



BIBLIOTECA NAZ.

Vittorio Emanuele III

XXIII

F

19

NAPOLI

XIII
7-19



No.

PHILOSOPHIAE
WOLFIAE
CONTRACTAE
TOMVS I.
LOGICAM ONTOLOGIAM
ET
COSMOLOGIAM GENERALEM
COMPLECTENS

CVM PRAEFATIONE
CHRISTIANI WOLFII
FRIDERICIANAE CANCELLARII



IN
LVCEM EDITVS
A



IOANNE FRIDERICO STIEBRITZ
PHILOS. IN ACAD. HALENSI PROF. ORDIN.

HALAE MAGDEBVRGICAE
PROSTAT IN OFFICINA LIBRARIA RENGIERIANA.
MDCCXLIV.

ILLVSTRISSIMO ATQVE EXCELLENTISSIMO
V I R O

D O M I N O

D N. SAMVELI
DE MARSCHALL

SACRAE REGIAE MAIESTATIS ADMINISTRO
STATVS INTIMO

IN SVPREMO BELLI AC REDITVVM PVBLICORVM REGIMINE

VT ET ECCLESIAE CATHEDRALIS ET ILLVSTRIS

GYMNASH IOACHIMICI DIRECTORI

SVPREMO CVRSVS PVBLICI MAGISTRO

CAPITVLI HAVELBERGENSIS DECANO

REGIARVM ACADEMIARVM CVRATORI

DOMINO HEREDITARIO

EN DAHLWIZ MVNCHHOFF RAHNSDORFF TASDORFF
ETC. ETC

HANC

PHILOSOPHIAM CONTRACTAM

EA

QVA DECET

ANIMI SVBMISSIONE

D. D. D.

A V C T O R

V I R

ILLVSTRISIME ATQVE EXCELLENTISIME,



On sunt mihi rationes e longin-
quo petendæ, quare fores
TVAS pulsare, præsentique
libro ILLVSTRISIMVM TVVM NO-
MEN præfigere sustineam. Cum enim PO-
TEN-

TENTISSIMVS PORVSSIAE REX
TIBI, præter alia grauissima negotia, academi-
arum curam demandauerit; quod nostris
præsertim musis perquam salutare accidit; at-
que ego sub hac tutela insigni plane TVA
gratia hucusque fruitus sim: recte me factu-
rum esse existimaui, si quaecumque diligen-
tiæ meæ specimen, in lucem exire iussum,
TIBI, VIR ILLVSTRISIME, offer-
rem ac submississime ante pedes TVOS de-
ponerem, firmiter persuasus, TE meum
hunc conatum consueta TVA gratia esse pro-
secuturum. DEVM vero OPTIMVM
MAXIMVM precor, vt TE, VIR IL-

LVSTRISIME, quam diutissime supereſſe
finat, innumeris animæ pariter, et corporis
bonis cumulatum. Sic habebit REX CLE-
MENTISSIMVS prudentiſſimum re-
rum, ad pacem bellumque pertinentium,
Adminiſtrum; patria atque vniverſa respu-
blica firmiſſimum fulcrum; Illuſtriſſima
TVA, quam DEVS ſeruet, gens ſplendi-
diſſimum ornamentum; muſæ venerabun-
tur Mæcenatem gratioſiſſimum; nec mihi
deerit indulgentiſſimus Patronus, ſtudiorum
promotor, proteſtor, fortunæque conditor.
Scripſi d. 12. April. MDCCXLIV.

CHRI.



CHRISTIANI WOLFII,
FRIDERICIANAE CANCELLARII,
PRAEFATIO.



Postquam Philosophiam methodo demonstratiua tradere aggressi sumus, statim animaduertunt plurimi, quantum intersit nostro, et communi more philosophari. Perplacuit, quod in operibus nostris deprehenderent definitiones terminorum perspicuas et propositiones determinatas, quibus ad ratiocinandum distincte et accurate opus habemus, et quas solas in futurum usum memoriae fideli mandare tenemur, ut didicerimus, quæ per omnem vitam usui sunt. Facile enim præiuderunt, hoc modo Philosophiam lucem præferre in omnibus negotiis humanis, ne in tenebris dubiis pedibus tentantes labent, et in facultatibus, quas dicere solemus, superioribus eodem

dem munere fungi, quod sol exequitur in orbe terrarum. Nemo arroganter dictum existimet, quod verissime dicitur, et unusquisque de se experiri potest, nisi nimis longum ac difficile videatur experimentis duci ad consentiendum. Non mea res agitur, cum ab ista temeritate quam longissime sim remotus, ut per imprudentiam mihi tribuam, quæ Philosophiæ sunt, illius muneris, quo nihil præstantius a Deo datum est hominibus. Placuit præterea solertioribus et acutioribus, quod, si nostro more philosophentur, non fluctuante animo imbibant opiniones fallaces et haud raro discordes, sed assensus lubricos potius sustineant, donec veritatem in apicem productam funditus perspiciant. Placuit denique excelsis ingeniis, quod, qui nostro more philosophantur, in mundum rationalem ingrediantur, in quo pulcherrimum veritatum universalium nexum, quem oculis non possunt, animo contemplantur. Quamvis vero nobis propositum minime fuit, in medium asferre ea omnia, quæ ex principiis a nobis demonstratis deducere porro poteramus, multo minus in iis eruendis desudare, quæ procul ab iis remota sunt; sed intra eos terminos nos continuimus, quos præfixit usus a nobis intentus, cum his, quæ dedimus, magis ardua et abscondita aliorum industriæ reliquerimus abunde contenti a nobis ad eadem patefactum esse aditum, qui non per invidentiam ad pompam, sed per ingenuitatem ad generis humani utilitatem philosophamur; non tamen evitare potuimus, quo minus systema, quod condimus, et quod in immensum diffundi per se aptum est, in opus magnum abiret, præsertim cum nobis danda esset opera, ne de-

demonstrationibus parum adfueti, earum vim minime perciperent, aut difficultate eam percipiendi deterrerentur, siquidem concisiores dare voluissēmus, ac præterea consultum nobis visum fuerit ubivis ea annotari, quæ vel majorem lucem dictis affundere, vel eorum usum insinuare, vel ad altiora viam commonstrare poterant. Quamvis adeo parum justæ sint illorum querelæ, qui operis prolixitatem accusant, cum superflua in eodem contineri ostendere haud quaquam possint; non tamen improbandum est eorum desiderium, qui, cum opus integrum sibi comparare vel non possint, vel quibus otium non est ad idem perlegendum, in votis habent, ut *Systēma* contrahatur, ne ejus notitia ac usu destituantur. Non deerant itaque, quibus non inutile videbatur, si tantummodo definitiones ac propositiones exciperentur, omiſſis demonstrationibus ac scholiis, quod existimarent præstare utique, ut quis historica saltem cognitione veritatum in omni vita adeo utilem, et quæ non sine detrimento in Facultatibus superioribus ignorantur, imbutum habeat animum, quam ut earundem prorsus sit ignarus, quemadmodum *Mersennus* definitiones ac propositiones ex scriptis veterum Geometrarum sine demonstrationibus congeſſit. Hunc laborem profuturum quoque putabant ei, qui propositiones, quarum veritatem vi demonstrationum percepit, memoriæ crebra repetitione imprimere voluerit. Immo et si quis in demonstrationibus citatas definitiones ac propositiones evolvere voluerit, minori labore ac molestia easdem in libro uno, quam in multis evolvi posse judicabant. Enimvero et si in applicandis propositionibus nullum habeant

usum demonstrationes, quippe quibus tantummodo de earum veritate convincimur, ut adeo ad recte ratiocinandum iisdem commode utatur, qui eas saltem memoria comprehensas tenet, quemadmodum in praxi geometrica utitur propositionibus *Euclideanis*, qui earum demonstrationes nescit; negari tamen non potest, multo utiliore operam sumi in ipso systemate cognoscendo, in quo veritates inter se concatenatae exhibentur, ut earum mutua a se invicem dependentia agnoscatur, praesertim cum hoc studio simul habitus demonstrandi acquiratur: id quod ad rectam et promptam veritatum applicationem haud parum conducit. Magis itaque probandum est consilium Collegae nostri conjunctissimi, cl. *Stiebritzii*, viri longe doctissimi, quod de Systemate nostro contrahendo cepit. Non opus est, ut de eo dicam, cum ipse idem omnium optime aperire possit. Mihi sufficit monuisse, quod vir veritatis amantissimus et in ea propaganda studiosissimus, quemadmodum omni eruditionis genere excellit, ita etiam Philosophiae nostrae Systema, si quis alius, intime perspexit, ut in eo contrahendo operam utiliter ponere potuerit. Faxit Deus, ut veritas indies magis propagetur, et genus humanum eam consequatur felicitatem, quam sine veritatis agnitione consequi haud datur! Halæ. die sexta Aprilis A. O. R. MDCCXLIV.



IOANNIS FRIDERICI STIEBRITZ P R A E F A T I O.



Emini obscurum esse potest, Systema philosophicum, quod a Perillustri sui conditore *Wolfianum* appellatur, tot invenisse lectores, fautores, admiratores, immo etiam adversarios atque persecutores, ut eorum vix numerus definiri queat. Testantur id ipsum scripta germanico pariter atque latino idiomate elaborata, sæpius tum apud

Germanos, tum apud alios in exteris oris impressa, quæ non solum in eruditorum manibus versantur, verum etiam ab illiteratis, et sequioris quoque sævus hominibus, quam diligentissime evolvuntur. Neque mirum videri debet, cum partim extrinsecæ, partim intrinsecæ rationes in hac philosophia dentur, quæ plurimorum attentionem excitant. De extrinsecis iam non est, quod copiosius dicam; partim quia ex quorundam virorum celebrium libris, qui historiam philosophiæ Wolfianæ condiderunt, intelligi queunt; partim quia illorum honori inimicas esse censeo, qui magno molimine, irrito vero conatu, æternis tenebris sepeliri voluerunt Wolfianam philosophandi rationem. Præstat itaque, ut, his silentio involutis, de intrinsecis paullo enucleatius exponam. Docuerant quidem superioris ævi philosophi, indispen-

labilem esse veritatum philosophicarum usum, iisque destitutum minime gentium in aliis disciplinis rite proficere posse. At bone Deus! quanta obscuritate ipsorum scripta laborabant; quantis consequenter in tenebris versabantur his ducibus præeuntibus ad philosophandum animum appellentes? Si laboris satis patientes se præbebant: memoriam terminis obscuris maximeque vagis, propositionibusque neutiquam determinatis, cum cereo naso iure suo comparandis, onerabant, cunctis hisce infelici successu ad alia deinceps applicatis. Si vero laboris infiniti tædio mox capiebantur: omnem de habitu philosophandi acquirendo spem abjicientes, philosophiæ studio non ita multo post nuntium mittebant, philosophis quibuscunque ludibrio expositis, cachinnoque exceptis. Enimvero quia luce caruerunt prisca philosophi; facile est ad colligendum, eos de demonstrationibus vel nihil, vel parum fuisse sollicitos, sed contentos, dummodo una alteraque ratiuncula, quæ probabilitatem quamdam assertis conciliaverat, thesin suam stabilivissent. Quo vero factum, ut, quarumdam veritatum, sine quibus nec certitudo dari, nec ad maiora contendere potest, ignari manentes, viam nullomodo munirent, qua ad philosophandum in aliis disciplinis iri poterat. Possem, sicubi hoc opus esset, nisi que historia philosophica hoc satis superque comprobatum daret, multis hoc ostendere exemplis. Verum enimvero progredior nunc, potius ad *Wolfianæ philosophiæ* faciem, quæ serenior, nitidiorque comparet; decoram maiestatem in fronte gerit; et hinc plurimorum studia in se derivavit. Nullum legis terminum, nisi accurate definitum; nullam offendis propositionem, nisi satis determinatam; nihil præcipitur, nisi quod per antecedentia demonstratum; unumquodque debito loco deprehenditur extare; omnia inconcussis principiis sunt superstructa; non tam memoriæ, quam intellectus ratio habetur; hic numquam rerum varietate obruitur; verum, quod natura finiti intellectus requirit, successive a propositione una, quando tanquam certam eam agnovisti, ad alteram leniter deduceres. Qua ipsa ratione distincta, solida, et hinc certa cognitio lectori, a præjudiciorum sordibus vacuo, ingeneratur; ita ut sine voluptate *Wolfianos libros* e manu non dimittere, nihilque tædii, nisi propterea, quod, fatigatus legendo, ulterius progredi per vires non valeas, concipere possis.

Acce-


Accedit, quod quaecumque ab *illustri auctore* scripta sunt, manifestissimum usum, sive in posterioribus philosophiæ partibus, sive in Theologia, sive in Jurisprudentia, sive in medica arte, sive in communi vita, promittant. Experientia, optima rerum magistra, loquitur, eos demum, qui hac philosophandi ratione probe innutriti sunt, in aliis disciplinis omnia majori luci reddere, plurima ad certitudinem redigere, et disciplinarum pomœria proferre valere; dum alii sat habent, si propositiones, a magistris instillatas, memoria comprehenderint, atque in utramque partem de iis verba facere didicerint, de cetero in receptis semelque ductis lineis placide ac somnolenter subsistentes. Merentur hæc partim in discentium, partim in adversantium gratiam longius explicari, atque exstantissimis speciminibus, quomodo hæc philosophia superioribus, quas vocant, Facultatibus adjumento sit, iisque lucem roburque conciliet, confirmari; ipseque ego sub initium constitueram apud me, in præsentī hoc perutili labore defungi; a quo tamen per morbum hac vice avocatus jussusque sum, has curas usque ad finem huius mei laboris, si Deus eum mihi imponere concesserit, rejicere. Sufficiat ergo nunc vel saltem hæc commemorasse, et ad solidissima scripta Reinbeckii, Canzii, Carpovii, Ribovii, Reuschii, Wytenbachiique in theologia; Crameri, Schierschmidii et Kahlii in iure, Schreiberi in medicina benevolum lectorem ablegasse. Sed quæris ex me, *Lector Benevole*; cum hæc ita sese habeant, *Wolfiana*que omni laude majora, et sedula lectione dignissima sint: qui factum, ut ego Te ab istis abstrahere, atque ad *philosophiam contractam* vocare coner? Dicam, quod res est. Sunt alii in numero discentium, qui ex operibus *Philosophi*, patrio sermone conscriptis, non contemnenda hauserunt, aditum nunc ad majora parantes, quibus vero sub initium libri philosophici latine a Perillustri *Wolffo* exanti, uberiores, quam ut iis se pares deprehendant, videntur, adeoque librorum exasctatissimorum mole absterri se patiuntur. Iis ante omnia inservire volui, aliquid propositurus, quod inter brevitatem germanicorum scriptorum, et ubertatem latinorum medium locum occupet. Sic inveniuntur, ex meo labore, omnibus propositionibus necessariis, in latinis obviis; adfuerunt rigorosioribus demonstrationibus; docentur plura, quam quidem ex germanicis hauriri poterant;

terant; exemplis idoneis erudiuntur, ac magis magisque ad opera consummata *Wolfiana*, diurna nocturnaue manu volvenda, præparantur. Eo magis tamen iis discendum meus labor usui esse poterit, qui linguæ germanicæ expertes, fundamentis maxime necessariis juxta ductum *Wolfianum* instrui gestiunt. Hi, si mediocrem attentionem secum afferunt, voti sui facile compotes reddi, et deinceps ad ampliora progressum facere queunt. Sunt porro *alii*, qui indefessa diligentia eximios profectus ex ipsis latinis *Wolffi* sibi acquisiverunt; quibus vero sæpius iterata repetitione opus est, ne notiones adæquatæ in inadæquatas, completæ in incompletas, distinctæ in confusas, propositiones determinatæ in indeterminatas, abeant, immo ne prior obscuritas et ignorantia postliminio reducat. Si autem numquam non vasta opera latina *Philosophi* relegenda ipsis essent; verendum, ne, temporis angustia impediti, tam necessariam curam plane omitterent. Ejusmodi viris quam maxime consuli potest contractiori meo labore, ex quo sibi cuncta iterum repræsentare, et semel acquisitam distinctam cognitionem conservare queunt. Jam claret, tantum abesse, ut philosophiæ deditos de ipsis *Wolfianis* fontibus avellere tentem, ut potius tum discentes ad eos pellicere, et aptos reddere; provectiores vero in iis magis confirmatos efficere velim. Sed exierit se alius adhuc fructus, quem ex meo conatu sperare possum. Dantur haud pauci tum in nostris, tum in exterorum terris, qui, fama de motibus super *Wolfiano Systemate* excitatis, de clamoribus ortis, de multorum plausibus eius rei causa institutis, edocti, desiderio sciendi et pernoscenti, quidnam *Wolffius* doceat; quidnam peccaverit ille, quod tam favas persecutiones adversus se provocaverit; quidnam differat ab aliis philosophis; numque operæ pretium sit ipsius philosophandi rationem reliquis anteponi; accensi sunt: verbo; sunt, qui plus ex curiositate, quam soliditatis cupiditate, in scripta *Wolfiana* incidere volunt, ut et sibi et aliis, ea de re sciscitantibus, facere satis queant. Non inquiri jam, utrum probanda sint; quæ habent illi, mentis destinata; an vero damnanda: id tamen me defendere posse sustineo, quod, philosophia hac contracta utentes, sicim suam satis superque restinguere valeant. Ut adeo ipsis non opus sit inanibus, qui sæpe sparguntur, rumoribus fidem habere; aut aliis negotiis, quibus nunc distra-

istrahuntur, insuper habitis, vasta volumina ipsa evolvere. Satis solixus fui in declarando usu, quem meus labor fundere potest; nihil nunc restat amplius, quam ut ordinem edisseram tractandique modum, quem in concinnando hoc scripto adhibui. Et primo quidem nullam omisi *Auctoris* definitionem, nullam necessariam propositionem, sive ea axiomatica, sive theorematice esset; ita ut lectori hac ratione revera integrum *Wolffii* Systema, quoad singulas, ex quibus constat, partes promittere possim. Ac ut eo magis de eo gloriari quirem, ipsas voces, quibus *Philosophus* mentem suam significavit, maximam partem sine ulla mutatione retinui; ne illi, qui ipsa *Wolffiana* legerunt, vocum permutatione confunderentur. Immo eo usque fui scrupulosus, ut et in ipsa distinguendi ratione, *Auctori Perillustri* familiari, nihil quidquam immutaverim. Ut adeo nihil sit meum, omnia vero *Wolffii* ipsius heic deprehendantur. In philosophicis demonstrationes utramque paginam, post definitiones, facere, ii norunt, qui in Logicæ delicias sese abdiderunt. Hinc mearum iudicavi esse partium, non exsangues gratisque sumtas propositiones lectoribus meis adponere. Sed cum *Wolffianum Systema* in eo inter alia aliis antecellat, quod cuncta solidissimis argumentis roborata sint: vel demonstrationes ipsas, prouti ab earum *auctore* suppeditatæ erant, proposui, vel in compendium iis, quæ illico in mentem attenti lectoris veniunt, rescissis, eas misi; vel ubi facile indagari poterat demonstratio ab eo, qui antecedentia cogitate legerat, solos §. §. adjeci, ex quibus tota demonstratio compingi potest. Aliter tamen aliquo modo versatus sum in *Cosmologica de legibus notus* tractatione, ubi demonstrationes plurimas, eo quod a mathematicum, et imprimis Algebra, infcio intelligi nequeant, propositionibus solis retentis, omisi; ne plerisque lectoribus, utpote in hac palæstra non exercitatis, nauseam crearem viamque impeditam redderem. propria vero experientia didici, præcepta plurima vel accuratissimis definitionibus instructa, et indubitatis principiis inædificata, nihilominus incipientibus captu difficilia, immo etiam aliquando sterilia videri, nisi idoneis exemplis illustrentur, eorumque usus doceatur. Qua de causa omnem dedi operam, ut exemplis declararem, quæ sine iis ab imperitioribus intelligi nequibant; et non raro usum com-

mon-

monstrarem, qui ab hac vel illa propositione pendet. Me tamen non monente, quilibet largietur, mihi brevitati studendum, et necessaria tantum afferenda fuisse; quia *philosophiam Wolfianam CONTRACTAM* dare decreveram. Compendiosius enim exhibere volui, quæ scripta *Wolfiana* copiosius et fufius edisserunt. Oculis vero tuis, *Benevole Lector*, mei laboris se *Primus tomus* sistit, qui omnem *Logicam*, *Ontologiam* et *Cosmologiam*, præstantissimas utique maximeque fundamentales, scientias complectitur. Ipsa inspectio te docebit, hunc tomum, si molem spectes, vix tertiam paginarum partem *Wolfianorum* scriptorum conficere. Vnde facile dabis, eum *contractæ* philosophiæ *Wolfianæ* nomen iure meritoque tueri. Si otium vitamque Deus; rerum mearum moderator, ulterius concefferit: futuris *Lipsiensium* autumnalibus nundinis *Tomum secundum*, qui *Psychologiam empiricam* et *rationalem*, et totam *Theologiam naturalem*, illustrissimas plane philosophiæ partes, continebit, in compendium redactas, luci publicæ exponam: progressum deinde ad *Præcticam philosophiam*, in qua elaboranda *Auctor Perillustris* adhuc defudat, bono cum Deo, facturum. Nihil est, *Lector*, quod te amplius morer. Vtere fruerique hoc labore, maiora indies in veritate cognoscenda et applicanda incrementa cape, mihi que fave! Datum d. XIII. April. MDCCXLIV.



PHILOSOPHIA
RATIONALIS
SIVE
LOGICA,
METHODO SCIENTIFICA
PERTRACTATA
ET
AD USUM SCIENTIARUM
ATQUE VITÆ
APTATA.
PRÆMITTITUR DISCURSUS PRÆLIMINARIS
DE PHILOSOPHIA
IN GENERE.



DISCURSUS PRÆLIMINARIS
DE
PHILOSOPHIA IN GENRE
CAPVT I.
DE TRIPLICI COGNITIONE
HUMANA, HISTORICA, PHILO-
SOPHICA ET MATHEMATICA.

§. 1.

Sensuum beneficio, ad nos attenti, cognoscimus, quæ in mundo materiali sunt atque fiunt, & mens sibi conscia est mutationum, quæ in ipsa accidunt.

Fundamen-
tum cognitio-
nis historica.

§. 2.

Cognitio eorum, quæ sunt atque fiunt, siue in mundo materiali, siue in substantiis immaterialibus, *historica* adpellatur.

Ejus definitio.

§. 3.

Quæcumque sunt vel fiunt, non destituntur ratione, unde intelligitur, cur sint vel fiant. Adserti veritas attento & acumen adferenti per exempla patet; inferius vero in eius universalitatem inquiretur.

Fundamen-
tum cognitio-
nis philoso-
phica.

§. 4.

Cognitio rationis eorum, quæ sunt vel fiunt, *philosophica* dicitur.

Definitio ejus.

(Logica contracta.)

A

§. 5.

§. 5.

Differen-
tia
cognitionis
hist. & philos.

Differt cognitio philosophica ab historica. Hæc enim tantum versatur circa facti notitiam (§. 2.); illa vero rationem facti palam facit, ut intelligatur, cur istiusmodi quid fieri possit (§. 4.).

§. 6.

Datur histori-
ca cognitio
cognitionis
philosophicæ.

Potest equidem aliquis nosse, quam rationem facti alter alleget, quamque cognitionem philosophicam alter habet; ipse tamen demonstrare nequit, rationem facti ab altero allegatam esse eius rationem; adeoque ipse cognitione philosophica destituitur.

§. 7.

Historica est
philosophicæ
fundamen-
tum, adeoque
excolenda;

Si per experientiam stabiliuntur ea, ex quibus aliorum, quæ sunt atque fiunt, vel fieri possunt, ratio reddi potest: cognitio historica philosophicæ fundamentum præbet (§. 2. 4.). Ergo cognitio historica non est negligenda ei, qui ad philosophicam adspirat; præmitti potius, & constanter cum philosophica conjungi debet.

§. 8.

Præbet enim
amplissimum
usum.

Id non solum fieri debet in *physica*; sed etiam in omni alio cognitionis genere. In *philosophia prima* notiones fundamentales derivandæ sunt ab experientia, quæ cognitionem historicam fundat (§. 2.); *philosophia* quoque *moralis* & *civilis* inde principia petit; immo ipsa *Metaphisica* historicam quandam notitiam supponit. Neque solum cognitionis historicæ usum in *philosophia* asserimus; verum etiam eiusdem in *vita* utilitatem defendimus; utrumque experimur; sed suo loco constabit quoque ratio.

§. 9.

Fundamen-
tum cognitio-
nis mathema-
ticæ.

Quicquid finitum est, sua determinata gaudet quantitate. Experientia hoc loquitur; nec obscura ratio est. Finitum enim augeri minuique potest. Quatenus vero aliquid augeri minuique potest, eatenus quantitas eidem tribui solet. E. omni finito, qua finito, determinata quantitas tribuenda est. e. c. *calor meridians solis; aquæ in alveo fluminis decurrentis celeritas; attentio; virtus* &c.

§. 10.

Cognitio quantitatis rerum dicitur *mathematica*.

§. 11.

Qui novit quantitatem rei ab altero assignatam, is historiam habet cognitionem cognitionis mathematicæ alterius (§. 2. 10.). Si vero aliquis quantitatem rei ab altero assignatam demonstrare valet, is ejusdem cognitionem mathematicam perinde ac alter habet (§. 10.).

§. 12.

Differt cognitio mathematica cum ab historica, tum a philosophica (§. 2. 4. 10.).

§. 13.

Nonnunquam historica cognitio fundamentum præbet mathematicæ; nonnunquam philosophica. Res facti per exempla comprobatur. In elementis ærometriæ docui, quomodo Mathesis ad experimenta applicetur, nondum cognitæ causis physicis, & quomodo effectus viribus causarum proportionati demonstrantur. Utriusque igitur casus exempla ibidem occurrunt.

§. 14.

Veritatum mathematicarum datur etiam historica cognitio. Quæ enim in mathesi præsertim mixta per principia mathematica demonstrantur, per experimenta quoque doceri possunt. Qui igitur theorematum mathematicorum veritatem experiundo addiscunt, illi historicam sibi comparant notitiam eorundem (§. 2.); etsi demonstrationum ignari mathematica constituentur (§. 12.).

§. 15.

Facta natura subinde latent, ut non sua sponte se se offerant attendenti. e. c. lumen solare esse compositum ex luminibus heterogeneis, factum naturæ est; sed hoc factum maxime later. Sane ex circumstantiis experimenti, quo visui perceptibile sistitur lumen, demonstrandum est, illud esse compositum. Evincendum quoque est, lumina ista, ex quibus componitur, esse non minus simplicia, quam heterogenea. Eadem patent ex omni philosophia experimentalis; astronomia quoque lumen affundit; atque in psychologia & philosophia morali etiam exempla occurrunt.

Fij's defin'tio.
Datur cognitio historica cognitionis mathematicæ; potest vero etiam alter cum alio mathematicam communem habere. Differentia hujus cognitionis ab h. st. & philos. Uti cognitio historica & philos. in mathematica.

Datur historica cognitio veritatum mathematicarum.

Fun'tamentum cognitionis histor. arcane

§. 16.

Divisio cogni-
tionis histori-
cæ in commu-
nem & arca-
nam.

E. cognitio historica est vel *communis*, quæ est cognitio factorum naturæ, etiam rationalis, quæ patent; vel *arcana*, quæ est cognitio factorum naturæ, etiam rationalis, quæ latent (§. 1. 15.).

Addita est vox *rationalis*; quia ad facta naturæ etiam ea referuntur, quæ in substantiis immaterialibus finitis, veluti mentibus nostris, accidunt, & cognitionis hist. non minus objectum sunt, quam quæ in mundo materiali contingunt.

§. 17.

Infimus co-
gnitionis gra-
dus, qui et-
iam in vulgo
deprehendi-
ter.

Historica cognitio communis infimus est gradus cognitionis humane (§. 1. 2.). Hinc patet ratio, cur *cognitio vulgi, & ea, quæ in vita utimur, plerumque nonnisi historica sit*. Vulgo enim in his acquiescimus, quæ sensu duce nobis innotescunt. Et, si vel maxime rerum causas agnoscamus, & rationes; quia sensui palam fiuntur: non tamen distincte perspicimus, quomodo hæc alterius causa esse possit. e. c. cur *aqua igni* superimposita ebulliat, plerique ignorant.

§. 18.

Reductio co-
gnitionis hi-
storice arca-
næ ad commu-
nem.

Arcanam cognitionem historicam ars sæpius reducit ad formam communis. Artis enim operationes, perinde ac experimenta, facta naturæ sæpius in apicem producunt, quæ alias latent. E. cum cognoscenti perinde sit, siue natura sensui quædam offerat, siue ars eidem sistat: artis ope, sola attentione, acumine aliquando stipata, ad cognitionem hist. arcanam, perinde ac ad communem, pervenitur. E. arcana reducitur artis ministerio ad communem. e. c. *ignis* proprietates & effectus latentes ars fusoria metallorum exhibet; uti experimenta ope antice pneumaticæ instituta *aëris* latentes proprietates ac effectus revelant.

§. 19.

Ut ita phæ-
nomenorum
in arte.

Inde consequitur, *utile fore ad philosophandum, si phænomena in officinis artificum & alibi in arte* (e. c. in æconomia rurali) colligerentur & describerentur. Sic enim fundamenta cognitionis philosophicæ obtineremus (§. 7.).

§. 20.

Cognitio hist.

Si quis per rationem aliquid fieri posse agnovit; factoque expe-

expevimento idem fieri observat: is cognitionem philof. confirmat confi- mat phi-
lofophicam.
hiflorica. (§. 4. 2.). Qui enim dubitari poffet, aliquid fieri poffe,
quæ actu fieri observat (§. 7.)?

§. 21.

Si quantitas effectus viribus cauffe proportionata demonftra- Cognitio ma-
them. philof.
certam reddit.
tur, cognitio philof. a mathematica haurit omnimodam certitu-
dinem. Qui enim demonftrat, quantitatem effectus viribus
cauffæ proportionatam effe, is ejus habet cognitionem mathem.
(§. 10.); qui vero caufam effectus agnofcit, philofophicam (§. 2).
E. Si demonftrari poffit, quantitatem effectus non excedere vi-
res cauffæ, cui eandem tribuimus: mathematica cum philof.
confpirat. Quia autem evidentius constare nequit, effectum ab
aliqua caufa proficifci poffe, quam ubi conftat, quantitatem ejus
viribus cauffæ effe æqualem: cognitio philof. a mathematica
omnimodam certitudinem acquirit. Vid. præfat. ad Elementa
ærometria.

§. 22.

E. Cognitio mathematica cum philofophica conjungenda est, E. cum philof.
conjungatur.
fi fumma ftudueris certitudini.

CAPVT II.

DE PHILOSOPHIA IN GENERE.

§. 23.

P*hilofophia* est scientia poffibilia, quatenus effe poffunt.

§. 24.

Scientia est habitus afferta demonftrandi, h. e. ex princi- Philofophie
definitio.
piis certis per legitimam confequentiam inferendi. Scientiæ defi-
nitio.

§. 25.

In philofophia reddenda est ratio, cur poffibilia actum confe- Philofophia
reddit ratio-
nem, cur ali-
quid fieri pof-
qui poffint (§. 23. 24.).

§. 26.

Si ergo plura fuerint in aliquo casu poffibilia, philofophia Reddit quo-
que rationem,
docere debet, cur aliquid potius fiat aut fieri debeat, quam
A. 3

car unum po-
tius sit, quam
alterum.

Stude: certi-
tudini omni-
modæ.

Media cer-
titudinis obti-
nendæ.

Cognitio hi-
stor. & mathe-
mat. nexum
in philosophia
non turbat,
quando utri-
usque limites
rite sunt con-
stituti.

cetera (§. 3. 25.) e. c. possibilis est amor æque, ac odium in ini-
micum.

§. 27.

In philosophia studendum est omnimodæ certitudini. Philo-
sophia enim est scientia (§. 23.); in ea demonstrata sunt asserta
ex principiis certis legitima consequentia inferendo conclusio-
nes (§. 24.). Sed quæ hoc modo inferuntur, certissima sunt.
E. in philosophia, quæ est scientia, studendum est certitudini
omnimodæ.

§. 28.

*In philosophia itaque principia ab experientia derivanda,
quæ demonstrantur experimentis ac observationibus confirman-
da; & cognitioni mathematicæ una opera danda est.* (§. 27. 7.
20. 21.).

§. 29.

Pater inde quousque cognitio historica & mathematica in
philosophiam admittenda sit, nempe quatenus principia præbet
firma & examina decisiva cognitio historica, evidentiam autem
complet mathematica. Si limites hac ratione constituentur, co-
gnitio historica & mathematica non turbat veritatem in philosophia
nexum. In philosophia veritas una ex altera demonstrari de-
bet (§. 3.). E. Omnia, quæ in ea traduntur, continuo nexu co-
pulari debent. Si limites dicta ratione constituentur: 1) Co-
gnitio histor. principia firma præbet (§. 28.). Quamobrem
cum ceterorum inde ratio reddatur (§. 7.): cetera cum hisce prin-
cipiis cohærent; neque adeo cognitio hist. nexum in philoso-
phia hoc in casu turbat. 2) Eadem cognitio examina suppedit-
at, quibus deceditur, a veritate non esse aliena, quæ per ratio-
nes fuere demonstrata. E. Cum ista examina cum propositio-
nibus, quarum veritas iis confirmatur, non modo eadem ratio-
ne cohærent, qua demonstrationes earum cum ipsis conne-
ctuntur; verum etiam ipsamet ex veritatibus deducuntur &
cum demonstratis consentiunt: multis sane modis cum iisdem
cohærent, adeoque nec in hoc casu cognitio historica nexum
in philosophia turbat. 3) Denique, limitibus ita constitutis,
cognitio mathem. complet evidentiam, adeoque clarius demon-
strat, circa quæ scrupulus oriri poterat (§. 21.). Cum vero ube-
rior

rior & ulterior demonstratio nexum veritatum non turbet, sed firmiter copulet, & veritatibus ceteris plures connectat: nec cognitio mathem. hoc in casu impedit, quominus omnia in philosophia pulcherrimo nexu inter se cohaereant.

§. 30.

Philosophia, prouti a nobis definita est, esse numero eorum, quae impossibilia non sunt (§. 3. 25. 26.)

Datur philosophia.

§. 31.

Fieri quoque potest, ut philosophia (§. 23.) compotis reddamur. Hoc ipso facto patet ex philosophia, quam tradidimus.

Ea est in nostra potestate.

§. 32.

Possibilis etiam philosophia juris, medicinae, artium quarumcumque. Nam 1. in Jurisprudencia docentur leges; harum dantur rationes, cur potius haec, quam aliae in republ. sint ferendae. Est igitur quaedam scientia, quae explicat istas rationes, adeoque philosophia juris (§. 25. seq.). 2. In medicina agitur de sanitate, de morbis, de iis, quae sanitatem conservant, de remediis morborum. Sed dantur horum omnium rationes. Non impossibilis itaque scientia rationes istas exponens, adeoque philosophia artis medicae. 3. In quacumque arte alia non desunt rationes eorum, quae ibi sunt, unde non impossibilis est philosophia artium quarumcumque.

Philosophia juris, medicinae, artium.

§. 33.

Ipsa artis opera philosophicam cognitionem admittunt; quia rationibus suis non destituuntur (§. 32.) e. c. architectura civilis. Vide elementa mathematicae universae.

Opera artis ad philosophiam pertinent.

§. 34.

Si quorum philosophica nobis est cognitio, ea certiori successu ad casus in vita humana obvios applicantur, quam ubi eorumdem nonnisi historicam habemus. Quicquid de ente aliquo praedicatur, id non nisi sub certa conditione eidem convenit; sive conditio ista a definitione, sive aliunde petatur. Qui philosophica cognitione instructus, is novit rationem, cur aliquid sit, vel fiat (§. 4.), adeoque conditionem istam perspicit, sub qua aliquid de ente quodam enunciat, consequenter praedicatum non tribuit enti obvio, nisi ubi conditionem istam praesentem

Cognitionis philosophicae certior applicatio, quam historica.

rem perspicit. E. in applicatione, philos. cognitione imbuti, non aberramus; historica autem saltem instructi, ad conditionem istam vel prorsus non attendimus, vel minimum non integram perspicimus, cum sic saltem constet, aliqua esse vel fieri posse, nequaquam vero cur fieri vel esse queant (§. 5.). Fieri adeo solet, ut quotidie entialicui tribuamus, absente conditione, quod tamen eidem non competit. Sæpius ergo in applicatione aberratur. Cerrior E. successus est in applicatione cognitionis philos. quam historicæ.

§. 35.

Cognitionis
phil. major ex-
tensio, quam
historicæ.

Quorum philos. est cognitio, ea ad plures casus in vita humana obvios applicantur, quam ubi eorundem non nisi historicam habemus, si ratio ejus, quod speciei competit, in notione generis contineatur. Qui histor. habet cognitionem, novit, aliquid esse, vel fieri posse (§. 2.): quod ergo de subiecto certæ cujusdam speciei cognovit, id non admittit, nisi de subiectis aliis, ad eandem speciem pertinentibus. Quodsi tamen ratio ejus, quod tribuitur speciei, in notione generis contineatur; idem de toto genere, consequenter de omni alia specie ad idem genus pertinente prædicari debet. Historica igitur cognitione contentus ad res unius speciei applicat: quæ ad res plurium applicari debebant, consequenter ad casus pauciores, quam fieri poterat. Philos. vero pollens cognitione rationem eorum, quæ sunt & fiunt, perspicit, adeoque videt, num in notione generis, an speciei contineantur. Si ergo contingit, eam in notione generis reperiri; pluribus speciebus tribuit, quæ duce sola cognitione hist. de una tantum enuntiat.

E. c. Aqua movetur celerius, si alveus coarctetur, ut per minorem sectionem fluvii fluat, quam antea.

§. 36.

Cognitio phi-
los. est com-
pendiosior hi-
storica.

*Si ea, quæ cognitio historica ad casum specialem restringit, universalius enuntiarî possunt, cognitione philosophica propositio-
num numerus minuitur, ut cognitione minus ampla instructus ad plures casus sit paratus.* Qui philosophicam cognitionem habet, rationem ejus novit, quod ad casum specialem cognitione historica restringitur (§. 4.). E. cum non latet, quod ista in notione generis contineatur, Quamobrem cum de genere prædicari

dicari debeat, cujus ratio in ejus notione continetur: quæ cognitio historica ad certam speciem restringit, ea ad genus philosophica extendit (§. 35.). E. plures propositiones de diversis speciebus formandæ hoc modo ad unam reducuntur. Una vero cum jam satisfaciatur: pauciori cognitione instructus ad plures casus paratus est.

§. 37.

Cognitio philosophica animum voluptate perfundit, quam ab historica expectare non licet. Historica circa obvium est indifferens; circa inexpectatum versantes in admirationem rapimur. Sin talia adsint, quæ nosse interest, gaudemus, dum innotescunt; sed voluptas transitoria est. Rationibus autem cognitorum perspectis, mira voluptate perfunditur animus sciendi ac veri cupidus, olim reditura, ubi easdem denno mediteris. Hoc voluptatis genus palmam præripere experimur voluptatibus ceteris quibuscumque.

Voluptatem parit philosophica.

§. 38.

Philosophia ob usum cognitionis historica in casibus vitæ humanæ non est contemnenda (§. 34. 35. 36. 37.).

Philosophia non contemnenda.

§. 39.

Philosophus est, qui rationem reddere potest eorum, quæ sunt, vel esse possunt (§. 23. 25. 26.).

Philosophi definitio.

§. 40.

Major ergo philosophus est, qui plurimum rationem reddere potest; minor, qui pauciorum rationem novit.

Quinam major philosophus.

Hoc criterio philosophos distingues; aliæ differentie peti possunt a doctoribus.

§. 41.

Quia possibile tantus est numerus, ut unus homo rationem omnium minime perspicere possit; philosophus tamen non est, nisi qui rationem reddere potest eorum, quæ sunt, vel esse possunt (§. 39.): *nemo boninum in omnibus est philosophus.* Immo se ipsum examinans, *quam parum sit philosophus*, intelligit.

Nemo in omnibus est philosophus.

§. 42.

Nostri igitur philosophiæ notio a fastu revocat (§. 39. 41.).

Philosophi definitio a fastu revocat.

§. 43.

Si quis novit philosophiæ propositiones easque intelligit, earum (Logica contracta.)

Philosophiæ cognitio historica.

rum autem veritatem demonstrare nequit: is historicam habet philosophiæ cognitionem (§. 2. 24. 23. 39.).

§. 44.

Ad usum vitæ
est applicabi-
lia.

Qui historicam habet philosophiæ cognitionem, eam ad casus vitæ humanæ applicare valet (§. 43.). Quum enim propositiones philosophiæ intelligit; vel terminorum definitiones habet perspectas, vel minimum notiones rerum iisdem denotarum claras habet, adeoque sibi oblatas iterum agnoscit; consequenter si expressa in propositione conditio adsit, prædicatum in propositione subiecto tributum eidem convenire concludit. E. historicam cognitionem ad casus vitæ hum. applicat.

Philosophia eandem sortem experitur, quæ matheseos esse solet. Plurimi arithmeticam practicam exercent, qui operationum regulas demonstrare nequeunt. Agrimensores & architecti militares praxes quasdam geometriæ feliciter absolunt, etsi eas demonstrare non noverint.

§. 45.

Judex in contro-
versis phi-
losophicis qui
esse non pos-
sit.

Sola cognitione philosophiæ historica instructus de controversiis philosophicis judicare nequit. Judex enim ejusmodi demonstrare debet, num aliqua thesis controversa ceteris contradicat, an iisdem consentiat, aut num ex iisdem legitime deducatur. Cum vero ad hoc habitus demonstrandi s. scientia requiratur (§. 24.); sola autem cognitione philosophiæ historica instructus eadem careat (§. 43.): eundem de controversiis philosophicis judicare non posse evidens est.

§. 46.

Continuatur.

Multo minus igitur de controversiis philosophicis judicare valet, qui tantum cognitionem historicam habet cognitionis philosophicæ alterius (§. 6. 43. 45.).

§. 47.

Medius inter
cognitionem
philosophi-
cam & histori-
cam gradus.

Siquis theses philosophiæ, quarum historicam habet cognitionem, per experimenta atque observationes confirmare novit, utut demonstrationes non capiat: is medium quemdam gradum inter cognitionem historicam & philosophicam obtinet. Etenim sola historica cognitione instructus, propositiones philosophiæ tantum intelligit, earum autem veritatem non perspicit (§. 43.). Qui illas per experimenta & observationes confirmare valet, agno-

agnoscit, id fieri posse, quod posse fieri per rationem philosophus agnoscit (§. 20.). Quia tamen ipse rationem non percipit, philosophica cognitione destituitur (§. 4. 6.). Ejus itaque cognitio inferior est philosophica, superior tamen historica, adeoque inter utramque media.

CAPVT III.

DE PARTIBUS PHILOSOPHIÆ.

§. 48.

Entia, quæ cognoscimus, sunt Deus, animæ humane ac corpora seu res materiales. Si enim ad nos ipsos attendimus, quovis temporis momento nobis sumus conscii rerum extra nos præsentium & organa sensoria nostra ferientium; quilibet vero etiam sui ipsius conscius est. Id, quod in nobis sui ipsius conscius est, dicitur anima: res ceteræ extensæ, figuris & magnitudine a se invicem differentes, quas extra nos intuemur, corpora vocantur. Admittimus itaque duplex entium genus, corpora & animas humanas. Et quam primum statuimus, hæc entia non esse a se, seu propria virtute orta & perseverantia; autorem quoque admittimus, cujus virtute utrumque entium genus fuit productum. Is autor Deus appellatur.

Fundamentum partium philosophiæ.

§. 49.

Tres hinc enascuntur philosophiæ partes, quarum una de Deo, altera de anima humana, tertia de corporibus seu rebus materialibus agit (§. 48.).

Philosophiæ partes primariæ.

§. 50.

Ea pars philosophiæ, quæ de Deo agit, dicitur theologia naturalis; quæ est scientia eorum, quæ per Deum possibilia intelliguntur. Etenim philosophia est scientia possibilium, quantum esse possunt (§. 23.). Quamobrem cum in numero possibilium etiam ea sint, quæ Deo insunt, & per eum fieri posse intelliguntur: ideo theologia naturalis est scientia eorum, quæ per Deum possibilia sunt.

Theologiæ naturalis definitio.

Ea, quæ Deo insunt, sunt attributa, & quæ vi horum attributorum

per ipsum fieri posse intelliguntur, sunt operationes ipsius, e. c. creatio & conservatio universi. E. in theologia nat. agendum est de attributis ac operationibus Dei.

§. 51.

Psychologia
definitio.

Pars philosophiæ, quæ de *anima* agit, *psychologia* a me appellatur; quæ est scientia eorum, quæ per animas humanas possibilia sunt. Ratio definitionis patet, ut ante (§. 23.).

§. 52.

Physica defi-
nitio.

Pars denique philosophiæ, quæ de *corporibus* agit, *physica* salutatur; quæ est scientia eorum, quæ per corpora possibilia sunt (§. 23. 50.).

§. 53.

Fundamen-
tum logicæ &
philos. practi-
cæ.

Anima duplicem habet facultatem, cognoscitivam atque appetitivam; quod experientia confirmat. Nec minus patet, *utramque facultatem in suo exercitio aberrare posse*, nempe *cognoscitivam a veritate, appetitivam a bono*.

§. 54.

Logicæ defi-
nitio.

Ea philosophiæ pars quæ usum facultatis cognoscitivæ in cognoscenda veritate ac vitando errore tradit, *logica* dicitur; quæ est scientia dirigendi facultatem cognoscitivam in cognoscenda veritate.

§. 55.

Philos. practi-
cæ definitio.

Ea philosophiæ pars, quæ usum facultatis appetitivæ in eligendo bono & fugiendo malo inculcat, *philosophia practica* dicitur; quæ est scientia dirigendi facultatem appetitivam in eligendo bono & fugiendo malo.

§. 56.

Fundamen-
tum ethicæ &
politice.

Homo considerari potest vel quatenus est homo, vel quatenus est civis; aut prouti vivit in *statu naturali*, vel in *societate civili*. Hinc philosophia practica in duas partes dispescitur.

§. 57.

Ethicæ defi-
nitio.

Ea philosophiæ pars, in qua homo consideratur homo, appellatur *ethica*; quæ est scientia dirigendi actiones liberas in statu naturali, s. quatenus sui juris est homo, nulli alterius potestati subiectus.

§. 58.

Politice defi-
nitio.

Ea philosophiæ pars, in qua homo consideratur tanquam vivens

vivens in statu civili, *politica* vocatur; quæ est scientia dirigendi actiones liberas in societate civili.

§. 59.

Dantur præter societatem civilem *societates aliæ minores*, quibus etiam in statu naturali fuisset locus, veluti societates conjugialis, paterna, herilis, quæ simplicium, nomine venire solent.

Fundamentum æconomica.

§. 60.

Pars philosophiæ, in qua homo consideratur tanquam membrum societatis alicujus minoris, *æconomica* appellatur; quæ est scientia dirigendi actiones liberas in societatibus minoribus, quibus etiam extra temp. fuisset locus.

Oeconomica definitio.

§. 61.

Homo appetere nequit bonum, & averfari malum, quod non cognovit. Ea philosophiæ pars, in qua docetur, quænam actiones sint bonæ, quænam malæ, *jus naturæ* vocatur; quod est scientia actionum bonarum atque malarum.

Juris naturæ definitio.

§. 62.

Sunt quoque principia quædam generalia, unde omnis theoria & praxis philosophiæ practicæ pendet. Hoc ipso facto probatur.

Fundamentum philosophiæ practicæ universalis.

§. 63.

Ea philosophiæ pars, quæ generalem theoriæ & praxin philosophiæ practicæ tradit, a jme *philosophia practica universalis* appellatur; quæ est scientia affectiva practica dirigendi actiones liberas per regulas generalissimas.

Ejus definitio.

affectiva dicitur, quia flectit voluntatem ad appetendum & averfandum; *practica* audit, quia determinare docet facultatem locomotivam ad exequendum actiones internas.

§. 64.

Possibilis quoque est philosophia artium (§. 32.), quam appellare posses *Technicam* aut *Technologiam*; quæ est scientia artium & operum artis, aut, scientia eorum, quæ organorum corporis, manuum potissimum, opera ab hominibus perficiuntur.

Technologia definitio.

Specimen dedi de agricultura in tentamine *de vera causa multiplicandi frumentum*. Supponit hæc philosophia artium reliquam philosophiam.

am. Sunt enim regulæ artis veluti consecraria theoriarum philosophicarum.

§. 65.

Philosophia
artium libera-
lium.

Ipsarum quoque artium liberalium condi potest philosophia, si sc. eadem ad formam scientiæ redigantur. e. c. datur philosophia grammaticæ, in qua rationes redduntur regularum generantium ad grammaticam in genere spectantium, non habita linguarum specialium idionismi ratione. Sic oritur grammatica philosophi. Ita condi posset rhetorica, poetica &c. philosophica.

§. 66.

Fundamen-
tum & defini-
tio ontologiæ.

Sunt etiam nonnulla enti omni communia. Pars illa philosophiæ, quæ de ente in genere & generalibus entium affectionibus agit, ontologia s. philosophia prima dicitur; quæ est scientia entis in genere s. quatenus ens est.

§. 67.

Artis inveni-
endi definitio
& fundamen-
tum.

Dantur etiam regulæ, quibus intellectus dirigitur in veritate latente investiganda. Pars illa philosophiæ, quæ regulas istas dirigendi intellectum in veritate latente explicat, ars inveniendi dicitur; quæ adeo est scientia veritatem latentem investigandi.

§. 68.

Fundamen-
tum diversif-
icorum partium
physicæ.

Diversa sunt corporum genera, de quibus in physica agitur. Dantur corpora totalia, ex quibus tanquam partibus componitur mundus; dantur etiam partialia in totalibus obvia, e. c. fossilia, vegetabilia, animalia. Quamobrem physica in diversas partes dispescitur, quæ subinde peculiaribus nominibus insigniuntur.

§. 69.

Physicæ gene-
ralis definitio.

Ea physicæ pars, quæ de generalibus corporum affectionibus agit, pluribus eorundem speciebus communibus, physica generalis appellatur; quæ est scientia eorum, quæ corporibus vel omnibus, vel diversarum saltem specierum competunt.

§. 70.

Cosmologiæ
definitio.

Pars physicæ, quæ de corporibus mundi totalibus agit atque docet, quomodo ex iis componatur mundus, Cosmologia appellatur; quæ est scientia mundi, qua talis.

Quia

Quia corpora mundi totalia moventur, physici est reddere rationem motuum eorum. Pars cosmologiæ, quæ de motuum cælestium causis agit, a Keplero appellatur *Physica cælestis*,

§. 71.

Datur etiam generalis mundi contemplatio, ea explicans, Cosmologiæ quæ mundo existenti cum alio quocumque possibili communia generalis definitio. sunt. Ea philosophiæ pars, quæ generales istas notiones, easque ex parte abstractas, evolvit, *Cosmologia generalis* s. *transcendentalis* a me vocatur; quæ est scientia mundi in genere.

§. 72.

Psychologia & theologia naturalis nonnumquam *Pneumatica* nomine communi insigniuntur: & *pneumatica* per spirituum & metaphysicæ definitio. scientiam defini soler. Ontologia vero, Cosmologia generalis & pneumatica communi *metaphysicæ* nomine compellantur; quæ est scientia entis, mundi in genere atque spirituum.

§. 73.

Pars physiciæ, quæ de meteoris agit, *meteorologia* nuncupatur; quæ est scientia meteororum s. eorum, quæ in atmosphæra generantur, ut sunt pluvia, iris, fulgur, aurora borealis. *Meteorologiæ* definitio.

§. 74.

Pars physiciæ, quæ de fossilibus tractat, *oryctologia* vocatur, quæ est scientia fossilium. *Oryctologiæ* definitio.

§. 75.

Pars physiciæ, quæ de aqua agit, *hydrologia* appellatur; quæ est aquarum scientia. *Hydrologiæ* definitio.

§. 76.

Pars physiciæ, quæ de plantis agit s. vegetabilibus, dicitur *Phytologia*; quæ est scientia vegetabilium. *Phytologiæ* definitio.

Hæc habet diversas partes. *Botanologia* e. c. est ea physiciæ pars, quæ herbarum proprietates speciales ad rationes revocat. *Dendrologia* est ea physiciæ pars, quæ de arboribus singularia tradit. Est ergo *botanologia* scientia herbarum; *dendrologia* scientia arborum & fruticum.

§. 77.

Ea physiciæ pars, quæ de corpore animato, præsertim humano, agit, *physiologia* appellatur s. *œconomia animalis*, s. *medicina*. *Physiologiæ* & *pathologiæ* definitio.

chanica animalium; quæ est scientia corporis animati; strictius vero secundum medicos est scientia corporis humani sani. Alii tractationem physicam de homine in specie *Anthropologiam* vocant. Medicis *Pathologia* dicitur, quæ de corpore ægroto s. morbis, quibus affligitur, agit. Quia medicinæ quoque datur philosophiæ (§. 32.); *Pathologia* etiam *physica* admittenda. Et cum philosophi sit reddere rationem eorum, quæ sunt ac fiunt (§. 25.): physici quoque est reddere rationem eorum, quæ in corpore ægroti accidunt. Est ergo *pathologia physica* scientia corporis ægroti, qua talis.

§. 78.

Physicæ pars
nomine desti-
tuta.

Rerum naturalium duplices dari possunt rationes, quarum aliæ petuntur a causa efficiente, aliæ a fine. Quæ a causa efficiente petuntur, in disciplinis commemoratis expenduntur. Datur itaque præter eas alia adhuc philosophiæ naturalis pars, quæ finem rerum explicat, nomine adhuc destituta. Dici posset *Teleologia*.

§. 79.

Num plures
philosophiæ
partes den-
tur?

Absit, ut nobis persuadeamus, his partibus hætenus recensitis exauriri omnem naturæ thesaurum. Multæ disciplinæ philos. latent, suo tempore in apicem producendæ. Suffecerit nobis in id incumbere, ut ante omnia disciplinæ receptæ, sed male cohærentes ordinentur.

§. 80.

Ordo partium
philosophiæ.

Ordo partium philosophiæ is est, ut præcedant, ex quibus aliæ principia mutantur (§. 23. 24.). Si negas: priori loco ponendæ sunt, quæ ex aliis demonstrationum principia petunt. Utendum igitur erit terminis nondum definitis, & principiis nondum demonstratis, adeoque antequam nobis constet, eadem certa esse & immota. Sensum igitur propositionum non bene assequimur, nec de veritate earum sumus certi, quamdiu partes ceteræ non accedunt. Quam ob rem cum hoc scientiæ (§. 24.) repugnet, qualis philosophia esse debet (§. 23.); nec cum omnimoda certitudine consistat, cui in philosophia studendum (§. 27.): sancte custodiendus est ordo, quo prior locus cedit iis partibus, qui ceteris principia suppeditant, unde intelliguntur ac demonstrantur, quæ ibidem traduntur.

§. 81.

§. 81.

Si philosophiæ cum fructu operam navare decreveris, logica primo loco pertractanda. (§. 54. 27.). Quando logica primo loco tractanda.

Hoc usu etiam receptum est. Et sane logicæ ignarus, nescit, quæ ratione definitiones & demonstrationes sint examinandæ, adeoque facile admittit tanquam certa, quæ certa non sunt; immo admittit inanes sine mente sonos.

§. 82.

Si in logica omnia demonstranda, petenda sunt principia ex ontologia atque psychologia (§. 54. 66. 51.). Idem patet a posteriori. Logicæ principia.

§. 83.

Quodsi in logica omnia rigoroſe demonstranda, allatis rationibus geminis, logica ontologiæ atque psychologiæ postponenda (§. 82. 81.). Quando logica ontologiæ & psychologiæ postponenda.

§. 84.

Methodus demonstrativa requirit, ut logica post ontologiam & psychologiam tradatur (§. 83.); methodus autem studendi suadet, ut eadem omnibus philosophiæ partibus præponatur (§. 81.). Utrique methodo satisfieri nequit. Re igitur curatius expensa, cum intelligeremus, non posse logicæ imperitum in ontologia & psychologia utiliter versari; facillime tamen principia ontol. & psychol. in ipsa logica explicari posse, quibus opus est: methodum studendi præferre maluimus methodo demonstrandi.

§. 85.

Si in philosophia practica omnia demonstranda, principia peti debent ex metaphysica. De philos. practica vide (§. 55. 51. 25.) de jure naturæ tanquam ejus parte (§. 61.), & ethica (§. 57.) vide (§. 50.). De philosophia practica universali (§. 63.) notandum, in illa, uti experientia docet, semper recurrendum esse ad theol. nat. & psychol. Denique philos. practica rota carere nequit notionibus universalibus in ontologia evolutis (§. 66.) sua ergo principia philos. pract. sumit ex ontol. psychol. & theol. nat. quæ sunt partes Metaphysicæ (§. 72.). Philos. practicæ principia metaphysica.

(Logica contracta.)

C

§. 86.

E. metaphysi-
ca phil. practi-
cæ præmitten-
da.

Physicæ prin-
cipia meta-
physica

Metaphysica
physicæ præ-
mittenda.

Theol. natu-
ralis princi-
pia.

Cosmol. ge-
neralis prin-
cipia onto-
logica
Psychologiæ
principia on-
tol & Cosmo-
logica.

Partium me-
taphysicæ or-
do.

§. 86.

*Ergo metaphysica philosophiæ practicæ omni est præmit-
tenda, si ea demonstrativa ratione pertrahari debet (§. 85. 80.).*

§. 87.

*Si in physica singula sunt accurate demonstranda, principia
ex metaphysica petenda (§. 52. 71. 66. 72.).*

§. 88.

*Ergo physicæ metaphysica est præmittenda, si demonstrativa ra-
tione pertrahari debet (§. 87. 80.).*

§. 89.

*Si theol. nat. metodo demonstrativa tradenda, principia
ex cosmologia, psychologia & ontologia petenda (§. 50. 24.).* Im-
mota principia, ex quibus existentia Dei ejusque attributa firmiter
concluduntur, desumenda sunt a contemplatione mundi (§. 48.).
Quamobrem cum cosmologia generalis mundi contem-
plationem generalem tradit, unde ejus dependentia ab attribu-
tis divinis sit conspicua (§. 71.): theol. nat. principia ex Cosmo-
logia petit. Notiones attributorum diu. formamus, dum no-
tiones eorum, quæ animæ conveniunt, a limitibus liberamus.
Quare cum animæ cognitio ex psychologia hauriatur (§. 51.):
theologia quoque nat. principia ex psychol. desumit. Quia de-
nique notionibus generalibus, quæ in ontologia evolvuntur
(§. 66.), in demonstrationibus theol. nat. maxime opus est: ea-
dem non minus ex ontologia principia mutuatur.

§. 90.

*Si Cosmologia generalis metodo demonstrativa tradenda,
principiis ontologicis opus habet (§. 71. 66.).*

§. 91.

*Si psychologia metodo demonstrativa tradenda, ex cosmo-
logia & ontologia principia sumit.* Animæ comperit vis sibi re-
præsentandi universum convenienter mutationibus, quæ in or-
ganis sensorii contingunt. Quia vero vis illa distincte non
agnoscitur, nisi ex ontologia notionem vis in genere, & ex cosmol.
doctrinam de mundo generalem perspexeris (§. 66. 71.): ideo psy-
chol. ex cosmol. & ontologia principia sumere debet.

§. 92.

*In Metaphysica primum locum tuetur ontologia, secundum
cosmolo-*

cosmologia generalis, tertium psychologia, & ultimum theologia naturalis (§. 80. 89. 90. 91).

§. 93.

Physica Teleologia præmittenda (§. 78.). Ipso facto docemur, rationes finales tum demum patere, ubi causæ efficientes fuerint perspectæ, ita ut ex physica petantur principia demonstrationum teleologicarum. Jam vide §. 80.

Physica Teleologia præmittenda.

§. 94.

In teleologia cognitio Dei ex theologia naturali hausta confirmatur. In illa explicantur fines rerum natural. (§. 78.). Quia itaque finis primarius in eo consistit, ut ex opere agnoscat conditor ejus, Deus; adeoque mens ex contemplatione rerum naturalium in Deum ascendat (§. 50.): in Teleologia quoque doceri debet, quomodo Deus ex rebus naturalibus agnoscat. Argumentis hinc petitis cum confirmentur, quæ in theol. nat. de Deo fuere demonstrata: evidens est, cognitionem Dei ex theol. nat. haustam in Teleologia confirmari.

Ufus teleologia in cognitione Dei.

§. 95.

Teleologia post theologiam nat. pertractanda. In illa enim cognitio Dei ex theol. nat. hausta tantum confirmatur (§. 94. & §. 50.).

Cur post theol. nat. tractanda.

§. 96.

Philosophia practica universalis ethica, æconomica atque politica præmittenda (§. 63. 55. 57. 58. 60. & 80.). Sunt sc. commemoratæ scientiæ tantum partes speciales philos. practicæ.

Philos. pract. universalis quibus disciplinæ præmittenda.

§. 97.

Ethica æconomica, æconomica politica præmittenda. Oeconomica enim supponit principia in ethica demonstrata; in politica vero supponuntur, quæ tum in ethica, tum in æconomica docentur (§. 80.).

Ethica, æconomica & politica quo ordine tractanda?

Quodsi jus nat. ab ethica, æconom. & politica separet: ius nat. his omnibus, tanquam theoria praxi (§. 61.), præmitti debet.

Jus nat. quo loco tractandum?

§. 98.

Philosophia practica statim post metaphysicam tractari potest (§. 85.). Quæ vero ex physica petuntur, ea tanquam per experientiam cognita sumi possunt. Nil ergo impedit, quo minus philos. practica statim post metaph.

Philos. pract. cur post metaph. tractari queat?

§. 99.

Cur physica
statim post
metaphysicam
tradi queat?

Physica statim post metaphysicam tradi potest (§. 48-63. 72. 88.). Quia physica ex philos. pract. principia nulla mutuatur, non opus est, ut ea ipsi præmittatur (§. 80.). Potest igitur statim post metaphysicam tradi.

Perinde ergo est, siue physica s. philos. pract. priori loco tractetur. Quia tamen teleologia principia ex phil. pract. supponit (§. 80.); teleologia autem physice pars est (§. 78.): consultius videtur, ut physica integra demum post philos. practicam tradatur.

§. 100.

Physicæ exper-
imentalis de-
finitio & fun-
damentum.

In physica reddenda est ratio eorum, quæ per corpora fieri possunt (§. 52. 24.). Paret autem ex demonstrationibus cosmologicis, nos ad rationes ultimas pervenire non posse, adeoque in iis acquiescendum esse, quæ a causis proximis derivantur. Principia igitur ab experientia petenda, unde aliorum, quæ fiunt, ratio reddi potest: quæ cum non semper per observationes pateant, per experimenta sunt in apicum producenda. Ea præterea, quæ demonstrantur in physica, experimentis confirmanda (§. 27. 28.), & acquisito hinc gradu intermedio inter cognitionem hist. & philos. ad ipsam scientiam physicam præparatio fieri debet (§. 47.). Ea igitur philosophiæ pars, quæ per experientiam stabilit principia physicæ, ibique tradenda illustrat, *Physica experimentalis* vocatur; quæ est scientia per experimenta stabiliendi principia, unde ratio redditur eorum, quæ in natura rerum fiunt.

§. 101.

Physica dog-
matica quæ-
nam dicatur?

Physica experimentalis introducta, nomen physicæ generale esse cepit. Ut ergo scientia, quæ hoc nomen olim acceperat (§. 52.), a physica experimentalis distingueretur; *physica dogmatica* appellari sinit.

§. 102.

Experimenta-
lis præmit-
tenda dogma-
tica.

Physica experimentalis dogmatica præmittenda (§. 100. 80.).

§. 103.

Experimento-
rum ordo.

Experimenta eo ordine sunt digerenda, ut ex anterioribus ratio sequentium reddi possit. Hoc fieri posse, expertus sum; fieri debere, constat ex §. 100.

§. 104.

§. 104.

In psychologia reddenda est ratio eorum, quæ per animas humanas possibilia sunt (§. 51. 24.). Quia ex psychologia demonstrationum principia cum in logica (§. 82.) atque arte inveniendi (§. 67.) tum etiam in philos. pract. petuntur (§. 85.); istarum vero disciplinarum certitudo maxime nobis curæ esse debet: ideo in psychologia quoque consultum est, ut principia tam momentosa per experientiam constituentur (§. 28.), & perinde ac in physica experimentalis (§. 103.) eo ordine digerantur, ut sequentium ratio per antecedentia pateat. Hinc *psychologiam empiricam* philosophiæ partem fecimus, in qua per experientiam stabiliuntur principia, unde ratio reddi possit eorum, quæ per animam humanam fieri possunt. Definuit ergo, quod sit scientia stabiliendi principia per experientiam, unde ratio redditur eorum, quæ in anima humana fiunt.

Psychol. empiricæ fundamentum & definitio.

§. 105.

Postquam psychol. empiricam ab ea distinguere cæpi philosophiæ parte, quam supra (§. 51.) definivi, huic *psychologiæ rationalis* nomen imposui.

Psychologia rationalis quænam dicatur?

§. 106.

Technologia ex physica, præsertim experimentalis, principia mutuatur (§. 64.). Ars versatur circa corpora natur. quorum cognitio ex physica petenda (§. 52.). Rationem igitur redditurus eorum, quæ arte fiunt, ad physicam recurrere debet. Insuper multus in arte occurrit instrumentorum apparatus, de quorum structura & usu ex principiis mechanicis iudicium ferri debet. Ista principia in physica experimentalis per experimenta declarantur & confirmantur. Rationem itaque redditurus eorum, quæ arte fiunt, ad physicam experimentalem recurrere debet. Præterea hæc experimentalis stabilis principia physica (§. 100.). Evidens adeo est, quod Technologia ex physica, præsertim experimentalis, principia mutuatur.

Technologiæ principia.

§. 107.

Technologia post physicam tractanda (§. 106. 80.).

Physicæ postponenda.

CAPUT. IV. DE METHODO PHILOSOPHICA.

§. 108.

Methodi philosoph. definitio.

Methodus philosophica est ordo, quo in tradendis dogmatibus uti debet philosophus.

§. 109.

Cur omnes termini explicandi?

In philosophia non utendum est terminis nisi accurata definitione explicatis. Tunc enim singularum propositionum sensus est manifestus. Cum vero philosophia sit scientia (§. 23.): cuncta demonstranda in ea sunt (§. 24.). Quia autem thesibus demonstrari nequit, antequam ejus sensus sit certus: omnium propositionum philosoph. certus esse debet sensus, adeoque utendum est terminis accurata definitione explicatis.

§. 110.

Principia philosoph. qualia esse debeant.

In philosophia utendum est principiis sufficienter probatis (§. 23. 24. & 27.).

§. 111.

Quænam propositio in philosophiam admittenda.
Ordo definitionum.

In philosophiam propositio nulla admittenda, nisi quæ ex principiis sufficienter probatis legitime deducitur (§. 23. 24. 110.).

§. 112.

In philosophia termini, qui ingrediuntur definitiones sequentes, explicari debent per antecedentes. In philosophia studendum est certitudini (§. 27.). Si in definitione utamur termino nondum explicato, in ejus vero sensu hæremus, ut eam plene intelligere nequeamus. Quare cum hoc certitudini obstat, terminis non utendum est, nisi in anterioribus definitionibus jam explicatis. Et si autem obstaculum removeatur, ubi in sequentibus definitionibus explicantur termini, qui ingrediuntur priores: id tamen adhuc incommodi est, quod tædioso labore inquirendum sit, num forsitan circulus vitiosus fuerit commissus. Quamobrem cum hinc denuo lectori dubium subnasci possit certitudini intentæ (§. 27.) adversum: nemo negabit, præstare, ut termini, qui ingrediuntur definitiones sequentes, in anterioribus jam fuerint explicati.

§. 113.

§. 113.

In philosophia propositiones, quæ ingrediuntur demonstrationes sequentium, demonstrari debent in antecedentibus. In philosophia studendum est omnimodæ certitudini (§. 27.). Si ergo demonstrationem ingreditur propositio tanquam principium, quæ in anterioribus nondum fuit demonstrata, dubium est, an ea sit vera, an falsa. Cum vero id omnimodæ repugnet certitudini, propositiones in anterioribus demonstrandæ sunt, quæ posteriorum demonstrationes tanquam principia ingrediuntur. Quamvis autem illæ propositiones in sequentibus demonstrantur, quas in anterioribus tanquam veras supposuimus: id tamen incommodi remanet, quod tum denum tediose inquirendum sit, num forsitan circulus vitiosus in demonstrando fuerit admissus. Cum vero hinc iterum dubium certitudini adversum subnasci possit (§. 27.): quis inficiabitur, in anterioribus demonstrandas esse propositiones, quæ demonstrationes sequentium ingrediuntur.

Ordo propositionum.

§. 114.

In propositionibus philosophicis conditio accurate determinanda, sub qua prædicatum convenit subjecto, s. sub qua aliquid de re aliqua affirmatur vel negatur. In philosophia reddenda est ratio, cur possibilia actum consequantur (§. 26.) consequenter cur aliquid de re aliqua affirmari vel negari debeat. Si ergo ratio, cur prædicatum convenit suo subjecto, vel in definitione, vel in conditione aliqua contineatur: philosophus monstrare debet, quomodo vi istius vel definitionis, vel conditionis prædicatum subjecto conveniat. Quare propositionem ita efferre debet, ut appareat, num vi definitionis, vel conditionis alicujus, prædicatum ei tribuatur, adeoque conditio accurate determinanda, nisi vi definitionis, consequenter absolute, eidem competat.

Propositio-
nam philoso-
phicarum for-
ma.

§. 115.

Propositiones philosophicæ, in quibus conditio accurate determinatur, sub qua prædicatum subjecto tribuitur, sunt cum ad scientiam, tum ad vitam utiles. In scientia utimur propositionibus ad ratiocinandum propositiones demonstraturi. Si ergo nobis innotuerit conditio, sub qua prædicatum tribuitur subjecto:

Propositio-
num genuinæ
formæ utili-
tas.

num-

numquam propositione ista utimur tanquam principio in ratiocinando, nisi ubi vel vi assumtorum, vel vi eorum, quæ demonstrata sunt, conditio illa adesse intelligitur. Sicque vi propositionum ante cognitarum inferre licet alias nondum nobis perspectas. *In vita* propositionibus utimur de rebus obvis iudicaturi. Si igitur in iis accurate fuerit expressa conditio: numquam prædicatum rei obviæ tribuis, nisi ubi conditionem istam adesse intellexeris. Immo si definitio conditionis loco fuerit: ex illa (§.109.) subiectum obvium agnoscitur, & prædicatum non nisi ei tribuitur, cui definitio competit (§.34.).

§. 116.

Demonstrationis materia.

In demonstrationibus non plura contineri debent, quam quæ leſſori antecedentium gnaro sufficiunt ad revocandum cetera in memoriam, ad ratiocinium complenda requisita (§.112. seq.).

§. 117.

Ordo demonstrationis.

Singulæ propositiones in demonstratione eo ordine collocari debent, quo subeunt animum demonstrationem concipientis. In Logica ostendemus, omnem demonstrationem constare ex determinato quodam ratiociniorum numero, certa quadam ratione inter se connectendorum, ut conclusiones syllogismorum præbeant præmissas sequentium. Hinc constabit, omnes propositiones certo quodam ordine animum demonstrationem concepturi subire debere: quod cum necessarium sit ad certam cognitionem (§.27.); quis neget, eo ordine collocari debere propositiones, quo in demonstratione concipienda animum subire debent, cum alterius ordinis nulla profus sit ratio?

§. 118.

Cur probabilis a certis distinguenda.

Si qua cognitu utilia demonstrari nequeunt, eorum probabilitas convenienti ratione adstruenda, ipsa autem probabilis a certis probe distinguenda (§.27.). Alia demonstratio peti potest ex §. 110. 111.

§. 119.

Hypotheses philosoph. definitio.

Si qua in philosophia sumuntur, quod per ea ratio reddi possit quorundam phaenomenorum, etsi demonstrari non possit, in iis rationem veram contineri; ea hypotesin philosophicam, constituunt; quæ est sumtio eorum, quæ esse nondum

dum demonstrari potest, tanquam essent, rationis reddendæ gratia.

§. 120.

Hypothesibus philosophicis in philosophia locus concedendus, quatenus ad veritatem liquidam inveniendam viam sternunt. In hypothesibus philosophicis sumimus quædam, de quibus non constat, num sint, ac si ea essent, quia rationem inde reddere licet eorum, quæ fieri observamus (§. 118.). Quodsi plura inde deducantur, quam quæ fieri observavimus; ansam inde arripimus vel observandi, vel per experimenta detegendi ea, de quibus alias ne quidem cogitasset, ut certiores evadamus, num quædam inde fluant, quæ experientiæ repugnant. Et enim si qua inde deducuntur, quæ experientiæ contraria sunt; hypotheseos falsitas apparet; si vero eadem eidem consentanea deprehenduntur, ejusdem probabilitas crescit. Via igitur hic sternitur ad veritatem liquidam inveniendam. Enimvero dum videmus, ex assumtis reddi posse rationem eorum; quæ fieri observamus: ansam porro arripimus inquirendi in ea, quæ sumimus, an revera in his ratio contineatur: Unde denuo via sternitur ad veritatem liquidam perveniendi.

Hypotheses philosoph. quo loco habende.

§. 121.

Hypotheses non ingredi debent tanquam principia demonstrationem propositionum, quæ in philosophiam tanquam dogmata admittuntur (§. 119. & 117.). E. c. harmonia præstabil.

Hypothesium abusus quomodo præcaveatur.

§. 122.

Si ex ante positis nondum constet, hypothesin aliquam in natura verum obtinere, ex iis tamen quædam in eadem demonstrari possint: nil obstat, quominus demonstratio afferatur. Propositionum in philosophia is esse debet ordo, ut unicuique is cedat locus, ubi ea ex antecedentibus demonstrari potest (§. 113.). Quam ob rem si in aliqua hypothesi ex præcedentibus quædam demonstrari possint: eorum demonstratio ibidem tradenda, tanto facilius intelligenda, quod ejus principia adhuc recenti memoriæ inhaereant. Et si autem hypothesin in natura rerum obtinere per præcedentia nondum constet: nil tamen periculi hinc metuendum, cum in data hypothesi demonstrata nullibi applicentur, nisi ubi eandem obtinere reperimus: Quodsi eam

Hypothesin ad huc incerta quinam sit locus?

(Logica contracta.)

D

pror-

prorsus impossibilem deprehendamus, negamus idem, quod in ea fuerat demonstratum. Atque ita propositio hypothetica usum habet in errore refellendo. Nil itaque obstat, quo minus demonstrentur, quæ ex hypothesi aliqua consequuntur, ubi principia sufficientia adsunt, etsi ipsam hypothesin possibilem esse nondum constet, immo etsi eam per sequeantia impossibilem esse deprehendamus.

E. c. etsi in ontologia nondum demonstrari possit, *ens simplex* proprie sic dictum dari vel possibile esse; id tamen non obstat, quo minus ibidem demonstretur, quæ ex notione entis simplicis consequuntur. Saltim videmus, quid de *compositis* negandum.

§. 123.

Determinatio
prædicati in
propositioni-
bus philoso-
phicis.

In propositionibus philosophicis prædicatum accurate determinandum, ne scilicet subiecto plus tribuatur, quam per ante posita de eodem demonstrari potest. Si enim plus tribuitur subiecto: aliquid gratis asseritur (§. 111. 113.), & vitium subreptionis admittitur.

E. c. si quis demonstret, dari ens necessarium; nondum dici potest, dari Deum, qui sit mundi autor ex nihilo producti.

§. 124.

Cur subinde
minus de-
monstratur,
quam rei
competit.

Hinc porro sequitur, *subinde minus de re aliqua demonstrari debere, quam eidem competit.* Si minus dato in loco demonstrari possit, quam eidem competit, eo tamen ad demonstrandum alia habemus opus, utique id tantum demonstrari debet, quod potest, ceteris in alium locum opportuniorē reiectis.

§. 125.

Ordo per
omnem phi-
losofiam.

In omni parte philosophiæ is tenendus est ordo, ut ea præmittantur, per quæ sequentia intelliguntur & demonstrantur, vel minimum probabiliter adstruuntur (§. 112. 113. 117.).

§. 126.

Methodi phi-
los. lex supre-
ma.

Quoniam philosophica methodus est ordo, quo in tradendis dogmatibus uti debet philosophus (§. 108.); ordo vero is tenendus est, ut ea præmittantur, per quæ sequentia intelliguntur & demonstrantur, vel minimum probabiliter adstruuntur (§. 127.): hanc *supremam methodi philosophicæ legem esse apparet, quod*

quod ea sint præmittenda, per quæ sequentia intelliguntur & ad-
struuntur.

§. 127.

Idem cum ordo tenendus sit in tradendis partibus philoso-
phiæ (§. 80.), unus idemque ordo est per philosophiam universam,
ejusque hæc lex communis, quod præcedere debeant, unde quomodo-
cunque pendet cognitio sequentium.

Lex commu-
nis philoso-
phiæ toti ac
linguæ ejus
partibus.

§. 128.

Si quis methodo philosophica philosophiam tradere velit,
is & regularum logicarum apprime debet esse gnarus, & habitu
pollere eandem ad praxin transferendi (§. 109. 110. 111. 114. 123. 126.
117. 116.). Hæc omnia vero tradit Logica.

Methodi phi-
los. praxis un-
de pendeat.

§. 129.

Si quis alia, quam philosophica methodo, philosophiam tradere
intendit: is ea tradet, quæ nec sufficienter intelligi, nec evidentè ve-
ra agnoscì possunt (§. 109. 112. 110. 113. 116.).

Damnum ex
neglectu me-
thodi philos.
ortum.

§. 130.

Hinc sequitur, neglecta methodo philosoph. nullam certam
ac distinctam obtineri cognitionem (§. 129.).

Damnum al-
terum.

§. 131.

Si quis philosophiam alia, quam philosophica methodo tradit,
is docet, quæ ab usu vitæ abhorrent, s. quæ ad casus vitæ humana
non commode applicari possunt (§. 129. 114. 115.).

Damnum ter-
tium.

§. 132.

Methodi Philosoph. eadem sunt regulæ, quæ methodi mathe-
maticæ (§. 109. 110. 111. 114. 123. 126. 116. 117.). Ex nostra commen-
tatione de methodo mathem. & ipsa matheseos accurata tractatione,
qualem offerunt elementa nostra matheseos universæ, liquet, in
tradenda mathesi ea omnia præstari, quæ in §. cit. requisita
sunt ratione methodi philos. vide illius commentat. §. 17. 18. 14.
30. 199. 49. 199. 43. 45 199. 44.

Identitas me-
thodi philos.
& mathemat.

Hæc identitas methodi ex eo pendet, quod utrobique regulæ me-
thodi ex notione certitudinis deducantur. Vide supra §. 27. Phi-
losophia ergo methodum suum non mutuatur a mathesi; sed perinde ac
mathesis eam ex veriori Logica haurit.

CAPUT V. DE STYLO PHILOSOPHICO.

§. 133.

Syllogismus philosophicus.

Stylus philosophicus est genus scribendi, quo uti debet philosophus.

§. 134.

Ejus suprema lex.

In stylo philos. non habenda est ratio rei alterius, quam ut alteri animi nostri sensa aperiamus (§. 109-111.).

§. 135.

Receptus verborum significatus cur retinendus.

In philosophia igitur a recepto verborum significato non est recedendum, hoc est, verbis non res aliæ a nobis denotandæ sunt, quam quæ iisdem vulgo significantur (§. 134.). Alioquin enim aut mentem nostram prorsus non assequi potest lector, aut minimum difficulter, prout vocis vel nulla a nobis datur definitio, vel definitio lectori non semper animo observatur. Verborum igitur significatus mutatio in alienum perspicuitati officit, quæ stylo philosophici propria esse debet.

§. 136.

Constantiæ loquendi necessitas.

Ejusdem vocis idem constanter esse debet in philosophia, saltem in eadem ejus parte, significatus (§. 134.). alia adhuc est ratio: In philosophia propositiones sequentes demonstrantur per præcedentes (§. 113.). E. In sequentibus idem debet esse vocum significatus, qui fuerat in antecedentibus: alias enim fieri nequit per leges artis ratiocinandi in logica tradendas, ut propositiones anteriores ingrediantur demonstrationes posteriorum.

§. 137.

Vocum a significatu vago ad fixum reductionis.

Si ergo per inconstantiam loquendi vocis cujusdam significatus sit vagus & indeterminatus, in philosophia is ad determinatum reduci debet. A recepto quidem significato non est recedendum (§. 135.). & sic retinendus videtur significatus vagus & indeterminatus, ubi usu fuerit receptus. Sed cum etiam constans esse debeat ejusdem vocis significatus (§. 136.), adeoque determinatus, non vagus: ab inconstantia loquendi recepta est recedendum. Cum ergo utrumque fieri nequeat: exceptio fieri debet

debet ab alterutra regula. Quia vero loquendi inconstantia a methodo philos. prorsus abhorret (§. 136.); exceptio fieri debet a regula priori, quæ receptum usum loquendi tuetur.

§. 138.

Quæ a se invicem differentia intrinseca constante differunt, diversis quoque in philosophia nominibus insigniri debent. Philosophus debet rationem eorum reddere, quæ sunt vel esse possunt (§. 39.). Rationes vero eorum, quæ sunt, desumuntur ab iis, quæ rebus inesse & quibus a se invicem differre intelliguntur. Ergo per ea, quæ rebus insunt, eorum genera & species constituere debet, ut constet, num aliquod prædicatum rei cuiusdam tribuatur ex ratione generali, an ex ratione speciali, sicque judicia accurata formentur. Cum igitur per differentias intrinsecas determinentur rerum genera & species; tot constitui debent genera & species rerum; quot differentię intrinsecę constantes deprehenduntur. Singula vero genera & singulę species propriis insigniri debent nominibus.

Nominibus
quæ sint di-
scernenda.

§. 139.

Nomina rerum a philosopho discretarum, sed quarum vulgo differentia non attenditur, *termini philosophici* dicuntur.

§. 140.

Termini philosophici semel recepti non sunt immutandi: quodsi non satis accurate fuerint definiti; accuratior definitio substituenda (§. 135. & 109.).

Termini phi-
losophici defi-
nitio.

Philosophi
circa termi-
nos receptor
officium.

§. 141.

Si termini accurata definitione explicentur, cognitionem reddunt distinctam & ad progressum scientiarum vitamque utilem. Si termini accurate definiti sint; res nominibus quoque a se invicem distinguimus, & in sua genera ac species distribuimus. Quod si factum; rerum distincta cognitio redditur, & propositiones accuratę formantur, in quibus cuilibet generi ac speciei sua attribuuntur prædicata. Ejusmodi vero propositiones sunt & ad progressum scientiarum & ad vitam utiles (§. 115.).

Terminorum
usus.

Si terminis caremus; toties recitanda est definitio, quoties terminus est locus: & multis verbis opus est, ubi vox una sufficit.

§. 142.

In philosophia utendum est verbis propriis, nec pluribus, quam simpliciter.

quam ad veritatem nude proponendam sufficiunt. Non pluribus verbis utendum esse in philosophia, quam ad veritatem nude proponendam sufficiunt, intelligitur ex (§. §. 109. 114. 123. 116.) verba autem propria sunt, quæ rebus istis, de quibus adhibentur, significandis destinantur. Si ergo non pluribus utendum est verbis, quam quæ animi nostri conceptibus alteri significantis sufficiunt: verbis utique utendum erit propriis. Idem conflat ex §. §. 109. 136. 139. idem sequitur ex §. 134.

§. 143.

Stylus oratorius ex philosophia describendus.

E. Philosophus respondere debet verborum ornatum, qui oratores juvat. Ejusmodi enim ornatus aut in verbis impropriis consistit, aut in verborum ambagibus (§. 142.).

CAPUT VI. DE LIBERTATE PHILOSOPHANDI.

§. 144.

Libertatis philosophandi definitio.

DUm philosophamur, aut nobis permissum est palam eloqui, quid nobis videatur verum, quid falsum; aut non licet tanquam verum defendere, nisi quod aliis ita videretur. In priori casu utimur *libertate philosophandi*; quæ est permissio publice proponendi suam de rebus philosophicis sententiam. In posteriori casu nulla nobis relicta est.

§. 145.

Servitutis philosophandi definitio.

Servitus contra *philosophandi* est coactio defendendi aliorum de rebus philosophicis sententiam tanquam veram, utur nobis contrarium videatur.

§. 146.

Servitus philosophandi methodo philosophicæ ad-versatur.

Si quis philosophiam methodo philos. tradere debet, ei iugum servitutis in philosophando imponi nequit. Etenim per servitutem philos. admittere debet definitiones tanquam genuinas, quia alii eas judicant bonas, quamvis deprehendat, eas a regulis logicis abhorreere; admittere debet propositiones tanquam veras,

veras, de quarum veritate dubitat, immo falsas esse agnoscit; quia alii eas pro veris venditant: admittere debet probationes tanquam demonstrationes, quas plurimis defectibus obnoxias agnoscit; quia alii rigorem & validitatem earum, prædicant (§. 145.). Sed de methodo philos. confer. §. 109. 112. 114. 123. 110. 111. 113. 116. 117.

§. 147.

Si quis philosophiam methodo philosophica tradere debet, is in eligendis sententiis solius veritatis rationem habere debet (§. 111. 110. 109.).

In eligenda sententia solius veritatis habenda est ratio. Non attendendæ sunt rationes extrinsecæ.

§. 148.

Hinc sequitur, quamdiu philosophia methodo philosophica traditur, in eligenda sententia exulare debere omnes rationes extrinsecas (§. 147.).

Methodo philosophica philosophanti perinde est, siue veritas fuerit jam olim, aut recentius demum agnita; siue in pretio sit, s. contemnatur; s. ab aliis fuerit eruta, s. proprio Marte ab ipso reperta; s. a viro celebri defendatur, s. lateat in obscuri nominis autoris libro. Veritatem is per se amat; non eam ad famam, opes aliorumque favorem refert.

§. 149.

Si quis philosophiam methodo philosophica tradere debet, is suo, non aliorum stare debet iudicio (§. 109. 110. 111. 118.). In his §. §. citatis requisita logica docet. Philosophus E. philosophiam philos. methodo traditurus regulas generales ibi traditas ad casus speciales, h. e. definitiones, principia & propositiones applicare debet. Dum ita de valore definitionum, principiorum & propositionum iudicat, suo stat iudicio, non aliorum: alioquin enim ejusmodi disquisitione non haberet opus.

Philosophus suo stare debet iudicio.

§. 150.

Si quis philosophiam methodo philosophica tradere debet, is ab aliis tradita non admittere potest, nisi quatenus ea ex principis suis demonstrari & intelligi possunt (§. 109. 112. 113.).

Quatenus ab aliis tradita admittit.

§. 151.

E. fieri potest, ut philosophiam hac methodo traditurus ab aliis verbis dissentiat, etsi in re sit consensus, & vice versa, ut in verbis sit consensus, etsi in re inter ipsos non conveniat (§. 137. 136.). Alter scil. potest vel per inconstantiam loquendi, vel suo

Quamvis verbis ab iis differat.

in denominando jure usus, vocem quamdam in alio adhibere significatu; ubi uterque de eadem re judicium tulerit, a veritate non alienum. E. in re est consensus; in verbis dissensus. Ubi vero alteruter de re, quam voce quadam denotat, tulerit judicium a veritate alienum, non implicat, ut judicium istud sit verum, si vox in isto significato sumatur, quem eidem tribuit alter. E. in verbis erit consensus; in re dissensus.

E. c. *Leibnitius* vocem *mundi* sumit pro universa rerum existentium sibi que mutuo succedentium serie; de hac asserit, quod sit omnium possibilem optima. Contra in S. S. vox *mundi* sumitur pro universo genere humano, & in hoc significato affirmatur, totum mundum esse malum. Inter Leibnit. ergo & scriptorem S. est dissensus in verbis; in re consensus.

§. 152.

Ratio ejusdem
sententiarum di-
versa.

Porro patet, fieri posse, ut philosophicum metodo philosophica tradens non ex eadem ratione idem assermet, ob quam idem affirmat alter (§. III. 113.). Si igitur principia ista fuerint diversa ab iis, quibus utitur alter ad propositionem aliquam stabiliendam; evidens est, quod idem non ex eadem ratione assermet, ob quam id affirmat alter. Ipso facto docemur, ut una eademque propositio diversa ratione demonstretur.

§. 153.

Sententiarum al-
terius pars
adoptari pot-
est, integra
missa.

Nec minus patet, fieri posse, ut philosophiam metodo philosophica tradens non integram alterius sententiam, sed aliquam saltem ejus partem adoptet (§. 113.). Si ergo contingat, ut non nisi aliqua, quæ defendit alter, ex principiis suis deducere possit; non integram alterius sententiam adoptat, sed eam tantum, quam ex principiis suis deducere valet.

E. c. potest quis admittere discrimen inter aternitatem independentem ac dependentem; ideo vero non opus est, ut aternitatem mundi actualem vel possibilem defendat.

§. 154.

Ab aliis dicta
quando majore
re luce illu-
strentur.

Si quis metodo philosophica philosophiam tradit, is efficere potest, ut ab aliis dicta & clarius intelligantur & ad majorem certitudinem deducantur & eorum cum ceteris veritatibus nexus perspicatur (§. 109. 110. 111.).

§. 155.

Si quis methodo philosophica philosophatur, is oppositas sententias refellere non habet opus. (§. 110. III. 118. 121.). Quodsi ergo quis aliter sentit, is vel negat, quod alter affirmat, vel pro incerto venditat, quod illi demonstratum habetur, & contra pro certo habet, quod ille incertum pronuntiat. Quamobrem cum affirmativa ab illo fuerit demonstrata, eo ipso destructa est negativa, & qui demonstrationem percepit, cum affirmativam tanquam certam amplectatur, sponte sua missam facit negativam. Superfluum itaque foret, sententiæ negativæ refutandæ peculiarem operam impendere. Eodem modo se se res habet, si negativa fuerit evicta, aliis affirmativam tuentibus. Similiter si ab eo, qui methodo philosophica philosophatur, propositio aliqua non nisi probabiliter adstrui possit, neminem id turbabit, si vel maxime alius eam pro certo vendiderit: rationes enim indicat, quæ deficiunt, quominus thesibus demonstrari possit. Quamdiu ergo alius defectum non supplet, nemo ejus assertioni fidem habebit.

Cur in erroribus refutandis opera perdat a philosopho.

Si quando contingit, ut oppositam sententiam removeri opus sit: vel per modum corollarii falsitatem oppositæ insert philosophus; vel ad firmandum propositionem veram utitur demonstratione per indicium.

§. 156.

Si quis methodo philosophica philosophatur, is defendere nequit veritati revelatæ contraria (§. 110. III. 147. 113.). Suo loco ostendetur, veritatem philosophicam revelatæ contradicere non posse.

Philosophus non contradicit veritati revelatæ.

Fieri tamen potest, ut contradicat erroneis interpretationibus S. S. vel iis, quæ non legitima consequentia inde deducuntur. Sed hæc non sunt veritas revelata.

§. 157.

Si quis methodo philosophica philosophatur, virtuti contraria docere nequit (§. 110. III. 118. 121.). Quæ ex principiis veris demonstrari possunt, virtuti repugnare nequeunt; nam & ipsa virtutis notio per ista principia stabilitur: quod in philosophiæ practica universali patebit. Qui vero probabilibus non utitur in stabilendis dogmatis, neque hypothesei quantumvis probabilis

Nec contraria docet virtuti.

(Logica contracta.)

E

hic

hic concedit locum (§. 121.): is, si vel maxime probabilia veritati non prorsus consentanea sint, & hypothesis prorsus fallat, virtuti tamen nil quidquam præjudicat.

Si vel maxime e. c. fallat hypothesis, qua in explicando commercio inter mentem & corpus utimur; nihil tamen periculi virtuti creatur. Non enim philosophus hypothesin venditat pro veritate demonstrata, neque ea utitur in demonstrandis principiis moralibus. Sumit, enim, quod experientia certum est, & cujus explicandi gratia hypothesis excolitur tanquam principium: quod autem experientie consentaneum, nullam libem ab hypothesis contrahit, per quam id explicare conatur philosophus.

§. 158.

Nec statui publico contraria.

Qui methodo philosophica philosophatur, non docet statui publico contraria. Supponimus statum non nimium degenerasse a forma genuina; & tum demonstratio fluit, ut ante (§. 157.). Si vero forma ejus est prava: tum philosophus non turbas creat, quia formam genuinam tantum in genere docet, nulla applicatione in singulari facta. Ipsi res est cum veritatibus universalibus, non cum singularibus. Et quoniam in genuina philosophia civili ultima lex est salus & tranquillitas publica; ideo philosophus non admittit, quæ eidem repugnant, ob veritatum nexum, cui studet (§. 126.). Quam ob rem si agnoscit, quod dogma sine metu turbarum evulgari non possit, illud silentio premit, ut statui civili sua constet tranquillitas.

§. 159

Cui libertas philosophandi concedenda.

Si quis methodo philos. philosophiam tradere debet, is libertate philosophandi fruatur opus est, (§. 148. 149. 150. 144.): si negas; lege §. 129. 131. 130.

§. 160.

Quando nullum hinc nascitur periculum.

Si libertas philosophandi integra conceditur iis, qui methodo philosophica philosophantur; nullum hinc metuendum est religioni, virtuti ac rei publicæ periculum (§. 156. 157. 158.).

Potest quidem aliquis in applicanda methodo philos. aberrare, uti Spinoza; sed hoc ipsum methodo ipsi præjudicio esse nequit.

§. 161.

Contradictio philosophiæ & theologiæ de-

Si qua propositio philosophica theologicæ, vel interpretatio- ni S. S. receptæ contradicere putatur, contradictio evidenter demon-

monstranda. Duplex est casus contradictionis: aut enim *contradictio* est *patens*, veluti quando *Ptolomæus* ait: *terra in centro mundi quiescit*; *Copernicus* vero affirmat: *Terra medio inter planetas loco collocata circa solem movetur*; vel *latens*, veluti cum in geometria dicitur, *circular alterum intus contingens idem cum eo habere potest centrum*, id quod propositioni alteri contradicit, qua affirmatur: *omnes radii unius circuli sunt inter se æquales*. Nonnumquam etiam contradictio ideo later, quod verba in alia fumantur significatione. Quoniam servitus philosophandi cum methodo philos. consistere nequit (§. 146.); sed libertas potius philosophandi cum eadem necessario connectitur (§. 159); nec philos. methodus rejici potest, nisi absurda volueris ad §. 159. citata: ideo contradictio philosophanti obrudi non potest; sed evidenter demonstranda, ut philosophus, qui suo judicio stare debet (§. 149.), eandem agnoscat. Quia in re esse potest consensus, etsi in verbis appareat dissensus (§. 151.): contradictio non venditari potest pro patente, nisi ubi dissensum realem eviceris ex §. 109. Quod si lateat contradictio, legitima consequentia ex thesi autoris, sumtis principiis ab eodem concessis tanquam præmissis, inferri debet contraria theologicæ, cui illa contradicere dicitur. vid. §. 156.

§. 162.

Sine libertate philosophandi nullus est scientiæ progressus, (§. Progressus scientiæ a libertate philosophandi pendet. 144. 145. 146. 129. 130. 131.).

Omnium seculorum historia testatur, quantum progressui scientiarum obsuerit servitus philosophandi. Cuncta in disciplinis philos. incrementa debentur viris cum libertate philosophantibus. Ex hac quidem varia damna propullularunt; sed hæc non per se ex ea profluxerunt. E. c. superficialia philosophiæ tractatio. Qui dicta methodo recte utitur, facit, quæ habentur §. 151. 11. 118. 154. Huc etiam spectat libertas philosophandi §. 159.

§. 163.

Quando methodo philos. philosophari ceperint homines, collatis viribus incrementa scientiarum promovebunt. Methodo philosoph. philosophans regularum logicarum est gnarus (§. 128.); ergo novit, utrum methodo philos. philosophetur, nec ne, aut, ubi aliquando aberraverit, errorem statim agnoscit & corrigit. Quam ob rem cum methodus phil. præcipiat, quæ extant (§. 109.

110. 111. 113. 116. 117. 120. 121. 118. 151.): attentione usus novit, num definitiones suæ sint accuratæ, & principia sufficienter probata, propositiones quæcumque sufficienter demonstratæ; num demonstrationes sint omnibus numeris absolutæ; num quibusdam propositionibus inter probabilia concedi possit locus, & num hypotheses ita sint comparatæ, ut ad veritatem inveniendam viam sternere queant, & ubi vel memoriæ labilitate, vel attentionis defectu in applicatione regularum logicarum labitur, admonitus, vel ipse alio tempore mentem magis serenam ad meditationes reiteratas afferens lapsum agnoscit, & errorem vel corrigit, vel, ubi veritas nondum in potestate est, errorem missum facit. Idem cum sit animus omnibus hac methodo philosophantibus, unus veritatem ab altero traditam agnoscit, eaque ad ulteriora detegenda utitur; alter lapsum admissum vel adnotat, vel emendat, &, qui eundem admisit, eum agnoscit, &, nisi jam ab altero emendatus fuerit, ipsemet eum emendare studet.

PHILOSOPHIÆ RATIONALIS

SIVE

LOGICÆ

PROLEGOMENA.

§. 1.

Definitio-
logica.

Logica est scientia dirigendi facultatem cognoscitivam in cognoscenda veritate (§. 54. disc. præl.).

§. 2.

Logicæ præ-
cepta demon-
stranda sunt.

Quia scientia est habitus asserta demonstrandi (§. 24. l. c.); quæ in logica præcipiuntur, demonstranda sunt; & quidem juxta §. 82. l. c.

§. 3.

Dantur regu-
læ operatio-
num mentis,

Exercitium facultatis cognoscitivæ in cognoscenda veritate suis constat regulis; quod experientia confirmat. Regulas istas

in

in cognoscendo mens tenet, ut ut eas non intelligat; quod iridem experientia loquitur.

§. 4.

Datur naturalis quædam dispositio mentis dirigendi operationes ejus in cognoscendo regulis istis conformiter, sed quæ ad actum, multo magis ad habitum, non deducitur, nisi prævio exercitio.

§. 5.

Dispositio illa naturalis exercitio communi ad habitum deducta dirigendi facult. cognoscit. in veritate cognoscenda, dicitur *logica naturalis*; quæ est *connata*, vel *acquisita*. Illa est dispositio naturalis ad operationes mentis, quibus veritas cognoscitur; hæc est habitus dirigendi operationes mentis in cognoscenda veritate, ipso usu acquisitus absque regulis.

§. 6.

Qui logica naturali utitur, confusam quandam ideam habet regularum, per quas mentis operationes dirigit in cognoscenda veritate. Qui enim in casu simili vel se ipsum, vel alios imitatur, exempla præterita vi imaginationis sibi repræsentat, & in iis modum agendi confuse percipit. Sed qui logica naturali utitur, antea factum in casu simili imitari nequit (§. 5.), nisi quatenus exempla præterita sibi vi imaginationis repræsentat, & in iis modum agendi percipit.

§. 7.

Notitia confusa regularum, juxta quas diriguntur operationes mentis in cognitione rerum, constituit *logicam naturalem docentem*; quæ est notitia confusa dirigendi facult. cognosc. in veritate cognoscenda.

§. 8.

Habitus ille notitiam confusam regularum dirigendi facultatem cognoscit. ad praxin transferendi constituit *logicam naturalem utentem*; quæ est habitus s. ars dirigendi facult. cognosc. in cognitione veritatis solo usu acquisitus.

§. 9.

Si regulas illas distincte cognoscis, earumque rationes perspicis, tum logicam habes artificialem docentem; quæ est scientia dirigendi facult. cognoscit. in cognoscenda veritate, dicitur

quas mens sequitur, et si eas non intelligat.

Naturalis dispositio facult. cognoscitivæ & ejus habitus vulgo acquisitus.

Logicæ naturalis definitio & divisio.

Logicæ naturalis docentis fundamentum.

Ejus definitio.

Logicæ naturalis utentis definitio.

Logicæ artificialis docentis definitio.

diciturque per eminentiam *Logica*, propterea quod ea sola philosophiæ pars est (§. 54. disc. præl.).

§. 10.

Logicæ artificialis docentis & naturalis differentia.

Logica artificialis docens est distincta explicatio logicæ naturalis (§. 7 8. 2. 9.).

Non ergo logicæ regulas cudit & novum quoddam artificiale cogitandi genus introducit, ut nonnulli putant; sed ipsam cogitandi modum naturalem explicat, ut distincte intelligatur. Eadem utrobique sunt regulæ; non vero eadem illarum utrobique notitia.

§. 11.

Logicæ artificialis utentis definitio.

Si quis pollet habitu regulas logicæ ad praxin transferendi, *is logicam habet artificialem utentem*; quæ est habitus s. ars dirigendi facultatem cognosc. in veritate cognoscenda.

§. 12.

Diversi gradus logicæ naturalis connata.

Logica naturalis connata non est ejusdem gradus in singulis hominibus. Qui ad diversitatem in hominibus obviam attendit, deprehender, non omnes eadem sibi facilitate comparare habitum dirigendi operationes mentis in cognitione veritatis. Pone enim, omnes homines eadem sibi facilitate comparare habitum istum: tum nulla ratio erit, cur non omnes eadem facilitate demonstrationes geometricas capiant, etsi eodem doctore utantur, & nullus logica artificiali sit instructus.

§. 13.

Diversi gradus logicæ naturalis acquisitæ.

Nec logica naturalis acquisita ejusdem gradus est in singulis hominibus. Hoc enim solo usu acquiritur (§. 5.). Sed cum non sit idem omnibus usus, nec omnibus eadem dispositio naturalis (§. 12.): nec logica naturalis acquisita ejusdem in singulis hominibus gradus esse potest.

§. 14.

Idem tractatur.

Logica naturalis connata major accedente eodem studio majorem parit acquisitæ gradum, quam minor. Si enim acquirerent duo homines sub eodem studio eundem gradum: dispositio naturalis eadem esse deberet.

§. 15.

Prærogativa naturalis in logica qualis sit.

Ergo non alia est homini uni præ altero in logica prærogativa per naturam, nisi quæ in majore gradu logicæ naturalis consistit. In logica enim nemo per naturam habet, nisi quod est con-

connatum; quod vero studio acquiritur, eidem tribui nequit. Sed sola logica naturalis connata complectitur, quod homini connatum est; naturalis autem acquisita, quod studio acquiritur absque regulis (§. 5.), & illa quidem non est in singulis ejusdem gradus (§. 12.). E. prærogativa, quam unus præ altero in logica per naturam habet, non est alia, nisi quæ in majore gradu logicæ nat. connatæ consistit.

§. 16.

Si quis rerum cognitioni studens operationes mentis non dirigit secundum regulas, quibus naturalis cogitandi modus continetur, is perversam sibi comparat logicam naturalem docentem. Quando logica naturalis docens perversa.
Sic enim concipiet animo ideam confusam ejus, quo utitur, modi, tanquam ad agnitionem rerum necessarii, consequenter istius modi, qui a modo cogitandi naturali abhorret. Sed confusa ista idea absolvit logicam naturalem docentem (§. 7.), modo autem cogitandi naturali vera logica continetur (§. 1.3.). Patet itaque, isto in casu logicam naturalem docentem a vera abire, & perversam comparari.

§. 17.

Cui perversa est logica naturalis docens, is & perversa pollet logica naturali utente (§. 6. 7. 8.). Quando logica naturalis utens perversa.

§. 18.

Qui sola pollet logica naturali, is in applicatione sæpissime aberrat (§. 6. 8.). Quæ sc. confuse tantum cognoscuntur, ea sæpius confunduntur, ut adeo casus similes videantur, qui sunt dissimiles, & secundum ideam confusam qui agit, facile omitit, quibus vel maxime fuerat opus. Insufficiencia logicæ naturalis.

§. 19.

E. cum logica naturali conjungenda est logica artificialis (§. 9. 10. 11. 18.). Logicæ artificialis necessitas.

§. 20.

Si quis logica artificiali docente fuerit instructus, non autem pollet utente, is agit secundum logicam naturalem, cum sibi videtur agere secundum artificialem (§. 9. 11. 2.). Quando nulli usus artificialis docens?
Si enim non pollet logica utente, ad praxin transferre nequit, quæ a docente præcipiuntur: & cum nihilominus ad praxin descendit, logica non potest uti nisi naturali (§. 8.).

§. 21.

§. 21.

Casus alter.

Si quis in logica docente in confusis operationum mentis notionibus acquiescit; is agit secundum logicam naturalem. (§. 10.).

§. 22.

Casus tertius.

Qui sub nomine logicæ didicit, quæ ad dirigendam facultatem cognoscit. in cognoscenda veritate nil conferunt, vel de quibus non constat, quomodo ad praxin transferantur; is nonnisi secundum logicam naturalem agit (§. 11.).

§. 23.

Distincta regularum logicarum applicatio.

Quinam con- querantur de logicæ artific. inutilitate.

Qui logica utente artificiali pollet, is regulas docentis distincte applicare valet in casu quolibet dato (§. 11. 9.).

§. 24.

Qui logicæ artificialis inutilitatem se experiri arbitrantur, illi vel logica utente destituuntur, vel docentem didicere, quæ regulas dirigendi facultatem cognoscit. non distincte explicat. Docens logica absque utente nullius est usus (§. 20.); adeoque ejus utilitatem experiri nequit, qui utente destituitur. Et si in docente regulæ distincte non explicantur; in notionibus confusis acquiescimus, vel talia discimus, quæ ad praxin nihil conferunt, aut quomodo ad eam transferenda sint non patet. Cum vero sic tantum agamus secundum logicam natur. (§. 21. 22.); fieri tum quoque nequit, ut ejus utilitatem experiamur.

§. 25.

Lapis lydius primus.

Ea logica artificialis docens censetur genuina, quæ praxi veterum geometrarum censetur conformis. Hi enim veritatem quæsitam invenerunt & rigore demonstrarunt: nemo Euclidem, Archimedem, Apollonium, Theodostum &c. legit, quin veritatis statim fuerit convictus, quam primum eos intellexit. Direxerunt ergo, non invita natura, operationes mentis in veritate investiganda & demonstranda. Quia regulæ methodi philosoph. eadem sunt, quæ methodi mathem. (§. 132. disc. præl.) methodus vero ordo est, quo in tradendis dogmatis utimur (§. 108. disc. præl.): non alia sane ratione dirigendæ sunt operationes mentis in philosophia, quam in Mathesi, ut veritas agnoscatur. Si ergo regulæ logicæ artif. docentis eadem sunt, quibus geometræ veteres in veritate demonstranda sunt usi: eadem quoque

que sunt illæ ipsæ regulæ, juxta quas operationes mentis dirigi debent in veritate cognoscenda, & consequenter ejusmodi logica docens artif. est genuina (§. 9.).

§. 26.

Ea logica artificialis docens censetur genuina, per cujus re- Secundus.
gulas rationem reddere licet cogitationum, quæ sese invicem naturaliter consequuntur. Hæc enim distincte explicare debet logicam naturalem (§. 10.) & tradere regulas, juxta quas operationes mentis in cognitione rerum diriguntur, dum dispositio naturalis ad actum deducitur (§. 7.5.). Cogitationes, quæ naturaliter se invicem in mente consequuntur, juxta istas regulas producuntur, etsi mens eas non intelligat (§. 3.). Ergo si per regulas in logica artif. traditas reddi potest ratio cogitationum, quæ naturaliter sese invicem consequuntur; ea non est nisi explicatio distincta logicæ naturalis, adeoque genuina.

§. 27.

Ea logica artif. docens censetur genuina, cujus regula ex Tertius.
ipsa mentis humanæ natura & ratione entium in genere demonstrari possunt. Menti inest dispositio ad dirigendas operationes mentis in cognitione rerum juxta regulas, quas violare nequit (§. 4.), & quas logica artif. docens distincte explicare debet (§. 10. 7.). Quæ vero per mentem fieri possunt, eorum quoque ratio ex natura mentis hum. demonstrari potest. E. si logica artif. docens regulas tradit ex natura mentis hum. demonstrabiles: illæ ipsæ regulæ sunt ejusmodi, quas mens, operationes suas in cognitione rerum directura, vi naturæ suæ tenet, & consequenter logica est genuina. Enimvero quoniam ens omne, quatenus tale, cognoscibile est: regulæ, quibus facult. cognos. dirigitur in cognitione rerum, suas quoque in notione entis generali rationes habent. Quare cum logica artif. docens regulas istas distincte explicare debeat (§. 10.): genuina est, ubi regulæ ejus rationi entis generali fuerint conformes.

§. 28.

Quia logica artif. docens sola est, quæ verbis doceri potest. Epilogus.
 est, eaque dudum eminenter logica dici suevit (§. 10.); nos quoque eandem tradituri sola logicæ appellatione erimus contenti.

(Logica contracta.)

F

LO.

LOGICÆ PARS I.
SIVE
THEORETICA
SECTIO I.
DE
LOGICÆ PRINCIPIIS.
CAPUT I.
DE TRIBUS MENTIS OPERA-
TIONIBUS IN GENERE.

§. 29.

Mens sensu
percipit ex-
terna.

Sensu percipimus res externas, quæ organa nostra sensoria affi-
ciunt.

§. 30.

Sensu interno
percipit se-
ipsam.

Mens etiam sibi conscia est eorum, quæ in ipsa contingunt, si non omnium, saltem quorundam, atque sic veluti seipsam percipit sensu quodam interno. Quis enim nescit, se sibi conscium esse ejus, quod videt, vel alio sensu externo percipit (§. 29.), aliarumque mentis operationum, quocunque tandem nomine posthac designandæ veniant?

Hac facultate si mens destitueretur, nulla foret Logica. Etenim veritates Logicæ docentis artificialis ex iis deducimus, quæ in mente nostra circumspici attentione observamus: Logica vero utens artificialis, cum distinctam requirat regularum docentis applicationem (§. 27.), a nobis acquiri non poterat, nisi nobis conscii essemus illorum actuum qui ad regularum applicationem necessarii. Absque hac applicatione sæpius iterata non acquiritur habitus applicandi Logicam docentem artificialem; in quo utens consistit (§. 11.): si autem nobis non essemus conscii operationum mentis, unde, quæso, nobis constaret, applicationem regularum a nobis fieri, prout debebat & habitus acquirendus requirit?

§. 31.

§. 31.

Possimus etiam nobis imaginari res absentes & si quæ Mens imaginatur absentia & lex imaginationis. simul percepimus atque unius perceptio denuo producat, ab imaginatione quoque producit perceptio alterius. Qui ad se attendit, non modo plures rerum absentium imagines in se continuo advertit; verum eas contemplatus perspicit etiam legem, quam commemoramus, constanter observari.

§. 32.

Dum rem sive sensui, sive imaginationi præsentem tantum intuemur, seu attentionem nostram in eadem defigimus, simpliciter apprehendere dicimur: Unde simplex apprehensio definitio. nobis est attentio ad rem sensui vel imaginationi præsentem seu menti quomodocunque repræsentatam.

§. 33.

Rerum in mente repræsentatio Notio, ab aliis Idea, appellatur. Notionis & Ideæ definitio.

§. 34.

Facile autem pater, rem nullam simpliciter apprehendi posse, nisi cujus notionem seu ideam habemus. Dum enim re simpliciter apprehendimus, in eadem attentionem nostram defigimus (§. 32.). Sed non sumus nobis rei conscii, nisi quatenus eam nobis in mente repræsentamus, consequenter quatenus ejus notionem vel ideam habemus (§. 33.), adeoque in eadem attentionem nostram defigere non possumus, nisi ejus habeamus notionem. Absque notionem simplex apprehensio nulla est.

Atque ea ratio est, cur simplex rei apprehensio atque notio vulgo pro Synonymis habeantur. Placuit tamen nobis simplicem apprehensionem distinguere a notionem. Etenim alius actus mentis est, quo notio formatur seu idea producit; alius vero, quo ad notionem formatam seu ideam productam attendimus.

§. 35.

Notiones vocibus alteri indigitamus. Sunt adeo Voces soni articulati, quibus notiones significantur. Voces autem istæ Termini appellantur. Unde Terminus definitur, quod sit vox notionem quandam significans. Vocis & termini definitio.

§. 36.

Termini res
significant.

Termini denotant res, quarum notiones habemus, aut habere possumus. Termini denotant notiones (§. 35.). Sed notionibus res nobis repræsentamus (§. 33.). Patet itaque, quod perinde res indigent ac notiones, quas de iis habemus.

§. 37.

Definitio ter-
mini inanis.

Si quis sibi videretur habere notionem aliquam, cum tamen nullam haber, eamque voce quadam indigitat, tum terminus *notionem deceptricem* significat, quæ cognoscenti imponit, cum sit re vera sine mente sonus. *Terminum* istum *inanem* appellamus. Atque adeo *Terminus inanis* est, qui notionem deceptricem significat. e. gr. influxus phycicus.

§. 38.

Judicii defi-
nitio.

Quando aliquid in re obvia distinguimus, aut cum ea simul percipimus, idque primum tanquam ab ea diversum, deinde vero tanquam ad eandem quomodocunque pertinens, vel non pertinens spectamus; tum *judicare* dicimur. Atque actus iste mentis, quo aliquid a re quadam diversum eidem tribuimus, vel ab ea removemus, *judicium* appellatur.

E. gr. Si triangulum intueamur, & præter tria latera tres in eodem angulos distinguamus, atque adeo perpendamus, tres istos angulos non esse ipsum triangulum, eos tamen ad idem pertinere; tum judicamus, triangulum habere tres angulos.

§. 39.

Judicia in quo
consistant.

Dum igitur mens judicat, notiones duas vel conjungit, vel separat. Etenim dum judicat de re quadam, eidem tribuit, quod tanquam diversum ab ea agnoscit, vel istiusmodi quid ab ea removet (§. 38.).

§. 40.

Enunciatio
sive propositi-
onis definitio.

Solemus etiam judicium verbis efferre, tumque illud *enunciare* vel *proponere* dicimur. Est igitur *Enunciatio* sive *Propositio* Oratio, qua alteri significamus, quid rei conveniat, vel non conveniat. Per *Orationem* vero hic intelligimus terminorum combinationem.

§. 41.

Pater adeo, *differe propositionem sive enunciationem a judicio.* Conf. §. 33. 39. 40. Differentia inter judicium & enunciationem.

§. 42.

Quicquid sensu percipimus, sive externo, sive interno, *Individuum* appellari. Individuum quid dicatur.

Nondum hic definimus, quid sit individuum, notione clara in præsentia contenti.

§. 43.

Res singulares, quas percipimus, vel in quibusdam similes sunt inter se vel sunt dissimiles. Quæ similes sunt, ad eandem classem referimus, quam *Speciei* nomine insignimus. Est itaque *Species* similitudo individuorum. Speciei definitio.

§. 44.

Quodsi notiones specierum quædam communia continent, adeoque individua ad eas relata eatenus adhuc aliquam inter se similitudinem habent; classem quandam superiorem constituimus, quæ species istas sub se complexa *Genus* appellatur. Quamobrem *Genus* definimus per similitudinem specierum. Generis definitio.

§. 45.

Quoniam genere quoque diversa in nonnullis adhuc convenire possunt, atque eatenus quandam inter se similitudinem habent; notio, quæ pluribus generibus communia complectitur, *Genus* quoddam *superius* constituit. Quamobrem *Genus superius* est similitudo generum. Generis superioris definitio.

§. 46.

Quoniam Genera superiora adhuc alia superiora habere possunt, ideo *Genera intermedia* sive *Subalterna* appellantur, quæ alia habent se superiora & inferiora. Et notandum quidem est, genera inferiora respectu superiorum, sub quibus continentur, appellari species, respectu inferiorum genera: *speciem*. Generis subalterni appellatio itemque specierum divisio.

ciem autem infimam dici, quæ nonnisi individua sub se completur.

§. 47.

Ratiocinationis primum genus.

Si quid simpliciter apprehendimus & ulterius progressi judicamus, quod ei vel convenient, vel non convenient, quæ ad bujus vel istius speciei aut generis notionem pertinent; eidem quoque nomen illius speciei aut generis vel convenire, vel non convenire porro judicamus. Patet per exempla asserti veritas. Etenim si notionem trianguli rectilinei habemus, quod sit figura tribus lineis rectis terminata, ac jam nobis occurrat figura, de qua judicamus, quod tribus lineis rectis terminetur; mox recordari triangulum rectilineum dici debere figuram tribus lineis terminatam; judicamus, præsentem quoque figuram triangulum rectilineum dici debere, seu esse figuram istiusmodi, quæ triangulum dicitur.

§. 48.

Ratiocinationis alterum genus.

Similiter si judicamus, ens nobis obvium esse bujus vel istius generis aut speciei, nobisque succurrit, generi isti aut speciei hoc convenire, vel non convenire, sive absolute, sive ob præsentem conditionem; ideo judicamus, huic quoque enti idem convenire, vel non convenire, sive absolute, sive ob præsentem conditionem. Patet denuo assertum per exempla. Etenim si nobis constet, ferrum candens urere atque de ferro nobis obvio judicemus, quod candeat; prioris judicii recordati judicamus porro, hoc quoque ferrum candens urere debere.

§. 49.

Ratiocinationis definitio.

Dum ita ex duobus judiciis notionem communem habentibus tertium vel, quod perinde est, ex duabus propositionibus terminum communem habentibus tertiam elicimus, combinando notiones in utroque judicio, vel terminos in utraque propositione diversos, ratiocinari dicimur. Est itaque Ratiocinatio operatio mentis, qua ex duabus propositionibus terminum communem habentibus formatur tertia, combinando terminos in utraque diversos.

Alii ratiocinationem *Dianoëam*, *Discursum*, *Argumentationem* vocant.

§. 50.

Judicium istud dicimus *intuitivum*, quo enti cuidam tribuimus; quæ in ipsius notione comprehensa intuemur. Istud autem *judicium discursivum* appellamus, quod per ratiocinium (§. 49.) elicitur. Posset quoque dici *dianoëticum*.

Judicii intuitivi & discursivi definitio.

E. gr. Soli tribuimus splendorem, propterea quod notio, quam de ea habemus, eum splendidum nobis exhibet. *Judicium* itaque, *Sol splendet*, est intuitivum. Enimvero dum ex *judicio* intuitivo, quod *hoc ferrum candeat* & alio, quod memoria suggerit, *ferrum candens urit*, tertium elicimus; *hoc ferrum urit*; *judicium* hoc tertium est discursivum sive *dianoëticum*.

§. 51.

Tres sunt mentis operationes, quibus ea circa cognoscibile versatur, notio cum simplici apprehensione, judicium & discursus. Conf. § 32. 38. 50.

Numerus operationum mentis.

Nimirum si cognoscibile intuemur, aut in simplici apprehensione acquiescimus, aut de eo judicamus; tertium non dari, ex ipsa notionis simplicisque apprehensionis atque *judicii* definitionibus liquet (§. 32. 38.). Si judicamus, *judicium* vel intuitivum est, vel discursivum (§. 50.); quorum hoc ratiocinando elicitur.

§. 52.

Notio cum simplici apprehensione est operatio mentis prima, judicium secunda, discursus tertia. Conf. §. 33. 32. 38. 50. 47. 48.

Ordo eorum.

In infantibus primum sese exerit notio, quam mox sequitur simplex apprehensio. Succedit *judicium* in pueris & ratiocinatio ex intervallo sese demum exerit. Atque inde confirmantur, quæ de ordine operationum mentis dicta fuere.

§. 53.

Notiones universales sunt notiones similitudinum inter res plures intercedentium, aut, si mavis, notiones, quibus ea representantur, quæ rebus pluribus communia sunt. Unde patet,

Notionis universalis definitio.

tet, *generum & specierum esse notiones universales.* Conf. §§. 43. 44. 45.

§. 54.

Entium forma-
tio.

Notiones universales non possunt formari absque secunda & tertia mentis operatione. Cum notio universalis comprehendat, quæ notionibus plurium individuorum vel plurium specierum communia sunt (§. 53.); ea formari nequit, nisi, quæ in notione rerum continentur a rebus ipsis distinxeris &, num eis constanter competant, an mutationibus obnoxia sint, determinaveris. Quatenus igitur agnoscis, quæ rebus convenient, quæ non semper convenire queant, eatenus judicas (§. 38.): per ratiocinia autem determinari debet, an, quod rei inesse observamus, semper eidem competat, num vero ab ea abesse possit, cum hæc judicia non ad intuitiva referri queant, adeoque ad discursiva pertineant, quæ ratiocinando eliciuntur (§. 50.).

§. 55.

Genera & species
ubi existant.

Genera & species non existunt, nisi in individuis. Conf. §. 43. 44. 45.

§. 56.

Cognitio uni-
versalis a co-
gnitione sin-
gularium de-
rivanda.

Cum adeo (§. 53.) genera & species sint notiones universales, *omnibus singularibus insunt universalia* (§. 55.), consequenter *a contemplatione rerum singularium ascendere licet ad cognitionem universalium.*

Hæc notasse plurimum juvat. Nam & cognitionem acquisitam amplificare licet & subinde singularium ope universalis cognitio absque difficultate acquiritur, quæ alias difficulter foret comparanda.

§. 57.

Compendium
Logicæ natu-
ralis.

Quæ hætenus tradidimus, Logicam naturalem absol-
vunt; hominibus omnibus communem, qua tanto rectius utun-
tur, quo puriorem conservant (§. 16.). Nimirum, 1. dum sensu
externo atque interno percepta (§. 29. 30.) simpliciter apprehen-
dunt (§. 32.), rerum quasdam notiones sibi familiares red-
dunt (§. 34.) easque terminis a se invicem distinguunt (§. 35.).
2. Cum notiones rerum, quas vel sensus solus (§. 29.), vel
sensus & imaginatio (§. 31.) una exhibent, inter se conferunt,
rerum

rerum similitudinem & dissimilitudinem perspicientes de utroque judicia formant intuitiva (§. 38. 50.). 3. Judicii de similitudine rerum species & genera constituunt (§. 43. & *seqq.*), quibus designandis nomina vulgo in linguis recepta adhibentur. 4. Judicia de dissimilitudine ad species & genera referunt, quæ iisdem vel absolute, vel sub certa conditione conveniunt, sicque enunciationes formant (§. 40.). 5. Notionibus istis atque judiciis comparatis, de rebus obviis ratiocinantur ex eo, quod in iisdem deprehendant, quæ notioni generis vel speciei alicujus respondent, colligentes, eam pertinere ad hoc genus, vel ad hanc speciem, eique adeotribuendum esse nomen, quo genus istud vel species ista designatur (§. 47.); vel ex eo, quod res obvia ad hoc genus vel hanc speciem pertineat, ac præsens ejus esse intelligatur conditio, inferentes, eidem tribui debere, quod per judicia ante acquisita generi vel speciei sive absolute, sive sub ista conditione tribuendum (§. 48.) & contra.

Hanc esse Logicam docentem naturalem, tres isti lapides Lydii probant, quas Logicæ docenti artificiali destinavimus (§. 25. 26. 27.). Quoniam itaque dubium nullum superest, quo minus Logica naturalis paucis istis absolvatur, quæ hic in compendio recensemus; Logica vero artificialis distincte explicare debet, quæ ad naturalem spectant (§. 10.); jam evidenter nobis patet, quænam a nobis pertractanda sint, ut officii nostri partes adimpleamus. Etsi enim omnis Logica iis continetur, quæ hætenus a nobis sunt stabilita & hic in compendium redacta; de singulis tamen multa notanda sunt, ut in calu quolibet obvio ad praxin transferri possint. Specialibus istis explicatis constabit, cur præter Logicæ naturali jungere artificialem, & cur sola naturali contentus facilis a vero aberraret, quam qui cum ea artificialem combinavit. Neque vero metuendum, ne forsitan in Logicam artificialem perverfam incidamus, quæ magis nocet, quam prodest, propterea quod regulæ generales, quas jam perspectas habemus, nonnisi specialius explicandæ sunt.

CAPUT II. DE NOTITIIS QUIBUSDAM GENERALIBUS ENTIS.

§. 58.

Propositum
Autoris.

MOnui jam superius (*disc. præl. §. 82.*), quædam Ontologiæ principia in Logica nobis esse explicanda, ut demonstrationi sit locus: id quod tanto magis necessarium intelligitur, quod per demonstrationes istas parer, utrum Logica genuina sit, nec ne (§. 27.), quodque ea, quæ demonstrata sunt, firmiori assensu complectamur. *Antequam igitur ad singulas mentis operationes distinctius explicandas progrediamur, principia Logicæ ontologica nonnulla præmittenda sunt.*

§. 59.

Eorum, quæ
rebus insunt,
discrimen.

Si ad ea attendimus, quæ rebus insunt, alia constantia apprehendimus, quæ tamdiu insunt, quamdiu speciem ac genus non mutant; alia vero mutabilia, quæ salvis specie ac genere entis mutantur.

E. c. durities lapidi constans est: quamdiu enim is speciem non mutat, sed in numero lapidum persistit, tamdiu duritiem non amittit. Calor vero mutabilis, quem non retinet, nisi ubi corpori calefacienti, veluti Soli, aut aëri calido, fuerit expositus.

§. 60.

Quænam de
rebus absolute
enuncianda.

Quæ enti cuidam constanter insunt, ea de eodem absolute enunciari possunt & contra. Quæ enim constanter insunt, tamdiu insunt, quamdiu ens speciem ac genus non mutat (§. 59.). De eo igitur enunciari possunt, quamdiu ad istam speciem, vel istud genus refertur, hoc est, ens idem persistit. Cum adeo non alia conditione opus sit, ut, quod constanter inest, de eo enunciari possit, quam ut ad hanc speciem, vel hoc genus referatur; de eo tanquam ente hujus speciei, vel generis idem absolute enunciandum.

§. 61.

Quænam de
rebus sub certa
conditione
enuncianda.

Quæ mutabilia sunt, ea de ente nonnisi sub certa conditione enunciari possunt & contra. Quæ enim mutabilia sunt, ea specie

cie ac genere salvis mutari possunt (§. 59.). Terminus itaque, quo species vel genus designatur, nondum exprimit illam conditionem, ob quam rei convenit, quod mutabile. Alia igitur conditio cum requiratur, ea in enunciatione exprimenda, ut iudicium sit accuratum.

§. 62.

Quæ constanter insunt, eorum alia determinantur per alia, Constantiam
discrimina
ita ut, si hæc insint, non possint non ipsa quoque inesse: *alia vero tantummodo sibi mutuo non repugnant*, ita ut una inesse possint & per ipsa cetera, quæ insunt constanter, determinentur, ipsa vero non determinentur per alia, quæ insunt.

E. gr. In *triangulo* necessario perimenter tribus constat lineis & in eo una tres sunt anguli. Quod tres lineæ ad spatium terminandum concurrant, inter ea refertur, quæ fieri possunt; non tamen data una vel datis duabus lineis determinatur tertia, sed ea harum magnitudinis salva & specie, & magnitudine varia esse potest. Tertia igitur ad duas non necessario accedit, sed variis modis determinari potest. E. gr. si *triangulum* fuerit *rectilineum*, id tantum caveri debet, ne sit duabus datis simul sumtis major, quoniam repugnat in *triangulo* duo latera simul sumta esse tertio majora. Datis vero tribus lineis, quibus spatium determinari debet, simul determinantur anguli, sive eorum ad se invicem in punctis, ubi concurrunt, inclinationes. Non tamen vice versa datis tribus angulis in *triangulo rectilineo* determinantur quoque ipsa latera; sed ratio saltem laterum determinatur, quam ea inter se habent. Sunt igitur in *triangulo* nonnulla, quæ mere possibilia sunt, ita ut una inesse possint, sed quorum unum non necessario inest, ubi inest alterum. Sunt præterea alia, quæ per hæc determinantur, ita ut, si determinantia ponantur, ponenda etiam sint determinata.

§. 63.

Ea, quæ constanter insunt, quorum tamen unum per alterum non determinatur, *essentialia* appello. Essentialia entis.

Ratio denominationis patebit in *Ontologia*, ubi ostensurus sum, *essentiam entis* consistere in ejus *intrinsicâ* possibilitate, hanc autem inde agnoscî, quod ea, quæ una ponuntur, nullam contradictionem involvant.

§. 64.

Attributa entis.

Ea, quæ constanter insunt, sed per essentialia simul determinantur, *attributa* dico.

E. gr. Figura tribus lineis terminata necessario quoque tres habet angulos & datis lineis anguli una determinantur. Numerus adeo ternarius angulorum est trianguli attributum.

§. 65.

Attributorum discrimen.

Attributa, quæ per omnia essentialia simul determinantur, dicuntur *Proprietates*, item *proprietates essentialia*, sive *attributa propria*: quæ vero per unum vel aliquot eorum determinantur, dici possunt *Proprietates communes* vel *attributa communia*.

E. gr. In triangulo rectilineo ratio æqualitatis trium angulorum ad duos rectos determinatur per numerum laterum & speciem linearum, adeoque per omnia essentialia trianguli rectilinei (§. 63.). Est igitur æqualitas trium angulorum cum duobus rectis proprietas trianguli rectilinei. Sed numerus ternarius angulorum per solum numerum laterum determinatur, non attenta specie linearum, atque ideo attributum commune est, quod omni triangulo competit, sive rectilineum fuerit, sive curvilineum, sive mixtilineum, non tamen alii figuræ præter triangulum.

§. 66.

Modi definitio.

Mutabilia, quæ enti insunt, nec per essentialia determinantur, *Modos* appellare soleo; Scholastici *accidens* appellare solent, sed *prædicabile*, & nonnunquam *accidens separabile*.

Quoniam accidentis appellatio non semper eodem sensu sumitur; igitur ab ea abstinere malui, præsertim cum vocabulum modi a philosophis usurpari soleat ad denotandum ea, quæ in ente mutationi obnoxia sunt.

§. 67.

Differentia essentialium.

Fieri potest, ut, dum quædam essentialia vel propria eadem manent, cetera diversis modis determinentur.

Numerus ternarius laterum triangulo essentialis est; sed eodem manente

nente species linearum & ratio laterum ad se invicem determinari potest diversimode.

* §. 68.

Essentialia & attributa de ente absolute enunciantur & contra; modi vero sub certa tantum conditione & contra. Conf. §§. 63. 64. 60. 62. de essentialibus & attributis; & §§. 66. 61. de modis.

Quomodo essentialia, attributa & modi de ente enunciantur.

Supponimus hic talia de ente enunciarī, quæ ipsi intrinseca sunt ad eoque nobis non res est cum relationibus extrinsecis, quæ perinde ac modi mutari possunt.

§. 69.

Per essentialia genera & species determinantur. Genera & species vel per essentialia, attributa & modos simul, vel per unum horum determinantur. Modi cum abesse possint, specie ac genere salvis (§. 66. 59.); specierum ac generum determinationem ingredi nequeunt. Si enim ingredi deberent, species ac genus mutaretur, quamprimum modus variaretur: id quod definitioni repugnat. Attributa per essentialia determinantur, ita ut iis positis hæc una ponantur. Non igitur opus est, ut ad determinandum genera & species utraque conjungantur; sed sola essentialia sufficiunt: per hæc enim ubi genera & species determinantur, attributa singulorum generum singularumque specierum una determinantur, neque adeo liberum est ista salvis essentialibus aliter determinare (§. 64.).

Quomodo genera & species determinantur.

§. 70.

Genera & species possunt a nobis distingui per attributa, etsi essentialia ignorentur. Attributa propria per omnia essentialia simul determinantur (§. 65.), atque adeo nonnisi isti generi vel speciei competunt, cui ista essentialia conveniunt. Per unicum igitur attributum proprium seu proprietatem essentialē genus vel species agnosci potest atque ab aliis distingui, etsi essentialia ignorentur. Attributa communia per unum alterumve essentialium determinantur (§. 65.), atque adeo nonnisi isti generi vel speciei comperunt, cui istud essentialē convenit. Quod si ergo plura fuerint attributa communia, quorum unumquodque per unum vel alterum essentialium, omnia autem simul per omnia essentialia junctim sumta determinantur; attributa ista si-

Cur genera & species per attributa distinguantur.

mul sumta non conveniunt nisi generi vel speciei, cujus sunt ista essentialia.

§. 71.

Specierum &
generum in-
feriorum
differentia
unde.

Species & genera inferiora differunt per ea, quæ manentibus essentialibus ceteris iisdem diversimode determinari possunt. Genera & species determinantur per essentialia (§. 69.). Sed genera ea continent, quæ speciebus (§. 44.); genera vero superiora, quæ inferioribus communia sunt (§. 45.): species igitur & genera inferiora a se invicem differre nequeunt nisi iis essentialibus, quæ manentibus ceteris iisdem diversimode determinantur.

§. 72.

Individuo-
rum differen-
tia unde.

Si, quæ in notione speciei indeterminata supersunt, singula determinentur, nec determinatio generalibus, quæ notioni speciei insunt, repugnat; notio individui prodit. Species ea continet, quæ individuis communia sunt (§. 43.): cetera igitur, quibus individua a se differunt, in notione speciei non determinantur. Quamobrem si ea determinantur, ut nihil indeterminati amplius supersit; notio utique individui prodit: quodsi enim aliquid remaneret indeterminatum, quod, manentibus ceteris iisdem, diversimode determinari possit, species data non foret infima, sed intermedia (§. 46.). Enimvero quod determinationes ultimæ non repugnare debeant anterioribus, quibus genera & species determinantur, probatione non indiget: si enim repugnarent, una cum ceteris eidem enti inesse non possent, adeoque ens nullum esset, cui notio ista singularis conveniret.

E. gr. In specie trianguli æquilateri, ratio lateris ad lineam datam nondum determinata est. Quodsi ergo ea superaccedat, nihil amplius superest, quod determinari possit: unde dato latere determinatæ longitudinis triangulum æquilaterum in singulari determinatur. Atque ea ratio est, cur data recta magnitudine triangulum æquilaterum construi possit.

§. 73.

Individui de-
finitio.

Apparet hinc, *Individuum* esse ens omnimode determinatum, seu in quo determinata sunt omnia, quæ eidem insunt.

Habe-

Habemus adeo jam definitionem individui, cujus notione clara hactenus fuimus contenti (§. 42.).

§. 74.

Pater hinc, quid sit principium individuationis. Est nempe omnimoda determinatio eorum, quæ rebus insunt. Et harum quidem determinationum ex constituunt *differentiam numericam*, quibus datis ponitur individuum: ceteræ vero, quibus datis, individuum nondum ponitur, in *specificam & genericam differentiam* discerpendæ.

Differentia
numerica &
principium
individuationis.

Differt utique in eo individuum ab universali, quod hujus notio nihil involvat, quod non sit determinatum, cum in universali adhuc quædam indeterminata contineantur (§. 72.). Principium autem individuationis complectitur differentias omnes, siue numericæ fuerit, siue specificæ, siue genericæ. Est adeo omnium differentiarum complexus.

§. 75.

Differentia specifica differt a proprio. Differentia specifica consistit in determinationibus, quibus datis adhuc indeterminata sunt, quæ differentiam numericam absolvunt (§. 74.). Sed genera & species per essentielles determinaciones discernuntur (§. 69.), propria autem hisce datis una determinantur (§. 65.); differentia igitur specifica a proprio differt.

Differentia
specifica a
proprio di-
versa.

Nimirum eadem hic intercedit differentia, quæ inter essentialia entis ejusque attributa locum habet (§. 63. 64.).



SECTIO II.
DE
NOTIONIBUS IN SPECIE.
CAPUT I.
DE NOTIONUM DIFFERENTIA
FORMALI.

§. 76.

Differentiæ
formalis de-
nitio.

Differentiam notionum formalem dicimus eam, quæ a modo cognoscendi desumitur.

§. 77.

Fundamen-
tam notio-
num obscura-
rum & clara-
rum.
Notæ definitio.

Dum rem nobis repræsentamus, aut notio ad eam agnoscendam sufficit, aut non sufficit.

§. 78.

Notas appello rebus intrinseca, unde agnoscuntur & a se invicem discernuntur.

E. gr. Triâ latera ad superficiem terminandam concurrentia dicuntur notæ, unde agnoscitur triangulum.

§. 79.

Notionis clara-
& obscuræ
definitio.

Notio clara est, quæ nobis notas exhibet ad rem agnoscendam atque ab alijs discernendam sufficientes: obscura vero, quæ notas insufficientes continet.

Solem intuentes statim agnoscimus, eumque ab omni ente alio optime discernimus: ejus adeo notionem claram habemus. Si vero plantam exoticam intuentes hæremus, num eadem sit cum alia olim alibi visa, vel cujus nobis succurrit nomen; ejus notionem habemus obscuram.

§. 80.

Termini obs-
cure & clari
definitio.

Terminus obscurus est, cui notio obscura adhæret: clarus vero, cui notio clara respondet.

Terminus

Terminus enim est vox notionem significans (§. 35.): quamobrem cum notio vel clara sit, vel obscura (§. 79), termini quoque eandem differentiam admittunt.

§. 81.

Fieri potest, ut terminus aliquis sit alteri clarus, qui alteri est obscurus. Ratio una deprehenditur (§. 79. 80.). Similiter fieri potest, ut uterque habeat rei, quæ termino aliquo denotatur, notionem claram, sed ut alter norit, rei illi denotandæ terminum convenire, alteri autem non satis constet, quod ei indigenda serviat: unde denuo terminus uni clarus est, alteri obscurus.

Terminus idem cum uni clarus, alteri obscurus.

§. 82.

Si duo ejusdem rei notionem habent obscuram, notio unius obscurior esse potest notione alterius. Conf. §. 79. Quamobrem si unus plures ignoret notas, quam alter; ille notionem obscuriorem habet, hic minus obscuram.

Gradus notionum obscurarum.

§. 83.

Hinc si quis terminus duobus fuerit obscurus, idem uni obscurior esse potest quam alteri. Conf. §. 80. 82. 35.

Gradus nimirum obscuritatis terminorum pendent a gradibus obscuritatis notionum.

Terminus idem uni obscurior, quam alteri.

§. 84.

Si notarum quarundam obliviscimur, quæ nobis fuerant perspectæ: notio clara obscura & quæ fuerat obscura, obscurior evadit. Conf. §. 79.

Clara notio quomodo obscura fiat.

§. 85.

Hinc una liquet, quando terminus clarus nobis evadat obscurus & terminus obscurus adhuc obscurior (§. 80.), nimirum si quarundam notarum obliviscimur, quæ nobis fuerant perspectæ & ad notionem spectant, quæ termino adhaeret.

Terminus clarus quando fiat obscurus.

§. 86.

Dum notionem claram habemus, seu rem oblatam agnoscimus atque ab alia distinguimus (§. 79.), aut notas omnes, quas continet, distinguere, aut non distinguere valemus.

Fundamentum notionis confusæ & distinctæ.

(Logica contracta.)

H

Patet

Patet adeo notionem claram in duas abire species. Clara nimirum est notio, quæ nobis sistit intuendas notas ad rem agnoscendam & ab aliis discernendam sufficientes (§. 79.). Cum igitur modi cognoscendi habeatur hic ratio (§. 76.), in definitione notionis claræ modus, quo notas intuemur, duplici modo determinari potest: aut enim eas uno obrutu comprehendimus, aut singulas a se invicem distinguimus, notione rei in alias simpliciores resoluta.

§. 87.

Notionis clara
& confusa
definitio.

Notio clara, quam habemus, *distincta* est, si notas, quas nobis sistit, distinguere valeamus: *confusa* vero est, si eas distinguere non possumus.

• E. gr. Si triangulum nobis offertur, aut id uno obrutu comprehendimus, aut sigillatim ad singulas perimetri partes attentionem nostram promovemus. In priori casu non distinguimus notas, quibus id ab aliis figuris discernitur; in posteriori autem judicamus, perimetrum constare ex tribus partibus seu tribus lineis rectis. Quamobrem ubi novimus, nos triangulum a ceteris figuris rectilineis distinguere, quod perimetre ex tribus lineis componatur; notionem trianguli distinctam habemus. Ternarius enim laterum in perimetro numerus est notæ sufficiens ad triangulum a figura quacunque alia discernendum. Colorem rubrum optime agnoscimus & a colore quocunque alio distinguimus: cum tamen notas indicare non valeamus, unde eundem agnoscimus, ejus notionem nonnisi confusam habemus.

§. 88.

Signum
notionis
distinctæ.

Si quis habet notionem distinctam novitque notarum terminos, is eas alteri enumerare valet. Qui enim habet notionem distinctam, is notas, quas notio continet, distinguere valet (§. 87.). Quodli vero terminos notarum novit, ei perspectæ sunt voces, quibus notæ indignantur (§. 35. 36.).

§. 89.

Signum
ejusdem
fallax.

Qui notas cognoscibilis alteri enumerare valet, is ejus notionem habet distinctam; sed non contra notione distincta destituit, qui eas enumerare non valet. De priori vide §. 35. 33. 87.

Quod

Quod vero non e contrario notione distincta destituatur, qui notas enumerare non valet, patet ex §. 88., vi cujus duae requiruntur conditiones, ut quis notas cognoscibilis alteri enunciare valeat, nempe notionem habere debet distinctam notarumque nosse terminos. Alterutra igitur conditione deficiente, notas enumerare non valet.

Sæpiissime tamen accedit, ut, qui notas cognoscibilis enumerare non valet, notione distincta destituatur: rarior est casus alter, ubi quis ob terminorum ignorantiam vel defectum notas cognoscibilis alteri significare nequit.

§. 90.

Fieri potest, ut rem oblatam agnoscentes vel notas omnes distinguamus easque enumerare valeamus, vel saltem aliquas.

Fundamentum notionis completa & incompleta. Definitio.

§. 91.

Notio completa est, quæ notas sufficientes exhibet ad rem in statu quolibet agnosendam & ab aliis distinguendam: incompleta vero, quæ notas insufficientes continet.

E. gr. Qui novit, se pentagonum regulare ab aliis figuris discernere per quinque laterum & angulorum æqualitatem, is notionem ejus habet completam: si quis vero quæsitus, unde pentagonum regulare agnoscat, solam quinque laterum æqualitatem nominat, is incompletam habet.

§. 92.

Notio plures continens notas, quam quæ ad rem agnosendam & ab aliis discernendam sufficiunt, abundans a me dici solet.

Notionis abundantis definitio.

E. gr. Abundans notio trianguli rectilinei est, si dicas esse spatium tribus lineis rectis terminatum & tribus angulis instructum.

§. 93.

Si notionem habemus distinctam, notarum, quæ eam ingrediuntur, denuo habemus vel distinctam, vel confusam.

Notionis adæquatæ & inæquatæ fundamentum.

§. 87-33-79-87.

§. 94.

Notio distincta in notiones distinctas notarum, quæ eam

ingrediuntur, a cognoscente resolvable dicitur *adequata*; in casu opposito *inadequata*:

E. gr. In *notionis adequatæ* definitione mentio fit *notionis distinctæ* atque *notæ*. *Notionem vero distinctam* definivimus (§. 87.) & *notam* (§. 90.) &c.

§. 95.

Notionis ad-
equatæ gra-
dus.

Prima resolutio notionis distinctæ in notiones distinctas notarum est *primus gradus notionis adequatæ*. Secunda resolutio notionum distinctarum notarum, quæ datam notionem ingrediuntur, in notiones distinctas notarum, quæ illas ulterius ingrediuntur, constituit *gradum secundum notionis adequatæ* & ita porro, donec perveniatur ad notiones irresolubiles.

Quoniam terminis caremus, quibus notionum subordinationes exprimere valeamus; nec gradus notionis adequatæ satis distincte efferre licet (§. 141.). *Disc. prælim.*) Satis tamen clare percipiuntur gradus, si cogitemus, nos uno gradu ulterius promoveri, quoties notionem notæ sumimus tanquam datam & notarum, quæ ipsam ingrediuntur, notiones quærimus distinctas.

§. 96.

Quando no-
tio completa
fit incomple-
ta.

Si notas quasdam, quæ distinctam ingrediuntur, oblivioni damus, vel jactem per oblivionem statuimus, eas ad notarum numerum non esse referendas; notio completa abit in incompletam. Conf. §. 91.

§. 97.

Notionis di-
stinctæ in-
confusam
mutatio.

Si notas rei a se invicem discernere dediscimus, notio distincta abit in confusam. Conf. §. 87.

§. 98.

Adæquatæ in-
inadequatam
mutatio.

Si notiones notarum distinctæ abeunt in confusas, notio adæquata fit inadequata.

Notio adæquata cum suis habeat gradus (§. 95.), patet, eodem modo gradus deteriorari posse, ut magis adæquata notio in minus adæquatam abeat. Qui ex disciplinis accurata methodo pertractatis sibi familiarem reddidit notionum subordinationem attendendo, quomodo se-
quen-

quentes in antecedentes resolvantur (§. 112. *Diffr. prelim.*); is hanc notionem de generationem apprimè concipiet.

§. 99.

Notæ defumendæ sunt ab essentialibus & attributis. O-
mnis nota est quidpiam rei intrinsecum, per quod ea agnosci
& ab aliis rebus discerni potest (§. 78.). Defumendæ igitur sunt
notæ ab iis, quæ constanter insunt. Iam Conf. §. 62. seqq.

Notæ unde
defumendæ.

§. 100.

*Notionibus rerum distinctis eas reducimus ad sua genera at-
que species.* Qui notionem rei habet distinctam, is notas a se
invicem distinguit, per quam agnoscitur & ab aliis discernitur
(§. 87.), adeoque novit, quæ ei sunt essentialia, vel attributa ejus-
dem (§. 99.). Per essentialia autem (§. 69.), vel insignioris per at-
tributa, genera & species determinantur (§. 70.).

Notiones di-
stinctæ quo
tendant.

Quamdiu ergo notionibus confusis contenti sumus, genera & species
rerum accurate constitui nequeunt. Quodsi genera atque species re-
rum non fuerint accurate constituta, nec judicia satis determinata
erunt, nec accurate ratiocinari licebit (§. 47. 48.). Pater, adeo quanta
sit notionum distinctarum ad accurate philosophandum utilitas, immo
necessitas (§. 109. & seqq. *Diffr. prelim.*).

§. 101.

*Notas esse sufficientes ad rem agnoscendam & ab aliis discer-
endam demonstrari nequit, nisi intellectis essentialibus.* Qui
essentialia novit, is genera & species determinare valet (§. 69.),
differentias specificas & genericas a se invicem distinguendo
(§. 74.), ut distincte agnoscat, quænam essentialium ad genus,
quænam ad speciem determinandum sufficient. Immo qui
essentialia novit, is quoque attributa propria & communia di-
stinguere valet (§. 69.) atque adeo distincte agnoscit, quæ-
nam attributa ad genus, quænam ad speciem constituendum
sufficient (§. 70.). Quodsi quis rei istiusmodi notionem
habet, ut eam ad suam speciem suumque genus referre
queat; is sufficientes habet notas ad eam agnoscendam & ab
aliis distinguendam. Enimvero quamdiu essentialia ignoramus,
rei genus atque speciem per ea determinare non possumus:

Notarum suf-
ficientia unde
demonstro-
tur.

quod per se patet. Nec minus evidens est, nos iis ignoratis attributa propria & communia non evidenter distinguere. Quamobrem ubi per attributa a posteriori cognita res discernere constituimus, non evidenter patet, nos ea tenere, quæ rei ab aliis distinguendæ, consequenter ad suam speciem suumque genus referendæ sufficiunt (§. 43. & seqq.). Essentialibus itaque minime intellectis, demonstrari non potest, notas ad rem agnoscendam & ab aliis discernendam esse sufficientes.

Est enim experientia constare possit, quædam esse rebus diversarum specierum communia, alia non item, sed in hac tantummodo specie deprehendi; non tamen id ubivis succedit, neque nobis patet, an ea, quæ cognovimus, simul sumta notas sufficientes constituent. Hac sane ratio est, cur istiusmodi condantur definitiones, quæ instantiis obnoxie sunt, atque inutiles pariunt distinctiones, ubi eas tueri volueris. In genere autem constat, quæ a posteriori sumuntur, ea nondum esse demonstrata, si vel maxime certa sint.

CAPUT II. DE DIFFERENTIA NOTIO- NUM MATERIALI.

§. 102.

Differentiæ
materialis de-
finitio.

Differentiam notionum materiale[m] dicimus eam, quæ a materia earundem, seu re representata desumitur.

Pertinet huc distinctio notionum in *universales* & *singulares*, quarum istæ genera & species (§. 53.), hæ individua (§. 42. 73.) sub se comprehendunt. Sunt autem adhuc aliæ nonnullæ, quas in Logica attendi utile est. De his dicemus in præsentia.

§. 103.

Notionis sim-
plicis & com-
plexæ funda-
mentum.

Notio, quam habemus, aut solas rei notas continet, aut præterea attributa, modos & determinationes extrinsecas. Etenim aut

aut essentialia continet, per quæ ens representatum in suo genere suaque specie determinatur (§. 69.), aut præterea constantia ac mutabilia alia. Si essentialia continet, nec præterea alia, tum solas notas continet (§. 78.). Si solis attributis, per quæ ignoratis essentialibus genera & species determinari possunt (§. 70.), constat; tum denuo nonnisi notas involvit (§. 78.). Enimvero si præter essentialia, aut attributa ad rem distinguendam sufficientia complectitur adhuc alia; tum vel ea constantia sunt, vel mutabilia (§. 59.). In casu itaque priori insunt ulterius vel attributa quædam sive propria, sive communia (§. 65.), in posteriori modi nonnulli (§. 66.). Quodsi notio præter intrinsecæ rei quædam etiam extrinsecæ complectatur, tum determinationes extrinsecæ seu relationes ad alia insuper adsunt.

E gr. Si notio trianguli æquilateri non continet nisi trium laterum ad spatium terminandum concurrentium æqualitatem; solas notas continet. Quodsi accedat angulorum æqualitas; præter notas adest attributum. Si triangulum æquilaterum tibi representes tanquam per perpendicularum ex angulo uno in latus oppositum demissum in duo rectangula divisum; illa divisibilitas cum in numero modorum sit (§. 66.), notio præter notas atque attributa etiam modum quendam complectitur. Si idem triangulum circulo inscriptum concipias; ejus ad circumulum relatio extrinsecum quiddam est, adeoque notio trianguli æquilateri, quam tum habes, extrinsecam quoque determinationem admittit.

§. 104.

Notionem simplicem voco, quæ solis notis constat: *notio- Definitio.*
nem complexam vero, quæ præter notas alia sive rei intrinsecæ, sive extrinsecæ complectitur.

§. 105.

Quicquid sensu percipimus aut imaginamur, ejus notionem *Quorum no-*
complexam habemus. Quæ sensu percipimus aut imaginamur, *tionem com-*
sunt singularia sive individua. In individuo determinata sunt *plexam ha-*
omnia, quæ eidem insunt (§. 73.), adeoque tam attributa, quam *beamus.*
modi (§. 59. 65. 66.): determinata quoque sunt omnia, quæ ei-
dem

dem adfunt, seu juxta ipsum una percipiuntur. Iam Conf.
§. 104.

§. 106.

Quorum no-
tio simplex
est.

*Notiones generum & specierum distinctæ sunt notiones sim-
plices.* Vid. §. 87. 104.

§. 107.

Termini sim-
plici- & com-
plexi defini-
tio.

Terminus simplex, seu *incomplexus* est, qui notionem sim-
plicem seu incomplexam significat. Istiusmodi termini sunt no-
mina generum ac specierum (§. 106.). *Terminus vero complexus*
est, qui notionem complexam significat. Istiusmodi termini
sunt voces, quibus denotantur res cum suis attributis, modis ac
relationibus extrinsecis (§. 103. 104.).

Fieri autem potest, ut terminus pluribus constet vocibus, etsi sim-
plex sit. Ita *polygonum ordinatum* est terminus simplex, cum figurarum
quoddam genus significet.

§. 108.

Fundamen-
tum notionis
abstractæ &
concretæ.

*Quæ rebus insunt, veluti earum attributa atque modi, vel
etiam adfunt, veluti earum relationes ad alias, vel repræsen-
tantur ut rebus inexistentia, vel sigillatim absque rebus, quibus
insunt.*

Ita albedinem duplici modo considerare licet, vel ut rem nullam co-
gitemus, cui inest; vel ut rem quandam nobis una representemus, cui in-
est, veluti nivem albam, aut album in genere.

§. 109.

Definitio.

Notio abstracta est, quæ aliquid, quod rei cuidam inest, vel
adest, repræsentat absque ea re, cui inest vel adest. *Concreta* au-
tem est *notio*, quæ aliquid, quod alteri inest, vel adest, repræsen-
tat ut eidem inexistenti.

E. gr. Si color consideratur absque subiecto, cui inhaeret, abstracta est
notio: sed si subiectum consideratur ut coloratum, notio concreta est. In
abstracto consideramus rerum modos, attributa, relationes, ubi ea per mo-
dum substantiarum concipimus.

§. 110.

Termini ab-
stracti & con-
creti definitio.

Terminus abstractus est, qui notionem abstractam significat:
Concretus vero, cui notio concreta adheret.

Con-

Concreta efferri solent nominibus adjectivis, veluti lucidus, albus, doctus: abstracta vero per substantiva, ut lux, albedo, doctrina.

§. III.

Notiones nostræ vel talia continent, quæ rebus pluribus communia sunt, vel quæ nonnisi rem unam in singulari representant. Parec hoc ex iis, quæ de generibus, speciebus ac individuis dicta sunt. Conveniunt enim individuis, quæ ad integram speciem transferri nequeunt (§. 72. & seqq.). Species autem continent, quæ pluribus individuis; Genera, quæ pluribus speciebus communia sunt (§. 43. 44.). Modi quoque rebus pluribus sunt communes (§. 66.), nec non quædam proprietates (§. 65.).

Notionum communium & singularium fundamentum.

§. II2.

Notio communis est, quæ pluribus communia exhibet: Definitio notio singularis, quæ rem singularem seu individuum representat.

Notio hominis in genere est notio communis, cum plura sint individua, quibus ea conveniunt, quæ isti notioni respondent. Ast notio hujus hominis, v. gr. Petri, est notio singularis, cum unicum tantum sit individuum, cui notio ista respondet.

§. II3.

Terminus communis est, qui notionem communem designat: Singularis autem, qui individuum significat.

Termini communis & singularis definitio.

Ita omnia nomina generum & specierum sunt termini communes, nomina vero individuum sunt singulares.

CAPUT III. DE USU VOCUM SIVE TERMINORUM CIRCA NOTIONES.

§. II4.

S*I quis habet notionem alicujus rei novitque terminum, quo ea significatur; ei notio termino prolato in memoriam revocari potest. Vide §. 35. 36. 37. (Logica contracta.)*

Quando terminus notionem in memoriam revocat.

§. 115.

Quando mentem alterius intelligamus.

Si quis audita voce eandem in se notionem excitare valet, quam cum ea conjungit alter; is mentem alterius intelligit & contra. Qui enim audita voce in se excitat notionem, quam cum ea alter conjungit, is novit, quam notionem alter voce ista significet, adeoque mentem alterius intelligit.

Contra qui mentem alterius intelligit, is novit, quamnam notio cum voce ab altero prolata sit conjungenda. Necessse igitur est, ut notionem istam audita voce in animo suo producere valeat.

§. 116.

Quonam ea fini sit opus.

Qui igitur mentem alterius intelligere voluerit, is & perspectos habere debet terminos, quibus utitur, & nolleque notiones, quæ iis sunt jungende. Conf. §. 115.

§. 117.

Quando alterius mentem non intelligamus.

Si quis audita voce notionem cum ea conjungit vel nullam, vel deceptricem, vel obscuram. is mentem alterius non intelligit. Conf. §. 115. 3. 79.

E. gr. Si quis audit vocem *infinite parvi*, qua utuntur Geometrae recentiores, nunquam tamen didicit, quid ea voce intellectum velint; is vel nullam cum ea jungit notionem atque adeo agnoscit, se mentem Geometrarum minime perspicere; vel ex etymologia vocis format sibi notionem quandam obscuram, vel deceptricem, quasi sit aliqua pars determinatæ magnitudinis ex determinata quadam divisione emergens, atque adeo sibi videtur mentem Geometrarum agnoscere, etsi revera eandem non agnoscat, cum istiusmodi pars infinite parva sit impossibilis, atque hinc nulla ei notio respondeat.

§. 118.

Quando alterius mentem pervertamus.

Si quis audita voce notionem aliam in se excitat, quam cum ea jungit alter, is mentem ejus pervertit seu sensum a mente ejus alienum fingit. Conf. §. 33. 36. 35.

E. gr. *Leibnitius* voce mundi denotat universam seriem rerum, qua spatium ac tempus omne repletur. Si quis in *Theodicea Leibnitiana* legens vocem mundi cum ea connectit notionem compagis cor-

corporum totalium vel status præsentis, aut alterius præteriti universitatis rerum &c. is voci *mundus* significatum tribuit a mente *Leibnitii* alienum.

§. 119.

Si quis habet notiones notarum, quæ notionem distinctam ingrediuntur, claras, novitque terminos, quibus eadem indignantur; ei notio distincta communicari potest. Qui enim notiones notarum habet claras novitque terminos, ei terminis prolati istæ in memoriam revocantur (§. 114.). Cum igitur jam & ipse sibi repræsentet ens iis notis instructum easque a se invicem distinguat; notionem istius entis distinctam habet §. 87.). Distincta igitur notio terminorum usu eidem communicari potest.

Cuiusmodi notio distincta communicari possit.

§. 120.

Terminorum usu abstractiones fiunt claræ atque distinctæ. Etenim si quis abstrahere voluerit, quæ rei cuidam insunt, is missis ceteris ad ea sola attendere debet (§. 109.). Quoniam vero sæpius aliis sunt interspersa, aut sub aliis veluti sepulta latent, difficulter admodum mens a ceteris avocatur & in ea sola omnis cogitatio convertitur. Enimvero ubi eadem terminis peculiaribus indigita; tum & clare perspicis, quænam sint ea, quæ una insunt, vel in quibus ista latent, tum eadem a se invicem distinguis. Abstractiones igitur terminorum usu fiunt claræ atque distinctæ.

Terminorum in abstractionibus usus.

§. 121.

Notio determinata est, quæ nec plures, nec pauciores habet notas, quam quæ rei repræsentandæ sufficiunt, quæ ipsi respondet.

Quando notio determinata.

Nimirum omnis notio rem quandam repræsentat (§. 33.). Omni rei quæpiam inesse intelliguntur, per quæ in esse istius entis constituitur, seu cur ad hoc genus, ad hanc speciem referatur, vel hoc individuum sit, non aliud (§. 43. & seqq.). Ita genus trianguli rectilinei constituitur per numerum ternarium rectarum spatium comprehendentium; species scaleni per inæqualitatem laterum. Quamobrem si notio determinata esse debet, ex præcise notæ ingredi debent, quæ repræ-

tando ei, quod intenditur, sufficiunt, v. gr. notionem trianguli rectilinei tanquam generis numerus ternarius laterum spatium terminantium; notionem trianguli æquilateri tanquam speciei æqualitas laterum & ita porro. Unde notionem *determinate agnoscit*, qui notas illas optime distinguit ac enumerare valet, hoc est, cujus notio est completa (§. 91.); *indeterminate* vero, cujus incompleta (§. cit.) vel abundans est notio (§. 92.).

§. 122.

Quomodo no-
tionem fiant
determinatæ
& communi-
cabilis.

Terminorum usu notiones distinctæ fiunt determinatæ & communicabiles. Notio distincta notas continet, quas in re deprehensas a se invicem distinguimus (§. 87.). Quamobrem si singulæ notæ suis terminis indigentur, tum clarissime constat, quot & quasnam notas notio data involvat. Notio igitur distincta fit determinata (§. 121.). Jam si quis notarum terminos novit, is eas alteri enumerare valet (§. 88.). Quoniam igitur alteri, qui notiones notarum habet terminosque novit, notio hac ratione communicari potest (§. 119.); terminorum usu notio distincta fit communicabilis.

§. 123.

Idem ulterius
ostenditur.

Terminorum quoque usu notiones adequatæ determinatæ fiunt & communicabiles. Conf. §. 94. 95. 122.

§. 124.

Notio confu-
sa & obscura
non est deter-
minata

Notio confusa non est determinata, multo minus obscura. Conf. §. 87. 121. & 79.

§. 125.

Significatus fi-
xus termini
notionem
confusam si-
gnificantia.

Si notio confusa nihil prorsus distincti continet, significatus termini, cui respondet, fixus est. Etenim notio confusa cum sit clara (§. 87.), notas exhibet nobis ad rem agnoscendam atque ab aliis discernendam sufficientes (§. 79.). Quoniam vero nihil prorsus distincti continet, fieri non potest, ut in aliquo casu ad alia attendamus, quæ in numerum notarum minime sunt referenda, consequenter non ingredi debent notionem rei termino aliquo indigitatæ. Terminus itaque cum nobis continuo eandem rem sine ulla mutatione exhibeat; significatus ejus fixus est (§. 127.).

E. gr.

E. gr. Notio coloris rubri est confusa & ne minimum quidem distincti continet. Nullum ergo periculum est, ut uno tempore voce *rubedinis* una designemus, quod alio sub ea non comprehendimus.

§. 126.

Si notio confusa aliquid distincti contineat, vel rei, in qua aliquid confuse percipitur, insint alia, quæ a ceteris distingui possunt; significatus termini, qui ei respondet, variationem aliquam subinde admittit. Etenim si notio confusa est, notas, quæ ad eam pertinent, distinguere non valemus (§. 87.). Quare si rei insint præterea a ceteris optime discernibilia, de quibus minime constat, num ad notas sint referenda, nec ne; fieri omnino potest, ut subinde ad ea attendamus, dum termino prolato notionem nobis in memoriam revocamus, vel rem denovo oblatam agnoscimus, quæ alio tempore a notione removemus. Quamobrem cum rem eodem termino denotatam tunc paulo aliter nobis repræsentemus, quam alio tempore; significatus ejus non constanter idem, adeoque minime fixus est (§. 127.). Quod si quædam ad notionem spectantia possint a ceteris distingui, aliis notis indiscernibilibus, saltem respectu cognoscentis; tum utique accidere potest, ut discernibilia sola ad notionem referamus, atque adeo significatum termini angustiore redamus. In hoc igitur quoque casu significatus minime fixus est (§. 127.).

Significatus termini notio-
nis confuse si-
gni vagus.

E. gr. Qui audit, mundum constare ex cælo & terra, vel cælum pariter ac terram ad mundum referri; is confusa notione sibi repræsentat mundum tanquam compositum ex cælo & terra, eum cum domo comparans, cujus tectum sit cælum, pars habitabilis terra. Quoniam in cælis distinguit sidera, in terra mineralia, fluvios, alia &c. alio tempore ad stellas animum advertit, dum de cælo cogitat, vel ad corpora partialia in Tellure, dum hæc mentem ejus subit. Mundum igitur tum sibi repræsentat tanquam complexum siderum ac corporum partialium in Tellure. Alius adhuc aliter eundem sibi imaginatur, prout ad hoc potius attendit, quam ad aliud. Atque hinc accidit, ut, qui cum voce *mundus* notionem confusam conjungant,

non eandem prorsus cum eadem constanter jungant, sicque minus fixus sit ejusdem significatus.

§. 127.

Termini fixi
& vagi defini-
tio.

Terminus fixus est seu fixi significatus, cui notio invariata constanter respondet. Terminus vero vagus est, cui non constanter invariata respondet notio.

§. 128.

Significatus
termini quan-
do fixus.

Si quis notas enumerare valet notionem distinctam completam ingredientem, is termino eam denotanti tribuit significatum fixum. Conf. §. 91. 87. 35. 122. 121. 114. 127.

Hæc sane, non alia ratio est, cur termini Mathematicorum sint fixi.

§. 129.

Termini si-
gnificatus
quando va-
gus.

Si quis cum voce jungit notionem obscuram, vel confusam, cui aliquid distincti admiscetur, aut si in re confuse percepta distincte perceptibilia insint, termini significatus vagus est. Denotione obscura vide §. 124. coll. §§. 35. 79. 127. de confusa vide §. 126. sq.

§. 130.

Quando ter-
minum intel-
ligere nobis
videamur
absque notio-
ne.

Si termino quodam crebro utamur, cum nos satis intelligere arbitramur, etsi ad notionem eidem respondentem non attendamus. Si quem terminum prima vice audimus, exemplo querimus, quid significet. Ubi autem notionem eidem respondentem cum ipso sæpius animo recolimus; audito termino, de notione ipsi respondente non amplius sumus solliciti. Sufficit nobis utcumque meminisse, nos olim notionem ei respondentem considerasse, adeoque eum non esse sine mente sonum. Unde discursu continuo plurima fundimus verba non attendentes ad notiones singulis respondentes: id quod in tanta celeritate, qua proferuntur, fieri prorsus nequit.

§. 131.

Termini fami-
liaris defini-
tio.

Terminus nobis dicitur familiaris, quem nos intelligere putamus, etsi ad notionem, quæ eodem denotatur, non attendamus. Ut adeo pateat, crebro usu terminos nobis familiares reddi.

§. 132.

§. 132.

Patet hinc ulterius, *nos in legendo aliquo scripto nonnisi lento gradu progredi posse, quamdiu termini ibi occurrentes nobis non fuerint familiares.* Tum enim hæremus in significato ipsorum, adeoque non ante certi sumus, nos eum assequi, quam notionem eidem respondentem in memoriam revocamus (§. 131.).

Difficultas in
alterius menti
assequenda
hinc orta.

§. 133.

Si ex terminis simplicibus, quibus singulis sua respondet notio, formetur terminus complexus; videmur nobis notionem habere ei respondentem, etsi terminus revera sit inanis. Si enim singulis terminis, ex quibus complexus formatur, sua responderet notio nobis perfecta; eo prolato mentem nostram subeunt notiones terminis simplicibus respondentes (§. 114.), adeoque intelligere nobis videmur mentem propriam vel alterius (§. 115.). Fieri autem potest, ut notiones talia repræsentent, quæ una inesse nequeunt, consequenter ut terminus complexus contradictionem involvat. Quamobrem cum in numero impossibilem habeatur, quod contradictionem involvit, impossibili autem notio nulla respondere queat (§. 33.); termino in præsentia casu nulla notio responderi nisi deceptor, adeoque inanis est (§. 37.).

Notio deceptor
termino
complexo de-
notata.

E. gr. Si quis *Bilineum rectilineum* dicat, tum intelligere videmur mentem alterius atque bilinei rectilinei notionem habere eamque distinctam; quod nempe sit figura duabus lineis rectis terminata. Enimvero cum duæ lineæ rectæ spatium comprehendere non possint (§. 170. Geom.); bilineum rectilineum impossibile est atque adeo nulla eidem notio responderet.

§. 134.

Si quis ejus, quod observat, rationem redditurus causam termino indigat, huic autem non aliam jungit notionem quam ejus, quod observat; tum sibi videtur habere notionem termino respondentem, utut revera is sit inanis. Dum quis causam & id, cujus rationem reddere debet, hic a se invicem distinguit tanquam entia duo, quorum unum alterum non est; non tamen nisi unius notionem habet, nempe ejus, quod observat: causæ, cujus sibi aliquam notionem habere videtur, revera nullam

Notio deceptor
causæ.

nullam habet. Terminus itaque, quo eam indigitat, inanis est.

E. gr. Observamus ferrum a magnete attrahi ejusque polo adhærere. Notionem habemus hujus attractionis, quatenus est phenomenon quoddam seu effectus naturæ. Adefse debere phænomeni hujus causam, ratione convincimur. Eam etsi adhuc ignoratam anticipando termino quodam indigitare licet (§. 36.). Solet itaque appellari *vis attractrix*. Jam si quis notionem phænomeni seu effectus a se observati transfert ad causam eamque considerat per modum entitatis in magnete, per quam motus ferri ad magnetem ejusque adhæsiō producitur; tum sibi videtur habere notionem *vis attractricis magnetis*, cum tamen nullam habeat, adeoque *vis illa attractrix magnetis* est terminus inanis (§. 37.), & qui eam allegat tanquam causam motus ferri ad magnetem atque mutæ adhæsiōis, dat sine mente sonos.

§. 135.

Notionis generatix in de-
ceptricem de-
generatio.

Si quis causam ejus, quod observat, repræsentat tanquam ens, a quo id, quod observat, proficisci potest; is illius notionem habet, sed inde rationem reddere nequit ejus quod observat.

Scilicet cum idem per idem explicari non possit; ex ista notione reddi nequit ratio ejus, quod observatur. Si affirmes id fieri posse: dicendum erit, id, quod fieri observamus ideo fieri, quod fiat. Enimvero cum tale quid affirmare idem sit ac nugari, quod per se patet; quamdiu cum termino causam ejus denotante, quod observamus, non aliam notionem conjungis, quam quæ exhibet id quod observamus, ex ea hujus rationem reddere non potes.

E. gr. Si quis vim attractricem magnetis concipit tanquam ens, quod efficit motum ferri ad eundem & adhæsiōem cum eodem, is ejus utique aliquam habet notionem. Enimvero ex hac notione rationem reddere nequit, cur ferrum ad magnetem moveatur ejusque polo adhæreat. Si quis enim vim attractricem, cujus non aliam habet notionem, quam quæ motui ferri ad magnetem respondet, tanquam ejus causam alleget; is dicit, ferrum moveri ad magnetem
cique

eique adhærere, quia ad eundem movetur eique adhæret, adeoque nugatur.

§. 136.

Notio, qua repræsentatur res, cui indigitandæ terminus significatus & aliquis destinatur, *significatum* ejus *proprium* constituit. Et termini proprii definitio. terminus tamdiu *proprie sumi* dicitur, quamdiu eidem illa notio attribuitur, immo ipse *terminus* respectu hujus notionis, consequenter etiam rei, quæ ista repræsentatur (§. 36.), *proprius* appellatur, tanquam signum hujus notionis vel rei proprium.

§. 137.

Significatus vocum in communi sermone proprius constituit *usum loquendi*. Ut adeo usum loquendi observet, qui di quid sit. Ut vocibus seu terminis eas tribuit notiones, quibus res repræsentantur iis communi sermone indigitatæ.

E. gr. In communi sermone vox Sol sumitur pro luminari magno, quod lucem ac calorem Terræ subministrat. Usus igitur loquendi fert, ut voci *Solis* notio tribuatur, qua istud, non aliud corpus mundi totale repræsentatur.

§. 138.

Usui loquendi in sermone communi respondet in disciplinis ac arte *receptus terminorum significatus*, qui est significatus eorum in disciplinis ac arte proprius. Quamdiu adeo termino tribuimus notionem, qua res eadem repræsentatur, cui significandæ in disciplinis vel arte is destinatur; tamdiu a recepto significato non recedimus (§. 137.).

§. 139.

Si ejusdem rei plures formari possunt notiones distinctæ completæ, termini significatus idem est, quæcumque eidem jungere volueris. Si enim notiones rei, quæ formantur, fuerint completæ, unaquæque illarum notas sufficientes exhibet ad rem eandem in statu quolibet agnoscendam & ab aliis distinguendam (§. 91.). Quæcumque igitur earum termino jungas, nunquam ramen eundem nisi eidem rei tribues (§. 47.), consequenter idem significatus subsistit (§. 36.).

E. gr. Pentagonum regulare plures admittit notiones completas. Nam agnosci & ab aliis figuris distingui potest tum per laterum numerum (Logica contracta.)

K

rum

rum eorumque & angulorum æqualitatem, tum quod latera sint quinque & æqualia, ipsum vero circulo inscriptibile, tum quod singuli anguli contineant $\frac{2}{3}$ unius recti, seu quod excedant rectum parte ipsius quinta. Termini igitur *pentagoni regularis* idem est significatus, quibuscunque notis utaris ad notionem ejus completam formandam: notio enim constanter eandem figuram repræsentat.

§. 140.

Alius casus.

Si quis habet ejusdem rei notionem claram, sed confusam, alter vero distinctam, quam termino conjungit; ejus significatus idem est. Notio clara notas exhibet ad rem agnoscendam atque ab aliis discernendam sufficientes (§. 79.), utur qui distinctam habet, notas istas distinguere valeat, qui vero non nisi confusa utitur eas distinguere non possit (§. 87.). Enimvero quamdiu notæ sufficiunt ad rem oblatam agnoscendam atque ab aliis discernendam, sive eas distinguere possis, sive minus; nunquam eveniet, ut terminum tanquam nomen rebus diversis tribuas (§. 47.), consequenter significatus idem subsistit (§. 36.).

§. 141.

Casus tertius.

Hinc consequitur, nec ob stare eidem significatui termini, si alter notas ad rem agnoscendam & ab aliis discernendam sufficientes rite enumerare valeat, alter vero easdem enumeraturus fundat sine mente sonos, vel notas alleget alienas, vel insufficientes notione confusa genuina instructus eaque impeditus, ne defectum notionis distinctæ atque completæ agnoscat.

§. 142.

Significatus termini quando diversus.

Si duo cum eodem termino jungunt notiones rebus diversis convenientes, ejus significatus diversus est. Conf. §. 36.

§. 143.

Casus alius.

Eodem modo patet, terminum in diverso significato accipi ab eodem autore, si non constanter ei notionem jungat, quæ eadem res denotatur.

§. 144.

Significatus & termini improprie definitio.

Si terminus quidam a significato proprio transfertur ad significandam rem aliam suo termino proprio licet non destitutam, ob quandam similitudinem; significatus iste dicitur improprius & vox sumi improprie fertur, immo ipse terminus improprie.

proprius audit respectu hujus rei, ad quam significandum transfertur.

E. gr. Vocis *Oculi* significatus proprius est, si sumitur de organo corporis, quo mediante videmus. Enimvero si eadem vox transfertur ad intellectum, isque dicitur *Oculus mentis*; tum eadem vox improprie sumitur. Habet enim ista animæ facultas, qua cognoscimus, quæ sunt & esse possunt, proprium sibi terminum, quo denotatur, nempe vocem *intellectus*. Supponitur autem hic aliqua inter oculum & intellectum similitudo, ob quam nomen istius organi tribuitur huic facultati.

§. 145.

Si quis termino ad rem quandam significandum destinato jungit notionem rei alterius, is significatum ejus immutat. Etenim notio, qua representatur res, cui indigitandæ terminus aliquis destinatur, significatum proprium ejus constituit (§. 136.). Quodsi ergo in locum hujus notionis subtilitas notionem rei alterius; termini significatum utique immutat.

Significatus termini quando mutetur.

§. 146.

Si terminus aliquis rei cuidam significandæ destinatus præterea adhuc rei significandæ alii, cujus notionem habemus, destinatur; significatus posterior perinde proprius est ac prior. Proprium enim significatum constituit notio, qua res representatur, cui indigitandæ terminus destinatur (§. 136.). Quodsi ergo duas habueris rerum diversarum notiones & utramque eidem termino jungas; non minus unius, quam alterius significatus proprius erit.

Significatus duo proprii ejusdem termini.

Fieri autem potest, ut citra confusionem, idem terminus duos habeat significatus proprios, nempe alium in communi vita vel arte, alium in data quadam disciplina, vel alium in hac, alium in altera disciplina. E. gr. Arcus & sagitta suos habent significatus proprios in vita communi, sunt enim voces eisdem rebus significandis destinatæ, quarum tanquam instrumentorum obviorem notiones habemus minimum confusas. Enimvero in Geometria iisdem vocibus alius tribuitur significatus, cum arcus pro parte lineæ curvæ, sagitta pro recta ex arcu ad medium chordæ perpendiculariter ducta sumitur. Non minus vero significatus arcus & sagittæ proprius est in Geometria, quam in vita communi. Nec ex diversitate significatarum priorum ulla nascitur

confusio, propterea quod circumstantiæ, dum vocibus istis utimur, satis superque loquuntur, num in sensu geometrico, an in communi eadem accipiantur. Nos in Psychologia multis utimur terminis a rebus materialibus ad animam translatis, sed non in sensu improprio, quoniam singulis notiones tribuimus, quibus aliquid in anima indigitatur, ita ut significatus subsisteret, etiamsi eadem voces nunquam de rebus materialibus fuissent usurpatæ.

§. 147.

Terminus clarus quando fit ignotus.

Si terminus, cui proprius quidam significatus competit, præterea adhuc rei alii significandæ destinatur, ejus notionem vel nullam, vel saltem obscuram habemus; erit is in altero hoc casu inanis. Etenim si terminus, cui proprius quidam significatus competit, alii rei adhuc significandæ destinatur, notio significatum proprium constituens (§. 136.) ei demitur, ut significatu omni vacuus censeretur debeat. Quamobrem ubi ejus rei, cui significandæ destinatur, notionem vel nullam, vel saltem obscuram habemus; termino quoque novo significato imbuendo notionem claram tribuere nequimus, multo minus distinctam completam. Quoniam tamen propter notionem ab eo removendam aliquam sibi habere videtur, terminum ideo clarum existimans (§. 80.), vel etiam ob familiaritatem (§. 130.); notionem nonnisi deceptivam termino jungit, quæ cognoscenti imponit, cum is in hoc casu revera sit sine mente sonus (§. 37.).

E. gr. Vox *metus*, quatenus denorat quandam animi humani passionem, ortam ob imminens periculum, proprium habet significatum. Enimvero quando a Scholasticis natura tribuitur ob imminens vacuum, nulla ei notio respondet, adeoque sine mente sonus est.

§. 148.

Significatus proprius quomodo detegatur.

Quod si in significato vocis, quem ipsi tribuit usus loquendi, inquirere jubeamur, tum 1. varii cogitandi sunt casus, in quibus voce illa utimur. 2. quæcunque in re illa distingui possunt, cui inest quod voce indigitatur, sedulo sunt distinguenda. 3. examinandum, quænam sint illa, ob quæ voce ista hic utimur, dum scilicet casus alios in memoriam nobis revocantes attendimus, utrum adhuc voce ista sumus usuri nec ne, si hoc vel istud abesse

abesset, vel si hoc aut istud solum adesset. Hac sane ratione detegemus notas, quæ notionem ingredi debent voce data designatam. Jam adde §. 137. 87. 78. 47.

Præsens problema de investigando sensu vocum proprio, quem ex usu loquendi obtinent, magnæ est utilitatis. Conf. §. 135. *Disc. præl.* Et in ejus resolutione una continentur principia, unde demonstrari potest, vocem aliquam in recepta significatione sumi. E. gr. Si quis quærit significatum vocis *lux*, quem ex usu loquendi obtinet; ei attendendum est ad eos casus, in quibus lucem adesse dicit, tum & ad oppositos, in quibus eam adesse negat, ut appareat, quænam sint ea, ob quæ lucem adesse asseramus. Quoniam itaque deprehendimus, nos, quod lux adsit, inde agnoscere, quod corpora circumjuncta videre possimus; eam autem nondum adesse affirmamus, quando eadem videre nondum licet: ideo hinc constat, voce *lucis* ex usu loquendi id denotari, vi cuius corpora videri possunt.

CAPUT. IV.

DE DEFINITIONIBUS.

§. 149.

Definitio est oratio, qua significatur notio completa atque determinata termino cuiquam respondens. Sumitur subinde pro ipsa notione completa atque determinata rei termino denotatæ. Ipse autem terminus aut res eodem indigitata *Definitum* appellatur.

Definitionis definitio.

Distinguiamus notionem completam atque determinatam a definitione, tanquam signum a re significata, quemadmodum notio a termino (§. 35.), enuntiatio a iudicio (§. 40.) a nobis fuit distincta. Dicimus, notionem esse debere completam atque determinatam. Conf. §. 91. & 121.

§. 150.

In definitione enumerari debent notæ nec plures, nec pauciores, quam quæ ad rem definitam agnoscendam & ab aliis distinguendum sufficiunt. Vide §. 149. 91. 121. 40. 36.

Quot notæ in definitione enumerandæ.

E. c. Definitionem Dei conditurus non plura ejus attributa in ea enumerare debet, quam quæ ad eum ab aliis rebus discernendum sufficiunt: cetera ad judicia de Deo formanda, seu propositiones spectant.

§. 151.

Quænam definitionem ingredi possint.

Definitionem ingredi non debent, nisi quæ rei definiendæ intrinsecæ sunt. Conf. §. 150. 78.

§. 152.

Possibilitates rei intrinsecæ.

Si quid in definito possibile concipitur, illa possibilitas tanquam intrinsecum quid consideranda. Si quid in definito possibile, seu esse, vel fieri posse concipitur, ratio quoque in eo esse debet, cur id in eodem possibile sit, consequenter datur quidpiam actu in definito, propter quod alterum possibile (§. 3. *Disc. præl.*). Quamobrem possibilitas ista, quæ per quidpiam inexistentis una determinatur, concipitur per modum rei actu existentis atque adeo recte tanquam intrinsecum quid consideratur.

E. gr. Plumbum vi ignis liquefieri potest. Ratio, cur liquefieri possit, pendet ab ejus textura & qualitatibus massarum simpliciorum, quæ mixtionem ingrediuntur, quemadmodum in Physica docetur. Immo sufficit hic nobis generaliter cognovisse, dari aliquid in plumbo, per quod liquabile concipitur. Liquabilitas igitur concipitur tanquam quidpiam plumbo intrinsecum & inter notas recensetur, per quas metallum istud ab aliis corporibus distinguitur.

§. 153.

Modorum & relationum possibilitates.

Hinc consequitur, *modorum quorumcunque atque relationum ad alia possibilitates tanquam rei intrinsecas considerandas esse.* Ersi enim modi per essentialia entis non determinentur, ut actu insint (§. 66.); attamen per essentialia eorum possibilitas determinatur, ut res data dati cujusdam modi capax sit. Si negas; causa eadem rei cuilibet eundem modum inducere valebit, hoc est, ignis lignum vel lapidem perinde liquabit ac metallum: quod absurdum est atque experientiæ repugnat. Non aliter res habet cum relationibus, quæ per essentialia entis non ita determinantur, ut actu insint.

§. 154.

§. 154.

Possibilitates, quæ per omnia essentialia simul determinan- tur, inesse intelliguntur per modum attributorum propriorum; quæ vero per unum vel aliquot eorum determinantur, per modum attributorum communium. Conf. §. 65 & 152.

Possibilitates
inter attributa
referendæ.

§. 155.

Quod in re quodam non concipitur possibile, nisi præsupposito quodam ejus modo, ejus possibilitas concipitur instar alicujus modi. Possibilitas, quæ in re non potest admitti; nisi præsentem modo, cum non per ea determinetur, quæ constanter insunt (§. 66.), tanquam mutabilis, adeoque instar alicujus modi concipi debet (§. cit.).

Possibilitates
inter modos
referendæ.

§. 156.

Definitionem termini conditurus notionem habere debet rei, quam is denotat, distinctam & notarum nosse terminos, quæ eam ingrediuntur. Vide §. 150. 89. 35. 36.

Notitia ad de-
finiendum re-
quisita.

§. 157.

In definitionibus non utendum est terminis nisi propriis & fixis. Definitiones condimus eum in finem, ut alteri significemus notionem completam atque determinatam, quæ termino definito responderet (§. 149.). Sed cum alter mentem nostram non intelligat, nisi auditis vocibus easdem in se notiones excitare valer, quæ cum terminis, quæ definitionem ingrediuntur, conjunguntur (§. 115.); singulis invariata respondere debet notio (§. 127.).

Quales termi-
ni ad defini-
tionem requi-
rantur.

Porro definitionem conditurus enumerare debet notas, quot ad rem definitam agnoscendam atque ab aliis distinguendam sufficiunt (§. 150.), adeoque proferre terminos, quæ notis istis indigitandis destinantur (§. 35.). Enimvero si termino attribuitur notio, cui indigitandæ destinatur, in significato proprio eundem sumimus (§. 136.). Termini igitur definitionem ingredienti in significato proprio sumi debent.

§. 158.

Quoniam terminus, præter significatum proprium, quem habet, alium præterea acquirit, dum adhuc rei cuidam alii significandæ destinatur (§. 146.); in definitionibus uti licet terminis, qui a proprio significato ad alium transferuntur, modo ii ante de-

Idem ulterius
ostenditur.

fini-

finitione fuerint explicati, ne scilicet eis prolatis alter eisdem jungat notiones vulgo eis tributas (§. 114.), sicque mentem definientis non assequatur (§. 117.).

§. 159.

Idem adhuc
ulterius ostenditur.

Terminis definitionem ingredientibus aut utendum est in recepto significatu, aut ii ante definiendi sunt, quam iisdem utamur. Definitionem eam in finem condimus, ut alteri significemus notionem completam atque determinatam, quam termino dato tribuimus (§. 149.). Alter igitur mentem nostram intelligere, adeoque perspectos habere debet terminos nosseque notiones, quæ iis junguntur in definitione (§. 116.). Quoniam itaque eas notiones singulis terminis definitionem ingredientibus tribuere tenemur, quæ rebus conveniunt, quibus denotandis vel in communi sermone, vel in disciplinis ac arte termini isti destinantur; terminis utendum est, quemadmodum fert usus loquenti (§. 137.), atque in recepto significatu (§. 138.).

Quodsi terminum quendam ante definiamus, quam eodem in definitione aliqua utamur, patet utique, quænam notio eidem sit tribuenda (§. 149.), atque adeo qui præcedentem definitionem novit, eo audito notionem convenientem in se excitare valet (§. 114.), consequenter mentem definientis assequitur (§. 115.).

§. 160.

Termini in
definitione
cur esse debeant
clari.

In definitionibus utendum est terminis clavis, non obscuris. Lege §. 150. 79. 87. Si negas: sufficient obscuræ. Notas adeo nec agnoscere, nec a se invicem ab aliis discernere (§. 79.), consequenter nec rem definitam ex istis notis agnoscere poteris: id quod scopo definitionis adversatur (§. 149.).

§. 161.

Quænam claritatis cura.

Cum fieri possit, ut terminus aliquis sit alteri clarus, qui alteri obscurus est (§. 81.), definiens satisfacit officio suo, *si utitur terminis, quos claros supponere licet ei, in cujus gratiam definitio conditur.*

E gr. In definitionibus astronomicis utimur terminis geometricis, qui cum in Astronomia non explicentur, nonnisi ei perspecti sunt, qui definitiones geometricas memoria tenet, aut minimum terminorum istorum

istorum notiones claras, etsi confusas, Geometria translatione sibi comparavit.

§. 162

Fieri non potest, ut in disciplinis definitiones non ingrediantur nisi termini in communi sermone usati, & ut istiusmodi termini semper respondeant usui loquendi. Vide § 150. Cum autem vulgo non omnia discernamus, quæ rebus insunt, præsertim si earum notiones fuerint abstractæ (§. 108. 109.), adeoque in notionibus confusis acquiescamus (§. 87.); non mirum, quod in sermone communi deficiant subinde termini abstracti (§. 110.). In disciplinis adeo termini vel philosophici excogitandi (§. 138. 139. *Disc. prælim.*), aut terminus in communi sermone obviuus a recepto usu loquendi ad significatum aliud non minus proprium transferendus (§. 146.), hoc est, communis in philosophicum aut *technicum* seu terminum artis transmutandus.

Cur in definiendo non tantum terminis communibus & in significato recepto uti liceat.

Datur adhuc alius casus: scilicet in definitionibus urendum est terminis fixis (§. 137.), adeoque ex iis arcentur vagi (§. 127.). Quamobrem si in communi sermone termini significatus fuerit vagus; a vago ad fixum est reducendus (§. 137. *Disc. prælim.*). Quoniam termino fixo responder notio invariata, vago autem non item (§. 127.); ubi termini significatus vagus ad fixum fuit reductus, fieri omnino potest, ut usus ejus cum communi usu loquendi subinde non consentiat (§. 137.).

§. 163.

Si definitio respondet notio confusa, nec terminis definitionem ingredientibus simul sumtis aliam tribuere valeamus notionem, nisi eandem confusam; definitio nulla est §. 150. 88.

Definitio deceptrix idem peridem explicans.

E. gr. Si quis definit *finitum* per id, quod actu terminetur undique; is cum terminatione actuali undique facta eandem notionem confusam jungit, quam finito tribuit; nullas vero enumerat notas, per quas finitudo agnoscitur. Representamus nobis aliquod extensum terminatum, dum intelligere nitimur, quid sit esse actu undique terminatum, ne verba sint sine mente sonus; sed idem extensum nobis representamus, dum cognitionem divertimus ad notionem termino finito respondentem. Definitio igitur reuera nulla est. Idem hic explicatur per idem. Sunt nempe *finitum esse* & *undique actu terminari* termini idem significantes (§. 35.).

(*Logica contracta.*)

L

§. 164.

§. 164.

Definitum cur
non possit in-
gredi defini-
tionem.

Definitum ipsum non potest ingredi definitionem. Definitum est res, quæ definiri debet (§. 149.), adeoque non aliquid rei intrinsicum, quo ad eam agnoscendam utimur, consequenter nota nulla (§. 78.). Quamobrem cum in definitione enumerari non debeant nisi notæ (§. 150.); ipsum definitum eam ingredi nequit.

E. gr. Si quis *annum* definiret per spatium annum, quo majores temporis partes metimur; is nullum dat anni definitionem: spatium enim annum & annus sunt unus idemque terminus, atque adeo definitum ingreditur definitionem. Nullam vero ipsum definitum constituit notam, unde hanc temporis partem agnoscere licet.

§. 165.

Quando id in-
exotis appa-
reat.

Si definitum fuerit species, quam denotat terminus complexus constans ex termino generis & termino differentie specificæ, & terminus genus denotans ingreditur definitionem; definitum eam non ingreditur, sed saltem nota definiti. Etenim definitum terminus complexus est constans ex termino generis & termino differentie specificæ, quo denotatur species definienda. Quamobrem si tantum terminus, quo genus denotatur, definitionem ingreditur; definitum eam non ingredi patet.

Enimvero cum genus denotet similitudinem speciei definiendæ cum speciebus aliis (§. 44.), adeoque aliquid intrinsecum hisce commune; notam aliquam speciei constituit (§. 78.). Terminus itaque genus denotans notam rei definiendæ significat, adeoque in hypothesi propositionis præsentis nota aliqua definiti definitionem ingreditur.

E. gr. Nomen *Trianguli æquilateri* est terminus complexus, constans ex nomine generis, quod est *triangulum*, & ex nomine differentie specificæ, quæ indigitatur voce *æquilaterum*. Quamobrem si *triangulum æquilaterum* definitur per triangulum, cujus singula latera inter se æqualia sunt; definitum minime ingreditur definitionem, sed tantum aliqua nota huic figuræ triangulari cum ceteris communis, nempe numerus ternarius laterum in perimetro, qui voce trianguli indigitatur.

§. 166.

Cur circulus

Definitionem ingredi nequit terminus, cujus definitionem ingre-

ingreditur definitum. Conf. §. 150. Si enim termini definitio- in definiendo
nem ingreditur definitum; definitum constituitur nota notæ sui sit vitandus.
ipſius, hoc eſt, ex ipſo definito agnoſci debet id, unde defi-
nitum agnoſcendum. Definitum adeo ante agnoſci debet,
quam agnoſci poteſt nota, unde illud agnoſcere atque ab aliis
diſtinguere debemus: Quod vero eſt abſonum.

E. gr. Si quis definit *diem* per tempus conſtans viginti quatuor ho-
ris & *horam* per partem vigefimam quartam diei; definitionem diei
ingreditur hora tanquam nota & viciffim definitionem horæ dies. In
definitione itaque diei hora ſupponitur eſſe cognita, antequam noſca-
tur, quid ſit dies, & in definitione viciffim horæ ſupponitur notus dies,
antequam conſtet, quid ſit hora.

§. 167.

Si in definitione occurrat terminus, cujus definitionem *Circuli vitioſi*
ingreditur definitum, vitium in definiendo commiſſum dicitur *definitio.*
Circulus in definiendo. Eſt adeo is vitium, quo in definitio-
nem admittitur terminus, cujus definitionem ingreditur defi-
nitum.

Vitioſum dicimus, quod regulæ repugnat (§. 164.).

§. 168.

Si terminis in definitione combinatis non reſpondet notio Definitio, cui
nifi deceptrix; definitio nulla eſt. Vide §. 133. Si ergo ponamus, *notio dece-*
verbis in definitione combinatis non reſpondere niſi notionem *p:rix reſpon-*
deceptricem, hoc eſt, non eſſe poſſibilem rem iſtiusmodi, cui *det.*
notæ iſtæ junctim ſumtæ convenient, quæ terminis in defini-
tione combinatis denotantur (§. 37.); oratio iſta nullam ſignifica-
bit notionem, atque adeo definitio non eſt (§. 149.).

§. 169.

Si eſſentialia ſufficienter enumerantur, per quæ genus ali- *Primus mo-*
quod, vel ſpecies aliqua determinatur; definitionem habemus *dus definiendi*
generis, vel ſpeciei. Conf. §. 63. 78. 71. Notionem igitur ha- *genera & ſpe-*
bemus completam (§. 91.) & determinatam generis iſtius vel ſpe- *cies.*
ciei (§. 121.) eamque verbis ſignificamus. Generis adeo atque ſpe-
ciei definitionem habemus (§. 149.).

E. gr. Triangulum rectilineum per trium laterum concurſum ad ter-
minandum ſpatium tanquam genus aliquod figurarum planarum conſti-

stituitur. Si igitur *Triangulum rectilineum* dicis esse figuram planam tribus lineis rectis terminatam; definitionem ejus habes.

§. 170.

Modus secundus.

Si attributa sufficienter enumerantur, per quæ genus aliquod, vel species aliqua determinatur; definitionem habemus generis istius, vel speciei. Vide §. 65. Si ergo attributa ad genus aliquod, vel speciem aliquam determinandum sufficiunt, ad idem quoque genus eandemque speciem agnoscendum ac ab aliis distinguendum sufficiunt. Habemus igitur notionem generis, vel speciei completam atque determinatam (§. 91. 121.) terminis expressam, consequenter definitionem (§. 149.).

E. gr. Nulla est figura plana, præter triangulum rectilineum, cujus omnes anguli simul sumti sint ad rectum in ratione dupla. Ratio igitur dupla angulorum omnium simul ad rectum est proprietas, qua triangulum rectilineum a ceteris figuris planis omnibus distinguitur. Quamobrem *triangulum rectilineum* definiti potest per figuram planam, cujus omnes anguli simul sunt ad rectum in ratione dupla.

§. 171.

Modus tertius.

Quoniam modorum quorumcunque atque relationum ad alia possibilitates tanquam rei intrinsecæ considerantur atque per modum attributorum insunt (§. 154.), per attributa vero genera & species definiri possunt (§. 170.); patet utique, *per modorum quorumcunque atque relationum ad alia possibilitates genera & species definiri posse.* E. c. *Figura regularis* est figura plana æquilatera circulo inscriptibilis.

§. 172.

Quot attributa definitionem ingredi debeant.

Attributorum propriorum nonnisi unum definitionem ingredi debet; communia vero tot ingrediuntur, quot junctim sumpta nonnisi definito competunt. De propriis vide §. 65. 150. 78.

Contra communia attributa per unum vel aliquot essentialia determinantur (§. 65.), atque adeo omnibus istis generibus vel speciebus competunt, quæ essentialia ista communia habent. Unum igitur eorum ad rem definiendam agnoscendam atque ab aliis distinguendam non sufficit, consequenter unum definitioni non satisfacit (§. 150.). Enimvero si plura sumantur attributa communia, quæ simul sumpta per omnia essentialia determinantur; ista simul sumpta nonnisi ænti conveniunt ista essentialia habenti;

benti; consequenter uni attributo proprio æquivalent, atque adeo ea simul definitionem ingredi debent.

E. gr. Proprietas trianguli rectilinei est, quod summa angulorum sit ad rectum in ratione dupli. Una igitur triangulo rectilineo definiendo sufficit. Triangulum æquilaterum habet angulos æquales: sed hæc æqualitas cum pendeat ab æqualitate laterum, quod essentiale commune est omnibus figuris æquilateralis circulo inscriptibilibus, eadem quoque proprietas communis est figurarum earundem. Nullum attributum Dei est ipsi cum ente alio commune, si determinate sumitur, prout attributum est entis infiniti, seu perfectissimi. Quamobrem omne attributum Deo definiendo sufficit, nec leges definiendi observat, qui plura cumulat (§. 150.).

§. 173.

Quoniam modorum quorundam ac relationum possibilitates insunt per modum attributorum propriorum; aliæ autem per modum attributorum communium (§. 154.), atque adeo istæ attributis propriis, hæc communibus æquivalent; *istarum una, earum vero tot, quot junctim sunt æ non nisi definito convenient, definitioni sufficiunt* (§. 172.).

Quot modorum & relationum possibilitates ingredi debent definitionem.

E. gr. Auri solubilitas in aqua regis est modi possibilitas, quæ auro per modum attributi inest. Hæc igitur nota cum insolubilitate in aqua forti sufficit ad aurum ab aliis metallis distinguendum, atque adeo ibidem aurum definiti potest per metallum in aqua regis solubile & aqua forti insolubile.

§. 174.

Definitionem ingredi nequeunt modi. Vide §. 66. 78. 150.

E. gr. Nec frigus, nec calor constitui nota lapidis, neque adeo definitionem ipsius ingredi potest.

Modi cur ingredi nequeant definitionem.

§. 175.

Quoniam modorum & relationum possibilitates, quæ instar alicujus modi insunt (§. 155.); modis æquivalent, modi autem definitionem ingredi nequeunt (§. 174.); evidens est, *nec definitionem ingredi posse modorum atque relationum possibilitates, quæ instar alicujus modi insunt.*

Cur nec possibilitates quædam.

§. 176.

Per definitiones res ad suas species & genera distincte reducantur.

Definitiones du. reducantur res

ad sua genera & species. *ducuntur.* Vide §§. 151. 63. 64. 66. 153. 154. 155. 174. 175. 169. 170. 171. 69. 70. 150. 89.

§. 177.

Quando definitio constare debeat ex essentialibus.

Si essentialia fuerint perspecta, definitum per ea definiri debet. Genera & species per essentialia determinantur (§. 69.), quibus aliquid prius in definito concipi non potest; tanquam ab aliis prorsus independentibus (§. 62. 63.). Enimvero per definitiones res ad sua genera atque species distincte reducuntur (§. 176.), facta nempe distincta singulorum, per quæ determinantur, enumeratione (§. 150.).

§. 178.

Quando definitio conditio debet ex attributis.

Si essentialia ignorentur, definitum per attributa definiri potest. Etenim ignoratis essentialibus genera & species per attributa determinari possunt (§. 70.). Patet igitur eodem, quo in præcedente demonstratione, modo, definitum ignoratis essentialibus per attributa definiri posse.

§. 179.

Quando possibilitates definitionem ingrediantur.

Si essentialia & attributa sive omnia, sive aliqua ignorentur, definitum definiri potest per meras modorum atque relationum possibilitates, quæ per modum attributi insunt, vel per attributa & istiusmodi possibilitates, quæ simul non nisi definito conveniunt. Modorum atque relationum possibilitates, quæ per modum attributorum insunt, attributis æquivalent (§. 154.), adeoque in eorum locum surrogari possunt. Quoniam itaque genera & species per attributa definiri possunt (§. 170.); eadem quoque per possibilitates istas definire licet.

Quodsi attributa communia notas sufficientes non præbent; eodem modo patet, posse in supplementum assumi aliquam possibilitatem alicujus modi, vel relationis, quæ per modum attributi inest, donec notarum numerus compleatur (§. 150.).

E. gr. Pentagonum per diagonales ex eodem angulo eductas in tria triangula dividi potest. Id soli pentagono accidit, atque adeo ista divisibilitas per modum attributi proprii inest. Quamobrem (§. 172.) *pentagonum* definiri potest per figuram planam, quæ per diagonales ex uno angulo eductas in tria triangula resolvi potest.

§. 180.

§. 180.

Notio speciei constat ex notione generis atque differentia specifica. Notio speciei repræsentat ea, quæ pluribus speciebus communia sunt, ac præterea ea, quibus species istæ a ceteris ad idem genus relatis differunt (§. 43. 44.). Notio igitur speciei ex generis atque differentia specificæ notione componitur (§. 74.).

Notio speciei
quid involvat.

§. 181.

Quoniam genus inferius se habet ad superius ut species ad suum genus, seu respectu generis superioris pro specie habetur (§. 46.); patet ulterius, notionem generis inferioris componi ex notione superioris & notione differentia generis inferioris a ceteris, quæ ad idem superius tanquam species referuntur.

Notio generis
inferioris
quid involvat.

§. 182.

Notas ad definitum agnoscendum & ab aliis discernendum sufficientes præbent genus atque differentia specifica. Omnes definitiones vel sunt definitiones specierum, vel generum, quæ superiorum respectu tanquam species considerari possunt. Vide §. 176. 46. Notio speciei componitur ex notione generis atque notione differentia specificæ (§. 180.) & notio generis inferioris ex notione superioris atque notione differentia ab aliis inferioribus ad idem superius relatis (§. 181.), hoc est, ex suo genere atque sua differentia specifica. Quare notas ad definitum agnoscendum & ab aliis discernendum sufficientes præbent genus & differentia specifica.

Genus & differentia specifica
cur notioni completæ sufficiant.

§. 183.

Genus & differentia specifica ad definitionem sufficiunt. Conf. §. 150. 182.

Eadem cur
sufficiant definitioni.

§. 184.

Si vel genus definitum fuerit, vel termino, quo denotatur, respondet notio clara, sed confusa; in definitione tantum ponitur terminus, quo genus denotatur, nequaquam ipsius notæ singillatim enumerantur. Si enim genus fuit definitum, termino ejus respondet notio completa atque determinata (§. 149.). Jam conf. §. 91. 121. 114. Non ergo opus est, ut notæ generis in definitione

Quomodo genus
ingredietur definitionem.

nitio.

initione recenseantur, sed sufficit in ea poni solum terminum, quo genus denotatur.

Si termino, quo genus denotatur, respondet notio clara, etsi confusa; ea adhuc sufficit ad rem agnoscendam atque ab aliis distinguendam (§. 79. 87.). Integra igitur generis notio habetur pro nota una definiti; atque adeo, cum in definitione notæ enumerandæ sint (§. 150.), terminum, quo genus denotatur, in ea poni sufficit.

E. gr. Si *triangulum* in genere fuit definitum per figuram tribus lateribus comprehensam, fueritque ulterius in specie definiendum *triangulum scalenum*; non opus est, ut figuræ atque numeri ternarii laterum, quæ trianguli in genere notæ sunt, expressa mentio fiat; sed sufficit, si *triangulum scalenum* dicatur triangulum.

§. 185.

Quando notas generis & differentię specificę permisceri liceat.

Si genus non fuit definitum, vel quæ ad id pertinent, nondum determinatâ notione comprehenduntur; in definitione promiscue enumerantur notæ definiti, non attento generis & differentię specificę discrimine. Etenim si genus nondum definitum fuit, adeoque determinatâ notione comprehenditur (§. 149.); nondum discernere licet notas in notione rei distincta ad genus pertinentes a ceteris (§. 121.). Quodsi tamen omnes simul suntæ totidem præcise fuerint, quot ad rem agnoscendam & ab aliis distinguendam requiruntur; ad definitionem sufficiunt (§. 150.). Eas igitur enumerare licet promiscue, non attento discrimine inter notas generis atque differentię specificę.

E. gr. Si figura quadrilatera rectilinea in genere non fuit definita, quod sit figura plana quatuor lineis rectis terminata; notas ad genus pertinentes definitioni *Quadrati* in specie inferere licet, ita ut ipsum dicamus figuram planam quatuor lineis rectis ad angulos rectos invicem iunctis atque æqualibus terminatam.

§. 186.

Quando notas generis & differentię specificę permisceri non ferenda.

Si notas ad genus & differentiam specificam pertinentes discernere valeamus; nonnisi terminus genus denotans definitionem ingredi debet, nequaquam autem notæ generis cum notis differentię specificę sunt permiscendæ. Per definitiones res distinctæ ad sua genera suasque species reducuntur (§. 176.), ut in dato

dato quolibet casu judicari possit, ad quodnam genus & ad quam speciem eæ sint referendæ (§. 47.). Quamobrem ubi notæ generis & differentię specificæ distingui a se invicem possunt; eas distingui præstat. Nequaquam igitur notæ generis cum notis differentię specificæ sunt permiscendæ; sed nonnisi terminus genus denotans in hypotheli præfenti in definitionem admittendus.

§. 187.

In definitione genus proximum seu inferius præfertur remotiori seu superiori. Etenim in definitione notæ ad genus pertinentes non permiscendæ sunt cum notis differentiam specificam constituentibus (§. 186.). Enimvero cum genus remotius seu superius aliqua tantum contineat, quæ notio generis inferioris seu proximi speciei definiendæ involvit (§. 46.); si remotius in definitione ponitur, aliqua ad genus spectantia cum iis commisceri debent, quæ differentiam specificam constituunt.

Cur definitio
postulet genus
proximum.

E. gr. Si *triangulum rectangulum* definitur per figuram planam, tribus lineis rectis terminatam, quarum duæ angulum rectum intercipiunt; generis loco ponitur genus remotius, nempe figura plana, quod proximum nempe triangulum tanquam speciem sui sub se continet. Ideo numerus laterum ternarius ad genus spectans cum differentia commiscetur specificæ, nempe quod duo latera angulum rectum intercipiunt. Enimvero si in definitione trianguli rectanguli genus proximum ponitur, quod est *triangulum*, confusio ista evitatur & trianguli rectanguli definitio concinnior prodit, quod sit triangulum, cujus unus angulus rectus est.

§. 188.

Definitio, per quam non patet rem definitam esse possibilem, *nominalis* dicitur. Ast *definitio*, per quam patet rem definitam esse possibilem, *realis* vocatur.

Differentia
definitionis
nominalis &
realis.

E. gr. Si *Circulus* definitur per figuram planam, linea in se redeunte terminatam cujus singula puncta a puncto quodam intermedio æqualiter distant; definitio nominalis est: neque enim ex ea apparet, num istiusmodi figura plana sit possibilis, consequenter an definito respondeat aliqua notio, an vero sit sine mente sonus. Enimvero si idem *Circulus* definitur per figuram, motu lineæ rectæ circa punctum fixum in plano descriptam, ex definitione patet, istiusmodi figuram possibilem esse: definitio itaque realis est.

(Logica contracta.)

M

§. 189.

§. 189.

Differentia
definitionum
essentialium
& accidenta-
lium.

Definitionem essentialem appello, in qua enumerantur essentialia, per quæ definitum determinatur. *Accidentalem* dico, in qua enumerantur vel attributa, vel quæ per modum attributorum insunt, modorum ac relationum possibilitates, quibus definitum determinatur.

§. 190.

Quænam de-
finitiones sint
nominales.

Definitiones cum essentialia, tum accidentales sunt nominales (§. 189.). Enimvero essentialium unum non determinatur per alterum (§. 63.), adeoque non necessario conjunguntur. Quamobrem dum enumerantur; nondum liquet, utrum ens istiusmodi sit possibile, quod per ista essentialia determinatur (§. 188.).

Similiter in definitione accidentali enumerantur vel attributa definiti, vel modorum atque relationum possibilitates, quæ per modum attributorum insunt (§. 189.). Enimvero attributa determinantur per essentialia entis (§. 65.), nec minus possibilitates, quæ per modum attributorum insunt (§. 154.). Essentialibus igitur ignoratis §. 178. sq. non constat, utrum ens istiusmodi possibile sit, nec ne, cui ista attributa simul sumta conveniunt, velin quo istiusmodi relationes ac modi concipi possunt (§. 188.).

§. 191.

Definitio quæ-
dam realis.

Definitio modum exponens, quo aliquid fieri potest, realis est. Definitio, quæ modum exponit, quo aliquid fieri possit, palam facit, rem definitam esse possibilem, jam conf. §. 188.

§. 192.

Definitio ge-
netica quæ-
dam.

Definitio genetica dicitur, quæ rei genesis seu modum, quo ea fieri potest, exponit. Ut adeo appareat, definitiones geneticas esse reales (§. 191.).

§. 193.

Notitia ad de-
finitionem ge-
neticam re-
quisita.

Ex ipsa autem definitionis geneticæ definitione patet, quod *definitionem geneticam conditurus nosse debeat cum ea, quæ ad genesis rei requiruntur; tum quid unumquodque eorum ad eam conferat.*

E. gr. Circuli definitionem geneticam conditurus, nosse debet et ad ejus genesis requiri punctum & rectam, quorum illud in relatione ad circum-

culum

culum *centrum*, hæc *radius* appellatur; 2. punctum esse debere in plano fixum & lineam rectam circa hoc punctum in orbem moveri.

§. 194.

Ex hætenus dictis apparet, *definitionem nominalem* esse distinctam enumerationem notarum ad rem definitam agnoscendam & ab aliis discernendam sufficientium: *definitionem vero realem* five *genericam* esse notionem distinctam possibilitatis, aut, si mavis, modi, quo quid possibile. Definitiones nominales significatus fixos terminorum constituunt, ut eos non tribuamus nisi rebus, quibus indigitandis destinantur, atque earum ope has obvias agnoscamus. Præbent quoque prima ratiocinandi principia, ut quæ de rebus cognosci possunt inde deducantur. Ipsæ autem genericæ definitiones hunc inprimis præstant usum, ut, quæ rei definitæ conveniunt, inde facilius deduci possint, utque ratio reddatur eorum, quæ insunt quæque inesse possunt. Præxin investigandarum notionum distinctarum & condendarum definitionum hic nondum tradere licuit. Supponitea usum omnium operationum mentis. Eam igitur secunda & tertia operationibus sufficienter explicatis dabimus. Secunda vero & tertia mentis operatio supponit theoriam definitionum, quam adeo iisdem præmitti necesse erat.

Scholion generale.



SECTION III DE JUDICIO IN SPECIE.

CAPUT I. DE JUDICIORUM DIFFE- RENTIA.

Judicii partes. §. 195.
Omnne *judicium ex duabus constat notionibus, notione scilicet rei, cui aliquid tribuitur, vel a qua aliquid removetur, & notione illius, quod eidem tribuitur, vel ab ea removetur* (§. 38.).

Enunciationis partes. §. 196.
Enunciatio constat ex duobus terminis, quorum unus significat rem, de qua judicatur; alter id, quod eidem tribuitur, vel ab eo removetur. Conf. §. 40. 195.

Definitio sub- §. 197.
jecti & prædi- *Illud, de quo judicatur, dicitur Subjectum: quod vero rei cuidam tribuitur, vel ab ea removetur, Prædicatum.*
cati.

Copulae defi- §. 198.
nitio; *In enunciatione seu propositione notiones vel conjunguntur, vel separantur (§. 39. 40.), atque adeo voce quadam opus est, qua earum nexus, vel separatio indigitatur. Vocabula ista, quæ nexum prædicati & subjecti significat, dicitur Copula. Quodsi copulae præfigatur particula non; significabitur notiorum separatio. Utimur autem tanquam copula verbo substantivo.*

Cautio circa §. 199.
copulam. *Copula non est nisi verbum substantivum præsentis temporis. Denotat enim nexum inter subjectum & prædicatum intercedentem (§. 198.), qualis nempe repræsentatur in ideis nostris. In omni autem judicio nexus ille semper est aliquod præsens (§. 39.);*

Dubium

Dubium videri poterat, quomodo copula semper dici possit verbum substantivum *est* presentis temporis, cum etiam occurrant judicia de prateritis & futuris, v. gr. quando dicitur: *Lapis fuit calidus*, item *lapis erit calidus*. Etenim in hoc casu copula non est verbum substantivum prateriti vel futuri temporis *fuit* vel *erit*; sed copula tantum in eo latet: ipsum vero prateritum & futurum denotant statum in quo subiectum representatur, prateriisse, vel demum venturum. Nimirum iudicium est notio complexa representans subiectum cum suo attributo, modo vel statu (§. 38. 104. 195.). Quomodum itaque subiectum per notionem menti exhibetur tanquam præsens, ita quoque istud attributum vel modus exhibetur menti tanquam inexistens vel subiectum tanquam in isto statu. Enimvero dum mens sibi conscia est, subiectum jam non esse præsens illo modo instructum, vel isto in statu constitutum; subiectum isto modo præditum vel illo in statu positum considerat tanquam prateritum, vel futurum. Nexus igitur prædicati vel subiecti semper idem est, sive res, quæ notioni præsentī respondet, consideretur tanquam nunc præsens, sive tanquam praterita vel futura.

§. 200.

Copula in propositione vel expresse ponitur, vel termino, qui ad prædicatum pertinet, latet.

§. 201.

Notiones vel conjunguntur, vel separantur, dum iudicamus (§. 39.). Notionum conjunctio dicitur *iudicium affirmativum*; Notionum separatio *negativum*. Unde porro apparet, quænam enunciatio sive propositio dici debeat affirmativa, quænam negativa. Nimirum *Enunciatio seu propositio affirmativa* est, in qua prædicatum tribuitur subiecto: *Propositio autem negativa*, in qua prædicatum removetur a suo subiecto.

§. 202.

Affirmare igitur idem est ac prædicatum aliquod tribuere eidem subiecto, vel significare, quod prædicatum subiecto conveniat: *Negare* vero idem est ac prædicatum aliquod remove a suo subiecto, vel significare, quod prædicatum subiecto non conveniat.

Quomodo copula ingrediatur enunciationem. Definitio iudicii ac enunciationis affirmativæ ac negativæ.

§. 203.

Affirmationis signum est copula.

Conf. §. 202. 33. 198.

M 3

Affirmationis signum.

Negationis
signum.

§. 204.

Negationis signum est particula negandi copulae praefixa. In negatione enim significatur, praedicatum subiecto non convenire (§. 202.), seu ejus notionem cum notione subiecti non posse conjungi (§. 201.). Nexum istum, quem non posse admitti significamus, cum copula significet (§. 198.); particula negandi eidem praefigenda est, ut significetur, nexui isti nullum esse locum concedendum.

§. 205.

Fundamen-
tum propositio-
nis infinitae.

Si negandi particula non refertur ad copulam, sed ad praedicatum, vel subiectum; propositio negativa non est, sed aliquam ejus saltem speciem habet. Signum enim negationis est particula negandi copulae praefixa (§. 204.). Ubi ergo eadem ad copulam non refertur, sed vel ad praedicatum, vel ad subiectum; ibi copulae nulla particula negandi praefigitur, adeoque nulla negatio significatur (§. 201.).

E. gr. *Notio trianguli aequilateri non involvit contradictionem*; particula negandi ad praedicatum quidem refertur, sed non ad copulam. Etenim perinde est ac si diceret: *Notio trianguli aequilateri est notio non involvens contradictionem.* Propositio adeo tantum speciem mentitur negativæ. Revera enim significatur, definitionem possibili convenire notioni trianguli aequilateri, atque adeo affirmativa est propositio (§. 201.).

§. 206.

Definitio pro-
positionis in-
finitae.

Propositio, quæ speciem negativæ habet, sed revera affirmativa est, infinita dicitur.

§. 207.

Particula ne-
gandi quomo-
do ingrediat-
ur propositio-
nem.

Particula negandi vel exprimitur in propositione negativa, aut infinita, vel in voce ad subiectum, aut praedicatum pertinente latet.

Si dixeris: *Nullus hominum in omnibus est sapiens*, particula negandi includitur voci ad subiectum pertinenti, utur ad copulam pertineat: idem enim est ac si diceret, *omnis homo non est sapiens in omnibus.* Similiter si dicis: *Bruta carent ratione*; particula negandi latet in verbo carent ad praedicatum pertinente; etenim perinde est ac si diceret, *bruta non habent rationem.*

§. 208.

§. 208.

Notio positiva dicitur, quæ constat notis realitates denotantibus; contra *Negativa notio* vocatur, quæ a re representata remover realitates, seu earum absentiam tanquam notas rei exhibet. *Terminus positivus* est, qui notionem positivam denotat: *Terminus autem negativus*, qui notionem negativam significat.

Definitio notionis & termini positivi ac negativi.

Terminus positivus realitatem denotat; negativus realitatis absentiam (§. 36.). E. gr. *Triangulum rectilineum* concipimus figuram planam tribus lineis rectis terminatam. Notio igitur positiva est & terminus *triangulum rectilineum*, quo ea significatur, idem positivus. Enimvero *immateriale* dicimus, quod ex materia non constat, seu juxta *Cartesianos*, quod nullam habet extensionem; notio igitur ejus negativa est & terminus *immateriale* negativus. Cavendum vero, ne ex regulis Grammatices judicemus, an terminus positivus sit, an negativus: fieri enim potest, ut terminus habeat formam negativi & tamen propter notionem positivam ipsi respondentem censi debeat positivus, & contra ut terminus habeat formam positivi & tamen propter notionem negativam ipsi respondentem sit negativus. E. gr. *Terminus ens infinitum* est vi Grammaticæ negativus, ac si definitur per *ens* in quo omnia insunt per modum actus, notio eidem positiva respondet, atque adeo positivus censi debet.

§. 209.

Si terminus negativus ita ingreditur propositionem, ut negatio ipsi inbarens ad copulam referatur; propositio negativa est, in casu reliquo affirmativa. Conf. §. 208. 202. 204. 205.

Quando terminus negativus propositionem efficiat negativam.

E. gr. Si dicis: *Anima est immaterialis*, propositionem ingreditur terminus negativus *immaterialis*, suppono enim ei non responderi nisi notionem negativam, scilicet materiæ carentiam (§. 208.). Duplici autem modo interpretari licet propositionem, vel ut æquipolleat huic; *anima non est materialis*, vel ut æquivalet alteri: *anima est ens, quod non est materiale*. In priori casu negatio ad copulam refertur, in posteriori eandem non afficit. In priori ergo casu negativa est, in posteriori infinita & affirmativa æquipollet. Multo minus autem propositio negativa censi debet, quam tantum ingreditur terminus, qui negativus apparet vi originis (not. §. 208.). E. gr. Si quis dicit: *Deus est infinitus* atque

atque infinitudinis datur notio positiva, tum propositio ista affirmativa est, nec unquam eam negative interpretari licet.

§. 210.

Propositionis
identice de-
finitio.

Si subiecto & prædicato eadem respondet notio, *Propositio dicitur identica.*

E. gr. Si quis voci *Deus* non aliam jungit notionem, quam quod sit creator universi, & Deo tanquam subiecto propositionis jungit prædicatum, quod creaverit hoc universum; propositio: *Deus creavit universum* identica est. Etenim idem est ac si deceres: *Creator universi creavit universum* seu *Creator universi est creator universi*. Patet itaque propositionem posse esse identicam, quæ talis non apparet. Interim dantur propositiones identicæ, ubi identitas subiecti & prædicati per se patet, veluti cum dicitur: *Homo est homo.*

§. 211.

Definitio est propositio identica. Conf. §. 149. 197. 210.

§. 212.

Definitiones
quem locum
inter propo-
sitiones tue-
antur
Propositionis
categoricæ
fundamen-
tum.

Attributa & essentialia, nec non modorum atque relationum possibilitates, quæ per modum attributorum insunt, prædicantur absolute de suo subiecto. De essentialibus & attributis vide §. 68. Modorum atque relationum possibilitates, quæ per modum attributorum insunt (§. 154.), constanter insunt. Quæ vero constanter insunt, ea de subiecto absolute enunciantur (§. 60.).

§. 213.

Definitio pro-
positionis ca-
goricæ.

Propositio categorica est, in qua prædicatum absolute, seu nulla adjecta conditione, de subiecto enunciat.

E. gr. *Deus est sapientissimus* propositio categorica est: sapientia enim Deo tribuitur absque ulla adjecta conditione.

§. 214.

Propositionis
hypotheticæ
fundamen-
tum.

Modi atque relationes & quod in re quadam non concipitur possibile nisi præsupposito quodam ejus modo; de subiecto suo nonnisi conditionate enunciantur. De modis vide §. 68. Relationes sunt extrinsecæ, adeoque a comparatione rerum aliarum pendent. Sed quæ mutabilia sunt, ea nonnisi de subiecto suo sub certa conditione enunciantur (§. 159.).

Quicquid in subiecto non concipitur possibile nisi præsupposito quodam ejus modo, instar alicujus modi inest (§. 155.), adeoque nonnisi conditionate prædicatur.

§. 215.

§. 215.

Propositio hypothetica est, in qua prædicatum tribuitur Definitio pro-
subjecto sub adjecta conditione. positionis hy-
 potheticæ.

E. gr. *Si homo crebris exercitiis operam navat, habitum sibi com-
 parat.*

§. 216.

Si quod per alterum determinatur, id ideo de subjecto præ- Fundamen-
dicatur, quia hoc alterum eidem convenit. tam modi
 prædicandi.

Id quod per alterum determinatur, ideo inest, quia inest hoc, per
 quod determinatur. Quare cum prædicatum denotet illud, quod sub-
 jecto inest (§. 197); ideo quoque id, quod per alterum determinatur,
 ideo de subjecto prædicatur, quia ipsi hoc alterum convenit. E. c.
Triangulum æquilaterum est æquiangulum, quia æquilaterum. Neque
 vero solum valet præfens essetum, si prædicatum determinatur per in-
 trinseca subjecto; sed idem locum habet semper, cum nulla conditio
 exprimatur, atque adeo quoque si illud per extrinseca determinatur.
 Exemplo denuo res est manifesta. *Lapis ex alta turri delapsus ma-*
gnum impetum acquirit, quia ex tanta altitudine delabitur.

§. 217.

Attributa propria prædicantur de subjecto sub conditione Modus prædi-
essentialium ejus. Conf. §. 65. 216. candi attribu-
 ta propria.

§. 218.

Attributa communia prædicantur de subjecto sub conditio- Modus præ-
ne essentialium nonnullorum, quæ cum aliis entibus eidem sunt dicandi attri-
communica. Conf. §. 65. 216. Enimvero quoniam omnia essentialia buta commu-
 simul subjectum determinant, ut hoc præcisè ens sit, non aliud;
 idem unum essentialia, vel aliquot eorum cum entibus aliis com-
 munia habet.

Vide (§. 69.) & seqq.) Exempli loco: *Triangulum rectilineum habet*
tres angulos. Nam numerus ternarius angulorum est attributum com-
 mune atque adeo prædicatur de triangulo rectilineo, quatenus inter
 determinationes essentielles refertur numerus ternarius laterum, qui est
 ipsi cum triangulo sphærico & alio quocunque curvilineo atque mixtili-
 neo communis.

§. 219.

Possibilitates, quæ insunt per modum attributorum pro- Modus prædi-
(Logica contracta.) N prio candi ea, quæ

insunt per
modum pro-
prietatum.

priorum, prædicantur de subiecto sub conditione omnium essentialium lege §. 154. 217.

E. gr. Si dicitur: *Triangulum circulo inscribi potest*; ista inscriptibilitas insit proprietatis trianguli consideratur; prædicatur autem de eo, propterea quod tribus lineis concurrentibus terminatur, adeoque propter essentialia.

§. 220.

Essentialium
prædictio
quomodo pro-
positionem
pariat iden-
ticiam.

Si subiectum per essentialia definitur, & aliquod vel quædam eorum de eodem prædicantur; propositio identica est. Quoniam enim essentialia unum per alterum non determinatur (§. 63.), unum propter alterum de subiecto prædicari nequit (§. 216.). Cum itaque præter essentialia in definitione nil contineatur per *hypothesis*; ideo quod de subiecto prædicatur, essentialia propter seipsum eidem tribuitur. Subiecto adeo & prædicato eadem notio responder, consequenter definitio identica est.

E. gr. Essentialia, per quæ figura regularis determinatur, sunt laterum & angulorum æqualitas. Adeoque si dicis: *Figura regularis habet omnes angulos æquales*, perinde est ac si diceres: *Figura habens omnes angulos æquales habet omnes angulos æquales*.

§. 221.

Quando non
pariant.

Si subiectum per attributa definitur, vel per modorum atque relationum possibilitates, quæ per modum attributi insunt; essentialia de eodem prædicantur propter attributa vel ea, quæ attributorum vicem subeunt. Sicut enim attributa (§. 64.) & modorum atque relationum possibilitates (§. 154.) per essentialia determinantur; ita vicissim positis attributis vel istis modorum atque relationum possibilitatibus, ponuntur quoque essentialia, ut ad eo sumtis attributis vel illis possibilitatibus tanquam primis per ea determinentur essentialia (§. 216.).

E. gr. Parallelogrammo per modum attributi seu proprietatis convenit divisibilitas in duo triacula æqualia per diagonalem facta. Essentialia autem, per quæ figura ista determinatur, sunt laterum numerus quaternarius & parallelismus. Quod si ergo *parallelogrammum* definias per figuram planam in duo triacula æqualia per diagonalem divisibilem & postea affirmes: *Parallelogrammum habet latera opposita parallela*; parallelismus laterum de eo prædicatur ob divisibilitatem in duo triacula æqualia per diagonalem.

§. 222.

§. 222.

Quæ de subiecto absolute prædicantur, eadem ipsi tribuntur sub definitionis conditione, nempe ideo subiecto dicitur convenire prædicatum, vel etiam repugnare, quod eidem definitio comperit. Quæ enim de subiecto absolute prædicantur, ea sunt vel attributa & essentialia, vel modorum atque relationum possibilitates, quæ per modum attributorum insunt (§. 68 212.). Enimvero attributa tam propria (§. 217.) quam communia (§. 218) & quæ per modum istorum attributorum insunt, modorum atque relationum possibilitates (§. 219.) propter essentialia; contra essentialia propter attributa & ea, quæ per modum ipsorum insunt (§. 221.) prædicantur. Quamobrem cum in priori casu subiectum per essentialia (§. 177.), in posteriori autem per attributa aut talia, quæ per modum attributorum insunt (§. 178 179.) definitur; evidens est, quæ de subiecto absolute prædicantur, eadem ipsi tribui sub conditione definitionis.

E. gr. In propositione *Deus est omnipotens* omnipotentia Deo tribuitur sub conditione definitionis, v. gr. a *Cartesiano* ideo, quod sit ens perfectissimum.

§. 223.

Propositiones categoricæ æquivalent hypotheticis Et ad eas reduci possunt. Conf. §. 213. 222. 215.

E. gr. Propositio categorica est: *Deus creavit mundum.* Sed cum nomini Dei respondere debeat aliqua definitio, ne sit sine mente sonus; si ea distincte exprimitur: habebis propositionem hypotheticam. E. gr. Quodsi cum nobis *Deum* definias per ens a se, quod in se continet rationem sufficientem existentie contingentis universi, prout nempe nostra de existentia & attributis divinis a contingentia derivata demonstratio requirit; propositio hypothetica talis erit: *Si Deus est ens a se, quod in se continet rationem sufficientem existentie contingentis universi; mundum creavit.*

§. 224.

Si conditio, sub qua prædicatum convenit subiecto termino concreto absque particula conditionali subiecto adjectæ exprimitur; propositio habet formam categoricæ, etsi revera sit hypothetica. Etenim si prædicatum subiecto non absolute convenit, sed sub quadam conditione, non ideo conditio cessat, quod particula

Quamnam conditio in propositionibus categoricis tacite supponatur.

Categoricæ propositiones nam ad hypotheticas reducibiles.

Quando propositio hypothetica formam categoricæ habeat.

conditionalis non expresse ponatur. Manet igitur propositio hypothetica (§. 215.).

Quoniam tamen particula conditionalis non expresse ponitur, sed in vocibus ad subiectum pertinentibus latet; ideo propositio formam categoricæ habet.

E. e. *Lapis calidus calefacit* categoricæ formam habet: latet autem particula conditionalis *si* in voce *calidus*. Nam propositio æquipollet hypotheticæ sequenti: *Si lapis est calidus, calefacit*.

§. 225.

Determinatio-
nis subiecti
definitio.

Quod subiecto adjicitur ad determinandum ejus statum, in quo prædicatum ei tribui potest, dicimus *Determinationem subiecti*.

Nimirum si prædicatum subiecto non semper competit, neque adeo vi definitionis eidem tribui potest, per definitionem sufficienter determinatum non est. Quod igitur ad ea, quæ constanter eidem insunt, accedere debet, ut fiat subiectum habile in propositione data, id ulterius idem determinat. Unde quoque a nobis *subiecti determinatio* appellatur. E. gr. Lapis non calefacit, quatenus lapis est, sed quatenus ipse calidus.

§. 226.

Determinatio-
nes subiecti
unde desu-
mantur.

Determinationes subiecti vel desumuntur a modis, vel a rebus extrinsecis. conf. §. 63. 64. 66. 152. 154. 155. Essentialia & attributa, quæque iis æquivalent, vel ingrediuntur definitionem (§. 177. 178. 179.) vel de subiecto absolute prædicantur (§. 217. 218. 219.) atque adeo vi definitionis (§. 222.) consequenter adesse intelliguntur, ubi definitio locum habet. Nullam igitur subiecti determinationem in enunciationibus constituunt (§. 225.).

Sed modi mutabiles sunt (§. 66.), neque adeo constanter insunt. Quamobrem si prædicatum non convenit subiecto, nisi quatenus modus iste inest; is utique in enunciatione exprimens, ut status intrinsecus subiecti determinetur, in quo prædicatum ei convenire potest. Subiecti igitur determinatio sumitur a modo (§. 225.). Similiter quæ extrinsecæ sunt subiecto, ea ipsi non constanter adsunt: quod experientia notum sumimus. Quamobrem si prædicatum non convenit subiecto, nisi in relatione ad res quasdam extrinsecas & quatenus ab iis pender; status ille extrinsecus in enunciatione determinari debet, in quo illi præ-
dica-

dicatum tribui potest. Adeoque determinatio subiecti sumitur a rebus extrinsecis (§. 225.).

In propositione: *Lapis calidus calefacit* determinatio subiecti petitur a modo, nempe a calore: in propositione autem altera: *Lapis ex alto delapsus ingentem habet impetum* determinatio subiecti sumitur partim a modo, motu nempe lapidis, partim a rebus extrinsecis, ad quas motus iste refertur, nempe ab altitudine, per quam delapsus impetum motus acceleratione acquisivit.

§. 227.

Determinationes subiecti æquivalentes appello, quarum una alteri salvo prædicato substitui potest. *Determinationes subiecti non æquivalentes vel diversæ* sunt illæ, quarum una alteri salvo prædicato substitui nequit.

Determina-
tionis æquiva-
lents definitio.

Perinde est, siue dicas: *Parallelogramma super eadem basi & inter easdem parallelas constituta æqualia sunt*; siue affirmes: *Parallelogramma basium & altitudinem æqualiam æqualia sunt*.

§. 228.

Si duæ fuerint subiecti ejusdem determinationes & earum una posita altera quoque eidem sit tribuenda; erunt determinationes æquivalentes.

Quænam de-
terminationes
subiecti sunt
æquivalentes.

Propositionem illustrat exemplum præcedens.

§. 229.

Quod de specie absolute prædicatur, illud etiam prædicari potest de singulis individuis sub ea comprehensis. Conf. §. 222. 176.

43. 216.

Prædicata spe-
ciei singulis
individuis
communis.

E. gr. De triangulo æquilatèro absolute prædicatur, quod sit æquiangu-
lum, adeoque quatenus triangulum æquilatèrum est. Nemo igitur du-
bitat, quin quodvis triangulum æquilatèrum in singulari sit æquiangu-
lum.

§. 230.

Quod de specie sub certa conditione prædicatur, id de individuis ejusdem speciei prædicari potest, penes quæ eadem conditio locum habet. Quod de specie sub certa conditione prædicatur, id eidem tribuitur tum propter quiddam, quod speciei constanter inest, tum propter conditionem adjunctam. Nempe ab isto pender, quod prædicatum ei convenire possit; ab hac vero, quod actu conveniat. Quoniam quod speciei inest, id

Prædicata spe-
ciei tum condi-
tionala quo-
modo indivi-
duis applican-
da.

singulis individuis inest (§. 43.); igitur singulis individuis non repugnat istiusmodi prædicatum. Enimvero quoniam actu competere nequit, nisi conditio speciei adjecta adsit; ideo istis individuis prædicatum actu tribui potest, penes quæ eadem conditio locum habet, sub qua de specie enunciatur (§. 216.).

E. gr. In propositione hypothetica, *si lapis radiis solaribus exponitur, calidus sit*, de lapide tanquam specie prædicatur, quod calefiat, sub ea conditione, quod radiis solaribus exponitur. Idem igitur etiam de hoc, isto, illo lapide, prædicari potest sub eadem conditione. Nempe *hic quoque, iste, ille lapis calefit, si radiis solaribus exponitur.*

§. 231.

Quomodo
prædicata in-
dividuorum
ad speciem
transferenda.

Quod de singulis individuis vel absolute, vel sub determinata quadam conditione prædicari potest; idem quoque de specie, ad quam ea pertinent, vel absolute, vel sub eadem conditione prædicari potest. Vide §. 43. 216.

§. 232.

Prædicato-
rum generis
ad species &
individua ap-
plicatio.

Quod de genere absolute prædicatur, id etiam prædicari potest de singulis speciebus sub eo contentis earumque individuis. Conf. §. 222. 149. 44. 43. 216.

De omni fluido gravi tanquam genere absque ulla conditione adjecta prædicatur, *quod descensui gravium resistat*: igitur quoque de aqua tanquam specie & de hac, illa, ista aqua tanquam individuis prædicari potest, quod gravibus in ea descendentibus resiliant.

§. 233.

Prædicato-
rum generis
conditionato-
rum ad species
& individua
applicatio.

Quod de genere sub data quadam conditione prædicatur, id etiam prædicari potest sub eadem conditione de singulis speciebus sub eo contentis earumque individuis. Vide modo §. 43. 44. 230.

E. gr. *Grave ex alto delapsum magno impetu fertur.* Hic de genere, scilicet corpore gravi, prædicatur, quod magno impetu feratur, propter aliquam conditionem, *quod ex alto delapsum sit.* Sub hoc genere continentur plurimæ species, veluti globi lignei, plumbei, lapidei. Quomohrem istud prædicatum convenit non solum singulis hiscæ globorum speciebus, verum etiam singulis individuis earum, ita ut dicere liceat: *Globus ligneus ex alto delapsus magno impetu fertur,*
item-

itemque in casu singulari hic globus ligneus ex alto delapsus magno impetu fertur.

§. 234.

Quod prædicatur de genere aliquo superiori absolute, id non modo prædicatur de singulis inferioribus sub eo contentis, verum etiam de singulis speciebus ad inferiora relatis, nec non de singulis earum individuis. Conf. § 222. 149. 45. 216. 232.

Prædicatorum generis superioris absolutorum ad inferiora, species & individua applicatio.

Ita fluidum grave est genus quoddam superius, quod alia inferiora veluti aquam, Mercurium &c. sub se continet. De fluido gravi absolute prædicatur, quod pressio sit ut basis ducta in altitudinem. Sed idem quoque prædicatur de aqua, Mercurio &c. & in specie de aqua marina, fluviali, fontana, pluviali atque in singulari de hac aqua, de hoc Mercurio &c.

§. 235.

Quæ de genere aliquo superiori sub data quadam conditione prædicantur, ea sub eadem conditione de generibus inferioribus sub eodem contentis, de speciebus ad genera hæc inferiora relatis & earum individuis prædicari possunt. Vide § 46. 233.

Prædicatorum generis superioris hypotheticorum ad inferiora, species & individua applicatio.

§. 236.

Si quod individuis singularum specierum sub diversis generibus contentarum, quæ ad unum superius referuntur, sub data quadam conditione convenit, quatenus ejusdem speciei individua spectantur; species subeunt vicem conditionis, qua datæ conditioni superaddente idem prædicatum generi superiori tribui potest. Quod enim non prædicari potest, nisi de individuis ejusdem speciei; id prædicatur propter aliquid speciei huic proprium. Quoniam tamen idem prædicari potest de individuis cujuscunque speciei sub generibus inferioribus quibusdam contentis, quatenus nempe ea ad eandem speciem referuntur; prædicatum non modo iisdem tribuitur ob id, quod speciei unicuique proprium, verum etiam ob quidpiam singulis commune. Quamobrem quod prædicatur de individuis singularum specierum diversorum generum, sed quatenus ad eandem eadem referuntur; id tam de generibus inferioribus, quam de superiori, sub quo ea continentur, sub conditione specierum prædicatur, in propositione adeo indeterminate exprimenda, aut sub conditione specierum identitatem indigitante. Quamobrem

Species quando ingreditur propositionem instar conditionis.

Quamobrem

obrem si prædicatum, quod individuis ejusdem speciei convenit, nonnisi sub quadam conditione iisdem tribuitur; conditio speciei eidem superaccedere debet, ubi istud generi superiori tribuendum.

§. 237.

Subjectum
quotuplex.

Subiectum propositionis vel est genus quoddam, vel species, vel individuum. Lege §§. 197. 112. 111. 43 seqq.

§. 238.

Judicii & pro-
positionis sin-
gularis defini-
tio.

Judicium singulare est, cujus subjectum est individuum. Hinc *Propositio singularis* est, cujus subjectum est terminus singularis, seu individuum determinatum. Terminus autem singularis vel indicatur nomine proprio; vel particula demonstrativa; vel determinatione quadam singulari.

E. gr. Propositiones singulares sunt: *Keplerus veras planetarum orbitas invenit; hic liber continet lectu utilia; lapis, qui modo decidit, impegit in brachium hominis prateruentis.*

§. 239.

Judicii & pro-
positionis uni-
versalis defini-
tio.

Judicium universale est, cujus subjectum est notio communis, species nempe vel genus, prædicatum autem convenit singulis speciei individuis, sive absolute, vel singulis generis speciebus harumque individuis, sive sub data determinatione. Est autem signum universalitatis in propositione affirmativa vox *omnis*; in negativa *nullus*. Unde *Propositio universalis* est, qua subjecto præfigitur signum universalitatis.

§. 240.

Judicii & pro-
positionis par-
ticularis defi-
nitio.

Judicium particulare est, cujus subjectum est terminus communis, species nempe vel genus, prædicatum vero non convenit nisi quibusdam speciei vel generis individuis. Signum particularitatis est vox *Quidam*. Hinc *Propositio particularis* dicitur, cujus subjecto præfigitur signum particularitatis.

§. 241.

Propositionis
definitæ & in-
definitæ defi-
nitio.

Propositio dicitur definita, cujus subjecto additur signum quantitatis, nempe vel universalitatis, vel particularitatis, vel singularitatis (§. 238. & seqq.). *Propositio vero indefinita* appellatur, cujus subjectum est terminus communis sive absolute positus, sive cum certa determinatione, sed absque signo quantitatis.

§. 242.

§. 242.

Si prædicatum pluribus simul sumtis convenit, sed non singulis sigillatim; propositio speciem externam universalis mentitur, sed revera singulari æquivalet. Etenim si prædicatum pluribus simul sumtis convenit, sed non singulis sigillatim; tunc omnia ista simul sumta spectantur instar individui & singula tanquam partes differentie numericæ (§. 73. 74.). Quamobrem cum propositio singularis sit, cujus subiectum est individuum (§. 238.); propositio in numerum singularem referenda, ubi subiectum constituitur per plura simul sumta, quorum singulis sigillatim non convenit prædicatum.

Propositio
universalis
apparet.

Etsi igitur in subiecto compareat vox *omnes* vel *omnia*; non tamen hoc in loco est signum universalitatis; sed saltem indicat, omnia, quæ nominantur, simul sumi debere, ut determinetur subiectum, cui prædicatum tribui potest.

E. gr. Si quis dicat: *Omnes mendici* (scilicet simul) *accepere viginti sex nummos*: tum prædicatum de uno in singulari enunciari nequit. Omnes igitur mendici simul constituunt subiectum, quod adeo instar individui consideratur, quod nullis inferioribus communicari potest. Ceterum in præsentī casu particula *omnes* sumi dicitur a Scholasticis *collective*; in casu vero altero, ubi prædicatum de singulis inferioribus sub termino communi subiectum designante comprehensio sigillatim enunciari potest, *distributive*.

§. 243.

Si signum universalitatis in casu obliquo ingreditur propositionem, ipsa tamen ad aliam reduci potest; ubi prædicatum de singulis inferioribus sigillatim enunciari potest, quæ sub termino communi subiectum denotante comprehenduntur; propositio universalis est. Patet enim in hoc casu propositionem universalem datæ substitui posse (§. 239.). Universalis igitur & ipsa esse debet.

Propositio
oblique uni-
versalis.

E. gr. Propositio: *In omni triangulo latus majus subtendit majorem angulum* universalis est; etsi enim signum universalitatis *omnis* in casu obliquo in eadem compareat videaturque *latus majus* esse subiectum, ad quod istud non refertur; potest tamen propositio data ad aliam reduci, in qua relatio lateris ad angulum oppositum sit prædicatum & quam

(*Logica contracta*.)

O

univer-

universalem esse patet, scilicet ad hanc: *Omne triangulum habet latus majus majori angulo oppositum* §. 232.

§. 244.

Propositio oblique particularis.

Eodem modo ostenditur, *propositionem esse particularem, si particularitatis signum in casu obliquo propositionem ingreditur, quæ non nisi ad talem revocari potest, ubi prædicatum non singulis inferioribus competit sub termino communi subiectum denotante comprehensivis.*

E. gr. *In quibus triangulis anguli duo simul sumti sunt tertio majores* propositio oblique particularis est. Equivalet enim alteri: *Quædam triangula duos habent angulos, qui simul sumti tertio sunt majores.*

§. 245.

Universaliter prædicata quomodo particulariter prædicentur.

Si quid universaliter prædicatur de omni specie vel genere, illud etiam particulariter de quibusdam individuis, vel quadam specie prædicari potest. Quod enim universaliter prædicatur de omni specie vel genere; illud de singulis individuis sub specie & de singulis speciebus sub genere contentis earumque individuis prædicari potest (§. 239.), consequenter in utroque casu de quibusdam etiam individuis; in posteriori de quadam specie (§. 240.).

E. gr. *De omni triangulo rectangulo prædicatur ratio æqualitatis inter quadratum hypotenuse & quadrata reliquorum laterum simul sumta.* Eadem vero quoque potest prædicari de quibusdam triangulis rectangulis dicendo: *Quædam triangula rectangula habent quadratum hypotenuse quadratis laterum æquale.*

§. 246.

Modus universaliter prædicandi primus.

Propositio universalis est, si quid de specie aliqua vel absolute, vel sub expressa conditione prædicatur. Vide §. 229. 239. de priori, & §. 230. 225. 43. 239. de posteriori momento.

E. gr. *Omne triangulum æquilaterum est etiam æquiangulum.*

§. 247.

Modus secundus universaliter prædicandi.

Si quid de genere vel absolute, vel sub expressa conditione prædicatur; propositio universalis est. De priori conf. §. 232. 239. de posteriori autem §. 233. 225. 43. 241.

§. 248.

§. 248.

Si quid de genere aliquo superiori vel absolute, vel sub expressa conditione prædicatur, propositio universalis est. Vide §. 247. & 234. lq.

Modus tertius
universaliter
prædicandi.

§. 249.

Definitio æquivalet propositioni universali. In definitione definitio tanquam subiecto tribuitur notio quædam completa atque determinata tanquam prædicatum, & quidem absolute, nulla adjecta, nulla supposita conditione (§. 149. 197.). Concipimus nempe definitum tanquam ens, cui nomen hoc convenit, adeoque notio illa eidem attribuitur propter istud nomen. Quamobrem cum nomen istud sit terminus communis genus vel speciem quandam significans, atque idem conveniat singulis speciebus sub genere & singulis individuis sub speciebus contentis; notio quoque isti nomini iuncta iisdem speciebus ac individuis tribuenda. Definitio igitur propositio universalis est (§. 239.).

Definitio cui
propositioni
universali æ-
quivalens.

§. 250.

Hinc igitur patet, quod, si cui enti definitum competit, eidem quoque competere debeat notio definito in definitione attributa.

Cui definitio
competat.

Et si enim arbitrium sit, quam termino cuidam notionem attribuere velimus; postquam tamen determinata quædam notio ei attributa fuit, necessarius habetur nexus inter terminum & notionem, quæ eodem denotatur, ita ut, si ponamus, entialicui convenire debere hoc nomen, eo ipso simul ponamus, quod eidem quoque convenire debeant ea, quæ notio termino attributa continet.

§. 251.

Si definitum sumitur ut subiectum, de eo sigillatim universaliter prædicari possunt, quæ notio eidem in definitione attributa involvit. Si definitum sumitur ut subiectum, tum concipitur instar entis, cui id nominis convenit (§. 197.). Jam cum definitionem non ingrediantur, nisi intrinseca (§. 151.); definito singula conveniunt, quæ in notione per definitionem ipsi attributa continentur. Quæ vero subiecto conveniunt, ea quoque de eodem prædicari possunt (§. 197.). Quamobrem de definito sigillatim prædicari possunt singula, quæ in definitione continentur.

Cur singula
in definitione
contenta de
definito uni-
versaliter præ-
dicentur.

tur. Enimvero cum ea definito ideo attribuantur, quod ipsi istud nominis convenit, seu id tribuere visum fuit; ideo singulis individuis, quæ sub definito continentur, eadem tribui possunt, tanquam idem nomen participantibus. Propositiones igitur istæ universales sunt (§. 239.).

E. gr. *Quadratum est figura quadrilatera, æquilatera, reſtangula.* Singula, quæ hic conjunguntur in definitione, ſigillatim de quadrato univerſaliter prædicari poſſunt, affirmando ſcilicet: *Omne quadratum eſt figura: Omne quadratum habet quatuor latera: Omne quadratum habet latera æqualia: Omne quadratum habet angulos tantum reſtos: vel Omnia latera quadrati ſunt inter ſe æqualia: Omnes anguli quadrati ſunt reſti.*

§. 252.

Cur definitio
inverſa æqui-
valeat propo-
ſitioni univer-
ſali.

Si definitum in definitione ponatur loco prædicati & terminus complexus denotans notionem ei respondentem loco ſubjecti; definitio æquivaleret propoſitioni univerſali. Lege §. 211. 210. Ergo perinde eſt, quemnam utrorumque terminorum loco ſubjecti, quemnam loco prædicati ponas. Jam ſi definitum ponitur loco ſubjecti, notio completa & determinata eidem in definitione attributa univerſaliter de eodem prædicatur (§. 249.). Ergo etiam definitum de termino complexo notionem ei respondentem denotante, aut de re, cui convenit hæc notio (§. 36.), univerſaliter prædicari poteſt.

§. 253.

Cui definitum
competat.

Hinc conſequitur: *Si cui convenient notæ in definitione enumeratæ, vel (quod perinde eſt), ſi cui conveniat notio in definitione definito attributa, eidem quoque convenire definitum.*

§. 254.

Prædicata uni-
verſalia abſo-
luta.

Attributa & eſſentialia, nec non modorum atque relationum poſſibilitates, quæ per modum attributorum inſunt, de ſubjecto univerſaliter prædicantur & contra: Quod de ſubjecto univerſaliter abſolute prædicatur, eſt vel attributum, vel eſſentiale, vel modi cujuſdam atque relationis poſſibilitas, quæ per modum attributi in eſt. De priori vide §. 212. 246. 48. de poſteriori, ſi ſcilicet hanc propoſitionem negare velles, conſule §. 63. 64. 66. 154. ſq. & 214.

§. 255.

§. 255.

Modi atque relationes & quod in subiecto non concipitur possibile nisi præsupposito quodam modo nonnisi sub data determinatione de subiecto universaliter prædicantur; ea vero omiffa, nonnisi particulariter prædicari possunt. Et contra si quid de subiecto sub data determinatione universaliter prædicatur; id vel modus est, vel relatio quedam ad alia, vel quidpiam, quod in subiecto non concipitur possibile, nisi præsupposito quodam ejus modo. Sitermino communi, generi nempe vel speciei, tanquam subiecto (§. 237.) tribuitur modus vel relatio, cum non singulis individuis ad speciem & genus, nec singulis speciebus ad genus relatis necessario conveniant (§. 66.), nonnisi particulariter eidem tribui possunt (§. 240.).

Prædicata universalia hypothetica.

Enimvero cum modi atque relationes & quod in subiecto nonnisi præsupposito quodam modo possibile concipitur de subiecto conditionate (§. 214.), adeoque sub expressa determinatione (§. 225.) enunciari possint, consequenter de genere quodam, vel specie (§. 237.) sub expressa conditione vel determinatione prædicentur; quæ vero de specie aliqua vel genere quodam sub expressa conditione enunciantur, universaliter de iisdem prædicentur (§. 246. 247. 248.): evidens est, modos atque relationes & quod in subiecto possibile concipitur præsupposito quodam ipsius modo sub expressa conditione de subiecto universaliter prædicari.

Jam si quid de subiecto aliquo sub data determinatione universaliter prædicatur, id vel est modus quidam, vel relatio quedam, aut quidpiam quod in objecto possibile concipitur modo quodam præsupposito, vel est aliud quidpiam ab iis diversum. Conf. §. 63. 64. 154. 212.

§. 256.

Omnis propositio vel est universaliter affirmans, vel universaliter negans, vel particulariter affirmans, vel particulariter negans. Omnis propositio vel universalis est, vel particularis (§. 238. 239.); singulares enim sub particularibus comprehenduntur, quemadmodum ex collatione definitionum propositionis singularis & particularis pater (§. 239. 240.), & si fuerint propriæ sub universalibus (§. 252.). Enimvero omnis quoque propositio

Propositio-
num diversi-
tas.

positio vel affirmativa est, vel negativa (§. 201.). Quamobrem non minus propositio universalis, quam particularis aut affirmativa esse debet, aut negativa.

Propositiones infinitæ & indefinitæ minime in censum veniunt, cum illæ sint affirmativæ, etsi speciem negativæ præ se ferant (§. 206.); hæ autem constanter vel universales, vel particulares, utur signum quantitatis omittatur (§. 241.), ex iis, quæ de diverso modo prædicandis fæse a nobis demonstrata sunt (§. 243. & seqq.), facile supplendum.

CAPUT II. DE DIVISIONE PROPOSITIONUM IN MATHESI USITATA.

§. 257.

Cor divisio
ista hic expli-
cetur.

Differentia propositionum, quam hucusque adstruximus, præsentissimum pollicetur usum in arte ratiocinandi omnique Logica utente. Quæ vero apud Mathematicos occurrit propositionum divisio, in distincta methodi explicatione usum habet atque ideo, quod methodus philosophica cum mathematica eadem sit (§. 132. *Disc. prælim.*), in omni accurata tractatione locum invenit: in praxi autem Logicæ tantum non omne fert punctum.

§. 258.

Fundamen-
tum propo-
sitionum inde-
monstrabili-
um & demon-
stratarum.

Nimirum si qua nobis offertur propositio, terminis intellectis vel nobis patet, prædicatum in affirmativa convenire, in negativa non convenire suo subiecto; aut non patet (§. 35.).

E. gr. Universalis est propositio: *In omni triangulo reſtanguo quadratum hypotenuſæ eſt æquale quadratis laterum ſummiſumtis.* Enimvero ſi tibi repræſentēs triangulum cum quadratis ejus lateribus ſingulis ſuperſtruiſis, quod quadratum maximum ſit duobus ceteris ſimul ſumtis æquale nondum perſpicias, atque adeo non patet, quod prædicatum conveniat ſubjecto, eſi proſitionem intelligas. Proſitio item univerſalis eſt: *Omne totum eſt majus ſua parte.* Quodſi totum aliquod ſecundum notionem claram, ſed conſuſam, quam termino jun-

gis,

gis, tibi repræſentantes, v. gr. totam aliquam lineam, & in ea partem ſecundum claram, quam de parte habes, notionem diſtinguis; illico apparet, non poſſe concipi totum cum quadam ejus parte, quin ſtatim pateat illud eſſe hac majus.

§. 259.

Propoſitio illa indemonſtrabilis dicitur, cujus ſubjecto convenire, vel non convenire prædicatum terminis intellectus patet. Sed *demonſtrativa* appellatur propoſitio, cujus ſubjecto convenire, vel non convenire prædicatum intellectus terminis nondum patet. Et ideo propoſitiones indemonſtrabiles dicuntur *per terminos manifeſta*.

Definitio propoſitionis demonſtrativæ & indemonſtrabilis.

Ex iis, quæ ad præcedentem propoſitionem annotavimus, abunde intelligitur, quid ſibi velint verba: *terminis intellectus hoc patet*, & unde conſtet, *terminis intellectus aliquid eſſe manifeſtum*. Nimirum ſi ideam ſubjecti, de quo aliquid prædicatur, in animo tuo excites, atque id, quod definitioni ejus reſpondet, eadem referre nequeat, quin una exhibeatur, quod prædicato ſignificatur; tum ex terminis manifeſtum eſt, quod prædicatum conveniat ſubjecto, in caſu autem oppoſito liquet ex iisdem, quod non conveniat.

§. 260.

Si notionem ſubjecti atque prædicati habemus confuſam atque utraque indiviſſo nexu cobaret, ita ut producta notione ſubjecti in eodem quoque compareat notio prædicati; propoſitio indemonſtrabilis eſt. Si notionem ſubjecti habemus claram, etſi confuſam, ipſum ita nobis repræſentare valemus, ut id agnoſcere & ab alijs diſcernere valeamus (§. 79.): conſequenter cum ſubjectum agnoſcamus non attendentes adea, quæ prædicato reſpondent, liquet inde, eadem ad notionem ſubjecti minime pertinere. Enimvero dum ſuper integra notione complexa reſectimus atque in ea nobis obſcitantur, quæ notioni prædicati reſpondent, eaque a cæteris, quæ ad ſubjecti notionem referimus, divelli non poſſe animadvertimus; tum ſola attentione nobis patet, prædicatum ſubjecto ſuo convenire, atque adeo terminis intellectus non amplius obſcurum eſt (§. 259).

Primus modus cognoscendi per poſitionem indemonſtrabilem.

Ad hunc caſum pertinet quod *totum ſit majus ſua parte*. Notionem enim claram habemus totius pariter atque partis, vi cujus & totum, & partem agnoſcere poſſumus. Notionem quoque claram habemus majoritatis,

majoritatis, vi cuius majus a minori & æquali discernere valeamus. Enimvero attendentes ad notionem totius indeque totum agnoscetes, non opus est ut una attendamus ad notionem partis. Et attendentes ad notionem totius atque partis, non opus est ut attendamus simul ad notionem majoritatis. Satis igitur manifestum nobis est, neque notionem partis ad notionem totius, nec notionem majoris ad notionem utriusque pertinere. Nullum tamen nobis repræsentare possumus totum, quin una repræsentemus aliquam ejus partem & ejus ad totum relationem. Quamobrem dum super toto, quod nobis repræsentamus, reflectimus; animadvertimus quoque ejus partem & dum hanc ad totum referimus, totum parte majus agnoscimus.

§. 261.

Secundus modus cognoscendi propositionem inde monstrabilem.

Si subjeſti pariter & prædicati habemus definitiones & producta notione subjeſti, in eo quid deprehendimus, quod notioni prædicati respondeat, atque notio prædicati a notione subjeſti divellitur nequit; propositio denuo indemonstrabilis est. Si subjeſti habemus notionem distinctam atque completam; notas sufficienter enumerare valeamus, quibus illud agnoscitur atque a rebus aliis discernitur (§. 150.), consequenter si subjeſtum nobis repræsentamus, multo magis jam distinguimus, quæ ad definitionem ipsius pertinent, a ceteris, quæ eidem inesse deprehendimus. Dum vero ad eadem quoque attendimus & in iis animadvertimus, quæ prædicato respondent, clare autem perspicimus, eadem ab iis separari non posse, quæ ad notionem subjeſti pertinent, sola attentione cognoscimus, prædicatum subjeſto convenire, quam primum termini intelliguntur, qui subjeſto & prædicato respondent (§. 115. 259.).

E. c. Radii unius circuli sunt inter se æquales. Habemus enim circuli definitionem & dum cum menti seu oculis præsentem exhibemus, distinguimus notas definitionem ingredientibus, nempe quod sit figura plana; quod terminetur linea in se redeunte; quod singula hujus lineæ puncta a centro æqualiter distent. Jam si cogitemus ulterius rectas ex centro in peripheriam educas, quæ ad circuli definitionem non pertinent, & lineæ istæ ad se invicem referuntur, ut æqualem punctorum peripheriæ a centro distantiam; non latere potest earundem æqualitas. Cum vero hæc istarum linearum ad se invicem relatio constituat notio-

nem

nem prædicati, quod hic circulo attribuitur (§. 197.); prædicatum ſub-
jecto ſuo convenire ſatis clare perſpicitur.

§. 262.

In propoſitionibus vel de ſubjecto affirmatur ac negatur, quod eidem ineſt aut ſub quadam conditione ineſſe aut adeſſe poteſt; vel aliquid fieri vel effici poſſe affirmatur.

E. gr. In propoſitione *Deus eſt ſapientiſſimus*, ſapientia de Deo affirmatur: aſt in propoſitione *Deum poſſe amari*, affirmatur aliquid fieri poſſe.

Fundamen-
tum propoſi-
tionum theo-
reticarum &
practicarum.

§. 263.

Propoſitio dicitur *theoretica*, in qua aliquid, quod ſub-
jecto ineſt vel adeſt, de eodem affirmatur, vel negatur. *Practica* ve-
ro eſt propoſitio, qua aliquid fieri poſſe affirmatur, vel fieri debere
poſtulat.

Definitio pro-
poſitionum
theoreticæ &
practicæ.

§. 264.

Propoſitio theoretica indemonſtrabilis dicitur *Axioma*.

Definitio
axiomatis.

§. 265.

Propoſitiones, in quibus de definito prædicatur aliquid ſi-
gillatim, quod in definitione continetur, ſunt axiomata. Quæ in
definitione continentur, ea definito convenire, ex ipſa defini-
tione patet, adeoque quamprimum terminus, quo denotatur ſub-
jectum, intelligitur (§. 115. 149.). Propoſitio igitur indemonſtra-
bilis eſt (§. 259.). Sed cum in iſtiusmodi propoſitione aliquid
de ſubjecto affirmetur (§. 202.), quod eidem ineſt; eadem quo-
que theoretica eſt (§. 263.). In axiomatum itaque numerum refe-
renda (§. 264.).

Propoſitiones
inter axiomata
referendæ.

E. gr. *Quadratum* definitur, quod ſit figura quadrilatera, æquilatera,
rectangula. Propoſitiones itaque: *Quadratum eſt figura quadrilatera*, *Qua-*
dratum eſt figura æquilatera, *Quadratum eſt figura rectangula*, axiomatum
loco habentur.

§. 266.

Propoſitio practica indemonſtrabilis vocatur *Poſtulatium*.

Postulati defi-
nitio.

Talia ſunt poſtulatata *Euclidis*, quibus poſtulatatur, *A quovis puncto ad*
quodvis punctum rectam lineam ducere; *Rectam lineam terminatam in con-*
ſinum & directum producere; *Quovis centro & intervallo circulum de-*
ſcribere. Definitionem poſtulatorum eam formavi, quæ convenit po-
(Logica contracta.)

P

ſtulatatis

stulatis *Euclidem*, qui eadem & ab axiomatis, & a propositionibus demonstrativis distinguit.

§. 267.

Propositiones
identicae cur
sint axiomata.

Propositiones identicae sunt axiomata. Vid. §. 210. 197. Propositionio identica generalis, quæ ceteras omnes ambitu suo complectitur, hæc est: *Idem ens est illud ipsum ens, quod est*, seu, *omne A est A*, ubi A denotat generatim ens cujuscunque speciei vel generis, sive in communi, sive in singulari. Quoniam igitur in propositione identica terminis vel generaliter intellectis patet, subjecto convenire prædicarum; nullum superest dubium, quin propositionem identicam referre debeamus in numerum indemonstrabilium (§. 259.) & quidem theoreticarum (§. 263.), consequenter axiomarum (§. 264.).

§. 268.

Axiomata
negativa.

Propositiones, quibus idem negatur esse diversum a se ipso, sunt axiomata. Quivis sola attentione perspicit, si A sit A, fieri non posse, ut simul A non sit A. Sed si ponatur esse B, hoc est, quidpiam ab A diversum, ponetur esse non A: quod cum sit absurdum, idem non potest esse diversum quid a seipso. Vid. §. 259. 263. sq.

E. gr. Si quis novit, *triangulum* esse figuram tribus lineis terminatam; *quadratum* vero figuram quadrilateram, æquilateram, rectangulam; is statim perspicit, *triangulum non esse quadratum*.

§. 269.

Definitiones
quando fiant
axiomata.

Si definitione utimur tanquam propositione, eam axiomatis loco habemus §. 211. 267.

§. 270.

Casus alter.

Si definitum sumitur ut subjectum, & de eo prædicatur quidpiam, quod notis ad definitionem spectantibus in ejus notatione animo præsentem, indivulso nexu coheret; propositio axiomata est. Vid. §. 261. 263. sq.

E. gr. Definitio *figuræ regularis* est, quod sit æquilatera & æquiangula. Axiomata igitur sunt: *In Pentagono regulari angulus unus est pars quinta omnium simul; in Hexagono pars sexta; in Heptagono septima & ita porro in infinitum.* Aut in genere: *In Polygono regulari quocunque angulus unus ad summam omnium eam habet rationem, quam unitas ad numerum laterum.*

§. 271.

§. 271.

Definitio inversa est axioma. Pater eodem modo, quo *Casus tertius.*
 præcedens propositio, vi §. 252. vel etiam vi §. 261.

Qui enim novit definitionem *figuræ regularis*, quod sit æquilatera &
 æquiangula; is perspicit, quod *Omnis figura æquilatera & æquiangula sit*
regularis.

§. 272.

Propositio theoretica demonstrativa vocatur *Theorema.* *Theorematis*
 definitio.

§. 273.

Propositio practica demonstrativa dicitur *Problema.* *Problematis*
 Exemplum problematis habemus (§. 148.). definitio.

§. 274.

Corollaria, a nonnullis *Conjectaria*, dicuntur propositiones, *Corollarii de-*
 quæ non multa ratiociniorum ambage ex definitionibus, vel pro-
 positionibus aliis inferuntur. *finio.*

Exemplum corollarii præbet propositio supra (§. 56.) ex altera
 (§. 55.) illata, quod *omnibus singularibus universalis insunt.* Immo
 talia quoque sunt propositiones (§. 250. 253.). *Cui definitum com-*
petit, ei definitio competit, & cui definitio competit, ei definitum com-
petit.

CAPUT III.

DE VARIIS JUDICIORUM AFFECTIONIBUS.

§. 275.

Judicia æquipollentia dicuntur, quibus eadem notio comple- *Judiciorum*
 xa respondet. *Propositiones* igitur æquipollentes sunt, quibus *æquipollen-*
 judicia æquipollentia significantur, vel quæ sibi mutuo pos- *tium defini-*
 tunt substitui notione complexa salva. *tio.*

E. gr. Si quis sibi repræsentat Solem una cum ædificio directe eidem
 opposito atque lumine, quo ædificium collustratur; tum vel Sol su-
 mi potest loco subjecti, vel ædificium, vel lumen. In primo casu ju-
 dicamus: *Sol illuminat ædificium;* in altero: *Ædificium illuminatur a*

P 2

Sole;

Sole; in tertio: *Lumen Solis ædificium perfundit, vel ab ædificio terminatur.* Omnia igitur hæc iudicia seu propositiones omnes æquipollent.

§. 276.

Propositiones
æquipollentes
quænam.

Si ex definito prædicatur notio eidem in definitione attributa & de hac notione definitum; propositiones sunt æquipollentes. Etenim cum ex ipsa definitionis definitione pateat (§. 149.), quod utrique propositioni eadem respondeat notio complexa, si nempe definitum seu nomen rei per modum attributi consideres, quali fictioni hic locum esse jam supra (§. 249.) ostendimus; nullum sane dubium est, quin una harum propositionum æquipolleat alteri (§. 275.).

E. gr. *Omne triangulum est figura tribus lineis terminata & omnis figura tribus lineis terminata est triangulum* sunt propositiones æquipollentes, quarum una in alterius locum surrogari potest, prout nobis commodum fuerit hac vel illa uti.

§. 277.

Idem alterius
ostenditur.

Si eidem subiecto sub determinationibus æquivalentibus idem tribuitur prædicatum, propositiones sunt æquipollentes. Vid. §. 227. 275.

E. gr. *Parallelogramma, quorum æquales sunt bases & altitudines, æqualia sunt, & Parallelogramma super eadem basi & inter easdem parallelas constituta æqualia sunt,* propositiones sunt æquivalentes: determinationes enim æquivalentes sunt habere bases & altitudines æquales atque super eadem basi intra easdem parallelas constitui (not. §. 227.).

§. 278.

Adhuc alterius
ostenditur.

Si quando nobis occurrit propositio & notione complexa eidem respondente excitata formare licet propositionem aliam, cui eadem notio respondet; hæc altera æquivalet primum propositæ. (§. 275.).

Dedimus jam supra (not. §. 275.) exempla.

§. 279.

Propositionis
conversæ defi-
nitio.

Si prædicatum fiat subiectum & subiectum prædicatum; propositio dicitur conversi. Et quæ per talem conversionem prodit propositio, *conversa alterius* appellatur.

E. gr. Propositionis: *omne triangulum æquilaterum est æquiangulum,* conversæ est hæc altera: *omne triangulum æquiangulum est æquilaterum.*

§. 280.

Si de subiecto per essentialia definito prædicatur attributum proprium; propositio converti potest. Conf. §. 217. 197-279.

Quando propositiones convertibiles.

§. 281.

Si de subiecto per attributum definito prædicantur omnia essentialia simul sumta, propositio converti potest. Ponamus enim propositionem converti: inconversa attributum proprium, per quod subiectum definebatur (per *hypoth.* & §. 170.), prædicatur sub conditione essentialium (§. 279. 222.). Enimvero cum hoc fieri possit (§. 217.); propositio utique converti potest.

Idem ulterius ostenditur.

§. 282.

Quoniam possibilitates, quæ insunt per modum attributorum propriorum eodem modo de subiecto prædicantur, quo attributa propria (§. 217. 219.) & vicissim essentialia de subiecto per possibilitates istas definito (§. 179.) perinde prædicantur ac de eodem per attributa (§. 178.) definito (§. 221.); quæ respectu attributorum de propositionum conversione demonstrata sunt (§. 280. 281.), ea etiam applicari possunt ad possibilitates relationum atque modorum, quæ per modum attributorum propriorum insunt. Nimirum: *Si de subiecto per essentialia definito prædicatur modi cuiusdam vel relationis possibilitas, quæ per modum attributi proprii inest, propositio converti potest & vicissim; Si de subiecto per modi vel relationis cuiusdam possibilitatem definito prædicantur omnia essentialia simul, propositio converti potest.*

Idem adhuc ulterius ostenditur.

§. 283.

Si quid sub quadam conditione nonnisi de data specie vel genere dato prædicari potest, propositio potest converti. Etenim si prædicatum nonnisi de illa specie potest enunciari, sub sola ista conditione; ubi sub illa conditione enti cuidam convenit istud prædicatum, id ipsum ejusdem speciei esse debet. Quoniam itaque ens ejusdem speciei utique est, ideo species migrare potest in locum prædicari & conditioni junctum prædicatum tueri vicem subiecti (§. 197.), consequenter propositio converti potest (§. 279.).

Idem porro ostenditur.

E. gr. De lineis parallelis solis sub ea conditione, quod secentur linea transversa, prædicari potest *angulorum alternorum aequalitas.* Ex con-

verso autem *linearum parallelismum* prædicare licet de *lineis transverſis* quodum ita ſecūis, ut anguli alterni ſint æquales.

§. 284.

Idem alterius
prædicatur.

Si quid de ſubjecto ſub determinatione unica prædicari poteſt, propoſitio ita eſt convertibilis, ut determinatio ſiat prædicatum & prædicatum determinatio ſubjecti. Quod enim de ſubjecto prædicari poteſt nonniſi ſub unica determinatione, id eodem convenire non poteſt niſi adſit iſta determinatio (§. 197.). Quamobrem ſi id eidem convenire ſumitur, determinatio quæque erit ei tribuenda. Fit itaque, quod ante erat prædicatum, nunc ſubjecti determinatio (§. 225.), & quod determinationis loco erat, abit in locum prædicati (§. 197.).

E. gr. In propoſitione *omnis lapis calidus calefacit actus calefaciendi* tribuitur *lapidi* ſub conditione *caloris*, ſeu ſub hac determinatione, quod ſit *calidus*. Fieri autem non poteſt, ut ſub determinatione alia idem actus *calefaciendi* eidem conveniat: quod enim affirmatur de calido, negandum eſt de omni non calido. Propoſitionem igitur iſtam in hanc convertere licet: *Omnis lapis, qui calefacit, calidus eſt.*

§. 285.

Propoſitionum
oppositarum & con-
tradictoria-
rum definitio.

Propoſitiones, quarum una negatur, quod altera affirmatur, Oppoſitæ ſunt. In ſpecie *contradictoriæ* dicuntur, quibus idem ponitur ſimul eſſe & non eſſe.

E. gr. Propoſitiones oppoſitæ ſunt: *in omni triangulo anguli ſimul ſunt æquales duobus reſtis & in omni triangulo anguli ſimul ſunt non æquales duobus reſtis.* Contradictoriæ in caſu ſingulari ſunt: *Petrus ſcribit & Petrus non ſcribit.*

§. 286.

Earum diffe-
rentia.

Propoſitiones oppoſitæ cum non differant, niſi quod altera ſit affirmativa, altera negativa (§. 285.); differentia omnis in eo conſiſtit, quod in una copula nude ponatur, in altera vero particula negandi eidem præfigatur (§. 204.).

§. 287.

In quo eodem
convenient.

Hinc porro conſequitur, *propoſitionibus oppoſitis idem prorsus eſſe debere ſubjectum atque prædicatum, nec minimi quicquam in utroque immutari debere in alterutra; conſequenter terminos ſingulos in eodem ſumi debere ſignificatu.* Si enim ſumatur

tur

tur in diversis, non eandem amplius rem significabunt (§. 36.), adeoque nec subjectum & prædicatum idem est.

E. gr. *In omni triangulo anguli simul sumti sunt aequales duobus rectis & in omni triangulo anguli simul sumti non sunt aequales duobus rectis.* Supponimus autem *triangulum rectilineum*, tribuentes voci *triangulum* cum *Euclide* eam notionem, quæ nonnisi triangulo rectilineo convenit. Enimvero si quis cum *Theodosio* vocem *trianguli* generaliter sumat, ac præter rectilineum, curvilineum & mixtilineum quodcunque sub se comprehendat; propositio negativa non contradicit *Euclidean* affirmativæ.

§. 288.

Hinc ulterius consequitur, *si quid subjecto nonnisi sub certa conditione convenit & in negativa eadem omittatur vel immutetur, propositiones non amplius fore oppositas.* Etenim in hoc casu subjecti quidam status determinatur, in quo prædicatum ei tribui potest (§. 225.), atque adeo omiſſa conditione, subjectum absolute positum non amplius idem est, consequenter nec propositio negativa affirmativæ opponitur (§. 287.).

Subjecti determinatio in oppositis eadem.

E. gr. In propositione: *Omnis lapis calidus calefacit* subjectum determinationem habet adjunctam: quamobrem si in negativa *omnis lapis non calefacit* eadem omittatur; eadem affirmativæ non opponitur.

§. 289.

Similiter patet, *in propositionibus oppositis determinatam respondere debere prædicato notionem, nec in negativa quidpiam eidem addi, vel demi posse.* Etenim cum prædicatum denotet omne id, quod subjecto tribuitur vel ab eo removeretur (§. 197.), consequenter quod in notione termino sive simplici, sive complexo, quod designatur, respondente continetur; in propositionibus autem oppositis idem prædicatum esse debeat (§. 287.); evidens omnino est, quod prædicato determinata respondere debeat notio.

Determinata notio prædicati in oppositis eadem.

Porro cum prædicatum non amplius idem sit, si quid notioni determinatæ, quæ eidem respondet, vel addatur, vel dematur, quod per se patet; porro manifestum est, in propositione negativa prædicato nihil addi, nihil demi posse.

§. 290.

§. 290.

Officium de
oppositione
judicaturi.

Inde porro sequitur, *antequam de oppositione iudicium fieri possit, determinatas cum subiecti, tum predicati notiones esse constituendas, sive termino simplici utrumque indigitetur, sive complexo.*

§. 291.

Quando con-
tradictoria
particulariter
negans.

Si propositionum contradictoriarum una fuerit universaliter affirmans; altera est particulariter negans. Etenim si contradictoriarum una fuerit universaliter affirmans, sub hac formula generali continetur: *Omne A est B.* Quoniam is, qui alteri contradicit, negare debet, quod affirmat alter (§. 285.); contradicturus negare debet, quod omni A tribui possit, quod notione ipsius B continetur, adeoque contendere, sub A contineri quædam, quibus tribui nequeat, quod notione ipsius B continetur. Erit igitur contradictoria universalis propositionis datæ: *Quoddam A non est B:* quæ vero particulariter negans est (§. 204. 240.).

§. 292.

Quando parti-
culariter affir-
mans.

Si propositionum contradictoriarum una fuerit universaliter negans; altera est particulariter affirmans. Etenim si contradictoriarum una fuerit universaliter negans, sub hac formula generali continetur: *Nullum A est B.* Quoniam igitur judicans statuit, nullum dari A, cui tribui possit, quod in notione B continetur; eidem contradicturus affirmare debet dari quoddam A, cui tribui B possit (§. 285.). Erit igitur contradictoria universalis propositionis datæ; *Quoddam A est B.* Hæc autem est propositio particulariter affirmans (§. 204. 240.).

§. 293.

Cur duæ uni-
versales non
sint contradi-
ctoriæ.

Quoniam nulla datur propositio universalis, quæ non sit vel affirmans, vel negans (§. 256.), utriusque autem contradictoria particularis est (§. 291. 292.); *si in duabus propositionibus idem B de eodem A universaliter affirmatur, & negatur, propositiones non erunt contradictoriæ.*

E. gr Si unus affirmat, *omnes planetas esse corpora telluri similia;* alter vero statuit, *nullum planetam esse corpus telluri simile;* propositiones non sunt contradictoriæ.

§. 294.

§. 294.

Propositiones, quarum una universaliter negatur, quod in altera universaliter affirmatur de eodem subiecto, dicuntur *contrariae*.

Hinc si alter affirmet, omnes planetas esse corpora telluri similia; alter vero statuit, nullum planetam esse corpus telluri simile; posterior dicitur statueret contrarium ejus, quod defendit prior. Erica judicantes dicuntur sibi invicem contrariari, non autem sibi mutuo contradicere.

Contraria-
rum propo-
sitionum de-
finitio.

§. 295.

Si duæ fuerint *propositiones particulares*, quarum una affirmatur de subiecto, quod de eo in communi negatur altera; *propositiones non sunt contradictoriae*. Etenim cum terminus sit communis, quo subiectum denotatur per *hypothesein*, adeoque vel genus, vel species (§. 113.), subiectum particulariter sumptum non denotat, nisi quædam ejus individua. Quamobrem cum particularitatis signum non denotet individua in singulari; incertum est, num utrobique eadem indigentur, immo fieri potest, ut in utraque propositione supponantur diversa. Quamobrem cum idem in contradictoriis esse debeat subiectum (§. 285.); *propositiones in præsentī casu pro contradictoriis haberi nequeunt*. Etenim si supponamus, in utroque casu determinata quædam individua exprimi; tum propositiones erunt singulares, atque determinate enuncianda sunt individua.

Cue particula-
rium nulla
contradictio.

E. gr. Contradictoria non sunt: *Quidam homines sunt docti & quidam homines non sunt docti*, cum non sint iidem numero homines, de quibus affirmatur, quod sint docti & quod non sint docti.

§. 296.

Propositiones particulares, in quibus idem affirmatur & negatur de diversis inferioribus ad idem genus, vel eandem speciem relatis, dicuntur *subcontrariae*, quia sub contrariis (§. 294.) continentur: quemadmodum *subalternans* appellatur particularis, in oppositione ad suam universalem, sub qua continetur.

Propositio-
num subcon-
trariarum &
subalternan-
tium definitio.

Exemplum subcontrariarum dedimus (not. §. 295.). Subalternans est:
(Logica contracta.)

Q

Omne

Omne triangulum habet tres angulos & Quædam triangula habent tre angulos.

§. 297.

Propositio-
num opposi-
tarum signifi-
catio vulga-
ris.

Propositiones contradictoriæ, contrariæ, subcontrariæ & subalternantes vocantur subinde communi nomine *oppositæ*, quo in casu definiri possunt, quod sint propositiones non differentes nisi vel quantitate & qualitate, vel quantitate, vel qualitate sola.

Contradictoriæ nimirum differunt & quantitate, & qualitate (§. 291. 292.). Contrariæ & subcontrariæ differunt sola qualitate cum illarum una sit universaliter affirmans, altera universaliter negans; harum vero una particulariter affirmans, altera particulariter negans. Denique subalternantes sola quantitate differunt, cum una sit universaliter affirmans, vel negans; altera vero particulariter affirmans, vel negans. Dicuntur vero subcontrariæ & subalternantes *improprie oppositæ*.

§. 298.

Contradictio
in subalternis
latens.

Propositio subalternans unius contrariarum est contradictoria alterius contrariarum. In propositionibus contrariis idem universaliter de eodem subjecto affirmatur & negatur (§. 294.). Quod vero de subjecto universaliter affirmatur vel negatur, id etiam particulariter de eodem affirmari vel negari potest (§. 245.). Quod igitur alterutrum fiat, in casu priori particulariter affirmans erit contradictoria universaliter negantis & in posteriori particulariter negans contradictoria universaliter affirmantis (§. 291. 292.). Enimvero propositiones istæ particulares sunt suarum universalium, sub quibus continentur, subalternantes (§. 296.).

E. gr. Propositiones contrariæ sunt: *Omnis homo est sapiens & Nullus homo est sapiens.* Subalternans prioris est: *Quidam homo est sapiens*, quæ contradictoria alterius contrariarum: *Nullus homo est sapiens.* Similiter subalternans posterioris contrariarum est: *Quidam homo non est sapiens*, quæ contradictoria contrariæ prioris: *Omnis homo est sapiens.*

§. 299.

Contraria ab-
iens in contra-
dictoriam.

Propositio contraria in casu particulari & singulari abit in contradictoriam alterius. Propositiones contrariæ non differunt,

runt, nisi quod altera sit affirmans, altera negans, utraque vero universalis (§. 284.). Quodsi ergo alterutra mutetur in particularem vel singularem, applicatione in casu particulari, vel singulari facta (§. 48.); habemus propositiones, quarum una particulariter affirmat, quod altera universaliter negat, vel una particulariter negat, quod altera universaliter affirmat, consequenter propositiones contradictorias (§. 291. 292.).

E. gr. *Omne totum est majus sua parte & omne totum non est majus sua parte* sunt propositiones contrariae. Jam si in casu particulari occurrat propositio: *Quoddam totum non est majus sua parte*, contraria abit in contradictoriam.

§. 300.

Quoniam itaque propositiones indefinitae, in quibus subiectum est terminus communis, universaliter (§. 246. & seqq.) explicari possunt, & particulariter (§. 245.); *propositiones indefinitae oppositae aequivalent contradictoriis, si altera universaliter altera particulariter explicetur.*

Contradictio
latens in indefinitis.

E. gr. *Homo est sapiens, & Homo non est sapiens.* Quodsi prima universaliter, altera particulariter explicetur; habebis contradictorias: *Omnis homo est sapiens & Quidam homo non est sapiens.*

§. 301.

Et quia propositionum contrariarum alterutra in casu particulari & singulari sit alterius contradictoria (§. 299.); *qui contrarium statuit ejus, quod alter defendit, in casu singulari & particulari eidem contradicere tenetur.*

Contrariae
defendentium
contradictio.

§. 302.

Si in duabus propositionibus affirmativis, quarum una universalis, altera particularis, vel utraque singularis, subiecto eadem tribuuntur, quae eidem una convenire nequeunt; propositiones sunt contradictoriae, etsi tales non appareant. Praedicata enim B & C, quae eidem subiecto una convenire nequeunt, sunt ut B & non B. Quamobrem si dicatur: *Omne A est B & Quoddam A est C*, perinde est ac si diceret: *Omne A est B & Quoddam A non est B.* Quamobrem cum hae propositiones contradictoriae sint (§. 292.); etiam illae: *Omne A est B & Quoddam A est C* in hypothesi theorematum contradictoriae sunt, etsi tales externa specie non appareant.

Contradictio
latens in affirmativis.

Sic universaliter affirmans: *Omne totum est majus sua parte, & in casu particulari occurrat: totum quoddam esse minus sua parte.* Quoniam quod minus est, id non est majus; ideo patet, propositionem particularem: *Quoddam totum est minus sua parte* aequivalere huic alteri: *Quoddam totum non est majus sua parte*, consequenter universalis; *Omne totum est majus sua parte* contradicere.

§. 303.

Contradictio
latens in pro-
positionibus
negativis.

*Si duæ fuerint propositiones negativæ, quarum una universalis, altera particularis, vel utraque singularis, & ab eodem sub-
jecto remonentur, quorum alterutrum eidem necessario convenit;
propositiones sunt contradictoriæ, utut tales non appareant.* Sint
duo prædicata B & C, quorum alterutrum subiecto A neces-
sario convenit, ita ut A vel sit B, vel C. Sit jam universalis
propositio: *Nullam A est B*; particularis vero: *Quoddam A
non est C.* Quoniam A vel B est, vel C: igitur cum non sit
C per hypotesin; erit B. Quamobrem cum propositio:
Quoddam A est B contradicat universalis: *Nullum A est B*;
etiam altera: *Quoddam A non est C*, eidem contradicere debet.

E. gr. *Nulla pars est major toto & Quædam pars non est minor toto.*
Quoniam particulari aequivalere potest hæc altera: *Quædam pars est ma-
jor toto*, universalis contradictoria; altera quoque ejusdem contradi-
ctoria esse debet.

§. 304.

Contradictio-
riæ singula-
res.

*Omnes propositiones singulares oppositæ sunt contradicto-
riæ.* Nam in propositionibus singularibus oppositis idem de
individuo eodem affirmatur & negatur (§. 286.), consequenter
idem eidem tribuitur & ab eodem removetur, seu idem eidem
convenire & non convenire eodem tempore (§. 197.), conse-
quenter idem esse & non esse simul dicitur. Omnes nimirum
propositiones singulares oppositæ ad hanc formam in casu sin-
gulari rediguntur: *Hoc A est B & Hoc A simul non est B.* Sunt
igitur contradictoriæ (§. 285.).

E. gr. *Petrus scribit & Petrus simul non scribit.*

§. 305.

Propositiones
indefinitæ
quando con-
tradictoriæ.

*Si de quodam genere, vel quadam specie prædicatur attri-
butum, vel modi quædam atque relationis possibilitas, quæ per mo-
dum attributi inest; propositiones indefinitæ oppositæ æquivalent
con-*

contradictoriis. Conf. §. 64. 154. Quoniam itaque genus & species respectu horum prædicatorum pro singularibus haberi possunt, ita ut propositiones indefinitæ huc spectantes omnes oppositæ sub his generalibus contineantur: *Hoc genus vel hæc species, quæ nomine A designatur, est B & Hoc genus vel hæc species, quæ nomine A designatur, non est B* (§. 285.): propositiones indefinitæ oppositæ in data hypothæsi pro contradictoriis haberi possunt (§. 304.).

E. gr. Numerus ternarius angulorum est attributum proprium sive proprietas trianguli. Quamobrem si propositiones oppositæ indefinitæ: *triangulum habet tres angulos & triangulum non habet tres angulos* ita explices: *Hoc figurarum genus, quod trianguli nomine designatur, habet tres angulos & Hoc figurarum genus, quod trianguli nomine designatur, non habet tres angulos*; propositiones utique contradictoriæ sunt.

§. 306.

Si de quodam genere, vel quadam specie sub expressa Casus altes.
conditione prædicatur, quod eidem sub ista conditione semper con-
venit; propositiones oppositæ indefinitæ æquivalent contradicto-
riis. Demonstratio non absimilis præcedenti, modo propo-
sitiones indefinitas generales ita concipias: *Hoc genus vel hæc species, quæ nomine A designatur, in hypothæsi C est B & Hoc genus, vel hæc species, quæ nomine A designatur in hypothæsi C non est B.*

E. gr. Triangulo rectilineo sub hac conditione, quod constituatur cum parallelogrammo super eadem basi & inter easdem parallelas semper convenit ratio subdupla ad parallelogrammum. Quamobrem si hæ propositiones: *triangulum cum parallelogrammo super eadem basi & inter easdem parallelas constitutum est ejus dimidium & triangulum cum parallelogrammo super eadem basi & inter easdem parallelas constitutum non est ejusdem dimidium* ita explicentur: *Hæc figurarum species, quæ triangulari rectilinei nomine venit, sub hac conditione, quod cum parallelogrammo super eadem basi & inter easdem parallelas constituitur, est ipsius dimidium & non est ipsius dimidium*; propositiones erunt contradictoriæ.

§. 307.

Quænam repugnare dicantur;

Quæ salvis essentialibus, aut attributis, vel iis, quæ per modum attributorum insunt, consequenter definitione salva (§. 170. 172. 173.), subiecto convenire nequeunt; *eidem repugnare* dicuntur. Similiter quæ subiecto in data hypothese, seu ob adjectam determinationem, convenire nequeunt; ea *hypothese repugnare*; Quæ vero eidem subiecto simul convenire nequeunt, ea *mutuo sibi repugnare* dicimus.

E. gr. Essentialia *Quadrati* sunt laterum numerus quaternarius, eorum æqualitas & quod omnes anguli sint recti. Enimvero salvis iis essentialibus, consequenter salva definitione Quadrati, quod sit figura quadrilatera, æquilatera & rectangula, eidem convenire nequit angulorum inæqualitas, cum omnes anguli recti sint inter se æquales: inæqualitas itaque angulorum Quadrato repugnat. E contrario si *Trapezium* supponitur *circulo inscriptum & singuli ejus anguli obliqui; anguli diagonaliter oppositi non possunt esse æquales*. Cum enim simul sint duobus rectis æquales, forent singuli recti, adeoque non obliqui. *Æqualitas adeo angulorum diagonaliter oppositorum in trapezio* repugnat hypothese, quod *circulo sit inscriptum & obliquangulum*. Denique fieri non potest, ut *triangulum sit rectilineum & habet duos angulos actu rectos*. Dicuntur igitur hæc duo inter se pugnare, vel sibi mutuo repugnare.

§. 308.

Quænam sibi mutuo repugnant.

Quoniam contradictoria simul esse nequeunt (§. 285.), neque etiam contraria (§. 294.); igitur & *contradictoria & contraria sibi mutuo repugnant*.

E. gr. Propositiones contradictoriæ sunt: *Omne triangulum habet tres angulos & quædam triângula non habent tres angulos*; repugnare igitur dicitur, ut *omne triangulum habeat tres angulos & tamen sint quædam triângula, quæ non habent tres angulos*.

§. 309.

Crypticarum propositionum definitio.

Propositiones crypticæ dicuntur, quarum genuina forma non apparet.

Exempli loco sunt *propositiones oblique universales* (§. 243.).

§. 310.

Unde Cryptis oriatur & judicetur.

Quoniam igitur omnis propositio constat ex subiecto, prædicato atque copula (§. 196. 198.), & subiectum quidem pro-

propter signum quantitatis priori loco ponendum, omnis quoque propositio suum habere debet signum ejus quantitatem pariter ac qualitatem indicans (§. 256.), atque in negativis negatio copulam afficit (§. 204.), sique prædicatum subiecto non absolute competit, determinatio adjicienda (§. 225.): *Crypticæ propositiones erunt omnes, ubi non statim apparet, 1. Quodnam sit prædicatum, quodnam subiectum; 2. Utrum sint affirmativæ, an negativæ; 3. Utrum sint universales, an particulares; 4. Quænam ad subiecti determinationem, quænam vero ad prædicatum sint referenda.*

E. gr. Sunt latentis subiecti propositiones: *Dimidium parallelogrammi est triangulum super eadem basi & ejusdem altitudinis; laborandum est* &c. quarum priori subiectum ponitur loco posteriori, qui prædicato convenit; posteriori autem prorsus omittitur, cum ea æquipolleat huic alteri: *Homo laborare debet.* Propositiones indefinitæ præbent exemplum: *Crypticarum* (§. 241.) & indefinitæ eum illustrent casum, ubi qualitas latet (§. 206.). Pertinent quoque ad casum latentis quantitatis propositiones oblique universales & particulares (§. 243. 244.). Crypsis occurrit contradictionis in propositionibus quoad externam speciem contrariis (§. 305. 306.) & cryptica est propositio, ubi contradictio in affirmativis latet (§. 302.) atque in negativis (§. 303.).

§. 311.

Propositiones simplices dicuntur, quæ unum habent subiectum atque prædicatum. *Compositæ* vero sunt, quæ ex pluribus simplicibus coalescunt, veluti cum idem fuerit subiectum, prædicata vero sunt diversa; vel cum idem prædicatum fuerit, diversa vero sunt subiecta.

Propositio-
num simplici-
um & compo-
sitarum defi-
nitio.

§. 312.

Propositio composita dicitur *copulativa*, si subiectum vel prædicatum conjunguntur, ita ut utrique subiecto sigillatim possit tribui idem prædicatum, vel eidem subiecto possint tribui singula prædicata, aut in negativis ab eo removeri.

Propositionis
copulativæ
definitio.

Exempla propositionum copulatarum sunt: 1. *Deus est & liberri-
mus, & sapientissimus:* etenim quodlibet prædicatum sigillatim Deo
tribui potest, resolvendo propositionem compositam in duas simplices:
Deus est liberri-mus & Deus est sapientissimus: 2. *Homines pariter atque
bruta*

bruta habent organa sensoria, nam prædicatum unicuique subjecto sigillatim tribui potest, resolvendo compositam in has simplices: *Homines habent organa sensoria & Bruta habent organa sensoria*: 3. In negativis: *Deus nec est mutabilis, nec finitus*, nam & hæc propositio composita negativa in duas simplices resolvitur: *Deus non est mutabilis, & Deus non est finitus*.

§. 313.

Propositionis
disjunctivæ
definitio.

Propositio composita dicitur disjunctiva, ubi ex pluribus prædicatis unum tribuendum esse subjecto affirmatur, sed quodnam eorum tribui debeat, non determinatur.

E. gr. *Anima aut habet rationem existentie suæ sufficientem in seipsa, aut in alio*.

CAPUT. IV.

DE USU VOCUM SEU TERMINORUM CIRCA JUDICIA.

§. 314.

Quot voces
ad propositionem
requirantur.

Propositiones nec pluribus, nec paucioribus constare debent vocibus, quam qua ad significandum subjectum & prædicatum, illiusque determinationem, si qua adfuerit, atque propositionum quantitatem & qualitatem sufficiunt. Conf. §. §. 40. 197. 225. 256.

§. 315.

Propositionum
determinatarum
& vagarum
definitio.

Propositiones dicimus determinatas, quas nec plures, nec pauciores ingrediuntur voces, quam ad iudicium determinatum significandum sufficientes. *Judicium vero determinatum dicitur a nobis*, quod servat formam a Logica præscriptam, nempe ut subjectum representetur sub ea notione, ut in ea contineatur ratio, cur eidem conveniat prædicatum, seu id, per quod determinatur prædicatum. *Vagum appellamus iudicium*, quod subjectum ita non exhibet, ut notio ejus includat id, per quod prædicatum determinatur. *Vagum autem propositio est*, qua iudicium vagum significatur.

§. 316.

§. 316.

In propositionibus non utendum eſt terminis niſi propriis & De fixis vide §. 40. 314. 115. 127. de propriis conf. §. 136. Relege h. l. §. 146. 159. Quales eſſe debeant termini.

§. 317.

Paterhinc, quanta ſit definitionum neceſſitas, ut propoſitiones ab altero poſſint intelligi. Definitionum in propoſitionibus uſus.

§. 318.

Si in duabus propoſitionibus ſubjectum fuerit idem terminus, eidem tamen diverſæ tribuantur notiones; ſubjecta diverſa ſunt & propoſitiones diverſæ, ut ut idem prædicatum. Conf. §. 36. 197. Subjectum apparenter idem.

E. gr. Non idem ſubjectum eſt in hiſce propoſitionibus: *Triangulum habet tres angulos duobus rectis æquales* & *Triangulum habet tres angulos acutius rectos*, ſi in priori ſumitur terminus in ſignificatu *Euclideo*, in poſteriori in *Theodoſiano*.

§. 319.

Si in duabus propoſitionibus prædicatum fuerit idem terminus, eidem tamen diverſæ reſpondeant notiones; prædicatum idem non eſt, nec propoſitiones eadem ſunt, utnt ſubjectum fuerit idem. Demonstratio eadem eſt, quæ propoſitionis præcedentis. Prædicatum apparenter idem.

E. gr. Si duo affirmant, *Petrus eſſe doctum* alius tamen vocem *docti* in alia ſumit ſignificatione, quam alter; judicia eorum & ipſæ quoque propoſitiones, quibus illa ſignificantur, pro iisdem haberi nequeunt.

§. 320.

Si in duabus propoſitionibus & ſubjectum, & prædicatum fuerit idem terminus, utrique tamen diverſæ reſpondeant notiones; propoſitiones diverſæ ſunt. Lege §. 318. ſq. 40. Propositiones apparenter eadem.

§. 321.

Diverſus ejusdem vocis ſignificatus dicitur *Homonymia* atque *Æquivocatio*. Et res diverſæ eodem termino denotatæ *Homonymia* ſeu *æquivoca* appellantur: ipſe autem terminus res diverſas denotans *homonymus* ſeu *æquivocus* vocatur. Homonymiæ definitio.

E. gr. Vox *trianguli* æquivoca eſt, cum ſumatur vel cum *Euclide* pro triangulo rectilineo in ſpecie, vel cum *Theodoſio* pro triangulo quocunque ſive rectilineo, ſive curvilineo, ſive mixtilineo,

(*Logica contracta*.)

R

§. 322.

Æquivocatio
quando non
molesta.

§. 322.

Æquivocatio propositionum non reddit interpretationis dubie, modo in eodem libro, vel ab eodem Autore in scriptis suis evitetur. Si enim in eodem libro, vel ab eodem Autore in scriptis suis evitetur æquivocatio, termino eodem eadem constanter res indigitatur (§. 321.). Quamobrem cum, quod fieri debet (§. 317.), terminus ab autore fuerit definitus; in casu quolibet constar, quænam norio eidem sit tribuenda, consequenter iudicium Autoris intelligi potest (§. 115.), neque adeo est interpretationis dubiæ.

Subiectum
apparenter
diversum.

§. 323.

Si in duabus propositionibus subiectum fuerit terminus diversus, utrique tamen eadem notio respondeat; subiectum diversum non est & accedente eodem prædicato propositiones eadem sunt. Vid. §. 36. 197.

E. gr. Quod stylo Leibnitiano dicitur *calculus differentialis*, stylo Newtoniano appellatur *methodus fluxionum*. Quamobrem si dicas *Calculus differentialis inservit tangentibus determinandis* & *Methodus fluxionum inservit tangentibus determinandis*; propositiones eadem sunt, subiectum in utraque idem.

Prædicatum
apparenter
diversum.

§. 324.

Si in duabus propositionibus prædicatum fuerit terminus diversus, utrique tamen eadem notio respondeat; prædicatum diversum non est & accedente eodem subiecto propositiones eadem sunt. Ostenditur eodem prorsus modo, quæ præcedens propositio (§. 323.).

E. gr. Cum *calculus differentialis* & *fluxionum methodus* eandem rem significant; propositiones: *Geometria seculo præterito ditata est calculo differentiali* & *Geometria seculo præterito ditata est metodo fluxionum*, idem habent prædicatum & propositiones eadem sunt.

Synonymiæ
definitio.

§. 325.

Terminorum sive vocum significatus idem dicitur Synonymia; ipsi autem termini diversi eundem significatum habentes Synonyma aut termini Synonymici vocantur.

E. gr. *Calculus differentialis* & *fluxionum methodus*.

§. 326.

Propositiones
apparenter di-
versæ.

Si in duabus propositionibus & subiectum, & prædicatum fuerint Synonyma; propositiones eadem sunt. Conf. §. 323. 325. & 324. 325.

SECTIO

SECTIO IV.

DE

RATIOCINATIONE

SEU

DISCURSU IN SPECIE.

CAPUT I.

DE SYLLOGISMO IN GENERE.

§. 327.

Syllogismus est oratio, qua ratiocinium seu discursus distincte proponitur. Syllogismi definitio.

Ratiocinium nempe nobis est operatio mentis, quemadmodum notio & iudicium. Sicuti vero notio significatur termino, iudicium propositione, ita ratiocinium syllogismo.

§. 328.

Syllogismus tribus constat propositionibus, quarum duæ habent terminum communem, tertia vero combinantur termini in prioribus diversi. Conf. §. 327. 49. Partes Syllogismi.

E. gr. In hoc syllogismo: *Omne triangulum habet tres angulos. Omne triangulum sphericum est triangulum. Ergo Omne triangulum sphericum habet tres angulos:* duæ propositiones priores terminum triangulum habent communem; in tertia vero ceteri duo diversi triangulum sphericum & habere tres angulos combinantur, ut unus sit subiectum, alter vero prædicatum.

§. 329.

Syllogismus constare nequit, nisi tribus terminis. Conf. Termini syllogismi ingredientibus.

§. 328. 196.

E. gr. In syllogismo anteriori termini tres sunt *triangulum* in genere, *triangulum sphericum* in specie & *habere tres angulos*.

R 2

§. 330.

§. 330.

Præmissarum,
conclusionis
& illationis
definitio.

Duæ propositiones, ex quibus tertia formatur, combinando duos terminos in istis obvios, dicuntur *Præmissæ*: tertia vero, quæ ex iis dicta ratione formatur, *conclusio* appellatur. Ipsa denique propositionis tertiæ formatio per combinationem terminorum in duabus aliis terminum communem habentibus diversorum *Illatio* audit.

§. 331.

Termini
medii & extremi
definitio.

Terminus præmissarum communis vocatur *Medius*; diversi vero dicuntur *Extremi*.

§. 332.

Cur medius
ex conclusio-
ne exolet.

Terminus medius non potest ingredi conclusionem. Conf. §. 331. 330.

§. 333.

Termini con-
clusionis.

Conclusio componitur ex terminis syllogismi extremis. - Lege §. 330. seq.

§. 334.

Majoris & mi-
noris termini
definitio.

Major terminus appellatur extremus, qui subit vicem prædicari in conclusione: *Minor* autem, qui in eadem tuetur locum subiecti.

§. 335.

Majoris & mi-
noris propo-
sitionis defi-
nitio.

Propositio major est præmissa, in qua terminus major construitur cum termino medio. *Minor* vero est *propositio*, in qua terminus minor construitur cum medio.

§. 336.

Syllogismi
affirmantis &
negantis defi-
nitio

Syllogismus affirmans dicitur, cujus conclusio est affirmans: *Syllogismus vero negans*, cujus conclusio est negans.

§. 337.

Syllogismi
universalis &
particularis
definitio.

Similiter *Syllogismus universalis* dicitur, cujus conclusio universalis: *Syllogismus vero particularis*, cujus conclusio particularis vel singularis, non tamen propria: etenim jam in superioribus propositiones illas singulares ad particulares reduimus (§. 256.).

§. 338.

Fundamen-
tum figura-
rum Syllo-
gismorum.

In exemplo (not. §. 228.) *medius terminus est predicatum in minore, subiectum in maiore propositione.* Occurrunt vero etiam *Syllo-*

Syllogismi, in quibus medius terminus in utraque præmissa est prædicatum, vel etiam subiectum.

E. gr. *Omnis sapiens eligit media sui convenientia. Quidam homines non eligunt media sui convenientia. Ergo Quidam homines non sunt sapientes.* Hic medius terminus est *eligere media sui convenientia*, tanquam communis præmissarum (§. 331.). Patet vero per se, quod his ponatur loco prædicati. E contrario si quis argumentatur: *Nul-
lus stultus prospicit futura. Quidam stulti sunt divites. Ergo Quidam
divites non prospiciunt futura:* medius terminus esse *stultum* bis ponitur loco subiecti.

§. 339.

Distinguntur hinc Syllogismi in diversa genera, quæ *Figurarum* nomine designantur. Et *Figura* quidem *prima Syllogismorum* dicitur, in qua medius terminus est subiectum propositionis majoris & prædicatum minoris. *Figura secunda* vocatur, in qua medius terminus est utriusque præmissæ prædicatum. *Figura* denique *tertia* audit, in qua medius terminus in majore & minore est subiectum. Figurarum definitio.

§. 340.

Quoniam vero in singulis figuris propositiones, ex quibus *Modorum* constant Syllogismi; ratione quantitatis & qualitatis differre possunt (§. 256.); ideo in singulis figuris per diversitatem quantitatis vel qualitatis propositionum constituuntur Syllogismorum species, quæ *Modi* appellantur. Modorum definitio.

§. 341.

Dictum de omni dicitur propositio: *Quicquid de genere* *Dictum de*
vel specie omni affirmari potest, illud etiam affirmatur de quovis sub *omni.*
illo genere vel illa specie contento.

E gr. *De omni triangulo* in genere prædicatur, quod *habeat tres angulos*; idem igitur etiam prædicari potest de quavis specie triangulorum, v. gr. *de triangulis sphericis.* Illud adeo evidens est, ut sine probatione concedatur. Si quis enim hoc dictum in dubium vocare velit, is absurditatis vincitur per principium contradictionis: statuere enim debet, idem simul esse & non esse. Atque ea de causa superius dictum de omni supposuimus in definitione propositionis universalis (§. 239.).

§ 342.

Dictum de
nullo.

E contrario *Dictum de nullo* appellatur propositio sequens:
Quicquid de genere vel specie omni negatur; illud etiam de quovis sub illo genere vel illa specie contento negari debet.

E. gr. De omni triangulo in genere negatur, quod habeat quatuor angulos; idem igitur etiam negari debet de quavis specie triangulorum, v. gr. de triangulis sphericis. Dictum de nullo eadem evidentia nititur, quia dictum de omni, quamobrem idem quoque supposuimus in definitione propositionis universalis (§. 239.).

§. 343.

Dictum de
omni & nullo
ulterius ex-
tentum.

Vi dicti de omni & nullo de quibusdam speciebus vel individuis sive absolute, sive sub expressa conditione affirmandum, vel negandum, quod de genere vel specie sive absolute, sive sub expressa conditione affirmari vel negari potest, sub quibus istæ species vel individua continentur. Conf. §. 239 341. 342. 43. seqq. 246. 344.

§. 344.

Uterior ex-
tensio dicti
de omni &
nullo ad defi-
nitiones.

Quoniam generi vel speciei per definitum designatis notio in definitione eidem attributa responderet tanquam prædicatum, & vicissim generi vel speciei notione distincta completa representantis definitum tanquam prædicatum tribuitur (§. 249. 251. 252.); dictum de omni & nullo etiam has propositiones sub se comprehendit: 1. Cui definitum competit, eidem quoque competit notio integra in definitione ei attributa; competunt quoque singula sigillatim enuncianda, quæ in notione ista continentur. 2. Cui conveniunt notæ in definitione enumeratæ simul, eidem quoque convenit definitum. Et contra 3. Cui definitum non competit, de eo nec notio integra in definitione eidem attributa prædicari potest. 4. Cui non conveniunt notæ omnes in definitione enumeratæ simul, ei nec definitum convenit. Quæ in superioribus partim demonstrata (§. 250. 251. 253.). partim ex supra positis (§. 47.) manifesta sunt.

§. 345.

Extensio ejus-
dem ad prædi-
cationes præ-
prias.

Et quia nota ad individuum quoddam nomine proprio vel alia ratione designatum agnoscendum sufficiens definitionis vicem subit; vi ejusdem dicti de omni & nullo porro patet:

1. Cui

1. Cui ista nota convenit; illud esse id ipsum individuum hoc nomine proprio vel data alia ratione designandum & vicissim. 2. Cui nomen istud proprium vel determinatio ista singularis convenit, ei quoque notam istam convenire. Sed 3. Cui nota ista non convenit, ei nec nomen proprium aut determinationem istam singularem tribui posse. 4. Cui nomen proprium vel determinatio ista singularis non convenit, ei nec notam convenire posse.

E. gr. *Leibnitius* est Autor *Theodiceæ*. Hoc prædicatum ipsi soli convenit, atque adeo nota constitui potest ad *Leibnitium* ab eruditis aliis distinguendum. Quamobrem cum *Leibnitius* quoque invenerit calculum differentialem; auctori etiam *Theodiceæ* istud inventum tribui potest affirmando: *Autor Theodiceæ invenit calculum differentialem*.

§. 346.

Propositiones singulares, in quibus prædicatum est subiecto singulari proprium, dicuntur *propositiones propriæ*. Unde per se patet, quod possint converti (§. 280.).

E. gr. *Propositio propria est: Leibnitius est autor Theodiceæ*. Sed eadem converti potest: *Autor Theodiceæ est Leibnitius*.

§. 347.

Syllogismus proprius appellatur, qui constat ex propositionibus propriis.

E. gr. *Inventor calculi differentialis est autor Theodiceæ*. *Leibnitius est inventor calculi differentialis*. Ergo *Leibnitius est autor Theodiceæ*. Hic syllogismus proprius est, nam singulæ propositiones propriæ sunt (§. 346.): Eodem argumentandi genere utuntur Theologi, quando ex quibusdam characteribus Messie apud Prophetas obviis inferunt, *Jesus Nazarenus esse illum promissum mundo Messiam*.

§. 348.

Dicto de omni & nullo nituntur omnes syllogismi. Vide §. 327 47. 48. 341. lqq.

§. 349.

In nullo syllogismo præmissa utraque potest esse particularis. Cur ex meris particularibus nil sequatur.

Conf. §. 348. 341. lqq.

Minime concludit, si quis ita argumentetur: *Quoddam triangulum habet angulos ad basin æquales*. *Figura hæc est triangulum*. Ergo *figura hæc*

Fundamentam syllogismorum.

Cur ex meris particularibus nil sequatur.

hæc habet angulos ad basin æquales. Neque enim necesse est, ut hæc figura, etsi triangulum sit, in numero eorum contineatur, quæ angulos ad basin æquales habent.

§. 350.

Cur ex meris
singularibus
aliquid sequi
possit.

Quoniam vi Dicti de omni & nullo prædicatum proprium affirmatur vel negatur de individuo ob notam singularem eidem convenientem (§. 345.), adeoque illa præmissarum, quæ prædicatum proprium effert de individuo charactere singulari designato, universaliter æquivalens, id quod ex collatione syllogismi proprii cum particularibus statim innotescit; *non mirum, quod ex meris singularibus hic aliquid sequatur, etsi alias propositiones singulares particularibus æquivaleant (not. §. 256.).*

Ita in exemplo syllogismi proprii supra (not. 147.) allati: *Inventor calculi differentialis est autor Theodiceæ. Leibnitiuss est inventor calculi differentialis.* Ergo *Leibnitiuss est autor Theodiceæ.* Propositio major, *Inventor calculi differentialis est autor Theodiceæ*, æquivalens universaliter, unde & per modum universalis effertur potest: *Quicumque est inventor calculi differentialis, ille etiam est autor Theodiceæ.*

§. 351.

Conclusio
quando par-
ticularis.

Si alterutra præmissa particularis, conclusio quoque particularis, & contra. Vid. §. 341. sqq. Quamobrem cum Dictum de omni & nullo sit fundamentum syllogismorum (§. 348.); in conclusione autem de subiecto id ipsum affirmetur, vel negetur, quod de omni affirmatur, vel negatur in præmissa; evidens est affirmationem vel negationem in conclusione esse debere particularem & contra.

§. 352.

Cur ex meris
negativis nil
sequatur.

In nullo syllogismo utraque præmissa potest esse negativa. Conf. §. 348. 342. sqq. Ergo una præmissarum enunciare debet, quædam ista, de quibus aliquid negandum, contineri sub omni, de quo idem negatur.

Si quis argumentetur: *Nullus homo est immortalis. Nullum brutum est homo.* Ergo *Nullum brutum est immortale*: consequentiæ vis nulla est, etsi omnes propositiones sint veræ, id quod ex Dicto de omni & nullo apparet, quod solum continet omnis consequentiæ syllogisticæ rationem (§. 348.).

§. 353.

Si una præmissarum fuerit negativa, conclusio quoque negativa est, & contra. Conf. §. 348. 342. 330. Quando conclusio negativa.

§. 354.

Præmissa particularis & negativa dicitur Pars debilior præmissarum. Partis debilioris definitio.

§. 355.

Conclusio sequitur partem debiliorem. Conf. §. 351. Conclusio eam partem debiliorem sequatur.

353. 354.

§. 356.

Syllogismus, qui ex meris propositionibus categoricis constat, *categoricus* dicitur. Solet quoque dici *Syllogismus simplex*. Syllogismi categorici definitio.

Et de categorico syllogismo potissimum intelligenda sunt, quæ hic de syllogismo in genere demonstrantur.

§. 357.

Propositio minor sub maiore dicitur subsunni, si hæc primo ponitur loco. Subsumtionis definitio.

§. 358.

Propositionem maiorem dicemus assumi, si minor primo ponitur. Assumptionis definitio.

§. 359.

Si, quod de specie absolute prædicatur, ad individua applicatur, minor esse potest propositio identica. Etenim si species fuerit A & prædicatum ipsi absolute tribuendum C, erit individuum sub specie contentum: *Hoc A* (§. 238.) & quædam individua ejusdem speciei dicenda erunt: *Quædam A* (§. 240.). Quoniam igitur propositio major: *Omne A est C*; minor, quæ subsunni debet, erit: *Hoc A est A* vel *Quædam A sunt A*. Unde inferetur conclusio: *Hoc A est C* vel *Quædam A sunt C* (§. 341.).

Propositio-
num identica-
rum in syllo-
gismo usus.

E. gr. *Omne triangulum habet tres angulos duobus rectis æquales.*
Subsume: *Hoc triangulum est triangulum* vel *Quædam triangula sunt triangula.* Inferetur hinc: *Ergo Hoc triangulum habet tres angulos duobus rectis æquales*, vel *Ergo Quædam triangula habent tres angulos duobus rectis æquales.* Apparet hinc, propositionibus identicis suum consistere (*Logica contracta*.)

S

in

in ratiocinando usum. Atque ideo propositiones identicas in axiomatum numerum retulimus (§. 267.). Ceterum non hic unus est casus, quo propositiones identicæ in syllogismum ingrediuntur. Sunt e. gr. etiam definitiones propositiones identicæ (§. 211.) & in eam quoque censum veniunt illæ, in quibus de definito prædicatur aliquid sigillatim; quod in definitione continetur (§. 220.), ideo inter axiomata & ipsæ relatæ (§. 265. 269.).

§. 360.

Syllogismi
cryptici defi-
nitio.

Syllogismus crypticus est, cujus genuina forma non apparet.

CAPUT II. DE FIGURIS ET MODIS SYL- LOGISMORUM.

§. 361.

Universalitas
majoris in pri-
ma figura.

In prima figura major semper esse debet universalis. Conf. §. 339. 334. 335. 341. 342. 239.

§. 362.

Minor cur
affirmans in
prima figura.

In prima figura minor semper debet esse affirmans. Conf. §. 342. 202.

§. 363.

Forma syllo-
gismi univer-
saliter affir-
mantis in pri-
ma figura.

Si in prima figura conclusio universaliter affirmans, utraque præmissa universaliter affirmans esse debet. Quod præmissæ universales esse debeant; vide §. 361. 351. quod affirmantes esse debeant; lege §. 362. 353.

§. 364.

Forma syllo-
gismi univer-
saliter negan-
tis in prima
figura.

Si in prima figura conclusio universaliter negans, major universaliter negans, minor universaliter affirmans esse debet. Conf. §. 361. 362. 353. de eo, quod major universaliter negans esse debeat; de minori universaliter affirmante vide §. 362. 351. 307.

E. gr. Nullum triangulum habet plures quam tres angulos. Omne triangulum sphericum est triangulum. Ergo Nullum triangulum sphericum habet plures quam tres angulos.

§. 365.

§. 365.

Si in prima figura conclusio particulariter affirmans, major universaliter affirmans, minor particulariter affirmans esse debet. Minorem esse particularem discitur ex §. 361. 341. 199. eam vero affirmantem, patet ex §. 362. 353. 307.

Forma syllogismi particulariter affirmantis in prima figura.

E. gr. Omnis sapiens prospicit futurum. Quidam homines sunt sapientes. Ergo Quidam homines prospiciunt futurum.

§. 366.

Si in prima figura conclusio particulariter negans, major universaliter negans, minor particulariter affirmans esse debet. Conf. §. 365. de posteriori; sed de priori vid. §. 342. 362.

Forma syllogismi particulariter negantis in prima figura.

E. gr. Nullus, qui ratione utitur, affectuum impetu abripitur. Quidam homines utuntur ratione. Ergo Quidam homines affectuum impetu non abripiuntur.

§. 367.

Prima figura nonnisi quatuor modos habet. Conf. §. 256. Sed in prima figura conclusionum istarum quælibet nonnisi unico modo inferri potest (§. 363. & seqq. §. 340.).

Quot sint modi in prima figura.

§. 368.

Modus syllogismorum universaliter affirmantium dicitur Barbara; modus universaliter negantium Celarent; modus particulariter affirmantium Darii; modus particulariter negantium Ferio.

Nomina Modorum.

§. 369.

Significatus nominum, quibus modi syllogismorum designantur, essentialis est. Etenim cum vocales A. E. I. O. designent quatuor propositionum categoricarum species (§. 367.); vocales in nominibus obviæ quantitatem & qualitatem singularum propositionum in quolibet modo indicant. Ipsum igitur nomen cum per elementa sua significet ea, per quæ modus unusquisque constituitur (§. 340.); significatus essentialis est: neque enim alia significatus essentialis notio.

Significatus essentialis eorum.

§. 370.

Habent vero nomina ista hunc usum, ut forma syllogismorum facile retineri & in casu quovis dato examinari possit.

Eorundem usus.

I.

BAr Omnis homo est mortalis.

bA Omnis Rex est homo.

rAE Omnis Rex est mortalis.

II.

CE Nullus homo est immortalis.

LA Omnis doctus est homo.

rEnt. E. Nullus doctus est immortalis.

III.

DA Omnis pius Deum amat.

rI Quidam homines sunt pii.

IE. Quidam homines Deum amant.

IV.

FE Nullus pius proximum odit.

rI Quidam homines sunt pii.

OE. Quidam homines proximum non oderunt.

§. 371.

Syllogismi
proprii primæ
figuræ cujus
modi.

Quoniam in syllogismis propriis major æquivalet propositioni universalis (§. 350.), ceteræ autem propositiones, nempe minor & conclusio, particularibus æquivalent (§. 345. 341. 342.); syllogismi proprii affirmantes ad modum Darii, negantes ad modum Ferio pertinent. Non adeo opus est, ut peculiare modi syllogismorum propriorum, quatinus sæpius obviunt, consulantur.

E. gr. Autor principiorum philosophiæ naturalis mathematicorum est inventor telescopii catoptrico-dioptrici. Atqui Isaacus Newton est autor principiorum philosophiæ naturalis mathematicorum. Ergo Isaacus Newtonus est inventor telescopii catoptrico-dioptrici. Majorem ulterius hoc syllogismo proprio probes. Autor Opticæ in qua traduntur novæ luminis proprietates, est inventor telescopii catoptrico-dioptrici. Enimvero Autor principiorum philosophiæ naturalis mathematicorum est etiam Autor Opticæ novæ luminis proprietates revelantis. Ergo Autor principiorum est inventor telescopii catoptrico-dioptrici; uterque syllogismus est in modo Darii, cum propositiones majores universalibus æquipollent & ad formam universalium ita reducuntur: Quicumque est Autor principiorum philosophiæ naturalis mathematicorum, is est inventor telescopii catoptrico-dioptrici & Quicumque est autor Opticæ novæ luminis proprietates revelantis, is etiam est autor principiorum philosophiæ naturalis mathematicorum. Ex hoc ipso exemplo patet, quod hoc argumentandi genere in criticis utamur & in historicis disquisitionibus. Ad idem exemplum syllogismi proprii negativi: Johannes Newtonus est autor astronomiæ & trigonometriæ Britannicæ. Sed Eminens ille principiorum philosophiæ naturalis mathematicorum autor non est Johannes Newtonus

Newtonus. Ergo Eminens ille principiorum philosophia naturalis autor non est autor astronomiæ & trigonometriæ Britannicæ.

§. 372.

Si terminus medius fuerit negativus, propositio minor infinita est. Conf. 339. 335. 341. 202. 206.

Quando minor infinita.

E. gr. Si quis ita argumentatur: *Quæcunque figura non habet plures quam tres angulos, illa est triangulum.* Atqui hæc figura non habet plures quam tres angulos. Ergo hæc figura est triangulum; syllogismus est in Darii. Major enim est universaliter affirmans, propterea quod negatio non afficit copulam est (§. 205.); minor autem est infinita, cum æquipolleat huic affirmanti: *Hæc figura, est figura quæ non plures quam tres angulos habet.*

§. 373.

Prima syllogismorum figura omnibus conclusionibus inferendis sufficit. Conf. §. 256. 368. 371.

Perfectio figuræ primæ.

§. 374.

Sola ergo prima figura possumus esse contenti.

§. 375.

Syllogismi in prima figura sunt maxime naturales, seu proxime accedunt ad Dictum de omni & nullo. In Logica naturali non attendimus in ratiocinando nisi ad Dictum de omni & nullo (§. 47. 48. 341. 342. & seqq.): syllogismi vero in prima figura non sunt nisi distincta Dicta de omni & nullo applicatio (§. 361. & seqq.).

Figuræ primæ ad ratiocinandum sufficientia. Syllogismi primæ figuræ cur maxime naturales.

§. 376.

Veteres cum Aristotele cognovere, fundamentum artis ratiocinandi esse *Dictum de omni & nullo* & hinc prodire quatuor modos syllogismorum primæ figuræ, quibus sua per se constat evidentia: quæ singula a nobis fuere in antecedentibus demonstrata. Cum porro agnoscerent, propositiones posse converti & per earum in syllogismis primæ figuræ conversionem prodire alios argumentandi modos; hac via incidere in modos figuræ secundæ & tertiæ, quos per reductionem ad figuram primam ope conversionis demonstrarunt. Nos autem in his evolvendis hac vice non hærebimus.

Monitum de nominibus syllogismorum.

CAPUT III. DE SYLLOGISMIS COM- POSITIS.

§. 377.

Syllogismi
compositi de-
finitio.

Syllogismus compositus est cujus vel una, vel utraque præmissa non est propositio categorica.

Unde in numerum syllogismorum compositorum referendus non est, cujus præmissæ sunt propositiones copulativæ, etsi copulativa propositio sit composita. E. gr. Si ita argumentamur: *Quicumque est & liberrimus, & sapientissimus, ille non vult nisi optimum. Sed Deus est & liberrimus, & sapientissimus. Ergo Deus non vult nisi optimum*; Syllogismus categoricus est in modo *Darii* primæ figuræ (§. 368.).

§. 378.

Syllogismi
hypothetici
definitio.

Quodsi major fuerit propositio hypothetica, *syllogismus hypotheticus* dicitur. Vocatur etiam *syllogismus conditionalis*, item *connexus*.

§. 379.

Antecedentis
& consequen-
tis definitio.

In propositione hypothetica *antecedens* dicitur propositio, quæ particulam conditionalem habet, seu quæ conditionem de subiecto enunciat, sub qua ipsi prædicatum tribuitur, vel ab eodem removeretur aut sub qua aliud quid esse affirmatur, vel negatur; *Consequens* vero vocatur propositio, in qua prædicatum subiecto isti tribuitur, aut qua aliud quid esse affirmatur, vel negatur.

E. gr. *Si Deus est & liberrimus, & sapientissimus, non vult nisi quod optimum*, h. l. antecedens dicitur propositio categorica, *Deus est & liberrimus, & sapientissimus*; consequens vero propositio categorica altera, *Deus non vult nisi quod optimum*.

§. 380.

Quid poni,
quid remo-
veri dicatur.

Poni dicitur membrum aliquod præmissæ, quod ita repetitur, ut in eadem habetur; *removeri* autem, cujus contradictorium asseritur.

E. gr.

E. gr. Poni dicitur antecedens propositionis hypotheticæ, si propositio categorica, ex qua constat, repetitur, veluti si in exemplo præcedente affirmamus, *Deum esse & liberrimum, & sapientissimum*. Poni dicitur consequens, si affirmatur, *Deum non velle, nisi quod optimum*. Enimvero si dixeris: *Aut dies est, aut nox est, & negaveris esse diem*; tum removeri dicitur antecedens: Quodsi negaveris, *esse noctem*, removeri dicitur consequens.

§. 381.

Si in syllogismo hypothetico antecedens ponitur, ponendum quoque est consequens; si vero consequens tollitur, tollendum quoque est antecedens. Vide (§. 380.). Quare cum propositio ista contineat conditionem, ob quam subjecto consequentis prædicatum tribui debet, vel ab eodem removeri (§. 379.); antecedente posito, conditio ista admittitur, adeoque etiam consequens admitti debet, consequenter in conclusione repetendum, prout in majore continetur.

Fundamentum syllogismi hypothetici.

Quodsi in minore consequens tollitur vel removetur, contradictorium ejus asseritur, quod in propositione categorica, quæ consequente continetur, prædicatur (§. 380.). Cum adeo propositio ista non admittatur, sed negetur, quod in ea affirmatur, vel contra affirmetur, quod in ea negatur (§. 285.); nec antecedens admitti potest, quo posito ponendum erat consequens, *videlicet*.

Nondum sequitur, quod etiam *sublato antecedente tolli debeat consequens*, cum consequens ex alia ratione possit esse verum. E. gr. propositio hypothetica est, *si globus ligneus ex turri delabitur, celerissime movetur*. Licet tollas antecedens, quod *ex turri delapsus motum acquisiverit*, non tamen ideo tollendum consequens, quod *globus alia ratione motum celerimum acquirere possit*.

§. 382.

Si tamen antecedens unicam contineat conditionem, sub qua prædicatum in consequente subjecto tributum eidem convenire possit; sublato antecedente, tollendum quoque est consequens. Si negas: concedendum erit, sublato antecedente, adhuc convenire posse subjecto prædicatum, quod ei in consequente tribuitur. Ergo antecedens non continet unicam conditionem, sub qua præ-

Fundamentum particulare.

prædicatum in consequente subiecto tributum eidem convenire potest.

E. gr. In propositione hypothetica *si lapis est calidus, calefacit*, antecedens *lapis est calidus* unicam continet conditionem, sub qua prædicatum *calefacere* subiecto *lapidi* tribui potest. Quamobrem si neget *lapidem esse calidum*, negare quoque debes, quod *calefaciat*.

§. 383.

Modi syllogismorum hypotheticorum.

Modi syllogismorum hypotheticorum nonnisi duo sunt, quibus hi syllogismi generales respondent.

I.

Si antecedens est, etiam consequens est.

Sed antecedens est.

Ergo etiam consequens est.

II.

Si antecedens est, etiam consequens est.

Sed consequens non est.

Ergo antecedens non est.

Conf. §. 382. Quodsi antecedens contineat unicam conditionem, cur prædicatum in consequente eidem tributur; proposito hypothetica, *si A est B, D quoque est C*, æquipollet alteri (§. 275.): *Si A non est B, D quoque non est C*. Quodsi ergo hanc illi substituas, posito antecedente poneatur consequens, nempe si admittis A non esse B, admitterendum quoque erit D non esse C. Continetur adeo syllogismus sub modo primo, quo posito antecedente ponitur consequens.

§. 384.

Nomina modorum.

Modus syllogismorum hypotheticorum, qui posito antecedente ponit consequens, dicitur ponens: contra vero modus, qui sublato consequente tollit antecedens, dicitur tollens.

§. 385.

Compendium loquendi.

Ne in minore antecedens & in conclusione consequens in ponente, nec in minore consequentis, in conclusione antecedentis contradictorium repeti sit opus in tollente; compendiose *subsumimus in ponente: atqui verum est prius vel antecedens, & inferimus: Ergo & posterius, live consequens; contra in tollente subsumimus: Atqui falsum est posterius, & inferimus: Ergo & prius.*

§. 386.

§. 386.

Si antecedentis & consequentis idem fuerit subiectum & in ponentibus prædicatum antecedentis, in tollentibus prædicatum consequentis sumatur tanquam subiectum, in illo autem prædicatum consequentis, in hoc prædicatum antecedentis eidem adjicitur tanquam prædicatum; retenta conclusione & minore, propositio sic formata subit vicem majoris & syllogismus hypotheticus abit in categoricum primæ figuræ. Cum enim in modo ponente minor sit antecedens, conclusio consequens (§. 384.) & consequentis atque antecedentis idem subiectum *per hypoth.* minor & conclusio idem subiectum habent, adeoque ad formam figuræ primæ quadrant (§. 370.). Enimvero in eadem figura medius terminus est subiectum majoris & prædicatum minoris (§. 339.). Quamobrem ut prodeat major, prædicatum antecedentis sumi debet tanquam subiectum; prædicatum consequentis tanquam prædicatum.

Syllogismi
hypothetici
ad figuram
primam facile
reducibiles.

In modo tollente contradictorium consequentis minor est, contradictorium antecedentis conclusio (§. 384.). Quamobrem cum antecedentis & consequentis idem sit subiectum *per hypoth.* idemque in contradictoriis retineatur (§. 285.); minor & conclusio denuo idem subiectum habent, adeoque ad formam figuræ primæ quadrant (§. 370.). Enimvero in eadem figura terminus medius est subiectum majoris & prædicatum minoris (§. 339.). Quamobrem ut prodeat major, prædicatum consequentis sumi debet tanquam subiectum & prædicatum antecedentis tanquam prædicatum, ut formetur propositio major syllogismi categorici.

E. gr.

I.

Quicunque est liberrimus, is non vult
nisi optimum. Hic lapis non est calidus.
Ergo hic lapis non calefacit.

Deus est liberrimus.

Ergo Deus non vult nisi opti-
mum

III.

Quicunque est sapientissimus, is facit
quod est optimum.

II.

Quodcunque non est calidum, id
non calefacit.

Deus est sapientissimus.

Ergo Deus facit, quod est optimum.

(Logica contracta.)

T

IV,

IV.

Hic lapis calefacit.

Quodcumque calefacit, id est calidum. Ergo hic lapis est calidus.

§. 387.

Eorum æquipollentia cum categoricis.

Apparet adeo, *sylogismos hypotheticos, in quibus antecedens & consequens idem habent subiectum, æquipollere categoricis in prima figura*: id quod non mirum, cum omnis propositio categorica ad formam hypotheticam reduci possit (§. 223.).

§. 388.

Evidentia hypotheticorum syllogismorum.

Quoniam *sylogismi hypothetici, in quibus antecedens & consequens idem habent subiectum*, æquipollent categoricis in prima figura (§. 387.), syllogismi autem categorici in prima figura evidentiam suam mutuatur a Dicto de omni & nullo (§. 375.); illi etiam hypothetici a Dicto de omni & nullo evidentiam suam mutuatur. Enimvero *sylogismi quoque ceteri hypothetici, in quibus antecedens & consequens diversum habent subiectum, per Dictum de omni & nullo sunt evidentes*: id quod ita ostenditur. Omnes illi syllogismi in modo ponente nituntur hoc generali: *ubique ponitur antecedens, ibi ponendum quoque est consequens*. Atqui *hic ponitur antecedens*. Ergo *hic ponendum quoque est consequens* (§. 381. 384.). Similiter omnes illi syllogismi in modo tollente nituntur hoc generali: *ubique tollitur consequens, ibi quoque tollendum est antecedens*. Atqui *hic tollitur consequens*. Ergo *hic quoque tollendum est antecedens* (§. 381. 384.). Jam vero hi syllogismi generales sunt evidentes per dictum de omni & nullo (§. 341. 342.). Quamobrem cum hypothetici speciales non formentur nisi per applicationem illorum generalium in dato quolibet casu; ideo quoque iidem evidentiam suam a Dicto de omni & nullo mutuatur.

§. 389.

Syllogismi hypothetici ad figuram primam diffculter reducibiles.

Si antecedens & consequens diversum habeant subiectum & syllogismus hypotheticus ad primam figuram reducendus; integrum antecedens constitui debet determinatio subiecti in majore. Etenim recitata conclusione, antecedens integrum spectari debet tanquam medius terminus, cum ex conclusione exulet (§. 332.). Quamobrem cum antecedens sit integra propositio, & in prima figura medius terminus subiectum majoris esse debeat (§. 339.); illud

illud majorem ingredi nequit nisi sub forma determinationis sub-
jecti (§. 225.).

Atque inde est, quod syllogismi hypothetici, quorum subjectum in
antecedente ac consequente diversum est, difficulter ad primam redu-
cantur, quemadmodum vel tentanti patebit. E. gr. In modo ponente
inferimus, *tempestatem statam variari debere, quia Sol in ecliptica
movetur.* Ut hoc medio termino conclusio in prima figura inferatur, ita
argumentandum:

*Quaecunque tempestas a motu Solis in ecliptica pendet, illa variari
debet.*

Sed tempestates statæ a motu Solis in ecliptica pendent.

Ergo tempestates statæ variari debent.

Similiter in ponente ita argumentantur:

Si homines peccant, mundus, qui existit, non est optimus.

Atqui verum est prius. Ergo & posterius.

Ex eo itaque, quod homines peccant, inferunt. *mundum hunc non esse opti-
mum.* Ut hoc medio termino eadem conclusio in prima figura infera-
tur, ita argumentandum:

Nullus mundus, in quo homines peccant, est optimus.

Sed hic mundus est mundus, in quo homines peccant.

Ergo hic mundus non est optimus.

In modo tollente inferimus: *Solem non moveri in æquatore, quia tempe-
states statæ variantur.* Ut hoc medio termino conclusio in prima infera-
tur, ita argumentandum:

*Cuiusque motui Solis tempestatum statarum variatio repugnat, eo Sol
non movetur aut, si mavis, is Soli tribui non potest.*

Sed motui Solis in æquatore repugnat tempestatum statarum variatio.

*Ergo Soleodem non movetur, aut, si mavis, motus in æquatore Soli tribui
nequit.*

Quodsi nullus prorsus crypsi relinqui debet locus; syllogismus ita formari
debet.

*Nullus motus, cui repugnat tempestatum statarum variatio, Soli est
tribuendus.*

*Sed Motus solis in æquatore est istiusmodi motus, cui variatio tempe-
statum statarum repugnat.*

Ergo Motus in æquatore non est Soli tribuendus.

Enimvero modo quis in propositionibus æquipollentibus formandis fuerit versatus, ei nunquam impossibile erit syllogismos quoscumque in prima figura condere, in quibus nihil occurrit, quod aures offendit.

§. 390.

Syllogismi
disjunctivi
definitio.

Syllogismus disjunctivus est, cujus propositio major est disjunctiva.

§. 391.

Fundamen-
tum syllogi-
smorum dis-
junctivorum.

Si propositio disjunctiva duobus constet membris, uno posito, tollitur alterum, & uno sublato ponitur alterum: si vero constet pluribus membris, uno posito, tolluntur cetera, & ceteris sublatis, ponitur unum; uno autem sublato, ponitur indeterminate ceterorum unum. Conf. §. 313. 380.

§. 392.

Scholion de
propositione
disjunctiva
incompleta.

Quod si prædicata in propositione disjunctiva enumerata ita fuerint comparata, ut omnia simul a subiecto abesse possint, quo in casu *incompleta* est & formam saltem disjunctivæ mentitur (§. 313.); tum quidem uno posito, tolluntur cetera; sed uno sublato non ponitur alterum, vel ceterorum unum: id quod sine probatione patet.

E. gr. *Petrus aut sedet, aut ambulat.* Si subsumas, *Atqui sedet;* tum utique sequitur, quod *non ambulet.* Si vero subsumas, *Atqui non ambulat;* non inde sequitur, quod *sedeat.*

§. 393.

Modi syllogi-
smorum dis-
junctivorum.

Modi igitur syllogismorum disjunctivorum bisce syllogismis continentur.

1.

Aut anima est substantia simplex,
aut composita.
Sed est substantia simplex.
Ergo non est composita.

2.

Aut anima est substantia simplex, aut
composita.
Sed non est composita.
Ergo est simplex.

3.

Aut mundus est ens a se, aut a finito,
aut ab infinito productus.
Sed productus est ab ente infinito.
Ergo nec a se est, nec a finito pro-
ductus.

4.

Aut mundus est ens a se, aut a finito,
aut ab infinito productus.
Sed non est ens a se, nec productus ab
ente finito.
Ergo productus est ab ente infinito.

5. Aut

5.

Aut elementa corporum sunt substantiæ simplices, aut atomi materiales, aut massæ similes in infinitum divisibiles.

Sed non sunt atomi materiales.

Ergo sunt aut substantiæ simplices, aut massæ similes in infinitum divisibiles.

vel

Sed sunt substantiæ simplices.

Ergo nec atomi materiales, nec massæ similes in infinitum divisibiles.

Syllogismus istiusmodi disiunctivus in demonstrando sæpissime utimur, etsi ad categoricos revocari possint.

§. 394.

Si membri, quod ponitur, vel tollitur, prædicatum sumatur pro medio termino, retenta conclusione, syllogismus disiunctivus abit in syllogismum primæ figuræ. Sunt enim propositiones æquipollentes, *Aut A est, aut B est, & Quodcunque est A, illud non est B, itemque Quodcunque non est A, illud est B.*

Syllogismorum disiunctivorum ad primam figuram reductionis.

Exempla syllogismorum disiunctivorum modo (not. §. 393.) allata in prima figura ita se habent:

1.

Quicquid est substantia simplex, illud non est composita.

Sed anima est substantia simplex.

Ergo anima non est composita.

2.

Omnis substantia, quæ non est composita, simplex est.

Sed anima non est substantia composita.

Ergo anima est substantia simplex.

3.

Quicquid productum est ab ente infinito, id nec a se est, nec a finito productum.

Sed mundus productus est ab ente infinito.

Ergo nec a se est, nec a finito productus.

4.

Quicquid nec a se est, nec ab ente finito productum, id productum est ab ente infinito.

Sed mundus nec a se est, nec ab ente finito productus.

Ergo mundus productus est ab ente infinito.

T 3

§. Nulla

5.

Nulla substantia simplex est atomus materialis, aut massa similis in infinitum divisibilis.

Atqui elementa corporum sunt substantiæ simplices.

Ergo elementa corporum non sunt atomi materiales, nec massæ similes in infinitum divisibiles.

CAPUT IV. DE SYLLOGISMIS CRYPTICIS.

§. 395.

Ratio enthymematis.

Si alterutra præmissarum fuerit adeo evidens, ut ab altero eam minime in dubium vocari conslet; omitti solet in syllogismo & una saltem retenta inferitur conclusio.

E. gr. In syllogismo, *Omnis homo est mortalis. Sed omnis doctus est homo. Ergo omnis doctus est mortalis*, minor adeo evidens, ut nemo eam in dubium vocare possit. Omittitur ergo & ita argumentamur: *Omnis homo est mortalis. Ergo Omnis doctus est mortalis.*

§. 396.

Enthymematis definitio.

Syllogismus mutilus, cujus alterutra præmissa deficit, dicitur *Enthymema*.

§. 397.

Syllogismus crypticus est.

Enthymema est species syllogismi cryptici. Vid. §. 328. 383. 393. 396. 360.

§. 398.

Criterium enthymematis categorici vel syllogismi hypothetici categorici æquipollentis.

Si in enthymemate præmissa & conclusio habent terminum communem; enthymema est vel syllogismi categorici, vel hypothetici, in quo antecedentis & consequentis idem subiectum. De syllogismo categorico vide §. 335. sq. 396. de hypothetico conf. §. 386.

E. gr. Enthymema: *Quadratum non habet tres angulos. Ergo Quadratum non est triangulum*, vel est syllogismi categorici, *Nulla figura, qua non habet tres angulos, est triangulum. Sed Quadratum &c. Ergo &c.* vel hypothetici: *Si quadratum non habet tres angulos, non est triangulum: Atqui non habet tres angulos. Ergo triangulum non est.*

§. 399.

Quænam præ-

Si in enthymemate præmissæ & conclusionis terminus communis

minoris fuit subiectum conclusionis, major deficit; si prædicatum, deficit minor. Etenim in propositione majore prædicatum conclusionis, in minore ejus subiectum constituitur cum medio termino (§ 334. 335.), qui conclusionem non ingreditur (§. 332.). Quamobrem cum in enthymemate alterutra præmissarum deficiat (§. 396.); terminus præmissæ & conclusionis communis vel prædicatum est, vel subiectum conclusionis; prædicatum nimirum, si adfuerit major, adeoque ubi defecerit minor; subiectum vero, si adfuerit minor, adeoque si defecerit major.

missa in Enthymemate deficiat.

Hoc itaque criterio patet, utrum major, vel minor in enthymemate dato deficiat. E. gr. In Enthymemate: *Omnis doctus est homo.* Ergo *Omnis doctus est mortalis*, præmissa & conclusio idem habent subiectum, atque adeo deficit major: *Omnis homo est mortalis.* Contra in enthymemate: *Omnis homo est mortalis.* Ergo *Omnis doctus est mortalis*, in præmissa occurrit prædicatum conclusionis *esse mortalem.* Deficit ergo minor: *Omnis doctus est homo.*

§. 400.

Si in syllogismis hypotheticis antecedens & consequens diversa habuerint subiecta; enthymematis præmissa & conclusio terminum nullum commune habent & contra. Conf. §. 381. Consequenter patet, non posse hic omitti minorem, quæ vel antecedens ponit, vel consequens tollit, sed semper omittendam esse majorem, seu propositionem conditionalem. Quod si ergo in syllogismis hypotheticis antecedens & consequens diversa habuerint subiecta, *per hypothesis*; fieri non potest, ut in enthymemate præmissa & conclusio communem aliquem terminum habeant.

Enthymemata syllogismorum hypotheticorum.

E. gr. Si ita argumentamur: *Sol movetur in ecliptica.* Ergo *tempestas anni non eadem*, enthymema est in modo ponente. Si vero argumentamur: *Tempestas anni non est eadem.* Ergo *Sol non movetur in æquatore*; erit enthymema in modo tollente (§. 394.) quamvis etiam sumi possit tanquam in ponente, cum non pateat, omissa majore, num ponatur antecedens, an tollatur consequens. Etenim quemadmodum in priori casu Syllogismus hypotheticus ita se habet: *Si Sol movetur in ecliptica, tempestas anni non eadem est.* Sed *Sol movetur in ecliptica.* Ergo *tempestas anni non eadem*; ita in casu posteriori duplex esse potest, vel in modo tollente: *Si Sol movetur in æquatore, tempestas anni eadem.* Sed *tempestas anni non eadem.* Ergo *Sol non movetur in æquatore*;

aquatore; vel in modo ponente: Si tempestas anni non eadem, Sol non movetur in aquatore. Sed tempestas anni non eadem. Ergo Sol non movetur in aquatore.

§. 401.

Enthymemata syllogismorum disjunctivorum.

Quoniam in Syllogismo disjunctivis membra uno posito alterum removetur; uno autem remoto, alterum ponitur (§. 391.), absente autem majore non apparet, utrum utrumque ponatur, an alterutrum removeatur (§. 380. 393.), atque in hypotheticis posito antecedente, ponitur quoque consequens (§. 381.); *enthymema Syllogismi disjunctivi non differt ab enthymemate hypothetici, nec ab eo discerni potest.*

E. gr. *Aut dies est, aut nox est. Sed nox non est. Ergo dies est, enthymema: Nox non est. Ergo dies est, haberi quoque potest pro enthymemate Syllogismi hypothetici in modo ponente: Si nox non est, dies est. Sed nox non est. Ergo dies est.*

§. 402.

Cur cum enthymematis syllogismorum categoricorum conveniant.

Quoniam porro in eo casu, ubi antecedens & consequens idem habent subjectum, enthymema Syllogismi hypothetici cum enthymemate categorici idem est (§. 398.), enthymema autem disjunctivi idem cum enthymemate hypothetici (§. 401.); evidens est, *enthymema quoque syllogismi disjunctivi idem esse cum enthymemate categorici.*

E. gr. Enthymema: *Deus est sapientissimus. Ergo facit, quod est optimum*, est enthymema syllogismi disjunctivi. Idem vero est enthymema hujus categorici: *Quicumque est sapientissimus, is facit quod est optimum. Sed Deus est sapientissimus. Ergo Deus facit, quod est optimum.*

§. 403.

Principium generale crypticorum syllogismorum.

Si syllogismus in regulas sive singulares, sive speciales impingere videtur, cum tamen iis conformis sit, crypticus est. Conf. §. 350.

Statim ex hoc apparet, enthymema esse syllogismum crypticum; videtur enim impingere in regulam §. 328. cum tamen eidem sit conformis, una saltem praemissa omissa.

§. 404.

Si in syllogismo terminis synonymicis utaris, syllogismus crypticus evadit. Lege §. 325. 36. 329. 403. Cryptis synonymiz.

E. gr. In syllogismo: *Omnis figura regularis est circulo inscriptibilis. Sed Pentagonum regulare est figura ordinata. Ergo Quinquangulum regulare circulo inscribi potest:* cryptis oritur ex synonymia.

§. 405.

Si eadem vox absolute posita fuerit terminus medius, sed cum determinatione adjecta sumta unus extremorum; syllogismus crypti quadam levi laborat. Dico cryptin levem, quæ facile tollitur. Videtur scilicet medius terminus ingredi conclusionem: quod cum fieri non possit (§. 332. seq.), syllogismus crypti quadam laborat (§. 403.). Enimvero modo ad determinationem adjectam respicias atque ad animum tibi revoces vocem absolute positam & cum determinatione adjecta sumtam non esse unum eundemque terminum, cum diversa in utroque casu ei respondeat notio (§. 35.); cryptis illa statim evanescit.

Cryptis levis ex medio termino orta.

E. c. *Omne triangulum habet tres angulos duobus rectis æquales. Sed triangulum rectangulum est triangulum. Ergo triangulum rectangulum habet tres angulos duobus rectis æquales.*

§. 406.

Si in præmissis & conclusione signa quantitatis omittuntur, syllogismus crypticus est. Conf. §. 340. 360. Cryptis ex defectu signorum quantitatis.

E. gr. Si quis argumentetur: *Homo est mortalis. Rex est Homo. Ergo Rex est mortalis,* non apparet, an in Barbara, an vero in Darii esse debeat syllogismus, quemadmodum id statim liquet, ubi signa quantitatis præfiguntur.

§. 407.

Si in prima figura medius terminus fuerit negativus, syllogismus crypticus est. Minor scilicet tunc speciem negativæ, habet ergo syllogismus videtur impingere in regulam (§. 362.).

E. gr. *Quicumque non prospicit futura, stultus est. Sed Quidam avari non prospiciunt futura. Ergo Quidam avari stulti sunt.*

Cryptis ex medio termino negativo orta sive negationis.

§. 408.

Si loco majoris in figura prima ponitur ejus conversa, syllogismus affirmativus crypticus evadit. Conf. §. 279. 339. Cryptis ex propositionis conversione orta sive reciproca.

(Logica contracta.)

U

tivus

tivus est *per hypotbesin*, qualis in secunda figura esse nequit. Est igitur crypticus (§ 403.).

E. gr. *Omne triangulum habet tres angulos. Hec figura habet tres angulos. Ergo haec figura est triangulum*; syllogismus videtur esse in secunda figura, quod medius terminus bis praedicatur. Sed loco majoris: *Quaecunque figura habet tres angulos, triangulum est*, ponitur ejus conversa: *Omne triangulum habet tres angulos.*

§. 409.

Crypsis obli-
quitatis.

Si praemissa fuerint oblique universales & particulares, syllogismus crypticus est. In propositionibus enim oblique universalibus & particularibus subjectum casu obliquo ponitur videturque subjectum esse, quod non est (§. 243 244.). Cum igitur signa quantitatis non referantur ad subjecta apparentia; genuina syllogismorum forma non apparet (§. 340.), adeoque iidem cryptici sunt (§. 360.).

E. gr. Ita argumentamur in theologia naturali: *Cujuscunque voluntas est perfectissima, is non appetit nisi optimum. Sed Dei voluntas est perfectissima. Ergo Deus non appetit nisi optimum.* Sublatis propositionibus crypticis syllogismus ita sonat: *Quicunque voluntatem habet perfectissimam, is non appetit nisi optimum. Sed Deus habet voluntatem perfectissimam. Ergo Deus non appetit nisi optimum.*

§. 410.

Crypsis agna-
ta crypsi reci-
procationis.

Si in praemissa aliqua indefinita subjectum & praedicatum transponuntur, quæ retentis iisdem signis converti seu reciprocarı nequit; syllogismus crypticus evadit. Demonstratio eadem fere est, quæ crypseos reciprocationis (§. 408.).

E. gr. Si quis argumentetur: *Dimidium parallelogrammi est triangulum super eadem basi & ejusdem altitudinis. Sed haec figura est triangulum constitutum cum parallelogrammo super eadem basi, & ejusdem altitudinis est.* Ergo hoc triangulum est parallelogrammi dimidium. Propositio major laborat crypsi transpositionis, cum praedicatum collocetur in loco subjecti. Unde syllogismus videtur esse in secunda figura, quæ tamen affirmativum respuit. Quodsi majorem debite enuncies; syllogismus a crypsi liber talis erit: *Omne triangulum constitutum cum parallelogrammo super eadem basi & eandem altitudinem habens est dimidium parallelogrammi. Sed haec figura &c. Ergo &c.*

§. 411.

Si determinatio subiecti, salva propositionis veritate, ab eodem ad prædicatum transverri potest, facta hac translatione in maiore, syllogismus fit crypticus. Etenim si determinatio in maiore propositione a subiecto transfertur ad prædicatum, in minore autem adicitur termino, qui subiecto maioris respondet; syllogismus videtur impingere in dictum de omni & nullo (§. 343.), consequenter crypticus est (§. 403.).

Cryptis translate determinatio.

E. gr. Si quis argumentatur: *Omne triangulum est dimidium parallelogrammi super eadem basi & ejusdem altitudinis.* Sed hæc figura est triangulum cum parallelogrammo super eadem basi & ejusdem altitudinis. Ergo hæc figura est dimidium hujus parallelogrammi, syllogismi forma non apparet genuina. In maiore determinatio referri debebat ad subiectum, quæ prædicato adharet. Facta igitur transpositione, ut major sit: *Omne triangulum cum parallelogrammo super eadem basi & ejusdem altitudinis est parallelogrammi hujus dimidium,* syllogismus formam genuinam habet (§. 343.).

§. 412.

Si quæ propositio in syllogismo fuerit cryptica; syllogismus crypticus erit. Conf. §. 309 340. 360.

Generale syllogismorum crypticorum principium.

§. 413.

Syllogismus crypticus a crypti liberaturus 1. ex præmissis eruat medium terminum (§. 331.), 2. reterat conclusionem formet syllogismus in prima figura (§. 370.). *Quodsi in conclusione lateat cryptis; vel ex medio termino ortum trahat;* in casu priori per substitutionem propositionis æquipollentis (§. 275.), in posteriori vi synonymiæ (§. 325.) a crypti liberabitur syllogismus.

Quomodo syllogismus a crypti liberetur.

E. gr. Si quis argumentetur: *Avari cupido habendi satiari nequit. Sed Petri cupido habendi satiari nequit.* Ergo *Petrus est avarus;* Syllogismus non una crypti laborat. Videtur medius terminus bis prædicari, adeoque syllogismus esse in secunda figura: id quod tamen repugnat ob conclusionem affirmativam. Ex præmissis negativis videtur inferri conclusio affirmativa: id quod tamen repugnat regulis generalibus (§. 352. 353.). Sed sume conclusionem: *Petrus est avarus & erue medium terminum,* quia *ejus cupido habendi satiari nequit;* prodibit syllogismus in prima figura: *Cujuscunque cupido habendi satiari nequit,*

is avarus est. Sed Petri cupido habendi satiari nequit. Ergo Petrus est avarus. Quodsi ulterius cryptin obliquitatis, quæ adhuc restat (§. 409.), tollere volueris, quamvis vix opus esse videatur, cum eadem sit familiarissima; mutetur major in æquipollentem propositionem, in qua signum quantitatis ponitur in casu recto & habebis syllogismum sequentem: *Omnis homo, cujus cupido habendi satiari nequit, est avarus. Sed Petrus est homo, cujus cupido habendi satiari nequit. Ergo Petrus est avarus.* Facile apparet, cryptin obliquitatis ortam fuisse ex medio termino, qui nonnisi in casu obliquo de subiecto conclusionis predicari poterat: quamobrem prima statim vice cryptin obliquitatis simul tollere poterat, sumto medio termino de subiecto conclusionis in casu recto posito predicabili, nempe quod sit homo, cujus cupido habendi satiari nequit.

§. 414.

Syllogismi
compositi
cryptici.

Quoniam in syllogismis compositis perinde ac in categoricis locus esse potest propositionibus crypticis, a propositionibus autem crypticis ortum trahit cryptis syllogismorum (§. 412.); *syllogismi compositi erunt cryptici, si propositiones crypticæ eos ingrediuntur.*

E. gr. Syllogismus disjunctivus: *Aut dies est, aut nox est. Atqui dies est. Ergo nox non est,* crypticus est, cum ipsa propositio disjunctiva cryptica sit (§. 31.), æquipollens nempe huic manifestæ: *Hoc tempus aut dies est, aut nox est, vel omne tempus, quod metimur motu Solis dururno, aut diurnum est, aut nocturnum.*

§. 415.

Quomodo
cryptis ex syl-
logismis com-
positis tolli-
tur.

Quodsi ergo propositionibus crypticis substituantur manifestæ æquipollentes (§. 275. & seqq. 320. & seqq. &c.) syllogismus crypticus compositus fit manifestus.

CAPUT V. DE CONSEQUENTIIS IMME- DIATIS.

§. 416.

Propositio-
num æqui-
pollentiam
nexus.

Si duæ fuerint propositiones æquipollentes, earum una admissa, admittenda quoque erit altera, & contra. Conf. §. 275.

E. gr.

E. gr. Propositiones æquipollentes sunt: *Sol illuminat ædificium & Ædificium illuminatur a Sole* (§. 275.). Quamobrem argumentari licet: *Sol illuminat ædificium. Ergo Ædificium illuminatur a Sole, & contra: Sol non illuminat ædificium. Ergo nec ædificium illuminatur a Sole.*

§. 417.

Si propositionum æquipollentium una sumitur ut antecedens, altera ut consequens; syllogismus habebis hypotheticum. Syllogismi hypothetici ex æquipollentia propositionum.

Conf. §. 380 sq. 416.

E. gr. *Si Sol illuminat ædificium, ædificium a Sole illuminatur. Sed Sol illuminat ædificium. Ergo Ædificium a Sole illuminatur.*

§. 418.

Si duæ fuerint propositiones contradictoriae, earum una posita, tollenda est altera. Lege §. 291 sq. 285. Propositionium contradictoriarum nexus.

E. gr. *Omne triangulum habet tres angulos & quædam triângula non habent vel hoc triângulum non habet tres angulos.* Quamobrem si ponimus, *Omne triângulum habet tres angulos*, poni non potest, quod *quædam triângula non habeant*, vel *hoc triângulum non habeat tres angulos.*

§. 419.

Si una propositionum contradictoriarum sumatur ut antecedens, opposita alterius ut consequens; syllogismus nascitur hypotheticus. Conf. §. 418 380 sq. Syllogismi hypothetici inde orti.

E. gr. *Si omne triângulum habet tres angulos, falsum est hoc triângulum non habere tres angulos. Sed Omne triângulum habet tres angulos. Ergo Falsum est, hoc triângulum non habere tres angulos.*

§. 420.

Si duæ fuerint propositiones contrariæ, earum una posita, tollitur altera. Vid. §. 294. 377. Propositionium contrarium repugnantia.

E. gr. Propositiones contrariæ sunt: *Omnis planeta est corpus telluri simile & Nullus planeta est corpus telluri simile.* Quamobrem si ponis, quod *Omnis planeta sit corpus telluri simile*, eo ipso tollis alterum, quod *nullus planeta sit corpus telluri simile.*

§. 421.

Si propositio contrariarum una sumatur ut antecedens & per modum consequentis removeatur altera; syllogismus nascitur hypotheticus. Conf. §. 420. 380. Syllogismi hypothetici ex contrariis orti propositionibus.

E. gr. *Si omnis planeta est corpus telluri simile, falsum est, nullum planetam esse corpus telluri simile. Sed omnis planeta est corpus telluri simile. Ergo falsum est, nullum planetam esse corpus telluri simile.*

§. 422.

Propositionis
subalternantis
cum universa-
linexus.

Posita quacunque propositione universali, una ponitur quævis subalternans. Conf. §. 296. 341.

E. gr. *si ponis, omne triangulum habere tres angulos, eo ipso ponitur, quoddam triangulum, vel hoc triangulum habere tres angulos.*

§. 423.

Enthymema a
subalternanti-
bus pendens.

Si propositionem quancunque universalem sumas ut præmissam & subalternantem ut conclusionem; habebis enthymema syllogismi, cujus minor identica. Vid. §. 422. 370. 393.

E. gr. *Si argumenteris: Omne triangulum habet tres angulos. Ergo Quoddam triangulum vel hoc triangulum habet tres angulos; habes enthymema, ubi deficit minor: Quoddam vel hoc triangulum est triangulum.*

§. 424.

Syllogismus
hypotheticus
a subalternan-
te ortus.

Si propositionem universalem sumas ut antecedens & subalternantem ut consequens; habebis syllogismum hypotheticum. Conf. §. 422. 380.

E. gr. *Si omne triangulum habet tres angulos, etiam hoc triangulum habet tres angulos: Sed omne triangulum habet tres angulos. Ergo etiam hoc triangulum habet tres angulos.*

§. 425.

Nexus propo-
sitionum ne-
gativarum.

Si de omni A negatur B, etiam de omni B negari debet A. Quod si negas, de omni B negari deberi A; concedendum erit, de quodam vel omni B affirmari posse A. Quoniam judicium affirmativum in notionum conjunctione consistit (§. 201.); si de quodam vel omni B affirmatur A, ea, quæ notionibus A & B continentur, eidem subjecto una inesse possunt. Contra cum judicium negativum notionum separationem constet (§. cit.); si de omni B negari debet A, ea, quæ notionibus B & A continentur, eidem subjecto inesse nequeunt. Jam cum sit absurdum, quod eadem eidem subjecto una inesse & non inesse possint (§. 285.); si de omni A negatur B, de quodam vel omni B affirmari nequit A, consequenter de omni B negari debet A.

E. gr.

E. gr. Si nullus avarus sorte sua contentus est, etiam nullus, qui sorte sua contentus, avarus est.

§. 426.

Si de Quodam A affirmatur B, etiam de Quodam B affirmari potest A. Quoniam enim iudicium affirmativum in notionum conjunctione consistit (§. 201.); si B de quodam A affirmari potest, ea, quæ notionibus A & B respondent, eidem subjecto simul inesse possunt. Enimvero si non repugnat, ut, quæ notionibus A & B respondent, eidem subjecto una insint, notiones quoque B & A conjungere, consequenter de quodam B affirmare A licet.

Nexus propositionum particularium.

E. gr. Si quidam doctus est moderatus, etiam quidam, qui est moderatus, doctus est.

§. 427.

Quoniam propositio Nullum B est A est conversa ejus Nullum A est B & propositio Quoddam B est A conversa hujus Quoddam A est B (§. 279.); posita universaliter negante vel particulariter affirmante, ponitur etiam utriusque conversa.

Conversæ unius ex altera illatio.

E. gr. Nullus, avarus sorte sua contentus, Ergo Nullus, qui sorte sua contentus, est avarus.

§. 428.

Si propositio universaliter negans, vel particulariter affirmans sumatur ut antecedens, conversa vero ut consequens; habebis syllogismum hypotheticum. Demonstratio eadem, quam dedimus (§. 424.).

Syllogismus hypotheticus ex propositionum conversione.

E. gr. Si nullus avarus sorte sua contentus est, nullus etiam, qui sorte sua contentus, est avarus. Sed nullus avarus sorte sua contentus, Ergo nullus, qui sorte sua contentus, est avarus. Dicitur hæc conversio Logice simplex, quæ sit retenta propositionis quantitate & qualitate.

§. 429.

Generaliter si propositione una posita simul ponatur altera, sumta una pro antecedente, altera erit consequens syllogismi hypothetici (§. 424.).

Principium generale syllogismi hypothetici.

E. gr. Si nihil est sine ratione sufficiente, nec mundus est sine ratione sufficiente. Quamobrem si argumenteris; Nihil est sine ratione sufficiente,

ciente, cur potius sit, quam non sit. Ergo etiam mundus non est sine ratione sufficiente cur potius sit quam non sit; enthymema habes syllogismi hypothetici.

Consequentia
immediata
definitio.

§. 430.

Modus ratiocinandi, quo una propositione posita simul poni alteram per rationes logicas manifestum est, dicitur *Consequentia immediata*.

E. gr. *Æqualia eidem tertio sunt equalia inter se. Ergo hi duo anguli æquales eidem tertio sunt inter se æquales. Idem: Nullus homo est immortalis. Ergo Nullus, qui est immortalis, est homo. Nec non: Titus est pater Caji. Ergo Caji est filius Titii. Etenim consequentia in casu primo patet per solum dictum de omni (§ 341.); in secundo ex notione propositionum negativarum (§ 425.); in tertio ex notione æquipollentia propositionum, in relatione hic fundata (§ 416.).*

§. 431.

Quid sint con-
sequentia im-
mediata.

Quoniam si una propositione posita simul ponitur altera, modus argumentandi est syllogismi hypothetici enthymema (§ 429.); evidens est, consequentias immediatas esse enthymemata syllogismorum hypotheticorum, sed ubi consequentia per rationes logicas patet (§ 430.).

E. gr. 1. *Si equalia eidem tertio sunt equalia inter se, hi duo anguli eidem tertio æquales sunt inter se æquales. Atqui verum est antecedens. Ergo & consequens.* 2. *Si nullus homo est immortalis, sequitur quod nullus, qui est immortalis, sit homo. Sed nullus homo est immortalis. Ergo sequitur, quod nullus, qui est immortalis, sit homo.* 3. *Si Caji est Filius Titii, Titius est pater Caji. Sed Caji est Filius Titii. Ergo Titius est pater Caji.*

§. 432.

Cura nonnul-
lis negligen-
tur, ab aliis
minime.

Cum adeo consequentia sic dicta immediata sint enthymemata syllogismorum hypotheticorum (§ 431.); ideo plurimi Logicorum eas prorsus insuper habent, ad syllogismos hypotheticos confugientes, ubi iisdem est locus, non attenta ratione, ob quam patet consequentia. Ceteri vero enthymemata ista pro peculiari argumentandi genere habent, quod ratio consequentia per regulas logicas pateat (§ cit.).

§ 433.

§. 433.

Quoniam istiusmodi syllogismi hypothetici oriuntur ex propositionum æquipollentia (§. 417.), contradictione (§. 419.), contrarietate (§. 421.), subalternatione (§. 424.), conversione (§. 428.): ideo theorematum de propositionibus in istis casibus se mutuo ponentibus (§. 416. 418. 420. 422. 427.) sunt totidem modi consequentiarum immediatarum.

§. 434.

Unde patet, conclusionem per consequentiam immediatam inferri beneficio syllogismi categorici, ab iis scilicet, qui modos ex Logica didicere, vel in aliis disciplinis sibi plures condidere, *cujus major est propositio generalis de propositionibus se mutuo ponentibus, minor affirmat, has propositiones, quæ nobis obviæ sunt sub casibus istis contineri, conclusio vero infert, has quoque propositiones se mutuo ponere.*

Ita praxis dirigitur his syllogismis generalibus.

1. In Casu æquipollentiae.

Quæcunque propositiones sunt æquipollentes, earum una posita, ponitur altera (§. 416.).

Sed hæ propositiones sunt æquipollentes.

Ergo earum una posita, ponitur altera.

3. in Casu contrarietatis.

Quæcunque propositiones sunt contrariæ, earum posita una, removetur altera (§. 420.).

Sed hæ propositiones sunt contrariæ.

Ergo earum una posita, removetur altera.

5. in Casu conversionis.

Omnis propositio universaliter negans simpliciter potest converti (§. 427.).

(Logica contracta.)

2. in Casu contradictionis.

Quæcunque propositiones sunt contradictoriæ, earum una posita, removetur altera (§. 418.).

Sed hæ propositiones sunt contradictoriæ.

Ergo earum una posita, removetur altera.

4. in Casu subalternationis.

Quæcunque propositio est universalis subalternans, ea ponitur posita universali (§. 422.).

Sed hæc propositio est subalternans istius universalis.

Ergo hæc propositio ponitur posita ista universali.

Omnis propositio particulariter affirmans simpliciter converti potest (§. 427.).

X

Sed

Sed hæc propositio est universaliter negans.	Sed hæc propositio est particulariter affirmans.
Ergo hæc propositio simpliciter potest converti.	Ergo hæc propositio simpliciter converti potest.

§. 435.

Fundamentum quorundam consequentiarum immediatarum.

Si minor syllogismi categorici sumitur ut antecedens, conclusio ut consequens propositionis hypotheticæ, posita majore illius syllogismi, ponitur propositio ista hypothetica. Sit enim quicumque syllogismus in prima figura: *A est B. Sed C est A. Ergo C est B*, ubi signa quantitatis & qualitatis omittuntur, quia hic nulla eorum habetur ratio, atque adeo syllogismus sumi potest in quolibet modo primæ figuræ. Omissa majore, habebimus entlymema; *C est A. Ergo C est B* (§. 396.). Idem vero entlymema quoque est syllogismi hypothetici. *Si C est A, idem C erit quoque B. Sed C est A. Ergo idem C est quoque B* (§. 398.). Patet ergo conclusionem admitti sub conditione minoris, admissa majore. Quamobrem posita majore, poni quoque debet conclusio sub conditione majoris, consequenter propositio hypothetica, cujus antecedens est minor, consequens conclusio syllogismi hypothetici (§. 379.).

E. gr. In prima figura argumentamur: *Omnis pius Deum amat. Quidam homines sunt pii. Ergo Quidam homines Deum amant.* Quamobrem si admittis, quod *Omnis pius Deum amat*, admittere etiam debes, quod, *si quidam homines sunt pii, etiam quidam homines Deum amare debeant.*

§. 436.

Species consequentiæ immediatæ.

Species igitur consequentiæ immediatæ est, si posita majore syllogismi categorici, ponitur conclusio sub conditione minoris (§. 430. 435.): quo argumentandi genere utimur, ubi minor nondum sufficienter probata, ut tanquam vera nondum sumi possit, & ubi aliis ex rationibus eandem quasi in medio relinquimus.

V. gr. *Nullus verus Christianus est contentiosus. Ergo Si quis theologus est contentiosus, nondum is est verus Christianus.*

CAPUT

CAPUT VI.

DE ALIIS NONNULLIS ARGUMENTANDI GENERIBUS.

§. 437.

Si plures fuerint propositiones categoricae ejus conditionis, ut *Fundamentum Soritis categorici*, prædicatum unius sit continuo subiectum alterius; ex iis tantum præmissis inferre licet conclusionem, cujus subiectum idem cum subiecto primæ, prædicatum vero idem cum prædicato ultimæ. Nimirum si omne A est B, & omne B est C, omne C est D, omne D est E & ita porro in infinitum; dico omne A esse E. Etenim 1. Omne B est C, per hypoth. Sed omne A est B, per hypoth. Ergo omne A est C (§ 370.). 2. Omne C est D, per hypoth. Sed omne A est C, per num. 1. Ergo omne A est D, (§ cit.). 3. Omne D est E, per hypoth. Sed omne A est D, per num. 2. Ergo omne A est E.

E. gr. Deus est omnipotens. Omnipotens facere potest, quicquid possibile. Qui facere potest, quicquid possibile, is facere potest, quicquid contradictionem non involvit. Ergo Deus potest facere, quicquid contradictionem non involvit.

§. 438.

Istiusmodi syllogismus, quo ex pluribus propositionibus Soritis categoricis, quarum sequentis subiectum est prædicatum proxime rici definitio. antecedentis, inferitur conclusio, dicitur *Sorites categoricus*.

§. 439.

Sorites categoricus in tot resolvi potest syllogismos categoricos, quos sunt medii termini, seu termini præmissarum communes (§ 331.), aut ex conclusione exulantes (§ 332.). *Ejus in syllogismos categoricos resolutionis.*

E. gr. Conclusionem, *Deus potest facere, quicquid contradictionem non involvit*, non ingrediuntur termini, *esse omnipotentem, & posse facere, quicquid possibile*, adeoque medii sunt, consequenter Sorites inditos syllogismos categoricos resolvitur sequentes: 1. *Quicumque est omnipotens, is potest facere quicquid possibile. Sed Deus est omnipotens. Ergo Deus potest facere, quicquid possibile.* 2. *Quicumque potest facere, quicquid possibile, ille potest facere, quæ nullam contradictionem involvunt.*

X 2

Sed

Sed Deus potest facere, quicquid possibile. Ergo Deus potest facere, quicquid nullam contradictionem involvit.

§. 440.

Ejus usus.

Quoniam in Sorite plures syllogismi contrahuntur in unum, evidens est, Soritem esse compendium argumentandi.

§. 441.

Fundamentum Soritis hypothetici.

Si plures fuerint propositiones hypotheticæ, ita comparatæ, ut consequens unius sit continuo antecedens proxime sequentis, posito antecedente primæ, ponitur quoque consequens ultimæ. Scilicet sint propositiones hypotheticæ sequentes: si A est B, etiam C est D; & si C est D, etiam E est F, & si E est F, etiam G est H atque ita porro in infinitum: dico etiam sequi, si A sit B, quod etiam G sit H. Etenim posito antecedente primæ propositionis, quod A sit B, ponendum quoque est consequens, quod C sit D (§. 383.). Jam 2. si C sit D, etiam E est F, per hypoth. Sed C est D, per num. 1. Ergo etiam E est F (§. cit.). 3. Si E est F, etiam G est H per hypoth. Sed E est F per num. 2. Ergo etiam G est H (§. cit.).

E. gr. Si mundi elementa debent esse diversa, posito quod alius sit mundus, mundus hic productus est ex nihilo. Si mundus hic productus est ex nihilo, Deus gaudet potentia aliquid ex nihilo producendi. Si Deus gaudet potentia aliquid ex nihilo producendi, nulla datur materia ipsi coæterna. Ergo si mundi elementa debent esse diversa, posito quod alius sit mundus, nulla datur materia Deo coæterna.

§. 442.

Soritis hypothetici definitio.

Syllogismus hypotheticus, quo ex pluribus propositionibus hypotheticis ita inter se connexis, ut antecedens proxime sequentis sit idem cum consequente antecedentis, inferitur conclusio, dicitur *Sorites hypotheticus*.

§. 443.

Soritis hypothetici in syllogismos hypotheticos resolutio.

Quoniam propositionis cujusque hypotheticæ antedecente posito, ponitur etiam consequens (§. 383.); *qualibet propositio Soritis hypothetici in syllogismum hypotheticum resolvitur.*

E. gr. Sorites hypotheticus: *Si Deus est sapientissimus, mundus fini, quem per creationem intendis, maxime convenit. Si mundus fini, quem*
Deus

Deus per creationem intendit maxime convenit; omnium possibilem optimus est. Si mundus, qui existit, omnium possibilem optimus est, mala non obstant perfectioni ipsius. Ergo si Deus sapientissimus, mala, quæ in mundo dantur, non obstant perfectioni ipsius: in hos resolvitur syllogismus hypotheticus. 1. Si Deus est sapientissimus, mundus fini, quem per creationem intendit, maxime convenit. Sed Deus est sapientissimus. Ergo mundus fini, quem per creationem intendit, maxime convenit. 2. Si mundus fini, quem Deus per creationem intendit, maxime convenit; omnium possibilem optimus est. Sed mundus fini quem per creationem intendit, maxime convenit, per num. 1. Ergo omnium possibilem optimus est. 3. Si mundus, qui existit, omnium possibilem optimus est; mala non obstant perfectioni ipsius. Sed mundus, qui existit, omnium possibilem optimus est, per num. 2. Ergo mala non obstant perfectioni ipsius. Patet adeo, si Deus ponatur sapientissimus, sequi tandem, quod mala non obstant perfectioni mundi.

§. 444.

Liquet hinc ulterius, *Soritem hypotheticum non minus Eius usus, quam categoricum esse compendium ratiocinandi.*

§. 445.

Quoniam omnis propositio categorica ad hypotheticam Soritis in genere definitio. reduci potest, sumta definitione subiecti pro conditione, sub qua prædicatum eidem tribuitur (§. 223.), adeoque pro antecedente, prædicato autem, quatenus id definito attribuitur, pro consequente (§. 379.); ideo *Sorites* in genere definiti potest per syllogismum, quo ex pluribus præmissis ita invicem junctis, ut continuo consequens antecedentis propositionis sit antecedens propositionis consequentis (§. 438. 442.), inferitur conclusio.

§. 446.

Sorites crypticus dicitur, qui constat propositionibus Soritis crypticis, veluti oblique universalibus; indefinitis, & aliis, quæ ci definitio. hypotheticis æquipollent.

E. gr. Si argumentemur: *Quem amamus, eum odio non prosequimur. Quem odio non prosequimur, ex ejus damno voluptatem non percipimus. Ex cujus damno voluptatem non percipimus, ei nullum damnum inferimus. Ergo quem amamus, ei nullum damnum inferimus, Sorites cryptici multiplici laborat, sunt enim propositiones omnes indefinitæ (§. 241.);*

sunt eadem æquipollentes oblique universalibus (§. 243.); sunt denique infinitæ (§. 206.). Nimirum prima præmissarum, *Quem amamus, eum odio non prosequimur*, æquipollet huic alteri, *Nullum, quem amamus, odio prosequimur*, & hæc denique affirmativæ directe universali, *Omnis homo, quem amamus, est persona, quam odio non prosequimur*. Sorites crypticus, in quo propositiones hypotheticæ æquipollentes occurrunt, est sequens: *Ubi amor, ibi nullus odio locus est. Ubi odio locus non est, ibi exultat gaudium ob infelicitatem alterius. Ubi gaudium ob infelicitatem alterius exultat, ibi studium nocendi abest. Ergo ubi amor locus est, ibi studium nocendi abest.* Etenim Sorites hic æquipollet sequenti hypothetico: *Si amor locus est, odio nullus esse potest. Si nullus odio locus esse potest, nec ob alterius infelicitatem gaudemus. Si ob infelicitatem alterius minime gaudemus, studium nocendi abest. Ergo Si amor locus est, studium nocendi abest.*

§. 447.

Inferiorum &
superiorum
definitio.

Individua respectu speciei, sub qua comprehenduntur; species respectu generis, quod eas sub se continet, & genera inferiora respectu superiorum, quæque per modum individuorum, specierum & generum inferiorum concipiuntur, respectu eorum, quæ per modum specierum, generum proximorum & generum superiorum concipimus, *inferiora* simpliciter appellantur: species vero respectu individuorum suorum, genera respectu specierum sub iis contentarum & genera superiora respectu inferiorum, quæ comprehendunt, quæque per modum specierum, generum proximorum & generum superiorum concipiuntur, respectu eorum, quæ per modum individuorum, specierum & generum inferiorum concipiuntur, *superiora* simpliciter appellari solent.

§. 448.

Fundamen-
tum inductio-
nis.

Quod de singulis inferioribus affirmari vel negari potest, idem etiam de superiori universaliter affirmari vel negari debet, sub quo inferiora ista continentur. Vid. §. 447. 42 sqq. 202. 259.

§. 449.

Inductionis
definitio.

Modus argumentandi, quo de superiori universaliter infertur, quod de singulis inferioribus affirmatur vel negatur, dicitur *Inductio*. Quod si omnia inferiora recensentur, *Inductio completa* est; si quædam deficiunt, *incompleta*.

E. gr.

E. gr. Si argumenteris: *Angulus ad peripheriam, in cuius crure est vertex anguli ad centrum eidem arcui insistentis, est hujus dimidius; Angulus ad peripheriam, intra cuius crura comprehenditur vertex anguli ad centrum eidem arcui insistentis, est ejusdem dimidius; Angulus ad peripheriam, extra cuius crura constituitur vertex anguli ad centrum eidem arcui insistentis, est ejusdem dimidius, nec datur præterea alius angulus ad peripheriam cum angulo ad centrum eidem arcui insistentis.* Ergo omnis angulus ad peripheriam est dimidius anguli ad centrum eidem arcui insistentis: argumentatio inductio est, eaque completa. Si argumenteris: *Hic canis latrat, iste canis latrat, ille canis latrat, nec reperiuntur canes, qui non latret.* Ergo omnis canis latrat: inductio incompleta est.

§. 450.

Omnis inductio est enthymema contentum sub hoc syllogismo categorico generali: Quicquid competit, vel non competit singulis inferioribus, id etiam competit, vel non competit omni superiori, sub quo continetur. Sed hoc competit, vel non competit singulis inferioribus. Ergo hoc competit, vel non competit omni superiori. Patet per inductionis definitionem & fundamentum (§. 448. 449.).

Reductio inductionis ad syllogismum

Enthymema affirmativum hoc est: *Hoc convenit singulis inferioribus.* Ergo hoc convenit omni superiori, aut, si mavis, *Singula A sunt B.* Ergo *Omne A est B.* Enthymema negativum hoc est: *Hoc non convenit singulis inferioribus.* Ergo hoc non convenit omni superiori, aut, si mavis, *Singula A non sunt B.* Ergo *Nullum A est B.* Hinc etiam quælibet inductio ad syllogismum categoricum reducitur, e. gr. exemplum reductionis incompletæ modo (not. §. 449) propositum ad sequentem: *Quod singulis canibus proprium experimur, illud omni cani recte tribuitur.* Sed *latratum singulis canibus proprium experimur.* Ergo *latrat omni cani recte tribuitur.* Adde consequentiam immediatam: *Latrat omni cani recte tribuitur.* Ergo *omnis canis latrat.* Ita habes propositionem per inductionem illatam ipsissimis verbis.

§. 451.

Quoniam major in quocunque casu probatur per theorema, quod fundamentum constituimus inductionis, (§. 448.), ex quo nimirum per consequentiam immediatam inferitur (§. 430.); ideo *inductio pro peculiari argumentandi modo habetur.*

Cor inductio-
ne peculiaris
argumentan-
di modus con-
stituitur.

Patet

Patet tamen (§. 450.), quod omnis vis concludendi pendeat a forma syllogismi categorici in prima figura, consequenter a dicto de omni & nullo (§. 341. 342.).

§. 452.

Inductionis
ad syllogi-
smum hypo-
theticam re-
ductio.

Quia omne enthymema syllogismi categorici idem est enthymema hypothetici (§. 398.); *Omnis quoque inductio ad syllogismum hypotheticum reducitur, ejus generalis forma hæc est: Si hoc convenit, vel non convenit singulis inferioribus, idem quoque convenire, vel non convenire debet omni superiori. Sed hoc convenit, vel non convenit singulis inferioribus. Ergo hoc convenit, vel non convenit omni superiori.*

E. gr. *Si singuli canes latrant, omnis canis latrat. Sed singuli canes latrant. Ergo omnis canis latrat.* Conf. §. 448.

§. 453.

Dilemmatis
definitio.

Syllogismus hypotheticus, cujus consequens est propositio disjunctiva & totum tollitur, dicitur *Dilemma*.

E. gr. *Dilemma est sequens syllogismus hypotheticus: Si triangulum plures quam tres habere potest angulos, aut rectilineum, aut curvilineum, aut mixtilineum angulos plures quam tres habebit. Sed neque triangulum rectilineum, neque curvilineum, neque mixtilineum angulos plures quam tres habet. Ergo nullum triangulum plures quam tres angulos habere potest.*

§. 454.

Conclusio
in dilemmate
qualitas.

Quoniam dilemma est in modo tollente syllogismi hypothetici (§. 453. 383.), conclusio vero syllogismi hypothetici in modo tollente estremotio antecedentis (§. 383.); erit *dilemmatis conclusio negativa, si antecedens majoris affirmativum, & contra illa affirmativa erit, si hoc negativum.*

E. gr. In dilemmate (not. §. 453.) antecedens, *si triangulum plures quam tres habere potest angulos*, affirmativum est: unde ejus conclusio, *nullum triangulum plures quam tres angulos habere potest*, negativa est. Enimvero ubi dilemma tale fuerit: *Si Deus mundum optimum non produxit, aut id fecit, quia non potuit, aut quia noluit. Sed id non fecit, quia non potuit, neque etiam quia noluit.* Ergo mundum optimum produxit: antecedens est negativum atque adeo ejus conclusio, utpote remotio propositionis negativæ, affirmativa.

§. 455.

§. 455.

Syllogismus categoricus, quem ingrediuntur propositiones compositae, dicitur *syllogismus categoricus multiplex*. Et in oppositione categoricus sive simplex dictus (§. 356.) *categoricus simplex* appellatur.

Syllogismi categorici multiplices definitiones.

§. 456.

Quoniam in propositione composita vel diversa praedicata tribuuntur eidem subiecto, vel idem praedicatum effertur de diversis subiectis (§. 311.), in syllogismo autem categorico propositiones componuntur ex termino medio atque terminis extremis (§. 330 sqq.); in syllogismo categorico multiplici vel eadem conclusio inferitur pluribus mediis terminis, vel eodem medio termino inferuntur conclusiones plures sive ejusdem subiecti, sive ejusdem praedicati.

Varietas illorum syllogismorum.

E. gr. Si ita argumenteris: Omne triangulum aequicrurum per perpendicularum ex vertice in basin demissum dividitur in duas partes aequales. perinde ac basis ejus & angulus ad verticem. Hoc triangulum est aequicrurum. Ergo hoc triangulum per perpendicularum ex vertice in basin demissum dividitur in duas partes aequales, perinde ac basis ejus & angulus ad verticem: syllogismus est categoricus multiplex, in quo eodem medio termino, qui est *triangulum aequicrurum*, inferuntur tres conclusiones idem subiectum, sed diversa praedicata habentes, scilicet 1. *Hoc triangulum per perpendicularum ex vertice in basin demissum dividitur in duas partes aequales.* 2. *Hujus trianguli basis dividitur per perpendicularum ex vertice in basin demissum in duas partes aequales.* 3. *Hujus trianguli angulus ad verticem per perpendicularum in basin demissum dividitur in duas partes aequales.*

§. 457.

Quia Syllogismus categoricus multiplex vel pluribus mediis terminis eandem inferit conclusionem, vel eodem medio termino plures diversas conclusiones (§. 456.), in tot resolvitur potest syllogismos, quot sunt medii termini, vel conclusiones diversae.

Syllogismi categorici multiplices in plures simplices resolutiones.

§. 458.

Si subiecto tribui potest aliquod praedicatum, supposita non minus subiecti, quam praedicati quadam determinatione; posita (Logica contracta.)

Y

Fundamentum syllogismi biformis.

determinatione & subiecti, & prædicati, subiecto tribuendum est prædicatum. Conf. §. 384.

E. gr. In propositione categorica, *Omnia lex posterior derogat legi priori*, subiecti determinatio est *posterioritas*, prædicati vero *prioritas legis*. Æquivalet igitur huic hypotheticæ: *Si lex B fuerit posterior, lex vero A prior; lex B derogabit legi A*. Quare si ponas, *legem B esse posteriorem, legem vero A priorem*, sequetur utique: *legem B derogare legi A*.

§. 459.

Modus syllogismi bifor-
mis.

In hoc igitur casu ita argumentari licet: *Omni subiecto A sub determinatione C tribuendum prædicatum B sub determinatione D*. Sed in hoc casu subiectum A habet determinationem C & prædicatum B determinationem D. Ergo in hoc casu subiecto A tribuendum est prædicatum B.

E. gr. In casu dato (not. §. 438.) ita argumentamur: *Omnia lex posterior derogat legi priori*. Atqui *lex B est posterior, lex vero A prior*. Ergo *lex B derogat legi A*.

§. 460.

Definitio syllogismi bifor-
mis.

Vocatur autem istiusmodi *syllogismus biformis*. Unde *syllogismus biformis* definitur, quod sitis, quo posita determinatione subiecti atque prædicati, sub qua prædicatum jungi potest subiecto, prædicatum subiecto tribuitur. Quoniam itaque propositioe minori affirmari debet, & subiecto, & prædicato suam convenire in casu dato determinationem; in *syllogismo biformi propositio minor duplex subsuntur sub diversis majoris partibus*.

E. c. *Liber methodo demonstrativa conscriptus certiore cognitionem largitur lectori, quam liber secundum scholæ methodum conscriptus*. Sed *hic liber est methodo demonstrativa conscriptus; ille vero secundum methodum scholæ*. Ergo *hic liber certiore cognitionem largitur lectori quam ille*.

§. 461.

Syllogismi bifor-
mis in sim-
plices resolu-
tio.

Facile *syllogismus biformis* resolvitur in *simplices*; id quod exemplis doceri sufficit. E. c. *Omnia liber methodo demonstrativa conscriptus certiore cognitionem largitur lectori, quam liber secundum scholæ methodum conscriptus*. Sed *hic liber est methodo* de-

demonstrativa conscriptus. Ergo hic liber certiore largitur lectori cognitionem, quam liber secundum scholæ methodum conscriptus. Ex conclusione denuo per immediatam consequentiam infertur (§. 416. 431.): Quicumque liber secundum scholæ methodum conscriptus, is minus certam cognitionem largitur lectori, quam hic liber. Unde porro argumentamur: Sed ille liber secundum scholæ methodum conscriptus. Ergo ille liber minus certam cognitionem quam hic lectori largitur, consequenter per immediatam consequentiam (§. cit.): Hic liber certorem lectori, quam ille cognitionem largitur.

§. 462.

Syllogismus adeo biformis, cum in unum compingat syllogismos categoricos duos atque unam vel duas consequentias immediatas (§. 461.), compendium argumentandi est.

Cur sit compendium argumentandi.

CAPUT VII.

DE

RATIOCINATIONE POLY-
SYLLOGISTICA ET MIXTİM
COMPOSITA.

§. 463.

Si syllogismi antecedentis conclusio sit præmissa sequentis, vel plurium conclusiones considerantur instar notionis complexæ, ac formata inde enunciatio ingreditur tanquam præmissa syllogismum sequentem; *Syllogismi concatenari* a nobis dicuntur.

Concatenatio: nis syllogismorum definitio.

E. c. Quicumque est sapientissimus, is eligit media sui convenientissima. Sed Deus est sapientissimus. Ergo Deus eligit media sui convenientissima. It porro: Si Deus eligit media sui convenientissima, mundum creavit sui creationis convenientissimum. Sed Deus eligit media sui convenientissima. Ergo Deus mundum creavit sui creationis convenientissimum. Denique: Si Deus mundum creavit sui creationis

Y 2

CON-

convenientissimum; mundum optimum produxit. Sed Deus mundum creavit fini creationis convenientissimum. Ergo mundum optimum produxit. Alter concatenationis casus in Mathesi frequentissimus est.

§. 464.

Prosyllogismi
& Episylogismi definitio.

Syllogismus, cujus conclusio est præmissa alterius syllogismi, appellatur *Prosyllogismus*; Syllogismus vero, cujus præmissa est conclusio alterius syllogismi, dicitur *Episylogismus*.

E. gr. Si quis ita argumentatur: *Omnis actio lege naturali prohibita est fugienda. Sed nimius labor est actio lege naturali prohibita. Ergo nimius labor est fugiendus, & minorem probaturus argumentatur: Quaecunque actio tendit ad corporis destructionem, ea est lege naturali prohibita. Sed nimius labor tendit ad corporis destructionem. Ergo nimius labor est actio lege naturali prohibita: Syllogismus posterior est prosyllogismus, quia per eum præmissa prioris, nimius labor est actio lege naturali prohibita, infertur tanquam conclusio. Similiter in exemplo de mundo optimo syllogismus secundus est episylogismus primi, quia concludo primi, Deus eligit media fini convenientissima, est simul minor secundi & tertius est episylogismus secundi, quia conclusio secundi, Deus mundum creavit fini creationis convenientissimum, est minor tertii.*

§. 465.

Ratiocinationis polysyllogistica definitio.

Series syllogismorum inter se concatenatorum dicitur *Ratiocinatio polysyllogistica*.

Exempla sunt not. §. 463. & not. §. 464. species occurrunt §. 439. 443. 456.

§. 466.

Ratiocinationis mixtim compositæ definitio.

Quodsi syllogismis categoricis & hypotheticis immisceantur consequentiæ immediatæ & alii quicunque argumentandi modi, *Ratiocinationem* dicimus *mixtim compositam*. Unde *Ratiocinatio mixtim composita* definiri potest per seriem quorumcunque argumentandi modorum inter se concatenatorum.

Nimirum immediata consequentia concatenatur cum syllogismo, si conclusio syllogismi sit præmissa, unde infertur per immediatam consequentiam.

consequentiam nova conclusio, & e contrario syllogismus concatenatur cum immediata consequentia, si conclusio per immediatam consequentiam illata sit præmissa syllogismi. Ratiocinationes mixtim compositz in demonstrationibus Mathematicorum ut plurimum locum habent.

§. 467.

Si data quædam propositio ex aliis tanquam notioribus per syllogismos colligitur, *probari* dicitur. Unde *Probatio propositi*onis definiri potest per syllogismum aut syllogismorum inter se concatenatorum seriem, quibus ea ex aliis tanquam notioribus colligitur. Probationis definitio.

§. 468.

Probatio, quæ unico syllogismo absolvitur, dici potest *simplex*; contra vero *composita*, quæ pluribus inter se concatenatis constat. Unde *composita* est syllogismorum inter se concatenatorum series, adeoque ratiocinatio vel polyfyllogistica (§. 465.), vel mixtim composita (§. 466.). Probationis simplicis & compositz differentia.

§. 469.

In specie autem probatio *Demonstratio* dicitur, si in syllogismis, quos inter se concatenamus, non utamur præmissis, nisi definitionibus, experienciis indubitatis, axiomatis & propositionibus jam ante demonstratis: Ut adeo demonstrationes tandem nitantur definitionibus, experienciis indubitatis & axiomatis. Demonstrationis definitio.

CAPUT VIII.

DE USU VOCUM, SEU TERMINORUM CIRCA RATIOCINIA.

§. 470.

Ufus vocum
in reducendis
rebus o vis
ad sua genera
suasque spe-
cies.

Si genera & species terminis accurate definitis distinguuntur, res nobis obvias ratiocinando ad sua genera suasque species reducere licet. Vid. §. 33. 38. 50. 344. 149. 47. 49.

§. 471.

Ufus vocum
in applicandis
propositioni-
bus genera-
libus.

Si genera & species terminis accurate definitis distinguuntur, ad res nobis obvias ratiocinando applicare licet propositiones generales cognitivas. Conf. §. 470. In propositionibus generalibus subjectum est vel species aliqua, vel genus quoddam; prædicatum vero convenit singulis speciei individuis, vel singulis generis speciebus harumque individuis (§. 239.). Quamobrem cum constet, rem obviā ad hanc speciem, vel istud genus pertinere, ratiocinando colligimus, quod de genere vel specie aliqua absolute in propositione universalī prædicatur, seu affirmatur vel negatur, id quoque de re nobis obvia absolute affirmari, vel negari debere (§. 341. 342.).

§. 472.

Ufus vocum
in cognoscen-
da subjecti
conditione.

Si conditio, sub qua prædicatum convenit subjecto, terminis fixis exprimitur, ratiocinando colligere licet, num rei cuiusdam obviæ conditio ista adsit. Quoniam terminis fixis invariata respondet notio (§. 127.), si conditio, sub qua prædicatum subjecto tribuitur, terminis fixis exprimitur, eam in casu obvio agnoscere (§. 79.) consequenter ratiocinando colligere licet (§. 47. 49.), num rei obviæ conditio ista adsit.

§. 473.

§. 473.

Si conditio, sub qua prædicatum convenit subiecto terminis fixis exprimitur, & genera atque species accuratis definitionibus distinguuntur; propositiones hypotheticas generales ad res obvias, vel casus speciales aut singulares obvios, ratiocinando applicare licet. Conf. §. 370. 472. Stante igitur utraque hypothesis, ratiocinando colligitur, rem obviam esse hujus vel illius generis aut speciei, eique hanc vel istam convenire conditionem. Quamobrem cum de singulis speciebus eorumque individuis sub data conditione prædicari possint, quæ de genere (§. 233.), vel specie (§. 230.) sub ista conditione prædicantur; ratiocinando colligitur, de re obvia sub conditione obvia prædicari posse, quod in propositionibus hypotheticis universalibus de subiecto enunciatum (§. 215. 239.).

Ufus vocum in applicandis propositionibus hypotheticis.

§. 474.

Si terminis fixis respondet significatus & in propositionibus enunciatum, ex quibus prædicatis absolute positum vel sub certa conditione enunciatis agnoscatur definitum; ratiocinando colligere licet, quod rei obvia quoque conveniat notio in definitione definito attributa. Si enim terminis fixis responderet significatus, invariata iisdem responderet notio (§. 127.), atque adeo agnoscere licet, num rei obvia conveniat hoc vel illud prædicatum, sive absolute positum, sive sub certa conditione enunciatum (§. 79.), consequenter cum prædicata sive absolute posita, sive sub certa conditione enunciata ad definitum agnoscendum sufficientia vicem definitionis tueantur (150.), ratiocinando inde colligimus, quod eidem conveniat definitum (§. 344.), atque inde porro inferre licet, quod eidem quoque conveniat definitio, seu notio in definitione definito attributa (§. cit.).

Ufus vocum in applicandis definitionibus.

§. 475.

Quoniam dicto de omni & nullo omnes nituntur syllogismi (§. 348.), vi dicti autem de omni & nullo prædicata absolute, vel sub data conditione de subiecto enuncianda

Vocum usus indispensabilis in ratiocinando.

cianda sub generibus ac speciebus contentis vindicantur (§. 341. & seqq.), definitiones autem ad res obvias applicantur & res obviæ ad sua genera suasque species reducuntur (§. 344.); omnis tandem nostra ratiocinatio eo tendit, ut res obvias ad sua genera suasque species reducamus ipsique prædicata convenientia attribuamus. Quamobrem ut hic utendum sit terminis fixis & accurata definitione explicatis (§. 470. & seqq.); *eorundem indispensabilis in ratiocinando usus apparet.*

FINIS PARTIS PRIMÆ.



PHI-

PHILOSOPHIÆ
RATIONALIS
SIVE
LOGICÆ
PARS II.
PRACTICA.

LOGICÆ PARS II. SIVE PRACTICA.

SECTIO I.

DE

USU LOGICÆ IN VERO A FALSO, CERTOQUE AB INCERTO DIJUDICANDO.

CAPUT I.

DE VERITATIS CRITERIO.

§. 476.

SI prædicatum quodecunque, sive affirmativum, sive negativum, subiecto absolute, vel sub data conditione convenit, *propositio* dicitur *vera*, sin minus, *falsa*. Est itaque *veritas* consensus iudicii nostri cum objecto seu re representata; *falsitas* vero dissensus ejusdem ab objecto. Dicitur autem hæc *veritas logica*, cum in Logica hic sit vocis significatus.

Veritatis & falsitatis definitio nominalis.

§. 477.

Sequitur, *veram esse propositionem*, 1. Si universaliter est, quod universaliter affirmatur §. 256. 2. Si particulariter vel in casu singulari est, quod particulariter vel in casu singulari affirmatur §. cit. 3. Si absolute est, quod absolute affirmatur §. 213. 215. 4. Si sub ista conditione est, quod sub eodem affirmatur, §. cit. Et §. 225. 5. Si universaliter esse nequit, quod universaliter negatur. 6. Si particulariter, vel singulari in casu esse nequit, quod particulariter, vel in casu singulari negatur. 7. Si absolute non est, quod absolute negatur; 8. Si sub ista conditione esse nequit, quod sub ea esse negatur (§. 476.).

Casus iudiciorum verorum.

(Logica contracta.)

Z 2

§ 478.

§. 478.

Casus judicio-
rum falsorum.

Eodem modo pater, e contrario falsa esse judicia, 1. Si universaliter non est, quod universaliter affirmatur, 2. Si particulariter est, quod universaliter affirmatur, 3. Si universaliter est, quod particulariter tantum affirmatur, 4. Si absolute propositus non est, quod absolute affirmatur, 5. Si sub certa conditione est, quod de subiecto absolute posito affirmatur, 6. Si universaliter est, quod universaliter negatur, 7. Si particulariter est, quod universaliter negatur, 8. Si particulariter vel in casu singulari est, quod particulariter vel in casu singulari negatur, de eodem scilicet subiecto. 9. Si absolute est, quod absolute negatur, 10. Si sub certa conditione est, quod de subiecto absolute posito negatur, 11. Si sub ista conditione est, quod sub ea esse negatur.

§. 479.

Consensus ju-
dicii cum ob-
jecto & ejus ab-
eo dissensus.

Ipsa hac casuum judiciorum cum verorum, tum falsorum enumeratione innotescit, quandonam judicium cum obiecto consentire, quando ab eodem dissentire dicatur, ut adeo nullus definitionem (§. 476.) ingrediatur terminus, qui non satis intelligatur.

§. 480.

Quando uni-
versaliter affir-
mans propo-
sitiō vera.

Propositio universaliter affirmans vera est, si prædicatum per subiectum ejusque determinationem determinatur. Vide §. 225. 254. 64. 154. 222. 177 sqq. de eo, si prædicatum per subiectum determinatur; de eo vero, si prædicatum per determinationem quandam subiecti determinatur, lege §. 255. 214. 216. 225.

E. gr. Propositio universaliter affirmans, omne triangulum habet tres angulos, vera est: Quoniam enim vi definitionis triangulum est figura tribus lineis terminata, categorica huic hypothetica æquivallet: Si triangulum est figura tribus lateribus terminata, tres habet angulos (§. 223.), numerus ternarius angulorum per numerum ternarium laterum determinatur. Similiter propositio universaliter affirmans vera est; Omnis figura æquilatera circulo inscripta est æquiangula: per hanc enim conditionem, quod ea circulo sit inscripta, determinatur æqualitas angulorum.

§. 481.

Quando pro-
positio parti-
culariter affir-
mans vera.

Propositio particulariter affirmans vera est, quæ sub universaliter affirmante vera continetur & contra §. 341.

E. gr.

E. gr. *Propositio particulariter affirmans, quoddam triangulum habet tres angulos*, vera est, quia continetur sub universaliter affirmante vera, *Omne triangulum habet tres angulos.*

§. 482.

Propositio singularis vera est, quando prædicatum determinatur per ea, quæ notioni individui in dato statu spectati insunt. Vid. §. 3. disc. præl. Enimvero ratio ista vel est in subiecto, vel in extrinsecis, quæ eidem adsunt, vel in utroque simul. Quamobrem cum notio, qua individuum in statu dato repræsentatur (§. 73.), omnia eidem intrinseca statumque ejus determinantia extrinseca continere debeat; patet prædicatum per ea determinari, quæ notioni individui in dato statu spectati insunt. Vid. nunc (§. 476.).

Quando propositio singularis vera.

E. gr. *Propositio singularis, Titius scribit*, vera est, si in iis, per quæ status ejus singularis determinatur, continentur rationes ad actum scribendi determinandum sufficientes.

§. 483.

Si propositio negativa vera est, ei opposita affirmativa falsa est. Conf. §. 285. 476.

Propositionis negativæ veræ consequens.

§. 484.

Veritas est determinabilitas prædicati per notionem subiecti. Conf. §. 480. 481. 482. In omni igitur propositione affirmante vera veritas est determinabilitas prædicati per notionem subiecti, consequenter cum propositiones negativæ censeantur veræ, quando ipsis oppositæ affirmativæ sunt falsæ (§. 483.); veritatis definitionem realem habes, si eam concipis per determinabilitatem prædicati per notionem subiecti (§. 191.).

Veritatis logicæ definitio realis.

§. 485.

Propositio affirmativa falsa est, si prædicatum notioni subiecti repugnat. In judicio determinato subiectum repræsentatur sub ea notione, ut in eadem contineatur ratio, cur prædicatum ipsi conveniat (§. 315.). Quod si propositio affirmativa fuerit falsa, prædicatum subiecto convenire nequit (§. 476.); adeoque cum essentialibus, vel attributis, vel iis, quæ per modum attributorum insunt, vel cum modis in dato casu existentibus, vel

Quando affirmativa propositio falsa.

stantibus determinationibus extrinsecis inesse nequit (§. 217 - 219. 226.), consequenter notioni subiecti repugnat (§. 307.).

E. gr. Propositio affirmativa falsa est, *triangulum habet quatuor angulos*. Quoniam enim nomine *trianguli* denotatur figura tribus lateribus terminata, fieri non potest, ut eidem figuræ conveniat numerus ternarius laterum & numerus quaternarius angulorum, sicque prædicatum notioni subiecti repugnat. Similiter propositio affirmativa falsa est, *lapis ex alto delapsus tarde movetur*, propterea quod motus tardus repugnat lapsui ex alto; cum motus gravium cadentium continuo acceleretur.

§. 486.

Quando negativa propositio vera.

Propositione negativa significamus, quod prædicatum subiecto convenire nequeat, salvis his, quæ notione subiecti continentur (§. 202.), adeoque in ea prædicatum notioni subiecti repugnat (§. 307.). Quamobrem evidenter patet, *propositionem affirmativam falsam constituere negativam veram* (§. 485.).

§. 487.

Quando veritas propositionis agnoscitur.

Quoniam veritas propositionis est prædicati per notionem subiecti determinabilitas (§. 484.); *veritatem propositionis agnoscit, qui perspicit, quomodo prædicatum per ea, quæ in notione subiecti continentur, determinetur*.

§. 488.

Qui veritatem propositionis non agnoscant.

Qui subiecto aliquid convenire observat, veritatem propositionis non agnoscit, etsi constet, propositionem esse veram. Non enim novit, quenam sint in notione subiecti contenta, per quæ prædicatum determinatur. Cum ideo determinabilitatem prædicati per notionem subiecti non perspiciat; veritatem propositionis non agnoscit (§. 484.).

Nihil autem subiecto convenire potest, nisi adscriptio cur conveniat (§. 3. *Disc. præl.*). Ratio cum contineri debeat vel in definitione subiecti, vel in determinatione ejus (§. 222. 225.), utraque autem ad notionem subiecti referatur (§. 317); non minus evidens est, in notione subiecti contineri debere, ob quæ etiam prædicatum vi observationis eidem conveniens convenire debet, consequenter in notione subiecti contineri debere; per

per quæ prædicatum determinatur (§. 216.). Et si adeo veritas propositionis distincte non agnoscatur, *vi partis primæ propositionis præsentis*; constat tamen esse eam veram (§. 484.).

Nimirum agnoscimus quidem, inesse propositioni veritatem, ipsam autem veritatem, quæ latet, non perspicimus. E. gr. *Nivem esse albam* observamus. Constat igitur, in notione nivis contineri debere, per quæ albedo determinatur, ita ut iis positis ponatur etiam albedo nivis, consequenter dubium non est, propositionem hanc esse veram: *nix est alba*. Atar cum ignoremus, quænam sint ea, per quæ albedo nivis determinatur, ipsam veritatem propositionis non perspicimus. Quod si vero Physicus ex notione nivis palam facere possit, cur sit potius alba, quam non; is veritatem denum propositionis agnoscit.

§. 489.

Impossibile dicimus, quod contradictionem involvit; *Possibile*, quod contradictionem non involvit.

Impossibilis & possibilis definitio.

E. gr. *Biangulum rectilineum*, figura duabus lineis rectis terminata, impossibile est, cum ex notione rectæ sequatur contrarium, duas lineas rectas scilicet spatium comprehendere non posse. *Triangulum vero rectilineum*, figura tribus lineis rectis terminata, possibile est, quia notioni lineæ rectæ non repugnat, ut earum tres spatium comprehendant.

§. 490.

Hinc consequitur, *notionem esse impossibilem, in qua conjunguntur, quæ sibi mutuo repugnant*; contra vero *possibilem esse, in qua conjunguntur, quæ una inesse possunt eidem subjecto, vel quæ sibi mutuo non repugnant*. Etenim si sibi mutuo repugnant, quæ in notione aliqua conjunguntur, ea eidem subjecto una inesse nequeunt (§. 307.).

Notio impossibilis & possibilis.

Eodem modo patet, si in notione conjunguntur, quæ sibi mutuo non repugnant, eam esse a contradictione liberam, consequenter possibilem (§. 489.).

§. 491.

Propositioni affirmativa vera notio possibilis respondet. Conf. §. 480. 199. 216. 38. 307. 490.

Notio respondens judicio affirmativo vero.

§. 492.

vero.

§. 492.

Notio respon-
dens judicio
negativo.

Propositioni negativæ veræ notio impossibilis respondet.
Conf. §. 486. 485. 490.

§. 493.

Conceptibilis
& inconcepti-
bilis definitio.

*Conceptibile dicitur, cujus formari potest notio; Inconcep-
tibile, cujus nulla formari potest notio.*

E. gr. *Triangulum rectilineum* est conceptibile, quia ejus formari potest notio, seu menti tanquam præfens representari (§. 33.): *Bian-
gulum vero rectilineum* est inconceptibile, quia ejus notio nulla formari potest, qua menti tanquam præfens exhiberetur.

§. 494.

Criterii verita-
tis definitio.

Criterium veritatis est propositio intrinsecum, unde agnoscitur, eam esse veram, consequenter offert notas ad veritatem in casu quolibet dato agnoscendam, adeoque veram propositionem a falsa discernendam sufficientes, estque notio veritatis distincta. (§. 87.).

§. 495.

Quodnam sit
criterium ve-
ritatis.

Veritatis criterium est determinabilitas prædicati per notionem subiecti. §. 484. 194. 494.

E. gr. *Propositio, triangulum habet tres angulos*, veræ intelligitur, quam primum intelligitur, per numerum ternarium linearum ad spatium terminandum concurrentium, qui notionem subiecti continetur, una determinari numerum ternarium angulorum, ita ut positis tribus lineis ad spatium terminandum concurrentibus ponantur quoque tres anguli. Nimirum usus hujus criterii pendet a dicto de omni & nullo ad definitiones extenso (§. 344.). Ita nimirum argumentamur criterium veritatis ad usum translaturi: *Cujuscunque propositionis prædicatum per notionem subiecti determinatur, illa propositio est vera. Sed hujus propositionis prædicatum per notionem subiecti determinatur. Ergo hæc propositio vera est.*

§. 496.

Criterii falsita-
tis definitio
nominalis.

Per Criterium falsitatis intelligimus propositioni intrinsecum, unde agnoscitur, eam esse falsam §. 78.

§. 497.

Quodnam sit
criterium fal-
sitatis.

Falsitatis criterium consistit in eo, quod prædicatum notioni subiecti repugnet. §. 485. 496.

E. gr.

E. gr. Propositio, *Triangulum habet quatuor angulos*, falsa inde cognoscitur, quod notioni trianguli, qua tanquam spatium tribus lineis terminatum representatur, repugnat numerus angulorum ternarius. Nam ex notione trianguli sequitur, quod tres habeat angulos: fieri autem non potest, ut simul tres & quatuor habeat angulos. Repugnat enim notioni subiecti, quod contrariatur ei, quod per subiectum determinatur, cum contraria simul inesse nequeant (§. 307). Nititur criterium falsitatis dicto de nullo ad definitionem extenso (§. 344): redit enim ad hunc syllogismum generalem: *Cujuscunque propositionis predicatum notioni subiecti repugnat, illa est falsa. Sed hujus propositionis predicatum notioni subiecti repugnat. Ergo hac propositio est falsa.*

§. 498.

Criterium veritatis propositionis negativæ consistit in eo, quod predicatum notioni subiecti repugnat. §. 489 499 19.

Criterium veritatis propositionis negativæ.

E. gr. Propositio negativa: *Triangulum non habet quatuor angulos*, vera esse intelligitur, quod numerus angulorum quaternarius notioni trianguli repugnet, adeoque exinde, quod falsa sit propositio affirmativa: *Triangulum habet quatuor angulos.*

§. 499.

Propositio vera est, quæ est conceptibilis; falsa vero, quæ inconceptibilis de vera conf. §. 491. 493. de falsa vide §. 492. 493.

§. 500.

Due propositiones contrariæ non possunt esse simul veræ. Conf. §. 294 480. 216. 307. 498.

E. gr. *Omne triangulum habet tres angulos & nullum triangulum habet tres angulos.*

§. 501.

Quodsi ergo constet, propositionum contrariarum unam esse veram, eo ipso patet, alteram esse falsam.

§. 502.

Si de subiecto absolute prædicatur, quod eidem nonnisi sub adjicienda conditione convenit, due propositiones contrariæ simul falsæ sunt. Si enim sub certa nonnisi conditione est, quod de subiecto absolute posito affirmatur, propositio falsa est (§. 478.). Atque adeo patet in præsentī hypothēsi propositionem universalem affirmantem esse falsam. Enimvero quoniam prædicatum, (*Logica contracta.*)

Quænam propositiones conceptibiles, quænam inconceptibiles. Cur propositiones contrariæ non possint esse simul veræ.

Contrariarum falsitas unde innotescat, Contrariæ quando simul falsæ.

Aa

quod

quod subiecto absolute tribuitur, sub data quadam conditione eidem convenit, propositione tamen contrariarum negativa absolute negatur, *per hypoth.* falsa autem propositio est, qua de subiecto absolute posito negatur, quod sub certa conditione est (§. 478.); non minus liquet, propositionum contrariarum negativam quoque in hypothefi præfenti esse falsam.

E. gr. Dux propositiones contrariæ, *omnis lapis est calidus & nullus lapis est calidus*, sunt simul falsæ, calor enim absolute nec affirmari, nec negari potest de lapide, qui eidem non convenit, nisi quando per sufficiens temporis spatium calori v. gr. Solis fuit expositus.

§. 503.

Cur una con-
tradictoria
rum necessa-
rio vera; al-
tera falsa.

Propositionum contradictoriarum altera necessario vera; altera necessario falsa. Propositiones contradictoriæ vel sunt singulares (§. 304.), vel indefinitæ determinatæ (§. 305. 306. 315.), vel altera earum universalis, altera particularis est (§. 291. 292.). Jam in casu singulari omnes contradictoriæ continentur sub his formulis generalibus, *hoc A est B & hoc A non est B*, cum idem de eodem individuo eodem tempore vel sub eadem determinatione una affirmetur atque negetur (§. 285. & seqq.). Parer autem perse, eidem subiecto A idem prædicatum B vel convenire, vel non convenire, consequenter unam contradictoriarum esse veram, alteram falsam (§. 476.).

Si contradictoriæ fuerint propositiones indefinitæ determinatæ, genera & species sive absolute posita, sive sub certa determinatione, spectantur ut individua (§. 305. 306. 315. 73.), atque adeo propositiones ipsæ hoc respectu æquipollent singularibus (§. 238.). Enimvero si propositiones contradictoriæ fuerint singulares, una earum necessario vera, altera falsa, *per casum primum*. Ergo etiam si propositiones indefinitæ determinatæ fuerint contradictoriæ, altera earum necessario vera est, altera falsa.

Quod si denique altera contradictoriarum fuerit universalis, altera particularis; aut una earum itidem necessario vera est, altera vero falsa, aut non. Ponamus posterius. Cum in uno casu propositiones contradictoriæ contineantur sub hisce generalibus, *omne A est B & quoddam A non est B* (§. 291.); fieri poterit, ut falsum sit, *& omne A esse B, & quoddam A non esse B*,
aut

aut utraque sit vera, scilicet, ut & omne *A* sit *B*, & quoddam *A* non sit *B*. Si falsum sit, omne *A* esse *B*, dari poterit aliquod *A*, quod non sit *B*, aut nullum prorsus *A* erit *B* (§. 478). In utroque igitur casu verum est, quoddam *A* non esse *B* (§. 342.). Et si falsum sit, quoddam *A* non esse *B*, impossibile est, ut detur aliquod *A*, quod non sit *B* (§. 478.), adeoque quodcumque sive omne *A* esse debet *B*. Quamobrem duæ contradictoriæ in præsentī casu non possunt esse simul falsæ. Quod si omne *A* est *B*, vi Dicti de omni, fieri nequit, ut detur aliquod *A* quod non sit *B* (§. 341.), adeoque verum esse nequit, quoddam *A* non esse *B* (§. 476.), consequenter duæ contradictoriæ in præsentī casu non possunt esse simul veræ. Quoniam igitur nec simul veræ, nec simul falsæ esse possunt; una earum necessario vera, altera falsa est. Idem eodem modo ostenditur in casu altero, ubi contradictoriæ sunt, nullum *A* est *B* & quoddam *A* est *B*.

E. gr. In casu singulari *Petrus aut scribit, aut non scribit*. In casu indefinito, *Triangulum aut habet tres angulos, aut non habet tres angulos*, numerus enim angulorum per laterum numerum determinatur. Denique in casu contradictionis inter universalem & particularem intercedentis aut omne quadratum habet quatuor angulos, aut quoddam quadratum non habet quatuor angulos.

§. 504.

In propositione vera sive affirmativa, sive negativa, notio subiecti possibilis esse debet. §. 491. 490.

Notio subiecti in propositione vera. veris cur possibilis.

E. gr. Notio trianguli possibilis est; neque enim repugnat, ut tres lineæ ad spatium comprehendendum concurrant. Hinc vera formantur de triangulo iudicia cum affirmativa, tum negativa, v. gr. *Triangulum habet tres angulos, triangulum non habet quatuor angulos &c.* Contra notio bianguli rectilinei impossibilis est, cum repugnet, ut duæ lineæ rectæ spatium comprehendant. Enunciationes igitur nullæ sunt, *biangulum rectilineum habet duos angulos, biangulum rectilineum non habet tres angulos &c.*

§. 505.

Quoniam in propositione determinata notio subiecti continet rationem, cur prædicatum ei tribuitur (§. 315.), in categorica autem propositione prædicatum subiecto tribuitur sub conditione definitionis (§. 222.), in hypothetica sub conditione adje-

Quando propositio hypothetica vera.

Etā (§. 215); Propositio non nisi hypothetice vera est, quamdiu non constat, num in categorica definitio, in hypothetica conditio adjecta possibilis. Nimirum vera est propositio categorica, si definitio subiecti possibilis; vera est hypothetica, si conditio adjecta possibilis.

E. gr. Si Deus cum Cartesio definitur per ens perfectissimum, propositiones *Deus est omniscius, Deus est omnipotens, Deus est summe bonus* tamdiu hypothetice veræ intelliguntur, quamdiu non probatur ens perfectissimum esse possibile. Equipollent enim propositiones categoricæ huic hypotheticæ compositæ: *Si Deus est ens perfectissimum, omniscius, omnipotens; summe bonus est.* Constat autem consequens non poni nisi posito antecedente (§. 381.). Quamdiu igitur non constat, antecedens poni posse, v. gr. *Esse ens perfectissimum possibile*, tamdiu quoque ignoratur, poni posse consequens, nempe *enti alicui convenire omniscientiam, omnipotentiam, summam bonitatem.*

§. 506.

Quæ sibi mutuo non repugnant.

Si quæ in eodem subiecto una observamus, ea sibi mutuo non repugnant §. 307.

E. gr. Observamus, ignem & lucere, & calefacere; adeoque constat, lucem & calorem sibi mutuo non repugnare.

§. 507.

Quæ per se invicem non determinatur.

Si, quæ in eodem subiecto una insunt, in aliis separatim deprehenduntur, eorum unum per alterum non determinatur. Quod enim per alterum determinatur, id ideo inest, quia inest hoc, per quod determinatur (§. 216.), scilicet si A determinatur per B & subiecto C inest A, etiam B inesse debet. Cum adeo semper una inesse debeant, quorum unum per alterum determinatur (§. 378.). si in subiecto C, cui inest A, non inest B, nec B per A determinatur, hoc est, non determinatur per se invicem, quæ separatim inesse deprehenduntur, etsi in aliquo subiecto una insint.

E. gr. Chalybs durus est atque elasticus; lapides duri sunt, sed non elastici: aër fluidus est idemque elasticus. Quare cum durities & elasticitas, quæ in chalybe conjunguntur, in lapidibus & aëre separatim deprehendantur; durities per elasticitatem non determinatur.

§. 508.

§. 508.

Si utraque præmissa alicujus Syllogismi fuerit vera, conclusio quoque vera est §. 486. Enimvero ex iis, quæ de forma omnium syllogismorum Sect. IV. Part. I. demonstrata sunt, patet, si in præmissis subiecto conveniat prædicatum, quale ipsi attribuitur, in conclusione quoque prædicatum, quod suo tribuitur subiecto sive affirmativum, sive negativum, convenire debere. Conclusio igitur vera est (§. 487.).

Conclusio syllogismorum quando vera.

§. 509.

Si major syllogismi categorici fuerit falsa & minor vera; conclusio quoque falsa est. Syllogismi primæ figuræ sunt Dicti de omni & nullo non nisi distincta applicatio (§. 361. & seqq.); ergo omnes tandem syllogismi categorici ad hunc generalem reducuntur (§. 343. 344.): *Quicquid sub universali A per B determinato continetur, ei convenit prædicatum C* (ubi per B omne id intelligitur, quod ad notionem subiecti requiritur, ut per eam prædicatum determinetur vi §. 315. per C autem prædicatum quodcumque, sive affirmativum, sive negativum). *Atqui D continetur sub A per B determinato. Ergo ei convenit prædicatum C.* Quodsi ergo propositio major sit falsa, subiecto, quod sub universali A per B determinato continetur, non convenit C (§. 476.). Quamobrem si minor fuerit vera, D continetur sub A per B determinato (§. 477.), consequenter ei prædicatum C convenire nequit (§. 508.): quod tamen ob falsam majorem eidem tribuitur. Est igitur conclusio, *ipsi D convenit prædicatum C*, falsa (§. 476.).

Conclusio syllogismi categorici quando falsa.

E. gr. Si quis ita argumentetur: *In omni triangulo tres anguli junctim sumti æquivalent duobus rectis. Atqui triangulum sphericum est triangulum. Ergo in triangulo spherico tres anguli junctim sumti sunt æquales duobus rectis;* conclusio falsa est, quia major propositio falsa est, quæ de omni saltem triangulo rectilineo intelligenda; minor autem propositio vera.

§. 510.

Si prædicatum in majore subiecto vel absolute, vel sub data determinatione soli competit, minor autem fuerit falsa; conclusio quoque falsa esse debet. Constat ex demonstratione theorematum præcedentis, quod omnes syllogismi categorici sub hoc catholico continen-

Casus alius.

tineantur: *Quicquid sub universali A per B determinato continetur, ei convenit prædicatum C.* Sed D continetur sub A per B determinato. Ergo ipsi D convenit prædicatum C. Cum igitur prædicatum C non possit convenire nisi ei, quod sub universali A per B determinato continetur, per hypoth. ipsi D non convenit, si sub A per B determinato non continetur. Enimvero cum minor sit falsa per hypoth. D sub A per B determinato non continetur (§ 476.). Ipsi itaque D prædicatum C convenire nequit, consequenter conclusio in hypothesei theorematis falsa est (§. cit.).

E. gr. Si quis ita argumentatur: *Omne quadrilaterum circulo inscriptibile habet binos angulos diametraliter oppositos duobus rectis æquales.* Sed omne trapezium parallelarum basium est quadrilaterum circulo inscriptibile. Ergo omne trapezium parallelarum basium habet binos angulos diametraliter oppositos duobus rectis æquales: propositio major vera est & prædicatum soli quadrilatero circulo inscriptibili competit. Quamobrem cum minor falsa sit; falsa quoque est conclusio.

§. 511.

Quando conclusio vera ex præmissis tam non sequitur.

Si propositio major fuerit vera, minor autem falsa, prædicatum vero conclusionis subiecto non repugnat; conclusio quidem vera esse potest; sed ex præmissis tamen non sequitur. Etenim si in syllogismo catholico: *Quicquid sub universali A per B determinato continetur, ei convenit prædicatum C.* Atqui D continetur &c. Ergo &c. minor fuerit falsa, D sub A per B determinato non continetur (§. 478.); consequenter nec vi Disti de omni & nullo eidem tribui potest prædicatum C (§ 343.), adeoque conclusio ex præmissis non sequitur (§. 348.). Quod si tamen prædicatum subiecto non repugnat, id minime obstat, quo minus aliam ob rationem eidem conveniat (§ 337.).

E. gr. Si quis ita argumentetur: *Omnis lapis calori solis æstivo diu expositus est calidus.* Sed hic lapis calori solis æstivo diu fuit expositus. Ergo hic lapis est calidus, fueritque minor falsa, vi syllogismi præsentis non sequitur, lapidem esse calidum, etsi non repugnet, eum alia de causa esse calidum, cum calorem alia ratione contrahere potuerit, v. gr. quod immerfus fuerit aquæ fervidæ.

§. 512.

Quid ex falsa minore concludatur.

Quoniam conclusio vera esse potest, etsi minor falsa sit (§. 511.); Ex minore falsa non concluditur, falsam esse conclusionem, sed

sed tantummodo, eam ex præmissis non sequi, consequenter conclusio in medio relinquitur.

§. 513.

Si præmissa in consequentiis immediatis fuerit vera, conclusio quoque vera est. Conf. §. 430. 476.

Quando conclusio in consequentiis immediatis vera.

E. gr. Per consequentiam immediatam inferimus (§. 427.): *Quoddam triangulum est æquilaterum.* Ergo *quodam figura æquilatera est triangulum.* Quoniam præmissa vera; conclusio quoque vera.

§. 514.

Eodem modo patet, in syllogismis hypotheticis conclusionem esse veram, si minor seu subsumptio vera. Etenim minor vel est antecedens, & conclusio consequens, (§. 381.), adeoque si in minore prædicatum convenit subiecto, prædicatum quoque eidem convenit in conclusione; vel minor est oppositum consequentis, conclusio antecedentis oppositum (§. 381. 285.), adeoque si prædicatum in consequente subiecto suo convenire nequit; nec prædicatum in conclusione eidem convenire potest.

Quando vera in hypothetica.

§. 515.

Propositio, quæ demonstrari potest, vera est. Vid. 469. Quoniam in demonstratione syllogismos non ingrediuntur tanquam præmissæ præter definitiones, de quibus vid. §. 211. 476. 133. axiomata, de quibus lege §. 264. 259. 476. & experientias indubitatas nisi conclusiones ex iis tanquam præmissis illatæ, adeoque veræ *per demonstrata*; Conf. §. 488. omnis propositio, quæ demonstratur, inferitur tanquam conclusio per syllogismos concatenatos, quorum præmissæ veræ sunt, consequenter & ipsa vera est (§. §. cit.).

Cur propositio vera, quæ demonstrari potest.

§. 516.

Ad verum a falso discernendum regulæ logicæ sufficiunt. Propositio cum vera sit, quæ demonstrari potest (§. 515.), verum a falso discernit, qui demonstratum esse agnoscit, prædicatum subiecto sive absolute posito, sive sub data determinatione convenire. Quoniam itaque demonstratio constat syllogismorum concatenatione, quorum præmissæ sunt definitiones, experientiae indubitatae, axiomata & propositiones jam demonstratæ (§. 469.); verum a falso ut quis discernere possit, facultatem habere

Regularum logicarum usus in discernendo vero a falso.

bere debet judicandi, num definitiones, quibus utimur in demonstrandis propositionibus, sint genuinæ; num experientiæ, quas sumimus, sint indubitatæ; num axiomatis nomen mereantur propositiones, quæ pro talibus venditantur; num forma syllogismorum sit genuina; denique num syllogismi inter se rite concatenentur. Enimvero Logica tradit definiendi regulas (§. 149. & seqq.), docet formam judiciorum in universum omnium (§. 195. & seqq.), quæ adeo etiam esse debet, intuitivorum ab experientia derivatorum (§. 50.); inculcat discrimen inter axiomata & propositiones demonstrabiles (§. 264. 265. 267. & seqq.); delineat formam syllogismorum (§. 327. & seqq.); monstrat denique modum syllogismos concatenandi (§. 463.). Regulæ adeo logicæ sufficiunt ad verum a falso discernendum.

§. 517.

Eorundem
sufficiencia.*Non alio igitur criterio veritatis opus est (§. 516.).*

§. 518.

Idem veræ &
falsæ discrimina.

Quoniam propositioni affirmativæ veræ notio possibilis responderet, *idea* sive *notio vera* dicitur, quæ est possibilis: e contrario autem *falsa* audit, quæ impossibilis. Arque adeo *in notione vera conjunguntur, quæ eidem subiecto una inesse possunt*. E contrario autem *in falsa conjunguntur, quæ una inesse nequeunt, seu sibi mutuo repugnant* (§. 490.).

§. 519.

Notio subiecti
in propositione
vera.

Quamobrem cum in propositionibus veris notio subiecti possibilis (§. 404. 405.); *in propositione vera notio subiecti sive absolute, sive sub data determinatione positi vera esse debet* (§. 518.).

CAPUT II

DE DEMONSTRATIONE.

§. 520.

Demonstrati-
onis ostensivæ
definitio.

D*emonstratio ostensiva* sive *directa* est, qua ex notione subiecti colligitur, prædicatum convenire subiecto.

§. 521.

§. 521.

Demonstratio apogogica seu indirecta est, qua, posito contrario ejus, quod probari debet, tanquam vero, colligitur, quod propositioni veræ, vel notioni subjeeti contradicit. Demonstrationis apogogicæ definitio

Dicitur quoque hæc demonstratio *Deductio ad absurdum* vel *impossibile*.

§. 522.

Si prædicatum subjecto absolute tribuitur, demonstrationem Forma demonstrationis
ostensivam conditurus 1. vel ex definitione integra format propositionem, vel ex ejus partibus plures, easque sumit tanquam propositiones minores syllogismorum. 2. Quodsi de eodem subjecto prostant axiomata, vel propositiones jam demonstratæ, non attenda definitione, hæc quoque subinde sumi possunt ut propositiones minores syllogismorum. 3. Data jam propositione minore in memoriam revocatur propositio alia, quæ terminum cum ea communem habet, atque majorem syllogismi constituit. Sicque inferitur conclusio (§. 330.). Quodsi *vi num. 1. vel 2.* plures propositiones minores fuere formatæ, plures quoque hac ratione eliciuntur conclusiones. 4. Vel singulæ sumuntur ut præmissæ novorum syllogismorum, vel plures simul spectantur ut notio complexa formaturque inde propositio, quæ sumitur ut præmissa novi syllogismi. 5. Hisce præmissis jungitur alia ex antecedentibus nota inferiturque conclusio. Atque hac ratione adhibitis, si cubi opus fuerit, consequentiis immediatis progrediendum, donec aliquo syllogismo inferatur conclusio, quæ eadem est cum propositione demonstranda (§. 520.). ostensivæ propositionis categoricæ.

E. gr. (§. 174.) propositionem, quod *Modi definitionem ingredi nequeant*, demonstraturi, vi definitionis (§. 66.) quod *Modi sint mutabilia, quæ enti insunt, nec per essentialia determinantur*, sumimus: *Modi sunt mutabiles*. Jam recordati propositionis per se manifestæ: *Quæ mutabilia sunt, constanter non insunt*, sumta propositione priori tanquam minore, posteriori tanquam majore syllogismi, inferimus: *Modi constanter non insunt*. Quoniam porro memoriam subit propositio altera manifesta, quæ axiomatis instar haberi potest: *Quæ constanter non insunt, rebus agnoscendis atque a se invicem discernendis inservire nequeunt* (nobis enim jam res est cum rebus omni tempore discernendis); sumta conclusione anteriori pro minore, axioma pro majore syllogismi (*Logica contracta*.)

Bb

fmi

fmi inferimus: *Modi rebus agnoscendis & a se invicem discernendis infer-
vire nequeunt.* Jam cum definitio notarum nobis succurrit, quod sint
rebus intrinseca, unde agnoscuntur & a se invicem discernuntur (§. 78.),
per consequentiam immediatam inferimus: *Quod rebus agnoscendis & a
se invicem discernendis infervire nequit, ex notarum numero excluden-
dum & sumta conclusione hac pro majore, conclusione autem syllogismi
anterioris pro minore novi syllogismi inferimus: Modi ex notarum nu-
mero excluduntur.* - Quoniam denique recordamur propositionis antea
demonstrata (§. 150.), in definitione enumerari debent nota nec plures,
nes pauciores, quam quæ ad rem definitam agnoscendam & ab aliis distin-
guendam sufficiunt, per consequentiam immediatam inferimus: *Quod
ex notarum numero excluditur, ex definitione exulare debet.* Sumta
igitur hac conclusione pro majore, anteriori autem pro minore syllo-
gismi, tandem inferimus: *Modi ex definitione exulare debent; quæ pro-
positio æquipollet alteri ad demonstrandum propositæ: Modi definitio-
nem ingredi nequeunt.*

Analysis igitur logica demonstrationis hujus logicæ hæc est:

I. *Definitio.* Modi sunt mutabilia, quæ enti insunt.

Conclusio 1. Ergo per immediatam consequentiam: Modi sunt mutabiles.

II. *Axioma.* Quæ mutabilia sunt, constanter non insunt.

Conclusio 1. Modi sunt mutabiles.

Conclusio 2. Ergo Modi constanter non insunt.

III. *Axioma.* Quæ constanter non insunt, rebus agnoscendis atque a se
invicem discernendis infervire nequeunt.

Conclusio 2. Modi constanter non insunt.

Conclusio 3. Ergo modi rebus agnoscendis atque a se invicem discer-
nendis infervire nequeunt.

IV. *Definitio.* Notæ sunt rebus intrinseca, unde agnoscuntur & a se in-
vicem discernuntur.

Conclusio 4. Ergo per immediatam consequentiam: Quod rebus a-
gnoscendis & a se invicem discernendis infervire nequit,
ex notarum numero excludendum.

V. *Conclusio 4.* Quod rebus agnoscendis & a se invicem discernendis in-
fervire nequit, ex notarum numero excludendum.

Conclusio

Conclusio 3. Modi rebus agnoscendis & a se invicem discernendis inservire nequeunt.

Conclusio 5. Ergo Modi ex notarum numero excludendi.

VI. *Propos. dem.* In definitione enumerari debent notæ nec plures, nec pauciores, quam quæ ad rem definitam agnoscendam & ab aliis distinguendam sufficiunt.

Conclusio 6. Ergo per consequentiam immediatam; Quod ex notarum numero excluditur, ex definitione exulare debet.

VII. *Conclusio 6.* Quod ex notarum numero excluditur, ex definitione exulare debet.

Conclusio 5. Modi ex notarum numero excluduntur.

Conclusio 7. Ergo Modi ex definitione exulare debent.

VIII. *Conclusio 7.* Modi ex definitione exulare debent.

Conclusio 8. Ergo per consequentiam immediatam: Modi definitionem ingredi nequeunt.

§. 523.

Si propositio fuerit hypothetica sive formaliter talis, sive ad categoricæ formam reducitur (§. 224.), demonstrationem conditionis utitur hypothese, quemadmodum in casu præcedente definitione (§. 522.), ut nempe inde formentur judicia intuitiva, quæ tueantur vicem propositionum minorum in syllogismis primis: Quibus datis concatenationem absolvi eodem prorsus modo, quo in casu præcedente fuimus usi.

Forma demonstrationis
offensivæ
propositionis
hypotheticæ.

E. gr. Ubi demonstranda est propositio: *Si in duabus propositionibus subiectum fuerit idem terminus, eidem tamen diversæ tribuantur notiones propositiones diversæ sunt, quamvis idem sit prædicatum; ex hypothesi formatur propositio: Subiectum propositionum est terminus idem, cui diversæ respondent notiones.* Jam cum ex antecedentibus memoriæ subeat propositio: *Omni termino, cui notiones diversæ respondent, res diversæ denotantur; sumta hac pro maiore, ista pro minore syllogismi, infertur conclusio: Ergo subiecto propositionum res diversæ denotantur.* Unde per consequentiam immediatam infertur: *Ergo propositiones in hypothesi theorematidis diversæ habent subiecta.* Quoniam igitur potro in memoriæ revocamus propositionem: *Omnes propositiones, quæ idem prædicatum, sed diversæ subiecta habent, sunt diversæ, sumta hac pro*

stantibus determinationibus extrinsecis inesse nequit (§. 217 - 219. 226.), consequenter notioni subiecti repugnat (§. 307.).

E. gr. Propositio affirmativa falsa est, *triangulum habet quatuor angulos*. Quoniam enim nomine *trianguli* denotatur figura tribus lateribus terminata, fieri non potest, ut eidem figuræ conveniat numerus ternarius laterum & numerus quaternarius angulorum, sicque prædicatum notioni subiecti repugnat. Similiter propositio affirmativa falsa est, *lapis ex alto delapsus tarde movetur*, propterea quod motus tardus repugnat lapsui ex alto; cum motus gravium cadentium continuo acceleretur.

§. 486.

Quando negativa propositio vera.

Propositione negativa significamus, quod prædicatum subiecto convenire nequeat, falsis, quæ notione subiecti continentur (§. 202.), adeoque in ea prædicatum notioni subiecti repugnat (§. 307.). Quamobrem evidenter patet, *propositionem affirmativam falsam constituere negativam veram* (§. 485.).

§. 487.

Quando veritas propositio-
nis agnosca-
tur.

Quoniam veritas propositionis est prædicati per notionem subiecti determinabilitas (§. 484.); *veritatem propositionis agnoscit, qui perspicit, quomodo prædicatum per ea, quæ in notione subiecti continentur, determinetur*.

§. 488.

Qui veritatem propositionis non agnoscant.

Qui subiecto aliquid convenire observat, veritatem propositionis non agnoscit, etsi conslet, propositionem esse veram. Non enim novit, quænam sint in notione subiecti contenta, per quæ prædicatum determinatur. Cum adeo determinabilitatem prædicati per notionem subiecti non perspiciat; veritatem propositionis non agnoscit (§. 484.).

Nihil autem subiecto convenire potest, nisi adstratio cur conveniat (§. 3. *Disc. præl.*). Ratio cum contineri debeat vel in definitione subiecti, vel in determinatione ejus (§. 222. 225.), utraque autem ad notionem subiecti referatur (§. 317); non minus evidens est, in notione subiecti contineri debere, ob quæ etiam prædicatum vi observationis eidem conveniens convenire debet, consequenter in notione subiecti contineri debere, per

per quæ prædicatum determinatur (§. 216.). Et si adeo veritas propositionis distincte non agnoscat, *vi partis primæ propositionis præsentis*; constat tamen esse eam veram (§. 484.).

Nimirum agnoscimus quidem, inesse propositioni veritatem, ipsam autem veritatem, quæ later, non perspicimus. E. gr. *Nivem esse albam* observamus. Constat igitur, in notione nivis contineri debere, per quæ albedo determinatur, ita ut iis positis ponatur etiam albedo nivis, consequenter dubium non est, propositionem hanc esse veram: *nix est alba*. Atat cum ignoremus, quænam sint ea, per quæ albedo nivis determinatur, ipsam veritatem propositionis non perspicimus. Quod si vero Physicus ex notione nivis palam facere possit, cur sit potius alba, quam non; is veritatem denum propositionis agnoscit.

§. 489.

Impossibile dicimus, quod contradictionem involvit; *Possibile*, quod contradictionem non involvit.

Impossibilis & possibilis definitio.

E. gr. *Biangulum rectilineum*, figura duabus lineis rectis terminata, impossibile est, cum ex notione rectæ sequatur contrarium, duas lineas rectas scilicet spatium comprehendere non posse. *Triangulum vero rectilineum*, figura tribus lineis rectis terminata, possibile est, quia notioni lineæ rectæ non repugnat, ut earum tres spatium comprehendant.

§. 490.

Hinc consequitur, *notionem esse impossibilem, in qua conjunguntur, quæ sibi mutuo repugnant*; contra vero *possibilem esse, in qua conjunguntur, quæ una inesse possunt eidem subjecto*, vel *quæ sibi mutuo non repugnant*. Etenim si sibi mutuo repugnant, quæ in notione aliqua conjunguntur, ea eidem subjecto una inesse nequeunt (§. 307.).

Notio impossibilis & possibilis.

Eodem modo pater, si in notione conjunguntur, quæ sibi mutuo non repugnant, eam esse a contradictione liberam, consequenter possibilem (§. 489.).

§. 491.

Propositioni affirmativa veræ notio possibilis respondet.
Conf. §. 480 sqq. 197. 216. 38. 307. 490.

Notio respondens judicio affirmativo veræ.

§. 492.

§. 492.

Notio respon-
dens judicio
negativo.

Propositioni negativæ veræ notio impossibilis respondet.
Conf. §. 486. 485. 490.

§. 493.

Conceptibilis
& inconcepti-
bilis definitio.

*Conceptibile dicitur, cujus formari potest notio; Inconcep-
tibile, cujus nulla formari potest notio.*

E. gr. *Triangulum reſilileum* est conceptibile, quia ejus formari
potest notio, seu menti tanquam præſens repræſentari (§. 33.): *Bian-
gulum vero reſilileum* est inconceptibile, quia ejus notio nulla formari
potest, quæ menti tanquam præſens exhiberetur.

§. 494.

Criterii verita-
tis definitio.

*Criterium veritatis est propositioni intrinsecum, unde
agnoscitur, eam esse veram, consequenter offert notas ad veri-
tatem in casu quolibet dato agnoscendam, adeoque veram propo-
sitionem a falsa discernendam sufficientes, eſſeque notio veritatis di-
ſtincta.* (§. 87.).

§. 495.

Quandam sit
criterium ve-
ritatis.

*Veritatis criterium est determinabilitas prædicati per no-
tionem subjeſti.* §. 484. 194. 494.

E. gr. *Propositio, triangulum habet tres angulos*, vera intelligitur,
quam primum intelligitur, per numerum ternarium linearum ad spa-
tium terminandum concurrentium, qui notione subjeſti continetur, una
determinari numerum ternarium angulorum, ita ut positis tribus lineis
ad spatium terminandum concurrentibus ponantur quoque tres anguli.
Nimirum usus hujus criterii pendet a dicto de omni & nullo ad defini-
tiones extenso (§. 344.). Ita nimirum argumentamur criterium veri-
tatis ad usum translatum: *Cujuscunque propositionis prædicatum per no-
tionem subjeſti determinatur, illa propositio est vera.* Sed hujus propo-
sitionis prædicatum per notionem subjeſti determinatur. Ergo hæc propo-
sicio vera est.

§. 496.

Criterii falsita-
tis definitio
nominalis.

*Per Criterium falsitatis intelligimus propositioni intrin-
secum, unde agnoscitur, eam esse falsam.* §. 78.

§. 497.

Quandam sit
criterium fal-
sitatis.

*Falsitatis criterium consistit in eo, quod prædicatum notio-
ni subjeſti repugnet.* §. 485. 496.

E. gr.

E. gr. *Propositio, Triangulum habet quatuor angulos*, falsa inde cognoscitur, quod notioni trianguli, qua tanquam spatium tribus lineis terminatum repræsentatur, repugnat numerus angulorum ternarius. Nam ex notione trianguli sequitur, quod tres habeat angulos: fieri autem non potest, ut simul tres & quatuor habeat angulos. Repugnat enim notioni subiecti, quod contrariatur ei, quod per subiectum determinatur, cum contraria simul inesse nequeant (§. 307.). Nititur criterium falsitatis dicto de nullo ad definitionem extenso (§. 344.): redit enim ad hunc syllogismum generalem: *Cujuscunque propositionis predicatum notioni subiecti repugnat, illa est falsa. Sed hujus propositionis predicatum notioni subiecti repugnat. Ergo hæc propositio est falsa.*

§. 498.

Criterium veritatis propositionis negativæ consistit in eo, quod predicatum notioni subiecti repugnat. §. 489-497 lq.

Criterium veritatis propositionis negativæ.

E. gr. *Propositio negativa: Triangulum non habet quatuor angulos*, vera esse intelligitur, quod numerus angulorum quaternarius notioni trianguli repugnet, adeoque exinde, quod falsa sit propositio affirmativa: *Triangulum habet quatuor angulos.*

§. 499.

Propositio vera est, quæ est conceptibilis; falsa vero, quæ inconceptibilis de vera conf. §. 491-493. de falsa vide §. 492-493

Quænam propositiones conceptibiles, quænam inconceptibiles. Cur propositiones contrariæ non possint esse simul veræ.

§. 500.

Duæ propositiones contrariæ non possunt esse simul veræ. Conf. §. 394-480. 216. 307-498.

E. gr. *Omne triangulum habet tres angulos & nullum triangulum habet tres angulos.*

§. 501.

Quod si ergo constet, propositionum contrariarum unam esse veram, eo ipso patet, alteram esse falsam.

Contrariarum falsitas unde innoteat. Contrariæ quando simul falsæ.

§. 502.

Si de subiecto absolute prædicatur, quod eidem nonnisi sub adjicienda conditione convenit, duæ propositiones contrariæ simul falsæ sunt. Si enim sub certa nonnisi conditione est, quod de subiecto absolute posito affirmatur, propositio falsa est (§. 478.). Atque adeo pater in præsentî hypothesis propositionem universaliter affirmantem esse falsam. Enimvero quoniam prædicatum, (Logica contracta.)

Aa

quod

quod subiecto absolute tribuitur, sub data quadam conditione eidem convenit, propositione tamen contrariarum negativa absolute negatur, *per hypoth.* falsa autem propositio est, qua de subiecto absolute posito negatur, quod sub certa conditione est (§. 478.); non minus liquet, propositionum contrariarum negativam quoque in hypothesi præfenti esse falsam.

E. gr. Dux propositiones contrariæ, *omnis lapis est calidus & nullus lapis est calidus*, sunt simul falsæ, calor enim absolute nec affirmari, nec negari potest de lapide, qui eidem non convenit, nisi quando per sufficiens temporis spatium calori v. gr. Solis fuit expositus.

§. 503.

Cur una contradictoria
rum necessaria
vera; altera falsa.

Propositionum contradictoriarum altera necessario vera; altera necessario falsa. Propositiones contradictoriæ vel sint singulares (§. 304.), vel indefinitæ determinatæ (§. 305. 306. 315.), vel altera earum universalis, altera particularis est (§. 291. 292.). Jam in casu singulari omnes contradictoriæ continentur sub his formulis generalibus, *hoc A est B & hoc A non est B*, cum idem de eodem individuo eodem tempore vel sub eadem determinatione una affirmetur atque negetur (§. 285. & seqq.). Pater autem perse, eidem subiecto A idem prædicatum B vel convenire, vel non convenire, consequenter unam contradictoriarum esse veram, alteram falsam (§. 476.).

Si contradictoriæ fuerint propositiones indefinitæ determinatæ, genera & species sive absolute posita, sive sub certa determinatione, spectantur ut individua (§. 305. 306. 315. 73.), atque adeo propositiones ipsæ hoc respectu æquipollent singularibus (§. 238.). Enimvero si propositiones contradictoriæ fuerint singulares, una earum necessario vera, altera falsa, *per casum primum*. Ergo etiam si propositiones indefinitæ determinatæ fuerint contradictoriæ, altera earum necessario vera est, altera falsa.

Quodsi denique altera contradictoriarum fuerit universalis, altera particularis; aut una earum itidem necessario vera est, altera vero falsa, aut non. Ponamus posterius. Cum in uno casu propositiones contradictoriæ contineantur sub hisce generalibus, *omne A est B & quoddam A non est B* (§. 291.); fieri poterit, ut falsum sit, *& omne A esse B, & quoddam A non esse B*,
aut

aut utraque sit vera, scilicet, ut & *omne A sit B, & quoddam A non sit B*. Si falsum sit, omne A esse B, dari poterit aliquod A, quod non sit B, aut nullum prorsus A erit B (§. 478). In utroque igitur casu verum est, *quoddam A non esse B* (§. 342.). Et si falsum sit, *quoddam A non esse B*, impossibile est, ut detur aliquod A, quod non sit B (§. 478.), adeoque quodcunque sive omne A esse debet B. Quamobrem duæ contradictoriæ in præsentī casu non possunt esse simul falsæ. Quod si *omne A est B*, vi Dicti de omni, fieri nequit, ut *detur aliquod A quod non sit B* (§. 341.), adeoque verum esse nequit, *quoddam A non esse B* (§. 476.), consequenter duæ contradictoriæ in præsentī casu non possunt esse simul veræ. Quoniam igitur nec simul veræ, nec simul falsæ esse possunt; una earum necessario vera, altera falsa est. Idem eodem modo ostenditur in casu altero, ubi contradictoriæ sunt, *nullum A est B & quoddam A est B*.

E. gr. In casu singulari *Petrus aut scribit, aut non scribit*. In casu indefinito, *Triangulum aut habet tres angulos, aut non habet tres angulos*, numerus enim angulorum per laterum numerum determinatur. Denique in casu contradictionis inter universalem & particularem intercedentis aut *omne quadratum habet quatuor angulos, aut quoddam quadratum non habet quatuor angulos*.

§. 504.

In propositione vera sive affirmativa, sive negativa, notio subiecti possibilis esse debet. §. 491. 490.

Notio subiecti in propositione negativa veris cur possibilis.

E. gr. Notio trianguli possibilis est: neque enim repugnat, ut tres lineæ ad spatium comprehendendum concurrant. Hinc vera formantur de triangulo judicia cum affirmativa, cum negativa, v. gr. *Triangulum habet tres angulos, triangulum non habet quatuor angulos &c.* Contra notio bianguli rectilinei impossibilis est, cum repugnet, ut duæ lineæ rectæ spatium comprehendant. Enunciationes igitur nullæ sunt, *biangulum rectilineum habet duos angulos, biangulum rectilineum non habet tres angulos &c.*

§. 505.

Quoniam in propositione determinata notio subiecti continet rationem, cur prædicatum ei tribuitur (§. 315.), in categorica autem propositione prædicatum subiecto tribuitur sub conditione definitionis (§. 222.), in hypothetica sub conditione adie-

Quando propositio hypothetica vera.

cta (§. 215.); *Propositio non nisi hypothetice vera est, quamdiu non constat, num in categorica definitio, in hypothetica conditio adjecta possibilis.* Nimirum vera est propositio categorica, si definitio subiecti possibilis; vera est hypothetica, si conditio adjecta possibilis.

E. gr. Si Deus cum Cartesio definitur per ens perfectissimum, propositiones *Deus est omniscius, Deus est omnipotens, Deus est summe bonus* tamdiu hypothetice veræ intelliguntur, quamdiu non probatur ens perfectissimum esse possibile. Æquipollent enim propositiones categoricæ huic hypotheticæ compositæ: *Si Deus est ens perfectissimum, omniscius, omnipotens; summe bonus est.* Constat autem consequens non poni nisi posito antecedente (§. 381.). Quamdiu igitur non constat, antecedens poni posse, v. gr. *Esse ens perfectissimum possibile*, tamdiu quoque ignoratur, poni posse consequens, nempe *enti alicui convenire omniscientiam, omnipotentiam, summam bonitatem.*

§. 506.

Quæ sibi mutuo non repugnant.

Si quæ in eodem subiecto una observamus, ea sibi mutuo non repugnant §. 307.

E. gr. Observamus, ignem & lucere, & calefacere; adeoque constat, lucem & calorem sibi mutuo non repugnare.

§. 507.

Quæ per se invicem non determinantur.

Si, quæ in eodem subiecto una insunt, in aliis separatim deprehenduntur, eorum unum per alterum non determinatur. Quod enim per alterum determinatur, id ideo inest, quia inest hoc, per quod determinatur (§. 216.), scilicet si A determinatur per B & subiecto C inest A, etiam B inesse debet. Cum adeo semper una inesse debeant, quorum unum per alterum determinatur (§. 378.). si in subiecto C, cui inest A, non inest B, nec B per A determinatur, hoc est, non determinatur per se invicem, quæ separatim inesse deprehenduntur, etsi in aliquo subiecto una insint.

E. gr. Chalybs durus est atque elasticus; lapides duri sunt, sed non elastici: aer fluidus est idemque elasticus. Quare cum durities & elasticitas, quæ in chalybe conjunguntur, in lapidibus & aëre separatim deprehendantur; durities per elasticitatem non determinatur.

§. 508.

§. 508.

Si utraque præmissa alicujus Syllogismi fuerit vera, conclusio quoque vera est. §. 486. Enimvero ex iis, quæ de forma omnium syllogismorum Sect. IV. Part. I. demonstrata sunt, patet, si in præmissis subiecto conveniat prædicatum, quale ipsi attribuitur, in conclusione quoque prædicatum, quod suo tribuitur subiecto sive affirmativum, sive negativum, convenire debere. Conclusio igitur vera est (§. 487.).

Conclusio syllogismorum quando vera.

§. 509.

Si major syllogismi categorici fuerit falsa & minor vera; conclusio quoque falsa est. Syllogismi primæ figuræ sunt Dicti de omni & nullo non nisi distincta applicatio (§. 361. & seqq.); ergo omnes tandem syllogismi categorici ad hunc generalem reducuntur (§. 343. 344.): *Quicquid sub universali A per B determinato continetur, ei convenit prædicatum C* (ubi per B omne id intelligitur, quod ad notionem subiecti requiritur, ut per eam prædicatum determinetur vi §. 315. per C autem prædicatum quodcumque, sive affirmativum, sive negativum). *Atqui D continetur sub A per B determinato. Ergo ei convenit prædicatum C.* Quod si ergo propositio major sit falsa, subiecto, quod sub universali A per B determinato continetur, non convenit C (§. 476.). Quamobrem si minor fuerit vera, D continetur sub A per B determinato (§. 477.), consequenter ei prædicatum C convenire nequit (§. 508.): quod tamen ob falsam majorem eidem tribuitur. Est igitur conclusio, *ipsi D convenit prædicatum C*, falsa (§. 476.).

Conclusio syllogismi categorici quando falsa.

E. gr. Si quis ita argumentetur: *In omni triangulo tres anguli junctim sumti equivalent duobus rectis. Atqui triangulum sphericum est triangulum. Ergo in triangulo spherico tres anguli junctim sumti sunt æquales duobus rectis;* conclusio falsa est, quia major propositio falsa est, quæ de omni scilicet triangulo rectilineo intelligenda; minor autem propositio vera.

§. 510.

Si prædicatum in majore subiecto vel absolute, vel sub data determinatione soli competit, minor autem fuerit falsa; conclusio quoque falsa esse debet. Constat ex demonstratione theorematum præcedentis, quod omnes syllogismi categorici sub hoc catholico continen-

Casus alius.

Aa 3

tinean-

tineantur: *Quicquid sub universali A per B determinato continetur, ei convenit prædicatum C.* Sed D continetur sub A per B determinato. Ergo *ipsi D convenit prædicatum C.* Cum igitur prædicatum C non possit convenire nisi ei, quod sub universali A per B determinato continetur, *per hypoth.* ipsi D non convenit, si sub A per B determinato non continetur. Enimvero cum minor sit falsa *per hypoth.* D sub A per B determinato non continetur (§ 476.). Ipsi itaque D prædicatum C convenire nequit, consequenter conclusio in hypothesis theorematis falsa est (§. cit.).

E. gr. Si quis ita argumentatur: *Omne quadrilaterum circulo inscriptibile habet binos angulos diametraliter oppositos duobus rectis aequales.* Sed *omne trapezium parallelarum basium est quadrilaterum circulo inscriptibile.* Ergo *omne trapezium parallelarum basium habet binos angulos diametraliter oppositos duobus rectis aequales:* propositio major vera est & prædicatum soli quadrilatero circulo inscriptibili competit. Quamobrem cum minor falsa sit; falsa quoque est conclusio.

§. 511.

Quando conclusio vera ex præmissis tamen non sequitur.

Si propositio major fuerit vera, minor autem falsa, prædicatum vero conclusionis subiecto non repugnat; conclusio quidem vera esse potest; sed ex præmissis tamen non sequitur. Etenim si in syllogismo catholico: *Quicquid sub universali A per B determinato continetur, ei convenit prædicatum C.* Atqui D continetur &c. Ergo &c. minor fuerit falsa, D sub A per B determinato non continetur (§. 478.), consequenter nec vi dicti de omni & nullo eidem tribui potest prædicatum C (§. 343.), adeoque conclusio ex præmissis non sequitur (§. 348.). Quodsi tamen prædicatum subiecto non repugnat, id minime obstat, quo minus aliam ob rationem eidem conveniat (§. 377.).

E. gr. Si quis ita argumentetur: *Omnis lapis calori solis æstivo diu expositus est calidus.* Sed *hic lapis calori solis æstivo diu fuit expositus.* Ergo *hic lapis est calidus,* fueritque minor falsa, vi syllogismi presentis non sequitur, lapidem esse calidum, etsi non repugnet, eum alia de causa esse calidum, cum calorem alia ratione contrahere potuerit, v. gr. quod immersus fuerit aquæ fervidæ.

§. 512.

Quid ex falsa minore concludatur.

Quoniam conclusio vera esse potest, etsi minor falsa sit (§. 511.); *Ex minore falsa non concluditur, falsam esse conclusionem,* sed

sed tantummodo, eam ex præmissis non sequi, consequenter conclusio in medio relinquitur.

§. 513.

Si præmissa in consequentiis immediatis fuerit vera, conclusio quoque vera est. Conf. §. 430. 476.

Quando conclusio in consequentiis immediatis vera.

E, gr. Per consequentiam immediatam inferimus (§. 427.): *Quoddam triangulum est æquilaterum.* Ergo *quoddam figura æquilatera est triangulum.* Quoniam præmissa vera; conclusio quoque vera.

§. 514.

Eodem modo patet, in syllogismis hypotheticis conclusionem esse veram, si minor seu subsumentio vera. Etenim minor vel est antecedens, & conclusio consequens, (§. 381.), adeoque si in minore prædicatum convenit subiecto, prædicatum quoque eidem convenit in conclusione; vel minor est oppositum consequentis, conclusio antecedentis oppositum (§. 381. 285.), adeoque si prædicatum in consequente subiecto suo convenire nequit; nec prædicatum in conclusione eidem convenire potest.

Quando vera in hypotheticis.

§. 515.

Propositio, quæ demonstrari potest, vera est. Vid. 469.

Quoniam in demonstratione syllogismos non ingrediuntur tanquam præmissæ præter definitiones, de quibus vid. §. 211. 476. 133. axiomata, de quibus lege §. 264. 259. 476. & experientias indubitatas nisi conclusiones ex iis tanquam præmissis illatæ, adeoque veræ *per demonstrata*; Conf. §. 488. omnis propositio, quæ demonstratur, inferitur tanquam conclusio per syllogismos concatenatos, quorum præmissæ veræ sunt, consequenter & ipsa vera est (§. §. cit.).

Cur propositio vera, quæ demonstrari potest.

§. 516.

Ad verum a falso discernendum regulæ logicæ sufficiunt. Propositio cum vera sit, quæ demonstrari potest (§. 515.), verum a falso discernit, qui demonstratum esse agnoscit, prædicatum subiecto sive absolute posito, sive sub data determinatione convenire. Quoniam itaque demonstratio constat syllogismorum concatenatione, quorum præmissæ sunt definitiones, experientia indubitata, axiomata & propositiones jam demonstratæ (§. 469.); verum a falso ut quis discernere possit, facultatem habere

Regularum logicarum usus in discernendo vero a falso.

bere debet judicandi, num definitiones, quibus utimur in demonstrandis propositionibus, sint genuinæ; num experientiæ, quas sumimus, sint indubitatæ; num axiomatis nomen mereantur propositiones, quæ pro talibus venditantur; num forma syllogismorum sit genuina; denique num syllogismi inter se rite concatenentur. Enimvero Logica tradit definiendi regulas (§. 149. & seqq.), docet formam judiciorum in universum omnium (§. 195. & seqq.), quæ adeo etiam esse debet intuitivorum ab experientia derivatorum (§. 50.); inculcat discrimen inter axiomata & propositiones demonstrabiles (§. 264. 265. 267. & seqq.); delineat formam syllogismorum (§. 327. & seqq.); monstrat denique modum syllogismos concatenandi (§. 463.). Regulæ adeo logicæ sufficiunt ad verum a falso discernendum.

§. 517.

Eorundem
sufficiencia.*Non alio igitur criterio veritatis opus est (§. 516.).*

§. 518.

Idem veræ &
falsæ discrimen.

Quoniam propositioni affirmativæ veræ notio possibilis respondet, *idea* sive *notio vera* dicitur, quæ est possibilis: e contrario autem *falsæ* audit, quæ impossibilis. Atque adeo *in notione vera conjunguntur, quæ eidem subiecto una inesse possunt*. E contrario autem *in falsa conjunguntur, quæ una inesse nequeunt, seu sibi mutuo repugnant* (§. 490.).

§. 519.

Notio subiecti
in propositione
vera.

Quamobrem cum in propositionibus veris notio subiecti possibilis (§. 404. 405.); *in propositione vera notio subiecti sive absolute, sive sub data determinatione positi vera esse debet* (§. 518.).

CAPUT II. DE DEMONSTRATIONE.

§. 520.

Demonstratio
onis ostensivæ
definitio.

D*emonstratio ostensiva sive directa* est, qua ex notione subiecti colligitur, prædicatum convenire subiecto.

§. 521.

§. 521.

Demonstratio apogogica seu indirecta est, qua, posito contrario ejus, quod probari debet, tanquam vero, colligitur, quod propositioni veræ, vel notioni subjecti contradicit.

Demonstratio
apogogica dicitur

Dicitur quoque hæc demonstratio *Deductio ad absurdum* vel *impossibile*.

§. 522.

Si prædicatum subjecto absolute tribuitur, demonstrationem ostensivam conditurus 1. vel ex definitione integra format propositionem, vel ex ejus partibus plures, easque sumit tanquam propositiones minores syllogismorum. 2. Quodsi de eodem subjecto prostant axiomata, vel propositiones jam demonstratæ, non attenta definitione, hæc quoque subinde sumi possunt ut propositiones minores syllogismorum. 3. Data jam propositione minore in memoriam revocatur propositio alia, quæ terminum cum ea communem habet, atque majorem syllogismi constituit. Sicque inferitur conclusio (§. 330.). Quodsi *vi num. 1. vel 2.* plures propositiones minores fuere formatæ, plures quoque hæc ratione eliciuntur conclusiones. 4. Vel singulæ sumuntur ut præmissæ novorum syllogismorum, vel plures simul spectantur ut notio complexa formaturque inde propositio, quæ sumitur ut præmissa novi syllogismi. 5. Hisce præmissis jungitur alia ex antecedentibus nota inferiturque conclusio. Atque hac ratione adhibitis, si cubi opus fuerit, consequentiis immediatis progrediendum, donec aliquo syllogismo inferatur conclusio, quæ eadem est cum propositione demonstranda (§. 520.).

Forma demonstrationis
ostensiva: propositionis
categoricæ.

E. gr. (§. 174.) propositionem, quod *Modi definitionem ingredi nequeant*, demonstraturi, vi definitionis (§. 66.) quod *Modi sint mutabilia, quæ enti insunt, nec per essentialia determinentur*, sumimus: *Modi sunt mutabiles*. Jam recordati propositionis per se manifestæ: *Quæ mutabilia sunt, constanter non insunt*, sumta propositione priori tanquam minore, posteriori tanquam majore syllogismi, inferimus: *Modi constanter non insunt*. Quoniam porro memoriam subit propositio altera manifesta, quæ axiomatis instar haberi potest: *Quæ constanter non insunt, rebus agnoscendis atque a se invicem discernendis inservire nequeunt* (nobis enim jam res est cum rebus omni tempore discernendis); sumta conclusione anteriori pro minore, axioma pro majore syllogismi (*Logica contracta*).

Bb

fui

smi inferimus: *Modi rebus agnoscendis & a se invicem discernendis inservire nequeunt.* Jam cum definitio notarum nobis succurrit, quod sint rebus intrinseca, unde agnoscuntur & a se invicem discernuntur (§. 78.), per consequentiam immediatam inferimus: *Quod rebus agnoscendis & a se invicem discernendis inservire nequit, ex notarum numero excludendum & sumta conclusione hac pro majore, conclusione autem syllogismi anterioris pro minore novi syllogismi inferimus: Modi ex notarum numero excluduntur.* Quoniam denique recordamur propositionis antea demonstratæ (§. 150.), in definitione enumerari debent nota nec plures, nec pauciores, quam quæ ad rem definitam agnoscendam & ab aliis distinguendam sufficiunt, per consequentiam immediatam inferimus: *Quod ex notarum numero excluditur, ex definitione exulare debet.* Sumta igitur hac conclusione pro majore, anteriori autem pro minore syllogismi, tandem inferimus: *Modi ex definitione exulare debent; quæ propositio æquipollet alteri ad demonstrandum propositæ: Modi definitionem ingredi nequeunt.*

Analysis igitur logica demonstrationis hujus logicæ hæc est:

I. *Definitio.* Modi sunt mutabilia, quæ enti insunt.

Conclusio 1. Ergo per immediatam consequentiam: Modi sunt mutabiles.

II. *Axioma.* Quæ mutabilia sunt, constanter non insunt.

Conclusio 1. Modi sunt mutabiles.

Conclusio 2. Ergo Modi constanter non insunt.

III. *Axioma.* Quæ constanter non insunt, rebus agnoscendis atque a se invicem discernendis inservire nequeunt.

Conclusio 2. Modi constanter non insunt.

Conclusio 3. Ergo modi rebus agnoscendis atque a se invicem discernendis inservire nequeunt.

IV. *Definitio.* Notæ sunt rebus intrinseca, unde agnoscuntur & a se invicem discernuntur.

Conclusio 4. Ergo per immediatam consequentiam: Quod rebus agnoscendis & a se invicem discernendis inservire nequit, ex notarum numero excludendum.

V. *Conclusio 4.* Quod rebus agnoscendis & a se invicem discernendis inservire nequit, ex notarum numero excludendum.

Conclusio

Conclusio 3. Modi rebus agnoscendis & a se invicem discernendis inservire nequeunt.

Conclusio 5. Ergo Modi ex notarum numero excludendi.

VI. *Propos. dem.* In definitione enumerari debent notæ nec plures, nec pauciores, quam quæ ad rem definitam agnoscendam & ab aliis distinguendam sufficiunt.

Conclusio 6. Ergo per consequentiam immediatam; Quod ex notarum numero excluditur, ex definitione exulare debet.

VII. *Conclusio 6.* Quod ex notarum numero excluditur, ex definitione exulare debet.

Conclusio 5. Modi ex notarum numero excluduntur.

Conclusio 7. Ergo Modi ex definitione exulare debent.

VIII. *Conclusio 7.* Modi ex definitione exulare debent.

Conclusio 8. Ergo per consequentiam immediatam: Modi definitionem ingredi nequeunt.

§. 523.

Si propositio fuerit hypothetica sive formaliter talis, sive ad categoricæ formam reducta (§. 224.), demonstrationem conditurus utitur hypothesi, quemadmodum in casu præcedente definitione (§. 522.), ut nempe inde formentur judicia intuitiva, quæ tueantur vicem propositionum minorum in syllogismis primis: Quibus datis concatenationem absolvit eodem prorsus modo, quo in casu præcedente fuimus usi.

Forma demonstrationis
ostensivæ propositionis
hypotheticæ.

E. gr. Ubi demonstranda est propositio: *Si in duabus propositionibus subjectum fuerit idem terminus, eidem tamen diversæ tribuantur notiones propositiones diversæ sunt, quamvis idem sit predicatum;* ex hypothesi formatur propositio: *Subjectum propositionum est terminus idem, cui diversæ respondent notiones.* Jam cum ex antecedentibus memoriam subeat propositio: *Omni termino, cui notiones diversæ respondent, res diversæ denotantur;* sumta hac pro maiore, ista pro minore syllogismi, infertur conclusio: *Ergo subjecto propositionum res diversæ denotantur.* Unde per consequentiam immediatam infertur: *Ergo propositiones in hypothesi theorematibus diversæ habent subiecta.* Quoniam igitur porro in memoriam revocamus propositionem: *Omnes propositiones, quæ idem predicatum, sed diversa subiecta habent, sunt diversæ,* sumta hac pro

B b 2

maiore

maiore syllogismi & formata ex conclusione præcedente ac hypothesi theorematidis minore: *Propositiones duæ, quarum subiectum idem est terminus, sed cui diversa tribuuntur notiones, prædicatum vero idem, diversa habent subiecta, sed idem prædicatum: infertur tandem conclusio: Ergo propositiones istæ diversæ sunt.*

§. 524.

Forma demonstrationis
apagogica.

Propositionem aliquam ad absurdum vel impossibile reduci sumit ei contrariam tanquam veram (§. 521.) eaque utitur seu definitione atque hypothesi in demonstratione ostensiva (§. 522. 523.), ut nempe vel ipsa subeat minorem in syllogismo primo, vel inde formentur judicia intuitiva, vel per consequentiam immediatam inferantur conclusiones, quæ præbent minores in syllogismis primis: Quibus datis concatenatio syllogismorum eodem prorsus modo, quo supra (§. 522.), absolvitur, eo usque progrediendo, donec syllogismo aliquo inferatur conclusio, quæ vel hypothesi, vel definitioni subiecti, vel propositioni alicui veræ contradicit.

Ita e. gr. per indirectum demonstramus (§. 363.), *si in prima figura conclusio sit universalis, utramque etiam præmissam universalem esse debere.* Etenim sumimus 1. *maiores esse debere particulares:* quæ propositio cum sit contraria paulo ante demonstratæ (§. 361.), absque ulla statim probatione patet, eam esse falsam (§. 501.). Sumimus 2. *minorem esse debere particularem.* Jam cum memoriam subeat demonstrata in anterioribus propositio, *si alterutra præmissa particularis, conclusio quoque particularis,* per immediatam consequentiam inferimus: *Si minor particularis, conclusio particularis,* & sumta hac conclusione pro maiore, anteriore autem propositione pro minore infertur: *Conclusio est particularis:* quæ propositio hypothesi repugnat, vicujus conclusio esse debet universalis.

§. 525.

Quando Sorites demonstratio est.

Quoniam sorites resolvi potest in syllogismos categoricos ejus conditionis, ut conclusio præcedentis sit minor sequentis (§. 439.); sorites continet seriem syllogismorum inter se concatenatorum, adeoque *si in eodem non occurrat propositio, nisi ante demonstrata, vel quæ in definitionum atque axiomatum, vel experientiarum indubitatarum numero habetur; demonstratio est* (§. 469.). Vid. not. §. 437.

§. 526.

§. 526.

Quoniam demonstratio est species probationis (§. 469.), probatio vero simplex unico syllogismo absolvitur (§. 468.), evidens est, *demonstrationem quoque unico syllogismo absolvi, consequenter etiam inductione completa (§. 449.), dilemmate (§. 453.), syllogismo biformi (§. 460.) constare posse.* Multo minus itaque dubitari potest, quod *omnibus legitimis argumentandi modis in demonstratione sit locus.*

§. 527.

Si ex propositione aliqua colligitur, quod propositioni cui-dam veræ vel notioni subiecti veræ contradicit, propositio illa falsa est, ejus autem contradictoria vera. Quod propositioni veræ, vel notioni subiecti veræ contradicit, illud falsum est (§. 503.). Quoniam igitur modo argumentandi legitimo inseritur conclusio falsa, omnes præmissæ veræ esse nequeunt (§. 508.). Enimvero de omnibus præmissis, quæ aliunde sumuntur, certo constare supponimus, quod sint veræ; de sola propositione, quæ precario sumitur, id non constat: hæc igitur una falsa esse debet.

Fundamentum demonstrationis per indirectum.

Jam propositionum contradictoriarum altera necessario falsa (§. 503.). Quamobrem cum ostenderemus, falsam esse propositionem, ex qua legitima syllogismorum concatenatione, adscitis aliunde nonnisi præmissis veris, colligitur propositionis cujusdam veræ, vel notionis subiecti veræ contradictorium; illius contradictoria vera esse debet.

§. 528.

Quoniam in demonstratione apagogica ex propositione precario assumpta legitimo argumentandi modo adscitisque aliunde præmissis nonnisi evidenter veris colligitur, quod propositioni veræ, vel notioni subiecti veræ contradicit, indeque inferitur propositionis assumptæ contradictoria tanquam vera (§. 524.); quod *per indirectum demonstratur, illud verum est.*

Cur propositio vera, quæ per indirectum demonstratur.

§. 529.

Si ex propositione aliqua directe colligitur ejus contradictoria, propositio ista falsa est, hæc autem vera. Ponamus enim propositionem istam esse veram, unde ejus contradictoria directe

Quoniam contradictoriarum vera, quarum una ex altera colligitur.

colligitur. Cum vera sit propositio, quæ ex præmissis veris inferitur (§. 508.); contradictoria datæ quoque vera erit, consequenter duæ contradictoriæ possunt esse simul veræ: quod cum sit absurdum (§. 503.), propositio illa, ex qua directe colligitur ejus contradictoria, falsa esse debet (§. 527.). Quoniam itaque propositionum contradictoriarum altera necessario vera, altera necessario falsa (§. 503.), quæ autem in casu præsentis inferitur propositio est contradictoria ejus, unde inferitur, *per hypothesein*, & quam falsam esse ostendimus; eam veram esse necesse est.

E. gr. Ex motu celerrimo rotæ inferitur directe, eam motu celerrimo non moveri. Unde constat, propositionem primam: *Rota movetur motu celerrimo*, esse falsam; alteram vero: *Rota non movetur motu celerrimo*, esse veram.

§. 530.

Modus demonstrationis per indirectum singularem.

Quodsi propositionis probandæ contradictoria sumatur tanquam vera & inde directe inferatur (§. 523.) propositio probanda; hoc ipso patebit, eam esse veram (§. 529.). Habemus adeo *singularem quandam speciem demonstrationis per indirectum seu apogogicæ* (§. 521.).

§. 531.

Syllogismorum in demonstrando indispensabilis usus.

Quoniam demonstratio tam ostensiva (§. 522. 523.), quam apogogica (§. 524. 530.) continua syllogismorum omnis generis concatenatione absolvitur; *syllogismorum indispensabilis in demonstrando usus in dubium revocari nequit.*

§. 532.

Principiorum demonstrandi definitio.

Principia demonstrandi appellantur præmissæ syllogismorum, qui demonstratione concatenantur, vel ex nozione subiecti derivatæ, vel aliunde adscitæ.

§. 533.

Quænam sint principia demonstrandi.

In numerum principiorum demonstrandi non assumuntur nisi definitiones, experientiæ indubitæ, axiomata & propositiones jam demonstratæ (§. 469. 532.).

§. 534.

Scholion generale.

Fieri sæpissime solet, ut formatis judiciis intuitivis sive ex definitione, live ex hypothese propositionis, deficiant propositiones.

positiones alia, quibus majoris loco utamur ad conclusiones ex istis judiciis inferendas. Quamobrem *variis opus est artificiis, quibus propositio demonstranda reducitur ad eam formam, quæ ex nobis cognitis principiis demonstrabilis efficitur.* Equidem dubium non est, generales quasdam de his artificiis regulas præcipi posse: Sed hæc ad *Artem inveniendi* spectant, quam a Logica distinguimus. Etsi enim Logicæ in ipsa arte inveniendi multus atque præclarus sit usus, sola tamen eam minime exhaurit. Cumque nos non tradamus nisi ea, quorum rationem reddere valemus, vel quæ firma experientia nixa ad aliorum rationem reddendam serviunt, cognitioni quippe philosophicæ intenti (§. 4. *Proleg.*), regularum autem artis inveniendi generalium ratio a notionibus ontologicis & psychologicis facultatum animæ, specialium vero a principiis disciplinarum specialium pender; res ipsa minime patitur, ut de arte inveniendi in Logica dicamus, nisi quatenus ejus in eadem usus absque aliis principiis intelligi potest. Seponimus itaque ista demonstrandi artificia, quorum tamen hic mentio fieri debebat, ne tyronibus insufficientia de demonstratione tradidisse videamur, ubi *preparationem*, quæ demonstrationem præcedit, per regulas nostras non patere animadvertunt. *Preparationis* enim nomine comprehenduntur illa artificia, quibus propositio ex principiis nobis cognitis redditur demonstrabilis.

CAPUT III. DE CERTO, INCERTO ATQUE PROBABILI.

§. 335.

Si agnoscimus, propositionem esse veram, vel falsam, *propositio* dicitur nobis esse *certa*: Quod si non agnoscimus, utrum ea vera sit, an falsa, *incerta* vocatur.

Certi atque
incerti defini-
tio.

§. 336.

Quoniam notio certi atque incerti relativa est, cum respe-

Cur eadem
tum propositio

uni certa, alteri incerta.

Cur omnis
propositio, vel
vera, vel falsa.

Propositiones
a posteriori
certæ.

Propositiones
a priori certæ.

Certitudinem
excertitudo.

Demonstra-
tionis vim qui
non percipi-
ant.

Certitudo fal-
satis.

Etiam ad cognoscentem involvat; fieri potest, ut eadem propositio uni sit certa, alteri vero incerta (§. 535.).

§. 537.

Omnis propositio vel vera est, vel falsa. Falsa nimirum est propositio, quæ non est vera (§. 476.). Quamobrem cum propositiones: *Propositio A vera est* & *Propositio A non vera est*, sint contradictoriæ (§. 285.), ex duabus autem contradictoriis altera necessario vera, altera necessario falsa (§. 503.); omnis omnino propositio aut vera erit, aut falsa.

§. 538.

Si prædicatum subiecto convenire observamus, propositio nobis certa est. Conf. §. 488. 537. 535.

§. 539

Si prædicatum subiecto convenire sive directe, sive indirecte demonstrare valemus, propositio nobis certa est. Vide §. 515. 528. 537-535.

§. 540.

Quoniam demonstratio omnis, tam ostensiva (§. 522 523.), quam apogogica (§. 524. 530.) mera syllogismorum concatenatione absolvitur, non una ratione instituta, præmissæ autem omnes veræ esse debent, ut vera inferatur conclusio (§. 508.); qui demonstrationis vim percipere, seu ad assensum propositioni demonstratæ præbendum compelli debet, is & singularium præmissarum veritatem perspicere, & formam demonstrationis non modo animo comprehensam habere, sed particularem quoque, quæ ipsi occurrit, generali convenientem agnoscere tenetur.

§. 541.

Veritatis ergo propositionis demonstratæ non sunt certi, qui præmissæ vel unius syllogismos concatenatos ingredientis veritatem ignorant; 2. qui nullam demonstrationis genuinæ formam animo comprehensam habent; 3. qui non perspiciunt, num forma demonstrationis præsentis sit genuina.

§. 542.

Si quis demonstrare valet, prædicatum repugnare suo subiecto; ei propositionem esse falsam, certum est (§. 497.). Falsam igitur

igitur esse agnoscit, qui novit, verum esse, quod prædicatum notioni subiecti repugnet. Enimvero qui demonstrare valet, prædicatum subiecto suo seu notioni ejus repugnare, is novit, verum esse, quod prædicatum notioni subiecti repugnet (§. 515, 528. 535.).

propositionis
demonstratione
nixa.

§. 543.

Axiomata certa sunt, itemque postulata. Lege §. 264. 266. 476. 535.

Axiomata &
postulata cer-
ta.

§. 544.

Requisita ad veritatem appello ea, per quæ prædicatum subiecto tribuendum determinatur.

Requisitorum
ad veritatem
definitio.

E. gr. Ad vegetationem plantarum requiritur semen fecundum, terra, cui semen committitur, aer libere fluens, calor solis, pluvia atque ros. Quamobrem si noverim, semen fecundum terræ fuisse commissum in libero aëre, quo solis radii per diem pertingunt, pluviamque atque rorem alternatim terram irrigasse; omnia adesse novi, quæ ad hoc requiruntur, ut plantæ ibi locorum crescant.

§. 545.

Qui omnia requisita ad veritatem adesse agnoscit, is veritatem certo cognoscit. Conf. §. 544. 87. 484. 535.

Veritas quan-
do certo co-
gnoscatur.

E. gr. Si in moralibus vel politicis mihi fuerit perspectum, casum A per illas circumstantias determinari, atque mihi constet, omnibus istis circumstantiis hic esse locum; casui quoque A hic locum esse certo agnosco. Attento haud difficulter patet, eum, qui omnia requisita ad veritatem adesse agnoscit & inde veritatem colligit, applicare dictum de omni & nullo (§. 343. 344. 345.): quæ applicatio cum consistat in syllogismo, cujus utraque præmissa vera est, conclusio quoque ejus vera esse debet (§. 508.), consequenter syllogismus iste demonstrationis locum tuetur (§. 526.) atque adeo certam cognitionem parit (§. 539.). Syllogismus ille catholicus, cujus hic meminimus, istiusmodi est: *Ubi adsunt omnia ista requisita, ibi verum est, subiecto hoc prædicatum convenire.* Atqui hic adsunt omnia ista requisita. Ergo hic verum est, subiecto hoc prædicatum convenire.

§. 546.

Quoniam per rationem intelligimus, cur aliquid sit, (Logica contracta.) Cc *vel Rationes, cur fiat prædicatum*

conveniat sub-
jecto, quantum
sunt.

fiat (§. 3. *Proleg.*), ex iis autem, per quæ prædicatum subiecto tribuendum determinatur, agnoscitur, prædicatum subiecto convenire (§. 216.); ea, per quæ prædicatum subiecto tribuendum determinatur, sunt rationes, cur prædicatum subiecto conveniat, consequenter *singula requisita ad veritatem sunt rationes partiales, cur prædicatum subiecto conveniat, & omnia simul sumta constituunt rationem sufficientem.*

E. gr. Rationes, cur alicubi crescant plantæ, sunt, quod semen fecundum terræ fuerit commissum, quod sol calore suo terram foveat, quod pluvia terram, ros plantas irriget. Omnes rationes simul sumtæ constituunt rationem sufficientem, cur hic loci crescant plantæ.

§. 547.

Qui eas co-
gnoscat.

Hinc consequitur, *eum, qui omnia requisita ad veritatem cognoscit, rationem sufficientem cognoscere, cur prædicatum subiecto tribuendum (§. 546.).*

§. 548.

Quando ratio
insufficiens.

Quoniam omnia requisita ad veritatem simul sumta constituunt rationem sufficientem (§. 546.), *quædam eorum non nisi rationem insufficientem præbent.* Unde porro sequitur, *enim, qui aliqua tantum requisita ad veritatem cognoscit, cur prædicatum subiecto tribuendum sit, rationem insufficientem cognoscere.*

§. 549.

Probabilis
propositionis
definitio.

Si prædicatum subiecto tribuitur ob rationem insufficentem, *propositio dicitur probabilis.* Patet adeo, *in probabilis propositione prædicatum subiecto tribui ob quædam requisita ad veritatem.*

Ita qui semen fecundum in libero aëre, quo solis radii, ros atque pluvia perungere possunt, terræ committens iudicat, *plantas optime vegetatum iri;* is probabiliter iudicat, cum aliqua saltem norit ad veritatem requisita, nescius adhuc, num tempestas serena atque pluvia ita sit alternatura, quemadmodum vegetationi commodum accidit.

§. 550.

Probabilior igitur est propositio, si subiecto prædicatum tribuitur ob pluræ requisita ad veritatem, quam si tribuitur ob pauciora. Quidnam probabilius. (§. 549.).

§. 551.

Notæ definitionem ingredientibus sunt requisita ad id, ut definitum possit tribui subiecto §. 344. Requisite ad definitionem in dato casu applicandam.

§. 552.

Quod si ergo ob aliquas tantum notas in subiecto animadvertas definitum eidem tribueris, propositio non nisi probabilis est. Vid. applicatio definitionis, (§. 551. 549.).

E. gr. Notæ, quæ ingrediuntur definitionem figuræ ordinatæ, dux sunt, laterum nempe atque angulorum æqualitas. Quod si cognoscas in dato aliquo casu, figuram habere aequalia latera, ignorans vero, num æquales quoque sint anguli, ponas, *figuram esse ordinatam*; tuum de figura iudicium non nisi probabile est.

§. 553.

Quoniam per definitiones res ad suas species & genera distincte reducuntur (§. 176.), qui subiecto obvio tribuit definitum ob aliquas tantum notas, quæ definitionem ingrediuntur, in eo animadvertas, is non nisi probabiliter de specie atque genere subiecti iudicat (§. 552.). Probabile de genere & specie entis iudicium.

§. 554.

In propositionibus categoricis requisitum ad veritatem est definitio. Conf. §. 213. 222. 216. 544. Requisite ad propositionis categoricæ veritatem.

E. gr. In triangulo rectilineo tres anguli junctim sumti sunt duobus rectis æquales, ratio angulorum ad rectum prædicatur de triangulo rectilineo ob definitionem, quod terminetur tribus lineis rectis. Ut igitur figuræ tribuere possis æqualitatem omnium angulorum simul sumtorum cum duobus rectis; ante constare debet, quod tribus lineis rectis terminetur.

§. 555.

In propositionibus hypotheticis requisita ad veritatem sunt definitio atque conditio subiecto adjecta, aut in hypotheticis ad formam categoricarum reductis definitio atque determinatio subiecti. Lege §. 215. 216. 544. 224 sq. Requisite ad veritatem propositionis hypotheticæ.

E. gr. Si quadrilaterum sit circulo inscriptibile, anguli diagonaliter oppositi simul sumti sunt duobus rectis æquales. In ea ratio angulorum diagonaliter oppositorum simul ad rectum de quadrilatero prædicatur sub ea conditione, quod circulo inscribi possit. Ut adeo prædicatum tribui possit subiecto, requiritur & ut sit quadrilaterum, consequenter ut ei conveniat quadrilateri definitio (§. 344.), & ut circulo inscribibile sit.

§. 556.

Conclusio syllogismi quando probabilis.

Si in syllogismo categorico alterutra præmissarum fuerit probabilis, conclusio probabilis est. Ex (§. 509.) patet, omnes syllogismos categoricos ad hunc generalem reduci posse: *Quicquid sub universali A per B determinato continetur, ei convenit prædicatum C.* Atqui D continetur sub A per B determinato. Ergo ei convenit C. Ponamus jam maiorem non esse nisi probabilem: Ei, quod sub universali A per B determinato continetur, nonnisi probabiliter convenit prædicatum C. Quoniam igitur minor vera est per hypoth. D sub A per B determinato continetur. Ergo ei nonnisi probabiliter convenit C.

Ponamus porro, minorem non esse nisi probabilem; probabile saltem est: D contineri sub A per B determinato. Quoniam igitur, posita maiore syllogismi categorici, ponitur conclusio sub conditione minoris (§. 436.); evidens est, si minor saltem probabilis sit, nec conclusionem nisi ut probabilem admitti posse, hoc est, probabile tantum esse, quod ipsi D conveniat prædicatum C.

§. 557.

Alius casus.

Quodsi ergo hæc conclusio denuo ingreditur tanquam præmissa syllogismum alium, conclusio rursus probabilis esse debet (§. 556.). Per syllogismorum itaque concatenationem, quorum vel unum ingreditur præmissa aliqua probabilis, non infertur nisi conclusio probabilis.

§. 558.

Probationis probabilis definitio.
Differentia probationis probabilis a

Probatio hinc dicitur probabilis, si syllogismos, qui concatenantur, ingrediuntur præmissæ probabiles.

§. 559.

Probatio igitur probabilis a demonstratione non differt nisi principiis. De demonstratione conf. §. 533. 538 sq. 543. de probabili

babili probatione vide §. 532. 558. In demonstratione decere- demonstratio.
ro & in probatione probabili syllogismi inter se concatenantur tione.
(§. 469. 558.).

§. 560.

*Si notio subiecti probabilis fuerit, propositio nonnisi proba- Propositio
bilis est.* Etenim in propositionibus categoricis notionem subje- probabilis ob
cti definitio, in hypotheticis definitio cum conditione adjecta ab- notionem
solvit (§. 315. 222. 213. 215.). Jam cum & definitio, & conditio ad subiecti pro-
jecta in probatione ingrediatur syllogismos per modum præmissa- babilem.
rum, quibus rite inter se concatenatis tandem infertur propositio,
cujus subiecti notio probabilis (§. 522. 523. 524. 530. 559.); quæ
vero hoc modo infertur propositio tantum probabilis sit (§. 557.);
evidens est, propositionem nonnisi probabilem esse, si notio subje-
cti fuerit probabilis.

E. gr. Campanella Medicinal. lib. 7. c. 1. art. 2. p. 598. notionem fe-
bris probabiliter adstruit, quod sit bellum contra morbum potestativa vi
spiritus initum, seu, quod sit spontanea extraordinaria spiritus agitatio
inflammatioque ad pugnam contra irritantem morbosam causam. Omnes
igitur propositiones, in quibus de febris prædicantur, quæ per hanc notio-
nem determinantur, nonnisi probabiles sunt.

§. 561.

*Si nonnisi probabiliter constet, notionem subiecti, quæ in Applicatio
propositione certa supponitur, enti cuidam obvio convenire; præ- probabilis
dicatum illi attributum nonnisi probabiliter huic tribuitur.* Omnis propositio-
applicatio propositionum certarum in casibus obviis hoc syllo- num certa-
gismo catholico continetur: Cui convenit notio subiecti, quæ in rum.
propositione certa supponitur, isti etiam convenit prædicatum.
Atqui huic enti convenit notio subiecti, quæ in propositione certa
supponitur. Ergo huic enti etiam convenit prædicatum in propo-
sitione certa subiecto suo attributum: id quod facile patet per Di-
ctum de omni & nullo rite extensum (§. 343. & seqq.). Quodsi
igitur in casu particulari nonnisi probabiliter constet, notionem
subiecti, quæ in propositione certa supponitur, enti obvio conve-
nire, quemadmodum postulat hypothesis; minor syllogismi cat-
holici: Huic enti convenit notio subiecti, quæ in propositione

certa supponitur, nonnisi probabilis est. Cum adeo syllogismus ingreditur præmissa probabilis; conclusio; Huic enti convenit prædicatum, quod subiecto in propositione certa tribuitur, nonnisi probabilis est (§. 556.).

Quæ in moralibus atque politicis demonstrata sunt, quam sapissime nonnisi probabiliter applicari possunt in vita communi.

§. 562.

Cur propositio probabilis falsa esse possit.

Si requisita quædam ad veritatem desunt, quæ ob cetera præsentia adesse supponimus in propositione probabili; erit eadem falsa. Etenim si desunt requisita ad veritatem, non omnia adsunt, per quæ prædicatum subiecto tribuendum determinatur (§. 544.). Prædicatum igitur, quod subiecto nonnisi sub conditione horum requisitorum convenire potest (§. 216.), in præsentī casu eīdem minime convenit. Ergo vide §. 476.

§. 563.

Cur improbabili possit esse vera.

Quoniam propositioni probabili quæ opponitur propositio improbabilis est, quemadmodum veræ quæ opponitur falsa (§. 401.), cum scilicet fieri haud quaquam possit, ut utraque probabilis sit, consequenter eam simul sit & non sit; evidens est, *propositionem improbabilem posse esse veram.*

Quoniam probabilis notio relativa, quæ respectum ad cognoscentem involvit (§. 549.); evidens est, respectu ejusdem subiecti cognoscentis hic affirmari, quod fieri minime possit, ut eadem propositio sit simul & probabilis, & improbabilis.

CAPUT IV.

DE SCIENTIA, OPINIONE, FIDE ATQUE ERRORE.

§. 564.

Scientiæ definitio.

Si quis propositionem demonstrare noverit, is eam scire dicitur. Atque adeo scientia est habitus demonstrandi, quod affirmamus, vel negamus (§. 24. disc. præl.).

§. 565.

§. 565.

Scientia instructus certam habet rei cognitionem. Conf. Scientia cer-

§. 565. 539.

tain parit co-
gnitionem.

§. 566.

Quoniam scientia in numero habituum est (§. 565.), ha-
bitus vero omnis exercitio comparatur; *scientia quoque exercitio
comparari debet.* Cum itaque demonstrandi habitus sit (§. 564.),
demonstrationes autem Geometrarum omnes demonstrandi leges
adimpleant (§. 522. & seqq.); *scientiam tibi ipso usu comparabis,
si in demonstrationibus mathematicis cum attentione sedulus ver-
seris, antequam ad cognitionem veritatum aliarum progrediaris.*
Quoniam denique forma demonstrationis distincte delineatur in
Logica, nec ea sine omni Logicæ theoria intelligi potest (§. 522.
& seqq.); *ad scientiam tendens Logicæ præcepta sibi familiaria
reddere, formam demonstrationis distincte agnoscere & analysin
demonstrationum logicam instituire debet, cujus supra (loc. cit.) de-
dimus exempla.*

Quomodo sci-
entia compa-
retur.

§. 567.

Quoniam methodus philosophica, qua nos philosophi- Idem ulterius
am universam tradere constituimus, cum mathematica eadem est ostenditur.
(§. 132. *Disc. prælim.*), ut adeo quoque demonstrationes nostræ
philosophicæ eandem analysin admittant, quæ est geometrica-
rum (not. §. 522. 523. 524.); me tacente apparet, *accurata philo-
sophiæ nostræ tractatione ad scientiam perveniri, cum non modo
quoad habitum demonstrandi comparandum elementis Geome-
triæ substitui possit, verum & habitus demonstrandi effata singulis
disciplinis propria acquiratur; quod posterius a Geometria expe-
ctari non licet.*

§. 568.

Quoniam demonstratio scientiam parit (§. 564.), *ea scimus, Quantum scia-
que demonstrare valemus; quæ vero a nobis demonstrari non possunt, mus.*
eorum scientia caremus.

§. 569.

*Probatio insufficientis est, si syllogismos, qui concatenan- Probationis
tur, ingrediuntur præmissæ, de quarum veritate nondum certo insufficientis
constat: aut, si mavis, quæ nititur principiis nondum certis.* definitio.

§. 570.

Principii precarii definitio.

§. 570. *Principia*, quæ omni ratione destituta vel sine probatione sumuntur, dicuntur *precaria*.

Cur principium uni precarium alteri possit esse certum.

§. 571. Quoniam fieri potest, ut, quam unus sine probatione sumit, propositionem alter demonstrare, vel saltem probabiliter probare possit; igitur *fieri etiam potest, ut, quod uni precarium est principium, idem alteri sit certum* (§. 570. §35.).

Quoniam notio principii precarii relativa est, utpote respectum ad cognoscentem involvens (§. 570.); igitur principium precarium absolute dicitur, cujus nulla adhuc in publicum prostat demonstratio, nec probatio probabilis, aut cujus saltem probatio, quam dederat non nemo, in oblivionem adducta est. Si vero is saltem ignorat probationem, qui eodem utitur; principium precarium dicitur sensu particulari, ejus nempe, qui eodem utitur, respectu.

Opinionis definitio.

§. 572. Propositio insufficienter probata dicitur *Opinio*, quæ adeo vel *probabilis*, si probatio probabilis; vel *precaria*, si probationem ingrediuntur præmissæ precariæ, vel si probatio nititur principii precariis.

Cur unus sciat, quod alteri opinio.

§. 573. Cum non repugnet, immo ipsa experientia confirmetur, fieri posse, ut alter demonstret, quod nonnisi insufficienter alter probare valet; *fieri utique potest, ut alter sciat, quod nonnisi opinio est alteri* (§. 572.).

Cur opiniones mutabiles.

§. 574. Similiter cum opinio nitatur probatione insufficiente (§. 572.), fieri potest, ut quis agnoscat, se propositionem istam insufficienter probare, atque adeo non amplius eidem assensum præbeat. *Opiniones igitur mutabiles sunt.*

Cur falsa esse possint.

§. 575. Et quia propositio probabilis falsa esse potest (§. 562.), *opinio probabilis falsa esse potest* (§. 572.).

Hypotheses philosophicæ

§. 576. *In numerum opinionum referendæ sunt hypotheses philosophicæ.* Conf. § 120. *disc. pralim.* & §69. §72. Log.

E. gr.

E. gr. Hypothesis astronomica est motus solis circa tellurem annuus in circulo eccentrico: sumitur enim in gratiam quorundam phenomenorum; sed accurata demonstratione stabili nequit. A Logico igitur in numerum opinionum refertur.

cur sint opi-
niones.

§. 577.

Requisita ad veritatem hypotheseos philosophicæ sunt singula phenomena, quorum inderatio redditur & quæ per se invicem non determinantur. Hypothesis philosophica in se continere debet rationem phaenomenorum, quorum gratia conditur (§. 120. Disc. prælim.); adeoque requisita ad veritatem eorundem (§. 546.), consequenter ea, per quæ phaenomena determinantur (§. 544.). Quoniam itaque vicissim hypothesis per omnia phaenomena simul sumta determinatur, quorum unum non determinatur per alterum; singula ista phaenomena sunt requisita ad veritatem hypotheseos (§. cit.)

Requisita ad
veritatem hy-
potheseos.

§. 578.

Si qua hypothesis ob quodam phaenomena admittitur, erit ea opinio probabilis (§. 576 sq 549 572.): Si vero precario sumitur; probabilitatem nullam habet (§. 570. 572.).

Quænam hy-
pothesis pro-
babilis.

E. gr. Cartesius cum perpendere, duo dari corporum totalium genera, continentia & contenta, atque contenta denuo in duas abire species lucida & relucens sive opaca; triplicem materiam phaenomenis explicandis sufficere ratus est, nempe materiam subtilissimam, sive ignem elementarem, unde formata sunt corpora lucida; materiam subtilem sive ætherem, ex quo constant corpora continentia sive cæli: & materiam terrestrem, unde facta sunt corpora opaca. Opinio itaque Cartesii eam materiam diversitatem admittentis, quæ phaenomenis explicandis sufficere videtur, probabilis est.

§. 579.

Si hypothesis philosophicæ vel unum, quod observatur, phaenomenon repugnat, falsa ea est. Quoniam quæ sibi mutuo repugnant, una esse nequeunt (§. 307.), aut hypothesis est, aut phaenomenon. Sed vi observationis phaenomenon est. Ergo hypothesis non est, consequenter hypothesis falsa est (§. 478.).

Hypothesis
philosophica
quando falsa.

E. gr. Si quis sumit, solem moveri motu æquabili circa Tellurem in circulo eidem concentrico; huic de motu illius proprio hypothesis inæ-

(Logica contracta.)

Dd

quali-

qualitas ejus repugnat, quæ observatur. Atque hinc concluditur hypothesis ista falsa.

§. 580.

Hypothesis
quando im-
probabilis.

Si qua observantur phenomena, quorum ratio per hypothesin non patet, ea improbabilis est. Cum ad veritatem hypothesis requiratur, ut omnium phaenomenorum ratio inde reddi possit (§. 577.), si quæ occurrunt phaenomena, quorum ratio per hypothesin non patet, suspicio est, eam in eadem non contineri, consequenter hypothesin non esse veram. Improbabilis igitur est hypothesis (§. 549.).

Per phaenomenon intelligimus, quod esse observamus, sed cujus nonnisi confusam notionem habemus, quomodo esse possit.

§. 581.

Fidei defini-
tio.

Fides dicitur assensus, quem præbamus propositioni propter auctoritatem dicentis, ipsamque propositionem credere dicimur.

§. 582.

Objectum fi-
dei.

Qui novit formam demonstrationis cum ostensivæ (§. 522. 523.), tum apogogicæ (§. 524. 530.), is haud difficulter nobis largietur, res facti demonstrari non posse. Aut igitur admittendæ sunt tanquam probabiles ob circumstantias singulares nobis perspectas, aut credendæ. Quod enim demonstrari nequit, illud vel ratione quadam intrinseca, etsi insufficiente nititur, quo in casu tanquam probabile admittitur (§. 548 549.); vel rationem assensus nonnisi extrinsecam rei habemus, derivatam nempe ab auctoritate dicentis, quo in casu creditur (§. 581.).

§. 583.

Requisita ho-
minis fidei
digni.

Si alteri fides habenda, certi esse debemus, tum quod ipse norit veritatem ejus, quod narrat, vel asseverat, tum quod vera dicere velit.

§. 584.

Fides, quando
certa, quando
probabilis.

Quodsi probabiliter saltem noverimus, quod alteri veritas ejus, quod narrat, fuerit perspecta, vel quod vera dicere velit; fides nonnisi probabilis est: Si utrumque certo noverimus, fides quoque certa est. Dum enim alterius dictis assentimur, hoc utimur syllogismo: Quæ is narrat, qui veritatem novit eamque dicere

cere vult, ea vera sunt (§. 583.). Sed hoc is narrat, qui veritatem novit eamque dicere vult. Ergo hæc vera sunt. Quodli ergo probabiliter saltem noverimus, quod alteri veritas ejus, quod narrat, fuerit perspecta, vel quod vera dicere velit, sive alterutrum saltem, sive utrumque probabiliter tantum agnoscatur; minorem syllogismi probabilem esse pater. Conclusio igitur, quod narrans vel asseverans vera dicat, tantum probabilis est (§. 556.). Assensus igitur, qui præbetur propositioni probabilis, consequenter fides (§. 581.) tantum probabilis.

Quoniam porro constat, sicerto noverimus, narrantem, seu asseverantem & nosse, & velle dicere vera, minorem istius syllogismi veram esse debere; in eo casu conclusionem quoque veram esse manifestum est (§. 508.). Assensus igitur, qui præbetur propositioni, quam veram esse agnoscimus, certus est (§. 535.), consequenter & fides certa est (§. 581.).

§. 585.

Si quis & præsens sit, & omnibus facti circumstantiis attendat, & singula, quæ sensu assequitur, memoriæ infixæ retineat, & quæ novit verbis propriis efferre novit; is veritatem facti novit atque alteri narrare valet (§. 476.).

Requisita ad hoc, ut quis novit facti veritatem eamque alteri narrare valeat.

Enimvero qui verbis propriis efferre novit, quæ memoriæ infixæ tenet, is ad denotandas res utitur verbis, quæ iis indigendis destinantur (§. 136.), atque adeo verbis prolatis in animo audientis easdem notiones excitat, quas ipse iisdem jungit, seu quibus ipsemet factum sibi repræsentat (§. 114.). Quoniam igitur factum ita enarrare valet, ut alter idem intelligat, ac si ipsem præsens fuerit (§. 115.); veritatem quoque facti alteri narrare valet (§. 476.).

§. 586.

Qui narrat, quæ præsens sensu duce assecutus, dicitur Testis oculatus; qui vero narrat, quæ ab altero audit, Testis auritus vocatur.

Testis oculatus & auritus definitio.

§. 587.

Si testis auritus, quæ ob oculato narrari audit, qui & facti veritatem novit, & eloquitur, intelligit, memoriæ infixit & eidem infixæ verbis propriis efferre novit; testis oculato æquivaleat. Conf. §. 585. 115. 33.

Testis auritus oculato æquivalens.

Facti veritas
in animo obli-
tescata.

Quando testis
auritus ve-
ritatem facti
non assequi-
tur.

Alius casus.

Hoc vero per se patet, si & testis oculatus, & qui oculato
aequivolet auritus quoddam facti circumstantias oblivioni dederint,
in eo casu utramque facti veritatem non amplius nosse.

Si testis oculatus, qui veritatem facti novit, narrat verbis
vagis, quae sensu affectus memoria infixit; testis auritus verita-
tem facti non semper assequitur. Vid. §. 127. 113.

Si testis oculatus suum de facto iudicium cum facto confun-
dit, auritus id non advertens facti veritatem non assequitur. Su-
mit enim auritus iudicium oculati pro facto. Cum adeo non
factum norit, sed alterius de facto iudicium; ipse facti veritatem
non assequitur.

E. gr. Si quis doceat, quomodo per systema harmoniae praestabili-
ta tanquam hypothesein philosophicam explicetur commercium in-
ter mentem & corpus, eodemque non utatur tanquam principio ad
stabilienda dogmata; Lucius vero, qui sibi persuadet, systema istud
cum libertate hominis consistere non posse, factum istud narraturus
dicat, illum docere libertati contraria, vel omnem libertatem, vir-
tutem, religionem tollere; is quidem suum de facto iudicium cum
facto alterius confundit, nec ex verbis ejus facti veritatem assequi
licet.

Cur quis vera
narrare nolit.

Si quis sciens & volens falsa narrat, is vel falsa narratione
boni quidpiam consequendum intendit, vel ex vera mali quidpiam
metuit. Nos nil appetimus nisi sub ratione boni, nec quidpiam
aversamur nisi sub ratione mali. Quamobrem qui sciens ac vo-
lens falsa narrat, is quidpiam per eam intendere debet, quod
bonum reputat; vel evitare studet malum, quod ex veritate in se
proficisci posse metuit.

E. gr. Qui sensuum iudicio stant, bonum iudicare solent illud, un-
de voluptatem percipiunt. Quamobrem ubi quis voluptatem perci-
pit ex credulitate alterius; is fallendi animo narrat, quae sunt a veri-
tate aliena. Similiter placet homini, si habeatur fide dignus; displi-
cet e contrario, si dictis denegetur fides: quamobrem accidere quam
sepiissime solet, ut factum narraturus ex ingenio suppleat, quae veri-
tati,

tati, quatenus eam novit, deesse videntur, quo alter in assensum rapiatur. Obiter itaque monemus, cum notio boni sit respectiva, eam relationem involvere vel ad mentem, vel ad corpus, vel ad statum hominis externum, opes puta, honorem, personas, quæ in felicitatem nostram quomodocunque influere possunt. Quamam vero sint bona intuitu mentis, corporis atque status externi, sive vera, sive apparentia, ex philosophia practica addiscendum. Neque etiam inutile judicamus hic observasse, quod bonum sperare, vel malum metuere possimus aut a personis, quibus falsa narramus, aut ab iis, de quibus falsa narratur, aut denique ab aliis, qui vinculo quodam utrisque junguntur.

§. 592.

Si qua in narratione continentur, quæ vel sibi mutuo, vel veritati certo agnitæ repugnant; narratio illa falsa est. Ponamus enim narrationem esse veram. Tum evidens est, omnia illa, quæ narrantur, una extitisse (§. 476. & seqq.). Sed quæ sibi mutuo repugnant, ea una esse nequeunt (§. 307). Narratio igitur illa vera non est, in qua continentur, quæ sibi mutuo repugnant. Est itaque falsa (§. 537.).

Narrationis
falsæ criteri-
um intrinse-
cum.

Quodsi in narratione continentur, quæ veritati certo agnitæ repugnant, & narratio ista ponatur vera; contradictoria simul erunt vera (§. 308.): quod cum sit absurdum (§. 503.), narratio ista vera esse nequit, atque adeo denuo falsa est (§. 537.).

E. gr. Si quis dicatur autor cædis, quem alibi locorum tunc temporis fuisse constat, quo illa patrata fuit.

§. 593.

Si quis propositionem falsam pro vera habet, errare dicitur: ut adeo Error sit assensus propositioni falsæ datus.

Erroris definitio.

E. gr. Falsa est propositio. *Sol est minor Tellure.* Quodsi igitur quis eam pro vera habeat, affirmans: *Solem esse Tellure minorem,* is errat eique tribuitur error, quatenus propositioni huic assensum præbet.

§. 594.

Errans adeo affirmat, quod erat negandum; & negat, quod erat affirmandum. Vid. §. 478. 593.

Errans quid
affirmat, quid
negat.

§. 595.

Error quomodo detegatur.

Paret porro (§. 593.), errorem detegi, si ostendatur, propositionem esse falsam, cui quis præbet assensum (§. 516.).

§. 596.

Quando recta argumentandi forma in errorem deducitur.

Si major syllogismi categorici fuerit falsa & minor vera, vel si minor fuerit falsa, in majore autem prædicatum subiecto vel absolute, vel sub data determinatione soli competit; vera argumentandi forma incidimus in errorem. Etenim cum in utroque casu vera argumentandi forma inferatur conclusio falsa (§. 509.) §10.), eam tamen, propterea quod utraque præmissa nobis videatur vera, pro vera habeamus (§. 508.); utique erramus (§. 593.).

E. gr. Omne corpus opacum Sole majus, a quo illuminatur, spargit umbram calathiformem. Sed Terra est corpus opacum Sole majus, a quo illuminatur. Ergo Terra spargit umbram calathiformem; ob minorem falsam falsam infertur conclusio. Si ergo minorem quis pro vera habet; recta argumentandi via in errorem deducitur.

§. 597.

Ex uno errore quomodo sequantur plures.

Atque adeo liquet, quomodo ex uno errore sequantur plures.

§. 598.

Cur id in methodo demonstrativa obtineat.

Quoniam in demonstrationibus propositiones antecedentes ingrediuntur syllogismos, qui concatenantur, tanquam præmissæ (§. 522. & seqq.); ideo in methodo demonstrativa ex uno errore sequantur plures (§. 596.).

§. 599.

Error ex notatione deceptus ortus.

Si notionibus deceptricibus utimur tanquam veris, in errores incidimus. Conf. §. 37. Si vero iisdem utimur tanquam veris, ex iisdem perinde ac ex definitionibus veris propositiones formamus (§. 250. 251. 252.), quibus tanquam præmissis utimur in syllogismis. Propositiones istæ cum falsæ sint, conclusiones per syllogismos illatæ falsæ sunt (§. 596.): quas cum pro veris habeamus (§. 508.), evidens est, nos errare (§. 593.).

§. 600.

§. 600.

Syllogismus, cujus forma legitima, sed conclusio falsa ob præmissam falsam, *vicio materiae laborare* dicitur: ut adeo *Vitium materiae in syllogismo* sit fallitas præmissæ, quæ eum ingreditur.

Vitium materiae in syllogismo.

§. 601.

Si quæ confuse percepta eadem apparent, cum tamen diversa sint, atque ideo pro iisdem a nobis habentur; error circa iudicium intuitivum committitur. Conf. 594. Quoniam nempe hic subiecto tribuimus, quod in ipsius notione comprehensum nobis intueri videmur, iudicium intuitivum est (§. 50.). Error adeo circa iudicium intuitivum committitur.

Error circa iudicium intuitivum commissus.

E. gr. Solis figura, quam oculis usurpamus, eadem esse apparet, quæ est disci. Cum adeo figuram Solis atque disci pro eadem habentes iudicamus, Solis figuram esse disceam, errorem in iudicio intuitivo formando committimus.

§. 602.

Quoniam definitiones & iudicia intuitiva sunt principia probationis (§. 533. 467.); *qui circa notiones deceptrices* (definitionum quippe locum sustinentes) *atque iudicia intuitiva committitur error, est error circa principia commissus.*

Error circa principia.

§. 603.

Si definitio continet notas insufficientes & maior fuerit definitio interfecta; ejus applicatio errorem parit. Quoniam definitio continet notas insufficientes, per *hypoth.* quæ nec plures, nec pauciores contineri debebat, quam quæ ad rem definitam agnoscendam & ab aliis distinguendam sufficiunt (§. 150.); propositio ex inversa orta; Cui conveniunt notæ in definitione enumeratæ simul, eidem quoque convenit definitum, in præsentī casu falsa est (§. 478.). Quoniam igitur major syllogismi falsa, minor autem vera supponitur; conclusio falsa esse debet (§. 509.). Cum tamen eam, quod majorem veram supponimus defectum definitionis non agnoscimus, pro vera habeamus, in errorem incidimus (§. 593.).

Error ex definitione, quæ defectu laborat.

§. 604.

Memoriæ
quodam lapsu
quando in er-
rorem incida-
mus.

§. 604.

*Si memoriæ quodam lapsu propositionis ante eadem manda-
ta non rite recordemur, ita ut falsum pro vera accipiamus; ra-
ticipinando in errorem incidimus.* Videatur demonstrationum
forma, quam supra (§. 522.) delineavimus. Quoniam itaque
syllogismi propositio major falsa est; conclusio quoque falsa esse
debet, ut minor sit vera (§. 509.). Enimvero cum majorem pro vera
habemus lapsu memoriæ; conclusionem quoque pro vera habere
debemus (§. 508.), consequenter in errorem incidimus (§. 494.).

Non ab simili modo (§. 510.) ostenditur, quando ob mi-
norem falsam lapsu memoriæ in syllogismum introductam in er-
rorem incidamus.

E. gr. Si quis multiplicaturus 9. per 7. non recordetur, quod fa-
ctum sit 63; sed ipsi occurrat 64; tum propositio minor, hic duci de-
bere 9 in 7, vera est: sed fallit, quæ majoris locum tuetur, ex abaco
Pythagorico repetita. Quamobrem cum in facto scribamus 64 loco
63, errorem in calculo committimus.

§. 605.

Vitium formæ
in syllogismo.

Syllogismus regulis logicis contrarius dicitur *vitio formæ
laborare*, aut in *forma peccare*: ut adeo *Vitium formæ in syllogi-
smo* sit repugnantia ejus cum regulis logicis.

§. 606.

Sophismatis
& paralogi-
smi definitio.

Syllogismus, cujus forma vitiosa crypsi tegitur, dicitur
sophisma: is autem, cujus forma vitiosa crypsi nulla tegitur, *para-
logismus*.

§. 607.

Quomodo para-
logismi de-
tegantur.

Quoniam paralogismus vitio formæ laborat, quod crypsi
nulla tegitur (§. 606.), adeoque in regulas logicas syllogismorum
sive generales, sive speciales manifesto impingit; *paralogismi fa-
cile deteguntur, si forma syllogismorum secundum regulas logicas
cum generales, tum speciales examinetur*: per eas enim patebit,
cur syllogismus sit vitiosus.

E. gr. Si quis ita argumentatur: *Omne quadratum est circulo inscri-
ptibile. Atqui Nullum triangulum est quadratum. Ergo Nullum trian-
gulum est circulo inscriptibile*: Syllogismus manifesto impingit in regulam
logicam specialem, quod in prima figura, in qua syllogismus est (§. 339.),
minor semper affirmans esse debet (§. 362.).

§. 608.

§. 608.

Si terminus aliquis in una syllogismi propositione aliter sumitur, quam in altera; syllogismus in forma peccat. Etenim is re vera quatuor habet terminos. In regulam igitur syllogismi generalem impingens (§. 329.) in forma peccat (§. 605.).

Vitium forme
ex homonymia ortum.

Dici solet istiusmodi sophisma *fallacia equivocationis*, seu *homonymiæ*. E. gr. Si quis ita argumentatur: *Omne lumen potest extinguï. Intellectus est lumen. Ergo intellectus potest extinguï*; sophisma quinque terminorum condit, quo nihil concluditur ob homonymiam tum in voce *luminis*, tum in voce *extinctionis* latentem. Etenim *lumen* in maiore sumitur proprie, in minore metaphorice. Similiter *extinctio* in maiore proprie, in conclusione improprie sumitur. Neque differt ab hoc sophismate aliud, quod ex *equivocatione phrasæ* oritur: cum enim phrasîs ambigua in duabus propositionibus divertum habeat significatum, oriuntur hinc ut ante plures quam tres in syllogismo termini. E. gr. *Quicquid non est ex fide, peccatum est. Lex non est ex fide. Lex igitur peccatum est.* Quis vero non videt, terminum minorem esse *ex fide* non in eodem significato sumi in minore, quo sumitur in maiore.

§. 609.

Si quis in propositionibus, ex quibus syllogismus constat, vocem aliquam ad diversos terminos refert; syllogismus in forma peccat. Syllogismus scilicet ingrediuntur plures quam tres termini, adeoque is in regulam generalem impingit (§. 329.), consequenter in forma peccat (§. 605.).

Vitium forme
ex compositione ac divisione vocum ortum.

E. gr. Si quis ita argumentatur: *Quicumque habet potentiam scribendi, is scribere potest. Sed homo, dum legit, habet potentiam scribendi. Ergo homo potest scribere, dum legit*; syllogismus quatuor habet terminos, dum enim in minore verba, *dum legit*, ad subiectum minoris, quod *homo* est; in conclusione ad prædicatum ejus, quod est *posse scribere*, refertur; quinque oriuntur termini, qui sunt: 1. *habere potentiam scribendi*, 2. *posse scribere*, 3. *homo, qui legit*, 4. *homo simpliciter consideratus*, 5. *habere potentiam scribendi & legendi simul*. Quoniam in hoc casu conjunguntur, quæ erant disjungenda, nempe adus legendi atque scribendi simultaneus, ideo istiusmodi sophismata appellari solent *fallacia compositionis*. Quod si quis e contrario argumentetur: *Quicumque non potest scribere, ille non habet potentiam scribendi. Sed (Logica contracta.)*

Ee

homo

homo scribere non potest dum legit. Ergo homo dum legit non habet potentiam scribendi. Syllogismus denuo plures, quam tres terminos habet, eum enim ingrediuntur termini sequentes: 1. *non posse scribere*, 2. *non habere potentiam scribendi*, 3. *homo, qui legit*, 4. *homo simpliciter consideratus*, 5. *potentia scribendi legendi actui juncta*. Quoniam hic, in majore scilicet, disjunguntur quæ jungenda erant, actus nempe legendi & potentia scribendi, ideo sophisma istiusmodi dicitur *fallacia divisionis*. Istiusmodi vitium, sive fallaciæ compositionis, sive fallaciæ divisionis tribuendum fuerit, optime detegitur, si retenta conclusione sumtoque medio termino ex minore, juxta regulas syllogisticas construatursyllogismus: id quod in omni alio quocunque casu fieri consultum est.

§. 610.

Error in argumentando a specie ad genus.

Si quis generi tribuit, quod speciei qua tali convenit, sive absolute, sive sub data quadam conditione; is errat. Quoniam genus non continet, quæ uni speciei propria sunt (§. 44.), adeoque multo minus, quæ eidem nonnisi conditione quadam superaddente conveniunt; falsam majorem esse evidens est, consequenter errat, qui generi tribuit, quod speciei qua tali convenit sive absolute, sive sub data conditione (§. 594.).

E. gr. Si quis in systemate harmoniæ præstabilitæ animæ tanquam speciei spirituum tribuit impotentiam physicam movendi corpus seu, quod perinde est, si negat, animam per influxum physicum movere posse corpus, & alter inde concludit omni spiritui, consequenter etiam Deo, tribuendam esse impotentiam movendi corpus, seu negari debere, quod ullus spiritus movere queat corpus; is errat.

§. 611.

Qualis ista argumentatio sit.

Argumentatio a specie ad genus cum sit contraria Dicto de omni & nullo (§. 341 & seqq.), tanquam regulæ fundamentalis syllogismorum (§. 348.), inter eas referri meretur, quæ in forma peccant (§. 605.).

§. 612.

Argumentatio vitiosa a specie una ad alteram sub eodem genere contentam.

Si quis alteri speciei tribuit, quod uni vel absolute, vel sub data conditione convenit; is in argumentando errat. Quoniam species commune non habent, nisi quod notionem generis, sub quo continentur, ingreditur (§. 44.), quod uni absolute adeoque vi definitionis (§. 222.) convenit, alteri convenire nequit, adeoque multo

multo minus illud, quod nonnisi superaddente adhuc definitio-
ni determinatione ulteriori eidem competit.

E. gr. Si quis *animæ*, tanquam *speciei entis simplicis*, tribuit vim
quandam limitatam sibi representandi universum; perperam inde in-
fertur, quod ideo etiam *elementis rerum materialium*, tanquam *speciei
entis simplicis*, tribuat, vel tribuere debeat eandem vim representandi
universum.

§. 613.

Quod ista *argumentatio a specie una ad alteram sub eodem* Qualis sit ista
argumentatio.
genere contentam sit inter vitia formæ referenda; hoc modo o-
stendi potest. Omnes tandem syllogismi categorici ad hunc ge-
neralem reducuntur (§. 343. 344.): *Quicquid sub universali A per
B determinato continetur, ei convenit prædicatum C.* Atqui *D
continetur sub A per B determinato.* Ergo *ipsi D convenit prædi-
catum C.* Per prædicatum C autem intelligimus cum affirmati-
vum, tum negativum. Quoniam igitur syllogismus, quo a spe-
cie una ad alteram sub eodem genere contentam argumentaris,
sub catholico isto tanquam species sub suo genere non contine-
tur (§. 612.); formam genuinam habere nequit, adde etiam §. 611.
coll. §. 343.

§. 614.

*Si quis speciei tribuit, quod individuo uni vel alteri con-
venire observat; is vitiose argumentatur.* Argumentatur enim
ita: *Quod uni vel alteri individuo convenit, id integræ speciei
convenit.* Atqui *boc vel istud uni vel alteri individuo convenit.*
Ergo *boc vel istud integræ speciei convenit.* Sed hic syllogismus
non continetur sub catholico, qui omnes sub se comprehendit
(§. 613.). Vitiosus igitur est.

Argumenta-
tio vitiosa ad
speciem ab in-
dividui.

Pater idem ex fundamento inductionis superius (§. 448.)
stabilito, vi cuius speciei tribui nequit, nisi quod singulis inferio-
ribus competit.

§. 615.

*Si quis generi vel speciei, aut subjecto cuicunque absolute
tribuendum esse concludit, quod ei sub data conditione convenit;
is in argumentando errat.* Conf. §. 213. 500. 594.

E. gr. *Contingens naturaliter non potest ad alium perducı nisi per in*

Argumenta-
tio vitiosa ab
hypothetice
dicto ad abso-
lute dictum.

finitam causarum seriem; & alter inde infert, quod is statuat absolute, contingens non posse ad actum perducī nisi per infinitam causarum seriem, errorem in inferendo committit.

§. 616.

Argumentatio vitiosa
agnata.

Si quid subiecto cuicunque sub data conditione convenit & eidem sub parte istius conditionis convenire concluditur; in argumentando aberratur. Ostenditur eodem modo, quo propositio præcedens.

E. gr. Si quis ad lapidem ex quacunque altitudine cadentem & cuiusvis ponderis applicat, quæ nonnisi de lapide dati ponderis & ex data altitudine cadente intelligenda sunt; is vitiose argumentatur.

§. 617.

Argumentatio a dicto secundum quid ad dictum simpliciter.

Si prædicatum subiecto simpliciter convenire concluditur ex eo, quod eidem certo modo determinatum convenit; argumentatio vitiosa est. Applicari huc potest §. 615.).

E. gr. Si quis affirmet, *calculus differentialis esse inventum præstantissimum in Matheſi pura*, & alter inde infert, quod *ſit præstantissimum inventum simpliciter*; is vitiose argumentatur. Solent istiusmodi sophismata dici *fallacia a dicto secundum quid ad dictum simpliciter*.

§. 618.

Argumentatio a dicto simpliciter ad dictum secundum quid.

Si prædicatum aliquod subiecto simpliciter tribuitur atque ex eo concluditur, quod etiam certo modo determinatum eidem convenire debeat; argumentatio denno vitiosa. Ostenditur vitium argumentationis eodem modo, quo paulo ante (§. 615.) vitiosam esse argumentationem ab hypothetice dicto ad absolute dictum ostendimus.

E. gr. Si quis dicat, *elemosynam esse erogandam pauperi*, & alter inde inferat, quod *elemosyna danda ſit pauperi, quem eadem ad se inbriandum abuturum constat*; is vitiose argumentatur. Istiusmodi argumentatio vitiosa dicitur *fallacia a dicto simpliciter ad dictum secundum quid*.

§. 619.

Sophisma ex conversione particulariter negantis ortum.

Si quis ex eo, quod propositio particulariter negans ponitur, quæ sub universaliter negante non continetur, ejus conversam infert; is errorem committit. Qui enim ex particulariter negan-

negante, quæ sub universaliter negante non continetur, conversam ejus infert; is nititur hoc ratiocinio generali: *Omnis propositio particulariter negans, quæ sub universaliter negante non continetur, converti potest.* Sed hæc propositio est particulariter negans, nec continetur sub universaliter negante. Ergo hæc propositio potest converti. Quoniam vero particulariter negans converti quidem potest, si sub universaliter negante continetur (§. 427.), sed non in casu reliquo; major syllogismi falsa est (§. 478.), adeoque etiam falsa conclusio (§. 509.). Qui igitur in casu particulari eam admittit tanquam veram, errat (§. 593.).

E. gr. Non valet consequentia: *Quidam homo non est doctus.* Ergo *Quidam doctus non est homo.* Falsa nimirum est propositio universalis: *Nullus homo est doctus.*

§. 620.

Quodsi igitur quis ex propositione particulariter negante infert conversam ejus simpliciter, hoc est, non attendens, utrum sub universaliter negante contineatur, nec ne; *is se periculo errandi exponit.* Etenim si contingit, eam sub universaliter negante contineri, iustius incidit in propositionem veram (§. 427.); quodsi vero sub eadem non continetur, errorem committit (§. 619.). Nescius itaque vi illationis, num vera sit conclusio, quam infert, num falsa, periculo errandi sese exponit.

Periculum errandi ex conversione particulariter negantis.

§. 621.

Si quis propositionem universalem, qua attributum commune vel aliquod essentialie, aut quod per modum attributi communis esse debet, absolute prædicatur, convertit; is errat. Etenim si attributum, aut quod per modum attributi sese habet, commune est, non per omnia essentialia simul determinatur (§. 65.), adeoque prædicatum etiam aliis subiectis convenire debet, quæ essentialia ista communia habent, per quæ determinatur, hoc est, prædicatum C non comparit soli A, sed etiam ipsi B. Per se igitur patet, falsam esse propositionem: *Cui convenit C, idem est A.* Sed si propositionem hanc: *Quodcunque est A, eidem convenit C.* convertas; prodit hæc altera: *Cui convenit C,*

Error ex conversione propositionis universalis categoricæ.

id est A. Quamobrem qui eam tanquam veram admittit, errat (§. 593.).

Si aliquod essentiale de subiecto prædicatur, idem perinde ac attributum commune non soli subiecto convenit, sed aliis etiam, quæ non sunt ejusdem speciei. Unde demonstratio in hoc quoque casu adhuc subsistit.

E. gr. Si quis affirmet, *omne necessarium esse æternum*, seu *carere existendi initio atque fine*, atque alter per consequentiam immediatam inde inferat, *omne æternum esse necessarium*, is vitiose argumentatur: neque enim ex eo, quod *omne necessarium sit æternum* sequitur, *omne æternum esse necessarium*.

§. 622.

Error ex conversione propositionis hypotheticæ oritur.

Si quis propositionem universalem convertit, qua quid sub quadam conditione de subiecto prædicatur, quod etiam de aliis subiectis prædicari potest; is errat. Quoniam subiectum adjecta conditione, sub qua prædicatum ipsi convenit, ulterius determinatur; novam quandam speciem constituit ita determinatum (§. 43) & prædicatum, quod accedente hac conditione eidem competit, non tamen soli, per modum attributi communis sese habet. Propositio itaque in præsentem casu æquivalens categoricæ (§. 224), in qua de subiecto attributum commune universaliter prædicatur. Enimvero qui propositionem categoricam universaliter affirmantem convertit, in qua prædicatum est attributum commune, is errat (§. 621.). Ergo etiam errat, qui propositionem universalem convertit, qua quid sub data conditione de subiecto prædicatur, quod etiam de aliis subiectis prædicari potest.

E. gr. Si quis affirmat, *lapidem ex alto delapsum celeriter moveri*, & alter inde inferat, *quod celeriter movetur esse lapidem ex alto delapsum*, is errat, quia propositionem convertit minime convertibilem.

§. 623.

Periculum errandi ex conversione propositionis universaliter affirmantis.

Quoniam quædam propositiones universaliter affirmantes converti possunt (§. 280. & seqq.), quædam converti nequeunt (§. 621. 622.); qui ex propositione universaliter affirmante infert ideo ejus conversum, quia universaliter affirmans, tacite nimirum supponens, posita universaliter affirmante poni conversam ejus, is periculo errandi sese exponit. Vitiosa nimirum est

est argumentatio, quæ nititur canone: posita universaliter affirmante, ponitur ejus conversa (§. 621 622.): quæ cum in quibusdam casibus succedat, exemplis veris illustrari potest, adeoque ad fucum faciendum imperitis servit, consequenter *sophistica est consequentia immediata per conversionem propositionis universaliter affirmantis* (§. 606.).

E. gr. Si quis affirmet, *omne necessarium esse æternum*; sophista inde infert per consequentiam immediatam, *omne æternum esse necessarium* (§. 606. 621.). Neque enim ex eo, *quod omne necessarium est æternum*, sequitur, *omne æternum esse necessarium*; sed, si vel maxime posterius perinde ac prius esset verum, aliunde tamen idem probandum foret. Quodsi conversio vi regularum logicarum, adeoque illatio per consequentiam immediatam (§. 430.) fieri debebat, ostendendum erat, æternitatem esse attributum proprium necessitatis (§. 180.).

§. 624.

Si quis ex eo, quod prædicatum sub data conditione subiecto tribuitur, quod tamen sub alia quoque eidem convenit, infert per immediatam consequentiam propositionem, in qua prædicatum fit determinatio subiecti &c., quæ ante erat subiecti determinatio, prædicatum; is errat. Si propositio universaliter affirmans: *Omni A sub determinatione B convenit C*; idem tamen C eidem A conveniat quoque sub determinatione D; dico eum errare, qui inde per consequentiam immediatam infert: *Ergo omni A sub determinatione C convenit B*. Quodsi enim ipsi A sub determinatione non minus D, quam B convenire potest C; evidens est, si C eidem actu convenit, adesse debere vel determinationem D, vel determinationem B: si enim sola B requireretur, nec præterea D locum quoque habere posset, determinatio B foret unica: quod est *contra hypothesin*. Quamobrem si sumitur ipsi A convenire C, tribuenda eidem erit vel determinatio D, vel determinatio B. Nequaquam igitur locum habet illatio, quæ seclusa determinatione D, tribuit ipsi A tantum B propter C.

Error ex conversione propositionis determinatæ.

E. gr. Si quis argumentatur: *Lapis ex alto delapsus celeriter movetur. Ergo lapis, qui celeriter movetur, ex alto delapsus fuit*; illegitima est consequentia. Si enim lapis celeriter movetur, non necesse

cesse est, ut cadendo impetum acquisiverit; potest enim impetu a projiciente vel alio quocunque modo impresso etiam celeriter moveri.

§. 625.

Periculum errandi ex conversione propositionis determinatæ ortum.

Patet adeo, qui propositionem ita convertit, ut prædicatum fiat determinatio subiecti *§. 625* e contravio determinatio subiecti mi-gret in locum prædicati, non attendens num determinatio sit unica, sub qua prædicatum subiecto convenire potest, eum nonnisi casu in conclusionem veram incidere (§. 284.), consequenter periculo errandi sese exponere.

E. gr. Si quis videns lapidem celeriter moveri infert, eum ex alto de-lapsum fuisse, propterea quod novit, lapidem ex alto de-lapsum celeriter moveri, is periculo errandi sese exponit. Quodsi enim veritatem assequitur, id nonnisi casu contingit, propterea quod perinde fieri poterat, ut alia quacunque de causa celeriter moveretur, cum plures sint determinationes subiecti, sub quibus motus celer de eodem prædicari potest.

§. 626.

Illegitima argumentatio ex contradictione apparente vel spuria.

Si quis pro contradictoriis habet propositiones, quæ tales non sunt, atque ex veritate unius infert falsitatem alterius; is illegitime argumentatur §. 430. 503.

E. gr. In scriptura dicitur, quod Luna sit Luminare; Astronomus vero affirmat, quod Luna sit corpus opacum omni proprio lumine destitutum. Quodsi quis arbitretur duas has propositiones sibi mutuo contradicere atque supposita veritate prioris, quod Luna sit luminare, infert falsam esse posteriorem, quod Luna sit corpus opacum, omni proprio lumine destitutum, is illegitime ratiocinatur. Et in hoc quidem casu contingit, ut illegitima argumentatione in errorem incidat, cum ambæ propositiones sint simul veræ. Etenim luminare cum dicatur corpus mundi totale, quod Tellurem fortiter illuminat, ut in conspectum prodeant corpora partialia; nulla est inter Mosen atque Astronomum contradictio. Neque enim Astronomus negat, lunam Tellurem illuminare; sed negat id fieri lumine proprio.

§. 627.

Error ex contradictione ortus.

Patet similiter, a veritate aberrare, si quis vere contradictoriarum falsam pro vera habet ac inde infert falsitatem alterius §. 503. 593.

§. 628.

§. 628.

Qui propositiones pro contradictoriis habet, quæ tales Ignorantia non sunt, dicitur *ignorare elenchum*: Ut adeo Ignoratio Elenchi sit ignorantia veræ contradictionis, adeoque requisitorum ad contradictionem.

Ita sophisma ignorantia elenchi committit, qui Astronomum *opacitatem Lunæ* defendentem contradicere iudicat. *Mos* eandem *luminare* appellant: neque enim inter thesin scripturæ, quod *luna sit luminare*, & effatum Astronomi, quod sit *corpus opacum*, contradictio intercedit, cum corpus opacum possit esse luminare, si lumen aliunde acceptum reflexit.

§. 629.

Quoniam *ignoratio elenchi* committitur vel ob æquivocationem terminorum, vel ob ignorata veræ contradictionis requisita. Quomodo æquivocatur, eadem evitabitur, si in priori casu inquiretur in notationem terminorum æquivoco jungendas & ea eidem jungatur, quæ cum veritate consistit; in casu autem posteriori, si applicentur regulæ, quæ de vera oppositione (§. 286. & seqq.) atque in specie de contradictoriis propositionibus (§. 291. & seqq.) demonstrata sunt.

In exemplo modo allato (not. §. 628.) ignorantia elenchi committitur ob æquivocationem vocis *luminare*. Quoniam enim *Moses* Solem atque Lunam communi nomine *luminaria magna* appellat, Solem autem esse corpus lucidum extra omnem controversiam positum est, ideo per *luminare* videtur intelligi corpus lucidum, quod proprio lumine fulget. Enimvero cum communis luminis notio non involvat, nisi quod in tenebris latentia in conspectum producat, seu efficiat, ut ea videri possint, atque hæc notio etiam Soli ex vero respondeat; neque diversa ab ea voci *luminare* jungi potest, quando de Luna usurpatur. Sublata igitur æquivocatione & vera notione stabilita, tollitur contradictio. Contra ob ignorata veræ contradictionis requisita ignorantia elenchi committit, qui affirmantem sibi contradicere statuit, quod *imaginatio non producat ideas nisi rerum ante perceptarum* & quod ex iisdem componat ideas rerum, quas sensu nunquam attigimus. Etenim in priori casu sermo est de ideis partialibus, in posteriori autem de compositis, quæ ex partialibus constantur. De imaginatione igitur non eodem respectu dicitur, quod non producat ideas nisi rerum ante perceptarum (Logica contracta.)

Ff

cepta-

ceptarum & quod ex iisdem componat ideas rerum, quas sensu nunquam attigimus, consequenter etiam extendatur ad objecta, quæ sensu nunquam percipimus,

§. 630.

Periculum errandi ex præcipitato assensu.

Si quis assentitur propositioni, quam vel non satis intelligit, vel sufficienter probare nequit; is periculo errandi sese exponit. De priori vid. §. 115. 476. de posteriori conf. §. 508.

§. 631.

Medium evitandum periculum errandi.

Periculum adeo errandi evitaturus cavere debet, ne admittat terminos nisi accurata definitione explicatos, §. 149. seqq. nec propositiones nisi sufficienter probatas, §. 522 seqq.

SECTIO II.

DE

USU LOGICÆ IN VERITATE INVESTIGANDA.

CAPUT I.

DE EXPERIENTIA IN GENERE.

§. 632.

Institutum Auctoris.

Hic ostendemus usum, quem regulæ Logicæ in veritate nobis adhuc incognita eruenda præstant. Est enim solæ artem inveniendi totam minime exhaustiant, multas tamen veritates proprio Marte earum ope consequimur, modo iisdem rite uti didicerimus.

§. 633.

Quot duntaxat modi veritatem investigandi.

Utimur autem in veritate proprio Marte eruenda vel solo sensu, vel ex aliis cognitis ratiocinando elicimus nondum cognita. In priori casu dicimus veritatem eruere a posteriori; in posteriori autem a priori.

§. 634.

§. 634.

Experiri dicimur, quicquid ad perceptiones nostras attenti cognoscimus. Ipsa vero horum cognitio, quæ sola attentione ad perceptiones nostras patet, *experientia* vocatur.

Experiri quid dicamur.

§. 635.

Quoniam nonnisi singularia percipimus, *experientia singularium est*.

Obiectum experientiz.

§. 636.

Ad experientiam itaque provocans casum singularem asferre tenetur, nisi talis vel obvius sit, vel alteri, cum quo nobis res est, notus. Quodsi enim obvius fuerit, quilibet eadem experiri valet, quæ nos experti sumus, quandocunque ipsi libuerit, aut antea jam experta monitus in memoriam sibi revocare potest: quod posterius etiam in altero casu obtinet, ubi is, cum quo nobis res est, non destituitur experientia, ad quam provocamus.

Officium ejus, qui ad experientiam provocat.

Si experientia, ad quam provocamus, non versatur circa obvia, aut alteri, cum quo nobis res est, minime nota; nec alteri constar, quales fuerint istæ perceptiones, unde notionem generalem vel judicium intuitivum, quod experientia tuetur, derivavit; & quomodo inde notionem suam, vel judicium intuitivum derivaverit. Primum cum sit res facti, in hoc casu, ubi sola alterius relatione nobis innotescere potest, credendum (§ 582.): posterius vero ex regulis logicis dijudicandum esse liquet (§. 1.). Ne temere credendo fallamur, nostrum est inquirere, utrum, qui rem facti narrat, sit fide dignus (§. 583. & seqq.), nec ne, & num ipsa quoque, quæ narrantur, fidem mereantur (§. 592.). Ut igitur judicium fieri possit, quantum experientia alterius tribuendum sit & num is in notionibus ac judiciis intuitivis formandis rite fuerit versatus; qui ad eam provocat in casu supposito utique singularem quendam casum aut plures asferre tenetur.

§. 637.

Quoniam illud experimur, quod ad perceptiones nostras attenti cognoscimus (§. 634.); si ejus rei nullam habemus notionem, eam nos experientia cognovisse dici nequit.

Quando perperam nobis aliquid experiri videatur.

Ff 2

E. gr. inur.

E. gr. *Influxus physici animæ in corpus* nullam prorsus habemus notionem, nec, dum ad voluntatem animæ moventur organa corporis, quicquam ejus percipimus: perperam igitur dicitur, quod eundem experiamur.

§. 638.

Vitium subreptionis in experiundo.

Errorem in experiundo commissum, quo nobis videmur experiiri, quod minime experimur, dicimus *Vitium subreptionis in experiundo*.

CAPUT II.

DE FORMANDIS JUDICIIS INTUITIVIS ET NOTIONIBUS A POSTERIORI.

§. 639.

Modus perveniendi ad judicia intuitiva.

Judicia intuitiva formaturus 1. attendere debet ad ea, quæ rebus insunt, aut ad quæ quomodocunque referuntur: 2. Rem, quam percipit, porro sumere debet pro subiecto, quod vero in ea deprehendit aut relationem ejus ad alia, quam observat, pro prædicato. Ita nimirum prodit judicium intuitivum §. 197. 38. 50.

Hac ratione cognoscimus, *radios Solis calefacere, pluviam madefacere, arbores incunite vere flores protrudere, ignem urere.*

§. 640.

Modus formandi judicia negativa.

Quodsi denuo 1. rem perceptam sumamus tanquam subiectum & 2. quod vel in aliis rebus simul, aut olim perceptis, vel in eadem olim percepta deprehendimus, in illa autem non animadvertimus, tanquam prædicatum negativum; *judicium intuitivum negativum formamus*: (§. 639.).

E. gr. Si ferrum candens & non candens una contuemur, atque adeo in uno deesse animadvertimus, quod in altero deprehenditur; judicium intuitivum negativum formamus, quod *ferrum non candeat*. Sive autem ferrum candens & non candens una videamus, sive alterum videamus

videamus, alterius antea visi recordemur, perinde omnino esse nemo negabit. Nec minus patet, si diversa objecta una percipiamus, in quorum uno notatur; quod in altero non apparet; eodem modo judicia negativa formari removendo ab uno, quod alteri tantummodo inest. E. gr. Si pomum viride & prunum cœruleum una videmus, negative judicamus, *pomum non esse cœruleum & prunum non esse viride.*

§. 641.

Quodsi prædicata judiciorum intuitivorum fuerint notæ, eo ipso notionem rei perceptæ formamus distinctam. Conf. §. 38. 87.

Quando judicia intuitiva præbeant notionem distinctam.

E. gr. Si quadratum contuemur, in eo deprehendimus quatuor latera; observamus, quod singula latera sint inter se æqualia; videmus denique, omnes angulos esse actu rectos. Tria igitur formamus judicia intuitiva, 1. *Quadratum habet quatuor latera*, 2. *Quadrati latera singula sunt inter se æqualia*, 3. *Quadratum habet angulos singulos actu rectos.* Quoniam hæc judicia intervniunt ad quadratum agnoscendum & ab aliis figuris quibuscunque discernendum; prædicata eorum sunt notæ (§. 38.) atque adeo, dum eadem a se invicem distinguimus, notionem Quadrati distinctam nobis formamus.

§. 642.

Si quid uno tempore in subiecto aliquo observatur, quod alio in eodem vel altero ejusdem generis, aut speciei non deprehenditur; id inter modos generis, aut speciei illius referendum. (§. 66.)

Modi observationis.

E. gr. Quando pluit, *lapis madet*; quando tempestas minime pluvia, *lapis est siccus.* Apparet itaque *madorem* atque *siccitatem* inter modos lapidis referri debere.

§. 643.

Quoniam modus, qui actu inest, vel aliquando inerat, inesse potest, ejus possibilitas vero tanquam rei intrinseca consideratur (§. 153.); hanc inter ea, quæ enti constanter insunt, consequenter inter attributa referri debere (§. 64.) constat: Arque adeo patet, *quomodo observentur ea, quæ per modum attributorum entibus insunt.*

Observatio eorum, quæ insunt attributorum se habent.

E. gr. *Lapis non semper calidus, sed subinde frigidus.* Patet adeo, illam dispositionem, qua posita lapis calefieri & frigesceri potest, con-

Ff ;

stantes

stanter eidem inesse, aut si mavis potentiam calefendi & frigescendi attributi iustar lapidi inesse, ut omni tempore vera sit propositio: *Lapis potest calefieri, lapis potest frigesieri.*

§. 644.

Modus observandi attributa & essentialia probabilis.

Si quid in pluribus subjectis ejusdem generis, vel speciei constanter observatur, nec unquam, etsi eadem subjecta frequentis sint observationis, contrarium deprehensum; id inter attributa, vel essentialia referri debere probabilis est. §. 63. 64. 549. 449.

E. gr. Canem latrare quotidie & nos, & alii observamus, nec unquam nobis occurrit exemplum canis non latrantis. Omnem adeo canem latrare posse inductione etsi incompleta, maxime tamen probabilis colligimus. Unde potentiam latrandi inter attributa canis referimus. Quomodo omni in casu, ita quoque in presente dantur gradus probabilitatis. Etenim & numerus observatorum, & tempus, quo observationes continuatae, probabilitatem auget, ita ut instar demonstrationis assensum extorqueat.

§. 645.

Attributorum & essentialium atque modorum aliquod discrimen.

Si quid salva re ab eadem auferri non potest, id inter attributa, vel essentialia ejus referendum; contrarium vero inter modos locum habet. De priori vide §. 63. 64. de posteriori vero conf. §. 66.

E. gr. Calor a lapide auferri potest, ut tamen maneat lapis: Calor itaque inter modos lapidis refertur. Numerus ternarius angularum in figura trilatera immutari nequit, nisi eam destruere velis; ternarius adeo laterum numerus trianguli attributum est.

§. 646.

Modi observatio altera.

Quamobrem si quid a subjecto quocunque eodem salvo auferri observamus, id esse modum ejus agnoscimus.

E. gr. Sulphuris accensi halitus a violis aufertur color caeruleus.

§. 647.

Attributorum essentialium & modorum observatio.

Si quid ex contiguitate eorum, inter quae constituitur, in contiguitatem contrarium defertur, nec, quod in eo observatur, mutatur; id vel ad attributa, vel ad essentialia pertinere probabilis est; vid. §. 547. 63. 64. in casu contrario patet, quod ad modos pertineat. Vid. §. 66. 216.

E. gr.

E. gr. Si cera mollis ex aëre calido in frigidum transfertur, mollem in duram abire observamus: hinc igitur certo colligitur, *mollitiem atque duritiem inter modos cera referri debere*. Facile autem patet, nobis hic sermonem esse de iis, quæ re salva mutantur. Quodsi enim quid ex contiguitate horum corporum in contiguitatem contrariorum translatum speciem mutet, id, quod una mutatur, inter attributa locum habere potest atque inter essentialia (§ 645.). L. gr. Si glacies ex aëre frigido in calidum transfertur; durities mutatur & ex fixo corpore fit fluidum: enimvero cum glacies una destruat, hinc colligere non licet, *duritiem esse modum glaciei*. Patet porius contrarium, quod scilicet *durities sit attributum glaciei*, cum tolli ab ea non possit, nisi eadem destructa. Quodsi lapis durus ex aëre calido in frigidum, ex humido in siccum transfertur, vel etiam igni exponitur, aut in aquam demergitur; omni tamen in statu durus permanet: hinc maxima probabilitate colligitur, *duritiem inter attributa lapidis referendam esse*. Cur vero illatio non possit venditari pro apodictica, ejus rei ratio ex demonstratione patet. Immo ipsa experientia constat, dari exemplum in contrarium. Nam si vitrum rubrum, vel viride, aut alio quocunque colore infectum ex contiguitate quorumcunque corporum, quæ aliis mutationem inducere valent, in contiguitatem contrariorum deferas; non tamen ideo mutabitur color, utur constet, eum vitro salvo abesse posse, quoniam vitra dari colore minime imbuta nemo ignorat, consequenter eum inter modos vitri locum habere: quod idem etiam ex ipsa vitri genesi manifestum est. Etsi enim vera sint, quæ illatione probabiliter colliguntur; non tamen ideo veritas vi illationis probabilis perpicitur.

§. 648.

Quodsi ergo perceptio singula clare repræsentat, quæ ad rem perceptam agnoscendam & ab aliis distinguendam sufficiunt, ita ut vel peregrinis, quæ ex notione exulare debent, non sint interspersa, vel præ iis tamen magis in sensum incurrant, sensu duce notionem universalem distinctam formabis, ubi 1. tot formaveris judicia intuitiva, quot in re percepta a se invicem distincta observas (§. 639), 2. prædicata, quæ ceteris manentibus iisdem variari possunt, missa feceris, aut illa prædicata, quæ juncta ceteris in omni casu non sunt prorsus eadem, a determinationibus particularibus liberaveris: id quod efficies, si pluribus exemplis inter

Quomodo notio universalis sensu duce acquiratur.

inter se collatis attenderis, in quo conveniant, in quo a se invicem differant §. 79. 641. 53.

E. gr. Ponamus oculis objici figuram quandam regularem, *hexagonum* puta *ordinatum*. Si attendis ad ea, quæ in hac figura repræsentantur, latera & angulos distinguis. Quodsi latera numeras, numero sex deprehendis: si eadem ad te invicem referas, æqualia esse intelligis. Formas adeo judicium intuitivum primum: *Hexagonum ordinatum habet sex latera æqualia*. Eodem modo formabis judicium intuitivum secundum: *Hexagonum ordinatum habet sex angulos æquales*. Ponamus aream esse colore rubro tinctam. Erit adeo judicium intuitivum tertium: *Hexagonum hoc ordinatum habet aream colore rubro tinctam*. Quodsi jam hæc judicia inter se conferas, facile liquet, stante numero senario & æqualitate laterum atque angulorum, colore, quo area tingitur, variari posse, consequenter eum notionem minime ingredi, sed tanquam peregrinum ex eadem exulare debere. Restat igitur numerus senarius atque æqualitas laterum & angulorum, atque adeo prodit notio *hexagoni ordinati*, quod sit *figura sex lineis rectis inter se æqualibus terminata & totidem angulos inter se æquales habens*.

§. 649.

Quomodo definitiones a posteriori detegantur.

Quodsi notæ hoc modo detectæ fuerint sufficientes ad rem perceptam ab aliis distinguendam, notio sic formata erit definitio §. 150.). Unde patet, *quomodo definitiones a posteriori detegantur*.

E. c. Cum senarius laterum numerus eorundemque ac angulorum æqualitas sufficiat ad *hexagonum regulare* ab aliis figuris rectilineis quibuscunque distinguendum; notio *hexagoni regularis*, quod sit *figura (1) sex lateribus (2) æqualibus terminata & (3) æquiangula*, definitio est.

§. 650.

Quomodo notæ superflue ex definitione arceantur.

Quoniam vero in definitione non plures enumerari debent notæ, quam quæ ad rem definitam agnoscendam & ab aliis distinguendam, sufficiunt (§. 150.); ex ea exulare debent, quæ per alias eam ingredientes determinantur, consequenter quæ ideo insunt, quia insunt ceteræ (§. 216.). Quamobrem *ne superflue notæ in definitione cunulentur, inquirendum est, num*

num quibusdam positis ponantur simul aliæ superiori metodo erutæ.

E. gr. Positis tribus lateribus ad terminandum aliquod spatium, ponuntur quoque tres anguli. Sufficit itaque, ut *triangulum* definiatur per *figuram tribus lineis terminatam*, nec in definitione mentio fieri debet trium angulorum (§. 150.).

§. 651.

Quoniam notæ, quæ definitionem ingrediuntur, sæpiissime sub determinationibus particularibus atque peregrinis adeo latent, ut vix agnoscantur, ideo consultum est, ut *definitio ex uno alterove exemplo eruta cum pluribus aliis conferatur*: etenim in uno manifesta esse possunt, quæ in altero latent, aut subinde in uno minus latent, quæ in altero profundius abscondita. Immo *nec utilitate sua caret, si definitio cum exemplis agnatis*, quæ scilicet cum definito aliquid affinitatis habent, *conferatur*: ita nimirum innotescit, num forte aliquid deficiente acumine præteriverimus, quod nimis a sensu in re percepta removebatur.

Examen definitionum a posteriori reperiatur.

§. 652.

Si in re percepta non nimis multa contineantur, eorumque discrimen in sensum incurrat; singula primum sigillatim contemplatus, deinde ordinem ac nexum eorum meditatus notionem distinctam illius consequitur. Etenim si res percepta non nimis multa contineat, multitudine eorum, quæ una eidem obijciuntur, non confunditur, adeoque cum præterea eorum discrimen in sensum incurrat, singula, quæ in eadem continentur, agnoscere & cum inter se invicem, tum a re percepta distingui possunt (§. 648.). Quamobrem si ad singula actu attendimus eademque cum a se invicem, tum a re percepta distinguimus, & quo ordine se invicem consequantur ac quomodo inter se cohereant dijudicemus, formati scilicet tum de iis, quæ insunt, tum de eorum ordine ac nexu judiciis intuitivis (§. 639.); notionem distinctam, quam *per demonstrata* consequi licebat, nos actu consequi patet.

Quando novæ distinctæ obtineatur.

E. gr. Inter res naturales iris figuram oculis distinctissime spectandam exhibet & colores, quibus in diversas partes distinguitur, sunt numero nonnisi quinque. Quamobrem qui ad figuram arcus attendit & quo (*Logica contracta.*)

G g

ordi-

ordine colores se invicem excipiant, perpendit; is distinctam iridis notionem consequitur.

§. 653.

Quomodo notiones adæquatas consequamur.

Quoniam notio distincta ab ita adæquatam, quamprimum singularum notarum, quæ eam ingrediuntur, notionem distinctam habuerimus (§. 94.); evidens est, *eadem methodo perveniri ad notiones adæquatas, quæ pervenitur ad distinctas* (§. 652.), si quidem rei natura tulerit.

E. gr. Singulæ molendini partes, quas in structura ipsius observamus, ita sunt comparatæ, ut ex partibus aliis minoribus componantur, quæ numero non adeo multæ sunt, ac facile solo adspectu a se invicem distinguuntur. V. gr. Rota dentata cum molarî eidem axi infixâ determinatum habet dentium numerum, quem numerando detegere licet, & earum quoque orbes, quibus dentes insiguntur, ex paucis partibus constant, tantæ quidem molis, ut nihil in iis, quod observari meretur, occurrat, quod visum effugere possit. Nec ligna transversa, quibus ad axem firmatur rota, aliter sunt comparata. Qui ergo attentionem ad contemplandam rotam affert, notionem ejus distinctam absque difficultate consequitur. Idem eodem modo patet de ceteris partibus molendini majoribus.

§. 654.

Usus microscopiorum in formandis notionibus distinctis.

Nemo ignorat, microscopiis in conspectum adduci, quæ ob parvitatem visum effugiunt. Quamobrem cum oculo armato hac ratione pateant, quæ nudo latent; *microscopiorum usu notiones distinctas eorum consequimur, quæ ob parvitatem nudo oculo nonnisi confuse, vel etiam prorsus non videntur.*

V. gr. *Scintillæ, quæ ex collisione chalybis atque silicis eliciuntur, adeo exiguæ sunt, ut oculus nudus nihil in iis distinguat. Ast per microscopium apparet, quod sint vel particule chalybis candentis, nonnullæ autem particule silicis liquefactæ & in virtum transmutatæ.* Similiter nudo oculo in semine animali nihil viventis distinguitur: ast per microscopium *semen animale innumeris animalculis plenum deprehenditur.*

§. 655.

Usus telescopiorum in formandis notionibus distinctis.

Nemo quoque ignorat, ope telescopiorum in conspectum adduci, quæ ab oculo nimis remota, vel confuse spectantur, vel prorsus non apparent. Quamobrem cum in hoc quoque casu oculo armato pateant, quæ nudo latent, *telescopiorum usu*

usu notiones distinctas eorum consequimur, quæ ab oculo nimis remotæ vel confuse spectantur, vel prorsus non apparent, siquidem telescopium satis amplificat speciem apparentem objecti.

E. gr. *Via lactea* oculo nudo confuse spectatur, ita ut nihil prorsus in eadem distinguere liceat. At per telescopium eam adspicientibus apparet, quod sit stellarum innumerarum congeries.

§. 656.

Quoniam definitio genetica sive realis modum exponit, quo res fieri potest (§. 191. 192.), ex notione autem distincta structuræ corporis organici intelligitur, quomodo id componi possit; definitio realis corporis organici invenitur, si queratur notio distincta structuræ ejusdem (§. 652.). Facile autem me non monente patet, sepius hic usui esse posse microscopia, quando nimium per microscopium videntur, quæ visu non armatum effugiunt (§. 654.).

Quomodo definitio realis corporis organici invenitur.

Exempla præbet anatomia corporis humani, nec non anatomia animalium. Præbet quoque exempla anatomia plantarum.

§. 657.

Quod si ea, quæ sunt, in oculos incurrunt, dum res quædam formatur, patet porro, nos definitionem ejus realem consequi, si attenti ad ea, quæ sunt, dum formatur, notionem geneseos distinctam nobis formamur (§. 652.).

Alius modus investigandi definitionem realem.

Hac ratione consequimur definitiones reales operum artis: nec artium manuarum tyrones alio modo nanciscuntur notiones operum perficiendorum. Similiter in naturalibus distinctam geneseos vaporum notionem consequimur, adhibitis præsertim microscopiis: quemadmodum alibi distinctius exposui sumus.

§. 658.

Quod si in re clare percepta non nisi talia continentur, quæ sensu solo distinguere in potestate hominis minime possumus; notionem sensu duce non licet consequi nisi confusam §. 652. 87.

Quando notionem non nisi confusam consequi debet.

Exemplum præsentis casus præbent colores, quos clare satis a nobis percipi constat (§. 79.), cum eos agnoscere & inter se distinguere possumus. In physicis ostendimus, notionem colorum multa involvere, quæ a se invicem distinguuntur & quorum notiones formare nobis minime impossibile. Enimvero adeo minuta sunt, ut nullo microscopio, ne quidem exquisitissimo, detegi possint. Nemo igitur solo sensu du-

Gg 2

cc

ce distinctam colorum notionem consequi valet. Notandum vero nos non absolute negare, quod colorum notionem distinctam consequi non liceat; sed id unice contendimus, solo sensuum usu eam obrineri non posse.

§. 659.

Quando in-
exercitati no-
tionem non-
nisi confusam
consequi va-
leant.

Quodsi in re clare percepta non nimis quidem multa contineantur, sed talia tamen, quæ percipienti familiaria non sunt, hoc est, cum olim perceptis parum aut nihil affinitatis habent, & ad quæ singula contemplanda ac inter se conferenda non sufficit attentio cognoscentis; notio distincta, quam consequi exercitatus potest, non est in potestate inexercitati, sed is non consequitur nisi confusam. Vid. ad §. 658.

§. 660.

Quando quis
sua culpa no-
tionem confu-
sam consequi-
tur.

Quodsi in re clare percepta non nimis multa contineantur, nec nisi talia, quæ percipienti familiaria sunt; percipiens tamen singula singulim contemplari atque eorundem ordinem ac nexum meditari negligit; notionem is tantum confusam consequitur. Demonstratio coincidit cum demonstratione anteriori (§. 658.).

§. 661.

Quando notio
sensuum usu
acquiratur in-
adæquata.

Quoniam notio distincta abit in adæquatam, quam primum singularum notarum, quæ eam ingrediuntur, notionem distinctam habuerimus (§. 94.), si, quæ hæcenus de causis confusæ notionis dicta sunt (§. 658. & seqq.), ad perceptiones partiales eorum applices, quæ in totali continentur; patebunt causæ notionum inadæquatarum sensu duce acquirarum.

§. 662.

Notio obscura
rei nimis exi-
gua, vel nimis
remota.

Si res perceptæ fuerint nimis exiguae, vel tanto intervallo a nobis remotæ, ut nihil in eo sensus distinguere valeat, nec eas a se invicem, vel ab aliis, quas memoria suggerit, discernere possit; notionem eorum nonnisi obscuram consequimur (§. 79.).

§. 663.

Notio obscura
ob peregrina-
& determina-
tiones parti-
culares.

Quodsi nota, quæ notionem rei formandam ingredi debent, sub aliis peregrinis sint quasi sepultæ, vel aliis particularibus determinationibus immerse; notionem obscuram consequuntur ii, quibus notas eruere non datum est.

§. 664.

§. 664.

Si quis rem perceptam sufficiente attentione minime contemplatur, eadem inter plura divisa; notionem ejus non consequitur, nisi obscuram (§. 79.).

Notio obscura ex defectu attentionis.

§. 665.

Si quis a re percepta una, quam contemplatur, ad aliam contemplandum animum statim divergit; notionem ejus obscuram consequitur. Hoc testatur experientia.

Notio obscura ex multitudine rerum simul perceptarum.

§. 666.

Ens, quod in se continet rationem, cur alterum existat, dicitur hujus causa.

Causæ definitio.

E. gr. Cum nihil sit sine ratione (§. 3. *Disc. pralim.*), ratio quoque dari debet, cur aqua ebulliat. Quoniam ea in ipsa aqua non datur, (alias enim semper ebulliret) extra eandem detur necesse est. Quamobrem cum ebulliat ad ignem posita, ratio ebullitionis in igne continetur. *Est igitur ignis causa ebullitionis.*

§. 667.

Si enti cuidam mutatio accedit, quam primum alteri jungitur; hoc alterum causam illius mutationis esse intelligimus (Vid. not. §. 666.). Quoniam enim ratio hujus mutationis dari debet (§. 3. *Disc. pralim.*), ea autem in ente ipso, quod mutatur, non continetur, cum alias non tunc demum accederet, quando alteri jungitur; extra eandem in alio ente detur necesse est. Observamus vero mutationem statim accidere, cum alteri jungitur altero contra absente cessare & ipsam, *per hypothesein*. Ratio igitur in ente hoc altero continetur, consequenter intelligimus, ens hoc alterum esse causam illius mutationis.

Causarum a posteriori investigatione.

§. 668.

Si vel in ente uno vel in ambobus simul, ex quorum conjunctione mutatio aliqua in uno resultat, alia quædam mutatio antegressa, sive qua ista minime fuisset subsequuta, unum non est causa mutationis alterius, nisi supposita mutatione antegressa sive in uno, sive in altero. Ponamus enim mutationem in neutro eorum, quæ conjunguntur, antegressam fuisse: non igitur amplius accidet in ente B mutatio, quæ supposita mutatione alia sive in A solo,

Cur mutationis antegressæ habenda sit ratio.

five in B & A simul evenit, *per hypotbesin*. Quoniam adeo tunc A non amplius continet rationem mutationis in B factæ, nec amplius causa illius mutationis erit (§. 666.).

E. gr. Cum aliquando vitro, in quo antea Martem vi olei vitrioli aqua temperati solveram, notabili temporis intervallo præterlapso, aquam infunderem, atque ligni *Brasiliensis* frustula iniecissem; loco coloris rubri prodit color subcæruleus, ut vitrum appareret mundum. Equidem hic constabit, *lignum Brasiliense esse causam mutati coloris*; non tamen patebat, *esse causam coloris subcærulei*: speciem enim coloris pendere a mutatione antegressa evidens erat ex eo, quod alias prodire soleat color ruber. Quodsi igitur ignarus adhuc, quinam prodire soleat color, si nulla alia causa accedat, inde intulisset, *frustula ligni Brasiliensis tingere aquam colore subcæruleo*; is in errorem incidisset (§. 594.). Apparet adeo, *ex propositione præcedente constare equidem, quod ens aliquod A sit causa mutationis in altero B factæ*; nequaquam autem, *quod sit causa unica*. Ne igitur in errorem incidamus ex eo, *quod A sit causa mutationis in B factæ*, argumentantes, *quod sit causa unica*; vi propositionis præsentis investigandum, num antea quadam præcesserit mutatio, sine qua præsens non subsequitur.

§. 669.

Error ex neglectu causarum in sensus non incurritur.

Si causæ mutationis, quam observamus, omnes in sensus minime incurrant; ea, quæ in sensus incurrit, per errorem pro causa unica habetur. Affirmatur enim, quod erat negandum, adeoque erratur (§. 594.).

§. 670.

Error ex neglecta attentione ad causas plures.

Quodsi causæ omnes in sensus incurrant, ad unum tamen tantum attentus eam pro unica habet, is denuo errat (§. 669.).

E. gr. Ubi quaritur, quænam sit causa, cur ex uno hordei, vel avenæ granulo plures progerminant arisæ: alii hanc, alii istam allegare solent. Sed re examinata deprehendes, omnes esse coniungendas.

§. 671.

Medium evitandi errorem notatur.

Ne igitur pro causa unica effectus babeas, quæ talis non est; vires causæ & quantitatem effectus metiri debes. Quodsi enim hæc istis deprehenditur æqualis, evidens est, hanc solam causam sufficere.

§. 672.

§. 672.

Ex eo, quod quædam constanter junguntur, inferri nequit, unum esse alterius causam, nisi probabiliter, quamdiu exemplum in contrarium non prostat. Quæ enim constanter junguntur, eorum vel unum est causa alterius, vel utrumque ab eadem causa, seu causis coexistentibus pendet, vel eadem fortuito junguntur. Quamobrem qui argumentatur: *A & B constanter junguntur. Ergo A est causa ipsius B;* is inferit, quæ inferri non debebant. Conclusio enim talis esse debebat: *Ergo vel A est causa ipsius B, vel A atque B a communi causa, vel causis coexistentibus pendent, vel A & B fortuito junguntur.* Quamdiu igitur non removeris, nec A atque B vel a communi causa, vel a causis coexistentibus pendere, nec fortuito congiungi; certo constare nequit, quod A sit causa ipsius B.

Quid ex eo inferri possit, quod quædam sint conjuncta.

Enimvero quoniam tamen ea constanter junguntur, quorum unum est alterius causa, ut scilicet vel una existant, vel unum alterum sequatur; ex uno autem ad veritatem requisito judicium probabile fieri potest (§. 548. 549): ex eo, quod quædam constanter conjuncta a nobis deprehendantur, inferri potest probabiliter, quod unum sit alterius causa.

Quoniam vero judicium probabile falsum esse potest (§. 562.), atque hic falsitas detegitur, quam primum vel semel observamus, A & B non esse conjuncta; ideo in præsentī casu nonnisi probabiliter colligimus, A esse causam ipsius B, quamdiu exemplum in contrarium non prostat.

Posse quædam constanter coexistere, quod a communi causa pendent, experientiam consulenti minime obscurum erit. E. gr. Reditus hirundinum & protrusio gemmarum constanter junguntur propterea quod aer ob solis ad tropicum ascensum indies fit calidior. Nemo vero affirmaverit, *gemmas ideo ab arboribus protrudi, quod hirundines redeant, aut hirundines gemmas ex arboribus protrudere.* Similiter patet, fortuito semper congiungi posse, quorum unum ab altero prorsus non pendet. E. gr. Dum incendium noctu exoritur, vigil, qui excubias agit, semper in specula constituitur: nemo autem ignorat, *vigilem non esse incendii causam.*

§. 673.

§. 673.

Error ex appa-
rentia objecto-
rum visibili-
um ortus.

Si quis judicat, res ita sese habere, prout apparent, is subinde errat. Patet enim ex Optica, res quam sæpissime aliter sese habere, quam apparent. Qui igitur in omni casu rem non aliter sese habere judicat, quam qualis apparet; is affirmat, quod erat negandum, adeoque errat (§. 594.).

E. gr. Sol apparet instar disci plani. Qui igitur judicat, figuram ejus esse disceam, is periculo errandi sese exponit & in præsentem quidem casu contingit, eum actu errare. Ex macularum enim observationibus deducitur, quod figuram habeat sphericam.

§. 674.

Quomodo is
evitetur.

Quoniam in Optica docetur, quando objecta visibilia aliter appareant, quam re ipsa sunt; *præcitantiam in judicando de rebus apparentibus*, consequenter periculum errandi, *evitatur*, *Opticorum theoremata perspecta habere debet.*

§. 675.

Judicium in-
tuitivum cate-
goricum uni-
versale.

Si ex observatione constat, prædicatum judicii intuitivi esse vel attributum, vel essenziale, vel quod per modum attributi inest (§. 643. & seqq.); *judicium intuitivum universale esse patet* (§. 254.).

E. gr. Experientia fide constat, potentiam calefendi & frigescendi attributi instar lapidi inesse (not. §. 643.). Propositiones igitur: *Lapis potest calefieri, Lapis potest frigesieri*, universales sunt. Experientia adeo debentur propositiones universales: *Omnis lapis potest calefieri, Omnis lapis potest frigesieri.*

§. 676.

Judicium in-
tuitivum hy-
potheticum
universale.

Si pluribus observationibus inter se collatis constat, positis his solis, enti cuidam convenire hunc modum; judicium, quod formatur, denuo universale est. Conf. §. 255. 215. 224.

E. gr. Si quis vel semel fuerit expertus, ex bono præsentem sibi subortum esse gaudium, atque sufficiente attentione usus didicerit hanc solam fuisse gaudii causam, non aliam; propositionem universalem esse novit, quod *bonum præsens gaudium gignat*. Etenim si contrarium aliquando accidere videatur, re explorata evidens erit, adfuisse causam contrariam, quæ impedivit, quo minus ista effectum suum fuerit consecuta.

§. 677.

§. 677.

Si pluribus observationibus inter se collatis una, vel altera occurrat, in qua posita causa non fuit subsecutus effectus, aut non facta fuit mutatio subjecti, quæ illi per alias observationes tribuitur; negandum non est, effectum illum, vel mutationem subjecti tribui debere isti causæ, antequam exploratum fuerit, an non in casu obstante adsit aliquod obstaculum, quo minus causa effectum ei convenientem, vel viribus ejus proportionatum producere possit. (§. 593.)

Præcipitantiæ in judiciis de causæ effectuum quomodo evitetur.

E. gr. Si contingat, oblato bono Sempronium minime gaudere; in obstaculum inquirenti patebit, eum vel non agnoscere bonum, quod ipsi offertur, vel idem ipsi videre exiguum, vel eundem affectu quodam contrario vehementiori corripitur, veluti quod luctui indulgeat, & si qua alia gaudii oritur obstacula esse possunt.

§. 678.

Et si igitur experientia non sit nisi singularium (§. 635.), ex his tamen, quæ a nobis demonstrata sunt, abunde liquet, dari viam vi experientiæ perveniendi ad notiones universales distinctas & adæquatas (§. 648. 652. & seqq.); immo ad ipsas definitiones (§. 649. & seqq.) atque propositiones cum categoricas (§. 675.) tum hypotheticas universales (§. 676. 677.), ut non opus sit inductione incompleta a particulari ad universali, multo minus a singulari ad universale argumentari.

Cognitio universalis a posteriori derivanda.

§. 679.

Observationes, quæ minime quotidianæ sunt, vel plura notanda offerunt, accuratissime litteris sunt consignandæ. Lima enim aliquando notiones nostræ universales & judicia opus habent (§. 648. 651. 668. &c.). Accedit quoque, quod nostra memoria labilis sit.

Cur observationes litteris consignandæ.

Accedit alia adhuc ratio, quæ idem suadet, ut, si rerum observandarum series fuerit longior, accuratior fiat observatio, attentione in eo, quod est præsens, unice defixa, quæ alias inter præsens atque præterita erat partienda.

CAPUT III.
DE FORMANDIS JUDICIIS DIS-
CURSIVIS ET DEFINITIONIBUS
A PRIORI.

§. 680.

Generum no-
tio ex notio-
nibus specie-
rum derivan-
da.

Datis notionibus specierum formatur notio generis, si i. spe-
cierum notiones inter se conferantur, ut appareat, quæ-
nam ceteris existentibus iisdem diversa sint, vel unius
tantum speciei notione data, probe perpendatur, quænam man-
entibus ceteris iisdem diversimode determinari possint: 2. omit-
tantur ea, quæ in pluribus notionibus actu diversa deprehendun-
tur, vel in una diversa ratione ceteris iisdem manentibus deter-
minari posse intelliguntur. Etenim quæ remanent, notionem
generis absolvent (§. 71.).

E. gr. Si detur *hexagonum regulare & octogonum regulare*, facile
inde derivatur notio *figuræ regularis* in genere. Quoniam enim hexago-
num regulare terminatur sex lateribus inter se æqualibus & totidem an-
gulos inter se æquales comprehendentibus; octogonum vero regulare
lateribus octo, quæ pariter inter se æqualia angulos inter se æquales com-
prehendunt, circumscribitur, ex collatione notionis utriusque apparet,
differentiam nullam adesse nisi in numero laterum. Quodsi ergo de-
terminationem numeri omittas; quæ in utraque notione remanent, ea-
dem sunt & notionem *figuræ regularis* in genere absolvent, quod nem-
pe sit *figura æquilatera & æquiangula*.

§. 681.

Generum su-
periorum no-
tio ex inferio-
rum notioni-
bus derivan-
da.

Quoniam genera inferiora perinde ac species per ea diffe-
runt, quæ ceteris existentibus iisdem diverso modo determi-
nata sunt (§. 71.), iisdem vero communia notionem generis su-
perioris constituunt (§. 45.); eodem modo notiones generum supe-
riorum a notionibus inferiorum derivantur, quo notiones generum
ex notionibus specierum repetuntur (§. 680.).

E. gr. Genera inferiora *figuræ rectilineæ* sunt *figura regulares &*
irregulares. Jam cum in regularibus latera singula singulique anguli
inter

inter se æquantur; in irregularibus & anguli, & latera inæqualia esse possint: *figura rectilinea* in genere notio obtinetur, si rationem laterum atque angulorum prorsus omittas, ut remaneat nonnisi hæc unica determinatio, quod *perimeter ex lineis rectis constet*.

§. 682.

E contrario *data notione generis formantur notiones specierum*, si i. distinguantur ea, quæ in notione generis determinata sunt, a ceteris, quæ indeterminata deprehenduntur: 2. quæ indeterminata sunt, ita determinentur, ut iis, quæ jam determinata sunt, non repugnent. Quot enim diversis modis hac ratione determinari possunt, tot obtinentur species sub genere dato contentæ. §. 44 71. 518.

Notiones specierum ex notione generis derivantur.

§. 683.

Quoniam genera inferiora superiorum respectu pro speciebus habenda sunt (§. 46. ; *data generis superioris notione formantur notiones generum inferiorum*, eodem prorsus modo, quo e notione generis inferioris species deducuntur (§. 682.).

Notiones generum inferiorum ex notione generis derivantur.

E. gr. Genus superius est *triangulum* in genere, in cujus notione numerus tantum laterum, minime autem species eorundem determinatur. Quamobrem si salvo numero ternario laterum determines speciem, v. gr. quod *latera esse debeant linea recta, vel arcus circulorum maximorum sphaera sese mutuo secantium*; duo prodeunt genera inferiora *triangulorum rectilineorum & sphaericorum*.

§. 684.

Data notione speciei unius formantur notiones specierum aliarum, si i. investigemus, quænam sint ea, quæ ceteris manentibus iisdem diversimode determinari possunt: 2. eadem aliis modis determinemus, quam in notione data determinata sunt, ita tamen ut determinationes istæ non repugnent iis, quæ in notione data non immutantur. Vide & applica demonstrationem (§. 682.).

Notio speciei ex notione aliterius derivanda.

Poterat igitur problema præsens reductione ad præcedentia ita resolveri: 1. Data notione speciei, investigetur notio generis (§. 680.). 2. Data notione generis, investigentur notiones ceterarum specierum (§. 682.).

Hoc modo ex una syllogismi specie, nempe ex prima syllogismorum figura, data eruantur species, seu figuræ syllogismorum ceterorum.

Hh 2

rum.

rum. Etenim cum in prima figura medius terminus in majore subiecti, in minore prædicati locum tueatur (§. 339.), idem autem aliter collocari possit, manentibus terminis ceteris & conclusione iisdem; mutato medii termini situ, ut idem in utraque præmissa vel subiecti, vel prædicati locum tueatur, species syllogismorum ceteræ prodeunt.

§. 685.

Notio generis inferioris unius ex notione alterius derivanda.

Quoniam genera inferiora respectu superiorum pro speciebus habentur (§. 46.); eodem modo *ex data notione generis inferioris unius eruntur notiones generum inferiorum ceterorum sub eodem superiori constitutorum.*

E. gr. *Triangulum rectilineum* est genus aliquod inferius, quod cum *curvilineo* sub eodem genere superiori, *triangulo* nempe in genere, continetur. Quodsi detur notio *trianguli rectilinei*, quod nempe sit figura tribus lineis rectis terminata; notio *trianguli curvilinei* prodit, si pro lineis rectis substituantur lineæ curvæ.

§. 686.

Modi formandi notiones.

Quoniam notiones rerum formantur ope judiciorum innotivorum de rebus sensu perceptis (§. 648.), ex notionibus specierum derivando notiones generum (§. 680.), vel ex notionibus generum inferiorum notiones generum superiorum (§. 681.); nec non ex notione generis notiones specierum (§. 682.), vel generum inferiorum (§. 683.); ex notione speciei unius notionem alterius (§. 684.), vel ex notione generis inferioris unius notionem generis inferioris alterius (§. 685.); exinde intelligitur, diversis modis *notiones universales comparari*, nimirum 1. *reflectendo super iis, quæ percipiuntur*, 2. *abstractendo communia*, quæ notionibus pluribus insunt, 3. *determinationes variabiles mutando in alias.*

Triplex adeo modus est formandi notiones *reflexio*, *abstractio* & *arbitraria determinatio*, quæ duplici modo peragitur, vel *determinando ea, quæ in notione data nondum determinata sunt*, veluti cum ex notione generis derivatur notio speciei (§. 682. 683.), vel *determinando aliter, quæ certo modo determinata sunt*, veluti cum ex notione speciei aut generis inferioris unius derivatur notio alterius (§. 684. 685.).

§. 687.

§. 687.

Notio per reflexionem formatu possibilis & vera est. Conf. §. 686. 506. 490. 518.

Cur notio per reflexionem formatu possibilis.

E. gr. Notio furis, quod sit persona auferens rem alterius infcio ac invico domino eamque suam faciens, formatur reflectendo super iis, quæ percipiuntur. Est igitur vera & possibilis.

§. 688.

Notio, quæ a possibilibus abstrahitur, possibilis est atque vera §. 686. 490. 518.

Cur notio a possibilibus abstracta possibilis.

E. gr. A notionibus trianguli rectilinei atque curvilinei abstrahi potest trianguli in genere notio, quod scilicet sit figura tribus lineis terminata. Quamobrem cum possibile sit, ut spatium comprehendatur tribus lineis rectis, nec repugnet, ut terminetur tribus lineis curvis; dubitari nequit, quod etiam verum sit in genere, idem terminari posse tribus lineis.

§. 689.

Si inter res vel olim perceptas, vel eas, quæ nunc sensui obijciuntur, talis occurrat, cui insunt, quæ in notione per arbitriam determinationem formata continentur; hanc possibilem atque veram esse intelligimus §. 506. 490. 518.

Quomodo a posteriori intelligatur, notionem per arbitriam determinationem formatam esse possibilem.

E. gr. Si quis in Politica diversas rerump. formas per arbitrias determinationes numeri personarum regentium ac potentix iisdem conferendæ condit; is singulas posibles esse probare valet, si provocat ad formas rerump. quæ vel olim floruerunt, vel hodiernum vigent, quibus notationes istæ respondent.

§. 690.

Si ex notione per arbitriam determinationem formata colligitur, quod vel eadem, vel propositioni cuidam veræ repugnat; notio illa impossibilis est atque falsa. Per se patet, omnem notionem reduci posse ad propositionem, cujus forma generalis hæc est: *Quæ in notione data conjunguntur, ea eidem subjecto una inesse possunt.* Quamobrem si ex hac propositione colligitur, quod vel notioni datæ, adeoque notioni subjecti propositionis, ad quam ista reducitur, vel propositioni cuidam veræ repugnat, quemadmodum per hypotesin fieri debet; falsa est propositio, quod eidem subjecto una inesse possint, quæ in notione data conjunguntur (§. 527.). Adde §. 307. 490. 518.

Quomodo demonstratur ejus impossibilitas.

E. gr. *Bilinei rectilinei* notio per arbitrariam determinationem formata reducitur ad hanc propositionem: *Dux lineæ rectæ spatium comprehendere possunt.* Inde autem colligitur, quod dux lineæ rectæ in duobus punctis se mutuo secare possint: quæ propositio contrariatur veræ, quod dux lineæ rectæ sese non secant nisi in unico puncto. Atque ideo patet, bilinei rectilinei notionem impossibilem esse ac falsam.

§. 691.

Quomodo e-
jus possibilitas
per indire-
ctum demon-
stratur.

Si ex contrario notionis per arbitrariam determinationem formata colligitur, quod propositioni cuidam veræ repugnat; notio illa possibilis est atque vera. Etenim cum notio omnis ad hanc propositionem revocari possit: *Quæ in notione data conjunguntur, ea eidem subiecto inesse possunt*: illius contrarium, seu propositionis eidem respondentis contradictoria erit: *Quæ in notione data conjunguntur, ea eidem subiecto inesse nequeunt.* Quodsi ergo hinc inferas (§. 524.), quæ propositioni veræ repugnant, demonstratione apogogica constat, quæ in notione data conjunguntur, ea eidem subiecto inesse posse (§. 528.). Constat ergo, notionem esse possibilem (§. 490.), consequenter etiam veram (§. 518.).

E. gr. Notio *trianguli rectilinei obtusanguli*, ponatur formata esse per arbitrariam determinationem, quod sit *triangulum*, in quo *angulus aliquis est obtusus*. Si ergo sumis, fieri non posse, ut spatium terminetur tribus lineis, sitque angulus in eodem obtusus; haud difficulter inde colliges, a puncto uno positione dato ad alterum positione datum non posse duci lineam rectam: quod cum repugnet postulato *Euclideo*, a quovis puncto ad quodvis punctum posse duci lineam rectam; notionem trianguli rectanguli possibilem atque veram esse constat.

§. 692.

Demonstratio
eiusdem o-
stensiva.

Si directe demonstrari potest, notionem per arbitrariam determinationem formatam non involvere contradictionem; erit ea possibilis atque vera (§. 489.).

Notio entis perfectissimi formatur per arbitrariam determinationem, aut, si mavis, compositionem. Ejus autem possibilitatem demonstramus ex eo, quod nullam contradictionem involvere possit.

§. 693.

§. 693.

Si genesis rei exponi pot. sit, cui notio convenit per arbitriam determinationem formata; notio possibilis est atque vera. Demonstratio ejusdem per genesis rei.

Conf. §. 490. 518.

E. gr. In moralibus nos virtutum notiones, quas per arbitriam determinationem formamus, possibiles esse demonstramus, ostendentes modum, quo istiusmodi habitus comparatur.

§. 694.

Ex definitione data propositiones collecturus 1. eam resolvere debet in propositiones, vel ut definitum sumatur loco subiecti & notio eidem attributa loco prædicati (§. 249.), vel ut de definito tanquam subiecto sigillatim prædicentur, quæ notio eidem attributa involvit (§. 251.), vel denique ut definitio invertatur, ponendo definitum loco prædicati & terminum complexum, qui denotat notionem ei respondentem, loco subiecti. 2. In memoriam sibi revocare tenetur propositiones alias, quæ cum formatis sic propositionibus terminum quandam communem habent. Quodsi enim tales ipsi succurrunt, conclusiones inferet ab assumtis diversas: sin minus, nullam conclusionem se ex definitione data eruere posse intelliget, solo Logicæ præsidio. 3. Data autem conclusione una ex integra definitione vel ex inversa deducta; aut pluribus datis conclusionibus ex iis propositionibus, in quibus notæ definitionem ingrediētes de definito sigillatim prædicantur, collectis, filum ratiocinationis continuandum eodem modo, quem in forma demonstrationis declaranda uberius exposuimus supra (§. 522. 523. 524. 530.).

Modus ex definitionibus deducendi conclusiones.

E. gr. Ponamus dari definitionem gaudii realem, quod nempe sit *affectus ex sensu boni presentis ortus*. Ex hac definitione formatur hæc propositio: *Qui gaudet, ille sentit bonum aliquod sibi præsens*. Jam cum memoria suggerat hanc alteram: *Qui sentit bonum aliquod sibi præsens, ille objectum præsens agnoscit idemque bonum esse judicat*. Ergo hinc inferitur conclusio: *Qui gaudet, ille objectum præsens agnoscit idemque bonum esse judicat*. Quodsi nobis porro in memoriam revocamus, quod *judicium vel verum sit, quod fertur, vel falsum*; solum ratiocinationis ulterius producturi sumimus: *judicium gaudenti de objecto præsentem, quod bonum sit, esse falsum*. Quamobrem cum porro nobis

bis

bis succurrat, eum, qui per errorem judicat, errorem suum agnoscere posse; prompta est illatio, fieri posse ut, qui gaudens per errorem judicat, obiectum præsens esse bonum, errorem agnoscat. Quodsi jam hanc conclusionem cum definitione gaudii conferas, illico patebit, cessare *nam* rationem gaudii, atque inde inferes: Si quis per errorem judicat obiectum præsens esse bonum, agnito errore cessabit gaudium. Unde porro deducitur modus gaudium alterius tollendi, si scilicet alteri persuadeas obiectum præsens non esse bonum, sed nonnisi per errorem tale haberi.

§. 695.

Modus ex data
hypothesi de-
ducendi pro-
positiones.

Quodsi ex hypothesi data, seu dato subiecto cum suis determinationibus propositiones eruendæ; hypothesei seu notione complexa, ex subiecto & ejus determinatione composita, utimur tanquam definitione in casu præcedente (§. 694), & formatis beneficio hypotheseos judiciis intuitivis eodem modo ratiocinationis filum producimus, quo idem in demonstrationum analysi (§. 523.) factum.

§. 696.

Habitus theo-
remata inve-
stigandi quo-
modo compa-
retur.

Habitus investigandi theoremata sibi comparaturus, quantum per nudam regularum logicarum applicationem licet, istiusmodi definitiones sumat, quibus 1. non multa continentur, & unde 2. istiusmodi theoremata deducuntur, quorum veritas ad examen revocari potest. Etenim si definitiones non multa contineant, in formandis judiciis intuitivis non adeo defatigabitur industria. Ubi vero propositiones ex definitionibus erutas exemplo ad examen revocare licet, illico patebit, utrum in ratiocinando legitimo modo fuerimus progressi, an vero in regulas impegerimus, aut vitium materiæ admiserimus.

§. 697.

Causæ effectui
latentis
quomodo in-
spicuum pro-
ducantur.

Si dati effectus inquirenda est causa 1. expendendum est, qualis res, quæ mutationem subiit, ante eandem fuerit, & qualis post eandemprehendatur; inde enim intelligitur, qualis actio requiratur ad mutationem, quæ facta esse supponitur, inducendam. 2. Perlustrandæ sunt res nobis notæ, ut appareat, num inter eas aliqua occurrat, a qua istiusmodi actio proficisci valer, vel an plures occurrant, quæ simul conjunctis viribus eandem

eandem edere possunt. 3. Nisi illæ fuerint solæ, a quibus istiusmodi actionem expectare licet; inquirendum an causæ illæ fuerint ibi præsentēs, ubi effectus datus fuit productus. Hac enim ratione nobis innotescere causam dati effectus, siquidem eam detegere in potestate nostra positum sit, demonstratione non est opus.

Ponamus tempore æstivo juxta fenestram radiis solis meridianis illustratam collocari *ceræ* quandam *portionem*, eandem circa vesp̄eram in *latum diductam superficiē aquabili vestitam & ligno firmissime adharentem* deprehendi. Quodsi ergo ea, quæ observas, tribus judiciis intuitivis complectaris atque ex iis ob subiectum commune compositum formes; recordatus eorum, quæ olim experientia duce tibi innotuere, quod *materiæ liquefactæ in latum deducantur superficiem aquabilem adipsantur & corporum asperorum superficiēbus firmiter adhareant*, colliges *ceram fuisse liquefactam & postea rursus indurata*. Quodsi porro experientia, quod didicisti tibi in memoriam revoces, *ceram calore liquefieri & solis æstivi radiis eandem horis meridiē proximis fuisse collustratam* constet; porro hinc concludes *solis æstivi calore ceram fuisse liquefactam*, ab ejus autem actione liberam *rursus frigefactam ac indurata* esse.

§. 698.

Datis causis atque effectu ab iisdem producto investigaturus, quid unaqueque illarum ad eundem contulerit, 1. notionem complexam, qua causæ cum effectu representantur, resolvere debet in judicia intuitiva. 2. Cetera peragenda sunt eodem modo, quo ex data hypothesi, vel definitione eruitur prædicatum subiecto tribuendum (§. 694. 695.). Etenim propositio generalis; sub qua omnes casus speciales comprehenduntur, est istiusmodi: *Si hæc causæ effectum istum producant, hoc modo ad eundem producendum concurrunt*. Perinde igitur est, ac si ex data hypothesi eruere jubearis prædicatum subiecto tribuendum.

Causarum influxus quo modo delegatur.

Experimur si vitrum exiguo collo instructum, nec aqua prorsus plenum subito invertatur, unam alteramque guttam initio delabi, deinde verone minimam quidem guttulam subsequi. Causæ hic concurrentes satis manifestæ sunt, nimirum *aër vitro inclusus & supra aquam eminens, aqua in vitro contenta, exiguum vitri orificium & aër exterius vitrum ambiens* (*Logica contracta*).

ambiens & in orificio ejus aquam contingens: quæritur vero, quomodo causæ hæ concurrant, ut obtineatur effectus observatus, scilicet *ut initio guttula quedam effluant, mox autem sistatur motus & ne minima quidem sequatur.* Judicium intuitivum primum hoc est, *aërem inclusum ejusdem esse densitatis cum externo, dum vitrum invertitur.* Recordati igitur, *aërem ejusdem densitatis cum externo habere vim elasticam ponderi atmosferico æqualem*, legitimo ratiocinio inferimus: *aerem vitro inclusum & super aqua eminentem, dum vitrum invertitur, habere vim elasticam ponderi atmosferico æqualem.* Intuentes ea, quæ in notione complexa data continentur, intelligimus, *aquam & aërem inclusum conjunctis viribus premere deorsum.* Combinantes igitur judicium hoc intuitivum cum conclusione ante reperta novum formamus judicium, quod *aër vitro inclusus & aqua in eodem contenta majore vi nitantur deorsum, quam pondus atmosfericum resistit*, seu aër externus ad orificium vitri sursum premit. Per immediatam consequentiam hinc porro inferitur, *guttam orificio proximam majore vi impelli deorsum, quam sursum.* In memoriam nobis revocantes, *si corpus aliquod viribus inæqualibus secundum contrariam directionem urgeatur, motum sequi versus eam partem, ubi minore vi urgetur*, inferimus: *guttam insinam ex vitro inverso effluere debere.* Ipso facto jam patet, primum effectum eodem prorsus modo erutum fuisse, quo supra in analysi demonstrationum ex definitione, vel hypothese data deduximus prædicatum subiecto tribuendum. Facile enim patet, si plures guttæ effluant, non alia de causa delabi secundam, vel tertiam, quam delapsa fuerat prima. Semper enim eadem redit ratio, quamdiu motus aquæ ex vitro deorsum continuatur. Quodsi eadem via ulterius progrediamur, in alteram quoque effectus observati partem incidimus, quod nempe aliquot guttis elapsis nullæ amplius sublequi debeant. Etenim attendentes ad vitri orificium angustum formamus hoc judicium intuitivum. *Vitri orificium admodum angustum est.* Recordati igitur *per vitri orificium angustum non posse simul aquam effluere & aërem ingredi super aquam ascensurum*, inferimus: *dum aqua per orificium effluit, aërem nullum in ejus locum in vitro succedere.* Hinc per consequentiam immediatam porro colligitur: *Spatium super aqua, in quo continetur aër inclusus, fieri majus.* Qui in memoriam sibi revocat, *aërem spatium liberius natum sese expandere*, inde ulterius insert: *aërem vitro inclusum sese expandere.* Cum porro recordamur, *aëris expansi vim elasticam*

ficam minui; hinc colligimus, aëris vitro inclusi elaterem fieri minorem, dum aquæ una alterave gutta ex vitro effluit. In Superioribus repereramus, elaterem aëris inclusi & vim gravitatis aquæ simul excedere vim aëris externi orificium vitri ambientis & descensui aquæ resistentis. Quodsi ergo hanc conclusionem cum anteriore conferimus, fieri posse intelligimus ut, dum aqua effluente, elater aëris vitro inclusi continuo minuitur, is tandem evadat cum gravitate aquæ elateri aëris externi æqualis: unde porro colligimus, guttum orificio proximam æqualibus viribus secundum contrariam directionem urgeri. Si jam nobis succurrat, corpus, quod æqualibus viribus secundum contrariam directionem urgetur, quiescere, inde inferimus, guttam orificio proximam quiescere debere, consequenter nullam amplius effluere. Diximus in superioribus, ut certi simus, nos effectus veram causam detexisse nec pro unica habere, quæ talis non est, vires causæ & quantitatem effectus mensurandas esse (§ 671.). Exemplo præsentem idem confirmare licet. Et enim dum in gratiam phaenomeni sumimus, fieri posse ut elater aëris inclusi, dum aqua effluente minuitur, cum gravitate aquæ simul evadat elateri externi æqualis, dubitari poterat, an eo usque minui possit. Enimvero si quis principiis aërometricis uritur, quod ponderi atmosphærico æquipolleat columna aquæ 32. pedum Rhenenorum & elater aëris minuat in ratione densitatis imminuta, is in dato quolibet casu æquilibrium elateris aëris interni inclusi gravitati aquæ juncti atque elateris externi aëris exactissime demonstrabit.

§. 699.

Quoniam methodus a nobis præscripta investigandi veritatem a priori eandem prorsus formam servat, quam demonstrationes mathematicæ & philosophicæ, immo in universum omnes tueri debent (§. 697. & seqq.); qui eadem utitur, veritates philosophicas methodo demonstrativa facile proponere aut demonstrationibus, quæ affirmat, munire poterit.

§. 700.

Definitionem nominalem conditurus 1. Ex iis prædicatis, quæ subjecto absolute tribuuntur, seligere debet, quorum unum per alterum non determinatur. 2. Rerum affirmum, hoc est, plura prædicata communia habentium prædicata cum iisdem conferre tenetur, ut constet, num omnia simul etiam rei alteri convenire queant. Etenim si ex prædicatis, quorum unum per

Quomodo ad demonstrationes extra Mathematicas perveniantur.

Modus investigandi definitiones nominales.

alterum non determinatur, tot combinat ad constituendam notionem complexam, quor simul rei alteri non conveniunt; definitio prodit nominalis. §. 246. seqq. 254. 177 - 179. 189 seq. 150. 216.

E. gr. Si quis *triangulum æquilaterum* cognoscere studet, is intelligit, de eodem prædicari & *laterum*, & *angulorum æqualitatem*. Enimvero quoniam per demonstrationes constat, angulorum æqualitatem per æqualitatem laterum determinari, ita ut repugnet latera esse æqualia & angulos inæquales; ex definitione *trianguli æquilateri* angulorum æqualitas excluditur.

§. 701.

Quando definitiones condere liceat.

Patet adeo, *definitiones nominales non posse condere, nisi ante multa rei prædicata cognoveris atque ea in essentialia, attributa & modos distinguere noveris.*

§. 702.

Modus determinandi, quod essentialia omnia sint perspecta, attributum sit proprium & communia simul soli rei conveniant.

Si ex quibusdam essentialibus, vel ex quodam attributo, vel denique ex quibusdam attributis generis rei deduci potest; ea non plura essentialia habet, quam quæ dantur, attributum unum est proprium, plura sunt attributa communia, quæ non nisi simul eidem rei conveniunt. Etenim si ex quibusdam essentialibus datis generis rei deduci potest, vi identitatis modi ex data hypothese investigandi conclusiones & modi demonstrandi (§. 697. & seqq.) demonstrari potest, rei essentialia data habenti convenire hanc generis, consequenter cum generis rei consideranda sit tanquam prædicatum tribuendum subjecto ob ista essentialia sola, alias enim ex iisdem deduci non posset, evidens est, quod plura essentialia non habeat.

Eodem prorsus modo ostenditur, quod attributum proprium sit, ex quo generis rei deducitur, & quod attributa plura data simul non nisi eidem rei conveniant, cujus generis ex iis cruitur.

E. gr. *Euclides* ex sola *laterum æqualitate* deducit *constructionem trianguli æquilateri*. Præter eam igitur determinationem essentialium triangulum istud nullam habet, quatenus nempe consideratur ut species triangulorum rectilineorum: nam numerus laterum ternarius & linearum species sunt determinationes generales.

§. 703.

§. 703.

Si ex genesi rei integra deducuntur nonnulla, quæ per se invicem non determinantur, ea essentialia omnia sunt; si unum exinde deducitur prædicatum, erit id attributum proprium; si denique ex quadam geneseos parte deducantur unum, vel aliqua, ex altera, vel ceteris aliud, vel plura alia prædicata; erunt eadem attributa communia, sed quæ simul sumta nonnisi rei datæ conveniunt. Vide denuo §. 702. 63. 65.

Modus alius
essentialia &
attributa de-
terminandi,

E. gr. Si figura quædam gigni concipitur, circuli peripheria in sex partes æquales divisa arcumque ductis subtenfis; ex hac ipsa genesi deducitur, hexagonum & æquilaterum, & æquiangulum esse debere. Quoniam tamen supposita in hexagono laterum æqualitate per eandem minime determinatur angulorum æqualitas: laterum & angulorum æqualitas inter essentialia figuræ, cujus genesis datur, referenda erit. Si quis ellipsin ex focis motu continuo generari concipit, quemadmodum in elementis Analyseos ad Geometriam sublimiorem applicatis docemus; is per hanc genesin extemplo intelligit, rectas ex utroque foco ad punctum quodcumque ellipseos ductas esse continuo axi majori æquales. Erit igitur hoc prædicatum attributum ellipseos. Si quadratum gigni concipimus, dum recta AB juxta ductum alterius rectæ AC sibi æqualis ita deorsum fertur, ut eidem continuo ad angulos rectos insistat; ex eo, quod AB alteri AC constanter ad angulos rectos insistat, adeoque ex parte geneseos, sequitur, figuram descriptam habere latera opposita parallelæ. Est igitur prædicatum hoc Quadrati attributum commune.

§. 704.

Si ex data definitione nominali realis investiganda, 1. ex ea tot formantur judicia intuitiva, quot fieri possunt, quemadmodum supra (§. 694.) docuimus. Quodsi inde nondum appareat, quænam fieri debeant, ut definitum gignatur, 2. methodo (loco citato) præscripta superius tamdiu eruuntur conclusiones, donec ad tales perventum fuerit, ex quibus intelligitur, quænam fieri debeant, ut definitum gignatur. 3. In memoriam nobis revocare tenemur res olim cognitæ visuri, num inter eas tales occurrant, a quibus ea proficisci valent, quæ ut genesis rei prodeat requiruntur.

Modus inve-
stigandi defi-
nitiones reales
ex datis nomi-
nalibus.

E. gr. Si detur definitio nominalis vaporum, quod sint particule aqueæ motu quasi spontaneo in aëre ascendentes & investigandus sit modus, quo vapores formantur; iudicium primo formamus intuitivum: vapores in aëre quasi sponte ascendunt. Quodsi nobis succurrit, omne corpus in fluido quasi sponte ascendens esse eodem specificè levius; inde inferimus: vapores aëre esse specificè leviores. Ex definitione nominali eruiamus iudicium intuitivum alterum: Vapores sunt particule aqueæ. Recordati aquam esse aëre specificè graviorem, inde colligimus: Vapores constare ex materia aëre specificè graviore. Hanc conclusionem conferentes cum conclusione anteriori, quod vapores sint aëre specificè leviores, formamus propositionem compositam, vapores constare ex materia aëre specificè graviore suntque eodem specificè leviores. Quamobrem si memoriam nostram subit propositio, quod, si corpus constans ex materia specificè graviore fluido sit eodem specificè levius, cavum esse debeat; inde ulterius colligitur: vapores esse debere cava. Quodsi porro meminerimus, corpuscula cava ex aqua formata esse bullulas; inferimus tandem: vapores bullulas esse, easque adeo exiguas, ut nudo oculo tales non appareant. Patet itaque, ut vapores generentur, formandas esse bullulas ex guttulis aqueis valde exilibus. Quamobrem ubi memoria recolimus, quænam causa guttulas in bullulas resolvere possit, atque nobis succurrit, aquam beneficio caloris aërem intus contentum rarefaciendo in bullulas resolvere, vaporum genesis caloris ope producendam concipimus, sicque definitionem vaporum realem condimus. Ex hoc exemplo apparet, quod methodus investigandi definitiones reales rerum, quæ a causis externis producuntur, coincadat cum methodo dati effectus inquirendi causas earumque concursus (§. 697. 698.), quamprimum res eo perducta est, ut constet, quænam ad genesis rei requirantur.

§. 705.

Modus investigandi genesis rerum nondum cognitarum.

Si definitiones rerum, quarum nullam adhuc notionem habemus, reales inveniende, entia nobis cognita pro arbitrio combinantur & ex iis, quæ nobis de iisdem innotuerunt, colligitur eadem, quæ in antecedentibus usi sumus, methodo (§. 694. 695. 697. 698. 704.), quidnam eorum conjunctione gignatur.

Methodo hac utimur in Geometria non minus elementari, quam sublimiori ad investigandas definitiones geneticas figurarum cum superficialium, tum solidarum. Non absimili modo in Mechanicis per arbitra-

bitrariam combinationem machinarum simplicium reperiri possunt compositæ. Exempla quoque huc si elevantia suppetat Chymia, philosophia experimentalis, moralis & civilis; immo in omni artis genere exempla istiusmodi obvia sunt.

§. 706.

Quodsi talia combinentur, de quibus porum, aut nihil nobis fuerit perspectum; tentando geneses rerum deteguntur, ubi casui multa accepta ferenda esse, experientia constat.

Quando casus ad geneses rerum detegendas concurrat.

In fortuita combinatione lentis convexæ atque concavæ detectum fuit *telescopium*, quod Galileo adeo profuit in tot novitatibus cælestibus detegendis & *Dioptricam* nobis peperit veteribus mathematicis ignotam. Similiter *commixtis carbonibus, sulphure & nitro casu repertus est pulvis nitratus*, cui *Pyrotechniam & rem tormentariam* debemus. Nec alio modo inventus fuit *phosphoborus*. Plurima artificum inventa ex hoc fonte originem suam ducunt.

§. 707.

Si genesis rei per arbitrariam elementorum combinationem fuerit detecta, cogniturus utrum ea jam sit nota nec ne, & quod eidem nomen imponatur, 1. ex illa deducere debet rei attributa (§. 694.): 2. memoria recolere tenetur res sibi cognitæ ejusdem generis, ut ad earum proprietates attendenti innotescat, num inter eas aliqua occurrat, cui illa attributa conveniunt. Quoniam enim attributa ex genesis rei tota deducta, aut ex singulis ejus partibus eruta, in posteriori quidem casu simul sumta, non conveniunt, nisi rei datam genesin habenti, quemadmodum ex ante (§. 703.) demonstratis apparet; inde intelligimus, rem istam esse eandem, cujus genesin reperimus.

Quomodo detegatur, nam res, cujus genesis reperi, jam sit cognita.

Hoc modo in Geometria sublimiori ex genesis curvæ detecta eruimus aliquam ejus proprietatem: quodsi enim nobis fuerit perspecta aliqua curva, cui illa proprietas convenit, hanc eandem esse cum ea, cujus genesin deteximus, absque ulla hæsitacione inferimus. Utimur quoque in moralibus hac methodo, ubi, virtutum genesis detecta, demonstramus, quodnam iisdem nomen vulgo imponatur.

§. 708.

Quoniam formatis judiciis intuitivis sive ex definitione Car veritas (§. 694.), *latens nonnisi*

ex cognitis ratiocinando eruatur.

(§. 694.), five ex hypothesi (§. 695.), five ex effectu (§. 697.), five ex causis (§. 698.), five ex definitione nominali (§. 704.), five ex reali (§. 707.), five ex arbitrariis combinationibus (§. 705.) datis conclusiones inferri nequeunt, nisi memoria comprehensas habuerimus propositiones alias terminum commune cum istis habentes, nec filum' ratiocinationis producere licet, nisi propositiones aliæ nobis cognitæ fuerint atque perspectæ; hinc evidentissime liquet, *veritates latentes non posse erui nisi ex aliis cognitis*, ubi nempe ratiocinando, experientia inconsulta, easdem eruere decreveris.

§. 709.

Cur non omnis eas erui possit.

Sequitur inde porro, quod *veritatem latentem eruere nequeat, nisi qui eas habuerit perspectas, quæ ad formanda ratiocinia aliunde petendæ, atque easdem experiatur familiares*, ut scilicet veluti sponte succurrant, quoties iisdem habuerit opus.

§. 710.

Cur aliquis invenire possit veritatem, quam alter invenire nequit.

Si ergo duo fuerint, qui arte inveniendi possent, seu regulas hæcenus traditas dextre ad usum transferre valent, *alter vero plurimum veritatum cognitione fuerit instructus, alter pauciores noverit; qui pauciores noverit, non tot latentes detegere valet, quam qui plures noverit. Etenim ubi ille ratiocinationem ad veritatem latentem detegendam requisitam inchoare, atque continuare valet, ibidem fieri potest, ut hic eandem vel inchoare, vel inchoatam continuare nequeat.*

E gr. Si quis reddere juberetur rationem, cur *sub initium ex vitro inverso nec aqua prorsus pleno una alteraque gutta effluat, idem vero ignoret, ærem ejusdem densitatis cum externo habere vim elasticam ponderi atmosferico æqualem; ratiocinationem ad illam detegendum requisitam ne quidem inchoare valet (not. §. 698.). Quod si eandem noverit, ratiocinationem bene inchoabit: est ubi in progressu ignoraverit, aut saltem non recorderetur, si corpus aliquod viribus inæqualibus secundum contrariam directionem urgeatur, motum sequi versus eam partem, ubi minore vi urgetur, illam absolvere haud quaquam poterit (§. cit.). Contra si quis utramque propositionem noverit, is ratiocinationem & inchoabit, & absolveret.*

§. 711.

§. 711.

Hinc porro sequitur, *inventorem in uno scientiarum genere, v. gr. in Mathesi, non ideo posse inventorem agere in altero* (§. 709.)

Inventor in n. no genere scientiarum cur non idem sit in altero.

§. 712.

Inde tandem conficitur, *tyronem non debere inventorem agere, sed aliorum inventa primum sibi perspecta reddere. Ut vero ad veritatem proprio Marte inveniendum se praearet, applicando regulas a nobis traditas inquirere debet, quomodo illa inveniri potuerint.*

Tyronis officium in veritate investiganda.

SECTIO III.

DE

USU LOGICÆ IN LIBRIS CONSCRIBENDIS, DIJUDICANDIS ET LEGENDIS.

CAPUT I.

DE LIBRORUM DIFFERENTIA.

§. 713.

IN libris vel recensentur facta sive naturæ, sive hominum; vel proponuntur dogmata, seu veritates universales. Propositiones singulares formantur de factis naturæ atque hominum, universales vero de eo, quod rebus pluribus commune.

Differentiæ librorum sunt duæ.

§. 714.

Libri facta recensentes dicuntur historici. Et propositiones singulares, si fuerint veræ, veritatum historicarum nomine veniunt.

Librorum historicorum definitio.

(Logica contracta.)

Kk

§. 715.

§. 715.

Differentia
librorum hi-
storiarum.

Libri recensentes facta naturæ dicuntur *historiæ natura-les*; quæ describunt opera artis & artes ipsas, *historiæ arti-um*; quæ recensent facta hominum, *historiæ* absolute appel-
lantur.

§. 716.

Historiæ na-
turalis variæ
species.

Historia naturalis in varias abit partes pro diversitate ob-
jectorum, circa quæ versatur. Ita *Historia celestis* appellatur,
quæ phænomena cælestia describit. *Historia meteororum* est,
quæ meteora ex observationibus describit. *Historia anima-
lium* est, quæ animalia describit, in specie *Historia piscium*,
avium, *insectorum*, quæ de piscibus, avibus, insectis agit. *Hi-
storia morborum* est, in qua morbi, quibus corpus humanum
obnoxium est, delineantur. Pertinet huc quoque *Anatomia*,
quæ est historia structuræ corporis humani; *Botanica*, quæ est
historia plantarum; *Psychologia empirica*, quæ est historia ani-
mæ &c.

§. 717.

Experimenta,
quatenus ad
historiam na-
turalem refe-
renda.

Ad *historiam naturalem* referri quoque debent *descriptio-
nes experimentorum*, si in iis solis acquiescas, nec ulterius ad
reddendas phænomenorum rationes progrediaris, atque artificia
experimentandi una edoceas. Etenim *experimenta* versantur
circa facta naturæ, etsi nonnisi opera nostra intercedente con-
tingant. Facta autem naturæ promiscue omnia sunt historiæ
naturalis objectum (§. 715.). Quatenus vero rationes phænome-
norum redduntur, ea, quæ cum historia naturali combinantur, ad
scientiam naturalem pertinent. Artificiorum experimentandi
descriptio ad artem inveniendi spectat.

§. 718.

Historiæ arti-
um species.

Eodem modo historia artium pro diversitate objectorum
diversa fortitur nomina. Ita *Theatri machinarum* nomine vul-
go venit historia machinarum, in qua machinæ huc usque in-
ventæ & ad varios vitæ usus applicatæ describuntur. *Tot sane sunt
historiæ artium species, quot artes diversæ.*

§. 719.

Historia per eminentiam sic dicta dividitur in *civilem*, *ecclesiasticam* & *literariam*, quibus *privata* additur. *Civilis* statum & fata regnorum & rerum. atque res gestas summorum imperantium; *ecclesiastica* statum & fata ecclesiæ; *literaria* statum ac fata orbis literarii; *privata* denique facta & fata hominum privatorum describit: quo pertinent *Biographiæ*, seu vitarum descriptiones.

Historiæ per eminentiam sic dictæ species.

§. 720.

Liber dogmaticus a nobis dicitur, qui dogmata, seu veritates universales proponit.

Libri dogmatici definitio.

§. 721.

Libri dogmatici vel dogmata tantum recensent & ad summum argumenta, quibus probantur, indicant; vel eadem demonstrant, aut probant. Illos dicemus *libros dogmaticos historicos*; hos vero *libros dogmaticos scientificos*.

Librorum dogmaticorum divisio.

§. 722.

Utraque species pro diversitate objectorum, circa quæ versatur, in diversas abire species inferiores. Huc pertinent *diversæ philosophiæ partes* in discursu præliminari recensitæ. Sed a scopo nostro alienum est illam differentiam hic expendere.

Subdivisio eorundem.

CAPUT II. DE CONSCRIBENDIS LIBRIS HISTORICIS.

§. 723.

Quoniam in *historia naturali* facta naturæ describuntur (§. 715.), *finis* ejus duplex est: vel *ingenere* animo lectoris *verum naturalium notiones*, unde nobis oblata agnosci possunt; vel *imbuere eundem principiis*, quibus in *ratiociniis de rebus naturalibus* habemus opus.

Finis historiæ naturalis.

Kk 2

§. 724.

§. 724.

Finis historię
artium.

Eodem modo patet (§. 718.), duplicem hunc finem convenire quoque historię artium, ita ut autor vel intendat *avimò lectoris ingenerare rerum artificialium notiones*, unde nobis oblatæ agnosci possunt, vel *eundem imbuere principiis*, quibus de operibus artis ratiocinaturi opus habemus.

E. gr. Ponamus describi *antem typographicam*. Aut igitur acquiescimus in describendo omni apparatu, quibus typothetæ & typographi habent opus, ut is agnosci & ab aliis rebus artificialibus distingui possit; vel simul explicamus principia, quæ de opere typographorum judicaturis utilia sunt.

§. 725.

Historię civi-
lis finis.

Quoniam *historia civilis* status rerum, & summorum imperantium describit (§. 719.); in ea *suppeditantur exempla*, quibus *dogmata politica confirmantur* & unde *principia prudentiæ civilis derivantur*, nec non *jura summorum imperantium deciduntur*. In historia universali, eaque generali intendere quoque possumus, ut *nonnisi quædam notio seriei temporis lectoris animo ingeneretur*, in usum historię specialis finium modo in medium allatorum consequendorum gratia pertractandæ.

§. 726.

Finis ecclesi-
astica.

Eodem modo (§. 719.) patet, in *historia ecclesiastica* *proponi exempla*, quibus *dogmata de regimine ecclesiastico confirmantur* & unde *principia prudentiæ ecclesiasticæ derivantur*.

§. 727.

Finis privatæ.

Nec minus liquet (§. 719.), *historiam privatam* *suppeditare exempla virtutum & vitiorum*, quibus *præcepta dirigendi actiones ad suam aliorumque felicitatem confirmantur* & unde *principia prudentiæ privatæ derivantur*.

§. 728.

Finis litera-
riæ.

Quoniam in *historia literaria* status orbis literati describitur; in ea docetur progressus scientiarum & artium liberalium (§. 719.): adeoque in ea intendimus docere lectorem, *undenam veritatum inventarum haurienda sit cognitio* &

¶ principia suppeditamus ad locupletandam artem inveniendi proficua.

§. 729.

Quoniam historia civilis recenset statum & fata rerump. cum rebus gestis summorum imperantium; ecclesiastica statum & fata ecclesiæ; privata facta & fata hominum (§. 719.); ex collatione factorum & fatorum leges providentiæ divinæ innoscunt. Unde inter *finis historiae in genere* referri debet, quod ad leges providentiæ divinæ agnoscendas manuducat.

Finis quidam generalis historiae.

§. 730.

Scriptum historicum conditurus id agere debet, ut 1. non narret, nisi vera, 2. singula eo, quo se invicem secuta fuere, ordine exponat, nec 3. quicquam eorum prætermittat, quod ad finem historiae consequendum cognitu necessarium §. 713 sq. 723 sqq.

Quænam in scripto historico observanda.

§. 731.

Historiam naturalem conditurus ea fini, ut rerum naturalium idea animo alterius ingenerentur 1. objecta minime obvia accuratissime delineata æri incidi ac suis nativis coloribus depingi curret: 2. partes singulas in iisdem discernibiles propriis suis nominibus indigiret, aut, si nulla prostant, attenta similitudine cum rebus aliis nova imponat: 3. quæ in partibus singulis denuo discerni possunt, eodem modo enumerare studeat, donec ad partium partes observabiles ultimas perveniatur: 4. quæ nudo oculo non patent, beneficio microscopii detegat: 5. quo ordine partes singulæ se mutuo excipiant & quomodo inter se cohæreant, sedulo explicet. Etenim ubi lector attentus objectum obvium oculis suis ipsemer subijcit, vel eos in minus obvii imaginem prototypo suo simillimam convertit, ratione præscripta notionem objecti adipiscetur, quantum fieri potest, distinctam & adæquatam (§. 652. 653. 654.); in ceteris vero, quæ distincte exponi nequeunt, claram, utut confusam (§. 658.).

Quænam in historia naturali condenda observanda ad ingenerandum animo rerum naturalium ideat.

E. gr. Si iridis historia tradenda, delineandus erit arcus, qualis in aëre comparat. Recensendi sunt colores eo ordine, quo se invicem

consequuntur. Indicanda est ratio latitudinis ad altitudinem; nec non ratio latitudinis colorum ad eandem altitudinem, & ratio latitudinis singulorum colorum inter se. Quodsi singuli colores in ipsa arcus cœlestis imagine picta exhibeantur; eorum claram nanciscetur ideam, qui iridem nondum vidit, vel olim visi non satis recordatur.

§. 732.

Cur historiae naturalis scriptor artis pictoriae debeat esse gnarus.

Consequitur hinc, *historia naturalis scriptores in delineandis ac depingendis objectis esse debere exercitatos*. Neque enim fieri potest, ut semper iis præsto sit pictor arte excellens; nec qui lucri gratia opus perficiunt, eam in eodem perficiendo collocare solent operam, qua utuntur veritatis amore ducti. Quorum vero nonnisi confusam notionem habemus, ea cum altero solis verbis communicare non possumus (§. 87-88-),

§. 733.

Cur linguae admodum gnarus esse debeat.

Quoniam *historia naturalis scriptor* singula propriis suis nominibus indicare, vel etiam juxta analogiam linguae, qua utitur, nomina, quae desiderantur, condere debet (§. 731.); *linguae, qua scribit, maxime gnarus sit opus est*.

§. 734.

Quando nudo nomine contentus esse possit.

Quodsi notio nomini respondens obvia fuerit, in descriptione rei nomen nudum poni sufficit §. 731.

§. 765.

An colores distincte describi possint.

Quoniam *Isaacus Newtonus* profunda indagine affecutus quinque colores, qui ex refractione luminis solaris in prismate facta prodeunt, esse primigenios, quorum commixtione procedunt compositi ceteri omnes, atque in præclaro Opticæ opere lib. 1. prop. 4 p. 58. edit. sec. lat. modum docuit luminis radios heterogeneos separandi; *experimentis perveniri poterit ad distinctas colorum compositorum notiones, ita ut in descriptione rerum naturalium experimenta necessaria facturo solis verbis communicari possit notio coloris*. Et quoniam pictores atque tinctores ad colorem inducendum utuntur materiis ex regno minerali atque vegetabili petitis & illi inprimis ex simplicium quorundam colorum

rum mixtione producunt compositos, quibus rerum nativos colores imitantur; *ars quoque pictoria & tinctoria experimenta sup-
peditare poterit, quibus ad distinctas colorum compositorum notio-
nes pervenitur. Ac utile in primis foret, notiones utraque via repe-
tas conjungi.*

§. 736.

Similiter ex historia experimentalis constat, varia ex-
cogitata esse artificia, quibus datus quidam gradus determinari
potest. Quod si ergo experimentum, quo gradus caloris determi-
natur, in descriptione corporis calidi adjiciatur, experimentum
reiteraturis solis verbis communicari potest notio caloris, quam nos
habemus.

An calor di-
stincte descri-
bi possit.

§. 737.

In genere notandum, si experimento præscripta methodo
facto illud sensibus præsens sisti possit, cujus nonnisi confusam ha-
bemus notionem; solis verbis effici posse, ut lector experimentum
reiteraturus eam, quam nos habemus, notionem confusam conse-
quatur.

Notiones con-
fuse quomo-
do alteri com-
municentur.

§. 738.

Si id, cujus notionem confusam habemus, similitudinem quan-
dam habuerit cum alio alteri noto, & similitudo distincte exponi
possit; solis verbis notionem hanc confusam alteri communicare li-
cet, quatenus similitudinem cum re alia alteri nota involvit. Cum
enim alter nomine rei alterius audito notionem ejusdem in men-
te reproducat, quam olim perceptæ habet; ea coram intuetur,
quæ eadem sunt in re a nobis confuse percepta. Quod si igitur
illa indicare potueris, similitudinem distincte exponis, nec alter
ad similitudinem referet ab eadem aliena. Verbis adeo, quibus
in descriptione objecti uteris, efficis, ut notionem confusam, quam
habet, consequatur alter, quatenus similitudinem cum re alteri
nota involvit.

Modus com-
municandi
notiones per
similitudinem
cum aliis.

Enimvero cum similitudinem non convenientibus circumscribant li-
mitibus, scopum sibi præfixum minime consequuntur. Etenim alter
sibi in memoriam revocans rem integram, quæ aliquid similitudinis
cum alia involvit, similitudinem ultra suos limites extendit. V. gr. Si
quis

quis aures alicujus animalis alteri nondum visi dixerit esse similes aures felis; qui hæc audit aures felis sibi visæ in memoriam revocat easque pro auribus animalis ignoti sumit. Accedit inde, ut istiusmodi comparatione in singularibus partibus animalis, quod describit alter, insinuat lector vi imaginationis componat ideam animalis, quale in rerum natura nullibi existit & quod toto cælo differt ab eo, quod sibi representare debet. Animal igitur peregrinum ipse tandem videus miratur atque fatetur, se longe aliam ejus ideam animo concepisse. Lubrica adeo hæc via est, nisi cautione utamur, ut terminos similitudinis indigitemus.

§. 739.

Experimentorum usus qui-
dem in histo-
ria naturali.

Si qua in objecto, quod describitur, sensui non patent, nisi experimento facto; idem una describendum (§. 731. 594.).

Exempla in anatomicis occurrunt, ubi per experimenta vasa latentia eorumque insertiones in apicum producantur.

§. 740.

Modus obser-
vandi quando
describendus.

Si modus observandi singularis fuerit lectori minime perspectus; cum una exponi convenit. Ratio prorsus eadem, quæ theoreticæ præcedentis.

§. 741.

Quænam in
condenda hi-
storia naturali
tenenda circa
scientiarum
principia.

Historiam naturalem conditurus ea fini, ut animum lectoris imbuat principiis, quibus in ratiociniis de rebus naturalibus habemus opus, 1. judicia intuitiva formet (§. 639.), eaque determinata (§. 317.), modos ab attributis & essentialibus, quantum datur, distinguens (§. 642. & seq.). 2. Distinctas eorum, quæ in objectis observantur, notiones consequi studeat (§. 648.), differentiis, quæ in diversis occurrunt, cum cura annotatis. 3. In causas latentes earumque concursum inquireat (§. 697.), factis, sicuti opus fuerit, experimentis adhibitisque microscopiis, quibus latens in apicum producit. 4. Definitiones & judicia universalis condant (§. 649. 675.), summopere tamen sibi cavens, ne sua de iis, quæ observat, judicia cum observatione confundat. Conf. hic §§. 680. 684. 694. 698. 87. 71. 701. 348. 343. 637.

§. 742.

§. 742.

Experimenta describuntur 1. instrumenta describat, quibus ad experimentum capiendum utitur, ut inde iudicium ferri possit, quantum eidem sit habendum fidei; 2. singulas actiones experimentatoris iusto ordine enumeret, ex eadem ratione; 3. singula quoque phenomena, quæ sese spectanda offerunt, recenscat; 4. propositiones, quæ inde stabiliri possunt, eruat. Ita nimirum nihil eorum prætermittetur, quod uti esse potest vel de veritate propositionis experimento stabilitæ iudicatur, vel eodem ad amplificandum scientiam usuro. Prius pater, ex fidei requisitis (§. 583. & seqq.); posterius ex iis, quæ ad stabiliendam propositionem præcedentem dicta sunt (§. 741.).

Quomodo experimenta describenda.

§. 743.

Historiam artium conditurus ea fini, ut animo lectoris rerum artificialium notiones ingeneret (§. 724.), 1. objecta, quæ describit, accuratissime delineata æri incidi curet, ut descriptionem legens oculos in rei imaginem convertere queat quasi coram intuiturus, quæ eidem insunt. 2. Cum opera artis sint ex partibus vel continuis, vel confugis certo modo inter se connexis composita, partes singulas sigillatim describat & modum, quo inter se connectuntur, distincte explicet. Quod si quædam in iis discernenda in oculos non incurrunt, partes integras a toto avulsas sigillatim delineari & æri incidi curet. 4. Partes majores, ubi ex aliis minoribus constant, in easdem resolvat & singulas eodem modo describat atque, si opus fuerit, sigillatim delineatas æri incidi curet. Singularum partium describat materiam, figuram, rationem ad totum, vel ad partes alias, colorem superficiæ inductum & si quæ alia observabilia ulterius occurrunt. Sic prædabit operis notio distincta & adæquata §. 652 sq.

Historia artis ad ingenerandum animo rerum artificialium ideas condenda.

§. 744.

Quoniam rationes magnitudinum per numeros determinantur, si singularum partium dimensiones in mensura quadam data assignentur, earum cum inter se, tum ad totum ratio patet.

Ratio dimensionum quomodo determinanda.

§. 745.

Quod si materia vel corporis artificialis totius, vel saltem (Logica contracta.)

LI

Mixta quomodo describenda.

unius alteriusve *partis fuerit mixta; in descriptione ejusdem* 1. enuncierandæ sunt materiæ simpliciores, sive naturales, sive artificiales, quæ mixtionem ingrediuntur. 2. Indicandæ sunt rationes singularum partium ad se invicem. 3. Declarandus est modus mixtionis. Sic obtinetur notio mixti distincta §. 652.

E. gr. Pulvis pyrius est corpus artificiale mixtum. In Pyrotechnia idem descripturi enumeramus materias, ex quibus inter se commixtis paratur, nitrum, sulphur & carbones. Docemus proportionem, quam habent hæc miscibilia ad se invicem pro diversitate efficaciz, quam in pulvere pyrio requirimus. Describimus denique modum, quo mixtio perficitur, ut tandem prodeat corpus mixtum.

§. 746.

Historia artium ad earum notionem animo ingerendam condenda.

Artes ipsas descripturus ea fini, ut earum notionem animo lectoris ingeneret, 1. singulas recensere debet operationes, quæ ad perficiendum aliquod opus artis requiruntur, & si ex pluribus actionibus consistent, eas eodem modo in easdem resolvere debet, quo partes in alias minores resolvimus in compositi descriptione (§. 743.). 2. Instrumenta, quibus ad singulas actiones opus habet artifex, describat eadem cura, qua artis opera describi convenit (§. cit.), cum utique sint corpora artificialia, seu opera arte parata, atque 3. accurate delineata affabre æri incidi curet. 4. Instrumentorum usum in perficiendo opere distincte exponat.

§. 747.

Quomodo historia artis condenda, ut suppeditet principia iudicandi de operibus artis & arte ipsa.

Historiam artium conditurus ea fini, ut animum lectoris imbuat principiis, quibus in ratiociniis de rebus artificialibus habet opus, 1. indicet fines uniuscujusque operis artificialis, si plures habuerit, vel præter finem ab inventore aut artifice intentum alii deinceps accesserint, vel accedere possint usus. 2. Distinctas eorum, quæ in objectis observantur, communicet notiones, quantum datur, perinde ac in casu præcedente (§. 745.). 3. Singularum partium, tam majorem, quam minorum, ex quibus ista componuntur, explicentur rationes finales, immo omnium, quæ circa singulas observantur, rationes reddantur, vel ab artifice perito addiscendæ, vel ex ipso opere deducendæ. 4. Instrumentorum quoque usus, additis & illorum, & hujus rationibus;

nibus, declaretur. §. 5 Et singulis una satisfiat præceptis, quæ in condenda historia artium ad earum notionem animo ingenerandam requiruntur (§. 746.).

De operibus artis judicaturus inquiri, num opera artis, instrumenta, quibus utuntur artifices, ipsæque artes sint perfectæ, an vero alicubi deficient, & medicatricem requirant manum. Ostendemus autem in Ontologia, perfectionem artis cujuscunque ex eo judicari, si particulares rationes tendant ad finem eundem generalem. Quodsi ergo intelligas finem totius operis singulosque ipsius usus atque fines singularum partium singularumque circa eas observandorum; inde judicare licebit, num singula habeant suas rationes finales & num rationes finales particulares tendant ad generalem, an eidem adversentur; consequenter num opus sit perfectum, an vero adhuc defectibus vel nævis laboret. Idem eodem modo de instrumentis, quibus utuntur artifices, ipsaque arte patet.

§. 748.

In historia civili, ecclesiastica & literaria sedulo cavendum, ne historicus sua de facto judicia cum facto isto confundat, seu recensionem facti sui de eo judicium substituat. §. 714.

Cor judicia de facto cum facto non confundenda.

§. 749.

Historiam civilem conditurus ea fini, ut dogmata politica inde confirmantur ac principia prudentiæ civilis hinc deriventur; 1. statum Reip. quovis tempore, aut sub quovis imperante distinctissime describat, quoad singula capita, quæ in Politica pertractari convenit, atque a nobis pertractari solent. 2. Describantur media, quibus flos Rerump. fuit conservatus, nec non 3. impedimenta, quæ eidem obstitere, una cum causis, ob quas imminutus ac deperditus. 4. Inprimis fideliter recenseantur molimina summorum imperantium una cum eorum eventu. Hac ratione ubi conscripta fuerit historia, finem intentum te consequi posse dubium nullum superest.

Historia civilis in usum Politicæ condenda.

Etenim in Politica docemus, quinam status Reip. bene constitutæ esse debeat & quibusnam mediis sit conservandus ac collapsus instaurandus. Quamobrem si diversus Rerump. status, qualis hoc, vel isto tempore fuerit, accurate describitur,

una cum mediis, quibus floridus evasit, atque impedimentis, quæ eidem obstituerunt, nec non causis cum depravantibus; dogmatum politicorum gnarus judicabit, quinam iisdem conformis fuerit, quinam ab illis abhorreat, consequenter eidem hinc constabit, quanam dogmata experientia corroborerentur, quanam eidem repugnent. Sufficiet itaque historia ad dogmatum politicorum examen instituendum. Dum vero ulterius patet, quibus mediis flos Reip. debeat, quibus de causis fuerit depravatus; Politicam quoque novis dogmatis augebit, qui propositiones determinatas formare didicit. Denique si molimina summorum imperantium una cum eorum eventu describantur; quid prudenter ab his factum, quid per imprudentiam peccatum, constabit: consequenter historia methodo præscripta consignata prudentiæ regulas ei suppediet, qui in formandis judiciis determinatis versatus. Similiter ubi mediteris media, quibus Reip. flos debetur, una cum ejus impedimentis atque causis deperdit; eadem, quam modo requisivimus, facultate instructus plures hinc prudentiæ regulas derivabit: id quod nemo in dubium vocabit, qui prudentiæ notionem intuetur, suo loco a nobis distinctius explicandam.

§. 750.

Historia con-
denda ad jura
Principum de-
cidenda.

Historiam civilem ea fini conditurus, ut jura summorum imperantium decidentur, describere imprimis debet 1. ortus imperiorum atque regnorum; 2. modum, quo imperantes summam potestatem in hac, vel illa regione consecuti; matrimonia summorum imperantium; 4. pacta & conventa cum statibus & 5. fœdera atque instrumenta pacis.

§. 751.

In historia ec-
clesiastica con-
denda quæ-
nam observan-
da.

Historiam ecclesiasticam conditurus ea fini, ut dogmata de regimine ecclesiastico inde confirmari ac prudentiæ ecclesiasticæ præcepta hinc derivari queant, 1. describere tenetur statum ecclesiæ, qualis omni tempore fuerit; 2. media, quibus flos ejusdem obtentus fuit ac conservatus; 3. impedimenta, quæ eidem obstituerunt, una cum causis, ob quas imminutus fuit atque deperditus; 4. mutationes singulas, quæ acciderunt, imprimis etiam circa dogmata & mores gregis christiani. Consule denuo §. 749.

§. 752.

§. 752.

Historiam privatam conditurus ea fini, ut dogmata moralia inde confirmantur ac prudentiæ privatæ principia hinc deriventur, 1. describat quam distinctissime singulas hominum actiones ex habitu vel virtutis, vel vitii prognatas. 2. Exponat fata, quæ istas fuisse comitata. 3. Inprimis annotet sollicita cura, quæ statum animi ob actiones atque fata producat. Etenim principiorum moralium probe gnarus hinc facile colliget, quæ ad confirmandum notiones virtutum & vitiorum atque actionum liberarum honestatem & turpitudinem intrinsecam profunt; colliget hinc media ad virtutem perveniendi & impedimenta, quæ iisdem contrariantur, & ex casu alieno discens, quæ sub his, vel istis circumstantiis singularibus opportune fiant, prudentiæ regulas formabit.

In historia privata condenda quænam sint tenenda.

§. 753.

Historiam sive civilem, sive ecclesiasticam, sive privatam ea fini conditurus, ut leges providentiæ divinæ inde agnoscantur, inprimis 1. annotare debet, quæ circa rerum eventus non consilio, sed fortunæ vulgo tribuuntur, & 2. fata Rerump. ecclesiæ hominumque in singulari spectatorum cum eorum actionibus sedulo recensere tenetur. Etenim in Metaphysicis demonstramus, nexum rerum in universo summa Dei sapientia esse constitutum ex principio convenientiæ. Illam igitur convenientiam scrutaturus & regulas providentiæ divinæ eruturus fata Rerump. atque ecclesiæ cum consiliis imperantium eorumque factis, nec non fata hominum in singulari spectatorum cum eorum actionibus conferre tenetur. Quamobrem si historia huic fini respondere debet, utique observanda sunt, quæ hic a nobis præcipiuntur.

Historia condenda legum providentiæ divinæ agnoscendæ gratia.

§. 754.

Historiam literariam conditurus ea fini, ut constet, unde petenda sit veritatum jam inventarum cognitio, recensere debet 1. Scripta, quæ hoc vel isto tempore de singulis argumentis prodire. 2. Indicare tenetur argumenta particularia, quæ in scriptis auctorum pertractantur. 3. Annotet opus & methodum, quæ in explicandis & probandis dogmatis autor usus, si scripta fue-

In historia literaria condenda quid observandum.

rint dogmatica, vel quem tenuerint in scriptis historicis ordinem, quo spectant ea omnia, quæ paulo post de libris dijudicandis præcipiemus. Inprimis autem 4. caveat, ne sua de factis judicia cum factis alterius confundat (§. 748.).

§. 755.

Historia literaria continenda in iis artibus inveniendi.

Historiam literariam ea fuit conditurus, ut principia ad locupletandam artem inveniendi proficua suppeditet, 1. vitas auctorum describat & in iis fideliter exponat, quo in loco fuerint nati, qua educatione & qua informatione usi, quibus præceptoribus siue vivis, siue mortuis profecerint & si qua alia præterea fuerint, quæ ad studiorum & morum formationem quicquam conferre potuerit. 2. Describat etiam statum rei literariæ, quo tempore auctores vixerunt (§. 754.), una cum statu ipsorum auctorum. 3. Sollicite annoret inventa, quæ anterioribus veritatibus quovis tempore accesserunt & qua ratione jam ante inventa ulterius fuerint perfectæ, ut dubia abierint in certa, errores in veritatem. 4. Enarrat quoque fata dogmatum, vel veritatum recens inventarum & fata inventorum. Conf. §. 708. 639 seqq. 690 seqq. ad num. 1. 3.

Quoniam vero ad veritatem inveniendam non sufficit nosse veritates, unde illa deducitur, & compotem esse artis inveniendi, quæ in præsentī casu satisfacit, verum præterea requiritur, ut ansa inventori suppeditetur appellendi animum ad veritatem investigandam; ideo necesse est, ut præter biographiam nobis etiam perspecta sint fata cum dogmatum, seu veritatum inventarum, tum ipsorum quoque inventorum eas in lucem proferentium.

§. 756.

Ufus logicæ potissimus in condenda historia.

Quoniam in omni historia describuntur nonnisi talia, quæ facta sunt (§. 714.); *Logica in condenda historia hunc potissimum præstat usum, ut doceat formare notiones eorum, quæ facta sunt, distinctas*, quantum scilicet sufficit, ut lector mentem historici assequatur, & *judicia determinata* (§. 639. 652.):

CAPUT

CAPUT III. DE CONSCRIBENDIS LIBRIS DOGMATICIS.

§. 757.

AUtor libri dogmatici historici non intendit, nisi ut lector intelligat dogmata & ad summum novit argumenta, quibus ad eandem probanda utuntur. Conf. §. 721. §22 sqq.

Finis librorum dogmaticorum historicorum.

Duplicem habent scripta istiusmodi usum. Nimirum qui hebetioris sunt ingenii, quam ut veritatem demonstrativam vel probabiliter aliarum ope adstructam capere possint, memoriæ inde mandant veritates in vita utiles easque data occasione ad usum transferre, valent: ii vero, quibus major obtigit ingenii acies, lectione istiusmodi scriptorum ad lectionem scientificorum præparantur, ut, dum termini ac propositiones ipsis jam sunt familiares, facilius atque celerius progrediantur, cum multum omnino temporis requiratur, antequam termini & propositiones familiares evadunt. Immo iidem eadem lectione ad cognitionem scientificam inflammantur, vortique sui damnati maiorem, quam alias futurum erat, voluptatem ex ea percipiunt atque ideo stimulos ad ultiores progressus sentiunt.

§. 758.

Scriptum dogmaticum historicum conditurus 1. terminos singulos accurata definitione explicet, nisi iisdem vulgo respondeat norio confusa quidem, sed fixa tamen: 2. propositiones determinatas condant: 3. si ita visum fuerit, argumenta enumeret, quibus ad eas probandum utuntur, immo discrimen annotet, quod inter ea intercedit: 4. in uno loco congerat, quæ ad idem subiectum spectant. Lege de num. 1. §. 757. 114. 124. 149. de num. 2. vide §. 47 sq. 315. 343 sqq.

Scriptum dogmaticum historicum quomodo condendum.

Quodsi lectorem docere quoque intendit autor, quod non gratis asserantur, quæ memoriæ mandare jubetur, argumenta enumerare debet. Cumque hac enumeratione cogniti-

nis

nīs scientificæ desiderium instilletur (*not. §. 757.*) non inutile est discrimen argumentorum indicari, ut constet, de cujus evolutione quam maxime solliciti esse debeamus. Quoniam denique facilius meminimus eorum, quæ una memoriæ fuisse mandata, scripta vero historica dogmatica nonnisi memoriæ consulunt; igitur consultum est, ut, quæ de eodem subiecto tenenda sunt, eodem in loco tradantur.

§. 759.

Quenam in
seriis dog-
maticis hi-
storicis tra-
denda.

Quoniam historica dogmatum cognitio in usum ratiocinandi comparatur, vel ad reddendam rationem nonnullorum, quæ sunt, vel ad praxes quasdam exercendas, cum nemo, qui sapit, dogmata sibi familiaria reddat, quorum nullum facere potest usum; *in scriptis historicis dogmaticis illæ in primis propositiones explicandæ, quæ vel ad reddendam aliorum rationem, vel ad praxes non nullas utiles sunt, omitti iis, quæ nonnisi illis demonstrandis inserviunt.*

E. gr. Si quis in Dioptrica nonnisi ad historicam ejus cognitionem lectorem deducere intendit; is tantum theoremata de focus lentium & imaginibus objectorum in iis formatis explicat, atque legem refractionis, qua nituntur, declarat; cetera vero theoremata, quæ ad illa demonstranda a mathematicis in medium asseruntur, omittit. Etenim qui illa theoremata novit, non modo lentibus opportune utitur; verum etiam variorum phenomenorum dioptricarum rationem promte reddit, veluti cur lentes convexæ sint causticæ & nonnisi ad datam quandam distantiam ignem excitent. Qui praxin dioptricam exercent vitra polientes atque ex iis tubos, microscopia & alia instrumenta optica conficiunt; iis historica ista theoriæ dioptricæ cognitio abunde sufficit; id quod & experientia loquitur, & ratio confirmat, cum demonstrationes hunc solum habeant usum, ut veritatis propositionum convincantur, nil autem eo conferant, ut propositiones sive ad reddendum aliorum rationem, sive ad praxes quasdam dextre applicentur.

§. 760.

In scripto sci-
entifico con-
dendo quæ-

Scriptum scientificum conditurus, i. terminos omnes definiat, qui vel definitiones alias ingrediuntur, vel quorum definitiones

riones ingrediuntur demonstrationes tanquam præmissæ syllogismorum; nec absque definitione admittat alios, nisi quibus notio confusa fixum vindicat significatum (§. 125.). 2. Quodsi disciplina aliqua propositionibus alterius utitur tanquam principiis in suis adstruendis, atque adeo illam supponit; terminos inde mutuo sumtos minime definire tenetur, sed definitiones suo loco traditas jure supponit. 3. Definitiones eo ordine collocet, ut eæ anteriori ponantur loco, quarum definita ingrediuntur definitiones alias, hæ autem loco posteriori. 4. Definitionibus non utatur tanquam principio demonstrandi, nisi earum realitate adstructa (§. 687. & seqq.). 5. Sine probatione propositionem nullam adsumat, nisi quæ indemonstrabilis (§. 260. 261.) & in axiomatum, vel postulatum numero habetur (§. 265. & seqq.). 6. Propositiones omnes determinatas ponat (§. 315.), ita ut in categoricis subjecto absolute posito tribuatur prædicatum (§. 213.), in hypotheticis autem conveniens adjiciatur subjecti determinatio (§. 225.). 7. Propositiones, quæ ex definitionibus, vel aliis jam demonstratis demonstrari nequeunt, aliis tamen demonstrandis inserviunt, a posteriori stabiliat (§. 675. 676. 677.). 8. Propositiones demonstrativas demonstratione vel ostensiva (§. 531. 532.), vel apogogica munit (§. 524. 530.). 9. In resolutionibus problematum singula, quæ fieri debent, distincte enumeret, eoque ordine, quo fieri debent, sumtaque resolutione pro hypothesi, ex ea problema demonstrat (§. 523.), hoc est, ostendat factis iis, quæ præcipiuntur, fieri quod fieri debebat. 10. Omnes propositiones eo ordine collocet, ut præcedant, quæ sequentibus demonstrandis inserviunt. 11. Propositiones alibi demonstratas tanquam certas supponat, easque mutuo sumat, si quando iis habuerit opus. 12. Si quæ obscuriora videri poterant, ea exemplis illustret & uberius declaret, & ubi opportunum visum fuerit, dogmatum præstantiam atque usum indicet, inventores laudet, artificia invenienda reveler, rationem ordinis non satis manifestam reddat &c. Conf. §. 721. 675 seqq. 522-524 530. 533. cetera per se patent.

nam obsequanda.

§. 761.

Scriptum sci-
entificum qua
methodo con-
datur.

Methodus sci-
entificæ quæ-
nam.

760.) *Scriptum scientificum methodo philosophica conditur. (§. Conf. §. 109-114. disc. præl.*

§. 762.

Apparet itaque, *methodum*, quam in discursu præliminari philosophicam diximus, *latius patere atque* adeo generali nomine *scientificam recte appellari.*

§. 763.

An mos Geo-
metrarum in
scriptis scien-
tificis obser-
vandas.

Et si autem methodus scientifica, quæ scriptis scientificis convenit, eadem sit cum philosophica (§. 761. 762.), consequenter cum mathematica (§. 132. *Disc. prælim.*); non tamen opus est, ut more Geometris recepto singulis veritatum generibus competentes definitionum, axiomatum, postulatum, theorematum, problematum, corollariorum atque scholiorum tituli præfigantur: neque enim ideo definitiones bonæ sunt, propositiones, quæ axiomata & postulata appellantur, nomen suum tuentur, theorematum in numerum propositionum demonstratarum referuntur, & ita porro, quod tituli isti præfigantur; sed quia regulis Logicæ singula veritatum genera ad amissum respondent. Sufficit itaque regulas Logicæ in unoquoque veritatum genere, quantum fieri potest, accuratissime observari.

§. 764.

Cur citationes
sint necessariae
& cur paragra-
phi continua
serie nume-
randi.

Quoniam propositiones in numerum principiorum demonstrandi (§. 533.), immo in genere in numerum principiorum probandi (§. 557.) non recipiuntur nisi jam demonstratæ, nec definitionibus atque axiomatis, vel experientis utimur nisi ante positis (§. 760. *Log. & 126. Disc. prælim.*); in scripto scientifico præmissæ, quibus utimur in syllogismis probationem constituentibus, citandæ sunt, ut in antecedentibus evolvi possint ab eo, cui ipsæ nondum sunt familiares. Ut igitur citatio faciliatur & citata facilius inveniantur, omnes omnino veritates continua serie numerari debent.

§. 765.

Quomodo ali-
unde citanda.

Ex eadem ratione patet, si aliunde definitiones, vel pro-
positio-

positiones mutuo sumuntur tanquam principia probandi, illas quæ ex iis libris, in quibus reperiuntur, citari debere.

§. 766.

Ex continua illa citationum serie non modo intelligitur, nihil assumi, quod non jam sit adstructum; verum etiam patet, quænam tanquam cognita præsupponi debeant, antequam veritatis propositionis, quæ præ manibus est, convinci queas.

Citationum
usus.

§. 767.

Quodsi citationes istæ per singulas disciplinas continentur, quomodo veritatis unius cognitio a veritate alterius pendeat, disciplinarumque mutuus nexus ad oculum patet. Neque enim alia re opus est, quam ut citationes adspiciantur.

Citationum
usus alius.

§. 768.

Quoniam methodus, qua libri scientifici conscribendi, eadem cum philosophica (§. 762.); in propositionum demonstrationibus, vel probationibus non plura contineri debent, quam quæ lectori antecedentium gnaro sufficiunt ad revocandum cetera in memoriam ad ratiocinia complenda requisita (§. 116. *disc. prælim.*). Quamobrem si qua præmissa sola citatione innotescit, adjecta citatione in demonstratione omitti potest. Ex eadem ratione patet, in demonstrationibus sufficere enthymemata, cum Logicæ gnarus enthymema datum absque ullo negotio in syllogismum completum convertere possit (§. 398. & seqq.). Quamobrem si conclusio anterior fuerit præmissa syllogismi sequentis & præmissa altera per citationem pateat: conclusionem syllogismi sequentis immediate jungere licet conclusioni antecedentis.

Quomodo demonstrationes
abbrevientur.

§. 769.

Demonstratio dicitur naturalis, aut ordinata, si propositiones eo ordine se invicem excipiunt, quo in ratiociniorum serie, in quam demonstratio resoluta abit (§. 522. & seqq.), continentur: in casu opposito inordinata appellatur.

Demonstratio
ordinata
& inordinata
definitio.

§. 770.

Quodsi ergo demonstrationem in sua, ex quibus constat, ratiocinia resolveris (§. 522. & seqq.). ordinatam condeve baud erit difficile (§. 769.). Facta enim resolutione, datur ratiociniorum

Demonstratio
ordinata quomodo
condenda.

series, atque adeo patet, quo ordine collocandæ sunt propositiones, quæ retinentur.

§. 771.

Modus propositionem datam more geometrico demonstrandi.

Demonstrationem propositionis alicujus philosophicæ, aut alterius cujuscunque ad formam geometricæ reducat 1. eam resolvat in syllogismos formales & 2. eorum præmissas tamdiu novis prosyllogismis prober, donec præmissæ prodeant definitiones, axiomata, vel judicia intuitiva. 3. Adscribantur præmissis singulis competentes tituli definitionum, axiomatum, judiciorum intuitivorum, theorematum &c. Ita enim patebit, quænam definitiones, axiomata, observationes in usum judiciorum intuitivorum tanquam principia demonstrandi præmitti, quænam propositiones aliunde mutuo peti & quo tandem ordine propositiones demonstrativæ collocari debeant (§. 763.). Exemplum legi potest in *Logica* germ. conscripta cap. IV. §. 25. ubi demonstratur, aërem esse elasticum.

CAPUT IV.

DE DIJUDICANDIS LIBRIS HISTORICIS.

§. 772.

Quænam in scripto historico dijudicando tenenda sint.

Quoniam scripti historici autor non narrare debet nisi vera, nec alio ordine, quam quo se invicem secuta fuere, neque quicquam eorum prætermittere eidem licet, quod ad finem illius consequendum cognitu necessarium (§. 730.), in scripto historico logice examinando attendendum est 1. ad veritatem eorum, quæ narrantur; 2. ad ordinem, quo ea recensentur; 3. ad relationem eorundem ad finem scriptori propositum; seu num sit completum.

§. 773.

Quomodo veritas scripti historici examinanda.

Veritas scripti historici examinanda est juxta regulas fidei (§. 583. & seqq.). Conf. §. 714. 581. 582.

§. 774.

§. 774.

Si veritas narratorum in particulari examinanda, tum 1. attendendum est ad circumstantias facti, & inquirendum, num inter se consentiant, an vero sibi mutuo repugnent. 2. Consideranda sunt antecedentia & consequentia in eundem finem, an scilicet facto consentanea sint, an vero eidem adversentur: 3. perpendendum quoque est, num talia narrentur; quæ veritatis manifestis contradicunt. Conf. §. 592. 489. 549.

Veritas narratorum in particulari quomodo observanda.

Nimirum narrata falsa vel in se contradictoria sunt, atque adeo inter *absolute impossibilia* referenda; vel repugnant hominum inclinationibus atque habitibus, atque adeo pro *moraliter impossibilibus* habentur; vel denique non consentiunt cum antecedentibus, vel consequentibus, aut etiam concomitantibus, atque adeo *hypothetice impossibilia* sunt, quatenus nempe ipsa poni nequeunt, si ponatur antecedens, vel consequens, vel concomitans, seu quod ante, aut postea, aut simul factum esse perhibetur.

§. 775.

Quoniam corpora ad unum agendi modum per essentiam suam determinata sunt, si quod in historia naturali refertur, oblata occasione, ipsimet observamus, aut experientum, quod eo constare perhibetur, ipsimet repetimus, veritatem narrati intuitive agnoscimus.

Historiæ naturalis veritas quomodo a posteriori dijudicetur.

§. 776.

Quodsi facti natura reperitur causa (§. 697.), vel datis causis una cum effectu per observationem, aut experimentum determinetur, quid unaquæque illarum ad eundem contulerit (§. 698.); veritas illius a priori innotescit. Vid. §. 699. 515. 528.

Historiæ naturalis veritas quomodo a priori dijudicetur.

§. 777.

Quodsi modum observandi, vel experimentandi, quo usi fuimus, omnemque, quam adhibuimus, industriam accurate describimus; inde de veritate ejus, quod observatione, vel experimento constat, judicare licet. Vid. §. 583. 681.

Historiæ naturalis veritas quomodo probabiliter dijudicetur.

Hinc auctoritatem consequuntur observationes astronomorum & experimenta autorum de cognitione rerum naturalium optime meritorum, veluti *Guericki, Boylei, Mariotti, Hanksbeji &c.*

§. 778.

Ordo historię
naturalis unde
dijudicetur.

Quod si observationes & experimenta iterentur (§. 775.), vel facti cause causarumque concursus methodo nostra pervestigentur (§. 697. 698.); inde innotescit, num in historia naturali singula eo ordine recenseantur, quo facta fuere.

§. 779.

Ordo historię
reliq̃ue unde
constet.

In historia civili, ecclesiastica, literaria & privata ordo ex circumstantia temporis patet.

§. 780.

Modus judi-
candi, num
scriptum hi-
storicum sit
completum.

Quoniam denique (§. 741. & seqq.) ostendimus, qua ratione condenda sit historia tum naturalis, tum artium, tum civilis cum ecclesiastica, literaria atque privata, ut diversis finibus, qui per eam intenduntur, satisfiat; dato sine ex problematum resolutionibus, quas exhibuimus, judicare licebit, num singula recenseantur, quæ ad illum consequendum profunt.

§. 781.

Quomodo
ipso facto e-
jusdem con-
vincantur.

Quod si iis animi dotibus fueris instructus, quæ ad historiam in usum suum convertendam requiruntur; ipso facto convinceris, sufficientia, vel insufficientia tradi, ubi eam ad usum suum transferre conatus fueris. Etenim si sufficientia traduntur, conatus non destituetur successu: quod si vero, quæ traduntur, fini intento minime sufficiunt, defectum notabis, ubi ulteriorem progressum sisti animadvertis. Deficientibus enim datis filum ratiocinandi abrumpi debere non inficiabitur, qui genuinam demonstrationis formam (§. 522. & seqq.) animo habuerit comprehensam, nec ignoraverit, quod supra (§. 699.) inculcavimus, methodum a nobis præscriptam veritatem a priori, vel ex aliis cognitis ratiocinando eliciendi (§. 633.), eandem servare formam, quam demonstrationes tumentur.

§. 782.

Rationes, cur
quis falsa nar-
ret, quomodo
detegantur.

Si quis falsa narrare deprehenditur, rationes, cur vel fallatur, vel fallat, deteges per ea, quæ de formandis judiciis & notationibus a posteriori (§. 639. & seqq.), atque de requisitis hominis fide digni (§. 585. 591.) præcipiuntur. Add. §. 585. 591.

CAPUT V.

DE DIJUDICANDIS LIBRIS
DOGMATICIS.

§. 783.

Cum scripti dogmatici historici atque scientifici definitiones dederimus (§. 721.), & in numerum scriptorum utriusque speciei referri debeant illi, quibus notæ in istis enumeratæ simul conveniunt (§. 344.); *ex definitionibus judicare licet, num scriptum dogmaticum, quod datur, in numerum historicorum, an vero in numerum scientificorum referendum sit*: id quod primum judicium est, quod de libro dogmatico judicaturus formare tenetur.

Unde constat, nam scriptum oblatum dogmaticum historicum sit, an scientificum.

§. 784.

Quoniam porro clarissime docuimus, quænam in scripto dogmatico historico (§. 758.), quænam in scientifico condendo observare debeat autor (§. 760.); *si constat, num scriptum dogmaticum ad historica, num ad scientifica referri debeat, per ea, quæ de utroque scripto condendo præcepimus, patet, utrum autor satisfecerit officio suo, nec ne (§. 343.)*.

Unde innoscit, num autor officio suo satisfecerit.

§. 785.

Si scripto dogmatico omnia traduntur, quæ de argumento, quod tractat, fuere reperta, *opus completum* dicitur absolute, pro ratione nimirum illius temporis, quo idem condidit autor. Quodsi certo fine conditum fuit, nec plura continet, nec pauciora, quam quæ fini isti consequendo sufficiunt; *scriptum in suo genere completum est*. In casibus oppositis dicitur *incompletum* vel absolute, vel cum addito *in suo genere*.

Operis completi & incompleti definitio.

§. 786.

Cum in historia literaria status rei literariæ eo tempore, quo vixerunt auctores, describatur, & inventa sollicitè annotentur, quæ veritatibus anterioribus quovis tempore acceperunt, & qua ratione jam ante inventa ulterius fuerint perfectæ; ut dubia abierint in certa, errores in veritatem (§. 745.); *an scriptum sit completum absolute*

Unde constat, an scriptum sit completum.

solute tale, per historiam literariam constat (§. 785.); an vero sit completum in suo genere per historiam literariam & finem ab auctore intentum simul patet (§. cit.).

§. 787.

Cur iudicium de scripto completo in suo genere difficilius sit, quam de completo absolute tali.

Quoniam itaque iudicaturus, num scriptum sit completum absolute tale, sola historia literaria habet opus; iudicaturus vero, num sit completum in suo genere, præterea ostendere debet, an ex hæcenus inventis proponantur, quæ fini ab auctore intento consequendo satisfaciunt (§. 786.); *iudicium de scripto completo in suo genere difficilius est, quam de completo absolute tali.*

§. 788.

Cur scriptum completum fieri possit incompleteum.

Quodsi successu temporis plures veritates de objecto alicujus scripti detegantur; scriptum, quod suo tempore erat completum, incompleteum evadit. (§. 785.).

§. 789.

Prolixi scripti & superflui definitio.

Scriptum, quod plura continet, quam quæ scopo auctoris inserviunt, dicitur *nimis prolixum*: illa autem, quæ in scripto tradita ad scopum auctoris non faciunt, *superflua* appellantur. Unde patet, *scripta nimis prolixa superflua continere.*

§. 790.

Libri perspicui & obscuri definitio.

Si termini singuli accurata definitione explicantur, nisi iisdem vulgo respondeat notio confusa quidem, sed fixa tamen, & fixus significatus in condendis propositionibus constanter continetur; *liber perspicuus est*: quodli terminis utatur auctor non definitis atque vagis, *liber obscurus est.*

§. 791.

Cur libri perspicui intelligi possint, obscuri non item.

Libri perspicui possunt intelligi, obscuri non item. Vide §. 790. 115. de perspicuo; sed §. 790. 127. & 115. de obscuro.

§. 792.

Libri perspicui a quonam non intelligantur.

Quodsi lector definitiones auctoris sibi non reddit familiares, nec ad verba, quibus notio confusa, sed fixa respondet, attentionem offert; librum perspicuum minime intelligit. Dum enim legit propositiones auctoris, vel hæret, quamnam cum iisdem jungere debeat notionem, vel notionem jungit diversam ab ea, quam cum

cum eadem jungi vult autor, adeoque in casu posteriori sensum fingit a mente ipsius alienum (§. 18.), consequenter, in utroque mentem auctoris non intelligit (§. 115.).

§. 793.

Si quis in scripto dogmatico historicopluves definitiones tradit, quam quæ ad definitiones sequentes atque subjecta & prædicata propositionum intelligenda sufficiunt; is in definiendo nimis est: in casu oppposito in definiendo deficit. Conf. §. 757 789 sq.

Quando auctor scripti historici nimis in definiendo & contra.

In scriptis nimirum dogmaticis historicis definitiones non alium habent usum, quam ut ea, quæ definiuntur, agnoscantur & ab aliis distinguantur (§. 150.). Ad hunc igitur solum attendimus, consequenter nec definimus, quæ absque definitione patent. Quænam vero sint ea, quæ absque definitione patent, in definitione libri perspicui (§. 790.) jam innuimus.

§. 794.

Si quis in scripto scientifico plures definitiones condit, quam quæ ad definitiones sequentes intelligendas & ad propositiones cum intelligendas, tum demonstrandas requiruntur; is in definiendo nimis est: si pauciores tradit, in definiendo deficit. Vide rursum §. 793. Enimvero cum in scriptis dogmaticis dogmata non tantum recensentur, ut lector intellecta memoriæ mandet; verum etiam demonstrantur, vel probentur (§. 721.), inter demonstrationum vero & probationum principia locum quoque sibi vindicent definitiones (§. 533.); eas definitiones adesse debere, quibus in demonstrando opus est, evidentissime liquet. Quoniam autem scripti scientifici autor aliud intendere nequit, vi (§. 721.), quam ut intelligatur, & propositionum demonstrationum veritas percipiat (§. 515. 528.); ideo pluribus definitionibus non habet opus; quam quæ utrique fini obtinendo sufficiunt (§. 789.).

Quando auctor scripti scientifici in definiendo nimis & contra.

§. 795.

Scriptum dogmaticum dicitur utile, quod talia tradit, quæ vel in scientiis aliistranquam demonstrandi principia adhiberi, vel ad casus vitæ humanæ commode applicari possunt. In casu oppposito scriptum dogmaticum inutile est.

Scripti utilis & inutilis definitio.

(Logica contracta.)

Na

§. 796.

§. 796.

Quando scriptum dogmaticum utile & contra.

Si autor scripti dogmatici propositiones condit determinatas, scriptum ejus utile est, in casu opposito inutile. Vid. §. 343. 375. 532. 315. & §. 115. *Disc. præl. de priori*; & §. 315. 343. 532. & §. 131. *Disc. præl. de posteriori*.

§. 797.

Scriptum dogmaticum historicum quando ordine conscriptum.

Si in scripto dogmatico historico in uno loco congeruntur, quæ ad idem subjectum spectant, liber dogmaticus historicus ordine conscriptus est: in casu opposito non item §. 758.

§. 798.

Quando scriptum scientificum ordine conscriptum.

Scriptum scientificum ordine conscriptum est, si unum quodque eo loco collocetur, quo sequentibus intelligendis & demonstrandis inservit §. 760.

§. 799.

Ordinis scholæ ac naturalis definitio.

Ordinem scholæ appello, quo ad idem subjectum spectantia in eundem locum congeruntur, nulla habita ratione, quomodo cognitio unius pendeat a cognitione alterius. Ordinem vero naturalem voco, quo præmittuntur, quæ sequentibus intelligendis & demonstrandis inserviunt.

Illum scholæ ordinem dico, quod in scholis nostro ævo usitatus; hunc vero ordinem naturalem, quia idem cum naturæ ordine, quo singula se invicem ita sequuntur, ut ratio sequentis contineatur in antecedente.

§. 800.

Ordinis mixti definitio.

Quodsi ea quidem constanter præmittantur, quæ sequentibus intelligendis & demonstrandis inserviunt; hoc tamen non obstante eodem in loco pertractantur ad idem subjectum spectantia, quantum regula anterior permittit; ordo dicitur mixtus.

Mixtum appello ordinem, quod ordinis scholæ atque naturalis una habetur ratio, quantum quidem fieri potest: fieri enim non potest, ut retento scholæ ordine naturali una constanter satisfiat.

§. 801.

Quod ordo scholæ memoriz inserviat.

Quoniam ordo scholæ requirit, ut eodem in loco pertractentur, quæ ad idem subjectum spectant (§. 799.), eorum vero

vero facilius meminerimus, quæ una memoriæ mandata fuere, quod suo loco demonstrandum tanquam experientiæ consonum hic sumimus; *ordo scholæ memoriæ inservit* (§. 797. 721.).

§. 802.

Quoniam ordo naturalis postulat, ut continuo præmittantur, quæ sequentibus intelligendis & demonstrandis inserviunt (§. 799.), per demonstrationes vero parer propositionum veritas (§. 515. 528.), consequenter earum beneficio certa obtinetur rerum cognitio (§. 535.); intellectus autem officium est certæ rerum cognitioni studere: ideo manifestum est, quod *ordo naturalis intellectui inserviat* (§. 798. 721.).

Quod naturalis inserviat intellectui.

§. 803.

Cum ordo scholæ memoriæ (§. 801.); ordo naturæ intellectui inserviat (§. 802.); ordo autem mixtus ex utroque ita componatur, ut, ordine naturæ strictè observato, simul ordinis scholæ habeatur ratio, quantum per istum datur (§. 800.): *ordo mixtus intellectui & memoriæ una inservit*.

Quod ordo mixtus & intellectui servit, & memoriæ.

§. 804.

Si quis notiones deceptrices a veris non distinguit, is verba cum rebus confundit. Etenim cum notio vera sola possibilis sit (§. 518.), ei quoque soli res quædam extra intellectum respondere potest: quod enim impossibile, idem esse nequit. Solus adeo rem quandam novit, qui notionem veram habet. Quod si notio fuerit deceptrix, termino videtur respondere aliqua notio, etsi is revera sit inanis (§. 133. 134.). Videtur adeo sibi autor rem quandam intelligere, cum solum nomen tenet, adeoque verba cum rebus confundit.

Verborum & rerum confusio.

§. 805.

Si autor termino, quem definiturus est, nonnisi confusam jungit notionem, nec terminis definitionem, quam sibi condere videtur, ingredientibus simul sumtis aliam tribuere valet notionem, nisi eandem confusam; is solum rei nomen tradit, non vero rem ipsam declarat (§. 150. 163.).

Cognitionis rei & nominis confusio.

E. gr. Definiri solet *essentia*, quod sit *entitas intrinseca præscindens ab actuali existentia*. Sed in hac definitione minime distincte idigitantur,

tur, quæ rei per essentiam denotatæ insunt, & simul sumta eandem absolvent. Cum adeo nullæ notæ enumerentur, unde id, quod essentia appellatur, agnoscere atque a ceteris, quæ enti insunt, distinguere valeas; definitio utique nulla est (§. 150.). Interim tamen terminus *essentia* non inanis est, sed notio eidem utique respondet, utur confusa. Qui igitur distincte explicat, quæ confusa illa notio involvit; is non amplius nomen *essentia* docet, sed rem ipsam eodem indigitatam declarat.

§. 806.

Incommoda
ex cumulatione
superfluo-
rum in defini-
tionibus ena-
ta.

Si quis in scripto scientifico definitionem conditurus alia cumulat, quorum unum per alterum determinatur; is propositiones cum definitionibus confundit, definitionum applicationem reddit prolixiorē, judicia format non accurate determinata, nec demonstrationum numerum contrahit (§. 700.). Quoniam vero de subiecto prædicantur vi definitionis (§. 216.), adeoque prædicata constituunt de definito tanquam subiecto enuncianda (§. 197.); ex iis atque definito formandæ sunt propositiones (§. 40.). Quamobrem qui definitionem conditurus cumulat alia, quorum unum per alterum determinatur, is definitionibus ingerit, quæ ad propositiones spectant, adeoque definitiones cum propositionibus confundit.

Definitionem ad rem obviam applicaturus ante ostendere tenetur, eidem convenire notas in definitione enumeratas simul, quam constat, eidem convenire definitum (§. 344.). Quodsi ergo in definitione cumulentur superflua, quæ perperam pro notis ad definitum agnoscendum & ab aliis discernendum requiri judicantur; plura eidem convenire ostendendum est, quam necesse fuerat, antequam ei definitum tribuere possis.

Quæ de subiecto absolute prædicantur, eadem ipsi tribuntur sub conditione definitionis (§. 222.). Quodsi ergo definitio superflua continet, conditio sive hypothesis, sub qua prædicatum subiecto tribuitur, plura supponit, quam ad hoc sufficit, ut prædicatum subiecto conveniat.

Quoniam denique in scripto scientifico definitione non licet uti tanquam principio demonstrandi, nisi ejus realitate, seu notionis eidem respondentis possibilitate evicta (§. 760.); demon-
stran-

strandum utique erit, quæ in definitione conjunguntur, eidem subiecto una inesse posse (§. 490.). Quodsi ergo in definitione continentur, quæ per alia in eadem definito attributa determinantur; demonstrandum est, hæcideo definito convenire, quia conveniunt cetera in definitione posita, per quæ determinantur (§. 216.). Eadem igitur opus est demonstratione (§. 522.), sive id, quod per alia, quæ definitionem ingrediuntur, determinatur, instar prædicati definito tanquam subiecto attribuas; sive idem definitione una comprehendas. Numerus adeo demonstrationum haud quaquam imminuitur, ubi in definitione cumulantur, quæ per se invicem determinantur.

In theologia naturali ex eo, quod Deus est ens a se & in eo continentur ratio sufficiens existentia contingentis hujus universi, deduci possunt cetera, quæ de eodem cognoscimus, attributa & opera. Quamobrem Dei definitionem nominalem conditurus eum definiri per *ens a se*, quod in se continet rationem sufficientem existentia contingentis hujus universi, cum non modo terminos definitionem ingredientibus in antecedentibus sufficienter explicassem, sed & demonstrassem, quod ens istiusmodi detur, ut de realitate definitionis nullum superesset dubium. Quodsi quis eodem, quo nos uti sumus, argumento existentiam & attributa atque opera divina demonstraturus plura, quæ Deo conveniunt, in definitione cumlaret eumque definiret per *spiritum infinitum & independentem*, qui, cum a se existat, sibi met ipsi sufficientissimus, nec ulla re extra se ad beatitudinem suam indigens, ex liberrimo tamen beneplacito gloriam suam demonstraturus hoc universum, quod contingenter existit, in tempore ex nihilo produxit, idemque ad huc conservat atque gubernat, sapientia suæ summæ ac bonitati convenienter; si omnia ista incommoda incurreret, quæ in præsentè propositione ex cumulatione superfluatorum in definitionibus deduximus. Realitatem hujus definitionis demonstraturus, antequam eadem uti potest tanquam principio demonstrandi, evincere tenetur, quæ in definitione cumulantur, sibi mutuo non repugnare, sed eidem enti convenire posse (§. 518.). Cum igitur ex contingentia universi & principio rationis sufficientis sequatur, quemadmodum a me ostensum, *dari ens a se & in eo contineri rationem sufficientem existentia universi*; ulterius demonstrandum est 1. *ens istud esse spiritum*; 2. *infinitum*; 3. *independentem*; 4. *idem sibi vix sufficere, nec ulla re extra se indigere*; 5. *habere voluntatem liberam*;

Et 6. decreta libera exequi posse; 7. mundum ab eo non fuisse productum ab eterno; 8. eundem fuisse productum ex nihilo; 9. mundum ab eodem adhuc conservari; atque 10. gubernari; 11. finem creationis esse demonstrationem gloriæ ipsius; 12. idem ipsum ens esse sapientissimum; nec non 13. bonum erga alios, seu benignissimum. Omnes istæ propositiones cum ex eo demonstrari possint, quod Deus sit ens a se & in se contineat rationem existentiam contingentis universi; plurimæ propositiones a definitione distinguendæ cum eadem confunderentur, singule tamen eodem modo adhuc demonstrandæ, ac si ex definitione exularent, & propositiones ceteræ de Deo non forent determinatæ, cum conditio, sub qua prædicatum de subjecto enuntiaretur, plurima contineret, quorum in demonstrando nulla habenda esset ratio. E. gr. Propositio: *Deus est omniscius*, logice resoluta (§. 223.) in hanc abiret: *Si Deus est spiritus infinitus & independens, si a se existit & sibi ipse sufficit ad beatitudinem suam, nec ulla re extra se indiget, si voluntatem habet liberam & decreta libera exequi potest, si mundum in tempore produxit & quidem ex nihilo, gloriæ suæ demonstranda gratia, eumque adhuc conservat & gubernat, si denique sapientissimus atque summe bonus est; omniscius est.* Quod si quis demonstrationem omniscientiae divinæ adornare tentet (§. 522); is abunde satis intelliget, quod multa superflua ingrediantur hypothesin, quibus ad demonstrandam omniscientiam minime opus.

§. 807.

Quando sup-
pe. sua in scri-
ptis dogmati-
cis historicis
continere non
debeant defi-
nitiones.

Si scriptum dogmaticum historicum ea fini conditur, ut ad scientifica intelligenda præparetur lector & alii discant veritates in usum vitæ; in definitionibus cumulanda non sunt talia, quorum unum per alterum determinatur. Etenim tunc tales in eo condendæ sunt definitiones, quibus in scripto scientifico locus est. Quamobrem cum ex scientifico proscribantur definitiones, in quibus talia cumulantur, quorum unum per alterum determinatur (§. 806.); nec eadem in historico tolerari possunt, cujus lectione præparari debet lector ad scripta scientifica tractanda.

Si scriptum dogmaticum historicum ea fini conditur, ut lectores discant veritates in usum vitæ; definitiones ita formandæ sunt, ut absque ambagibus ad rem in casu dato obviam agnoscendam & ab aliis distinguendam applicari possint. Enimvero defi-

definitiones, in quibus talia cumulantur, quorum unum per alterum determinatur, absque ambagibus applicari nequeunt (§. 806.): in scripto igitur dogmatico historico in usum vitæ conscripto tolerari nequeunt.

§. 808.

Si scriptum dogmaticum historicum ea fini conditur, ut tantummodo constet lectori, quænam sint definiti prædicata, in sola hac notitia acquieturo; tum in ejus notione omnia prædicata cumulari possunt, diciturque istiusmodi descriptio abusive definitio. Etenim si quis rei prædicata tantummodo nosse desiderat, ut sic ferente occasione eadem enarrare possit, aut recorderetur, hoc vel istud prædicatum, de quo sermo est, illi convenire; is omnia simul memoriæ mandare debet, cum sic audito nomine rei statim succurrant omnia prædicata, vel audito prædicato uno in memoriam redeant una cetera: id quod per ea manifestum est, quæ de memoria experientia loquitur. Consultum igitur est, ut nomini rei jungantur omnia prædicata, quotquot lectori familiaria reddere intendit scriptor.

Quando in scripto dogmatico historico definitiones superflua continentur.

Enimvero cum sic prodeat propositio composita ejusdem subjecti (§. 311.), minime autem definitio (§. 150.); nec nomen definitionis eidem tribui potest (§. 344.). Quodsi igitur propositioni huic compositæ definitionis nomen tribuitur, id per abusum fieri manifestum est.

§. 809.

Si definitio non omnia continet, quæ rei constanter insunt, nec tamen per se invicem determinantur; definitum tribuetur rebus, quibus minime convenit, nec omnia illius attributa inde demonstrari poterunt, ipsaque definitio manca, vel mutila est. Conf. §. 63. 169. 344. 522. 65.

Quando definitiones mutilæ & quænam de iis tenenda.

E. gr. Definitio *figura regularis* mutila est, quod sit *figura equalibus lateribus prædita*, cum ad figuræ regularitatem etiam requiratur *angulorum aequalitas*. Hac igitur definitione usus nomen figuræ regularis tribuet figuris æquilateris inæqualium angulorum, consequenter minime regularibus. Neque ex sola laterum æqualitate supposita demonstrabit, figuras regulares esse circulo inscriptibiles: quæ tamen in ipsa praxi utilissima est figurarum regularium proprietas.

§. 810.

§. 810.

Alios casus
definitionum
mutandarum.

Quoniam attributa communia per unum saltem, aurali-
quot essentialia determinantar (§. 65.), consequenter per se
mutuo determinari nequeunt, adeoque in abstracto considera-
ta cum essentialibus convenire videntur (§. 63.), demonstratio-
nem propositionis præcedentis adhuc subsistere pater, si in de-
finitione attributa communia pauciora commemorantur, quam
quot junctim sumta nonnisi definito comperunt. Pater igitur, *si
in definitione pauciora attributa commemorantur, quam quot jun-
ctim sumta nonnisi definito competunt; definitum tribui debere re-
bus, quibus minime convenit, nec omnia illius essentialia & attri-
buta propria ac communia cetera inde demonstrari posse, ipsamque
definitionem mutilam esse.*

E. gr. Mutila foret definitio *auri*, quod sit *metallum flavum & grave*,
cum color flavus & gravitas etiam orichalco convenient.

§. 811.

Quando prin-
cipia sunt in-
certa.

*Si quis definitiones, quarum realitatem nondum abstruxit,
& propositiones probatione indigas, sed nondum probatus in de-
monstrationibus, vel probationibus in numerum præmissurum admit-
tit; is principiis utitur incertis.* Conf. §. 532. 518. 476. 535.

E. gr. *Cartesiani* vulgo definitione *Dei*, quod sit *ens perfectissimum*,
utuntur in demonstrandis existentia & attributis divinis. Theologiam
adeo naturalem superstruunt principio incerto, etsi vero. Nos vero
in *Commentatione de differentia nexus rerum sapientis & fatalis necessi-
tatis* (§. 5.) offendimus, quomodo illius realitas evincatur, ut prin-
cipium certum evadat. Similiter alii probaturi existentiam *Dei* sine pro-
batione sumunt, *mundum capisse*, cum tamen vel ideo probatione in-
digeat, quod, qui *Deum* existere negant, sumunt, *mundum* non cœ-
pisse. Probationem adeo denuo principio etsi vero, incerto tamen su-
perstruunt.

§. 812.

Quando pro-
positiones in-
certæ sint.

Quoniam conclusio certa esse nequit, quæ probatur per
principia incerta (§. 541.); *propositiones quoque incertæ esse debent
leiori, si autor definitionibus utitur, quarum possibilitatem non
abstruxit & propositiones ad probandum ceteras sine probatione
sumit, utut probatione indigeant.*

E. gr.

E. gr. Si philosophus *Cartesianus* non ostenderit, *ens perfectissimum esse possibile*, & tamen notione ejusdem utatur ad demonstrandum existentiam & attributa divina; is existentiam Dei dubiam relinquit lectori, nisi aliunde fuerit de eadem certus.

§. 813.

Principia probandi probatione indiga, sed sine probatione sumta dicuntur *precaria*.

Principiorum
precariorum
definitio.

E. gr. Si quis contra atheum disputaturus postulat, ut sine probatione concedat, mundum aliquando coepisse, quod ille stante errore suo non largitur; is inde existentiam Dei eidem demonstraturus principio precario utitur. Nisi enim aliunde eidem probaverit, mundum non esse a se, quemadmodum a nobis factum est in *Metaphysicis*, probationem ejus nunquam admittit, sed constanter urgebit, precario sumi tanquam verum, quod falsum esse ipse arbitratur, mundum aliquando coepisse, cum antea non existeret.

§. 814.

Patet adeo eos *principiis precariis uti, qui utuntur principiis incertis* (§. 811. 813.).

Quinam iis
utantur.

§. 815.

Si autor scripti *scientifici* definitiones ab aliis datas & adstructas atque propositiones ab aliis publice demonstratas supponit, quæ tamen lectori perspectæ non sunt, atque iis utitur tanquam demonstrandi principiis; nec lector propositiones ab ipso propositas satis intelliget, (conf. §. 149. 115.) nec de earum veritate erit certus §. 811 sq.

Quando propositiones non satis intelligantur, nec earum veritas certa sit lectori.

§. 816.

Quod si autor, quæ aliunde supponit, ex aliis autoribus citet, lector veritatem eorum, quæ probat, assequi valet, ubi ante aliunde sibi cognita & perspecta reddit, quæ præsupponuntur. Perinde enim est ac si ipse autor ea probata dedisset & ubi lector eadem sibi cognita & perspecta reddit, de earum veritate non amplius dubitat.

Quomodo certitudini consulatur, ubi ab aliis data præsupponuntur.

§. 817.

Si scriptum *dogmaticum historicum* ea fini conditur, ut ad *scientificam* intelligendam præparetur lector & alii discant veritates (*Logica contracta*)

Quales definitiones & propositiones in

scripto historico dogmatico collocandæ.

in usum vitæ; definitiones nullæ in eo collocari debent, nisi quarum realitas in scripto scientifico jam adstructa, nec propositio ulla in eodem ponenda, nisi quæ jam publice in scripto aliquo scientifico fuerit demonstrata. (§. 760 518-541 343-509.)

E. gr. Si quis definitionem temperantiæ impossibilem format, is vi ejusdem homini, quem aliunde temperantem judicat, tribuet, quæ nunquam eidem convenire possunt. Quoniam itaque fieri nequit, ut in quodam unquam homine ea inesse deprehendantur, quæ in notione deceptrice temperantiæ continentur; nunquam etiam eadem homini temperanti agnoscendo inserviet. Similiter si quis de temperante judicaverit, quæ eidem convenire nequeunt; is in casu dato homini temperanti in singulari tribuet ab eodem maxime aliena. Patet igitur, quamdiu non constat, definitionem temperantiæ esse possibilem & quæ de temperante affirmantur, esse vera; definitiones pariter ac propositiones ad vitæ usum parum utiles esse.

§. 818.

Quando propositionibus probabilibus in scripto dogmatico historico sit locus.

Quodsi propositiones aliquæ in scriptis scientificis nondum fuerint demonstratæ, sed probabiliter tantummodo assertæ, quæ tamen vel in scientiis ad reddendas eorum, quæ observantur, rationes, vel ad quasdam in vita praxes utiles, quamdiu veritas ad liquidum non fuit perducta; eadem quoque scripto dogmatico historico in hypotthesi theorematis præcedentis inserendæ sunt, ita tamen ut propositiones certæ a probabilibus distinguantur. Etenim in hoc casu propositiones probabiles locum demonstratarum tuerentur in scriptis scientificis, quamdiu earum veritas ad liquidum perducere nequit. Quarecum demonstratæ in hypotthesi propositionis præcedentis locum habeant in scripto dogmatico historico (§. 817.); in præsentem casum probabiles quoque in eodem sibi locum vindicant. Distinguendæ tamen sunt propositiones probabiles a certis (§. 562. 563.), relege etiam §. 120. seqq. diff. prælim.

§. 819.

Quando certæ cum incertis confundantur.

Si autor scripti dogmatici historici propositiones probabiles a demonstratis non distinguit; certæ cum incertis confundit. Conf. §. 515. 537. 562 sq. 535.

§. 820.

§. 820.

Si quis propositiones pro demonstratis venditat, ad quas Alius casus. probandas sumit alias nondum probatas; is denuo certa cum incertis confundit. Vid. §. 469. 515. 535.

§. 821.

Si quis propositionis veritatem experientia constare dicit, Casus tertius. quæ tamen per eandem non patet, is quoque certa cum incertis confundit. Conf. §. 634 538. 638 535.

E. gr. Vulgus & qui in re astronomica vulgo non altius sapiunt sibi persuadent, experientia constare, quod terra quiescat & stellæ in universum omnes circa eandem ab ortu in occasum ferantur: Opticæ tamen gnarus probe intelligit, idem quoque apparere debere, si stellæ cum sole quiescant & terra motu vertiginis ab occasu versus ortum circumvolvatur. Qui igitur quietem Telluris & motum Solis atque stellarum diurnum tanquam experientia certum sumunt; ii certa cum incertis confundunt.

§. 822.

Quoniam multa cautione opus est, ne in formandis notionibus & judiciis intuitivis modos cum attributis & attributa communia cum essentialibus (§. 642. & seqq.) confundamus, vel pro causa effectus venditemus, quæ talis non est, atque pro unica habeamus, quæ plures socias requirit (§. 667. & seqq.) & ut notiones universales (§. 648. 652. & seqq.), definitiones (§. 649. & seqq.) atque propositiones universales cum categoricas (§. 675.), tum hypotheticas universales (§. 676. 677.) rite formemus; haud obscure patet (§. 821.), si quis in discernendis modis & attributis rerum observabilium, atque distinguendis attributis communibus a propriis & utrisque ab essentialibus, nec non in formandis notionibus universalibus, definitionibus & propositionibus universalibus atque in determinandis effectuum observabilium causis in regulas experientiæ a nobis demonstratas impingit, eum certa cum incertis confundere.

§. 823.

Si autor scripti dogmatici historici argumenta, quibus propositiones probantur, tantum indicat, ineoluta tamen pro demonstratione. Alia certi atque incerti consilio.

strationibus venditat; is denuo certa cum incertis confundit.
Vid. § 539. 522 seq. 541.

E. gr. Qui refert, Mathematicos ex umbra circulari telluris in eclipsis lunaribus demonstrare rotunditatem illius, hoc ipso nunquam efficiet, ut lector qui aliis speciminibus demonstrationis vim percepit, vel regularum logicarum gnarus, veritatis illius asserti convincatur.

§. 824.

Demonstratio
nis completæ
& incompletæ
definitio.

Demonstratio dicitur completa, in qua omnia principia demonstrandi vel explicite, vel implicite continentur. Incompleta vero appellatur, quæ principia demonstrandi nec explicite, nec implicite omnia continet. Continentur autem propositiones in demonstratione explicite, quæ disertis verbis enunciantur; implicite vero, quæ vel per eas, quæ adsunt, vel per citationes in memoriam revocantur. Conf. §. 768.

§. 825.

Demonstratio
nis consummata
& inconsummata
definitio.

Demonstratio consummata dicitur ordinata completa; Demonstratio vero inconsummata inordinata incompleta.

§. 826.

Criterion
definitionis
consummatæ.

In demonstratione igitur consummata nullum demonstrandi principium omittitur, quod non per ea, quæ adsunt, vel per citationes facile in memoriam revocetur, & singula eo ordine collocantur, quo in ratiociniorum serie, in quam demonstratio resoluta abit, continentur. Lege §. 825. 824 769.

§. 827.

Cur demonstratio
completa facile,
incompleta
difficiliter
intelligatur.

Si demonstratio fuerit completa, ab eo etiam lectore intelligitur, qui in eo argumento, ad quod spectat, nondum multum versatus; si vero incompleta, ab iis vel prorsus non intelligitur, vel nonnisi difficillime, seu multo temporis ac laboris dispendio. Conf. §. 824 768.

§. 828.

Prærogativa
demonstrationis
ordinatæ
præ inordinatæ.

Demonstratio ordinata facillime intelligitur, animum lectoris plenius convincit & genuinæ demonstrationis ideam distinctam animo ingenerat. Conf. §. 769. 541. 522 seqq.

§. 829.

§. 829.

Quoniam demonstratio consummata & ordinata est, & completa (§. 825.); ea & facile intelligitur, & plenius lectorem convincit, & genuinæ demonstrationis ideam animo ejus ingenerat (§. 827. 828.). Inconsummata cum inordinata sit & incompleta (§. 825.), difficulter intelligitur, lectorem non adeo fortiter ad assensum trahit, nec genuinæ demonstrationis ideam animo ejus ingenerat (§. §. cit.).

Demonstrationis consummatæ prærogativa.

§. 830.

Si quis in scripto scientifico in numerum axiomatum & posulatorum refert propositiones demonstrativas, is sine probatione sumit, quæ probari debebant. Vid. §. 259. 476. 515. 528. 264. 266.

Quando sine probatione sumuntur, quæ probari debent.

E. gr. Si quis existentiam Dei demonstraturus methodo mathematica inter axiomata refert, 1. *duri ordinem universi*, 2. *ordinem universi esse contingentem*; is sine probatione sumit, quæ quidem vera sunt, attamen sine probatione nec patent, nec ab atheo conceduntur.

§. 831.

Si quis judicium intuitivum, quod experientiæ minime obviæ debet, in numerum axiomatum, vel posulatorum refert; is sine probatione sumit, quod probari debet. Qui ad experientiam minime obviam provocat, is casum singularem afferre tenetur (§. 636.), unde scilicet judicium intuitivum deduxit, ut appareat, num idem sit rite formatum (§. 639. & 640.) & inprimis num ad universalitatem absque præcipitancia fuerit reductum (§. 675. 676. 677.). Non igitur sine omni probatione admitti potest. Jam vide §. 264. 266. 259.

Alius casus.

§. 832.

Qui propositiones ad probandum ceteras sine probatione sumit, utur probatione indigeant; is lectorem ad certam dogmatum, quæ proponit, cognitionem perducere nequit (§. 812.). Quamobrem qui in numerum axiomatum & posulatorum propositiones demonstrativas & judicia intuitiva experientiæ minus obviæ debita refert; is lectorem ad certam dogmatum, quæ proponit, cognitionem minime perducit (§. 830. 831.).

Cognitio certa quando non obtineatur.

§. 833.

Propositiones
scripto dog-
matico histo-
rico in usum
inventorum
inferendæ.

Si scriptum dogmaticum historicum in usum inventorum conditur, omnes propositiones eidem inferendæ sunt, quæ in scientificis publice demonstratæ extant. Etenim veritates ex definitionibus & hypothelibus datis eruturus familiares habere debet propositiones jam inventas (§. 694. 695.). Cum vero commode fieri non possit, ut omnes omnino propositiones, quæ in libris scientificis in aliquo genere scientiarum conscriptis demonstrantur, inveniendi arte pollentibus familiares sint, præsertim si in illa non sint continui; memoriæ vicem supplere debet liber dogmaticus historicus in usum inventorum conditus (§. 539.).

§. 834.

Eidem inferendæ in usum lectionis scientificorum.

Si scriptum dogmaticum historicum ea fini conditur, ut ad lectionem scientificorum præparetur lector; illæ propositiones eidem inferendæ sunt, quarum frequens est in demonstrandis aliis usus. Quoniam enim veritatis propositionis demonstratæ certus non est, qui præmissarum syllogismos concatenatos ingredientium veritatem ignorat (§. 541.); ad lectionem scripti scientifici accedens demonstrationum vim facillime percipit, qui omnes propositiones, quæ præmissarum loco habentur, familiares habet. Quamobrem illæ propositiones scripto dogmatico historico in usum lectionis scientificorum condito inferendæ, quarum frequens est in demonstrandis aliis usus.

§. 835.

Eidem inferendæ in usum vitæ.

Si scriptum dogmaticum historicum in usum vitæ conditur, propositiones eidem inferendæ sunt, quæ ad praxin tendunt.

§. 836.

Propositiones
inferendæ
scripto scienti-
fico in usum
vitæ.

Quoniam in scripto scientifico propositiones demonstrari, vel probari debent (§. 721.), facile patet, si scriptum scientificum in usum vitæ conditur, præter propositiones, quæ ad praxin tendunt, eas etiam inferendas esse, quæ illis demonstrandis inserviunt (§. 834.).

§. 837.

Eidem inferendæ in usum inventorum.

Eodem modo liquet (§. 721. 833.), si scriptum scientificum in usum eorum conditur, qui, ubi baculum inventa sibi familiaria-

miliaria reddiderunt, propria meditatione ulterioꝛa eruere decreverunt, ei inserendas esse propositiones etiam alias, quæ ad usum vitæ nondum transferri possunt.

Omnes nostræ actiones ad finem aliquem tendere debent: Cognitionis autem theoreticæ finis est praxis, vel ulterior veritas per eam eruenda. Qui inventores agere nolunt, frustra sibi familiares reddunt propositiones, sine quibus demonstrativa ratione praxes addiscere licet: ast inventorum non est negligere theoremata, quorum nulla adhuc utilitas apparet. Sufficit eadem esse vera, ut sic serenitate occasione præmissas præbeant ratiociniis, quibus ulterior veritas & nonnunquam quoque usus theorum hætenus desideratus detegitur.

§. 838.

Quoniam ex fine ab autore intento iudicium fieri debet, *Ufus theore-*
num scriptum ejus in suo genere completum sit (§. 786.); *remata de propositionibus unicuique scriptorum generi pro diversitate finium inferendis inserviunt iudiciis formandis, utrum scripta sint in suo genere completa, nec ne.* *matum præcedentiam.*

§. 839.

Si in resolutione problematis singula recensentur, quibus factis obtinetur, quod ad faciendum proponebatur, resolutio problematis completa est; in casu opposito incompleta. *Resolutio problematis completa & incompleta.* Vid. §. 273. 263. 91.

§. 840.

Si in resolutione problematis plura recensentur, quam quæ fieri debent, ut fiat, quod petebatur; resolutio superflua continet. *Resolutio superflua continens.* Resolutio problematis est notio distincta modi, quo aliquid fieri debet (§. 839.). Quod si igitur in ea plura enumerantur, quam quæ fieri debent, ut fiat, quod petebatur; ea ad resolutionem problematis non spectant & eadem salva ac integra abesse possunt (§. 789.).

Duplici autem modo innotescit, num problematis solutio superflua contineat, altero quidem a posteriori, altero a priori. A posteriori innotescit, ex resolutione superflua exulare, si ea ad casum singularem applicetur, cum sic appareat, num quibusdam prætermis-
præ-

præcipiuntur, fiat quod erat faciendum. A priori idem discitur, si attendamus, num singula, quæ præcipiuntur, demonstrationem ingrediantur. Utrobique cautione opus est, ne factio examine iudicium præcipietur. Etenim in casu priori haud rari sunt casus, ubi vix superflua detegere licet, nisi variis tentaminibus factis, num hoc, vel isto omisso adhuc obtineatur, quod intenditur. Exempla præbet formulæ medicamentorum compositorum. In casu posteriori demonstrationem non ingrediuntur, quæ id præstant, ut, quod erat faciendum, commodius fiat. Exempla præbet communis algorithmus numerorum integrorum, v. gr. cum numeris summandis decenter scriptis ducitur linea, quæ aggregitum inveniendum ab iisdem separat, ne numeri ad hoc spectantes per errorem ad illos referantur. Demonstrationem additionis minime ingreditur regula de linea sub numeris summandis ducenda.

§. 841.

Resolutio problematis vera.

Si demonstrari possit, factis iis, quæ in solutione problematis præcipiuntur, fieri, quod erat faciendum, nec in ea præcipiuntur, nisi quæ fieri posse jam constat; resolutio problematis vera est. Omne problema reducitur ad theorema, si resolutio sumitur pro antecedente & quod fieri debet pro consequente propositionis hypotheticæ. Scilicet omnia problemata continentur sub hac propositione generali: *Si hæc fiant, fit etiam, quod erat faciendum.* Jam si nihil præcipitur in resolutione, quod non fieri possit, antecedens verum est (§. 477.). Quare si demonstrari potest positus ibi fieri, quod erat faciendum; propositio hypothetica demonstrata est (§. 523.). Vera igitur est propositio hypothetica, ad quam resolutio problematis reducitur (§. 519. 515.), consequenter etiam problematis resolutio.

§. 842.

Alius casus.

Si experiamur, factis iis, quæ in resolutione problematis præcipiuntur, fieri quod erat faciendum; resolutio problematis vera. Conf. §. 841. 488.

§. 843.

Resolutio problematis falsa.

Qui demonstrationes theorematum præcedentium perpendit, is facile admittet, *resolutionem problematis esse falsam, si demonstrari possit, vel si experiamur, factis iis, quæ præcipiuntur, non fieri, quod erat faciendum.*

§. 844.

§. 844.

Si ea, quæ præcipiuntur, fieri non possunt, resolutio impossibilis. Resolutio impossibilis.

E. gr. Si quis parallaxin solis collatis inter se altitudine solis vera per calculum determinata & altitudine observata scrutari juberet; is problematis de parallaxi solis investiganda solutionem impossibilem daret, cum fieri minime possit, ut tam accurate computetur altitudo solis vera & observetur apparens, quantum huic negotio sufficit. Notandum vero non ideo ipsum problema solutu impossibile esse, quamvis resolutio ejus data sit impossibilis: Etenim non implicat, ut alio modo idem solvi possit. Ipsum exemplum, quod modo dedimus, asserti veritatem confirmat. Utut enim impossibilis sit, quam commemoravimus, problematis de scrutanda parallaxi solis solutio; non tamen ideo ipsum problema solutu impossibile est, cum alias solutiones dederint Astronomi, quibus parallaxin solis venari licet, in elementis Astronomiæ a nobis expōsitæ.

§. 845.

Quodsi ea, quæ in resolutione problematis præcipiuntur, non in potestate sunt, problema ad praxin transferri nequit. Resolutio a praxi aliena.

In hoc casu resolutio dicitur moraliter impossibilis. E. gr. Si quis medium ditescendi chrysopeiæ commendat, is problema ditescendi imperfecte solvit, ubi metalla viliora in nobiliora transmutari jubet, illam tamen transmutationem minime docet.

§. 846.

Hinc consequitur, in scripto cum dogmatico historico, tum scientifico problema ita esse ordinanda, ut solutiones posteriorum non præcipiant, nisi quod fieri possit per præcedentia. Ordo problematum.

§. 847.

Veritates dicuntur inter se connexæ, si cognitio unius pender a cognitione alterius. Unde consequitur, 1. definitiones esse inter se connexas, si definitum unius ingreditur definitionem alteram: 2. propositiones theoreticæ inter se connexi, si una ingreditur demonstrationem alterius tanquam præmissa: 3. problemata denique inter se connexi, si, quod in uno præcipitur, fieri potest per alia. Veritatum connexio definitur.

(Logica contracta.)

Pp

§. 848.

§. 848.

n quibusnam
scriptis verita-
tes inter se
conneſtantur.

Si quis ergo ſcriptum ſcientificum condit, quemadmodum a nobis præcipitur (§. 760.); veritates omnes inter ſe conneſtantur. Vid. §. 760. 846.

§. 849.

Nam conne-
xio in ſcriptis
dogmaticis hi-
ſtoricis locum
habet.

In ſcripto dogmatico hiſtorico veritates inter ſe conneſſi non poſſunt, niſi definitiones & problemata (§. 721. 532. 847.).

Quoniam tamen in ſcripto dogmatico hiſtorico definitionibus locus eſt, quæ ad definitiones ſequentes atque ſubjecta & prædicata propoſitionum intelligenda ſufficiunt (§. 793.); definitionum anteriorum definita ingredi poſſunt definitiones ſequentes (§. 847.).

Et quia in ſcripto dogmatico in uſum vitæ condito propoſitiones ſibi locum vindicant, quæ ad praxin tendunt (§. 835.), adeoque inprimis problemata, quæ propoſitiones præctiæ ſunt (§. 273.); ideo caveri poteſt, ne in reſolutionibus problematum poſteriorum præcipiatur, quod, quomodo fieri debeat, non patet per anteriora §. 847.).

Repugnat connexioni etiam ordo, qui in ſcriptis dogmaticis hiſtoricis tenendus. Ei enim ſatiſfacturus in uno loco congerere debet, quæ ad idem ſubjectum ſpectant (§. 797.), adeoque propoſitiones ita ordinare non datur, ut poſteriorum veritas pendeat a veritate anteriorum. *Ordo e contrario naturalis, quem ſcriptis ſcientificis vindicavimus (§. 798. 799.), connexionem indiviſam comitem habet:* ipſi enim ſatiſfieri nequit, niſi præmittantur, quæ ſequentibus intelligendis & demonſtrandis inſerviant (§. 799.): quod ubi factum fuerit, veritates inter ſe connexæ ſunt (§. 847.).

§. 850.

Tenenda circa
definitionum
ordinem.

Si termino, qui definitionem ingreditur, notio fixa, utut confuſa reſpondet, ejus definitio eidem præmittenda non eſt: quodſi tamen in ſequentibus definitione ejusdem opus eſt tanquam demonſtrandi principio, ea ibidem inferenda. Etenim in gratiam definitionum definitiones plures nec in ſcripto dogmatico hiſtorico (§. 793.), nec in ſcientifico locum habent (§. 794.), quam quæ ad ſequentes intelligendas ſufficiunt. Jam cum terminus, cui notio
fixa,

fixa, utut confusa responderet, non obstat, quo minus definitionem intelligas (§. 116.); ejus definitio in gratiam definitionis alterius, quam is ingreditur, minime præmittenda.

Quoniam vero in scripto scientifico unum quodque eo loco collocandum, ubi sequentibus demonstrandis inservit (§. 798.); ubi definitione illius termini tanquam demonstrandi principio opus habueris, ibi eam inferendam esse utique patet.

Ceterum cum definitio, cujus definitum ingreditur definitionem anteriorem, posteriori loco ponitur; multa attentione opus est, ne circulus in definiendo committatur (§. 167.), qui multoties vel ea sola de causa committi solet, quod definitiones inter se minime connectantur. Neque etiam vitium hoc in definiendo commissum facile detegitur, ubi auctores de rebus particularibus tractantes, quæ proponunt, ad systema aliquod minime referunt. Unde porro intelligitur, cur collatis ejusdem auctoris scriptis variis particularibus circulus in definiendo appareat, qui latet, ubi unum saltem legeris. Immo hinc ulterius inferitur, quanti sit usus, ubi quis systema aliquod sibi familiare reddit, ad quod definitiones suas omnes referat.

§. 851.

Si propositio aliqua independentem ab alia anteriore in subsequentibus demonstratur, quæ ejus demonstrationem tanquam præmissa ingredi possit dubio caret. Si probationem ingreditur propositio nondum demonstrata, propositio demonstrata non est, cujus veritas illa evinci debebat (§. 469.). Enimvero si in subsequentibus independentem ab hac propositione, cujus demonstrationem ingreditur, eandem demonstratur, perinde est ac si jam ante demonstrata fuisset, quam ad demonstrandum alteram adhibebatur. Cum adeo dubio careat, propositionem, quæ demonstranda erat, rite fuisse demonstratam (§. cit.); nec in dubium vocari potest, demonstrationem alicujus propositionis, illa salva, ingredi posse propositionem, quæ in subsequentibus independentem ab illa demonstratur.

Quando demonstrationem ingredi possit propositio inferius demonstranda.

§. 852.

Quoniam ordo mixtus requirit, ut constanter quidem præmittantur, quæ sequentibus intelligendis & demonstrandis inserviunt, hoc tamen non obstante eodem in loco pertractentur

Monitum de ordine mixto.

ad idem subjectum spectantia, quantum regula anterior permittit (§. 800); *in eo inprimis commodum accidit, ut propositionibus subinde ad alias demonstrandas utamur, quæ in subsequētibz demonstrationibus ab istis demonstrantur, cum sic plures propositiones de eodem subjecto in eodem loco congerere liceat, quæ alias in alieno erant reponendæ.*

Dicitur autem *propositio aliqua independentē ab altera demonstrari*, si nec hæc altera, nec alia demonstrationem ingreditur, ad quam probandam ista usi sumus.

§. 853.

Circuli in demonstrando definitio.

Si quis ad demonstrandum propositionem aliquam utitur alia, quæ independentē ab illa demonstrari nequit, *circulum in demonstrando committere dicitur.*

E. gr. Si quis demonstraturus *dari Deum* sumit, *dari fines rerum naturalium*, & vicissim demonstraturus *dari rerum naturalium fines* sumit *dari Deum*; is circulum viciosum committit.

§. 854.

Quod is demonstratio- nem efficiat nullam.

Qui circulum in demonstrando committit, is neutram propositionem demonstrat, in quibus demonstrandis is committitur. Etenim qui circulum in demonstrando committit, ad probandam propositionem A sumit propositionem B, quæ sine A tanquam certa supposita probari nequit. In demonstranda adeo propositione A supponitur ipsa A tanquam jam demonstrata, consequenter quæ contextitur demonstratio nulla est. Jam cum proposito A probata non sit, ea in probatione ipsius B sine probatione sumitur, atque adeo denuo demonstratio ejus nulla est (§. 469.). Patet igitur, quod erat propositum.

E. gr. Qui in demonstranda existentia Dei sine probatione sumit, *dari fines rerum naturalium*, is *existentiam Dei* non demonstrat. Quod si jam in demonstrandis finibus rerum naturalium tanquam certum ac demonstratum supponit, *Deum existere*, ob præsentiam, quam sibi dedisse videtur, demonstrationem; is nec demonstrat, *dari rerum naturalium fines.*

§. 855.

Methodi definitio & divisio.

Methodus. Ordo, quo utimur in tradendis dogmatibus, dicitur *methodus*. Appellatur autem *methodus analytica*, qua veritates ita pro-

proponuntur, prout vel inventæ fuerunt, vel minimum inveniri potuerunt. *Methodus* e contrario *syntbetica* appellatur, qua veritates ita proponuntur, prout una ex altera facilius intelligi & demonstrari potest. *Methodus mixta* est, quæ ex utriusque combinatione refultat.

Methodus nimirum analytica ab ordine scholæ magis abhorret, quam synthetica. Methodus analytica vocatur etiam *methodus inventio-nis*; methodus synthetica vero *methodus doctrinæ*; illa etiam *resolutoria* seu *methodus resolutionis*; hæc autem *methodus compositionis* appellatur.

§. 856.

Ex his adeo definitionibus judicare licet (§. 344.), quæ metho-
thodo utatur autor.

Quæ methodo
utatur Autor.

§. 857.

Quoniam in superioribus abunde docuimus, quem usum præstet Logica in veritate cum a posteriori (§. 639. & seqq.), tum a priori (§. 680. & seqq.) investiganda, & quænam circa definitiones (§. 149 & seqq.), quænam circa demonstrationes omnis generis (§. 520. & seqq.) sint tenenda, regulas quoque in condendis scriptis dogmaticis tum historicis (§. 758. 759.), tum scientificis (§. 760.) observandas explicavimus & in ipso discursu præliminari de methodo philosophica, quæ cum scientifica eadem est (§. 762.) & cum synthetica, si a mixta discesseris, prorsus coincidit (§. 855.), regulas potissimas tradidimus; immo diversitatem ordinis in dogmatis tradendis observandi (§. 799. & seqq.) ejusque regulas (§. 797. 798. 833. & seqq.) inculcavimus; non opus est, ut de regulis methodi analyticae & syntbeticae agatur. Notatis enim definitionibus utriusque methodi (§. 855.), regulæ anteriores modo citatæ absque ullo negotio ad suam methodum referentur.

§. 858.

Cum methodus analytica veritates eo modo proponat, quo vel inventæ fuerunt, vel minimum inveniri potuere (§. 855.); eadem lucem mutuatur ab arte inveniendi. Quamobrem ubi olim omnem artem inveniendi, quæ in exemplis latet, eruerimus & novis conclusionibus inde deductis auctam publicæ luci exposuerimus, revocatis exemplis ad suas regulas; *methodus quoque analytica magis patebit.*

Cur analytica
lucem mutuetur
ab arte in-
veniendi.

§. 859.

Compileris
& conditoris
systematis de-
finitio.

Compileris dicitur, qui, quæ ea de re, quam sibi pertrahendam fumsit, per alios libros sparsa reperit, in unum cogit, insuper habita veritatum connexionem, vel in scripto dogmatico historico finis ac ordinis nulla habita ratione. *Systematis* vero conditor est, qui veritates apud alios autores obvias suoque fini accommodas eligit & inter se connectit. *Systema* enim dicitur veritatum inter se & cum principiis suis connexarum congeries.

§. 860.

Plagiaris
definitio.

Plagiarius dicitur, qui, quæ ex aliorum scriptis hausit vel aliunde didicit, a se inventa esse affirmat.

Hinc perperam plagiaris nomen meretur, qui systema conditurus ab aliis inventa eidem inserit, inventoribus non laudatis: cum enim ipsi propositum sit systema condere, pro suis inventis non venditat, quæ aliunde haurit (§. 859.).

§. 861.

Compileris
plagiarius.

Si compileris aliis verbis reddit, quæ ex alterius scriptis hausit, ne ea inde hausisse videatur, plagiarius est (§. 860.).

§. 862.

Compileris
judicio carens.

Si compileris verbis connectit, quorum unum ex altero non infertur, vel cumulat, quæ sibi mutuo repugnant, sine judicio scriptum suum compilavit. Cum enim judicare nesciat, num propositio aliqua ex altera inferatur, & quænam sibi mutuo repugnent; judicandi facultate destituitur, quæ ad libros scribendos necessaria (§. 760.), adeoque sine judicio scriptum suum compilare debet.

E. gr. Si quis de anima philosophaturus *Lockii* sententiam suam facit, quasi nil obset, quo minus & materialis quædam substantia cognoscendi & appetendi facultate sit prædita; *Malebranchium* vero evolvens mox quoque *Cartesii* sententiam suam facit, quod ipsæmet cogitationes nostra doceant nos atque convincant, esse in nobis aliud quid præter corpus, is sibi mutuo repugnantia tradit atque adeo compilatorem sine judicio agit.

§. 863.

Epitomatoris
definitio.

Epitomator dicitur, qui ex scripto majore ea seligit, quæ dato fini inserviunt, & exinde minus componit.

§. 864.

§. 864.

Quoniam epitomator seligit ex opere majore, quæ dato cuidam fini inserviunt (§. 863.); ex sine, quem sibi præfixit, dijudicandum, num completum sit compendium ejus (§. 786.). Quoniam vero non minus scriptum scientificum, quam dogmaticum historicum in compendium mittere potest (§. 863.); eadem regula in dijudicandis compendiis locum habent, quæ de scriptis scientificis & dogmaticis historicis inculcavimus.

Compendia quomodo dijudicanda.

§. 865.

Cum tyrones in admittendis principiis non adeo scrupulosi esse soleant, accurata vero eorundem evolutione nimis diu detineantur, immo sæpiissime laboris pertæsi reddantur; in compendiis nonnulla sine demonstratione sumi possunt, quæ in systemate demonstrantur.

Qualis rigor demonstrandi conveniat compendiis.

§. 866.

Ex eadem ratione pater, si quæ theoremata ob praxin, quæ inde pendet, compendio inserenda, quorum demonstratio difficilis; ea sine demonstratione aliunde citanda afferenda esse.

Demonstrationes quænam in compendio omittendæ.

§. 867.

Immo ex eadem ratione liquet, ubi notio clara sufficit, non opus esse ut termini definitionem ingredientibus definiantur.

Quinam rigor in definiendo Epitomatori observandus.

Ita in compendio Geometriæ elementaris non definitur altitudo si-
guæ in genere, cum non demonstretur, e. gr. in triangulo altitudi-
nem esse lineam perpendicularem ex angulo uno in basin oppositam, con-
tinuatam, si opus fuerit, demissam, quemadmodum a nobis factum est
in Elementis Geometriæ Latinis; sed sic ferente occasione lineam istam
altitudinem appellamus.

§. 868.

Solida pertractatio dicitur, quæ regulis methodi ad amu-
sim respondet: superficiaria vero, quæ ab iisdem aberrat.

Solida & superficialis tractationis definitio.

§. 869.

Quod si ergo quis methodi notionem falsam sibi formavit, vel inadequatam, quam ingrediuntur termini non satis intel-
lecti; is sibi videbitur regulas methodi observasse, ubi ab iisdem
aberrat (§. 343 344), consequenter solide omnia pertractasse, ubi
superficiaria tractatione fuerit contentus. Facile apparet, idem
obtinere.

Cur multorum judicia de solida & superficiali tractatione fallant.

obtinere, ubi de aliorum tractatione iudicium ferendum, num ea solida sit, an superficialia.

§. 870.

Solidæ ac superficialiæ tractationis discrimen.

Quoniam solida rerum, de quibus agitur, pertractatio regulis methodi ad amissum respondere debet; superficialia autem ab iis aberrat (§. 868.); in solida pertractatione non utendum est terminis nisi accurata definitione explicatis, nec principiis nisi sufficienter probatis, propositiones singulæ ex principiis suis demonstrandæ vel, ubi principia certa deficiunt, probabiliter adstruendæ, ac singula ita ordinandæ, ut continuo præmittantur, per quæ sequentia intelliguntur, vel probantur (§. 760.). Quæ igitur utitur terminis non sufficienter explicatis atque principiis precariis, nec formam probationum legitimam attendit, immo priori loco profert ea, quorum cognitio ab iis pendet, quæ posteriori collocantur; is superficialia tractatione contentus.

§. 871.

Quæ sit scriptum solidæ ac superficialiæ tractationis.

Hinc ulterius consequitur, si solide pertractentur ea, de quibus in scriptis dogmaticis agitur, librum esse debere perspicuum (§. 790.), ordine naturali conscriptum (§. 798. 799.), demonstrationes consummatas (§. 826.), resolutiones problematicum completas (§. 839.), & veritates omnes inter se connexas (§. 847.). E contrario autem patet, si autor superficialia tractatione fuerit contentus, librum fieri obscurum (§. 790.), ordineque scholæ conscribi (§. 799.), verba cum rebus confundi (§. 804. 805.), in definitionibus nunc superflua cumulari (§. 806.), nunc mutilas afferri (§. 809. & seqq.), principia admitti precaria (§. 813.), propositiones non satis intelligi, multo minus earum veritatem perspicere posse (§. 815.), certa cum incertis confundi (§. 819. & seqq.), demonstrationes, si quæ afferuntur, esse minus consummatas (§. 826.) problematum resolutiones nunc incompletas esse, nunc superflua continere, nunc falsas, nunc prorsus impossibiles, vel minime a praxi alienas esse (§. 839. & seqq.), veritates nullas inter se connexas (§. 848.), nec certam ex istiusmodi libro rerum hauriri posse cognitionem (§. 832.).

CAPUT VI.

DE LEGENDIS LIBRIS TUM
HISTORICIS, TUM DOGMA-
TICIS.

§. 872.

Qui libros legit, operam dare debet, ut, quæ in iis narrantur facta, vel traduntur dogmata, intelligat & memoriæ mandet sibi profutura. Officium ejus, qui libros legit.

§. 873.

Si quis librum sive historicum, sive dogmaticum intelligere debet, easdem cum verbis singulis notiones conjungere tenetur, quas cum iisdem jungit autor (§. 115.). Quando verba autoris intelligamus,

Abstine autem, ut quis arbitretur, notiones cum verbis alterius conjungendas semper esse debere distinctas: etsi enim distinctæ præstent consensum, ad mentem tamen alterius intelligendam sufficiunt confusæ. Qui igitur, quæ de notionibus in genere prædicamus, ad distinctas restringit, theorema nostrum in perversum sensum trahit (§. 118.).

§. 874.

Quodsi igitur autor terminos, quibus utitur, explicat, definitiones eorundem nobis familiares reddere atque juxta eas illos interpretari tenemur (§. 873.). Quid faciendum, si autor terminos definit.

Neglectus hujus regula perversam interpretationem sapissime gignit: id quod expertus loquor. V. gr. In Meditationibus metaphysicis de Deo, anima & mundo definivi mundum per seriem simultaneorum & successivorum inter se connexorum & stante hac definitione non unum de mundo prædicavi, quod in alio sensu non habet locum. Unde sensum verborum meorum pervertentes nunc vocem mundi sumunt pro compage corporum mundi totalium, nunc pro statu quodam particulari telluris, nunc pro genere humano, nunc pro hominibus impiis & ita porro.

(Logica contracta.)

Qq

§. 875.

§. 875.

Quid faciendum, si autor definitiones supponit.

Hinc consequitur, si autor terminos aliunde cognitos supponit, definitiones eorundem ex aliis libris esse repetendus & ad eos applicandas (§. 344.).

§. 876.

Quid faciendum, si terminus nondum definitus utatur.

Quodsi autor utatur voce, qua utimur in communi sermone, non definita, in significatum inquirendum est (§. 147.), quem ipsi tribuit usus loquendi (§. 873.) Conf. §. 648.

Quodsi autor non sine iudicio scribit, ex communi usu loquendi non supponere debet vocum significatum tanquam perspectum, nisi cui notio fixa, utnt confusa respondet. Suppono enim, quod velit intelligi: si vero supponit terminos vagos non fixos, aut prorsus non, aut dubie intelligitur (§. 127. 116.).

§. 877.

Idem ulterius deducitur.

Quodsi significatus (§. 147. 876.) repertus propositionem reddat falsam, vel prorsus manifesto absurdum, nec autor fuerit compilator iudicio carens (§. 862.); concludendum erit, ipsum ab usu loquendi recedere, adeoque ubi significatus tantisper variatus producit sensum propositionis vel verum, vel saltem non manifesto absurdum, is voci non definitæ tribuendus.

E. gr. Nos definivimus mundum per seriem omnium simultaneorum & successivorum inter se connexorum & in hoc significato vocis demonstravimus, posito miraculo nec per aliud restituto, quod naturaliter illo non posito secuturum fuerat, per omne subsiquens tempus mundum differe ab eo, qui futurus erat, miraculo non patrato. Qui definitionem nostram non legerant vel saltem sibi familiarem non reddiderant, vocem mundi in significato communi pro compage corporum totalium sumentes propositionem ita interpretabantur, quasi defenderem, miraculum non posse patrari, nisi Sole & Luna e locis suis dirulsis. Inde intulerunt, stante hac hypothesi miracula esse neganda, ac hinc porro alia, quæ recenseri a presente scopo alienum.

§. 878.

Quid faciendum, si autor sibi contradicere videatur.

Ex eadem ratione liquet, si autor non fuerit compilator iudicio carens & significatus verborum a nobis repertus producat sensum propositionis alibi ab autore stabilitis contrarium; tantisper

per autem variatus iis consentientem; non illum, sed hunc esse verborum auctoris sensum.

Ratio equidem hæc probabilis tantummodo est; sed in eo casu, ubi auctor nec terminos ipse definit, nec ab aliis definitos supponit, nec in communi sermone fixus, sed vagus est significatus eorum, rationi probabilis locus est.

§. 879.

Quoniam tamen experientia dudum comprobavit, fieri **Alius casus.** facillime posse, ut, licet per definitionem terminus a significato vago ad fixum ab auctore fuerit revocatus, idem tamen per præcipientiam, aut memoriæ lapsu alicubi ab eodem recedat; si propositio aliqua per definitiones auctoris falsa evadat, ab iis autem si tantisper recedas, sua eidem constet veritas; non prior, sed posterior sensus auctori tribuendus.

§. 880.

Quoniam in scripto scientifico termini non admittuntur, **Sensus in scriptis scientificis quomodo servatur.** qui non fuerint definiti, nisi iisdem notio confusa fixum vindicet significatum (§. 760.); in scripto scientifico propositiones omnes per definitiones auctoris sunt explicandæ, nec admittendus alius earum sensus nisi qui inde prodit, excepto casu unico, ubi auctor in methodi regulas ex defectu attentionis impigit (§. 879.).

§. 881.

Paret adeo, in scripto scientifico lectori attento sensum auctoris ubivis esse certum, nec perverti posse, quin sensus perversus demonstrativa ratione refellatur. **Scripti scientifici sensus cur certus & perverti nescias.**

§. 882.

Quoniam in scripto historico nonnisi facta recensentur (§. 714.), adeoque terminis non alius convenire potest significatus, nisi quem iisdem vel in communi sermone, vel in scriptis dogmaticis obtinent omnium manu tritis; in lectione scripti historici sufficit, ut ad singula verba attenti eas cum vocibus singulis jungamus notiones, quas vulgo cum iisdem in sermone communi, vel in scriptis dogmaticis tritis conjungunt (§. 875. & seqq.). **Quid tenendum de lectione scripti historici.**

Plura scilicet subsidia non affert Logica: unde omittimus cetera, quæ aliunde petenda, utut ex hoc principio demonstranda. V. gr. In historia

istoria civili ad intelligendum mentem autorum opus habemus Geographia, Chronologia, Genealogia.

§. 883.

ignoranti terminos, quos autor supponit, cur liber obscurus.

Quodsi lectori definitiones terminorum, quas autor supponit, non fuerint perspectæ, vel oim memoria creditæ non succurrant; mentem illius assequi non potest (§. 115.).

§. 884.

Explicatio per etymologiam fallax.

Si quis termini, quem autor supponit, definitionem ignorans vi etymologiae vocis notionem quandam sibi fingit cum ea coniungendam; is mentem auctoris non intelligit, nisi ratio denominandi fuerit a notione petita (§. 115. 118.).

E. gr. Si quis ignorat, quod astronomi nomine *stella fixa* intelligant & vi etymologiae vocem interpretatur *de stellis*, quæ fixum, seu constanter eundem in calo tuerentur locum, is beneficio etymologiae sensum auctoris assequitur. Enimvero si quis ignorat, quid iisdem nomine *motus veri Solis* designetur, & vi etymologiae (verba enim, *motus* verus termino composito æquivalent) concludit, eo denotari motum Solis, qualis revera in se est, non qualis nobis e Tellure visus apparet, is sensum fingit a mente astronomorum prorsus alienum.

§. 885.

Quando definitionis in interpretando nullus usus.

Si autor definitionem ex terminis extruit, quibus simul sumtis non aliam tribuit notionem, quam confusam definito respondentem; ea propositionibus ac definitionibus, quas ingrediuntur, intelligendis non inservit (§. 163. 115.).

§. 886.

Casus alius.

Si definitionem auctoris ingrediuntur termini improprii & vagi; propositionibus ac definitionibus intelligendis inservire nequeunt. Conf. §. 127. 116. 136.

E. gr. Si quis intellectum definit per *lumen mentis*, vocem luminis improprie sumit. Definitionis igitur nullus est usus in interpretandis propositionibus, quæ de intellectu aliquid enunciant. V. gr. Si quis affirmaverit, *emendationem hominis non incipi debere ab intellectu*; definitio ad propositionem intelligendam minime conducit. Si enim definitionem in locum definiti substituas, hæc prodit propositio altera, *emendationem hominis non incipi debere a lumine mentis*, quæ non melius intelligitur anteriori.

§. 887.

§. 887.

Si quis in definitionibus utitur terminis nondum definitis, Et quibus nulla ratio fixa confusa respondet; definitiones ejus pro Casus adhuc
alius.
positionibus ac ceteris definitionibus intelligendis inservire nequeunt (§. 115. not. §. 886.).

E. gr. Si quis cum *Aristotelicis* definit *sapientiam* per scientiam rerum sublimium; quid vero sint *res sublimis* non explicat; definitio ejus non inservit intelligendis propositionibus de sapientia. Ponamus enim autorem hanc scientiæ definitionem tradentem affirmare, *timorem Domini esse initium sapientiæ*, ubi definitionem sapientiæ pro definito substitueris, prodibit hæc altera: *timor Domini est initium scientiæ rerum sublimium*. Sed hæc non clariorem fundit sensum, quam anterior, quamdiu ignoratur, quid rerum sublimium nomine veniat.

§. 888.

Si quis tradit definitionem mancā, Et propositionem juxta eam interpretatur, in qua prædicatum definito juxta completam notionem competit; sensus propositionis erroneus evadit. Definitiones
mançæ cur in
interpretan-
dis proposi-
tionibus er-
rorem pa-
riant.
Etenim ubi mutila fuerit definitio, definitum tribuitur rebus, quibus minime convenit (§. 809.). Quamobrem si contingat, prædicatum definito non competere nisi juxta definitionem completam, propositio autem explicetur secundum mutilam; prædicatum quoque tribuetur rei, cui minime convenit (§. 476. 593.).

E. c. Manca est definitio *figuræ regularis*, quod sit *figura equalium laterum*. Quamobrem si occurrat theorema: *Omnis figura regularis est circulo inscripibilis*, idque juxta definitionem mancā interpretaris, quod *omnis figura equalium laterum circulo inscribi possit*; sensus theorematum erroneus est. Dantur enim figuræ æquilateræ, quæ circulo inscribi nequeunt.

§. 889.

Si in definitionibus cumulentur, quæ per se invicem determinantur, propositiones per easdem explicatæ sunt identicæ, vel non satis accurate determinatæ. Definitiones
abundantes
quæ incom-
moda in in-
terpretando
pariant.
Etenim si in definitione cumulantur, quæ per se invicem determinantur, demonstrandum utique est, ut constet, definitionem esse possibilem, id, quod per alterum

alterum determinatur, definito convenire, quia convenit eidem hoc alterum (§ 216.). Prædicatum adeo propositionis hujus jam continetur in definitione, adeoque cum subiectum sit definitum, in ipsa notione subiecti. Est igitur prædicatum cum subiecti parte idem, consequenter propositio in numerum identicarum recte refertur (§. 211.).

Quodsi prædicatum propositionis categoricæ non est in numero eorum, quæ in definitione cumulantur; vi tamen definitionis eidem tribuendum (§. 344.). Enimvero cum plura cumulentur in definitione, quam quæ eam ingredi debent, *per hypothesis*; non vi integræ definitionis, sed saltem nonnullorum in ea contentorum prædicatum subiecto convenit. Perinde igitur est ac si in propositione hypothetica conditio plura contineret, quam quæ ad hoc requiruntur, ut prædicatum subiecto tribui queat (§. 215. 222.), consequenter propositio accurate determinata non est (§. 315.).

E. gr. Si *triangulum æquilaterum* definiatur per *triangulum æquilatum laterum & angulorum*; ante demonstrandum est, figuram triangularem & æquilateram, & æquiangulam esse posse, hoc est, ideo esse æquiangulam, quia æquilatera. Propositio vero, *triangulum æquilaterum angulos habet inter se æquales*, ita vi definitionis explicanda: *triangulum, quod latera & angulos inter se æqualia habet, angulos inter se æquales habet*. Ecquis vero negabit, propositionem sic fieri identicam. Quod vero propositiones sic non fiant satis determinatæ, in superioribus jam demonstravimus & exemplo confirmavimus (not. §. 806.).

§. 890.

Notiones ex
exemplis &
propositionibus
derivandæ.

Quodsi definitio vel defecerit, vel ad interpretationem parum apta tradita fuerit; ea cum verbis auctoris conjungendæ sunt notiones, quas vel exempla in medium allata, vel probatio propositioni adjecta insinuant (§. 873.).

E. gr. Ponamus *Titium* in scripto historico appellari *temperantem* & probationis loco adduci, quod nunquam comederit ad satietatem, sed frugali cœna contentus a cibo capiando deslitterit, cum sapor appetitum ulteriorem cieret, omnemque cibum averſatus fuerit, quem

quem sibi, vel aliis nocuum expertus fuerat, utut saporem suavis-
simum judicaret. Facile apparet, animo historici eam infēdissē tem-
perantiē notionem, quod sit habitus appetitum moderandi in capien-
do cibo, ne stomachum nimio oppleamus, nec sanitati adversum eide-
m ingeramus.

§. 891.

*Quodsi notio, quam verbis auctoris jungimus, sensum produ-
cat erroneum, nec tamen probari possit, ex intentione auctoris eam
cum iisdem notionem esse jungendam; præstat confiteri, nos men-
tem ejus non assequi, quam errorem eidem tribuere, præsertim ubi
judicii & acuminis dederit specimina alia* §. 873.

Sensus erro-
neus dubius
auctori non
tribuendus.

Facile apparet, nos hic supponere, per regulas antea traditas sen-
sum verborum auctoris erui non posse. Veteribus Philologis, quo-
rum non amplius extant scripta, sed ab aliis tantummodo concisis ver-
bis relata sententiæ prostant, neglecta hæc regula frequenter tri-
buuntur errores a mente ipsorum dubio procul quam maxime
alieni.

§. 892.

*Æquus in interpretando appellatur, qui verbis auctoris
non aliū tribuit sensum, quam quem iisdem convenire, de-
monstrare, aut, ubi minime erroneus fuerit, probabiliter ad-
struere valet. E. contrario iniquus in interpretando est, qui
verbis auctoris tribuit sensum erroneum, quem iisdem conve-
nire demonstrare nequit. Dantur autem gradus hujus in inter-
pretando iniquitatis, ita ut major sit, ubi per regulas antea tra-
ditas, seu argumentis insitis, probari potest, sensum errone-
um esse a mente auctoris alienum, & adhuc major, si quis
sensum erroneum verbis auctoris tribuere pergit, ubi falsæ in-
terpretationis fuerit admonitus & verus verborum sensus demon-
stratus.*

Æquitas &
iniquitas in
interpretando
definitio.

§. 893.

Cum in scripto scientifico lectori attento sensus ubivis
certus sit, nec perverti possit, quin sensus perversus demonstra-
tiva ratione refellatur (§. 881.), in eodem autem omnes proposi-
tiones per definitiones auctoris sint explicandæ (§. 880.); manifesta

Iniquitas ma-
nifesta in in-
terpretando.

sta

Ita sane iniquitas est, si quis verbis auctoris affingit sensum definitionibus ejus contrarium.

§. 894.

Iniquissima
interpretatio.

Quodsi ergo quis ne monitus quidem semel, vel aliquoties, ab interpretatione definitionibus auctoris adversa desistit, quin ea iniquissima omnium sit dubitari nequit (§. 880. 881.).

§. 895.

Rationes in-
terpretationis
iniquissimæ.

Si quis ne monitus quidem ab interpretatione verborum auctoris definitioni ejus contraria desistit, is ei inhaeret vel ex odio erga auctorem, vel ex fastu inani, vel ex supina negligentia. Etenim is aut non dignatur veram interpretationem definitioni conformem intueri, multo minus eam perpendere, aut errorem, quem in interpretando committit, confiteri renuit. In priori casu supinam esse negligentiam, nullo modo condonandam, præsertim ubi ex falsa interpretatione deducuntur consequentiæ auctori molestæ, nemo est qui diffiteri aulat. In casu posteriori cum ratio non in intellectu hæreat, in voluntate utique querenda. Aut igitur errorem confiteri non vult, quod auctori nocere intendit, aut ne negligentia, vel ignorantia ipsi vitio vertatur. Quod auctori nocere intendens odium erga ipsum animo conceperit; qui vero negligentia vel ignorantia reus haberi non vult, fastu inani turgat: denuo satis manifestum esse arbitror, utidem ulteriori probatione non indigeat.

§. 896.

Quando pro-
positiones
compilatoris
per definitio-
nes non expli-
candæ.

Si compilator non utitur definitionibus, quas vel in eodem, vel in diversis scriptis affert, ubi earum applicatione prodit sensus propositionum vel falsus, vel nullus; propositiones per definitiones interpretari non licet. Ubi compilator per alios libros sparsa in unum cogens insuper habita veritatum connexionem, (§. 859.) definitionibus, quas affert, non utitur; ipse terminos in propositionibus obvios per definitiones non explicat, adeoque non attendit, utrum sensus earum sit hisce consensaneus, nec ne. Non igitur propositiones per definitiones interpretari licet, ubi sensus prodit vel falsus, vel nullus, nisi iniquus in interpretando esse volueris (§. 892.).

E. gr.

E. gr. Cum non nemo definiret *possibile per id, quod potest fieri, nec tamen sit*, hac definitione vero non obstante affirmaret, *Deum non posse facere nisi possibilia*; iniquum fore pronunciavi, si quis ejus propositionem de Deo per definitionem possibilitatis interpretaretur. Etenim si ea substituitur in locum definiti, sensus propositionis talis evadet: *Deus non potest facere, nisi quæ fieri possunt, nec tamen sunt*. Quoniam itaque vi hujus definitionis dicendum erat, autorem statuere, quod Deus eorum, quæ actu sunt, nihil faciat, consequenter nec mundum producere possit; malui judicare, autorem definitionibus suis non uti, quam ipsi tribuere sententiam, quam forte ne somniando quidem assecutus.

§. 897.

Quoniam unius ejusdemque termini, non variato significato (§. 139.) plures dari possunt definitiones (§. 169. & seqq.); *servus propositionis verus prodit, quamcunque substituere pro termino volueris definitionem*. Non igitur *iniquus est in interpretando, qui per definitionem ab auctoris definitione diversam, modo veram propositionem ejus interpretatur* (§. 892.).

Quando liceat
ui definitione
a definitione
auctoris diver-
sa in interpre-
tando.

§. 898.

Si quis in scripto scientifico demonstrationem auctoris definitionem nixam intelligere voluerit, per eas præcise definitiones propositiones interpretari tenetur, quas auctor condidit, non per alias eidem æquipollentes (§. 728. §22. 873.).

Quando idem
non liceat.

§. 899.

Quodsi auctor cum quibusdam terminis conjungit notionem confusam, lector autem distinctam, & utraque eadem res representatur; lector mentem auctoris intelligit & melius explicat (§. 140. 873.).

Quo successu
in interpre-
tando notio
distincta con-
fusa substitua-
tur.

§. 900.

Si auctor terminis rerum practicarum jungit notiones, quas praxis ipsa eidem suggerit; mentem ejus non rectius intelligit, quam qui ipsa praxi easdem in se notiones excitat.

Quando pra-
xis suggerat
notiones ter-
minis jungen-
das.

Monui in notis ad Orationem de Sinarum philosophia practica, *Confucium*, Sinarum philosophum, firmiter fuisse persuasum, absque exercitio veras rerum moralium notiones comparari non posse, nec obtineri (*Logica contrafla.*)

Rr

nisi

nisi umbras earum & inanes ac sæpe falsas imagines. Vide not. 106. III. Et ibidem jam annotavi not. 136, id inprimis fieri debere, ubi auctor in confusis notionibus acquiescit.

§. 901.

Notiones in historia naturalis interpretanda requiruntur.

In lectione historię naturalis cum verbis auctoris ea conjungendę sunt notiones, quę rebus pręsentibus in animo hominis excitantur (§. 715. 873.).

E. gr. Si in historia naturali asseritur, *solem oriri*; non alia cum his verbis notio jungenda est, quam quę solem orientem intuentibus pręsens est, hoc est, quę a re pręsente abstrahitur. Cum igitur solem orientem intuentes non observemus, nisi quod appareat in horizonte, cum antea latuisset; notio *ortui Solis* respondens non est alia, quam quod sit *apparentia Solis antea latentis in horizonte*. Similiter quando *Sol dicitur moveri circa tellurem*; cum his verbis non alia conjungenda est notio, quam quę ad hoc phænomenon attendentibus pręsens, seu quę a phænomeno pręsente abstrahi potest. Jam si ad Solem per diem fuerimus attenti, nil quicquam aliud observamus, nisi quod *fusus ejus respectu puncti fixi in Tellure dati continuo mutetur*. Cum motu igitur *Solis circa terram* non aliam jungere licet notionem, quam quod sit *continua situs Solis mutatio respectu puncti fixi in Tellure dati*.

§. 902.

Quinam rectius eam interpretentur.

Non igitur rectius historiam naturalem interpretatur, quam qui ipsa verum naturalium observatione notiones sibi comparat, facultate formandi notiones, quantum datur, distinctas instructus (§. 900.).

§. 903.

Notiones in historia reliquę interpretanda requiruntur.

Facile absque demonstratione ulteriori patet, si in scripto historico occurrant termini facta hominum, vel opera artis denotantes, perinde ac in historia naturali (§. 901.) non alias jungendas esse notiones, quam quę a rebus pręsentibus abstrahuntur.

Pertinent huc etiam nomina officiorum & dignitatum, & illiusmodi alia.

§. 904.

Quinam eam rectius intelligant.

Hinc ulterius consequitur; non rectius scriptum historicum intel-

intelligi nisi ab eo, qui rerum præsentium, de quibus sermo est, notiones ipso usu sibi comparavit.

E. gr. Qui bello nunquam interfuit, nec accuratis schematis, quæ ibi contingunt, delineata vidit; is descriptionem belli alicujus non æque intelliget ac alius, qui ipsemet bello interfuit & singula in eo usitata proprio sensu usurpavit.

§. 905.

Eodem modo parer, si autor historie naturalis verbis eam notionem jungit, quam facto experimento sibi comparavit; eandem quoque verbis ejus esse jungendam, nec rectius mentem ejus intelligi quam ab eo, qui notionem experimento repetito acquisivit.

Notiones experimento acquisitæ quando usui in interpretando.

E. gr. Si quis ipsemet iteravit experimentum, quo Hauksbejus affricu virri per contactum manus lumen excitavit; is hujus luminis notionem eandem, quam ille habet, atque adeo rectius mentem ejusdem intelligit, dum descriptionem illius legit, quam si nunquam ipse idem lumen oculis usurpasset.

§. 906.

Si autor cum verbis suis conjungit notionem deceptricem, lector mentem ejus intelligit, ubi eandem notionem deceptricem iisdem jungit. (§. 873.).

Notionum deceptricium quinam in interpretando usus.

E. gr. Si quis affirmaverit, figuram rectilinearum omnium simplicissimam esse bilineum rectilineum; is bilinei rectilinei nonnisi notionem deceptricem habet, dum id fingit esse spatium duabus lineis rectis terminatum. Etsi igitur verbis spatium duabus lineis rectis terminatum nulla respqndeat notio, sed ea potius sint sine mente sonus; propositionem tamen; quam debilineorectilineo in medium attulimus, interpretaturus, bilineum rectilineum per spatium duabus lineis rectis terminatum explicare debet, ut mentem autoris assequatur.

§. 907.

Si autor terminis, quibus utitur, notionem imaginariam jungit; lector mentem ejus affecuturus cum iisdem eandem notionem imaginariam jungere debet (§. 906.).

Notionum imaginariarum usus in interpretando.

E. gr. Plerique spatii nonnisi imaginariam notionem habent, dum sibi illud representant tanquam extensum continuum uniforme, seu cujus

partes

**partes aequales non differant nisi loco.* Quamobrem si quis hanc notionem cum voce *spatium* conjungit; lector a mente ejus aberraret, si aliam cum eadem jungere vellet, v. gr. quod sit *ordo simultaneorum*, vel, ut *Leibnitius* loquitur, *coëxistentium*.

§. 908.

Definitionum
realium in in-
terpretando
abus.

Si autor supponit in propositione definitionem realem, mentem ejus clarius intelliges, ubi re per genesin suppeditatam producta notionem ejus claram, sive distinctam, sive confusam fueris consecutus (§. 874.). Ubi Autor definitionem reitermino aliquo denotatæ dedit realem, terminus iste per hanc definitionem realem explicari debet. Enimvero cum genesis rei raro inserviat eidem, quando nobis obvia est, agnoscendæ & ab aliis distinguendæ; non inutile est, ut præterea ejusdem notionem aliam completam habeamus, sive distinctam, sive confusam. Hanc igitur ubi cum definitione reali combinamus, clarior nobis evadit propositio, cum magis pateat, cuinam subjecto propositio sit tribuenda. Quamobrem cum eandem notionem adipiscamur, ubi rem præsentem intuemur, per genesin autem res præsens fisci possit; ut eam hac via venemur mentem autoris clarius intellegenduri, e re nostra esse quis dubitet?

E. gr. Definitio *circuli* realis est, quod sit *figura, quæ describitur, si recta quædam circa punctum fixum in orbem rotetur*. Quodsi igitur autor præmissa hac definitione asserat: *triangulo cuique circumscribi posse circumulum*, clarius mentem ejus intelliges, ubi vel nominalem simul habueris, vel confusa ejus idea animo observeretur.

§. 909.

Scripta histo-
rica qua at-
tentione le-
genda.

Si quis ea, quæ in scripto historico quocunque legit, eo modo expendit, quo notionem distinctam venamur; eadem memoria facile retinet (§. 652.). Constat vero experientia, ejus rei ideam memoriæ facile imprimi, in qua cogitationes ita designamus, ut attentionem ordine ad singula promoveamus, quæ in eadem discerni possunt. Quamobrem si ad narrationem facti, vel descriptionem operis eandem attentionem afferimus, qua in venanda notione distincta utimur; eandem quoque memoriæ facile imprimere debemus.

Quodsi in scripto dogmatico historico eadem cum cura ver-

verferis, in definitione definitum & notas, quæ eam ingrediuntur, singulas, ubi nominalis fuerit (§. 189. 190.), vel quæ in genere ejus ullo modo discerni possunt, ubi realis fuerit (§. 191.), in propositionibus subjectum & prædicatum una cum adjectis determinationibus, si categoricæ non fuerint (§. 196. 197. 225.), & argumenta, quibus probatio continetur, a propositionibus probandis distingues. Quamobrem patet, ut ante, ea, quæ legis, memorix facile imprimi debere.

§. 910.

De probabilitate vel veritate rei narratæ judicaturus in auctoritatem testis oculati atque auriti inquirere (§. 585. 587. 589.), simulque dispicere debet, num in narratione occurrant, quæ vel sibi mutuo, vel veritati certo agnitæ repugnant. Conf. §. 773 seq.

Veritas rei narratæ quomodo judicanda.

§. 911.

Quoniam historiam naturalem rectius interpretaturus ipsa rerum naturalium observatione & repetito experimento notiones sibi comparare debet (§. 902. 905.); qui historie naturali rectius intelligendæ studet, eo ipso veritatem ejusdem perspicit (§. 775.).

Veritatis historie naturalis cognoscendus modus peculiaris.

§. 912.

Si quis historiam civilem, ecclesiasticam atque privatam ad usum suum transferre voluerit, is & Ethicæ atque Politicæ cognitione instructus & Logica utente polere debet (§. 725 (99. 343 (99. 348. 639 (99.))

Quæ tenenda ei, qui historiam ad usum translaturus.

§. 913.

Si quis ex historia leges providentiæ divinæ derivare voluerit, is inquirere debet, quomodo fata singulorum hominum, tum etiam rerump. & ecclesiæ convenient illorum actionibus, & quomodo bona & mala physica respondeant morali. Etenim leges providentiæ divinæ in eo consistunt, quod in factis hominum contineatur ratio factorum sapientia divina digna. Unde eas in apicem producturus inquirere debet in hanc rationem, factis & satis distincte expensis.

Legum providentiæ divinæ scrutatio.

§. 914.

Ars inveniendi ex historia literaria quomodo locupletetur.

Ex historia literaria artem inveniendi locupletaturus 1. notet tempus, quo veritas quæcunque data fuerit inventa; 2. veritates illo tempore de eodem objecto perspectas cum affinibus aliis sibi familiares reddat; 3. inquiret in modum, quo ex his continuo ratiociniorum filo illa deduci possit, usus regulis supra sect. 2. c. 2. & 3. (§. 639. & seqq.) uberius expositis & artificijs aliis, vel aliunde cognitis, vel meditati veluti sponte sese offerentibus. Hac ratione enim patebit modus, quo illo tempore ad veritatem, quæ tum inventa supponitur, pervenire datum fuit.

Quodsi ex circumstantiis vitæ auctoris constiterit, quasnam veritates habuerit perspectas, cum non uno modo ad eandem veritatem pervenire possimus; modum, quo inventor usus fuit, certius hariolari licebit.

Si vero ne tempus quidem constiterit, quo veritas aliqua primum in apurum producta; artem inveniendi tamen excolet atque sic ferente occasione novis artificijs locupletabit, ubi inquisiverit, quomodo ex veritatibus aliis ante discendis, quam illam capere possimus, inveniri queat.

Quoniam ita in omni casu patet modus, quo ad veritatem aliquam latentem ex aliis cognitis pervenitur; ubi ejusdem notionem distinctam attentione sufficiente usi nobis formaverimus (§. 648.), patebunt regulæ, quibus dirigitur intellectus in veritate latente investiganda in casu dato. Ars inveniendi regulas istas tradere debet (§. 632.). Quamobrem si jam fuerint perspectæ, novo hoc exemplo confirmantur & confirmatæ clarius ac certius intelliguntur. Quodsi contigat esse in eorum numero aliquas, quæ nobis nondum cognitæ fuerant; artem inveniendi sic regulis novis locupletari patet.

E. gr. Constat ex dissertatione historica, quam de vero telescopii inventore edidit *Borellus*, telescopium primum fuisse inventum, cum artifex ex perspicillis poliendis vitrum quærens vitrum concavum & convexum forte fortuna combinaret. Et licet *Joannes Baptista Porta* in *Magia naturali* lib. 17. cap. 10. dudum ante monuerit, si vitrum concavum & convexum recte conjungere noveris, & longinqua, & proxi-

ma majora & clara videri; attamen ex novem, quas de refractione Neapoli A. 1593. in lucem emisit, *libris* & speciatim libro octavo, ubi de periscillo convexo & concavo agit, satis intelligitur, quod idem nonnihil lentium combinatione sive fortuita, sive ex instituto facta didicerit. Patet igitur, *fires diversa variis, quibus fieri potest, modis combinentur, sola attentione ad ea, quæ inde sequuntur, nova, seu incognita hætenus, sive nobis solum, sive etiam aliis, detegi posse.* Habemus adeo regulam artis inveniendi usus multiplicis, quæ mihi hac ratione innotuit & quam superius in numerum regularum detegendi geneses rerum retuli (§. 706.). Quoniam perinde est, sive quædam actu conjugas & observes, quænam inde consequantur; sive tantummodo eadem conjungi cogites & ex iis, quæ tibi de iisdem innotuere, colligas, quidnam inde sequatur; regula anteriori inventa, quæ ad methodum veritatem a posteriori detegendam spectat, ei respondens altera una innotescit ad methodum veritatem a priori investigandam referenda, quam itidem in numerum regularum genesin rerum investigandi retuli (§. 705.).

§. 915.

Si scriptum dogmaticum continuo orationis filo fuerit contextum, singulæ definitiones ac propositiones inde eruendæ ac beneficio definitionum (§. 149. 188. 264. 266. 272. 273.) ad suas species reducendæ (§. 344.), ac quæ ad demonstrationem seu probationem, quæ ad scholia pertinent, ab iisdem secernenda. Conf. §. 872. 880. 344. 522 lqq. 343. 557 lqq. 515. 528.

Quomodo in scripto dogmatico continuo orationis obvia distinguenda a se invicem.

E. gr. *Cartesius* partem primam Principiorum philosophiæ ita autpicatur: Quoniam infantes nati sumus & varia de rebus sensibilibus iudicia prius tulimus, quam integrum nostræ rationis usum haberemus, multis præjudiciis a veri cognitione avertimur: quibus non aliter videmur posse liberari, quam si semel in vita de iis omnibus studeamus dubitare, in quibus vel minimam incertitudinis suspensionem reperiemus. Quatuor hisce verbis continentur propositiones, quarum prima est: Omnis homo multa habet præjudicia; secunda: Omnis homo præjudiciis a veri cognitione avertitur; tertia: sese a præjudiciis liberare; quarta denique: Veritatem inquirens semel de omnibus in vita dubitare debet. In propositione prima, secunda & quarta aliquid de homine tanquam sub-
iecto

Non affirmatur, scilicet in prima, quod multa habeat præjudicia; in secunda, quod præjudiciis a veri cognitione avertatur; in tertia, quod veritatem inquisiturus semel de omnibus in vita dubitare debeat. Sunt igitur theoreticæ (§. 263.), cumque earum veritas terminis intellectus nondum pateat, propositiones demonstrativæ (§. 259), consequenter theorematæ (§. 272.). In tertia docetur, aliquid fieri posse, nempe ut a præjudiciis liberemur, atque adeo ea practica est (§. 253.), cumque modus, quo id fieri possit, terminis intellectus nondum sit manifestus, nec pateat nos a præjudiciis liberari, si semel in vita de omnibus dubitamus, in quibus vel minimam incertitudinis suspensionem reperimus, demonstrativa (§. 259.), consequenter problema (§. 273.), cujus solutio continetur his verbis, *semel in vita de iis omnibus dubitandum esse, in quibus vel minimam incertitudinis suspensionem reperimus.* Prima propositio inde probatur, quod infantes nascuntur & varia de rebus sensibilibus iudicia feramus, quasi integrum rationis usum habemus; secunda sumitur sine probatione tanquam experientiae consentanea; tertia denuo probatur & ex lemmate in margine adjecto, *veritatem inquirenti semel in vita de omnibus, quantum fieri potest, esse dubitandum*, apparet, propositionem quartam esse primariam, quam autor dare intendit, ceteras nonnisi ejus probandæ gratia adduci. Hac ratione primum articulum principiorum philosophiæ Cartesii logice resolvimus, quantum præsens propositio præcipit.

§. 916.

Quænam feri-
pta dogmatica
lectio faciliora.

Hoc igitur labore logice resolvendi contextum cavere potest lector, ubi ipse autor singula a se invicem distinguit. Atque hinc ulterius parer, lectionem scripti dogmatici, in qua autor ipse definitiones a propositionibus; propositiones ab earum probationibus, probationes a scholiis distinguit, faciliorem esse, quam alterius, cujus autor continuo rationis filo usus illa a se invicem distinguenda lectori relinquit. Nemo enim negabit, lectionem fieri faciliorem, ubi lectori minus laboris incumbit, sublato labore, qui & multam Logicæ theoriam, & praxin supponit (§. 915.).

Apparet itaque ratio, cur Mathematici singulis veritatum generibus convenientes titulos definitionum, axiomatum, postulatorum, theorematum, problematum, corollariorum, scholiorum & demonstrationum præfigant.

§. 917.

§. 517.

Definitio nominalis a lectore in tot resolvenda est propositiones, quot notæ eandem ingrediuntur, quarum quidem commune subiectum est definitum, prædicata vero sunt singule notæ illam ingredientes. Definitionum nimirum ope res obvias ad suas species suasque genera reducere debemus (§. 176.). Enimvero cum definitum non conveniat nisi rei, cui notæ omnes in definitione enumeratæ simul conveniunt (§. 344.); ante constare nequit, ad quodnam genus, vel ad quamnam speciem eadem referri debeat, quam in casu dato ostenderis singulas notas definitionem ingredientibus eidem convenire, consequenter tot probaveris propositiones, quot sunt notæ definitionem ingredientibus, quarum subiectum commune est res obvia, prædicata vero sunt istæ singule notæ.

Resolutio definitionis nominalis.

E. gr. Ubi *matrimonium* definitur per *societatem inter marem & feminam initam sobolis generandæ & educandæ gratia*, definitio resolvitur in propositiones sequentes: 1. *Matrimonium est societas*, 2. *Matrimonium initur inter marem & feminam*, 3. *Matrimonium initur sobolis procreandæ gratia*, 4. *Matrimonium simul initur sobolis educandæ gratia*. Probaturus enim definitionem applicando matrimonium inter duas personas intercedere, ostendere debet, quod (1) mas & femina 2) inierint societatem (3) sobolis procreandæ & (4) educandæ gratia.

§. 518.

Quoniam definitionem intellecturus cum singulis terminis notarum eam ingredientium notiones jungere debet, quæ iisdem respondent (§. 115.), illarum autem notarum notiones habet, qui rem præsentem intuetur & in ea distinguit, quæ sibi obvia in eadem deprehendit (§. 33.); definitionem intellecturus ad exemplum applicare debet, attendendo scilicet, num inter prædicata iudiciorum, quæ format, intuitivorum (§. 639) singule notæ definitionem ingredientibus compareant.

Definitionum nominalium illustratio.

§. 519.

Et quia notio vera non est, nisi in qua conjunguntur, quæ eidem subiecto una inesse possunt (§. 518.), definitiones vero in notionum numero habentur (§. 149.), *definitionem nominalem* (Logica contracta) Ss exami-

Veritatis definitionum examinationem.

examinaturus inquirere debet, num inter res perceptas olim, vel eas, quæ nunc sensui obijciuntur, talis occurrat, cui insunt, quæ in definitione continentur (§. 689.), aut possibilitas per indivisum an demonstrari possit (§. 691.), aut num offensiva demonstratione idem firmari queat (§. 692. 693.) disquirendum.

E. gr. Ubi *figura regularis* definitur, quod & æquilatera sit, & æquiangula; inquirendum nobis est, an fieri possit, ut figura æquilatera simul æquiangula sit; id quod per constructionem patet.

§. 920.

Superfluum
ex definitione
elimina-
tio.

In primis etiam *inquirendum est, an in notarum numerum referantur, quæ per alias definitionem ingredientibus determinantur, & eadem ex definitione eliminandæ sunt, antequam ea memorie mandentur (§. 176. 343. 806.).*

§. 921.

Quomodo superflua in definitionibus detegantur.

Inquisiturus num in definitione contineantur, quorum unum per alterum determinatur, 1 notam unam vel aliquotumat pro definitione integra & aliam, quam per illas determinari suspicio est, pro attributo rei definitæ: 2 ea methodo utatur in apri- cum producturus, num hoc attributum rei contractius definitæ conveniat, qua ex definitione data propositiones colliguntur (§. 694.).

Etenim si definitionem ingrediuntur, quæ per alia in eadem contenta determinantur; ea sub conditione ceterorum de definito prædicanda sunt (§. 216.). Habemus adeo propositionem, cujus subjectum est determinatum per cetera, quæ definitioni insunt, prædicatum vero illud attributum (§. 197.). Quamobrem cum ea, per quæ prædicatum istud determinatur, absolvant notionem subjecti, cui ipsum tribui potest; pro definitione hæc notio recte habetur (§. 150.). Patet adeo perinde esse, ac si ex definitione propositionem colligere iubearis.

E. gr. Si quis *triangulum æquilaterum* definit per triangulum, cujus & latera, & anguli inter se æquantur; inquisiturus num a qualitas angulorum per æqualitatem laterum determinetur, investigare debet, num triangulum, cujus singula latera inter se æqualia sunt, habeat quoque angulos æquales: quod cum demonstratum sit ab *Euclide*, æqualitatem angulo-

angulorum ex definitione eliminandam esse hinc apparet. Evidens hic est, definitionem esse hanc orationem, *triangulum aequilaterum est, cuius latera singula sunt inter se equalia*; theorema vero hanc propositionem, *triangulum aequilaterum est etiam aequiangulum*.

§. 922.

Cavendum quoque, ne definitiones memoria mandentur, antequam constet, notas, quæ eas ingrediuntur, esse ad rem definitam agnoscendam & ab aliis distinguendam sufficientes. Conf. §. 176. 343. 809 sq.

Cur lector a definitionibus maneat sibi cavere debeat.

E. gr. Definitio manca *quadrati* est, quod sit figura quadrilatera æquilatera, cum notæ eadem etiam rhombo conveniant. Quamobrem si quis illam memoriæ in futuros usus mandaret, rhombum obvium pro quadrato haberet, consequenter eidem quoque per errorem tribueret, quæ de quadrato demonstrantur, adde §. 651.

§. 923.

Quoniam de definitionibus nominalibus iudicium fieri nequit, nisi ante multa rei prædicata cognoveris arque ea in essentialia, attributa & modos distinguere noveris (§. 701.); ubi definitio expendenda, *antequam hanc cognitionem fueris consecutus, eamque tibi ad interpretandas propositiones sequentes familiares reddere teneris* (§. 874.); iudicium de eadem tantisper seponendum, donec demonstrationes subsequentes expendaris.

Quando iudicium de definitione diffinendum.

Ceterum hinc intelligitur ratio, cur nobis in more positum sit, quantum datur, observationes ac demonstrationes, quibus nituntur definitiones, ante præmittere, quam easdem condamus; consequenter cur mixtam methodum syntheticæ præferamus (§. 855.).

§. 924.

Propositiones memoriæ mandare non debet lector, antequam constet, eas esse determinatas. Conf. §. 694 sqq. 343. 315. add. §. 115. disc. præl.

Propositionum quodnam examen institui debeat.

§. 925.

Propositio tam categorica, quam hypothetica, quæ demonstrari potest, determinata est. Vide §. 515. 528. 484. 216. 222. 215. 225. 317.

Quomodo a priori innoscatur, propositionem esse determinatam.

§. 926.

Quomodo
idem pateat a
posteriori.

Si per observationem constet, prædicatum esse vel attributum, vel essentiale, vel quod per modum attributi inest, aut quibusnamque modis subiecto conveniat; propositiones determinatæ sunt. Conf. §. 643 lqq. 217. 221. 177 - 179. 222. 315.

§. 927.

Ex quorum li-
brorum lectio-
ne parum pro-
ficere detur.

*Pater adeo, nisi autor i se accuratas suppeditet definitio-
nes, earumque veritatem adstruat, Et propositiones determinatas
in medium afferat earumque probationes ex notione subiecti dedu-
cat, vel determinationes a posteriori stabiliat, nonnisi difficilimo
labore Et cui per pauci lectores pares sunt, cognitionem ad vitam
utilem ex i suis libro hauriri possit.*

§. 928.

Demonstratio-
num ac proba-
tionum ana-
lysis.

*Demonstrationes ac probationes ita resolvende sunt, ut non
modo singula syllogismorum, ex quibus constant præmissæ, animum
subeant, sed earum etiam forma appareat, (§. 515. 528. 539. 540. 533.
522 lqq.) annotatis in eavta conclusionibus, quæ syllogismos se-
quentes sive sigillatim sive in unum confusæ tanquam præmissæ in-
grediuntur.*

Quoniam scilicet in demonstratione vel conclusiones syllogismorum anteriorum sigillatim ingrediuntur tanquam præmissæ syllogismos sequentes, vel ex pluribus tanquam notione complexa spectatis formatur propositio præmissæ locum subiens (§. 522. & seqq.); cum illæ conclusiones in usum sequentem sint servandæ, eas in charta conscribi consuevit, ut oculis pateant, quæ alias memoria retentæ imaginationi præsentibus sisti deberent. Hoc enim artificio evolutionem demonstrationis minus defatigare attentionem lectoris ipso opere docemur.

Denique cum probatio probabilis a demonstratione nonnisi principiis differat (§. 559.), adeoque eandem cum demonstratione formam teneat; per se patet, quæ de demonstrationum analysi præcipiuntur, ea quoque de probationis alterius cujuscunque analysi tenenda esse.

§. 929.

Quanam de-
monstrationes
resolutæ faci-
les.

*Quoniam in demonstratione consummata nullum de-
monstrandi principium omittitur, quod non per ea, quæ adfunt,
vel*

vel per citationes facile in memoriam revocetur, & singula eo ordine collocantur, quo in ratiociniorum serie, in quam demonstratio resoluta abit, continentur (§. 826.); *demonstrationis consummatæ resolutio lectori nihil negotii succedit.*

§. 630.

Demonstrationes, ubi fuerint intellectæ, memorie mandare non tenetur lector (§. 539.).

Cur demonstrationes memorie mandandæ non sint.

Sufficit nimirum, ut demonstrationis confusè recordati non dubitemus, quin vera sit propositio, quoties eadem in dato casu opus habemus. Sive enim propositione demonstrata uti volueris ad ulteriorem veritatis investigationem, sive eam transferas ad usum vitæ; eam nosse sufficit; nec applicationem ullo in casu demonstratio ingreditur, immo ne hilum quidem ad eandem confert. Atque ea est ratio, cur nulla propositionum notitia praxi æque intersit ac scientiæ earundem cognitio: ut adeo etiam, qui ingenii hebetis ac tardioris sunt, veritates sibi familiares reddere atque ad usum vitæ transferre valeant.

§. 531.

Librorum scientificorum lectio etiam ab inexercitato absolvi potest, modo industriam non patiaturs desideravi suam (§. 760. 917. seqq. 925 seqq.).

§. 932.

Si liber methodo scientifica non fuerit conscriptus, eo, quem præscripsimus, modo legi nequit nisi ab eo, qui in arte inveniendi probe exercitatus. Ex eo scilicet demonstrationes exulant, nec eo ordine propositiones collocantur, quo veritas unius a veritate alterius pender (§. 758.). Enimvero deficientibus demonstrationibus nec de definitionibus iudicium ferri potest, quod utique ferendum, antequam eas ad futuros usus memorie mandaveris (§. 923.), nisi in arte inveniendi fueris probe versatus (§. 919. 921.), nec propositio determinata agnoscitur (§. 925. 926.), id quod tamen fieri debet, antequam ad futuros usus memoriæ insigenda (§. 924.).

§. 933.

In lectione libri methodo scientifica conscripti definitiones ac propositiones singulas vite intellecturus earumque veritatem perspiciendus anteriores sibi familiares reddere tenetur, antequam ad posteriores progrediatur. Vid. §. 880. 760. 541. 538 sq. 543.

§§ 3

§. 934.

Quamdiu lector scripti scientifici in anterioribus subsistere debeat.

§. 934.

Præparatio ad
lectionem li-
brorum scien-
tificorum.

Apparethinc utilitas scriptorum dogmaticorum historico-
rum, quibus lector ad lectionem scientificorum præparatur, cum
iisdem definitiones, & propositiones interantur, quorum fre-
quens est in demonstrando usus (§. 817. 834.). Eorum igitur le-
ctio lectioni dogmaticorum præmittenda.

§. 935.

Quomodo ea
fiat ipsorum
scientifico-
rum studio.

Quoniam in scripto dogmatico historico nullæ collocan-
tur definitiones, nisi quarum realitas in scripto scientifico ad-
struitur, nec propositiones aliæ, nisi quæ ibidem demonstran-
tur (§. 817.) & quarum frequens est in demonstrandis aliis usus
(§. 834.); si autem in scripto scientifico definitiones a proposi-
tionibus, propositiones a demonstrationibus atque demonstrationes a scho-
liis distinguit, scriptum dogmaticum scientificum præbebit usum hi-
storici, quo ad illius lectionem præparamur, ubi saltem definitiones
ac propositiones cum scholiis, demonstrationibus tantisper sepositis, ti-
bi familiares reddideris.

§. 936.

Quomodo sci-
entificæ scri-
pta ad lectio-
nem præpara-
toriam apten-
tur.

Quoniam tamen in scriptis scientificis plures propositio-
nes continentur, quam quæ ad præparationem istam necessaria
sunt (§. 824. 836. 837.); si scriptum scientificum simul vicem do-
gmatici historici sustinere debet, quo ad illius lectionem præpara-
mur, definitiones ac propositiones asterismo aliquo vel alio signo notan-
dæ, aut in fine operis indicandæ, quarum historica cognitio ad præpa-
rationem sufficit.

§. 937.

De prope-
rata
lectio lib-
rorum scien-
tificorum cur re-
jicienda.

Cum in lectione scripti scientifici proficere non detur, nisi
definitiones ac propositiones anteriores tibi familiares reddide-
ris, antequam ad sequentes progrediaris (§. 933.) & nec definitio-
nes, nec propositiones memoriæ mandare liceat, nisi examine
instituto (§. 919. & seqq. & §. 924.); illud autem non nisi
aliquo temporis intervallo obtineri, hoc multam attentio-
nem desiderare ipso facto experiamur; in lectione scripti scien-
tifici lento gradu progredi debet, qui in isto genere, ad quod illud
refertur, nondum fuerit versatus & methodo scientificæ nondum
adfectus.

CAPUT VII.

DE INTERPRETATIONE SCRIPTURÆ SACRÆ.

§. 938.

Usum Logicæ in interpretanda scriptura sacra ostensusur suppono, *singulis scripturæ sacræ verbis suas respondere notiones, ex intentione Dei cum iisdem jungendas.* Si negas; in scriptura sacra occurrere debent verba, quibus notio nulla responderet. Cum igitur verba sint signa notionum (§. 35.); si qua occurrunt, quibus notio nulla responderet, erunt ea sine mente sonus.

An singulis scripturæ S. verbis notiones quædam respondeant.

§. 939.

Scripturam sacram adeo intellecturus cum singulis verbis eas conjungere debet notiones, quæ ex intentione Autoris cum iisdem jungendæ (§. 873. 938.).

Quando S. S. intelligamus.

§. 940.

Notiones cum verbis S. S. inter legendum conjungendæ non immediate a Spiritu S. in animo legentis excitantur, sed vi verborum, quæ leguntur. Si negas; sit contrarium verum. Excitet scilicet Spiritus S. immediate notiones cum verbis S. S. inter legendum conjungendas, ipsis verbis nihil huc conferentibus. Nulla igitur apparet ratio, cur id non perinde fieri debeat, si quis digitum ad verba rextus authenticæ admoventis ea intelligere optat, aut eorum sensum a Spiritu S. sibi manifestari Deum precatur, quam ubi versionem linguæ sibi vernacula factam legit; neque ulla amplius est ratio, cur ex versione male facta non perinde verus S. S. sensus, prævia Numinis serâ invocatione, eruatur, quam ex altera, quæ textui authentico ad amissum responderet. Enimvero neutrum horum fieri & experientia loquitur, & in confesso est apud omnes.

Quomodo notiones verbis S. S. jungendæ in legente excitentur.

Sane si Spiritus S. immediate in animo legentis excitare deberet notiones verbis S. S. jungendas, nullo prorsus opus foret verbi externi apparatu, atque sic cum neglectu lectionis verbi divini in enthusiasum incideret, qui illam sibi persuaderet sententiam. Sed in rem manifesta verbis pluribus non est opus.

§. 941.

§. 941.

Quenam no-
gines in S. S.
pene le. o-
rem suppo-
nantur.

Quodsi in scriptura sacra vocis alicujus nulla traditur definitio, non alia præsupponi notio a Deo potest, quam quæ animo nostro jam inhaeret (§. 940. 35. 31.), aut quam in nobis habemus, dum ipso opere in nobis experimur ea, de quibus ea loquitur (§. 900.).

E. gr. Dum Paulus se vocat *servum Jesu Christi*, quid voce servi denotatum velit, non explicat. Eam igitur supponit notionem, quam eidem ex u. u. loquendi ii jungebant, ad quos scribat. Eodem modo patet, ubi *Christus ad Nicodemum* de regeneratione loquitur, cum vocis definitionem nullam tradat, eam eidem jungendam esse notionem quam homo in seipso intuetur, dum regeneratur.

§. 942.

Quomodo ad
notione in S.
S. appollitas
per, ematur.

Hinc consequitur, non alias in scriptura sacra supponi posse notiones, quam quæ a rebus præsentibus abstrahuntur, consequenter si quis ab ijs diversas verbis scripturæ jungit, eum fingere sensum a mente Autoris sacri alienum.

E. gr. *Josua* solem *stare* jubens non aliam *stationis* ideam habuit, quam quæ a rebus, quas tunc contuebatur, in animo ejus excitari poterat, & qui mentem *Josue* intelligere cupit, is eandem, non aliam, quam ipse habuit, eidem voci jungere debet (§. 115.). *Josua* solem respiciens & regionem in Tellure sibi circumjectam, non observabat nisi situm, quem sui respectu erga Terram habebat. Dum igitur eum *stare* jussit, nil aliud intendere potuit, quam ut eundem retineret situm, nec eum mutaret. *Stare* igitur hic idem est ac *situm suum non mutare*. Qui vero vocem idem significare contendunt ac *motum inhibere suum*, ut solem circa tellurem quiescentem moveri hinc inferre possint; illi menti *Josue* assingunt, quod est ab ea alienum. Cui notiones distinctæ desunt, is minimum confusus iis æquipollentes terminis hinc jungere debet, ubi sensum scripturæ sacre atsequi voluerit: id quod eum in finem moneo, ne quis arguetur, quasi scripturam sacram non nisi ab eo intelligi stituamus, qui verbis distinctas jungere novit notiones. Etenim hoc absolum fore nemo non intelligit, cui perspectum est, nos mentem alterius intelligere, modo eandem notionem cum voce jungamus, quam cum ea conjungit alter (§. 115.), sive distincta ea fuerit, sive confusa; etsi mentem alterius, consequenter & scriptorum sa-

cro.

crorum, melius explicare valeamus, ubi notiones jungimus verbis distinctas (§. 899.). De distinctis adeo notionibus in interpretanda scriptura sacra potissimum laborare debent, qui eam aliis explicare teentur; tum etiam (quod deinceps patebit) qui nexum veritatum revelatarum intimius perspicere cupiunt.

§. 943.

Si quæ in scriptura sacra occurrant voces, quibus respondentes notiones habere non valeamus; pro terminis inanibus eadem habenda non sunt. Etenim nemo nescit dari voces bene multas, quibus notiones suæ conveniunt, etsi nos eas in mente nostra minime habeamus, cum constet aliis easdem non deesse. Quoniam itaque scripturæ sacræ autorem Deum esse immota fide tenemus, nec minus pro certo ac explorato habemus, eum nobis in eadem revelasse, quæ rationis usu assequi non possumus; ubi constat, sermonem esse de rebus, quæ Deo perspectæ esse possunt, veluti cum de se ipso suisque operationibus loquitur, nobis autem minime earum notionem assequi licet, cum nihil iis simile in nobis experiamur, pro terminis inanibus habendæ non sunt voces, quibus respondentes notiones in nobis excitare minime valeamus.

Quænam voces non pro inanibus habendæ.

Res vocibus istiusmodi denotatæ *mysteria* dici solent, quarum nec per intuitivam cognitionem notiones in nobis habemus, cum nihil iis simile in nobis, vel in mundo materiali experiamur. nec demonstrationis beneficio acquirere valeamus, cum in alias notiones, quas natura habemus, resolvi nequeant. Pertinet huc vox *Trinitatis*, quæ, etsi in scriptura sacra non legatur, significatum tamen obtinuit scripturæ sacræ conformem, ut alia sint ejusdem verba, quibus eadem notio respondet, quam ad vocem *Trinitatis* referimus. Propositio autem nostra non modo de verbis mysteria significantibus, verum etiam de aliis capienda est, quæ ob circumstantiarum historicarum ignorantiam, vel alia quacunq; de causâ nobis obscura sunt, ut notiones iis jungendas frustraneo conatu venemur.

§. 944.

Consequitur hinc, *ob voces istiusmodi scripturam sacram Nec adeo terminus recte obscuritatis accusari; & perperam eas rejici tanquam inanes, vel etiam res iis denotatas.*

(Logica contracta.)

Tt

§. 945.

§. 945.

Notiones in S.
S. explicanda
non admittent
d.z.

Si notio subiecti consisterit, ea prædicati notio admitti nequit, quæ eidem repugnat & contra. Conf. §. 485. 497. coll. §. 424.

E. gr. Constat sensu S. S. Deum concipi debere spiritum, consequenter immaterialem, atque adeo in notione ejus contineri, quod sit spiritus idemque immaterialis. Quamobrem si quis Deo organum visorium tribuere veller, ubi in sacris *Oculi* ejus mentio sit; is eidem tribueret, quæ enti immateriali repugnant, consequenter notioni subiecti in ea propositione *Deus habet Oculum* notio prædicati repugnaret. Pater adeo per *oculum* Dei non intelligi posse organum sensorium, quæle res corporea sentientes habent, consequenter significatum quendam *oculi* generalem esse admittendum, qui & organo visorio, & attributo divino affinitatem quandam cum isto habenti convenit. Nimirum propterea quod oculum habet homo, fieri potest, ut objecta sibi præsentia intuitivè cognoscat. In significato adeo generali *oculus* dicit possibilitatem intuitivæ cognitionis rerum præsentium, quemadmodum in sensu speciali organon corporis denotat, vi cujus intuitiva rerum cognitione in animantibus ac homine possibilis. Significatus generalis Deo omniscio & singulorum, quæ sunt ac fiunt atque esse ac fieri posse intelliguntur, cognitionem intuitivam habenti convenit, atque adeo generalis ista, non specialis notio voci jungenda, quando oculi Dei sit mentio.

§. 946.

Falsæ inter-
pretationis
criterium.

Quod si per interpretationem S. S. prodeat propositio contradictoria ejus, quæ vel a posteriori certa est, vel demonstrata, vel per alia S. S. loca manifesta; in notione sive subiecti, sive prædicati determinanda aberratum esse constat. Conf. §. 488. 515. 528. 503. 518. Vide etiam rursus §. 945.

Quod si per quedam S. S. loca sensus alicujus propositionis fuerit manifestus, quin eadem sic intellecta vera sit nemo non largitur, qui divinam S. S. autoritatem in dubium non vocat (§. 503.).

Prior propositionis pars consentit cum principio hodie unanimi omnium consensu recepto, quod *veritas revelata non possit contradicere naturali*, cum lumen revelationis ac rationis eundem autorem habeat

beat Deum. Pars vero propositionis posterior cum illo Exegetarum canone conspirat, quod *scripturam sacram juxta analogiam fidei interpretari debeamus*, propterea quod fidei analogia constituitur per ea S. S. loca, quorum sensus adeo manifestus est, ut, nisi verbis vim inferre volueris, alias ea notiones non admittant, quam quas cum iisdem jungis, & quæ dicta *classica* dicuntur, veluti doctrinarum sedes. Ceterum non inutile est propositionem præsentem, quemadmodum ceteras, exemplis illustrari. E. gr. *Deum poenituisse* legimus Gen. VI. 6. *quod fecerit homines*. Quodsi *poenitentiam* explices per *tristitiam ex eo ortam*, quod aliquid a nobis male factum agnosciimus, quemadmodum terminus vulgo sumi solet, atque hinc verba scripturæ ita interpretaris, quasi Deus cognoverit, male a se factum. quod condiderit homines, propterea quod eorum flagitia non præviderit, atque ideo animo conturbatus & contristatus, immo sibi indignatus fuerit, prout in simili casu a nobis fieri solet; interpretatio & propositionibus in I helogia naturali demonstratis, & manifestis S. S. verbis contradicit. Etenim in Theologia naturali ostenditur, Deum ab æterno prævidisse mala hominum facta, nec ea ipsi ignota fuisse, cum decretum de condendo homine formaret. Et ipsa S. S. disertis verbis 1. Sam. I. 29. a Deo *poenitentiam* removel tanquam ipsi repugnantem, addita hac ratione, quod *homo non sit, ut poenitentiam agat*. Unde concluditur interpretationem illam humano more factam a sensu S. S. abire, canonis isti conformiter, quod, *quæ de Deo humano dicuntur more, intelligenda sunt ea, quæ ipsum decent, ratione*. Declarat homo poenitens, se detestari malum, quod ex facto suo emergit, atque ejus intuitu se nunquam fuisse facturum, quod fecerat: ad quæ si attendimus, notionem *poenitentia* formare licet Deo convenientem, scilicet quod *poenitere* idem sit ac *declarare*, se detestari malum, quod ex facto emergit, nec ejus intuitu factum fuisse decretum & executioni demandatum. Etenim si Deus dicatur declarasse hominibus, quod detestetur ipsorum flagitia, nec eorum gratia genus humanum condiderit, immo potius aliis deficientibus finibus nunquam idem conditurus fuerit; nihil in his continetur, quod naturæ ipsius non conveniat & aliis S. S. locis, unde attributorum divinatorum cognitio hauritur, non sit consentaneum.

§. 947.

Si notio subjecti fuerit certa, ea admittenda est prædicati notio, quæ per eam determinatur (J. 216.).

Tt 2

Claret

Notio prædicati per notionem subjecti verificanda.

Claret scilicet vel a priori, vel a posteriori, utrum prædicati notio per notionem subiecti determinetur. A priori idem patet, ubi ex notione subiecti demonstrare poteris (§. 512 & seq.). prædicatum eidem convenire debere; a posteriori autem liquet, si in nullo subiecto deprehendatur, quod notio subiecti involvit. quin in eodem una adsit, quod notione prædicati continetur. Exempli loco esse potest ipsa *penitentia* notio, quam Deo convenientem formavimus (not. §. 946).

§. 948.

Linguarum
authenticarum in S. S. in-
terpretanda
sunt.

Linguae authenticæ hunc solummodo habent usum, ut iudicium fieri possit, num versio rite facta, seu an voces linguae authenticæ & in versione iisdem respondentem eandem rem designent (§. 939. 118. 884.).

§. 949.

Quænam S. S.
propositiones
demonstrari
possint.

Si quæ propositiones in scriptura sacra occurrunt, quæ etiam rationi pervestigabiles sunt; quin eadem ex notione subiecti demonstrari possint dubium nullum est. Pone enim, eas ex notione subiecti demonstrari non posse. Quoniam methodus ex definitionibus seu notione subiecti & ejus determinationibus eruendi propositiones eadem prorsus est cum demonstrandi methodo, ita ut vi demonstrationis eadem in apicem producantur (§. 694. 695.); eadem ex principiis rationis investigari non poterunt, consequenter rationi impervestigabiles sunt: quod cum hypothesein evertat, absurdum est.

Vocantur a Theologis istiusmodi articuli, qui ex utroque lumine cum rationis, tum revelationis innotescent, *articuli fidei mixti.*

§. 950.

Quatenus pro-
positiones pu-
re revelatae de-
monstrabiles
sunt.

Quod si in propositione, quæ sola revelatione innotescit, notio distincta subiecti innoverit, ex ea prædicatum eidem convenire demonstrari potest, in subsidium vocatis propositionibus aliis, quæ vel per revelationem, vel rationem innoverunt. Etenim qui veritates revelatas intimius meditatus fuerit & methodi scientificæ praxin in potestate haber; is non negabit, non ablimilem ei inter illas intercedere nexum, qualis inter veritates naturales intercedere deprehenditur, ita ut veritatis unius ratio per alteram reddi possit. Enimvero in Ontologia & Cosmologia demonstra-
bimus,

bimus, veritates naturales ideo demonstrabiles esse, quod unius ratio per alteram reddi possit. Unde conficitur, veritates quæ revelatas eadem de causa demonstrabiles fieri.

Enimvero quemadmodum veritates naturales demonstrari nequeunt, nisi suppositis quibusdam definitionibus atque axiomatis, tanquam primis indemonstrabilibus (§. 522 & seqq.); ita similiter revelatarum demonstratio nulla concipi potest, nisi admittis quibusdam tanquam primis & indemonstrabilibus.

Quoniam veritates revelatas demonstrare non licet, nisi quædam tanquam indemonstrabiles axiomatum instar sumantur, ideo eodem modo patet, propositionem per modum conclusionis illatam pro pure revelata habendam esse, quo supra (§. 556. 557.) evicimus, propositionem nonnisi probabilem esse, si demonstrationem vel unicum principium probabile ingrediatur. Non igitur metuendum est, ne rationis decempea emitti velimus, quæ ejus sphæram transcendunt. Alia vero adhuc ratione stabiliari poterat nexus veritatum revelatarum, quem experientia intelligenti constare diximus. Etenim Eph. III. 10. affirmatur, ex opere redemptionis, quod obiectum divinæ revelationis est, sapientiam Dei innotescere. Sapientiam concludimus ex consensu finium & mediorum atque adeo ex ipso illo nexu, qui inter veritates revelatas intercedit. Quamobrem ubi scriptura sapientiam ex opere redemptionis colligi jubet; de nexu inter veritates illuc spectantes dubium nullum superesse potest. Sed nondum hic nobis suppetunt principia, per quæ hæc uberius deducere valemus. Veritates istæ, quæ sola revelatione innotescunt, *articuli puri* appellari solent. Scilicet si qua propositio in numerum articulo-rum fidei purorum refertur, tum vel notio subiecti sumitur tanquam possibilis auctoritate S. S. utut eam possibilem esse demonstrare non potueris, & ex ea tanquam possibili sumta legitima demonstrandi forma deducitur, prædicatum eidem convenire; vel articuli quidam puri auctoritate S. S. sumuntur tanquam veri & inde cum realitas subiecti ostenditur, tum prædicatum eidem convenire evincitur. Apparet adeo, demonstrationes istas nonnisi nomen suum tueri penes eos, qui immota fide tenent possibilitatem notionum assumtorum, vel articulo-rum fidei purorum, qui tanquam principia demonstrandi prima, seu axiomata sumuntur. Quodsi quis fide ista destitutus, vel probabiliter tantum divinam S. S. auctoritatem

agnoscit, vel eam prorsus in dubium vocat; is demonstrationes istas non nisi tanquam hypotheticas admittit, pro veris habendas, quam primum certo constiterit, assumpta esse certa. Quodsi vero quis cerneret, se universum veritatum revelatarum systema ex principiis rationis demonstrare velle, necis nugari merito censeretur, cum articuli puri, quales sunt Trinitatis & Incarnationis mysterium, rationis sphaeram transcendunt.

§. 951.

Quenam S. S.
in interpretatio
utilis.

Apparet adeo, *scripturam sacram explicaturum non modo in notiones verbis singulis ex intentione Dei jungendus inquirere debere* (§. 942. & seqq.), ut genuinus eorum sensus appareat, & hinc constet, quamnam tanquam vera asserat S. S. *verum etiam nexum praedicati cum subiecto* (§. 947.), & *veritatum revelatarum inter se pervestigare posse* (§. 949. & 950.), ut per consensum S. S. cum ratione quoad articulos mixtos, & per non repugnantiam purorum cum veritatibus naturalibus hostes S. S. evidentiis ac firmiter confutentur, scrupuli circa religionem subinde in animis hominum oriens certius eximantur & ex opere redemptionis attributorum divinorum notitia eruatur, quo ipso idem Deo dignum apprehenditur, & in pietatis mysterium abit.



SECTIO

SECTIO IV.

DE

USU LOGICÆ IN VERI-
TATE CUM ALIIS COM-
MUNICANDA.

CAPUT I.

DE MODO ALIOS CONVIN-
CENDI.

§. 952.

Convincere dicimur alterum, dum efficitur, ut proposi-
tio ipsi certa evadat. Et hinc *convicti* dicimur in casu
quocunque dato, quam primum propositio aliqua nobis
certa est. Convictionis
definitio no-
minalis.

§. 953.

Propositio nobis certa est, quando agnoscimus eam esse
veram, vel falsam (§. 335.); quamobrem *alterum convictum*
efficere debemus, ut agnoscat, propositionem esse veram vel falsam
(§. 952). Quid alterum
convictum
intendat.

§. 954.

Quodsi ergo nostrum de *probabilitate propositionis iudicium*
verum esse alter agnoscit; convictus erit probabilitatis propo-
tionis. Probabilitatis
quando con-
vincamur.

§. 955.

A posteriori alterum convictum eum eo adducere debes,
ut res praesentes, quarum notio exhibetur, vel de quibus iudica-
tur, coram intueatur, atque adeo, si de rebus praefatis sermo fue-
rit, earum veritatem in se ipso experiatur (§. 338.). Enimvero
si alterum eo adducere possis, ut res extra se positas observe-
vel Modus alte-
rum convin-
cendi a poste-
riori.

vel rerum practicarum notiones ipso opere in se ipso excitet; re ipsa experitur, in propositione data prædicatum convenire subiecto, modo judicia intuitiva formare didicisti (§. 639). Propositione igitur ipsi certa est. Eum adeo veritatis ejusdem convicti (§. 952.).

Similiter notionem veram atque possibilem esse intelligimus, si inter res vel olim perceptas, vel eas, quæ nunc sensui obijciuntur, talis occurrat, cui insunt, quæ in notione data continentur (§. 689). Quamobrem si alterum eo adducas, ut res præsentis, quantum notio exhibetur, coram intueatur, vel, quod perinde est, si ei in memoriam easdem revoces, ut earum imagines quasi oculis oberrantes contemplerur; re ipsa experietur, nam eaisdem insunt, quæ in notione data continentur (§. 953.).

Patet hinc observationum, experimentorum & exercitiorum in rebus practicis usus. Conf. Jo. VII. 17.

§. 956.

Quænam hic
regulæ obser-
vandæ.

Quoniam regulæ complures observari debent, ubi vitium subreptionis in experiundo evitare ac certam rerum cognitionem a posteriori obtinere volueris (§. 639. & seqq.), inprimis ubi judicia universalia (§. 675. 676.) ac notiones universales, definitiones inprimis (§. 678.) curæ cordique habueris; *alterum a posteriori convicturus in dato quolibet casu applicare debes regulas, quæ ad notiones, definitiones ac propositiones cum categoricas, tum hypotheticas præscribuntur.* Conf. §. 639. 642 sqq. 648. 652. 656. 649 - 61. 656 sq. 667 sqq. 676.

§. 957.

Cur propo-
sitiones a poste-
riori eadem
opera intelli-
gantur & verè
significentur.

Quoniam propositiones historicas quascunque non rectius intelligit, quam qui rerum præsentium notiones ipso usu sibi comparavit (§. 902. 904. 905.), necres practicas cujuscunque generis penitus novit, quam qui earum notiones ipsi praxi in se excitat (§. 900.); evidens est, *eandem opera a posteriori & propositiones penitus intelligi, & earum veritatem agnoscere.*

§. 958.

Quando ad
autoritatem
provocan-
dum.

Quodsi in potestate tuo positum non fuerit efficere, ut alter ipse observet, unde notiones & propositiones deducuntur a posteriori habi-

stabiliendæ; autoritas observatoris stabilenda (§. 583. & seqq. add. §. 581 sq.).

Facile autem patet, nulla hic opus esse probatione, ubi in vulgus notum est observatorem vel experimentatorem esse fide dignum. V. gr. *Cassini, Flamstedii, Halleji* in observationibus astronomicis auctoritatem nemo in dubium vocaverit, cui eorum in hoc genere merita fuerint perspecta. Absursum itaque foret probare eorum auctoritatem, ut observationes ipsorum recipiantur tanquam fide dignæ. Non exiguum tamen pondus accedere credibilitati observationum ac experimentorum, quæ a pluribus repetita unanimi consensu confirmantur, nemo in dubium vocabit.

§. 959.

Quodsi falsitatis observationis, vel experimenti alterum a posteriori convincere volueris; observatione, vel experimento ipso præsentè repetito monstranda est differentia, quæ inter utrumque intercedit (§. 499.).

Falsitatis observationis & experimenti alterum convincendi modus.

§. 960.

A priori veritatis vel falsitatis alterum convincimus vi demonstrationis (§. 539. 542. 953.), *probabilitatis autem vi probationis probabilis* (§. 557. 559. 954.).

Modus convincendi alterum a priori.

§. 961.

Alterum vi demonstrationis conviculus eam eo usque continuare debet, donec in syllogismis, qui eandem ingrediuntur, perveneris ad præmissas ei certas, vel, ubi in principiis prorsus adducere non posses, ad definitiones, axiomata & experientias indubitatas. Conf. §. 540. 535. 533. idem patet ex §. 522 sq.

Quænam hic principia sint supponenda.

E. gr. In demonstratione logica theorematis, quod modi ingredi nequeant definitionem, sumimus definitiones modi atque notarum, duo axiomata, sc. 1. quod mutabilia constanter non insunt, & 2. quæ constanter non insunt, rebus agnoscendis atque a se in invicem discernendis inservire nequeant, atque theorema, quod in definitione nec plures, nec pauciores note enumerande, quam quæ ad rem definitam agnoscendam & ab aliis distinguendam sufficiunt (not. §. 522.). Quodsi ergo convincendo definitiones ac axiomata ista una cum hoc theoremate fuerint perspecta; eum conviculus veritatis theorematis demonstrationem non-
(Logica contracta.)

Uu

nig

nisi ad hæc usque principia evolvi necesse est. Enimvero si circa definitiones hæserit, ejus dubia ante tollenda sunt; si axioma concedere noluerit, demonstratione per indirectum ante absurditatis convincendus (§14. §30.); si denique theoremati assensum denegaverit, ejus demonstratio in medium afferenda & eo usque continuanda, donec ad principia concessa, vel ad ipsa prima perveneris.

§. 962.

Modus detegendi principia convincendo tanquam nota supponenda.

Si, quæ in demonstratione ex antecedentibus sumuntur, continua citantur, ubi paragraphos citatos continuo evolvis, donec ad tales perveneris, in quibus nulla amplius reperitur; absque ullo labore recensere licet definitiones, axiomata, observationes, propositiones demonstrativas ante agnoscendas, quam convictio in casu dato habent locum. Etenim si perpendimus, qua ratione Autor vel alius quicumque, qui eidem assentitur, veritatis, vel probabiliteris propositionis datæ convictus fuerit; tum quidem evidens erit, id inde esse, quod singula successive principia, quæ demonstrationem quomodocunque ingrediuntur, perspexerit sibi que familiaria reddiderit. Quamobrem si alter eodem modo convinci debet, eadem quoque principia successive perspicere sibi que familiaria reddere tenetur: secus jure ab eo non requisiveris eum assensum, quem tumet propositioni datæ præbes.

Patet adeo usus citationum singularis, qui absque iis vel profusus non, vel nonnisi difficillime expectari poterat. Si vel unica definitio aut propositio, quæ in locis citatis reperitur, mihi perspecta non esset; ego veritatem ejus, cum qua nobis hic negotii est, non agnovissem, sed potius circa eam hæsissem assensum tamdiu suspendens, donec in notitiam ejus pervenissem, quod adhuc desiderabatur (§.540.). Quamobrem nisi alios, qui nostra legunt, assensum precipitare velim; nec ab iis jure requisivero, ut eundem propositioni nostræ præbeant adeo firmum ac inmutum, qualem ego eidem præbeo, antequam singulas definitiones ac propositiones locis citatis reperendas sibi adeo familiares reddiderint, quales ego easdem experior.

§. 963.

Assensus successiva generatio.

Quoniam assensus vi demonstrationis aut probationis probabilis extorquendus ab evidentia principiorum pender, quæ

quæ successive perspecta familiaria sibi reddidit convincendus (§. 961.); evidens omnino est, *assensum non in instanti, sed successive gigni, qui veritati propositionis demonstratæ, vel probabiliter evictæ præbendus.*

§. 964.

Si quis vi demonstrationis veritatis, vel falsitatis alicujus propositionis, aut vi probationis probabilis probabilitatis ejusdem convincendus; in demonstrando, vel probabiliter probando jam aliquandiu versatus esse debet, donec demonstrationem, vel probationem probabilem in dato casu agnoscere valeat. Conf. §. 540. 900. 344. 559.

Quinam sit ad convincendum idoneus.

§. 965.

Quoniam nostra demonstrationum ac probationum analysis, quam in usum lectionis librorum dogmaticorum commendamus (§. 928.), formam demonstrationis in dato quolibet casu ipsis oculis spectandam quam distinctissime exhibet (§. 522. 523. 524. 540.) & Logica (f. f. cit.) eam distincte exponit; ut quis vim demonstrationis vel probationis probabilis facilius percipiat, nec in utraque agnoscenda fallatur, & genuinam demonstrandi formam ex Logica sibi cognitam atque perspectam reddere, & demonstrationes ac probationes probabiles in casu quocunque dato juxta eam resolvere debet.

Quomodo ad convictionem facilem disponatur animus.

§. 966.

Quoniam vi demonstrationis vel probationis probabilis, quæ eandem cum ipsa formam tenet (§. 559.), convinci nequit, nisi qui aliquandiu in demonstrando fuerit versatus; *studium Geometriæ jam ab antiquissimis temporibus philosophiæ præmittendum esse judicarunt viri intelligentes, ita ut parum idoneus philosophiæ auditor habitus fuerit Geometriæ ignarus.*

Quid studium Geometriæ huc conferat.

§. 967.

Antequam alterum veritatis, vel probabilitatis propositionis datæ convincas, eandem ipsi explicanda; nisi eam jam intellegat (§. 873. 880. 898. 876. 900. 902. 199).

Propositio convincendo quando explicanda.

§. 968.

Qui convincendus est, eam asserre debet ad demonstrationem, vel probationem attentionem, ut agnoscat nullum sumi principium,

Attentio convincendi quæ.

lis esse debeat. *cipium, quod non sit certum, nec a forma demonstrandi vel probandi aberrari. Rationis loco conf. §. 953. sq. 532. 541. 558. sq.*

§. 969.

Medium illius
attentionis.

Quoniam adeo ad hanc attentionem requiritur, ut & demonstrandi & probandi principia, & forma inprimis demonstrandi familiaria sint (§. 968.), utrumque autem non nisi cum die, nec sine assiduo labore obtinetur, qui attentionem ad convictionem requisitam asserere vult, is & crebro demonstrandi exercitio, observata analysi nostra (§. 522. 523. 524.), formam demonstrandi, & successive crebra repetitione ac meditatione principia (§. 962.) sibi familiaria reddere debet.

§. 970.

Assensus con-
victi qualis.

Convictus non assentitur nisi propositioni sufficienter explicatae & probatae (§. 967. 955. & seqq. §. 961. 962.).

Convictio passive sumta definiri potest per assensum, qui præbetur propositioni sufficienter explicatae ac probatae, nempe ideo, quod eam sufficienter explicatam ac probatam intelligimus, judicantes vel juxta notiones confusas, quas scriptorum scientificorum assidua tractatione nobis comparavimus, vel juxta notiones distinctas ex Logica haustas.

§. 971.

Persuasionis
definitio.

Qui igitur assensum præbet propositioni nondum sufficienter explicatae ac probatae, is falso sibi persuadet se esse convictum (§. 476.). Unde persuasio passive sumta definiri potest per assensum, qui præbetur propositioni nondum sufficienter explicatae ac probatae, vel saltem non sufficienter probatae. Conf. §. 970.

§. 972.

Rationes per-
suasionis.

Qui sibi persuadet se esse convictum, cum tamen convictus non sit; is vel ignorat, quænam ad convictionem requirantur (§. 343. 952.), vel ad principia ac formam demonstrationis, aut ad alterutrum horum non satis attendit. Conf. 541. 952.

§. 973.

Præcipitantis
in judicando.

Actus assentiendi propositioni nondum sufficienter probatae ac explicatae dicitur præcipitantis in judicando.

Quid

Quid autem sit assensus, distincte in Psychologia exposituri sumus. Sufficit hic obiter monuisse, nos per *assensum* intelligere iudicium de veritate, falsitate & probabilitate propositionis. Unde patet, assensum minus fallacem secundum regulas logicas oriri debere, vi quarum certum de veritate, falsitate & probabilitate propositionum iudicium formatur. E. gr. Si quis de veritate vel falsitate propositionis, quod *Deus considerit mundum optimum*, iudicium sibi sumit, antequam cognovit, quid termino *mundi optimi* indigetur, eamque falsam pronunciat, probatione ex attributis divinis deducta nondum expensa; is iudicium suum de falsitate propositionis hujus deproperat & ob ratiunculas aliunde conquistas, veluti quod malum physicum & morale insint huic mundo, sibi persuadet, se esse convictum falsitatis propositionis, cum tamen convictus non sit, propterea quod precario sumit, *mundum non esse optimum*, in quo malum physicum ac morale extat, & in notione confusa mundi optimi acquiescens contradictionem inter notionem mundi optimi & existentiam mali physici ac moralis ostendere nequit: unde tamen falsitas propositionis evidenter agnoscenda (§. 498.).

§. 974.

Rationes assensus ex notione subjecti desumptæ dicuntur intrinsecæ; quæ vero aliunde petuntur, extrinsecæ.

Rationum intrinsecarum & extrinsecarum definitio.

E. gr. Si quis ob æqualitatem laterum atque angulorum largitur, figuram regularem circulo inscribi posse; is propositioni, quod *figura regularis sit circulo inscriptibilis* assentitur ob rationes intrinsecas. Si quis vero tuctur, non plures dari lineas curvas primi generis, quam sectiones conicas, propterea quod unanimi Geometrarum consensu idem affirmatur; is assentitur asserto Geometrarum ob rationem extrinsecam.

§. 975.

Rationes intrinsecæ eadem sunt, ob quas predicatum sub- jecto convenit. Conf. §. 222. 225. sq. Ratio igitur, cur prædicatum subiecto convenit, in categoricis a definitione; in hypotheticis a definitione & determinatione subiecti (§. 3. *Discurs. Prelim.*), consequenter in utroque casu a notione subiecti (§. 33. 149.) petitur, atque adeo intrinseca est (§. 974.).

Rationes intrinsecæ quales sint,

E. c. Ratio intrinseca, unde intelligitur, quod *Deus considerit mundum optimum*, derivatur ab attributis divinis & a fine, quem is

convenienter per creationem intendit Deus; sed eadem sunt rationes, ob quas mundum optimum condidit.

§. 976.

Assensus vi demonstrationis extorti rationes.

Si quis vi demonstrationis convincitur, is assentitur ob rationes intrinsecas (§. 522. 199. & 974.).

§. 977.

Assensus quando rationibus extrinsecis nitatur.

Si quis subiecti notionem nonnisi confusam habet, is prædicatum eidem tribuere nequit, nisi ob rationes extrinsecas. Etenim si notionem subiecti nonnisi confusam habet, judicia intuitiva inde formare nequit (§. 694. 695.), consequenter, cum ab iis demonstrationem ordini reneatur demonstraturus vi notionis subiecti prædicatum eidem tribui debere (§. 522. 523.), demonstrare haud quaquam valet, in propositionibus categoricis vi definitionis, in hypotheticis vi definitionis ac determinationis prædicatum subiecto convenire. Jam vid. §. 974.

§. 978.

Alius casus.

Si quis ignorat principia vel formam demonstrationis, is prædicatum subiecto tribuere nequit, nisi ob rationes extrinsecas. Etenim si principia, vel formam demonstrationis ignoret, utut vel maxime subiecti notionem distinctam habuerit, impossibile tamen est, ut demonstrationem actu condant, vi cuius evincitur, in notionem subiecti contineri, per quæ prædicatum eidem tribuendum determinatur (§. 522. 149.). Certus adeo esse nequit, ob notionem subiecti prædicatum eidem convenire (§. 541.), consequenter rationes, ob quas idem eidem tribuit, aliunde petere debet. (§. 974.).

§. 979.

Quomodo precipitantiam in iudicando evitetur.

Præcipitantiam in iudicando evitaturus assensum tamdiu suspendere debet, donec vel a posteriori, vel a priori veritatis, aut falsitatis, aut probabilitatis fuerit convictus. Etenim qui assensum tamdiu suspendit, donec vel a posteriori, vel a priori, aut veritatis, aut falsitatis, aut probabilitatis propositionis daræ fuerit convictus, is non assentitur nisi propositioni penitus intellectæ & cuius veritatem agnoscit (§. 957. 960. 967.), adeoque nonnisi sufficienter explicatæ ac probatæ. Præcipitantiam itaque in iudicando omnem evitat (§. 973.).

§. 980.

§. 980.

Quoniam a posteriori convincendus res ipsas præsentēs intueri & rerum practicarum veritatem a posteriori in seipso experiri (§. 955.), & in dato casu regulas ad notions, definitiones ac propositiones determinatas eruendas præscriptas applicare debet (§. 956.), aut ubi res præsentēs coram intueri non datur, auctoritatem observatoris juxta regulas fidei examinandam stabilire (§. 958.); qui autem a priori convincendus, & demonstrationes ac probationes probabiles ad prima sua principia revocare (§. 961.) & habitu demonstrationem ac probationem probabilem in dato casu agnoscendi pollere debet (§. 964.): igitur apparet, *quamam discussione opus sit, nisi assensum præcipitare voluerit, vel a posteriori, vel a priori instituenda.*

Discussio ad præcavendum præcipitantem in judicando necessaria.

Hac ratione satisfecimus regulæ, quam *Cartesius* ad evitandum præcipitantiam in judicando inculcat, qui *de iis omnibus dubitare nos jubet, in quibus vel minimam incertitudinis suspensionem reperimus.* Etenim jam constat, unde appareat, nullam amplius incertitudinis suspensionem superesse.

§. 981.

Præjudicium appellatur judicium erroneum per præcipitantiam latum. Unde patet *modus præjudicia evitandi*, scilicet *si non ante judicemus, quam vel a posteriori, vel a priori veritatis, aut falsitatis, aut probabilitatis fuerimus convicti.*

Præjudicii definitio & modus id evitandi.

§. 982.

Quoniam de multis judicare solemus, antequam a posteriori judicia universalia (§. 675. 676.) atque notions universales, & definitiones inprimis (§. 678.) formare, nec non demonstrationem, vel probationem probabilem agnoscere didicerimus, prout in vulgus constat; regulis tamen istis ignoratis (§. 956.), nec forma demonstrationis ac probationis probabilis adeo familiari, ut eam in casu dato agnoscere nobis detur (§. 964.), convictioni locus nullus est; evidens est nos de multis judicare, antequam convicti esse possimus veritatis, falsitatis, vel probabilitatis propositionis alienius dare, consequenter antequam propositio sufficienter nobis fuerit explicata & probata (§. 957. 967.); atque adeo per præcipitantiam (§. 973.).

Examen eorum, quæ didicimus, antequam ad convincendum idonei fuimus.

Quam.

Quamobrem ubi iudicia universalia & notiones universales cum definitionibus a posteriori formare & formam demonstrationis in dato casu agnoscere didicimus, iudicia omnia, quæ memoriæ mandavimus, ad examen revocanda, ut veritatis, falsitatis vel probabilitatis eorum convincamur.

§. 983.

Præjudicii
autoritatis
definitio.

Cum vel experientia constet, viros etiam in arte sua præclaros subinde errare; a veritate aberrat, qui simpliciter sumit vera esse, quæ a viro in arte sua præclaro affirmantur; falsa, quæ ab eodem negantur. Quoniam iudicium hoc per præcipientiam formatur (§. 973.); in præjudiciorum numero habetur (§. 981.). Solet autem præjudicium autoritatis appellari: ut adeo *Præjudicium autoritatis* sit iudicium, quo vera esse statuimus, quæ ab altero affirmantur, vel falsa, quæ ab eodem negantur, propterea quod nobis constet, ipsum eadem affirmare, vel negare. Et hinc in casu particulari ex præjudicio autoritatis statuere dicimur, cujus non aliam reddere noverimus rationem, quam quod alter idem affirmet, vel neget, quem verum a falso discernere eo in casu posse fumimus.

In cognitione probabili, qua in praxi vitæ sæpissime carere non possumus, argumento quoque ab autoritate petito locus est: unde enatum illud pervulgatum, *artifici in arte sua esse credendum*. Sed quatenus eodem uti possimus, ne præcipienter iudicemus & præjudicio autoritatis obnoxii reddamur, in Logica probabiliū doceri debet.

§. 984.

Medium aver-
tendi præju-
diciū auto-
ritatis.

Ne in præjudicium autoritatis proni simus, notandi sunt lapsus virorum præclarorum, immo eximiorum artificum in ipsa arte sua.

Quoniam vero omne præjudicium evitatur, ubi nihil per præcipientiam statuitur (§. 981.); igitur a præjudicio quoque autoritatis semper erit procul remotus, qui assensum tamdiu suspendens, donec vel a posteriori, vel a priori veritatis, aut falsitatis, aut probabilitatis fuerit convictus, quæ fide aliorum tenet, in medio relinquit (§. 979.).

§. 985.

§. 985.

Judicium erroneum de viribus propriis ad veritatem cognoscendam sufficientibus *præjudicium nimie confidentiæ* dicitur. Species hujus præjudicii est, quod viris doctis primi ordinis familiaris esse solet, quasi vires sufficienter veritatem beneficio notionum confusarum perspicendi, aut iis saltem subinde in demonstrationes admissis, neglecta accuratiori analysi, qualem supra commendavimus (§. 928.).

Præjudicium nimie confidentiæ & ejus species quædam singulæ.

§. 986.

Ne in præjudicium nimie confidentiæ sumus proni, considerandi sunt lapsus non modo nostri similitum, sed aliorum etiam, qui nos ingenio, acumine ac aliis animi dotibus vincunt, quarum in veritate pervestiganda usus est.

Medium illud declinandi,

CAPUT II.

DE MODO ALIOS REFUTANDI.

§. 987.

Alterum *refutare* idem est ac demonstrare falsitatem propositionis, quam is pro vera habet. Ipsa quoque *propositio*, cujus falsitas demonstratur, *refutari* dicitur.

Refutationis definitio.

§. 988.

Alterum impugnare dicitur, qui insufficiens probat falsitatem propositionis, quam is pro vera habet. Ipsa quoque *propositio*, cujus falsitas insufficiens probatur, *impugnari* dicitur.

Impugnatio-
nis definitio.

§. 989.

Propositio vera impugnari, non refutari; falsa & impugnari, & refutari potest. Pone enim propositionem veram refutari posse. Ergo demonstrari potest eam esse falsam (§. 987.): quod cum hypothese in evertat, absurdum est.

Quoniam propositiones refutari, quoniam impugnari possunt.

Quodsi propositionem quandam falsam precario sumis tanquam principium probandi & probatio insufficiens erit (§. 813.), & conclusio falsa, seu veræ contraria (§. 500.), inde inferri potest

(Logica contracta.)

Xx

est

est (§. 509. 510.). Vera igitur propositio impugnari potest (§. 988.).

Cum demonstrari possit vel per indirectum (§. 524.) propositionem aliquam esse falsam, vel directe (§. 522. 523.) contrariam falsæ esse veram; propositio falsa refutari potest (§. 987.).

Quoniam vero demonstrandi habitu non pollens insufficienter probat, quod demonstrari non repugnat; ideo propositio falsa impugnari quoque potest (§. 988.).

§. 990.

Quando constet adversarium non refutasse propositionem datam, non visum eius scripto.

Quoniam propositio vera impugnari tantum potest nequaquam autem refutari (§. 989.), ubi veritatis ejus vel a posteriori (§. 957.), vel a priori (§. 950.) fueris convictus, hoc ipso certus es, antagonistam eam tantummodo impugnasse, minime autem refutasse, ut ut eorum scripta non videris.

§. 991.

Quando refutatu errorum agnoscat.

Si quis ad refutationem eam attentionem offert, quæ ad convictionem requiritur; is errorem a se commissum agnoscit. Conf. §. 987. 968. 540. 594.

§. 992.

Quoniam demonstratio conveniat refutatio.

Quoniam refutatio erroris admissi demonstratio est (§. 987.), demonstratio autem indirecta (§. 528.) perinde ac directa (§. 515.) veritati stabiliendæ sufficit; in refutatione non minus locus est demonstrationi indirectæ, quam directæ.

E. gr. Si quis affirmet, *Venerem esse corpus lucidum*, & tu indirecte demonstres, *eam esse corpus opacum*, cum hoc ipso appareat eandem non esse corpus lucidum (§. 501.), in illo refutando directa uteris demonstratione. E contrario si indirecta demonstratione ex ea propositione, *Venus est corpus lucidum*, deducas, quod observationi repugnet, v. gr. quod nullas admittat luminis crecentis vel decrecentis phases instar lunæ; in eodem refutando ad demonstrationem indirectam confugis.

§. 993.

Differentia refutationis directæ ab indirecta.

Directa igitur seu *ostensiva refutatio* est, quæ nititur demonstratione directa seu ostensiva. Contra *Indirecta* seu *apogogica*

gogica refutatio est, quæ absolvitur demonstratione indirecta seu apogogica.

§. 994.

Si demonstratio, qua nititur refutatio, sive ostensiva, sive apogogica, contextitur ex aliis propositionibus ac definitionibus tanquam suis principiis (§. 533.), *refutatio* dicitur *a priori*. Quodli vero supposita generali Logicæ demonstratione propositioni refutandæ opponitur observatio, vel experimentum, seu experientia contraria, *refutatio a posteriori* vocatur.

Differentia inter refutationem a priori & a posteriori.

§. 995.

Quoniam impugnatio a refutatione non nisi forma differt, scilicet quod illa probatione insufficiente, hæc demonstratione nitatur (§. 987. 988.), probatio autem insufficiens a demonstratione principiis differt (§. 559.), scilicet quod hic non admittantur nisi certa (§. 533. 538 seqq.), ibi vero etiam precaria sumantur (§. 813.), adeoque incerta (§. 540. 535.); *nullum sane superest dubium, quin eadem differentia inter impugnandi diversos modos intercedat, quæ inter modos refutandi diversos obtinet.*

Impugnatio nem eodem modo differt, quo refutatio differt.

§. 996.

Est itaque *Impugnatio alia directa*, sive *ostensiva*, quæ nititur probatione directa, utur insufficiente, ea scilicet, quæ servat formam demonstrationis directæ. Contra *impugnatio indirecta*, sive *apogogica* est, quæ nititur probatione insufficiente indirecta, ea scilicet, quæ formam demonstrationis apogogicæ servat. Unde ulterius intelligitur, quando *impugnatio a priori* fiat, quando *a posteriori* in utroque casu (§. 994.).

Impugnatio nis differentia.

§. 997.

Antequam propositio refutetur vel impugnatur, eadem explicanda est, nisi sensus fuerit manifestus. Conf. §. 987. 497 307. 115. de refutatione; de impugnatione idem valet (§. 987 seq.).

Cur propositio explicanda, antequam refutetur vel impugnatur.

E. gr. Si quis refutare voluerit, quod *Sol spatio diurno circa Terram quiescentem revolvatur*; explicatione nulla opus est, cum notio complexa eidem respondens obvia sit. Enimvero si quis impugnare voluerit, quod *Deus condiderit mundum optimum*, in notionem mundi at-

que *mundi optimi* inquirere debet, ex intentione autoris affirmativam tuentis terminis istis jungendam, cum uterque terminus nondum admittat significatum determinatum communiter receptum.

§. 998.

Cur & quomodo explicatio demonstranda.

Quoniam is, qui alias cum terminis notiones jungit quam autor, quem impugnandum sibi sumsit, sensum fingit a mente ejus alienum (§. 118.), nec ipsius placita impugnat, vel refutat, sed alia ab iis diversa (§. 318. 319.); *ab impugnando vel refutando altero tamdiu desistendum, donec demonstraveris hunc, non alium esse verborum ipsius sensum*, principiis scilicet supra positis (§. 874. & seqq.) ad casus datos applicatis (§. 343.).

§. 999.

Logomachia definitio.

Impugnatio propositionis, cui respondentem notionem veram agnoscit impugnans, sed quam ipse aliis verbis exprimit, *Logomachia* dicitur.

Si quis impugnat propositionem, quod *Deus mundum optimum condiderit*, & tamen admittit, *Deum condidisse mundum fini a se intento*, scilicet gloriæ suæ illustrandæ, *maxime convenientem*, qui a nobis optimus appellari solet; ejus impugnatio nonnisi logomachia est.

§. 1000.

Medium evitandi logomachiam.

Pater adeo *logomachiam evitari, si propositio non impugnetur nisi sufficienter explicata & sensu ejus demonstrativa ratione stabilita* (§. 997. 998.).

§. 1001.

Scriptorum scientificorum utilitas in præcavendis logomachiis.

Quoniam in scripto scientifico lectori attento sensus autoris ubivis certus est, nec perverti potest, quin sensus perversus demonstrativa ratione refellatur (§. 881.): *scripta scientifica ad præcavendas logomachias plurimum conducunt*.

§. 1002.

An refutatio ni locus sit ob incommodam dictionem.

Si quis verbis notionem possibilem jungit, quibus vulgo impossibilis respondet; is equidem refutari nequit, admoneri tamen potest, ut dictionem corrigat. Quod refutari nequeat, disc. ex §. 518. 989. quod admoneri queat, vide §. 135. disc. præl. add. *Logic.* §. 874. 879. 983. 999. 593. 872.

Exem-

Exemplo hic nobis est *Augustinus* lib. 5. de civitate Dei c. 1. ubi sententiam tenere, linguam corrigere jubet eos, qui *fati* nomine decreta divina, vel voluntatem Dei appellant.

§. 1003.

Si quis ostendit modum, quo alter in errorem incidit, vel quod assumit principia falsa, vel quod in formam syllogismorum impigit; is alterum refutat. Etenim in utroque casu patet, quod erret (§. 596. 608. & seqq.); consequenter quod propositionem falsam pro vera habeat (§. 593.), atque adeo refutatur (§. 987.).

Præstantissimus refutandi modus.

§. 1004.

Quoniam in superioribus ostendimus, quomodo error circa judicia intuitiva committatur (§. 601.), vel ex principiis precariis (§. 596.), aut memoriæ quodam lapsu oriatur (§. 604.); quando forma syllogismorum vitiosa evadat (§. 608. & seqq.) & extradata notione demonstrationis cum ostensivæ (§. 522. & seqq.), tum apogogicæ distinctæ (§. 524. 530) pateat, num ejus neglectui error tribuendus sit; *modum, quo quis in errorem incidit, demonstraturus, regulas de errore circa judicia intuitiva commisso, ex principiis precariis, vel lapsu memoriæ orto, tum ex forma syllogismorum, vel demonstrationum vitiosa enato ad casum datum applicare debet* (§. 343.).

Ejus praxis.

§. 1005.

Si quis propositionem veram demonstrat, eo ipso contrariam refutat (§. 515. 528. 501. 987.).

Refutatio per demonstrationem propositionis veræ. Modi refutandi directi.

§. 1006.

Alterum adeo directe refutaturus propositionem veram falsæ oppositam, vel modum, quo is in errorem incidit, directe demonstrare debet (§. 1003. 1005. 993.).

Modus prior sufficit errori agnoscendo & fugando (§. 1005.): posterior autem, dum fontes errorum recludit, attentionem confert adeo facilis evitandis, cum sic devia, in quæ inciderunt alii, rectius evitare discamus. Consultum adeo est, ut uterque modus conjungatur, eo præsertim in casu, quo diserta erroris confutatione opus est, veluti cum error in lucem protrahitur ante veritatem detectam, vel nondum sufficienter stabilitam.

§. 1007.

Requisita ad
refutandum
alterum.

Qui cum erroris convincere studet, quem refutat, is non uti debet principiis nisi ab eodem concessis, nec quicquam efficit, nisi ulter ad refutationem eam afferat attentionem ut & agnoscat, nullum summi principium, quod non sit certum, nec a forma demonstrandi aberrari. Conf. §. 993. 961. 968.

§. 1008.

Refutatio sine
successu tenta.

Hinc consequitur, in refutando eo, qui principia ignorat, & eam adhibere nequit attentionem, quæ ad convictionem requiritur (§. 968.), inanem operam sumi. Conf. §. 963. 962. 968. 964.

Agnoverunt veritatem propositionis præsentis, qui inculcant, contra ignorantem principia non esse disputandum. Sed addere debebant: Contra inhabilem non esse disputandum.

§. 1009.

Modus refu-
tandi per indi-
rectum.

Alterum per indirectum refutaturus sumit propositionem, quam alter pro vera habet, tanquam veram & inde syllogismorum concatenatione infert propositionem, quam ipse falsam agnoscit. Conf. §. 993. 524. 527.

§. 1010.

Modus refu-
tandi per in-
directum spu-
ritus.

Si quis alterius sententiam consequentiis onerat, hoc est, propositiones falsas inde consequi affirmat, quas inde fluere demonstrare nequit; is eandem minime refutat.

E. gr. Systema harmoniæ præstabilitæ Leibnitianum impugnaturi vociferantur, in eodem destrui libertatem: quod perinde est ac affirmare, stante systemate harmoniæ præstabilitæ sequi hominem nullam habere libertatem, cujus contrarium cum Jaquelotus & alii dudum demonstrarint, eo ipso assertum jam fuit refutatum (§. 1005.). Nemo autem eorum ausus est hanc consequentiam secundam formam demonstrationis indirectæ ex notione harmoniæ præstabilitæ deducere. Systemata igitur istud minime refutatum, sed male impugnatum fuit.

§. 1011.

Quando refu-
tatio indirecta
absoluta.

Si ex propositione, quam alter pro vera habet, juxta formam demonstrationis indirectæ unica colligitur propositio falsa; illa jam refutata est: Superfluum vero ex ea ulterius inferre alias. Conf. §. 501. 503. 527. 539. 987. 597. 59.

§. 1012.

§. 1012.

Si quis errorem ab altero admissum vediculum, vel periculosum esse probare velit, is ex una propositione falsa, quam collegit, continuo infert alias, donec in casu priori ad tales pervenerit, quæ risum movent, minimum imperitis, adeoque plurimis; in posteriori autem istiusmodi errores prodeant, qui in Rep. non tolerantur, nisi prima statim ridicula, vel periculosa appareat.

Quando consequentia consequentiarum cumulantur.

Exempli loco nobis esse possunt, qui *systema Copernicanum, seu terræ motu* impugnavunt. Etenim qui contendebant, idem adeo absurdum esse, ut derideri mereatur, affirmabant, *admisso motu vertiginis Telluris adificia omnia collapsura esse & corpora terrestria quæcumque cælum versus excussum iri, aves e nido in aërem evolantes eum non iterum repetere posse, globum tormento versus orientem explosum post tormentum prolabi, lapidem ex altissima turri demissum versus occidentem extra urbem in campo decidere &c.* Contra qui eandem valde periculosam esse monstrare decreverant, eam *scripturæ sacræ manifesto contradicere* sumebant, atque hinc porro inferebant, quod eandem *defendens divinam Scripturæ Sacræ auctoritatem rejiciat, consequenter religionem revelatam in fabularum numerum referat & ideo atheismi suspicionem incurrat &c.*

§. 1013.

Consequentia hic dicitur propositio falsa, quæ ex alia, quæ pro vera venditur, infertur. Unde qui propositionem aliquam per indirectum impugnant, vel refutant, consequentiis eam impugnare, vel refutare dicuntur.

Consequentiarum definitio.

§. 1014.

Si quis ex propositione, quam alter pro vera habet, juxta formam demonstrationis indirectæ plures propositiones falsas a se invicem non dependentes colligit; is pluribus diversis modis eam refutat. Etenim una consequentia in hoc casu sufficit refutatori (§. 1011. 1013.); cumque unaquæque earum sibi peculiari demonstratione colligatur, tot utique prodeunt refutationes, quot sunt consequentiæ.

Refutatio indirecta multiplex.

§. 1015.

Si quis alteri consequentias ridiculas & periculosas imputat, hoc est, si contendit, alterum eas pro veris habere; is alteri nocere intendit. Conf. §. 1009, 1012. Sufficeret, ut demonstraret, consequentiam.

Imputatio consequentiarum molestarum unde oritur.

sequentias istas inde fluere (*§. §. cit.*), Si docere vellet, alterius sententiam esse falsam. Ergo alia adesse debet ratio, cur easdem alteri imputet. Intrinseca ex notione refutationis derivata ratio cum nulla hic adsit (*§. 974.*), extrinsecæ adesse debent (*§. cit.*), adeoque in præsentē casu a facultate appetitiva pendæ. Quoniam itaque liquet eum, qui impugnatur, vel refutatur, vi consequentiarum ridicularum minimum imperitis, adeoque plurimis, deridendum propinari, vi consequentiarum autem periculofarum famæ ac fortunæ periculum eidem creari, ubi imputationi fides habetur; evidens omnino est, consequentias ridiculas & periculofas animo nocendi imputari.

§. 1016.

Consequentiarum ultimus.

Consequentiarum dicuntur, qui consequentiis alio fine utuntur, quam animo refutandi. Vocantur etiam *Judices consequentiarum*, nec non, *consequentiarum fabri*.

§. 1017.

Cur consequentiarum primam consequentiam precario summat & alterius verba in sensum alienum detorqueat.

Quoniam *Consequentiarum* non animo refutandi consequentias profert, sed alium finem intendit sub refutationis prætextu (*§. 1016.*); ideo sibi religioni non ducit, primam consequentiam precario sumere, ut alias alteri molestas porro inde deducere valeat, immo ut aliqua veri specie eandem sumere imperitis videatur, verba alterius in sensum perversum detorquere non veretur: quod utrumque refutationis notioni repugnat (*§. 998. 1009.*).

§. 1018.

Consequentiarum præterea.

Quoniam consequentiarum sub prætextu refutationis alium finem intendit, quam refutationem (*§. 1016.*), alius vero intendi nequit, quam ut autorem, quem impugnat, vel alius deridendum propinet, vel exorsum reddat, & adeo vel famæ, vel fortunæ, immo vitæ noceat; igitur consequentiarum consequentias quærit vel ridiculas, vel periculofas, minimum plerorumque opinione tales; ubi istiusmodi consequentiæ non primæ se offerunt, consequentias consequentiarum eo usque continuat, donec ad tales pervenerit; nec in iis cumulandis subsistit, quamdiu tales offeruntur (*§. 1012.*), tandem denique molestas istas consequentias alteri imputat (*§. 1015.*).

§. 1019.

§. 1019.

Argumentum ab invidia ductum appellari sueverunt rationes, quibus in aliorum placita odium concitatur, quo opprimantur: ut adeo appareat, *argumento ab invidia ducto uti consequentiariorum* (§. 1016.).

Argumentum ab invidia definitio & quibus conveniat.

§. 1020.

Exhibebimus compendium diff. Clerici de argumento theologico ab invidia ducto: 1. *Sententia*, inquit, *quæ oppugnatur, male explicatur*. 2. *Cum invidiorum hominum dogmatis confertur*. 3. *Nominibus invidiosis infamatur*. 4. *Exaggeratur momentum questionis*. 5. *Invisi redduntur boni, quod consuetis non utantur vocibus ac loquendi formulis*. 6. *Studiöse celantur rationes, quibus sententia impugnata nititur*. 7. *Tacentur incommoda, quibus premittitur sententia, quæ defenditur*. 8. *Prætermittuntur ea, quæ invidiam amoliri possent*. 9. *Invidiosæ consequentiæ colliguntur ex eorum sententia, qui impugnantur*. 10. *Malignis suspicionibus premuntur*. 11. *Novitas illis objicitur quasi crimen*. 12. *Consensu hominum potentiorum operantur*. 13. *Miscentur in disputationibus multa, quæ ad rem nihil faciunt, sed quæ invidiæ creandæ apta sunt*. 14. *In deteriorem partem accipiuntur indifferentia*. 15. *Provocatio fit a peritis iudicibus ad imperitos*. 16. *Adversarii quasi immorigeri magistratibus infamantur*.

Praxis argumenti ab invidia ducti.

§. 1021.

Qui sub prætextu veritatis defendendæ dissidentes in discrimen famæ, fortunæ, immo vitæ adducere conatur, *persecutor* appellatur. Persecutoris definitio.

Ita *Paulus*, antequam converteretur, erat persecutor Christianorum, qui sub prætextu veritatis religionis Judaicæ defendendæ vi civili doctrinam Christianorum opprimere iisque ægre facere studebat.

§. 1022.

Quoniam consequentiariorum, qui periculosas consequentias alteri imputat, dissidentes ferre nequit iisque nocendi animum habet (§. 1018. & seqq.); persecutor vero sub prætextu veritatis defendendæ dissidentes in discrimen famæ, fortunæ, immo ipsius vitæ adducit (§. 1021.); *consequentiariorum periculosos* (*Logica contructa*.)

Quinam consequentiariorum in persecutorem degeneret.

consequentias alteri imputans in persecutorem facile degenerat, modo non desint vires.

§. 1023.

Modus refu-
tandi a poste-
riori.

Si propositioni, quam alter pro vera habet, observatio, vel experimentum, seu experientia contraria opponitur; propositio eo ipso est refutata. Conf. §. 488. 501. 987.

§. 1024.

Praxis ejus.

Quoniam iudicium ferre nequit, utrum experientia sit propositio, quam alter affirmat, contraria, necne, nisi qui doctrinam de propositionibus contrariis & regulas experientiae animo comprehendit, ut & contraria agnoscere (§. 343. 344. possit atque certus sit, perperam applicatis experientiae regulis vitium subreptionis non fuisse commissum §. 638.); à posteriori alterum refutaturus (§. 1023.) nosse debet doctrinam de propositionibus contrariis & praeerea quoque probe perfecta habere, quae de formandis iudiciis intuitivis & notionibus a posteriori (§. 639. & seqq.) integro capite docuimus, imprimis regulas, quae de observandis attributis & essentialibus (§. 644. 647.) nec non iis, quae per modum attributorum insunt (§. 643.), de definitionibus a posteriori detegendis (§. 649.) & limandis (§. 650. 651.), de causis investigandis (§. 667. & seqq.) & iudiciis universalibus intuitivis (§. 675. 676.) praecipunt.

§. 1025.

Cur de usu ra-
tionum ex-
trinsicarum in
impugnandis
aliis non aga-
tur.

Solent etiam sapissime, qui aliorum sententiam impugnant, rationibus extrinsecis uti, iisque propterea abutuntur consequentiarum, praesertim persecutores, quod non modo impugnare sueverint, quae minime intelligunt, verum etiam quod norint rerum impeditos, adeoque plurimos, per rationes extrinsecas assensum determinare (§. 974.). Qui dissentientium sententiam opprimere nititur, is media quavis probat, quibus finem sibi praefixum obtineri posse putat. Enimvero cum nostrum non sit malignas docere artes, quousque vero in impugnandis aliorum sententiis rationibus extrinsecis locus sit, in Logica probabilium doceri debeat; de eo in praesente, ubi Logica demonstrativa traditur, dicendum non est.

E. gr.

E. gr. Tale argumentum extrinsecum est, quod petitur a consensu maiorum & ab autoritate virorum in dignitate constitutorum, immo a pluralitate collegiorum idem sentientium.

§. 1026.

In refutatione abstinendum est a verbis, quæ contumeliam, vel injuriam redolent: multo magis autem, ubi refutandum erroris convincere studeas. Idem quoque in impugnatione valet. De refutatione vid. 987. 522 - 524. 530. 315. 1007. de impugnatione abstinendum, conf. §. 987.

A quibuscumque verbis in refutatione & impugnatione sit abstinendum.

§. 1027.

Cum *Consequentarius* alium finem intendat, quam refutationem (§. 1016.), alium vero intendere non possit, quam ut autorem, quem impugnat, vel aliis deridendum propinet, vel exosum reddat, & adeo vel famæ, vel fortunæ, immo vitæ noceat, ideo non mirum, si is utatur verbis maxime contumeliosis & in alterum injuriis.

Consequentarius quibus utatur verbis.

CAPUT III.

DE MODO SESE DEFENDENDI.

§. 1028.

Sese defendere idem est ac demonstrare, se ab altero non fuisse refutatum. Et *propositio* ab altero impugnata dicitur *defendi*, ubi demonstratur, eam ab altero non fuisse refutatam.

Defensionis definitio.

E. gr. Cum *systema Copernicanum* consequentiis ex motu vertiginis terræ deductis impugnaretur supra commemoratis (not. §. 1012), *Copernicani* idem defendebant ostendentes, absurda illa ex admissio motu vertiginis non sequi, propterea quod una cum tellure atmosphaera & quæ in eo sunt corpora eodem motu ciantur. Idem se defendebant adversus consequentarios objicientes, quod Scripturæ Sacræ autoritatem rejiciant, religionem revelatam in numerum fabularum referant & ideo atheismi suspicionem incurrant, dum negabant Scripturam Sacram motum solis diurnum statuere, utpote quæ hoc phenomenon recenscat,

Y y 2

non

non solvat, cum scopo ipsius phaenomeni noticia sufficiat, neglecta ejus causa physica.

§. 1029.

Defensio irrita
successu tenta-
ta.

Qui ergo demonstrare nequit, se ab altero non fuisse refutatum, is defensionem molitur, sed irrita successu.

Eodem scilicet modo differunt *defensio* & *tentamen defensionis*, quo supra differre diximus refutationem & impugnationem.

§. 1030.

Tentaminis
defensionis
definitio.

Tentamen adeo *defensionis* appellamus, si quis insufficiens probat, propositionem, quam pro vera, vel probabili habet, ab altero non fuisse refutatam.

Ita e. gr. *Copernicani* sese defendere tentarunt adversus consequentiaris fumentes motum telluris Scripturae Sacrae repugnare, dum respondere, eam loqui secundum opinionem vulgi, cum id demonstrari non possit. Quamobrem defensuri idem systema adversus eosdem evicimus (*not.* §. 942.), ex Scriptura Sacra decidi non posse; utrum terra moveatur, an Sol, cum motus Solis phrasi S. S. designet variationem situs respectu puncti fixi telluris.

§. 1031.

Quando de-
fensionis non
sit locus.

Si propositio aliqua fuit refutata, contra refutationem defendi nequit; (vid. § 987. 1028.) et si ab imperitis defensio tentari possit (§. 509. sq. 1030.).

§. 1032.

Defensio pro-
positionis
nondum pu-
blice demon-
strata a priori.

Si propositio vera impugnatur, cujus nondum in publicum prosat, vel ab impugnante ignoratur demonstratio; dum demonstratur, defenditur. Conf. §. 515. 528. 989. 1028.

§. 1033.

Ejusdem de-
fensio a poste-
riori.

Non absimili modo ostenditur, *propositionem impugnata defendi, si experientia confirmetur subjecto convenire predictum (§. 538.).*

E. gr. Si quis sumeret, dari in satellitibus Jovis maculas variabiles, & alter assertum impugnaret, quod in stellulis telescopicis maculas distinguere impossibile sit; idem defenderet allata in medium observatione *Cassini* atque *Maraldi* ex Commentariis Academiae Regiae Scientiarum Parisiensis, quam in Elementis Astronomiae descripsimus.

§. 1034.

§. 1034.

Quamobrem si ab imperito impugnetur propositio, quæ vel demonstrata, vel a posteriori confirmata peritorum iudicio certa est; defensione nulla opus est (§. 1032 seq.).

Quando impugnatio continenda.

§. 1035.

Si quis verba alterius in sensum alienum detorquet & sententiam a mente ejus alienam impugnat; defensio absoluta est, ubi verus verborum sensus fuerit demonstratus (§. 1028.).

Defensio in vindicando verborum vero sensu consistens.

E. gr. Nos in cosmologicis stabilivimus in mundo materiali nexum rerum sapientem, quem per dependentiam a causis efficientibus & finalibus explicamus & uide in Teleologia sapientiæ divinæ per opus creationis demonstrata argumenta petimus. Cum quidam nexum rerum & earum concatenationem pro synonymis haberent, quodque Spinoza fatalis ac brutæ necessitatis assertor termino concatenationis utitur, illum quoque per fatalem necessitatem interpretarentur ac inde consequentias periculosas colligerent, quasi providentia, immo existentia Dei hoc ipso negaretur, omnis religio cum christiana, tum naturalis subverteretur &c. non alia defensione opus erat, quam ut verum verborum sensum vindicarem: id quod (§. 831.) demonstrativa ratione fieri poterat, cum nullis in definiendo nexu usus fuerim terminis, nisi ante explicatis.

§. 1036.

Si quis sententiam impugnet, vel prorsus refutet, quam verba alterius fundere videntur, nec verus verborum sensus demonstrativa ratione patere possit; defensio erit absoluta, ubi is verba sua ita interpretatur, ut sensum fundant impugnanti, vel refutanti probatum (§. 891. 1028.).

Defensio obtrinens sensu verborum dubio.

Hinc enatum est illud pervulgatum: Quemlibet esse verborum suorum optimum interpretem.

§. 1037.

Quoniam persecutores sub prætextu veritatis defendendæ dissidentes in discrimen famæ, fortunæ, immo vitæ adducere conantur (§. 1021.) & consequentiarii nocendi animo consequentias cumulant, donec ad ridiculas, vel periculosas pervenerint (§. 1018.), neque, ut hoc fieri possit, primam consequentiam

Car perfectiores & consequentiarii eam non agnoscant.

precario sumere, immo ut aliqua veri specie eandem sumere imperitis videantur, verba alterius in sensum perversum detorquere verentur (§. 1017.); *persecutores pariter ac consequentiarum interpretationem verborum propriam, quæ nullum errorem parit, non admittunt, consequenter pro definitione nulla eam habent.*

§. 1038.

Defensio contra impugnationem directam, quæ fit probando contrarium.

Si quis propositionem aliquam directe impugnaturus ei contrariam directe probare nititur; illam defensurus ostendere debet, vel quod sumat principia precaria, aut prorsus falsa, vel quod in formam syllogismorum ratiocinando impingat (§. 533. 605 501. 987. 1028.).

§. 1039.

Defensio contra impugnationem directam, quæ nititur fonte erroris.

Si quis propositionem aliquam directe impugnaturus modum ostendere nititur, quo in errorem incidit alter, vel quædam principia falsitatis arguens, vel vitium formæ imputans; illam defensurus principia illa demonstrare, vel a posteriori confirmare tenetur conf. §. 538 seq. 1003. 1028.), nisi sint adeo manifesta, ut ad peritos provocare liceat (§. 1008.); vitium vero formæ per ignorantiam Logicæ imputari demonstrare debet (§. 1003. 1028.).

E. gr. Cum hypothesis de origine fontium ex aqua pluviali impugnaretur, quod aqua pluvialis eidem non sufficiat; eam defensurus *Mariottus* experimentis ea fini factis ingenioso calculo probavit in Tractu de motu aquarum part. 1. diu. 2. Oper. p. 338. & seqq. nonnisi tertia parte opus esse. Si quis in numerum principiorum precariorum referret gravitatem aëris; eam defensurus non alia re opus habet, quam ut impugnatorem ad *Ottomem de Guericke*, *Robertum Boyleum* aut alium auctorem ablegat, qui eam experimentis stabilivit. Si quis demonstrationem in forma impugnet; quod non conclusio syllogismi anterioris continuo ingreditur tanquam præmissa sequentem, quemadmodum in sorte demonstrativo accidit (§. 525.); eum docere teneris concatenationem syllogismorum, quæ sit ex conclusionibus plurium syllogismorum tanquam notione complexa formando iudicium intuitivum præmissæ vicem in syllogismo sequente obtinens adductis ex elementis Geometriz exemplis.

§. 1040.

§. 1040.

Si propositio indirecte impugnatur Et ex ea deducta consequentia tantum habeatur pro absurda; illum defensor aut demonstrare debet, banc esse veram (§. 1011. 1028.), aut ostendere minimum, quod sine probatione tanquam absurda sumatur (§. citt.).

Defensio contra impugnationem indirectam vi consequentiae minime absurda.

E. gr. Ricciolus motum vertiginis terra indirecte impugnans tanquam absurdum urget, quod illo admissio gravitas ejusdem corporis foret major versus aequatorem, quam versus polos. Illum itaque defensor opponit observationes Gallorum aliorumque, qui ex motu pendulorum didicerunt, gravitatem versus aequatorem omnino diminui. Similiter sententiam D. Augustini de mundo optimo impugnata ex eo, quod hinc sequitur absurdum, mundum sine malo fore deteriorem mundo, in quo malum datur, defendis, ubi urges, sine probatione pro absurdo haberi, quod tale esse minime probetur, cum demonstratum non sit, mundum sine malo morali fore meliorem altero, in quo datur malum: quemadmodum a nobis factum est in Metaphysicis.

§. 1041.

Si quis propositionem indirecte impugnans consequentiam, unde eam falsitatis redarguit, sumit, non syllogismorum concatenatione colligit; illam defensor monere debet, eam precario sumi atque urgere ut demonstretur, quomodo inde fluat. Vid. §. 524. §27. 1009. 1028.

Defensio contra impugnationem consequentiae precaria nimis.

E. gr. Qui systema harmoniae praestabilitae Leibnitianum impugnant, precario sumunt consequentiam, quod eo stante nulla sit libertas: illud adeo adversus hanc impugnationem indirectam defendis, ubi observas, consequentiam istam ex conditionibus istius systematis legitimo rationeciniurum nexu non colligi, sed gratis sumi, atque postulas, ut impugnatores dent, si possint, demonstrationem hujus propositionis: in systemate harmoniae praestabilitae nulla est libertas.

§. 1042.

Iisdem positis, propositionem impugnata defendit, qui contrariam consequentiae precariae directe inde colligit (§. 515. 501. 1009. 1028.), vel ex assumpta consequentia colligit, quod propositio impugnata, vel ejus hypotesi repugnat (§. 524. 527. 1009.).

Alii modi defensionis in eodem casu.

E. gr.

E. gr. Si *systema harmonia præstabilita Leibnitianum* consequentia precaria impugnetur, quod libertatem tollit; idem defendis, ubi cum *Fiqueloto* ostenderis, libertatem in eodem salvam & integram persilire. Fieri enim nequit, ut libertas in eodem salva sit & una per idem tollatur. Similiter quando *systema* idem impugnetur consequentia precaria, quod *singula actiones libera externa in eodem per miracula* fiant consequenter perpetua in eodem miracula sint admittenda; idem defenditur per indirectum sumendo propositionem istam, tanquam veram & inde colligendo, quod *Deus ad nutum anime potentia extraordinaria producat motus in corpore*, naturaliter non secuturos. Quoniam id *systemati harmonia præstabilita* repugnat; eo ipso constat, in eodem actiones externas per miracula non produci, consequenter miracula perpetua in eodem non admittenda esse.

§. 1043.

Defensio in
casu conse-
quentiarum
cumulatarum.

*Si consequentia cumulantur, quarum una ex altera infer-
tur, propositio impugnata tantummodo defendenda est contra ca-
rum unam (§. 1041 seq.); si vero plures cumulantur, quarum
una ab altera non pendet, contra singulas (§. 1042 995).*

Scilicet in casu posteriori perinde est, ac si plures diversis modis ad-
versus eandem propositionem insurgerent. Quis vero est, qui ignorat,
in hoc casu fieri posse, ut unus eam, ubi falsus fuerit, refutet; etsi ceteri ean-
dem male impugnent? E. c. Consequentiarum ex consequentia precaria,
quod in *systemate harmonia præstabilita Leibnitiano libertas tollatur*, infer-
runt alias de *virtute, pœnis, religione christiana & naturali* sublati. Idem
defensurus ubi ostenderit, libertatem in eodem salvam esse, non
opus habet, ut ulterius probet, virtuti, pœnis, religioni cum reve-
lata, tum naturali in eodem esse locum. Aliter vero sese res ha-
beret ubi præter libertatem in eo *systemate* jugulatam urgentur perpetua
miracula: quo in casu idem ab utraque consequentia liberandum. Et-
enim si vel maxime libertas subsistat in *systemate Leibnitiano*; non
tamen ideo repugnat, ut actiones externæ sint totidem miracula &
contra.

§. 1044.

Defensione
contra verba
injuriola cur
non sit opus.

*Contra verba, quæ contumeliam, vel injuriam redolent, nul-
la defensione opus est (§. 1026. 1028.).*

§. 1045.

§. 1045.

Si quis propositionem impugnans ignorat principia, vel demonstrandi ac probandi methodum, vel utrumque; sese defensurus idem demonstrare debet (§. 1028. 987. 532.).

Defensio contra ignorantem principia & demonstrandi methodum.

Argumenta desumuntur vel ab ipsa impugnatione, quæ satis prodit ignorantiam impugnatoris, vel ex ejus scriptis, quæ publici juris fecit.

§. 1046.

Quoniam consequentarius & persecutor sub prætextu veritatis vindicandæ alteri nocere intendit (§. 1018. 1021.); *ubi principia & methodum demonstrandi ac probandi ignoraverit, multo magis id demonstrandum, ne fidem habeant dicenti, qui per se de veritate propositionis impugnatae statuere nequeunt.*

Inprimis contra consequentiarum & persecutorum in causa.

§. 1047.

Contra persecutorem sese defensurus demonstrare debet, quod sit persecutor, h. e. quod sub prætextu veritatis defendendæ se in discrimen famæ, fortunæ, immo vitæ adducere conetur (§. 1021.) *& cur sit persecutor.* Sese defensurus id agere debet, ut ejus propositum pateat, tum ut in ruborem det ipsum persecutorem, nisi prorsus omnem pudorem exuerit; tum ne tam facilem penes alios inveniat fidem.

Defensio contra persecutores.

§. 1048.

Si quis alteri imputat consequentias ridiculas & periculosas, quales opiniones ipsemet fovet; sese defensurus demonstrare debet, eum persequendi animum habere ac ipsummet fovere opiniones ridiculas & periculosas (§. 1022. 1047.).

Defensio contra imputationem consequentiariorum.

Exemplo nobis hic Christus est, qui, cum Pharisei ipsi imputarent, quod Samarita cum Diabolo commercium habeat, retorserit ipsos facere opera Diaboli patris sui & a Dei cognitione alienos esse.

§. 1049.

Scripta polemica dicuntur, quibus errores refutantur aliorumque sententiæ impugnatae vel defenduntur, vel earum de- (Logica contracta.)

Scriptorum polemicorum sententia.

& apologeti-
corum deli-
nitio

fensio tentatur. Subinde quoque *eristica* appellantur. *Apologetica* vero vocantur, quibus continentur defensiones adversus impugnaciones errorum ridiculorum & periculorum, nec non adversus persecutores.

E. gr. Theologia polemica appellatur ea theologiæ pars, in qua objectiones dissentientium discutiuntur. Apologias scripsere christiani doctores adversus imputationes iniquas gentilium.

§. 1050.

Regula in istis
condendis ob-
servanda.

Quoniam in antecedentibus (§. 987. & seqq. atque §. 1028. & seqq.) docuimus, quæ refutandi, impugnandi & defendendi animo fieri debeant; *scriptum polemicum & apologeticum conditurus observare debet, quæ de refutando & defendendo a nobis præcipiuntur (§. 1049.).*

§. 1051.

A scriptis eri-
sticis cur ab-
horreant in-
tellectus &
virtute præ-
dici.

Quoniam si propositio vera demonstratur, eo ipso contraria refutatur (§. 1005.), alter vero per indirectum refutatur, si erroneam, quam tueretur, sumis tanquam veram & inde syllogismorum concatenatione infers aliam, quam ipse falsam agnoscit (§. 1009.), hoc est, si veram indirecte demonstres (§. 524); consequentiariorum vero praxis (§. 1017. & seqq.) a bonis moribus & veritate abhorret (§. 1015.); ideo *virii intellectus ac virtute præditi a scriptis eristicis abhorrent.*

§. 1052.

Scripta apolo-
getica quando
necessaria.

Cum argumento ab invidia ducto odium concitetur in aliorum placita, ut ea opprimantur (§. 1019.), & ipsis auctoribus aut defensoribus famæ, fortunæ, immo vitæ periculum creetur (§. 1020. & seqq.); *scriptis apologeticis opus est, quando interest generi humano, ne veritas opprimatur, & qui veritatem profitentur famæ, fortunæ ac vitæ periculum a se depellere tenentur.*

CAPUT IV.

DE METHODO DISPUTANDI.

§. 1053. ~

Disputatio nostris moribus est mutua propositionis alicujus impugnatio vel refutatio ac defensio in loco publico facta. Hinc *disputare* dicitur, tum qui thesin impugnat, vel etiam refutat; tum qui eam adversus impugnationem defendit, vel refutationi tandem cedit.

Disputationis definitio.

§. 1054.

Propositio ad disputandum proposita dicitur *Thesis*. Qui thesin impugnat, vel refutat, si fieri possit, vocatur *Opponens*; qui eam contra impugnationem defendit, vel refutationi tandem cedere cogitur, *Respondens*; qui partes respondentis suscipit, *Præsides* vocatur: ut adeo appareat, *Præsides ac Respondentis eandem esse partes*. Omnes communi nomine *Disputantes* appellantur.

Opponentis, Respondentis ac Præsidis definitio.

§. 1055.

Disputantes in terminis contradictoriis versari debent. Conf. § 987. lq. 1028. 285.

Contradictio disputantium motus.

§. 1056.

Disputantes convenire debent in notionibus subiecti & prædicati, ut nempe utrique non jungant, nisi eandem (§. 1055. 285. 287. 290).

Consensus disputantium in notionibus subiecti & prædicati.

E. gr. Si, qui affirmat; *mundum hunc, quem Deus condidit, esse omnium possibilem optimum*, per *mundum* intelligit omnem rerum cum simultanearum, tum successivarum inter se connexarum seriem, ita ut futurorum beatorum status ad eam simul pertineat; *optimum vero mundum* dicit eum, qui *fini a Deo per creationem intento magis, quam ceteri convenit*; contra eam oppositurus terminos singulos in eodem significato accipere atque adeo negare debet, *omnem rerum creaturarum seriem fini a Deo per creationem intento magis convenire, quam quamcunque aliam*.

§. 1057.

Propositionis
explicatio op-
positi prae-
mittenda.

Unde consequitur, *opponentem propositionem, quam impugnandum sibi sumit, ante explicare debere, quam opponat, nisi sensus fuerit manifestus, ut scilicet respondens tempestive monere possit, si is ab opponente vel prorsus, vel parumper mutetur* (§. 1054. 997.).

§. 1058.

Respondentis
officium circa
falsam propo-
sitionis inter-
pretationem
ab opponente
factam.

Quodsi opponens in explicanda propositione alias notiones subjecto & praedicato jungit, quam respondens, ut prodeat sensus a mente ipsius diversus; respondens propositionem in eo sensu rejicere ac opponentem docere debet, quas utrique termino notiones jungere teneatur, ut oppositio contra thesin fiat, quam defendit (§. 1054. 320.).

§. 1059.

Officium op-
ponentis ubi
sensus verbo-
rum Respon-
dentis obscu-
rus:

Propositionis
explicatio op-
ponendo eli-
cienda.

Si sensus verborum respondentis non satis pateat opponenti, ex respondente quaerit necesse est, quasnam cum singulis notiones jungat (§. 1056. 1058.).

§. 1060.

Quodsi respondens notiones singulis terminis jungendas ab oppugante rogatus explicare nolit, opponens eas elicere debet impugnando propositionem ob obscuritatem. Etenim si opponens propositionem obscuritatis accusat, hoc vel alio aequipollente argumento adversus eam insurgit: *Cujuscunque propositionis terminis notiones nullae respondent, illa est sine mente sonus.* Atqui terminis propositionis, quam respondens defendit, notiones nullae respondent. Ergo propositio, quam respondens defendit, est sine mente sonus (§. 1055.).

§. 1061.

Probatio ab
opponente re-
quisita.

Sensu propositionis impugnandae, vel refutandae certo, opponens ei contrariam probare, vel demonstrare debet (§. 1054. 1006.).

§. 1062.

Probationis
species.

Cum probatio atque demonstratio vel directa sit, vel indirecta (§. 520. 521.), & in refutatione ac impugnacione demonstrationi ac probationi cum directae, tum indirectae locus sit (§. 992. 995.):

995.): *opponens propositionem thesi respondentis contrariam probaturus, vel demonstraturus, uti potest probatione, vel demonstratione, non minus indirecta, quam directa.*

E. gr. *Opponens impugnaturus D. Augustinum, quod mundus a Deo conditus sit optimus, asserentem vel directe probare debet, possibilem esse mundum eo, qui existit, meliorem; vel per indirectum ostendere, posito, sed non concesso, mundum hunc esse optimum, inde consequi, quæ vel notioni optimi, vel aliis veritatibus manifestis repugnant.*

§. 1063.

Quoniam opponens respondentem erroris convincere intendit, nimirum quod affirmet, quod erat negandum, vel quod neget, quod erat affirmandum (§. 1053. 1054.), non uti debet nisi principiis a respondente concessis (§. 1007.), atque adeo probationem vel demonstrationem eo usque continuare debet, donec ad principia a respondente concessu pervenerit. Conf. §. 961 seqq.

Probationis
tecum.

§. 1064.

Quodsi ergo nulla sint principia, in quæ opponens & respondens consentiant, vel ad talia non nisi per ambages nimium prolixas pervenire detur; opponens contra ignorantem vel negantem principia disputare non debet.

Quando oppo-
sitis non ha-
beat locum.

§. 1065.

Opponens syllogismos singulos, ex quibus ipsius probatio vel demonstratio constat, in forma sigillatim proponere debet. Conf. §. 1053 sq. 1007. 522 sq. 608 seqq.

Cur formaliter
sit disputa-
andum.

§. 1066.

Opponens incipere debet a syllogismo ultimo, qui demonstrationem vel probationem ingreditur. Etenim syllogismus ultimus in demonstratione, vel alia quacunque probatione, si ea directa fuerit, propositionis impugnatæ contrarium; si vero indirecta fuerit, propositionem manifesto falsam, seu consequentiam absurdam, tanquam conclusionem infert (§. 522. 523. 524. 559), vel subinde in casu posteriori ex propositione, quam impugnatur, ejus contradictoriam colligit (§. 530.), & ubi a syllogismo ultimo ordine retrogrado ad anteriores ascenditur, præmissæ primo propositorum ex disciplinis minime notæ tanquam

Unde opposi-
tionis initium
fieri debeat.

conclusiones inferuntur per anteriores, aut ex pluribus conclusionibus anteriorum formantur (*§. §. cit.*). Quamobrem si ab ultimo syllogismo ad anteriores continuo ascenditur, respondens non modo videt, quod a scopo minime aliena proferantur, sed quæ ad thesin ipsius impugnandam faciunt; verum etiam opponens facto ipso intelligit, quousque probationem continuare debeat. vid. rursus §. 522 & 549.

§. 1067.

Modus oppositionis quomodo innoscitur.

Ex demonstratione propositionis præcedentis simul liquet, si probationem contrariæ thesios, vel illationem consequentiæ absurdæ ex thesi, quam impugnas, eo modo logice resolvas, quo demonstrationes resolvuntur (§. 522. & 549.); modum oppositionis hinc fieri manifestum.

§. 1068.

Quando respondens dicendus sit ignorare principia.

Quoniam in syllogismis, quæ probationem vel demonstrationem ab opponente allatam ingrediuntur, præmissæ duplicis generis occurrunt, quarum aliæ sunt propositiones ex disciplinis petitæ, quo spectat argumentum, de quo disputatur; aliæ vero conclusiones per syllogismos, quorum concatenatione fit probatio, vel demonstratio, illatæ, aut propositiones ex pluribus istiusmodi conclusionibus per modum propositionis intuitivæ formaræ (§. 522. & 549.); respondens autem thesin impugnatam defensor nolle debet definitiones ac propositiones, quæ ex disciplinis, quo illa spectat, mutuo sumuntur & a petitis certæ agnoscuntur; respondens dicendus est ignorare principia, quando ignorat definitiones ac propositiones ex disciplina, quo thesis impugnata spectat, in usum præmissarum mutuo petitas (§. 533.).

§. 1069.

Assumptio argumenti & responsionis ad idem definitio.

Syllogismus ab opponente prolatus contra thesin respondentis, quam impugnat, vocatur *argumentum*. Syllogismus vel *argumentum* a respondente assumi dicitur, dum ab eodem integer repetitur, prout ab opponente fuit prolatus. Idem respondens dicitur *respondere ad argumentum*, sive *syllogismum*, dum monet, quamnam præmissam concedat, seu tanquam veram admittat; quamnam vero adhuc in dubium vocet probationem ejus deside-

desiderans, & num formam syllogismi legitimam agnoscat, an vero vitium aliquod in eademprehendat.

§. 1070.

Ut appareat, *respondentem mentem opponentis rite percepisse, syllogismos singulos is assumere debet* (§. 1069.).

§. 1071.

Cur respondens argumentum assumere debeat. Cur ad idem respondere debeat.

Respondens ad syllogismos singulos ab opponente prolatos respondere debet. Conf. §. 1054. 987. 19. Quoniam vero constare nequit, utrum a parte opponentis stet veritas, nec ne, nisi quando respondens agnoscat, nullum summi principium tanquam præmissam in syllogismo, ex quibus demonstratio vel probatio constet, quod non verum esse concedat, atque nihil ullibi in forma fuisse peccatum (§. 1007.); necesse utique est, ut respondens ad singulos syllogismos moneatur, quamnam præmissarum concedat, quamnam in dubium vocet, & num circa formam aliqua sint reprehendenda.

§. 1072.

Quodsi respondens utramque præmissam in dubium vocet, unam tamen probationis magis indigam existimet, quam alteram; illius probationem petit, hanc tantisper seponit (id quod indicare potest hisce verbis: *transseat major, vel minor*), *donec illa fuerit absoluta.*

Quando alteram præmissam transire jubet respondens.

§. 1073.

Quodsi utraque præmissa eadem incertitudine respondentem laborare videatur, utramque etiam negare debet, arbitrio opponentis relicto, utram primo loco probare velit.

Quando utramque negat.

§. 1074.

Quodsi contingat, utramque præmissam esse adeo evidentem, ut a respondente in dubium vocari non possit; totum argumentum erit concedendum (§. 508.).

Quando totum argumentum concedat.

§. 1075.

Propositio dicitur restringi, si notio subjecti, vel quod ad notionem subjecti & prædicati refertur, ita determinatur, ut subjecto conveniat prædicatum, quod sine ista determinatione

Restrictionis definitio & differentia.

conve-

convenire non poterat. Illa autem determinatio *Restrictio* appellari solet & quidem in casu primo *recta*; in altero *obliqua*. Propositio, in qua subiecti vel prædicati notio non sufficienter determinatur, vocatur *irrestricta*, vel *restringenda*; propositio vero, in qua determinatio sufficiens datur, *restricta*, aut *restrictiva*.

E. Propositio, *quæ difficilia sunt, pulchra sunt*, est *irrestricta*, neque enim in omni casu vera est, cum non quævis difficilia intelligenda sint, sed nonnisi ea, *quæ bona*, aut *quæ virtutis sunt*, vel laude *digna*. Unde propositio restricta talis erit: *Bona difficilia pulchra sunt*, vel *quæ difficilia in genere virtutis sunt, pulchra sunt*, vel *difficilia laude digna pulchra sunt*. Et hæc quidem propositio exemplum præbet restrictæ rectæ restrictione: obliqua vero restrictione gaudet hæc altera, *Protophthalmus est princeps Astronomorum veterum*, cui *irrestricta* respondet *Protophthalmus est princeps Astronomorum*. Denique restrictionis respectivæ exemplum est: *Aër est levis respectu fluidorum sensibilium*, cui respondet *irrestricta, aër est levis*.

§. 1076.

Limitata pro-
positionis de-
finitio.

Quodsi determinatio subiecti, vi cuius prædicatum eidem competit, sit vel aliqua ejus pars, vel modus, *propositio* dicitur *limitata*: si ea omittatur, *illimitata* appellatur.

Patet adeo differentia, quæ inter propositionem restrictam & limitatam intercedit. Nimirum in propositione limitata determinatio sumitur ab intrinseco; in restrictiva ab extrinseco. Ita in exemplo propositionis rectæ restrictione restrictæ; *Difficilia in genere virtutis, vel laude digna*, aut *difficilia, quæ bona sunt, pulchra sunt*, determinatio difficilis desumitur ab extrinseco, neque enim in notione difficilis continetur ratio, cur sit in genere virtutis, vel laude dignum, vel bonum. Enimvero exemplum propositionis limitatæ est, *athlops est albus quoad dentes*, ubi determinatio desumitur a parte subiecti, & illimitata propositio eidem respondens hæc est: *athlops est albus*.

§. 1077.

Distinctionis
definitio.

Quando respondens præmissam syllogismi vel restringit, vel limitat; hoc est, determinationem omissam supplet, sub qua prædicatum subiecto convenit, sive ea ab extrinseco, sive ab intrin-

intrinseco petatur (§. 1075. 1076.); *distinguere* dicitur & applicatio illius determinationis ad subiectum vel prædicatum *distinctio* appellari solet.

E. gr. Si propositio *lapis calefacit* limitatur, adjecta determinatione, *ubi fuerit calidus*; inter *lapidem calidum & non calidum* sive *frigidum* distinguitur & *lapidem calidum calefacere* affirmatur, *lapidem non calidum* sive *frigidum calefacere* negatur.

§. 1078.

Si *opponens* tanquam *præmissa* utitur *propositione non sufficienter determinata*, aut si *mavis*, *irrestricta* vel *illimitata*, seu *restringenda* & *limitanda*; *respondens distinguere & applicatam distinctione monere debet*, quando *maiores* vel *minores* concedit, quando *eandem* neget (§. 1071. 1069. 1077.).

Officium respondentis in distinguendo

E. gr. Si *opponens* ita argumentetur: *Quodunque est leve, illud non est grave. Sed aer est levis. Ergo aer non est gravis*; propositio, *aer est levis*, restringenda est restrictione respectiva dicendo, *aerem esse levem respectu fluidorum sensibilium ceterorum* (§. 1075.). Respondens igitur cum *minorem* omni sensu negare non possit, distinguere inter *levitatem respectivam & absolutam* & distinctione hac ad argumentum *opponentis* applicata distincte monere debet, quid concedat, quid neget, dicendo: *Quicquid est absolute leve, illud non est grave*, concedo *maiores*. Sed *aer est absolute levis*, nego *minorem*. *Quicquid est respective leve*, respectu scilicet *ceterorum fluidorum sensibilium*, *illud non est grave*, nego *maiores*. Sed *aer est respective levis*, hoc est, *levior ceteris fluidis sensibilibus*, concedo *minorem*.

§. 1079.

Quoniam *distinctio* consistit in applicatione restrictionis, vel limitationis ad subiectum propositionis limitandæ vel restringendæ (§. 1077.), restrictio vero vel limitatio in determinatione subiecti vel ejus, quod ad notionem subiecti vel prædicati refertur (§. 1075. 1076.); *distinctio invenitur inquirendo in determinationem subiecti, vel ejus, quod ad notionem subiecti aut prædicati refertur*, quæ stante prædicatum subiecto competit.

Quomodo distinctio invenitur.

§. 1080.

Cum *respondens* conclusionem tanquam veram admitte-
(Logica contracta.) Ana re officium, si re-

spondens negat, vel distinguit aliquam præmissam.

re nequeat, quamdiu utramque præmissam tanquam veram non admittit (§. 508.); *Opponens præmissam a respondente negatam probare & distinctionem, ubi distinguit, vel rejicere, vel contra eam argumentari, hoc est, propositionem sic restrictam vel limitatam probare debet, prout eam negat respondens.*

E gr. Si respondens concedit, *aërem esse levem respectivè, sed negat esse levem absolute*; opponens *levitatem absolutam* probare tenetur, nisi respondenti manus victas dare voluerit.

§. 1081.

Enthymemate quando sit utendum.

Si altera præmissa fuerit adeo manifesta, ut eam a respondente negari non posse certum sit; opponens per enthymema argumentari debet (§. 395.).

E gr. *Quaecunque mutabilia sunt, ea constanter non insunt. Sed modi mutabiles sunt. Ergo modi constanter non insunt*, h. l. major est axioma adeo evidens, ut in dubium vocari haud quaquam possit. Opponens itaque brevius argumentatur per enthymema: *Modi sunt mutabiles. Ergo constanter non insunt.*

§. 1082.

Quando consequentia in syllogismo hypothetico neganda.

Si opponens syllogismo utitur hypothetico, in quo posito antecedente non ponitur consequens, antecedens licet verum sit; respondens consequentiam negare debet (§. 380 seq.).

E. gr. *Si in mundo, qui existit, dantur mala physica & moralia, mundus hic non est optimus. Sed verum est prius. Ergo & posterius*; respondens antecedens, *quod in mundo dentur mala physica & moralia*, concedere tenetur. Quoniam adeo consequens negare nequit (§. 381.), consequentia neganda. Negandum scilicet est, *ex eo, quod in mundo dantur mala physica & moralia, sequi, mundum non esse optimum.*

§. 1083.

Casus alter.

Si opponens utitur syllogismo hypothetico, in quo consequens falsum est, non tamen eodem sublato antecedens tollitur; denuo respondens consequentiam negare debet (§. 380.).

E. gr. *Si mundus est optimus, non dantur in eo mala physica & moralia. Sed falsum est posterius. Ergo & prius*; respondens concedere debet,

debet, falsum esse, quod in mundo non dentur mala physica & moralia. Cum tamen idem non concedat, mundum hunc optimum non esse; utique negare debet, ex eo, quod mundus sit optimus, sequi, quod nulla in eo sint mala physica & moralia.

§. 1084.

Si opponens in syllogismo hypothetico antecedens ponit, nec respondens integrum argumentum concedere, neque consequentiam negare potest, antecedens negare debet (§. 381.).

Quando in syllogismo hypothetico antecedens negandum.

E. gr. Si mundus sine malo morali melior eo, in quo idem locum habet, inundus, qui existit, optimus non est. Atqui verum est prius. Ergo & posterius; respondens antecedens negare debet, scilicet quod mundus sine malo morali melior sit eo, in quo idem locum habet.

§. 1085.

Si opponens in syllogismo hypothetico tollit consequens, quo tamen sublato antecedens tolli nequit, nec consequentia negari potest; respondens consequens concedere debet, hoc est, negare illud tolli posse (§. 381.).

Quando consequens concedendum.

E. gr. Si systema harmoniæ præstabilitæ possibile, libertas in eo subsistit. Sed libertas in eo non subsistit. Ergo non est possibile; respondens concedere debet consequens, quod libertas in systemate harmoniæ subsistat; id quod idem est ac negare, libertatem in eo subsistere non posse, seu falsum esse, quod libertas in eo non subsistat.

§. 1086.

Quoniam modus disputandi non differt ab analysi demonstrationis logica (§. 1067.) atque ea ad eandem attentio affertur, ut & appareat, nullam admitti præmissam nisi sufficienter probatam, nec ullum syllogismum nisi in forma legitimum (§. 1068. & seqq.); in disputatione adeo vis ab opponente factæ demonstrationis, aut defectus probationis omnium optime percipitur (§. 540.), atque hinc vel propositionem ab opponente propugnatam certam (§. 539.), vel dubium esse evidentissime omnium constat (§. 557.). Ex disputatione adeo, si ad finem perducitur, opponente ac respondente officio suo satisfaci-

An disputando veritas erui possit.

cientibus, evidentissime innotescit, utrum propositio aliqua certa sit, an incerta.

§. 1087.

Quemodo per
quæstiones lit
disputandum.

Si per quæstiones disputare libuerit, opponens incipere a syllogismo primo, qui demonstrationem vel probationem ingreditur, & ex respondente quærere debet, num hoc vel istud principium, quo tanquam præmissa utitur, concedat & conclusionem inde illatam admittat, ordine hinc progressurus ad ceteras, donec ad ultimum perveniatur. Conf. §. 1061 sq. 522 sqq.

CAPUT V. DE METHODO DOCENDI.

§. 1088.

Docere quid
sit.

Docere hic nobis idem est ac rerum alteri incognitarum notitiam verbis viva voce prolatis ejus animo ingenerare.

§. 1089.

Requisita ad
docendum.

Patet adeo, docentem eorum, quæ docurus est alterum, notiones habere ac facultate instructum esse debere singulas verbis convenientibus exprimendi (§. 35. 1088.).

§. 1090.

Notionis con-
fusæ commu-
nicatio.

Si discens rei alicujus nondum habet notionem, nec docens habet nisi confusam, hic eandem alteri aliter communicare nequit, nisi ut rem præsentem ei percipiendam sistat.

§. 1091.

Notionis di-
stinctæ com-
municatio.

Si discens rei alicujus nullam adhuc habet notionem, habet tamen notiones notarum, quæ notionem illius distinctam ingrediuntur, novitque prætereaterminos, quibus singula indignantur; docens notionem distinctam illius rei cum eo communicaturus recensere debet notas singulas, quæ eam ingrediuntur. Conf. §. 114.

E. gr. Ponamus tyronem Geometriæ notiones habere claras, etſi confuſas, quaternarii, æqualitatis, anguli recti & lineæ rectæ. Cum eodem notionem *quadrati* diſtinctam communicaturus eum docere debet, quod figura iſta, quæ quadratum dicitur, terminetur lineis rectis numero quatuor ac inter ſe æqualibus, quæ junguntur ad angulos rectos,

§. 1092.

Quodſi ergo diſcens notarum, quæ notionem diſtinctam ingrediuntur, notiones vel nullas, vel obſcuras habuerit, antequam docens notionem diſtinctam cum eodem communicare poſſit (§. 1091.) notiones notarum minimum confuſas animo ejus ingenerare debet (§. 1090.).

Alius caſus.

§. 1093.

Docens definitionem nominalem explicaturus diſcenti ſingulas notas ſigillatim indicare debet, quæ eam ingrediuntur (§. 190. 189. 78. 150. 87.).

Reſolutio definitionum nominalium.

E. gr. Si in Arithmetica definitio numeri quadrati explicanda eſt, docens diſcentem monere debet, 1. quod numerus quadratus ſit aliquod factum & 2. quod hoc factum ab aliis diſſerat æqualitate factorum, ſeu quod multiplicandus & multiplicator ſint idem numerus.

§. 1094.

Si in definitione nominali termini quidam occurrant, diſcenti vel nondum noti, vel nondum ſatis familiares; docens in caſu priori notionum iis reſpondentium ſive diſtinctarum (§. 1091.), ſive confuſarum (§. 1090.) communicatione intelligibiles eos reddere debet. Conf. §. 1088.

Explicatio earum.

E. gr. Si in definitione numeri quadrati terminus *facti*, itemque *factoris* diſcenti nondum fuerit familiaris; docens utriuſque definitionem repetit, ut ejus memoria diſcenti refricetur, ſcilicet quod *factum ſit numerus*; qui ex multiplicatione unius per alterum prodit, & *factores ſint numeri*, qui per ſe invicem multiplicantur. Has definitiones ubi in definitione numeri quadrati ſubſtituit docens, ea jam diſcenti clarior evadit, quod pauciorum terminorum notitiam præſupponat. Etenim loco definitionis, *Numerus quadratus eſt factum, cujus factores ſunt æqua-*

Aaa ;

les,

les, prodit propositio, si idem numerus per se ipsum multiplicatur, qui inde prodit est numerus quadratus.

§. 1095.

Illustratio earum.

Docens definitionem nominalem discenti explicaturus eam ad exemplum applicare atque monstrare debet, inter prædicata judiciorum intuitivorum, quæ exempli beneficio format (§. 639.) esse notas, ex quibus definitio nominalis componitur. Conf. §. 918. 1088.

§. 1096.

Resolutio definitionum geneticarum.

Si docens definitionem realem sive geneticam discitem docetur, sigillatim recensere debet singula, quæ ad genesin rei concurrunt, & quid unumquodque eorum ad eam conferat. Conf. §. 193.

§. 1097.

Definitionum geneticarum explicatio & illustratio.

Eodem vero, quo ante, modo ostenditur, in explicandis & illustrandis definitionibus realibus eadem tenenda esse, quæ observanda sunt in explicandis & illustrandis nominalibus (§. 1094. 1095.).

§. 1098.

Propositionis resolutio.

Propositionem exposturus docens hypotbesin a thesi distinguere & sic propositionem in duas alias ejusdem subjeçti resolvere, immo si hypotbesis plures determinationes continet, hanc denuo in tot resolvere tenetur, quot adsunt determinationes. Vid. §. 213. 215. 311. 215. 225. 380. 652. Categorica propositio reduci potest ad hypotheticam, adeoque eodem modo tractari (§. 222sq.).

§. 1099.

Propositionum explicatio & illustratio.

Eodem vero modo, quo supra (§. 1094. 1095.) ostenditur, propositionem explicari communicatis notionibus terminorum discenti vel ignotis, vel minus familiaribus & illustrari exemplis, quibus cognitio symbolica ad intuitivam reducitur.

E. gr. Propositionem (§. 218.), attributa communia prædicantur de subjeçto sub conditione essentialium nonnullorum, quæ cum aliis entibus eidem sunt communia explicaturus in discantis animo notiones attributi communis (§. 65.) & essentialium (§. 63.), nec non subjeçti & prædicati

casi (§. 197.) excitare debet, nisi singula fuerint eidem adeo familiares, ut vocibus auditis veluti sponte succurrant.

§. 1100.

Docens demonstrationes ac probationes ita resolvere debet, ut non modo singula præmissæ syllogismorum, ex quibus iidem constant, animus discantis subeant; sed earum etiam forma eidem appareat. Nec inconsultum est, si conclusiones, quæ syllogismos sequentes sive sigillatim, sive in unum confusæ tanquam præmissæ ingrediuntur, in tabula annotentur, ut conspectui discantis pateant, in demonstrationibus præsertim longioribus. Demonstratio-
nem jam dedimus in superioribus (§. 928.).

Demonstratio-
num resolu-
tio. 2

§. 1101.

Quoniam docens librum vel historicum, vel dogmaticum discanti explicans eundem finem penes discentes intendit, quem lector intendere debet, nimirum ut quæ in iis narrantur facta vel traduntur dogmata intelligat, & sibi profutura memoriæ mander (§. 872.), discntem manu ducens iniis, ubi sibi ipse nondum sufficit; *ei tenendæ sunt regulæ omnes, quæ de legendis libris tum historicis, tum dogmaticis traduntur (§. 873. & seqq.)* capite integro.

Regulæ docen-
ti cum lectore
libri commu-
nes.

§. 1102.

Cum porro docens, ubi in historica cognitione discanti communicanda non acquiescit, eum veritatis propositionum intellectuum convincere intendat; *eidem quoque usui sunt regulæ, quæ de modo alios convincendi integro capite (§. 952. & seqq.)* exhibentur, ubi non solum historicam cognitionem curæ cordique habet.

Quando me-
thodis alios
convincendi
usui sit do-
centi.

§. 1103.

Quodsi docens propositionem falsam refutare, vel dubiam impugnare tenetur; methodi refutandi leges capite integro (§. 987. & seqq.) stabilitas observare tenetur.

Methodo re-
futandi quan-
do habet
opus.

§. 1104.

Quoniam in libris dogmaticis non occurrunt, nisi definitiones ac propositiones, docens autem utrasque dijudicare tenetur, ne ad errores seducat discntes, & ex theoria pariter atque

Cur. omnis
theoria & præ-
xia Logice
docenti ne-
cessaria.

atque praxi Logicæ constar, non minus definitionum, quam propositionum determinatarum rationem in Logica tradi; quod docens theoriam pariter ac praxin Logicæ omnem perspectam habere debeat, dubitandum non est.

SECTIO V.

DE

USU LOGICÆ IN ÆSTIMANDIS VIRIBUS AD RERUM COGNITIONEM REQUISITIS.

CAPUT I.

DE ÆSTIMANDIS VIRIBUS AD VERUM INVENIENDUM ET DIJUDICANDUM REQUISITIS.

§. 1105.

Quando vires veritati a priori inveniendæ sufficiant.

Si quis novit principia, ex quibus veritas investiganda eruitur, nec non artificia heuristica, quibus ad eam eruendam opus est, atque ratiocinandi habitu pollet, quali in demonstrationibus opus est (§. 522. & seqq.); ejus vires veritati a priori inveniendæ sufficiunt. Lege §. 694 699. 522 599. Enimvero cum artificii heuristici præter autem ratiocinandi adhuc aliis opus sit, teste experientia inventoribus obvia; igitur & ea perspecta habere debet veritatem inventuram.

§. 1106.

Cur æstimatio virium pleniusque non-

Quoniam non constar, quibus præcise principiis opus sit ad veritatem investigandam, nisi ubi jam fuerit inventa, præterquam

quam quod generaliter constet, qualia præsupponantur, *ideo* nisi probabilis. *nonnisi probabiliter judicare datur, utrum vires veritati investiganda sufficiant, nec ne* (§. 549.).

§. 1107.

Certo tamen constat, *si quis vel principia in eo genere ignorat, ad quod veritas investiganda spectat, vel artificia beurlifica in universum nescit, vel nullo prorsus ratiocinandi habitu pollet, eum ad veritatem investigandam ineptum esse* (§. 1105.).

Virium ad veritatem investigandam insufficientia.

E. gr. *Differentiam inter naturam & gratiam* pervestigare nequit, qui nec vires animæ naturales distincte cognovit, ut norit, quorumnam adus per eas determinari queat, nec intelligit, quemnam perfectionis gradum, docente scriptura sacra, beneficio gratiæ homo attingere possit.

§. 1108.

Quodsi quis requisitis quibusdam ad inveniendum destituitur, ea tamen sibi comparare valet; is veritatis inventionem in potestate sua adhuc habet (§. 1105.).

Quando quis ad inveniendum sese aptum reddere valeat,

E. gr. Si quis fuerit principiorum arithmetico- & geometricorum probe gnarus, in astronomicis tamen non multum versatus, ac in geometricis atque arithmetice se inventorem præstitit; is principia astronomica sibi familiaria reddere valet, atque adeo ad veritatem astronomicam investigandam aptus evadere potest.

§. 1109.

Si vel principia non omnia fuerint nota, vel quædam non satis familiaria, notiones tamen communes in eo genere familiares; defectus librorum evolutione tollitur, optimunque hic præsidium foret scriptum dogmaticum historicum in gratiam inventorum conditum. Vid. §. 833.

Ignorantiæ principiorum quomodo mendi licet.

§. 1110.

Si quis in judiciis intuitivis formandis fuerit versatus & sermonis probe gnarus; is notiones distinctas rerum obviarum consequi valet. Vid. §. 639. 652.

Notiones distinctas quinam consequi possit.

§. III.

Quoniam definitiones nominales condi nequeunt, nisi ante multa rei prædicata cognoveris atque ea in essentialia, attributa

(Logica contracta.)

B b b

& mo-

Definitiones nominales in ejusnam sint potestate.

& modos distinguere noveris (§. 701.); *definitionem nominalem in ejus potestate esse colligimus, quem rei definiendæ multa prædicta cognita habere ac inessentialibus, attributis atque modis distinguendis probe exercitatum novimus.*

§. III2.

Specialis v-
rium dijudi-
catio unde
pendeat.

Quoniam plures tradidimus regulas ad veritatem cum a posteriori, tum a priori detegendam necessarias duobus capitibus integris §. 639 & seqq. atque §. 680. & seqq.); *si quem regulas veritatem quampiam a posteriori, vel a priori investigandi ad praxin transferre prompte valere intelligimus, cum illius inventionem in potestate habere colligimus.*

§. III3.

Speciatim i. in
casu judicii af-
firmativi.

Consequitur hinc, *innotescere nobis 1. quod quis causas a posteriori vel priori investigare, 2. notiones generum ac specierum formare, 3. notionum possibilitatem detegere, 4. ex definitionibus & bypotbesibus assumtis propositiones eruere, 5. definitiones reales invenire valeat; quam primum constat, quod regulis 1. investigandi causas a posteriori (§. 667. & seqq.) & priori (§. 697. & seqq.), 2. determinandi notiones generum & specierum (§. 680. & seqq.), 3. evincendi notionum possibilitatem (§. 687. & seqq.), 4. eruendi ex definitionibus & bypotbesibus propositiones (§. 694. & seqq.) atque 5. inveniendi definitiones reales sive a posteriori (§. 656. 657.), sive a priori (§. 704. & seqq.) satisfacere possit, editis speciminibus.*

§. III4.

2. in casu judi-
cii negativi.

Quoniam tamen a nobis demonstratum non est, regulas istas esse unicas, quibus veritas quæsitæ in dato casu sive a posteriori, sive a priori colligitur, ne iudicium præcipitur, *veritatis investigationem in dato genere non esse in potestate alterius colliges, ubi demonstrare poteris, seu aliunde certo noveris, cum nec regulis a nobis præscriptis satisfacere posse, vel easdem prorsus ignorare, nec præterea eidem perspectas esse alias, quibus idem, quod nostris præstat.*

§. III5.

Requisita ex-
trinseca ad ve-

*Si veritas a posteriori detegenda in potestate esse debet, oc-
casio.*

casione & externo, si quo opus est, instrumentorum apparatu aliisque subsidiis destituti non sumus opus est.

ritatem a posteriori inveniendam.

Ad observationes astronomicas requiritur observatorium cum instrumentorum apparatu, nec experimenta physica absque instrumentis, sumtu aliisque externis commoditatibus capere licet. Ita anatomica postulant cadavera; phytologica hortum vel agrum.

§. III6.

Quoniam ad verum a falso discernendum regulæ logicæ sufficiunt (§. 516.); *Verum a falso discreturus non modo regulas logicas probe perspectas habere, verum etiam habitu eas applicandi polleere debet.*

Vires quando sufficiant vero a falso discernendo.

§. III7.

Si quis formam demonstrationis legitimæ cum directæ, tum indirectæ dijudicandi habitu pollet; is verum a falso a priori discernere valet. Conf. §. 343 sq. 515. 528.

Quinam verum a falso a priori distinguere possit.

§. III8.

Immo cum ex ipsa forma demonstrationis legitimæ (§. 522. & seqq.), & ejus definitione (§. 469.) pateat, non alia probatione, nisi demonstratione certo constare posse a priori, propositionem datam esse veram; recte omnino colligimus, *ab eo, qui formæ demonstrationis legitimæ notionem nullam habet, vel minimum eam in casu dato dijudicandi habitu destituitur, veritatem a priori dijudicari non posse.*

Quinam verum a falso a priori discernere non valeat.

§. III9.

Si quis demonstrationis tum ostensivæ, tum apogogicæ formam animo distincte comprehendit novitque principia demonstrationem datam ingredientia esse certa; is judicare valet, utrum propositio data sit demonstrata, nec ne (§. 522. sqq. 534. 530. 343. 469.). Quodsi notio formæ demonstrationis fuerit incompleta, in judicando falli potest (§. 91. 79. 87. 603. 594.). Si denique alterutrum requisitorum prorsus defecit (§. 522. sqq.); judicium de demonstratione data nullum ferre licet.

Cujus sit judicium de demonstratione data.

In Mathesi exempla obvia sunt. Etenim si quis novam proponit demonstrationem, eam genuinam agnoscimus tum ex forma legitimæ

tum ex principiis certis. Quodsi principia quædam, quibus autor demonstrationis utitur, alteri nondum fuerint perspecta, etsi circa formam nihil desideret, se tamen judicare nondum posse agnoscit, utrum propositio data demonstrata sit, nec ne, quamdiu principiorum istorum veritatem non perspicit. Qui studio Matheticos notionem formæ demonstrationis incompletam sibi compararunt, in ejus applicatione aberrant, ubi extra eandem demonstrationes dare conantur. Accidit hoc ipsi *Cartesio*, demonstrationem existentia Dei evoluturo more Geometricarum, in *Mexico* de prima philosophia p. m. 85. & seqq. quem formam demonstrationis distinde animo non comprehendisse vel exinde constat, quod syllogisticos formales ad eam minime necessario judicet, quorum tamen concatenatione forma demonstrationis legitimæ absolvitur (§. 522. & seqq.).

§. 1120.

Qui demonstrare valet, num demonstratio sit ordinata, completa & consummata.

Quinam notionem veram a deceptrice distinguere valet.

Quinam definitiones nominales dijudicare possit.

Si quis demonstrationis datæ analysin logicam (not. §. 522. & seqq.) dare valet, is judicare potest, utrum demonstratio data sit completa, num incompleta; utrum ordinata, an inordinata; utrum consummata, an inconsummata (§. 522. seqq. 824. 769. 825.).

§. 1121.

Si quis possibilitatem notionum vel a priori, vel a posteriori stabilire valet (§. 687. & seqq.); is veras a deceptricibus distinguere aptus est (§. 538. seq.).

§. 1122.

Si quis essentialia, attributa communia atque propria, quæque per modum attributorum insunt, a se invicem discernere atque demonstrare valet, se essentialia omnia, attributa vero communia quæque per modum attributorum insunt tot enumerasse, quot definito agnoscendo sufficiunt; is judicium ferre potest, utrum definitio legitima sit, nec ne, hoc est, regulis logicis respondeat. Conf. §. 169. 173.

Demonstrationis enarrationis sufficientis pendent a principiis specialibus disciplinarum. E. gr. Ex notione societatis in genere constat, societates differre cum personis, qui eam ineunt; tum sine, cujus gratia contrahuntur. Quamobrem paret in definitione alicujus societatis essentialia, per quæ scilicet ea in esse suo determinatur, sufficienter enume-

enumerari, si loci omnes enumerentur & finis integer indigitetur, v. gr. quod societatem nuptialem incant mas atque scemina iobolis procreanda & educanda gratia.

§. 1123.

Quoniam regulæ logicæ complures observandæ sunt, ut definitio sit a nævis omnibus libera, quas integro capite (§. 150. & seqq.) tradidimus; de definitionibus judicaturus, utrum a nævis omnibus liberæ sint nec ne, & regulas logicas de definitionibus familiares experiri, & dextre ad casum præsentem applicare debet.

Quinam judicare possit, num definitiones sint a nævis liberæ.

§. 1124.

Qui notiones veras a deceptricibus distinguere novit; is verba a rebus discernere valet.

Quinam verba a rebus discernere valeat.

§. 1125.

Quoniam notiones veræ a deceptricibus distinguuntur vel vi demonstrationis, vel observationis (§. 1121.); verba a rebus distinguere valet, qui notionum eis respondentium possibilitatem vel demonstrationem, vel experientia stabilire novit.

Idem ulterius ostenditur.

§. 1126.

Si quis acumine pollet notionem prædicati in notione subiecti indiviso nexu cum ea coherentem pervidendi; is axiomata & postulata a propositionibus demonstrativis discernere valet. Conf. §. 259 - 266.

Quinam axiomata & postulata judicare valeat.

§. 1127.

Qui rejecto axiomate, vel postulato in dato quovis exemplum palam facere potest, vel contradictoria, vel quæ sunt, obsqueratione admittenda esse; is indivisum nexum prædicati cum subiecto intuetur.

Quinam nexum indivisum prædicati cum subiecto intueatur in casu dato.

§. 1128.

Qui propositionem ex notione subiecti demonstrare valet; is eam sufficienter determinatam esse agnoscit. Vid. §. 216. §22 seqq. 315.

Unde agnosca: ut sufficiens præpositionis determinatio.

§. 1129.

Si quis per observationem ostendere valet, prædicatum judicii intuitivi esse vel attributum, vel essentialiale, vel quod per modum

Quinam a posteriori veritatem judicare valeat.

dum attributi inest (§. 643. Et Sqq.), vel ex pluribus observationibus inter se collatis palam facere potest, positus his solis prædicatum convenire subiecto; id veritatem propositionum universalium a posteriori judicare valet. Conf. 775 lq. 587.

E. gr. Omnem lapidem esse durum a posteriori probamus, quod eum durum deprehendamus in aëre non minus calido, quam frigido, & non minus in humido, quam sicco, consequenter ratio duritiei intrinseca eaque constans esse debeat.

§. 1130.

Quinam probabiliter
judicare
possit.

Qui novit requisita ad veritatem omnia, seu rationem sufficientem, cur prædicatum subiecto tribuendum; is in dato casu singulari probabilitatem æstimare valet (§. 549.).

E. gr. Ita probabilis est spes de messe divite concepta, si semen fecundum agro probe stercoreto fuerit commissum, ob ignorantiam tempestatis, cujus magnum est in vegetatione momentum.

§. 1131.

Quinam de
probabili de-
finitionum &
propositio-
num applica-
tione judicare
valcat.

Quoniam requisita ad definitionem (§. 551.), & ad propositionis cum categoricæ (§. 554.), tum hypotheticæ (§. 555.) veritatem stabilivimus ac inde definitionum ac propositionum applicationem probabilem (§. 552. 561.) deduximus; *qui regularum de applicatione definitionum ac propositionum probabili vim tenet, is de eadem in dato casu judicium ferre poterit (§. 343. 344.).*

§. 1132.

Quinam de
probabilitate
hypothesium
philosophicarum
judicare
aptus sit.

Qui novit phænomena, quorum gratia hypothesis aliqua philosophica condita fuit, Et ex hac sive directe, sive indirecte conclusiones colligere valet; is de probabilitate hypotheseos judicium ferre potest. Etenim cum requisita ad veritatem hypotheseos philosophicæ sint phænomena, quorum inde reddenda est ratio & quæ per se invicem non determinantur (§. 577.); ubi hypothesis vera fuerit, ea, quæ vel directe, vel indirecte ex ea colliguntur, cum illis consentire debent, seu, quod perinde est, quæ ex hypothesis a priori deducuntur, eadem sint necesse est cum phænomenis, quæ per observationem patent. Quod si ergo quis & phænomena novit, & a priori cum directe, tum indirecte colligere valet,

valet, quæ inde consequuntur; ex collatione conclusionum a priori deductarum & phaenomenorum observatorum consensus eorundem innotescit.

E. gr. Astronomi norunt phaenomena motus proprii planetarum atque ex hypothesi *Copernicana* demonstrativa ratione deducere valent, quæ inde consequuntur. Ex consensu itaque eorum, quæ inde fluunt, atque phaenomenorum, quæ observant, veriore illam iudicant.

§. 1133.

Quoniam consensus eorum, quæ ex hypothesi philosophica colliguntur, atque phaenomenorum major est, si ad ipsas determinationes mathematicas extenditur; quia, quæ mathematicas determinationes admittunt, per principia mathematica ex hypothesi pariter atque observatis eruiere valet, ut in iis quoque consensus liquido appareat; is de probabilitate hypotheseos iudicium multo certius ferre potest.

Quinam certius de ea iudicare possit.

E. gr. Astronomi ex hypothesi *Copernicana* formam calculi geometrici motus planetarum exsculpunt & juxta eum loca eorundem ad datum tempus determinant mox observaturi, num eodem ibidem sint comparituri. Consensus calculi cum observatis ab alia hypothesi non exspectandus iisdem persuasit, hypothesin *Copernicanam* esse verior.

CAPUT II.

DE ÆSTIMANDIS VIRIBUS AD LIBROS CONSCRIBENDOS, DIJUDICANDOS ET LEGENDOS NECESSARIIS.

§. 1134.

Si quis notiones distinctas & quantum datur, adequatas formulandi habitu pollet atque singula suis nominibus efferre novit; is scriptum historicum ea fini condere potest, ut rerum in natura

Scriptum historicum quinam condere possit ad res.

rum & factorum notitiam inde hauriendam.

natura & arte obviarum factorumque notitiam inde hauriat lector.

Conf. §. 78. 87. 94. 731. 743. 746.

§. 1135.

Quibus rationibus apti reddamur adscripta historica condenda.

Quoniam cum in ontologicis docetur, quænam in notionibus distinctis diversorum entium formandis tenenda sint, & ex disciplinis specialibus patet, quidnam in entibus diversarum specierum attendendum sit, ubi in dato casu singulari notionem distinctam adipisci volueris; *qui in illo genere scientiæ, ad quod res describenda refertur, notiones generales sibi comparavit; is ad consiciendum scriptum historicum ea fini, ut notiones rerum descriptarum animo lectoris ingenerentur, pervaptus erit.*

E. gr. Notio *compositi*, quæ in Ontologicis traditur, generatim monstrat, quænam in notione distincta, corporis cum naturalis, tum artificialis formanda attendenda sint. Notio *temperantiæ*, quæ in Moralibus stabilitur, ad formandam notionem distinctam temperantiæ *Aristidis* præluceat.

§. 1136.

Quinam historiam naturalem & artium in usum cognitionis solida condere queat.

Si quis in judiciis intuitivis, iisque determinatis, formandis, modis ab attributis & essentialibus distinguendis, causis rerum & rationibus finalibus inquirendis probe versatus fuerit; is historiam & naturalem, & artium ea fini condere poterit, ut animum lectoris principiis imbuat, quibus in ratiociniis de rebus naturalibus & artificialibus opus est. Conf. §. 741. 743.

§. 1137

Quinam ad historiam in usum civilem atque moralem condendam aptus.

Historiam civilem, ecclesiasticam & privatam conditurus ea fini, ut dogmata politica & moralia inde confirmetur ac prudentiæ civilis & privati principia hinc deriventur, notionibus moralibus atque politicis determinatis instructus, in judiciis intuitivis formandis exercitatus & in discursivis ab intuitivis distinguendis promptus esse debet. Vid. §. 749. 751 seq. 1135. 1110. 748. 50. 343 seq.

§. 1138.

Quinam ad historiam in usum legum

Historiam civilem, ecclesiasticam & privatam in usum legum providentiæ divini cognoscendarum conditurus, notionibus moralibus, politicis & Theologiæ naturalis instructus, in judiciis determinatis

minatis formandis promptus & in rationibus pervestigandis probe exercitatus esse debet. Lege §. 753. 343 sq.

§. 1139.

Historiam literariam ea fini conditurus, ut conslet, unde petenda sit veritatum jam inventarum cognitio, principia illius disciplinæ, cuius historiam dare intendit, familiaria experiri, qui ad eam spectantes prodire libros perlegere & verum a falso, certum ab incerto, probabile a minus probabili distinguendi facultate pollere debet (§. 754. 119.).

§. 1140.

Historiam literariam ea fini conditurus, ut ars invenendi inde locupletetur, nosse debet quamnam veritates unoquoque tempore jam fuerint inventæ & quarum notitiam habuerit, qui alias adhuc incognitas ulterius invenit (§. 755.).

§. 1141.

Scriptum dogmaticum historicum conditurus in scriptis scientificis probe versatus esse atque propositionum in demonstrandis aliis atque praxibus usum sibi familiarem reddere debet: in primis etiam nosse tenetur, quamnam ad singula rite intelligenda necessaria sunt. Conf. §. 817 sq. 758. 1128. 760. 834 sq. 758. 793.

§. 1142.

Librum dogmaticum historicum in gratiam inventorum conditurus omnes evolvere debet autores, qui non tantum aliis jam dicta repetunt, verum etiam nova superaddunt, quæ apud alios nondum extabant. Conf. §. 833.

§. 1143.

Scriptum scientificum conditurus in aliquo scientiarum genere & definitiones ac propositiones illuc spectantes perspectus habere & habitu methodo scientifica utendi pollere debet: immo in illis etiam disciplinis probe versatus sit opus est, unde principia demonstrandi mutuanda. Vid. §. 836 sq. 761 sq. 760. 533. 765.

E. gr. Astronomiam methodo scientifica traditurus inventa Astronomorum cognita atque perspecta habere, methodum mathematicam, qua utuntur Geometræ & quæ eadem cum philosophica (§. 132. disc. prelim.), consequenter cum scientifica (§. 762.), familiarem experiri & (Logica contracta.)

Ccc

princi-

providentiz agnoscendarum condendam aptus.

Quinam historiam literariam in usum discendum condere aptus.

Quinam historiam literariam in usum artis invenendi condere possit.

Quinam scriptum dogmaticum historicum condere possit.

Librorum lectio ad scriptum historicum dogmaticum in usum inventorum condendum necessarium. Scriptum scientificum quinam condere possit.

principiorum Arithmeticæ, Geometriæ ac Trigonometriæ utriusque, nec non sphericorum Theodosii optime gnarus esse debet.

§. 1144

Quinam more Geometrico scribere librum possit.

Qui probationem alicujus propositionis in syllogismos formales ita resolvere novit, ut præmissæ ulterioris probationis indigere continuo probentur per prosyllogismos, donec ad tales perveneris, quorum præmissæ probatione nulla indigent; is eadem methodo extra Matthesium uti potest, qua Geometriae uti solent. Hoc patet ex intuitu exemplorum, quæ prostant.

§. 1145.

De libris dogmaticis quinam judicare possit.

Quoniam supra integro capite (§. 783. & seqq.) exhibuimus regulas de scriptis dogmaticis judicium ferendi, scilicet an scriptum sit in suo genere completum (§. 785. & seqq. 838.); an prolixum nimis & superflua contineat (§. 789.); an sit perspicuum (§. 790.); an utile (§. 795.), an ordine (§. 797. & seqq.) & accurata methodo digestum (§. 806. & seqq.); qui regulas istas judicandi libros dogmaticos sibi familiares reddit & eas ad casus obvios dextre applicandi habitum sibi comparat; is non modo judicium exactum de iisdem ferre, verum etiam idem demonstrare valet.

§. 1146.

Quinam de accurata methodo judicare valeat.

Si quis demonstrationes logice resolvere novit atque regulas Logicæ in universum omnes familiares experitur; is judicare valet, num liber scientificus accurata methodo sit conscriptus. Vid. §. 1120. 557. 522 seqq. 343 seqq. 760.

§. 1147.

Propositiones in scripto scientifico quinam intelligere possit.

Si quis definitiones autoris, tum etiam eas, quas alibi datas supponit, familiares experitur; is in scripto scientifico propositiones intelligere valet (§. 873-875. 880.).

Ita propositiones *Euclidis* intelligit, qui definitiones ejus sibi familiares reddidit, ut idea definito respondens in dato quolibet casu statim animo occurrat. Temerarium adeo est sibi de sensu propositionum in scripto scientifico sumere judicium, antequam definitiones perpen-

§. 1148.

§. 1148.

Si quis in significatum inquirere valet, quem ipsi usus loquendi tribuit; is intelligere potest autorem vocibus communibus absque definitione utentem. Etenim si autor velit intelligi, vocum communium significatum receptum non immutare debet, nisi idem discrete monuerit (§. 873.).

Quinam intelligat autorem vocibus indefinitis communibus utentem.

§. 1149.

Si quis in demonstrando, vel propositionibus determinatis a posteriori stabilendis fuerit probe exercitatus & principiorum in dato genere notitia instructus atque significatus prædicati pateat; is in casu dubio propositionem explicare valet. Conf. §. 694. 877. 19.

Quinam in casu dubio propositionem interpretari possit.

§. 1150.

Si quis scriptum dogmaticum continuo orationis filo contextum legere voluerit, ut dogmata inde hauriat; is Logica utente artificiali pollere debet. Conf. §. 915. 924. 926. 11.

Quinam aptus ad legendum scriptum dogmaticum continuo orationis filo contextum.

§. 1151.

Quoniam in libris Mathematicorum & methodo philosophica conscriptis nulla resolutione contextus logica opus est, propterea quod autor ipse singula a se invicem distinguit (§. 916.) nec propositiones afferunt nisi determinatæ, demonstrationes nisi consummatæ aut ordinatæ & completæ locum habere debent (§. 760.); hos libros legere aptus est, qui Logica nec docente, nec utente pollet, immo librorum istiusmodi lectione Logica utens naturalis comparatur.

Quinam libri absque Logica utente utiliter legantur.

§. 1152.

Qui demonstrationum analysin logicam (not. 522. & sqq.) dare novit; is scripta dogmatica scientifica legens demonstrationes facillime intelligit. Qui demonstrationum logicam analysin dat, is formam singulorum syllogismorum intuetur, & præmissas singulas expendit, consequenter distincte agnoscit, certas esse præmissas & ex iis conclusiones legitime inferri.

Quinam demonstrationes facillime intelligat.

§. 1153.

Si quis definitiones ac propositiones anteriores sibi familiaris

Quinam in lectione scripti.

Scientifici ad
sequentia pro-
gredi possit.

res reddidit; is ad sequentes in scripto scientifico progredi potest (§. 760.).

Hinc non mirum eos in lectione scriptorum scientificorum nihil proficere, qui nondum intellectis, nedum familiaribus sibi redditis anterioribus ad posteriora progrediuntur, immo anterioribus prorsus neglectis quæ medio vel postremo loco continentur, evolvunt, etsi in eo genere tyronum numero annuerandi. Conferenda hic sunt, quæ ea fini superius (§. 933. 934. 937.) inculcata fuere.

§. 1154.

Quinam ex
cursoria lectio-
ne librorum
scientificorum
proficere pos-
sint.

Si quis ex scripto aliquo scientifico definitiones ac propositiones sibi familiares reddidit; is alia in eodem genere fugitivo ocula percurrens & scientiam suam, & cognitionem historicam locupletare valet (§. 540. 539. 754 sq.).

Qui adeo præclaros ac celeres in aliquo scientiarum genere progressus amant, ex libro aliquo scientifico aut, ubi talis deficit, ex alio quocunque ea lege perlecto, quam nos in superioribus integro capite (§. 872. & seqq.) tulimus, ubi in arte inveniendi probe exercitatus fuerit (§. 932), definitiones ac propositiones sibi familiares reddant & alios deinde libros in eodem genere evolventes nonnisi ad ea attendant, quæ in systemate suo, quod cognitionis fundamentum posuere, minime exant, atque cum principiis sibi cognitis connectant. Hac profecto ratione ipso facto experientur, quod maximo temporis, atque laboris compendio & scientiam, & historiam literariam locupletare atque evidentiam in omni cognitione sua conservare possint. Præterea hunc etiam experientur usum, quod compilatores a bonis autoribus dignoscant.

§. 1155.

Quinam scri-
pturam sa-
cræ interpre-
tari possint.

Si quis notiones a rebus præsentibus abstrahere valet vel operam daret, ut ipso opere in se experiat, quæ de interiori hominis mutatione scriptura sacra in medium affert; ac in demonstrando fuerit versatus; is verum scripturæ sacre sensum investigare ac verum a falso discernere valet. Conf. §. 941. sq. 939. 945. 947.

Immo verum sensum non modo eruere, verum etiam ex principiis a nobis stabilitis demonstrare valet, eum esse verum: id quod non exigui momenti est in constituenda fidei analogia & condendo systemate

mate Theologiæ harmonico ad terminandum controversias, quibus nunc animi dissentientium exacerbantur. Apparet adeo, quam necessarium sit, ut interpretes scripturæ atque systematum conditores methodum scientificam in potestatem suam redigant, non modo logicam, quæ lapidem fert Lydium (§. 25. & seqq.) sibi familiarem reddentes, verum etiam scriptorum scientificorum attenta Lectione Logicam utentem sibi comparantes.

§. 1156.

Qui scripturæ sacræ verum sensum eruere valet, propositiones palmarias pure revelatas una cum principiis Theologiæ naturalis atque philosophiæ moralis sibi familiares reddidit & demonstrandi habitum pollet; is scripturam sacram explicare valet (§. 1155. 949. 951.).

Scripturam sacram quam explicare possit.

CAPUT III.

DE ÆSTIMANDIS VIRIBUS IN
CONVINCENTO, CONTROVER-
TENDO, DISPUTANDO ET
DOCENDO.

§. 1157.

Qui regulas formandi notiones, definitiones ac propositiones determinatas a posteriori dextre applicare & alterum ad observationes & experimenta illuc requisitas adducere potest; is alterum veritatis a posteriori convincere valet. Conf. §. 955. 639 seqq.

Quinam alterum veritatis a posteriori convincere valeat.

§. 1158.

Si quis ex hypothesis philosophica legitima demonstrandi formam deducere valet, ex quo vicissim hypothesis sive directe, sive indirecte colligitur, atque idem, quod ex hypothesis deduxerat, experientia consentaneum monstrare potest; is veritatis hypothesis alterum convincere valet (modo sit is, qui convinci possit, quod

Quinam alterum veritatis hypothesis philosophice convincere possit.

quod per se patet). Etenim si ex hypothesi A sequitur B & vicissim ex B sequitur A; B ex nulla alia hypothesi quam A sequi potest. Quodsi ergo B esse experiamur; A quoque esse debet. Quamobrem qui ostendere valet, posita hypothesi A poni B & vicissim posito B poni hypothesin A, atque B poni per experientiam probat; is veritatem hypotheseos A evincit, consequenter alterum ejusdem convincere valet.

E. gr. Si quis gravitatem aëris sumit tanquam hypothesin; exinde a priori deducere potest, hemisphaeria cuprea datae diametri evacuata adeo comprimi debere, ut nisi data vi non divellantur. Quamobrem cum Otto de Guericke facto experimento in comitiis imperii Ratisbonensibus, quod describitur in experimentis novis Magdeburgicis de vacuo spatio lib. 3. c. 23. f. 104., ostenderit, hemisphaeria nonnisi vi ista, quae calculo principiis hydrostaticis de pressione fluidorum nixo determinatur, separari posse; veritatis hypotheseos de pressione aëris alios convincit. Iltiusmodi *experimenta decisiva* sunt, per quae ea ponuntur, quibus positis hypothesin ponitur. Utrum vero quibusdam positis hypothesin ponatur, nec ne, nonnisi demonstratione dirimi potest.

§. 1159.

Si quis metodo demonstrandi ac observandi & experientandi pollet; is alterum probabilitatis hypatbeseos convincere valet. Conf. §. 522 seqq. 578. 952.

§. 1160.

Qui regulas fidei & experientiarum familiares experitur animumque habet principiis moralibus probe imbutum; is auctoritatem historici & observatoris adstruere valet. Vid. §. 583. seqq.

§. 1161.

Qui habitu demonstrandi pollet ac principiis imbutus & in propositionibus explicandis atque demonstrationibus resolvendis probe fuerit exercitatus; is veritatis propositionis alterum convincere valet (§. 522 seqq. 961. 967.).

§. 1162.

Quoniam tamen assensus non in instanti, sed successive gigni-

Quinam alterum probabilitatis hypotheseos convincere valeat.

Qui auctoritatem historici & observatoris adstruere valeat.

Quinam alterum a priori convincere possit.

Ignorantia principia

gignitur (§. 963.), donec principia, quæ magno sæpe numero quando convinci nequeat.
præsupponuntur (§. 962.); certa & familiaria evaserint (§. 541.); qui prima in quodam genere principia ignorat, eum veritatis alicujus propositionis ab iis procul præsertim distantis frustra convincere conaris, nisi a primis principiis incipere & ea sibi successive familiaria reddere indeque adsequentia progredi voluerit.

§. 1163.

Quoniam porro vi demonstrationis veritatis alicujus Ignorans formam demonstrationis cur convinci nequeat.
propositionis convinci nequit, qui in demonstrando nondum versatus, ut demonstrationem in dato casu agnoscere valeat, frustra quoque in convincendo altero a priori laborat, ubi is nullamquam demonstrationem concepit, omni adeo notione ejus destitutus.

§. 1164.

Cum demonstratio & probatio probabilis nonnisi principii, neutiquam vero forma differant (§. 559.); que de demonstratione (§. 1161. & seqq.) stabilivimus, ea quoque tenenda sunt, ubi vi probationis probabilis probabilitatis alterum convincere volueris. Que de probabilitate hic tenenda.

§. 1165.

Qui habitu demonstrandi minime pollet, nec notiones universales & judicia determinata a posteriori eruere valet; is præcipientiam in judicando evitare nequit. Is enim convictionis nullam habet ideam aut, si qua vel maxime incompleta ejus animo inhaeret, eam in dato casu applicare non novit, consequenter sibi persuadere potest, se esse convictum, cum tamen convictus minime sit (§. 979.). Præcipientiam in judicando evitare nequeat.

§. 1166.

Quoniam nec præjudicia evitare valet, qui præcipientiam in judicando evitare nequit (§. 981.); qui nec habitu demonstrandi pollet, nec notiones universales & judicia determinata a posteriori eruere valet, præjudicia evitare nequit. Quinam præjudicia evitare nequeat.

§. 1167.

Qui habitu demonstrandi non pollet, vel principiis in dato genere minime imbutus est, vel utroque defectu laborat; is propositio. Quinam alterum a priori refutare nequeat.

sitionem erroneam a priori neque directe, neque indirecte refutare potest (§. 522 seqq. 1006. 1009. 530.).

§. 1168.

Quinam alterius sententiam consequentis onerare valet.

Quoniam methodi demonstrandi & principiorum in dato genere ignarus affirmare potest, ex alterius sententia propositiones falsas sequi, utur eas inde fluere demonstrare nequeat; ideo *idicta quilibet sententiam alterius consequentis onerare valet.*

§. 1169.

Impotentia ad propositionem refutandam & impugnandam. Quinam ab impugnatione indirecta perversa abhorreat.

Qui propositionem datam explicare nequit, is eam nec refutare, nec impugnare valet, etiamsi falsa fuerit (§. 997.).

§. 1170.

Si quis intelligens (§. 522 seqq. 533. 1011.), sapiens ac virtute præditus fuerit, vel ob male facta pudore suffunditur (§. 1012.); is nec consequentias precario sumere, nec ad eas colorandas verba alterius pervertere, nec consequentias consequentiarum cumulare potest.

Loquimur hic de impossibilitate morali, non physica, quemadmodum in sacris impossibile dicitur, ut Deus mentiat, & vulgo impossibile affirmatur, ut vir honestus idem sit malitiosus.

§. 1171.

Quinam consequentiarum agere possit.

Si quis fuerit idiota & malitiosus, is consequentiarum agere potest. Quod si idem nullo pudore suffundatur, iniqua interpretatione consequentiarum precariam colorare valet. Conf. §. 522 seqq. 1011. de idiota; §. 1012. de malitioso; & §. 1017 seq. de eo, qui pudorem exuit.

§. 1172.

Quinam argumentum ab invidia ducere valet.

Quoniam consequentarius argumento ab invidia ducto utitur (§. 1019.), qui consequentiarum agere potest, ille etiam argumento ab invidia ducto uti valet. *Idiota igitur & malitiosus, quique nullo pudore suffunditur, argumento ab invidia ducto uti valet (§. 1171.).*

Qui principia omnia prorsus ignorat; is rationibus intrinsecis nihil probare valet, sed in omnibus ad extrinsecas confugit, quales argumentum ab

ab invidia ductum offert (§. 1020). Qui mentem alterius ne quidem intelligit, ei multe difficultates enascuntur, ubi nullas perspicit peritus, easque tanquam consequentias cum urgeat *vi demonstrationis antecedentis*, plurimas consequentias precarias facillimo negotio reperit, quæ sint ceterarum fundamentum. Cum vero ignorantiam suam non perspiciat & vano fastu turgidus alios talpas iudicet; pravi in alterum licet affectus sibi conscius, qui stimuli loco est, proferre non veretur, quæ magis ipsi, quam adversario nocent penes intelligentes ac æquos rerum arbitros.

§. 1173.

Similiter cum consequentiarum utatur verbis maxime contumeliosis & in alterum injuriis (§. 1027.), consequentiarum vero agere valeat idiota malitiosus & perfrictæ frontis (§. 1171.); *idiotam malitiosum & perfrictæ frontis non veretur uti verbis in alterum injuriis, quem impugnatur.*

§. 1174.

Qui demonstrationis indirectæ ideam animo concepit, is refutationem indirectam ab impugnationibus male sanis consequentiarum & praxi argumenti ab invidia ducti facile distinguit. (§. 344. 993. 996. 1017. 1020.).

§. 1175.

Quoniam alterum a posteriori refutaturus nosse debet regulas de formandis judiciis intuitivis & notionibus a posteriori, in primis de observandis attributis & essentialibus, nec non iis, quæ per modum attributorum insunt, de definitionibus a posteriori detegendis & limandis, de causis investigandis & judiciis universalibus ex observationibus atque experimentis eruendis (§. 1024.); *alterum a posteriori refutaturus non modo observationes atque experimenta in promptu, vel in potestate habere, verum etiam in propositionibus determinatis inde eruendis probe exercitatus esse debet.*

§. 1176.

Qui in propositionibus demonstrativa ratione interpretandis fuerit versatus, ac præterea principiis & habitu demonstrandi, nec non veritatem propositionis a posteriori stabiliendi instructus; is propositionem impugnatam defendere valet. Vid. §. 522 seqq. 1032. 1038. 1042.

(Logica contracta.)

Ddd

§. 1177.

Quinam in impugnando verbis in alterum injuriis uti queat.

Qui praxin consequentiarum a refutatione indirecta distingueret possit.

Quinam alterum a posteriori refutare possit.

Quinam propositionem defendere possit.

§. 1177.

Quinam scrip-
ta polemica
& apologetica
condere pos-
sit.

Quoniam scriptum polemicum & apologeticum condi-
turus observare debet, quæ de refutando & defendendo præ-
cipiuntur (§. 1050.); qui errores refutare & veritatem im-
pugnatum defendere valet, & in conscribendis libris dogmati-
cis fuerit exercitatus, is scripta polemica & apologetica condere
valet.

§. 1178.

Quinam ad
opponendum
aptus sit.

Si quis demonstrationum analysin logicam (not 522. & sqq.)
dure valet; is ad opponendum peraptus est (§. 1067.).

§. 1179.

Quinam in di-
sputando re-
spondentis vi-
cem tueri pos-
sit.

Si quis formam syllogismorum & principia in dato genere,
ad quod disputatio refertur, tenet, atque in determinatione sub-
jecti vel ejus, quod ad notionem subjecti aut prædicati refertur,
qua stante prædicatum subjecto competit, inquirere novit; is re-
spondentis officio in disputando fungi potest (§. 1079. 1072-1082.
sqq.).

§. 1180.

Quinam do-
centis mune-
re fungi
queat.

Qui notionibus rerum animum refertum habet easque ver-
bis dextre cum aliis communicare valet, definitiones ac proposi-
tiones explicare, illustrare & ordinatis atque completis demonstra-
tionibus munire easdemque a posteriori confirmare novit, nec non
metbodi alios convincendi ac refutandi gnarus, immo logica arti-
ficiali cum utentem, tum docente pollet; is docentis munere fungi potest
(§. 1089sqq.).



SECTIO VI.

DE

USU LOGICÆ IN PRAXI
VITÆ ET METHODO EAM
STUDENDI.

CAPUT I.

DE USU LOGICÆ IN PRAXI
VITÆ.

§. 1181.

U Sum Logica in praxi vitæ monstraturi ostendemus, quid Scopus Au-
Logica artificialis conferat in dirigendis operationibus toris.
mentis circa negotia in vita obvia.

§. 1182.

*Omnis cognitionis acquisitæ usus in negotiis vitæ ad ap- Unde pendat
plicationem definitionum & propositionum redit. Conf. §. 344. 113.* omnis cogni-
112. 43 lqq. 239 343. 50.

E. gr. Jctus ex definitione *Societatis* in dato casu ratiocinando col-
ligit *contractum datum esse societatem*, atque inde beneficio legum por-
ro infert, quid in eodem casu sit justum, quid injustum, & quid fieri de-
beat. Idem etiam facere tenetur Medicus morbum agnitus & reme-
dia convenientia præscripturus. Omnis nostra cognitio definitionibus
& propositionibus continetur. Propositionibus docemur, quam re-
bus obviis tribuenda sint prædicata, ut, quæ iis convenient, intelliga-
mus, etiamsi eadem intuitive minime cognoscamus. Definitionum
autem beneficio res obvias agnoscimus & a se invicem discernimus, ne
per errorem iisdem tribuamus prædicata, quæ minime convenient.
Hinc eas demum ad vitam utiles ostendimus (§. 115. *Diffr. pralim.*) pro-
positiones, in quibus conditio accurate determinatur, sub qua prædi-

Ddd 2

catum

earum subiecto tribuitur, consequenter quæ determinatæ sunt (§. 315.), & terminos in philosophia non tolerari iussimus (§. 109. *Disc. prælim.*) nisi accurata definitione explicatos, & in lectione librorum præcepimus ne propositiones memoriæ mendentur, antequam constet eas esse determinatas (§. 924.) & in scripto dogmatico historico in usum vitæ condendo injunximus, ne eidem inferantur nisi definitiones, quarum realitas jam publice adstructa, & propositiones publice jam demonstratæ (§. 817.), quæ ad praxin tendunt (§. 835.).

§. 1183.

**Judicatio
definitionum,
antequam ex
applicentur.**

Quoniam applicatio definitionis manca errorem parit, nec nisi fortuito rem agnosci facit (§. 603.), quæ vero superfluis abundat, applicationem justo prolixiorē reddit (§. 806.), immo efficere potest, ut res obvia minime agnoscatur, ubi accurate ratiocinari fueris aduersus (§. 344.); *antequam definitiones in dato casu applicare possis, eas nec mancās esse, nec superflua continere certus esse debes.*

Sane JCtus si utatur definitione manca societatis, pro societate habebit contractum, qui sub hac specie minime comprehenditur & ubi contigerit, eum in iudicando a vero non aberrare; quod veritatem assecutus fuerit non definitioni, sed casui tribuere debet, cum eadem facilitate in errorem incidere potuisset, si alius contractus societati ex parte similis oblatus fuisset. Quod si quis novit, definitionem esse mancā, nec aliam in promptu habet; is sane probabilem tantummodo esse applicationem ejus agnoscit, neque adeo pro certo habet, sed tanquam probabile sumit, rem obviā ad hoc vel istud genus, aut hanc vel istam speciem pertinere (§. 552.): quo in casu omnia quoque judicia ulteriora ex applicatione propositionum resultantia nonnisi probabilia erunt (§. 556. 557.). Plurimum autem refert in negotiis vitæ humanæ ut constet, utrum judicia nostra sint certa, an probabilia tantum, cum inde pendeat æstimatio spei circa eventum in consiliis prudenter capiendis non negligenda.

§. 1184.

**Judicatio
propositio-
num ante-
quam appli-
centur.**

Quoniam propositiones contrariæ simul falsæ sunt, si de subiecto absolute prædicatur, quod eidem nonnisi sub adjicienda conditione convenit (§. 502.) atque adeo earum applicatione ad casus obvios iudicium discursivum erroneum paritur (§. 509.); immo

immo quamdiu non constat, num in propositione hypothetica conditio adjecta, in categorica definitio possibilis sit, propositio nonnisi hypothetice vera est (§. 505.), consequenter nec certum parit in applicatione ad casum obviu judicium discursivum (§. 541.); *propositiones dijudicandæ sunt, num sint determinatæ & in iis notio subiecti possibilis, antequam ad casum obviu applicari possint.*

Ita e. gr. Medicus remedium morbo in dato casu conveniens non determinabit, nisi determinate noverit, quando nam idem conducat.

§. 1185.

Quoniam definitiones ac propositiones dijudicandæ sunt, num regulis logicis respondeant, antequam ad usum vitæ transferri possint (§. 1183. 1184.); patet *ad praxin vitæ potissimum facere, quæ de definitionibus ac propositionibus determinatis earum que demonstrationibus præcipiuntur.*

Quoniam præcepta Logicæ ad praxin vitæ serviant.

§. 1186.

Si libri dogmatici historici prostant, in quibus non traduntur definitiones nisi accuratæ, nec propositiones nisi determinatæ; usu Logicæ in dijudicandis definitionibus, num maneat sint, an superflua contineant, atque propositionibus, num sint determinatæ & in iis notio subiecti possibilis, carere potest eas ad casus obvios applicaturus. Etenim eo in casu autor libri dogmatici cum definitiones, tum propositiones dijudicavit, atque adeo non opus est, ut lector easdem denuo dijudicer (§. 343. 344.).

Dijudicatione definitionum & propositionum quando non sit opus.

§. 1187.

Si in libris dogmaticis historicis definitiones occurrant minus accuratæ & propositiones vagæ; eas absque periculo errandi ad praxin transferre nequit, nisi qui ipsemet easdem dijudicare valet (§. 1183 sq.).

Quandonam quis easdem opus habeat.

§. 1188.

Definitionem in dato casu applicaturus 1. eam in tot propositiones resolvat, quor notæ eandem ingrediuntur (§. 917.); 2. ad rem præsentem attendens tot judicia formet intuitiva, quor prædicata distinguere valer (§. 639.); 3. hæc prædicata cum notis istis seu prædicatis propositionum, in quas definitio resoluta fuit, conferat; Quodsi inter ista hæc singula minime occurrant,

Definitionis in dato casu applicatio.

ex illis (§. 522. & seqq.) colligat alia. Etenim si vel intuitive, vel ratiocinando, vel partim intuitive, partim ratiocinando innotescit, notas, quæ definitionem ingrediuntur, in re obvia contineri; definitum quoque iisdem competere recte concluditur (§. 344.).

Nimirum omnis definitionis applicatio continetur hoc syllogismo generali: *Cui conveniunt notæ in definitione ipsius B enumeratæ simul, eidem quoque convenit definitum. Sed enti A conveniunt omnes notæ in definitione ipsius B enumeratæ. Ergo ipsi etiam convenit nomen B* (quod est in hoc casu definitum), seu, quod perinde est, *ergo A est B*. Major continetur sub dicto de omni & nullo ad definitiones extenso (§. 344.). Minor probatur, vel per judicia intuitiva sola, vel per intuitiva & discursiva ex iisdem derivata. E. gr. *Temperantia habitus est determinandi appetitum circa cibum & potum legi naturali convenienter*. Etenim applicatio hoc continetur syllogismo: *Quicumque gaudet habitu determinandi appetitum circa cibum & potum legi naturali convenienter, ille est temperans. Sed Titius gaudet habitu determinandi appetitum legi naturæ convenienter. Ergo Titius est temperans*. Minor probari debet ex iis, quæ de Titio in capiendo cibo ac potu observas, adscitis in subsidium principiis moralibus sive juris naturalis de determinatione appetitus circa cibum atque potum juri naturali congrua, sed observatis iis, quæ de notis definitionem ingredientibus præcipiuntur, scilicet ne admittantur, quæ per se mutuo determinantur (§. 806.).

§. 1189.

Ambages in
definitionum
applicatione
vitandæ.

Ne in judiciis intuitivis formandis nimius sis, *finita qualibet nota, quæ definitionem ingreditur, dispiendum est, num ea in re obvia contineatur, ubi suspicio adfuerit, eam locum habituram, vel quæritur, num ea applicari possit*.

E. gr. Si quæritur, num *Mevius* sit temperans, cum jus naturæ urgeat quantitatem ac qualitatem cibi per sanitatem tanquam rationem finalem determinandam esse; inquirendum erit, num ea cibi quantitate ac qualitate utatur, quæ sanitati conducit, & num sanitatem in capiendo cibo atque potu constanter tanquam finem intendat. Quodsi cognoscas intuitive & data occasione, *Mevium* a nimia cibi quantitate abstinere; cum id inter requisita ad temperantiam locum habeat, probabili-

babiliter colligitur, *Mevium* forsan esse temperantem. Ne igitur per ambages incedas certo cogniturus, utrum temperans sit nec ne, inquirendum erit num cetera ad temperantiam requisita, hoc est, notæ definitionem ingredientibus omnes in eodem deprehendantur (§. 551.). Hac ratione evitantur ambages in applicandis definitionibus, dum a iudiciis intuitivis formandis abstinemus, quorum in determinandis notis nullus est usus.

§. 1190.

Cum notæ definitionem ingredientibus in dato casu singulari non semper intuitive cognoscantur, sed sæpissime ex iudiciis intuitivis colligi debeant eadem syllogismorum concarenatione, qua in demonstrando utimur; in applicandis definitionibus & demonstrandi habitu, & principiis certis sæpissime opus est.

Quinam definitiones datas in omni casu applicare queat.

§. 1191.

Omnes propositiones, quæ converti possunt, definitionum loco serviunt in dato casu (§. 279.). Ex eo igitur, quod quid B sit, inferre datur, quod etiam sit A, consequenter prædicatum propositionis convertibilis notæ vicem subit, unde in dato casu subiectum agnoscitur atque ab aliis rebus distinguitur.

Quoniam definitionum loco servant propositiones.

E. gr. In elementis Geometriæ propositio de æqualitate angulorum alternorum intra parallelas converti potest: utuntur adeo Geometristarum angulorum æqualitate loco definitionis in lineis parallelis agnoscendis.

§. 1192.

Quoniam propositio, in qua de subiecto prædicantur vel attributum proprium (§. 280.), vel omnia essentialia simul sumpta (§. 281.), vel modi cuiusdam aut relationis possibilitas, quæ per modum attributi proprii inest (§. 282.), vel quod sub data conditione nonnisi de eodem prædicari potest (§. 283.), in propositionibus convertendis multum studij ponendum, ne conversæ præmittatur, quam in casibus obviis definitionis locum tueri posse prævidemus, vel saltem suspicamur.

Stadium in convertendis propositionibus ponendum.

Cura propositionum convertendarum iis imprimis incumbit, qui scripta dogmatica in usum vitæ condunt, vel ex libris dogmaticis historicis, in quibus definitiones minus accurate & propositiones vagæ ponuntur, proficere

ficere

ficere student. Inprimis ea commendari meretur, quamdiu bonæ definitiones raræ sunt, ut propositionum conversarum ope defectui huic medeamur, cum datis istiusmodi propositionibus conversis & definitiones condi possint, si ita visum fuerit, & definitionibus in praxi carere possimus.

§. 1193.

Propositio-
num categori-
carum in dato
casu applica-
tio.

Propositionem categoricam applicaturus 1. vel ope notionis claræ, utut confusæ (§. 79. 87.), vel v. : definitionis (§. 1188.), vel denique vi propositionis, quæ definitionis locum tuetur (§. 1191.), rem obviam ad suum genus, vel speciem suam reducat: 2. eidem tribuat prædicatum, quod generi vel speciei isti convenire alias cognovit (§. 343.).

Nititur scilicet applicatio propositionis categoricæ hoc syllogismo generali: *Quicquid continetur sub genere vel specie A, ei competit prædicatum B. Atqui res obvia continetur sub genere vel specie A. Ergo ei competit prædicatum B.* Minor innotescit in casu dato vel notionis confusæ, vel definitionis, aut propositionis æquivalentis applicatione: major est principium nobis familiare. Communiter homines res obvias notionum confusarum ope distinguunt & principia, quibus majoris loco utuntur, sunt propositiones, quæ iteratis judiciis intuitivis animo sese ingenerant. E. gr. *Ignem* agnoscimus ope notionis confusæ. Quod *ignis calefaciat* experientia edocti sumus: unde de igne in præsentem casu inferimus, quod calefacere debeat. Revera igitur ita ratiocinamur, dum ope cognitionis antea acquisitæ & intuitive præsentis iudicium discursivum formamus, quod *hic ignis*, quem e longinquo spectamus, *calefaciat: Ignis calefacit. Hoc ens est ignis. Ergo hoc ens calefacit.*

§. 1194.

Propositionis
hypotheticæ
applicatio.

Propositionem hypotheticam sive expressam, sive ad formam categoricæ reduciam applicaturus 1. rem obviam ut ante ad suum genus vel speciem suam reducat: 2. formentur iudicia intuitiva (§. 639.), ut appareat, num in prædicatorum numero occurrat determinatio subiecti, quæ in propositione hypothetica conditionem præbet, vi cuius prædicatum subiecto tribuendum; vel ex iudiciis intuitivis colligantur (§. 522. & seqq.) alia discursiva in eundem finem, ubi intuitiva nondum exhibent determi-

determinationem subjecti: 3. quæ generi, vel speciei sub data determinatione conveniunt, prædicata rei obviæ tribuantur (§. 343.). Ita propositio hypothetica ad præsentem casum crit applicata.

Nitur scilicet applicatio propositionis hypotheticæ sive expressæ, sive ad formam categoricæ reductæ hoc syllogismo: *Quicquid continetur sub genere, vel specie A & admittit determinationem C, ei competit prædicatum B Sed res obvia continetur sub genere, vel specie A & admittit determinationem C. Ergo rei obviæ competit prædicatum B.* E. gr. *Ignem agnoscimus ope notionis confusæ: flammam ejus ferire trabem in casu dato ope judicii intuitivi nobis innotescit. Recordati igitur lignum ab igne accendi, si ejus flamma ipsum ferit, applicantes hanc propositionem in casu dato judicamus, trabem accensum iri. Revera igitur ita ratiocinamur: Si flamma ignis trabem ferit, eam accendere potest. Atqui flamma ignis hic trabem ferit. Ergo eam accendere potest.*

§. 1195.

Quoniam res nobis obvias ratiocinando ad sua genera suasque species reducere & propositiones generales cum categoricas, tum hypotheticas dextre applicare, nec non ratiocinando colligere licet, num rei cuidam obviæ conditio ista adsit, sub qua prædicatum in hypothetica subjecto tribuitur, si genera & species terminis accurate definitis distinguuntur & conditio in propositionibus hypotheticis terminis fixis exprimitur (§. 470. & seqq.); *terminis fixis studere & a vagis abstinere debet, cognitionem rerum, quam sibi acquirit, ad casus in vita obvios applicaturus.*

Terminorum fixorum necessitas ad applicandas definitiones & propositiones.

§. 1196.

Si quis propria experientia proficere studet in iis, quæ in negotiis vitæ humanæ usui esse possunt; is 1. eorum, quæ sunt, notionem sibi distinctas formare tenetur (§. 652.), ut norit, quid casu eodem recurrente sit agendum: 2. judicia formare debet determinata, ut eadem in casu simili applicare ipsosque casus similes dijudicare valeat (§. 1193. 1194.).

Propria experientia quomodo comparatur notitia rerum ad praxin vitæ utilium.

CAPUT II.

DE METHODO LOGICAM
DISCENDI.

§. 1197.

Initium studii
Logici.

Ad studium Logicæ animum appulsurus, præcipuorum terminorum ac propositionum historicam notitiam sibi comparare debet. Etenim terminos præcipuos qui sibi familiares reddantur, is propositiones logicas, tum etiam earum probationes ex iis contextas (§. 322. & seqq.), intelligere valer (§. 1147.) atque adeo nullum ex obscuritate tædium percipit, nec perversum sibi sensum fingens errorem veritatis loco amplectitur. Conf. §. 872. 1119.

§. 1198.

Directorium
in usum lectionis
præparatorum
Logicæ.

Historicam definitionum ac palmariarum propositionum notitiam sibi comparaturus,

I. Familiæres sibi reddat definitiones

1. simplicis apprehensionis & notionis (§. 32. 33.) atque termini cum in genere (§. 35.), tum inanis (§. 37.), iudicii & enunciationis (§. 38. 40.), individui, generis ac speciei (§. 42. & seqq.), ratiocinationis (§. 49.), notionis universalis (§. 53.), essentialium, attributorum & modorum (§. 63. & seqq.), notæ (§. 78.) ac specierum notionum (§. 87. 91. 92. 94. 104. 109. 112. 121.), nec non terminorum (§. 80. 107. 110. 127. 131. 208.) significatus proprii atque usus loquendi (§. 137. 138.), definitionis cum in genere (§. 149.), tum in specie nominalis & realis (§. 188.), essentialis & accidentalis (§. 189.) atque geneticæ (§. 192.) de prima mentis operatione.
2. Subiecti, prædicati & copulæ (§. 197. 198.) diversarum specierum propositionum (§. 201. 206. 210. 213. 215. 238. 239. 240. 241. 259. 263. 264. 266. 272. 273. 274. 275. 311. & seqq. 315.); determinationis subiecti (§. 225.); conversionis (§. 279.)

(§. 279.) & oppositionis (§. 285.) de secunda mentis operatione.

2. Syllogismi & partium ejus (§. 327. 330. 331. 335.), nec non specierum (§. 336. 337. 347. 356. 360. 377. & seqq. 387. 393. 430. 438. 442. 449. 464.), figurarum & modorum (§. 339. 340.), probationis ac demonstrationis (§. 463. 467. & seqq.) ejusque principiorum (§. 532.) & specierum (§. 520. 521. 769. 824. 825.) de tertia mentis operatione.
4. Veritatis & falsitatis (§. 476.) & criterii utriusque (§. 494. 496.) conceptibilis & inconceptibilis (§. 493.), ideæ veræ & falsæ (§. 518.), certi, incerti (§. 535.) & probabilis (§. 544. 549. 558.), scientiæ (§. 565.), opinionis (§. 572. fidei (§. 581.) & erroris (§. 593.), experientiæ (§. 634.) & vitii subreptionis in experiundo (§. 638.), libri dogmatici & ejus specierum (§. 720. 721.), methodi scientiæ (§. 762.) synthetice, analyticæ ac mixtæ (§. 855.), ordinis scholæ, naturalis & mixti (§. 799. 800.), connexionis veritatum (§. 847.), solidæ ac superficiariæ pertractationis (§. 868.), convictionis (§. 952.), præcipitantæ in judicando (§. 973.), rationum intrinsecarum & extrinsecarum (§. 974.), præjudicii (§. 981.) refutationis & impugnationis (§. 987. 988.), utriusque specierum (§. 993. & seqq.), consequentiarum (§. 1019.), defensionis (§. 1028.) ac tentaminis ejus (§. 1030.) disputationis (§. 1053. 1054.) ex praxi Logicæ.

II. Familiares sibi reddat propositiones

1. De operationibus mentis (§. 29. 30. 31. 39. 47. 48. 51. 54.), de ente in genere (§. 59. 60. 61. 68. 69. 71.) de notionibus (§. 77. 81. 84. 88. 90. 96. & seqq. 103. 105. 111.), de terminis (§. 36. 115. 116. & seqq. 119. 130. 133. 139. 142.) & definitionibus (§. 150. 151. 154. 155. 157. 160. 164. 172. 176. 190. 191.) quoad primam mentis operationem.

2. De partibus judicii (§. 195.), copula (§. 200), negatione (§. 204. 205. 209.), de modo prædicandi (§. 212. 214. 217. 218. 219. 222. 223. 224. 229. & seqq.), de determinationibus subjecti (§. 226.), de universalitate propositionum (§. 254. 255.), de differentia propositionum (§. 256.) de oppositione earundem (§. 286. & seqq. §. 291. 292.), *quoad secundam mentis operationem.*
3. De regulis syllogismorum in genere (§. 328. 329. 341. & seqq. §. 349. 351. 352. 529.) & syllogismorum primæ figuræ in specie (§. 361. & seqq.), de modis primæ figuræ (§. 367. & seqq.) & ipsa prima figura (§. 372. 373. 374.), de syllogismo hypothetico (§. 381. 383.), de disjunctivo (§. 391. 393.), de enthymemate (§. 395. 397.), de syllogismis crypticis (§. 403. 412. 413.), de consequentiis immediatis (§. 416. 420. 422. 425. 426. 427. 431. 434.), de forite (§. 437. 441.), de inductione (§. 448. 450.), de usu vocum circa ratiocinia (§. 470. & seqq.) *quoad tertiam mentis operationem.*
4. De judiciis veris & falsis (§. 477. 478. 480. 485. 490. 491. 492. 500. 503. 504. 505. 515. 519. 528. 529.) de veris & falsis syllogismorum conclusionibus (§. 518. & seqq.), de principiis demonstrandi (§. 533.), de certitudine cognitionis (§. 538. & seqq.), de probabilitate ejusdem (§. 549. & seqq.), de scientia (§. 566. & seqq.), de opinione (§. 573. & seqq.), de requisitis hominis fide digni (§. 583. & seqq.) de errore (§. 594. & seqq. §. 604. 607.), de experientia (§. 636. 637.), de possibilitate notionum (§. 687. & seqq.), de convictione (§. 953. 954. 955. 957. 960. & seqq.), de assensu rationibus extrinsecis extorto (§. 977.), de refutatione & impugnatione (§. 989. 992. 997. 1003. 1005. 1009. 1010. 1011. 1012. 1014. 1023. 1026.) & de defensione (§. 1031. & seqq.) *ex praxi Logicæ.*

III. Definitionibus ac propositionibus, prætermisſis demonſtrationibus, jungat, quæ illuſtrationis gratia adi-
ciuntur.

IV. Ab anterioribus ad poſteriora lento gradu progrediatur,
& anteriora tamdiu repetat, donec memoriæ ita fuerint in-
fixa, ut verbis prolatis notionēs iisdem reſpondentes ſtatim
recurrant & ſubjecto propoſitionis obvio prædicatum una
occurrat atque contra.

§. 1199.

*Ad lectionem præparatus (§. 1198.) integrum ſyſtema hoc logicum perlegat, obſervatis regulis, quas de ſcripſiſ dogmaticis ſcientificis legendis inculcavimus, nempe ut 1. propoſitiones omnes, immo definitiones ſequentes, explicet per definitiones noſtras (§. 880.), 2. definitiones nominales in tot reſolvat propoſitiones, quot notæ eandem ingrediuntur (§. 917.) & eas ad exemplum illuſtrationis gratia appoſitum applicet (§. 918.), 3. in propoſitionibus perinde ac docens hypotheſin a theſi diſtinguat (§. 1098.) eamque ad exemplum illuſtrationis gratia prolatum applicet, 4. demonſtrationes quoque ac probationes ita reſolvat perinde ac docens, ut non modo ſingularæ præmiſſæ ſyllogiſmorum, ex quibus eadē conſtant, animum diſcentis ſubeant; ſed earum etiam forma appareat (§. 1100.), immo integras ad exempla ſingularia applicet, veluti in caſu ſingulari demonſtraturus, prædicatum in dato caſu ſubjecto compe-
tere.*

Logicæ cog-
nitiō ſcientifica
quomodo
comparetur.

Etenim hac ratione ſingula rite intelliget (§. 873.) & ve-
ritatis propoſitionum certus evadet (§. 540.) easque ad exempla
obvia applicare diſcet, conſequenter Logicæ docentis artificialis
compoſ fieri (§. 9.).

§. 1200.

Logica artificialis utens quomodo comparatur.

Habitu utendi regulis Logicis sibi comparaturus, seu Logicam artificialem utentem acquiriturus, 1. scripta scientifica accurata methodo condita continuo legat, 2. quomodo in iisdem regulis Logicæ fuerit satisfactum inquirat. Patet enim hac ratione continuo applicari regulas logicas atque adeo exercitia logica institui.

§. 1201.

Logica naturalis quomodo clarior & usus ejus expeditior reddatur.

Si quis in continua scriptorum scientificorum tractatione versatur, sed exercitiis logicis prorsus neglectis; is logicam naturalem docentem sibi claviorem, logicam vero naturalem utentem expeditam magis & ampliorem reddit. Etenim lectione v. gr. elementorum *Euclidis* aut nostrorum vel *Matheseos* universæ, vel *Geometriæ*, aut nostrorum etiam scriptorum philosophicorum, notionem confusam acquirit formæ demonstrandi ac probandi, nec non connexionis definitionum atque propositionum (§. 760. 658.), quæ cum plura contineat, quam notio confusa regularum, juxta quas dirigitur facultas cognoscitiva in cognitione rerum, communi usu vel lectione scriptorum minime scientificorum acquisita; logica naturalis docens clarior fit (§. 7.).

Quoniam vero exercitio habitus comparatur, continua scriptorum scientificorum tractatione habitus quoque comparatur juxta ideam illam confusam in aliis casibus agendi, consequenter logica naturalis utens fit magis expedita & ampliatur.

§. 1202.

Connubium rationis & experientia.

Quoniam in optica præsertim & Astronomia observationes

nes cum demonstrationibus combinantur, & idem multo luculentius fieri potest in physica experimentalis, siquidem rite tractetur; *habitu utendi operationibus mentis in cognitione rerum a posteriori & cum ea combinandi cognitionem a priori, Opticæ, Astronomiæ atque physicæ experimentalis studio comparare licet, exercitiis præsertim logicis institutis, dum scilicet regulæ de formandis judiciis intuitivis & notionibus a posteriori (§. 639.) una cum ceteris regulis logicis quibuscunque, prout usus tulerit, applicantur.*

§. 1203.

Si quis logica docente ac utente artificiali pollet, is in legendis scriptis vulgari modo conditis aut compilatis utramque ulterius perficere valet. Etenim qui logica artificiali docente pollet, is distincte cognoscit regulas earumque rationes perspicit (§. 9.); qui vero logica artificiali utente pollet, is habitu instructus est regulas istas ad praxin transferendi (§. 11.). Quamobrem legens scripta vulgari modo condita, aut compilata, dijudicare valet, ubi in regulas logicas impeerint autores & in rationes inquirens, cur impeerint, perspicit, quomodo lapsus istiusmodi sint evitandi. Quodsi ergo in propositionibus determinatis formandis iisque demonstrandis fuerit versatus, id quod est Logicæ artificialis utentis (§. 522. & seqq. §. 675. 676. 704. 705.); logicam docentem subinde novis regulis ditare, cumque exercitiis continuatis amplietur habitus omnis, logicam quoque utentem perficere ulterius valet. Præterea qui in propositionibus determinatis formandis ac demonstrandis probe fuit versatus, seu, quod perinde est, in arte inveniendi exercitatus, is librum vulgari more conscriptum, vel compilatum eo modo legere valet, quo scientificus tractatur (§. 932.), ut scilicet definitiones ac propositiones determinatæ ad vitam utiles inde hauriantur (§. 927.) Quamobrem dum definitiones minus exactas emendat, notionibus confusis distinctas substituit & propositiones vagas ad determinatas reducit; Logicam in inveniendo exercet, quod est omnium

Quomodo logica artificialis docentem acutens ulterius perficiatur.

omnium exercitiorum logicorum supremum, consequenter eo ipso logicam utentem ulterius perficit (§. 11.) & docentem sibi clariorem reddit (§. 900.).

§. 1204.

Logica artificialis docens ac utens quo studio comparatur.

Logica cum docens, tum utens artificialis nonnisi multo studio atque labore, nec nisi successive comparatur. Conf. §. 1197. seqq. 963.

FINIS PARTIS SECUNDÆ.



PHILOSOPHIA
PRIMA,
SIVE
ONTOLOGIA,
METHODO SCIENTIFICA
PERTRACTATA,
QUA
OMNIS COGNITIONIS
HUMANÆ PRINCIPIA
CONTINENTUR.



PHILOSOPHIÆ PRIMÆ

S I V E

ONTOLOGIÆ PRO- LEGOMENA.

§. 1.

Ontologia seu Philosophia prima est scientia entis in genere, Philosophia
seu quatenus ens est. prima defini-
tio.

Dicitur *Ontologia*, quia de ente in genere agit. *Philosophia*
prima eadem appellari suevit, quia prima principia notionesque pri-
mas tradit, quæ in ratiocinando usum habent.

§. 2.

Quoniam scientia est habitus asserta demonstrandi (§. 24. An Ontologi-
Disc. prælim.); quæ in *Ontologia* proponuntur, demonstranda ca sint demon-
stranda.

§. 3.

Quodsi negas, *Ontologiam per scientiam recte definiri*, & Objectio &
hinc inferes, *perperam inde colligi, quod in ea proponenda demon-* responsio.
strari debeant: ego contraria ratione ostendam in *Ontologia*
demonstrativa utendum esse methodo & hinc colligam, quod sit
scientia.

§. 4.

In philosophia prima utendum est methodo demonstrativa. Rationes spe-
Si in *Logica*, *Philosophia practica* & *Physica*, *Theologia natu-* ciales cur On-
rali, *Cosmologia generali* & *Psychologia* omnia rigoroſe de- tologiæ me-
monstranda sunt; sæpius utendum est principiis ontologicis (§. thodus de-
82. 85. 87. 89. & seqq. *Disc. prælim.*), consequenter in *Ontologia* monstrativa
admittendum non est, nisi quod sufficienter explicatum atque conveniat.
experientia indubitata & demonstratione nititur (§. 533. & §.
760. & seqq. *Log.*).

(*Ontologia contracta.*)

Fff 2

§. 5.

§. 5.

Quod Ontologia scientia sit.

Philosophia prima est scientia (§. 4. Ont. & §. 564. Log.).

§. 6.

Cur philosophia absque Ontologia methodo demonstrativa tradi nequeat.

Quoniam philosophia prima methodo demonstrativa pertractanda, ut disciplinæ philosophicæ ceteræ omnes eadem methodo tracti queant, quemadmodum ex demonstratione anteriore liquet (§. 4.); ideo nunc patet, quod in *Discursu præliminari* (not. §. 66.) asseruimus, *absque philosophia prima philosophiam in universum omnem methodo demonstrativa pertractari non posse.*

§. 7.

Quinam philosophiam primam emendat.

Qui philosophiam primam methodo scientifica pertractat, is philosophiam scholasticam non postminimo in scholas revocat, sed eam emendat. Vid. §. 109. III. 114. *Disc. præl.* it. §. 149. 87. 91. 491. 315. 120. *Log.* Quoniam vero Scholastici in philosophia utuntur terminis male definitis, notionibus plerumque confusis, subinde prorsus obscuris, contenti, nec principia sufficienter probant, sed in canonibus vagis atque adeo multæ exceptioni obnoxii acquiescunt, satis patet, philosophiam scholasticam in scholas minime revocari, ubi methodo scientifica traditur; verum id potius emendari, quod in illa jure reprehendi poterat. De emendatione vid. §. 131. 130. 129. 115. 141. 154. 163. *Disc. præl.*

§. 8.

Quænam in Ontologia pertractanda.

Quoniam *Ontologia de ente in genere agit (§. 1.); ea demonstrare debet, quæ entibus omnibus sive absolute, sive sub data quadam conditione conveniunt.*

§. 9.

Cur Ontologia amplissimi usus.

Cum adeo definitiones ac propositiones ontologicæ ad entia quæcunque sive in omni, sive in dato quodam statu applicari possint (§. 8.); *Ontologiæ usus ubi vis sese exerit.*

§. 10.

Quinam esse debeat significatus terminorum in communi sermone utatorum.

Si qui termini ontologici in communi sermone adhibentur, receptus vulgo iisdem tribuendus est significatus, determinatus terminus idemque fixus. Conf. §. 135. 66. *Disc. præl.* it. §. 137. 134. *ibid.*

§. 11.

§. 11.

Termini scholasticorum, quibus aliqua notio, quæ vulgo non attenditur, respondet, sunt retinendi. Conf. §. 35. Log. & §. 139-141. Disc. præl.

Quinam termini scholasticorum retinendi.

§. 12.

Si termini scholasticorum retinentur & non satis accurate definiti accuratius definiuntur; philosophia prima scholasticorum non postliminio introducitur. Philosophia scholasticorum non terminis, quibus utuntur, sed eorum definitionibus minus accuratis & propositionibus perperam determinatis absolvitur.

An terminia scholasticorum locus sit absque eorum philosophia.

§. 13.

Termini ontologici, qui in communi sermone adhibentur, sunt clari, etsi male definiantur. Cum satis constet, quando iisdem sit utendum, utut nulla definitione utamur; iisdem claris jungimus notiones (§. 79. 88. Log.), etsi confusas (§. 87. Log.), quas loquentibus de rebus præsentibus attendentes ipso usu acquisivimus (§. 1090. it. 80. Log.).

Claritas terminorum ontologicorum communium male definitorum.

§. 14.

Termini philosophici a Scholasticis in Ontologiam introducti clari sunt, si non omnes, saltem plurimi, utut male ab ipsis fuerint definiti. Etenim examine instituto deprehendi, si non omnibus saltem plerisque respondere notiones claras, per exempla & judicia de rebus obviis communicandas (§. 1090. Log.), atque eos, qui terminorum istorum autores sunt, notiones illas habuisse (§. 80. Log.).

Claritas terminorum scholasticorum male definitorum.

E. gr. *Modus* obscure definitur, quod sit *forma separabilis ex parte subiecti & plane inseparabilis ex parte sui*: respondet tamen voci notio clara per exempla manifesta, veluti quod calor sit modus lapidis, quæ ad eum agnoscendum sufficit. Hinc termini Scholasticorum ex exemplis intelliguntur, qui per definitionem apparebant obscuri.

§. 15.

Cum fieri possit, ut terminus aliquis sit alteri clarus, qui alteri est obscurus (§. 81. Log.), immo ut terminus idem uni sit obscurior, quam alteri (§. 83. Log.); minime repugnat, ut lectori termini ontologici Scholasticorum sint obscuri, qui autoribus eo-

Obscuritas illorum terminorum relativa.

rum erant clari, immo ut uni lectori sint obscuriores, quam alteri.

§. 16.

Unde agnos-
catur termi-
num alteri
fuisse clarum.

Si quis terminum rite definire nequit, ab exemplis vero, quæ profert, communis quædam notio abstrahi potest; ei terminum fuisse clarum recte colligitur (§. 47. 79. Log.).

§. 17.

Unde agnos-
catur termi-
num alteri
fuisse obscu-
rum.

Si quis terminum rite definire nequit, exempla vero, quæ profert, ad communem notionem revocari nequeunt; eidem terminus fuisse obscurus probabiliter colligitur. (Log. §. 47. 79. 549.).

Si quis existentie terminum illustraturus provocaret tum ad ædificium, quod contueretur, tum ad ædificium, cujus sibi imaginem vi imaginationis format, tanquam ad entia existentia, is existentie obscuram haberet notionem, cum nulla sit communis utrique enti existentie notio.

§. 18.

Alius modus
idem agnos-
cendi.

Si quis ea perspicit, quæ enti insunt, num tamen eidem terminus tribui possit hæret; ei obscurus est. Etenim si clarus esset, notionem claram eidem jungeret (§. 80. Log.), perspicuens adeo, quæ enti insunt, agnosceret, utrum is eidem tribui possit, nec ne (§. 79. Log.): id hypothesei contrariatur.

§. 19.

Modus vulga-
ris pervenien-
di ad notiones
ontologicas.

Quoniam ea est mentis natura, ut ab ente quocunque removere nequeat, quod eidem inesse observat; universalialia autem singularibus, quæ percipimus, insunt (§. 56. Log.) notiones confusæ, quæ terminis ontologicis in communi sermone adhibitæ respondent, naturali mentis vi acquiruntur, dum rebus obviis tribuimus, quæ iisdem insunt, & talia nos jam ante alii tribuisse recordamur.

Hac ratione comparantes res corporeas secundum magnitudinem, v. gr. secundum altitudinem, ad notionem confusam æqualium, majoris atque minoris pervenitur. Postquam vero ista notio menti ingenerata &, dum sapius recurrebat, familiaris facta fuit; eadem utur confusa in dijudicandis æqualibus ab inæqualibus, majore a minore utimur (§. 47. Log.).

§. 20.

Et quia in Psychologia annotabimus, quod experientia clara comprobatur, acumen pervidendi universalia in singularibus non modo usu intendi, verum etiam cognitionibus præviis juvari; *notiones confusas, quæ terminis philosophicis a Scholasticis in Ontologiam introductis respondent, similiter acquiri, dum rebus obviis tribuuntur, quæ iisdem insunt, & talia nos jam antea aliis tribuisse, vel tribuere potuisse recordamur, satis patet.*

Modus perveniendi ad notiones ontologicas Scholasticorum.

Ita e. gr. enti omni tribuere Scholastici potentiam obedientialem prævia cognitione determinationis actus vi supernaturali Numinis.

§. 21.

Notiones ontologicae confusæ vulgares constituunt quandam Ontologiae naturalis speciem. Unde (§. 19.) *Ontologia naturalis* definiri potest per complexum notionum confusarum terminis abstractis, quibus generalia de ente judicia exprimi-mus respondentium, communi facultatum mentis usu acquisitarum.

Ontologia naturalis.

§. 22.

Unde consequitur, *Scholasticos Ontologiam naturalem magis completam effecisse.* Addiderunt enim notiones confusas terminis suis discretas, quales in Ontologia naturali occurrunt, sed quæ in eadem deficiebant (§. 20. & Log. §. 91. 772.).

Scholastici quid in Ontologia præstiterint.

§. 23.

Quemadmodum itaque Logica artificialis est distincta explicatio naturalis (§. 11. Log.); ita *distincta quoque explicatio Ontologiae naturalis dici potest Ontologia artificialis.* Atque hæc ipsa est, quam supra (§. 1.) definivimus.

Ontologia artificialis.

§. 24.

Quoniam adeo *Ontologia artificialis* determinatas tradit propositiones (§. 23.); ideo cum ad scientiam, tum ad vitam utilis (§. 115. Disc. prælim.). Et quia notiones præterea terminorum distinctas offert (§. 23.); ideo efficit, ut a Scholasticis & aliis dicta

Ontologia artificialis prærogativa.

dicta & clavius intelligantur, & ad majorem certitudinem perducantur, & eorum cum ceteris veritatibus nexus perscrutetur (§. 154. Disc. praelim.): id quod etiam ex eo patet (vi §. cit.), quod methodo demonstrativa tractetur (§. 4. 23.).

§. 25.

An Ontologia
sit Lexicon
philosophi-
cum.

Quoniam in philosophia prima demonstrari debent, quæ entibus omnibus sive absolute, sive sub data quadam conditione conveniunt (§. 8.), in Lexicis autem vocum saltem significatus explicatur; *Ontologia sive Philosophia prima Lexicon philosophicum non est.* Add. §. 23. 24.

§. 26.

An sit Lexi-
con barba-
rum.

Quoniam vero in Ontologia enodantur notiones quam maxime abstractæ, utpote enti in genere convenientes (§. 1.), iisdem vero, cum vulgo non attendantur, nomina nulla in communi sermone usitata respondent; ideo termini philosophici in eam fuere introducendi (§. 139. Disc. praelim.), quos ignoravit vetus Latium. Ob istos igitur terminos *Ontologia multo minus Lexicon philosophicum barbarum appellari potest.*

Nimirum meo judicio *voces barbaræ* sunt, quæ substituuntur aliis in Latina lingua receptis præter necessitatem; minime autem id nominis merentur, quæ excogitantur ad ea denominanda, quibus nondum aliquod impositum fuit nomen. Non modo in Ontologia, verum etiam in omni disciplina alia termini philosophici occurrunt, quos ignorarunt Romani, & in quavis scientia atque arte hodiernum tales fabricantur, cum terminorum indispensabilis sit usus.

FINIS PROLEGOMENORUM.



PHILOSOPHIÆ PRIMÆ

SIVE

ONTOLOGIÆ

PARS I.

DE

NOTIONE ENTIS IN GE-
NERE ET PROPRIETATI-
BUS, QUÆ INDE CONSE-
QUUNTUR.

SECTIO I.

DE

PRINCIPIIS PHILOSOPHIÆ
PRIMÆ

CAPUT I.

DE PRINCIPIO CONTRA-
DICTIONIS.

§. 27.

E *Am experimus mentis nostræ naturam, ut, dum ea judicat aliquid esse, simul judicare nequeat, idem non esse (§. 634. Log.).* Fundamen-
tum principii
contradictio-
nis.

Si quis neget, se idem in se experiri, eum vel mente captis, vel sponte insipientibus annumeramus, cum quibus nobis nihil negotii est. Sceptici sane, nimiam in vitanda judicandi præcipitancia cautionem adhibentes, phænomena tamen non negarunt.

(Ontologia contracta.)

Ggg

§. 28.

§. 28.

Tenor principii contradictionis.

Naturæ igitur mentis nostræ nobis conscii ad exempla attendentes sine probatione concedimus propositionem terminis generalibus enunciatam: *Fieri non potest, ut idem simul sit & non sit*, seu quod perinde est, *si A sit B, falsum est idem A non esse B*, sive A denotet ens absolute consideratum, sive sub data conditione spectatum.

§. 29.

Nomen & historia ejusdem.

Propositio hæc: *Fieri non potest, ut idem simul sit & non sit*, dicitur *Principium Contradictionis*, ob rationem mox adducendam. *Principium* autem *Contradictionis* jam olim adhibuit Aristoteles eodemque usi sunt Scholastici in philosophia prima *instar axiomatis maxime generalis*.

Omnes demonstrationes logicæ eodem nituntur. Sane si idem simul esse & non esse concesseris, idem prædicatum eidem subiecto sub eadem determinatione & convenire, & non convenire poterit, & eadem propositio simul & vera erit, & falsa (§. 476. Log.): quo posito, Logica nullum amplius locum habet, utpote quæ docere debet, quomodo facultas cognoscitiva dirigatur in veritate cognoscenda, ne præcipites in errores delabamur (§. 1. Log.).

§. 30.

Contradictionis definitio.

Nimirum *Contradicere* sibi inter ipse dicitur, qui idem simul esse & non esse pronunciat. Unde *contradictio* est simultanea ejusdem affirmatio & negatio, aut, si mavis, simultaneitas in affirmando & negando (§. 285. Log.).

§. 31.

Contradictio quibusnam propositionibus contineatur.

Quoniam contradicentium unus affirmat quidpiam esse, quod idem alter esse negat (§. 30.); ideo *contradictio* duabus continetur propositionibus, quarum una idem esse negatur, quod altera esse affirmatur, seu una tollitur, quod altera ponitur.

§. 32.

Quæ sit & quantitas illarum propositionum.

Demonstravimus vero jam alibi (§. 304. 291. 292. Log.), propositiones duas contradictorias vel esse singulares, alteram quidem affirmantem, alteram negantem, vel si altera fuerit universaliter affirmans

affirmans, alteram esse particulariter negantem; si vero altera fuerit universaliter negans, alteram esse particulariter affirmantem: quæ in usum præsentem probe notanda sunt.

§. 33.

In casu contradictionis propositionis universaliter affirmantis & particulariter negantis atque universaliter negantis & particulariter affirmantis contradictio revera obtinet inter propositiones singulares ejusdem subiecti & prædicati, consequenter in omni casu contradictio est singulare (§. 30.). Illud nempe quoddam, quod sub omni & nullo continetur, includit aliqua singularia sive individua, quæ una cum aliis sub propositionis universalis subiecto continentur (§. 239. Log.), & de quibus iisdem in particularibus negatur vel affirmatur, quod de iisdem affirmabatur vel negabatur in universalibus (§. 29.).

Quod contradictio proprie sit non nisi singulare.

§. 34.

Ex eo igitur quod contradictio intercedit inter propositiones singulares ejusdem subiecti & prædicati, quarum altera affirmativa, altera negativa, sequitur, quod etiam eadem intercedere debeat inter universaliter affirmantem & particulariter negantem atque inter universaliter negantem & particulariter affirmantem.

Contradictio universalium & particularium ex contradictione singularium deducta.

§. 35.

*Non absimili modo ostenditur, si propositionum contrariarum una fuerit vera, alteram eidem contradicere, minime autem, si utraque fuerit falsa. Omnes enim propositiones contrariæ continentur sub his duabus generalibus *Omne A est B* & *Nullum A est B* (§. 294. Log.). Ponamus vi principii analytici modo commemorati (§. 34.), omne A constare ex C, D, E, F. Propositiones adeo universales *Omne A est B* & *Nullum A est B*, ubi una earum veluti *Omne A est B* vera, æquivalent hisce singularibus simul sumtis, *C est B*, *D est B*, *E est B*, *F est B* & *C non est B*, *D non est B*, *E non est B*, *F non est B*. Quare singulæ propositiones, quæ continentur sub negativa, *Nullum A est B*, contradicunt singulis propositionibus, quæ continentur affirmativa.*

Contradictio universalium inter se ex contradictione singularium deducta.

Quod si propositio utraque fuerit falsa, singulares sub propositione universali affirmativa contentæ non amplius sunt C

est B, D est B, E est B, F est B &c. nec contentæ sub negativa C non est B, D non est B, E non est B, F non est B; sed Quoddam A est B & Quoddam A non est B, consequenter propositiones contradictoriæ particulares utramque constituunt, atque adeo si vi principii analytici resolvantur, nulla inter ipsas est contradictio.

§. 36.

Propositio universalis vera a contradictione libera.

Pater ex analysi nostra propositionum universalium in singulares, *propositionem universalem veram constare ex meris singularibus veris*, consequenter cum eam non ingrediantur propositiones contradictoriæ, *nullam contradictionem involvere*.

E. c. *Propositio universalis omnis planeta est opacus*, constat ex meris singularibus veris, *Saturnus est opacus, Jupiter est opacus, Mars est opacus &c.* quibus omnibus simul sumtis æquivaler.

§. 37.

Item particularis vera.

Ex eadem pater, *propositionem quoque particularem veram constare ex meris singularibus veris* (§. 241. Log.), consequenter cum eam non ingrediantur propositiones contradictoriæ, *nullam contradictionem involvere*.

Exempli loco est propositio; *Quidam planeta Soli nunquam opponitur*, scilicet inferiores, quæ constat ex duabus singularibus veris; *Venus Soli nunquam opponitur & Mercurius Soli nunquam opponitur*, quibus æquivaler.

§. 38.

Contradictio latens in propositionibus falsis ob defectum determinationis subiecti.

Si propositio universalis fuerit falsa ob defectum determinationis subiecti; pars ejus ex singularibus contradictoriis componitur, atque ideo illa contradictionem involvit. Etenim si propositio universalis fuerit falsa ob defectum determinationis subiecti, sub certa quadam conditione est, quod de subiecto absolute posito aut insufficienter determinato affirmatur vel negatur (§. 478. Log.), atque adeo particulariter & vera est, & falsa: vera nempe in casu conditionis præsentis; falsa in casu conditionis absentis.

E. gr. *Falsa est propositio, Omnis planeta Soli opponitur*, ob defectum determinationis subiecti, quod *planeta* tantum intelligantur superiores

periores & secundarii. Propositio igitur particulariter falsa est, & simul particulariter vera, scilicet *Quidam planetae Soli non opponuntur & Quidam planetae Soli opponuntur.* Negativa sub se continet singulares, *Mercurius Soli non opponitur, Venus Soli non opponitur*, affirmativa vero sequentes, *Saturnus Soli opponitur, Jupiter Soli opponitur, Mars Soli opponitur, Luna Soli opponitur &c.* Universalis falsa, *omnis planeta Soli opponitur*, continet sub se singulares, *Saturnus Soli opponitur, Jupiter Soli opponitur &c.* *Venus Soli opponitur, Mercurius Soli opponitur*, quarum duæ priores cum ceteris eo spectantibus veræ sunt, duæ autem posteriores contradictoriæ verarum *Venus Soli non opponitur, Mars Soli non opponitur.*

§. 39.

Si propositio fuerit falsa, propterea quod prædicatum notioni subiecti possibili repugnat; ex meritis propositionibus singulis componitur, quæ verarum contradictoriæ sunt, atque ideo contradictionem involvit. (Conf. Log. §. 307. 213. 222. 215. 224. 216.)

Contradictio latens in falsis ob repugnantiam prædicati cum notione subiecti possibili.

E. gr. Falsa est propositio: *Omne triangulum habet quatuor angulos*, propterea quod numerus quaternarius angulorum numero ternario laterum, adeoque definitioni trianguli repugnat. Jam cum falsæ sint propositiones singulares, ex quibus ea componitur, *Hoc triangulum habet quatuor angulos, Illud triangulum habet quatuor angulos, Illud triangulum habet quatuor angulos &c.* contradictoriæ, *Hoc triangulum non habet quatuor angulos, Illud triangulum non habet quatuor angulos, Illud triangulum non habet quatuor angulos &c.* veræ sunt. Per numerum ternarium laterum determinatur numerus ternarius angulorum, ut adeo veræ sint propositiones singulares, *Hoc triangulum habet tres angulos, Illud triangulum habet tres angulos, Illud triangulum habet tres angulos &c.* quibus positis, ponuntur etiam negativæ, *Hoc triangulum non habet quatuor angulos, Illud triangulum non habet quatuor angulos, Illud triangulum non habet quatuor angulos &c.* consequenter propositio, *Omne triangulum habet quatuor angulos*, componitur ex singularibus, quæ verarum contradictoriæ sunt.

§. 40.

Quoniam falsitas propositionis universalis, in qua subiectum sufficienter determinatum non est, oritur a particulari

Alia demonstratio contradictionis falsæ,

tentis in propositionibus indeterminatis.

falsa, quæ partem ejus alteram constituit, hoc est, falsum est, *Omne A esse B*, quia *Quædam A non sunt B*; in hac autem particulari subiecto A prædicatum B repugnat: ideo per modum corollarii ex propositione præcedente fluit, quod jam ante ostensum (§. 38.), *partem propositionis falsæ ob defectum determinationis subiecti constare ex singularibus, quæ verarum contradictoria sunt, atque hoc nomine contradictionem involvere.*

§. 41.

Sumtio quando contradictionem involvat.

Si quæ assumuntur per se invicem non determinantur, per quædam tamen eorum vel unum determinatur contrarium ejus, quod una sumitur; sumtio contradictionem involvit. Vid. §. 216. Log.

E. gr. Sumamus figuram rectilineam quinque terminari lateribus, quæ inter se æqualia sunt & angulos rectos comprehendunt. Summa ergo omnium angulorum simul erunt quinque recti. Constat vero ex elementis Geometriæ, summam omnium angulorum in figura quinque lateribus terminata esse 540° seu 6 rectorum. Singuli ergo anguli recti esse nequeunt. Vera adeo est propositio universalis negativa, *Figura rectilinea quinque lateribus equalibus terminata non habet singulos angulos rectos*: cui cum contradicat, quæ sumitur, *Omnis figura rectilinea quinque lateribus equalibus terminata habet singulos angulos rectos*, vel etiam, si sumtio tantum particularis ponatur, *Quædam figura quinque lateribus terminata habet singulos angulos rectos*; sumtio contradictionem involvit.

§. 42.

Extensio propositionis antecedentis ulterior.

Demonstrationem adhuc subsistere patet, si vel maxime inter assumpta contineantur, quæ per se mutuo determinantur: ea autem, quæ per alia determinantur, in præsentem casu tanquam superflua spectantur, ut adeo perinde sit ac si abessent. Sumtio igitur in omni casu contradictionem involvit, si per quædam vel quoddam eorum contrarium ejus determinatur, quod una sumitur.

§. 43.

§. 43.

Quoniam in definitionibus nominalibus sumenda non sunt, quæ per se invicem determinantur (§. 920. Log.); definitio nominalis contradictionem involvit, ubi per quædam in eadem assumpta, vel per unum eorum determinatur contrarium ejus, quod una sumitur.

Definitio nominalis contradictionem involvens.

E. gr. Si sumeremus, figuram rectilineam terminari debere tribus lineis & angulos duos actu rectos esse debere; definitio contradictionem involveret. Ex eo enim, quod figura tribus lineis rectis terminatur, sequitur, angulos duos non esse actu rectos adeoque contrarium ejus, quod sumitur, nempe quod anguli duo sint actu recti. Quodsi una sumeretur, figuram istam tres habere debere angulos; quod superfluum est utique sumeretur, atque adeo in præsentem negotio attendendum non foret.

§. 44.

Quoniam in hypothese philosophica sumuntur, quæ esse nondum demonstrari potest, tanquam essent (§. 119. Diss. prælim.); hypothesis philosophica contradictionem involvit, si ex uno vel altero assumpto, vel ex aliquot simul determinatur contrarium ejus, quod una sumitur (§. 41.).

Contradictio latens in hypothesis philosophica.

§. 45.

Suntio quælibet atque definitio nominalis a contradictione libera est, ubi ex uno vel aliquot eorum, quæ sumuntur, contrarium ejus, quod una sumitur, non determinatur (§. 41. 43.).

Suntio & definitio nominalis a contradictione libera.

§. 46.

Vi demonstrationis apogogicæ detegitur, num, quod sumitur, aut definitio aliqua nominalis contradictionem involvat (§. 524. Log.).

Medium detegendi contradictionem in assumtis latentem

§. 47.

Si talia sumuntur, quæ in eodem subiecto una observamus, suntio a contradictione libera (§. 41.).

Suntionis a contradictione libera: probatio a posteriori.

E. gr. Lapis & durus est, & gravis, vi observationis. Quamobrem ubi sumimus duriciem & gravitatem enti alicui una inesse; quæ sumuntur, a contradictione libera sunt.

§. 48.

§. 48.

Quomodo
sumtio a prio-
ri a contra-
dictione libe-
ra intelligi-
tur.

Si ea, quæ sumimus, per se invicem non determinantur; ex aliis tamen, quæ fieri posse constat (sive vi experientiæ, sive demonstrationis), combinari posse intelliguntur; sumtio a contradictione libera est (§. 28.).

Pleræque propositiones Mathematicorum exempli loco esse possunt, quarum hypotheses hoc modo a contradictione liberæ intelliguntur. E. gr. Si sumimus, *duas lineas parallelas a recta quadam oblique secari*; vi imaginationis facile producimur ideam, quæ duas parallelas a recta obliqua secatas exhibet. Super ea autem reflectentes intelligimus, nihil in ea contineri, nisi quod fieri posse constet, cum recordemur, datæ rectæ cuicunque intervallo quocunque parallelam duci posse, a puncto quocunque in una parallelarum assumpto ad punctum quodecunque in altera rectam duci eamque utrinque continuari posse.

§. 49.

Quomodo
sumtio a con-
tradictione li-
bera esse de-
monstratur.

Si modus, quo fieri possunt, quæ simul sumuntur, demonstrari queat; sumtio a contradictione libera. Conf. §. 515. Log. §. 36. Ont.

§. 50.

Sumtionis a
contradictione
liberæ probanda
casus
alii.

Si demonstrari possit, per quædam eorum, quæ sumuntur, cetera determinari; sumtio denuo a contradictione libera (§. 515. 216. 477. Log.)

§. 51.

An proposi-
tionum analy-
sis in singula-
res utilis.

Quoniam analysis propositionum universalium & particularium in singulares, qua in antecedentibus usi sumus, quæ maxime abstracta sunt, veluti oculis spectanda exhibet; in Mathesi autem non infimum claritatis gradum inde oriri constat, quod ad intuitivam cognitionem reducuntur, quæ discursivæ subsunt, quale subsidium extra Mathesin hætenus desideratum; *propositionum universalium & particularium in singulares analysis, claritatis conservande medium, inter steriles nugas referenda non est; multo autem minus eadem, quæ clara sunt, obscurari dicendum.*

§. 52.

Eam quoque experimur mentis nostræ naturam, ut quodcunque vel esse iudicet, vel non esse. In singularibus casibus idem obvium est. Nemo enim non iudicat. Aut Petrus fuit Romæ, aut non fuit Romæ: Aut Venus nativo lumine gaudet, aut non gaudet: Aut dies est, aut dies non est.

Fundamentum exclusio-
nis medii inter
contradictoria.

§. 53.

Quodsi vero in singulari concesseris, A esse B seu A vel esse, vel non esse; nostra propositionum analysi veritas in universalis facillime ostenditur illius principii ontologici: *Quodlibet vel est, vel non est*. Ponamus enim G sub se comprehendere individua A, B, C, D, E &c. Quoniam in singulari concedis, quodlibet esse vel non esse (§. 52.); igitur negare non potes, quod A vel sit, vel non sit; B vel sit, vel non sit; C vel sit, vel non sit; D vel sit, vel non sit; E vel sit, vel non sit &c. Quoniam adeo $G \supset A \vee B \vee C \vee D \vee E$ &c. idem sunt; igitur etiam *G vel est, vel non est*. Atque adeo universaliter pater, *Quodlibet vel esse, vel non esse*.

Exclusio me-
dii inter con-
tradictoria u-
niversaliter
adstruenda.

Coincidit hæc propositio cum altera in Logicis demonstrata (§. 503. Log.) quod *propositionum contradictoriarum altera necessario vera, altera necessario falsa*. Communiter etiam dicitur, *inter contradictoria non dari medium*.

§. 54.

Quoniam esse vel non esse considerari debet instar alicujus prædicati B, quod ipsi A tribuitur, ut adeo propositio singularis, *A vel est, vel non est*, sub hac formula generali omnium singularium *A est B*, contineatur, quod A sit B, hoc est, quod A vel sit vel non sit, admittimus tanquam verum vi principii contradictionis (§. 28.), atque adeo *propositio, quodlibet est vel non est, tanquam corollarium sub principio contradictionis continetur*.

An sub princi-
pio contradi-
ctionis conti-
neatur.

§. 55.

Quoniam impossibile est, idem simul esse & non esse (§. 28.), *Quodlibet, dum est, est*, hoc est, si *A est, utique verum est, A esse*. Nega enim A esse, dum est; concedere ergo de-
(Ontologia Contracta.) Hhh bes,

Principium
certitudinis.

bes, A simul esse & non esse: id quod principio contradictionis repugnat, adeoque vi ejusdem principii admitti nequit.

Patet adeo principium contradictionis esse fontem omnis certitudinis, quo posito, ponitur certitudo in cognitione humana; quo sublato, tollitur omnis certitudo.

CAPUT II. DE PRINCIPIO RATIONIS SUFFICIENTIS.

§. 56.

Rationis sufficientis definitio.

Per *Rationem sufficientem* intelligimus id, unde intelligitur, cur aliquid sit.

E. gr. Ponamus, personam quandam, cui reverentiam me debere pro certo habeo, in conclave intrare, dum sedens scribo, & me abjecto calamo extemplo surgere: ratio sufficiens, cur calamum abjiciam & protinus surgam, est inritus personæ, cui me reverentiam debere judico. Ex eo enim, quod persona illa in conclave intret, quodque me eidem reverentiam exhibere debere agnoscam, quod denique judicem, reverentiæ contrariari, si non surgam, intelligo, cur potius surgere, quam sedentem in scribendo pergere libuerit.

§. 57.

Nihili definitio.

Nihilum dicimus, cui nulla respondet notio.

Ipsa autem principio contradictionis docemur, quando nulla respondeat notio. Pone enim, te habere notionem trianguli, dum tibi præsentas figuram tribus lineis comprehensam. Pone ulterius, te removere illam notionem, nec aliam in ejus locum succedere: quod igitur remanet, erit nihil. Unde patet, sublata notione, poni nihil. Quare *nihilum* quoque definiri poterat, *quod relinquitur vel ponitur, notione sublata*,

sublata, vel si notioni extra mentem respondeat aliquid eidem simile; tanquam eadem representatum, *quod relinquitur, re sublata*. Hac notio conformis est Arithmeticae, tibi numero, qui ponebatur, sublato, nihil relinqui ponitur.

§. 58.

Quando igitur termino jungitur notio *deceptrix*, quæ vera nulla est, etiam talis videatur (§. 37. Log.), *nihilum mentitur aliquid*. Nihilum quando mentitur aliquid.

§. 59.

Aliquid est, cui notio aliqua responderet.

E. gr. *Triangulo* responderet aliqua notio: neque enim contradictionem involvit, ut spatium terminetur tribus lineis rectis. Aliquid definitio.

§. 60.

Paret adeo, *nihilum non esse aliquid* (§. 57. 59.), atque adeo *nihilum & aliquid sibi mutuo contradicere* (§. 30.), consequenter *inter nihilum & aliquid non dari medium* (§. 53.). Nihilum & aliquid num sint contradictoria.

§. 61.

Si nihilum ponas, quotiescunque libuerit; quod ponitur nihilum est, non aliquid (§. 57.). An nihilum aliquoties positum sit aliquid.

Propositio nostra clarius enunciat, quod obscurius a veteribus dictum, *ex nihilo nihil fieri*: neque enim istud aliter intelligendum esse censemus, quam *nihilorum repetitione seu iterata positione non fieri aliquid*.

§. 62.

Si ignoratur notio ipsi A respondens; non ideo A est nihil. Etenim si ignoratur, non ideo nulla datur, quæ eidem convenit: multa enim esse, quæ ignoramus, neminem fugit (§. 57. Ont. & Log. §. 344.). Fons præcipientis in iudicando de nihilo.

§. 63.

Quoniam terminus inanis est, cui notio nulla responderet, nisi *deceptrix* (§. 37. Log.), nihilum autem est, cui notio nulla responderet (§. 57.), & aliquid tantum mentitur, si eidem notio *deceptrix* attribuitur (§. 58.); *terminus inanis nihil denotat, quatenus aliquid mentitur*. Terminus inanis quid denotet.

§. 64.

Cur terminorum inanum notitia sit rei cognitio nulla.

Cum terminus inanis nihil denotet, quatenus aliquid mentitur (§. 63.); *qui terminos inanes novit, nihil novit, neque adeo intelligit, cur aliquid sit, ubi nihilum mentitur causam.*

§. 65.

Termini inanes cur ratio. nis vicem tue. ri nequeant.

Terminis inanibus non redditur ratio eorum quæ sunt. Vid. §. 56. 64.

E. gr. Anima rationalis dirigens operationes vitales in corpore humano est nihilum, quatenus mentitur causam eorum, quæ in corpore humano vitæ conservandæ gratia fiunt. Nullam enim habemus istius animæ notionem, adeoque terminus animæ rationalis hoc respectu inanis est, cum per fallaciam ipsi tribuatur notio mentis humanæ, cujus longe aliæ sunt operationes, de quibus in Psychologia dicemus. Quamobrem qui rationem redditurus operationum vitalium in corpore, v. gr. cur corpori noxia secernantur, ad animam provocat; is rationem nullam reddit, neque enim inde intelligimus, quomodo operationes istæ absolvantur, aut cur ipsæ potius fiant, quam aliæ.

§. 66.

Cur nihilum non contineat rationem.

Nihilum non continet rationem, cur aliquid sit (§. 57. 56.).

Si nihilum contineret rationem sufficientem, cur aliquid sit; vi definitionis rationis admittendum foret, nihilo aliquam respondere notionem (§. 56.): quod cum definitioni nihili repugnet (§. 57.), contradictorium est (§. 30.), atque adeo salva mentis nostræ natura admitti nequit (§. 27. 28.).

§. 67.

An aliquid de nihilo prædicari possit.

De nihilo non potest prædicari aliquid. Conf. (§. 197. & 344. Log. §. 59 sq. Ont.).

§. 68.

An nihilum quid efficere possit.

Ergo nihilum producere, vel efficere nequit aliquid. (§. 57.).

§. 69.

Posito nihilo non poni aliquid.

Si nihil esse sumitur, non propterea admittendum est esse aliquid. Vid. §. 61. 68.

§. 70.

Nil est sine ratione sufficiente, cur potius sit, quam non sit, hoc est, si aliquid esse ponitur, ponendum etiam est aliquid, unde intelligitur, cur idem potius sit, quam non sit. Vid. §. 53. 56. 69.

Principium rationis sufficientis probatur.

E. gr. Ponamus lapidem, qui erat frigidus, factum fuisse calidum: aut igitur datur aliqua ratio, per quam intelligi potest, cur lapis nunc potius sit calidus, quam frigidus, aut nulla datur. Si nulla datur istiusmodi ratio, nihil ponitur in lapide, nec extra eundem, ad quem ortus caloris referri potest. Utique igitur admittitur, lapidem, qui erat frigidus, factum fuisse calidum, cum nihil esset nec in lapide, nec extra lapidem, a quo calor proficisci potuit. Quoniam tamen calor cœpit, qui ante non erat, cum etiam nihil in lapide, aut extra lapidem esset, unde oriri potuisset; ut appareat, cum nunc calor fuerit subortus, qui antea non oriebatur, admittendum erit, aut nihilum in lapide abiisse in calorem, aut nihilum extra lapidem eundem produxisse, hoc est, affirmari debet lapidem esse calidum, propterea quod vel nihil fuit in lapide, vel extra lapidem, a quo proficisci potuit. Quis vero non ultro largietur, hæc esse absurda, atque ideo affirmabit, dari aliquid vel in lapide, vel extra lapidem, unde calor iste ortum suum duxit.

§. 71.

Propositio, quod nil sit sine ratione sufficiente, cur potius sit, quam non sit, dicitur *Principium rationis sufficientis*.

Principii rationis sufficientis definitio.

§. 72.

Principium rationis sufficientis experientia contrarium minime deprehenditur. Quodcunque enim eorum sumis, quæ esse observantur, ubi inquisiveris, eorundem rationem aut deprehendes, aut saltem demonstrare haud quaquam poteris nullam adesse; verum fateri cogeris te eam reperire non posse. Quamdiu autem exemplum nullum afferre vales, ubi rationem nullam adesse demonstrare potes; tamdiu quoque affirmare nequis, principium rationis sufficientis experientia repugnare: quæ satis manifesta ulteriore probatione minime indigent. Add. §. 963. Log.

An istud principium experientia contrarium sit.

Mihi nunquam incidere licuit in exempla, utur studiose conquiſita, vel ab alijs tanquam principio rationis ſufficientis contraria propoſita, ubi rationem ſufficientem detegere extemplo minime potuiſſem.

§. 73.

Quomodo ab
exemplis ab-
ſtrahatur.

Principium rationis ſufficientis ab exemplis ſeu ſingularibus tanquam univerſale abſtrahi poteſt.

Sume quodcunque exemplum, ubi aliquid eſt, principium rationis ſufficientis inde abſtrahe. E. gr. Si quaſiveris ex Titio, qui multus & aſiduus eſt in ſcribendis epittolis ad alios, cur non etiam aliquam det ad Imperatorem Turcarum, quærentem ridebit & importune inſtanti reſpondebit, abſque reſpoſione patere, quod non habeat, quod ad illum ſcribat. Ridet igitur, quod facere debeat, quod nulla prout ratio ſuadet.

§. 74.

Principium ra-
tionis ſuffici-
entis menti
noſtræ natu-
rale.

Eam experimur mentis noſtræ naturam, ut in caſu ſingulari non facile quis amiſerit aliquid eſſe ſine ratione ſufficiente. Quis enim ignorat, nos ad quærendum in omni caſu eſſe proſos, cur hoc ſit, cum idem in pueris a teneris unguiculis experiamur, quam primum ſeſe aliquis rationis uſus exerit. Immo vulgus pueros reprehenſurum, quando mali quidpiam patrarunt, eos interrogat, quare hoc fecerint, nec hic reſpoſionem quamlibet admittit, non acquieſcens niſi in ea, unde intelligit, in dato caſu voluntatem ira determinari potuiſſe. Unde naturæ mentis noſtræ veluti repugnat admittere, quod aliquid ſine ratione ſufficiente eſſe poſſit. Iſta repugnantia magis adhuc ſeſe exerit in iis, qui in ſcientiis verſari rationibus eorum, quæ ſunt, pervidendis adſueti ſunt, conſervato recta diſcendi methodo naturali mentis impetu, quo in rationem ſufficientem fertur.

§. 75.

An princi-
pium rationis
ſufficientis
abſque proba-
tione ſumi
poſſit.

Quoniam ea eſt mentis noſtræ natura, ut naturali quodam impetu in rationem ſufficientem ejus feratur, quod eſt (§. 74.), nec principium rationis ſufficientis experientiæ contrarium deprehenditur (§. 72.), quin potius a caſu quovis ſingulari abſtrahi poteſt (§. 73.), conſequenter ejus veritas per notionem confuſas, quas experientia in mente noſtra excitavit, ſola attentione

rentione innotescit, nisi perversa studendi methodo depravatum & præjudiciis præpeditum habueris animum; *principium rationis sufficientis absque probatione instar axiomatis sumere licet.* Vid. *Leibnit.* Theod. P. I. § 44.

§. 76.

Si propositiones per principium rationis sufficientis demonstratas experientia confirmari, vel etiam probationes aliarum, quæ juxta regulas Logicæ evolutæ insufficientes deprehenduntur, demonstrationis vim acquirere observamus; assensus, qui sine probatione sumto datus fuerat, firmior evadit. Si propositio ex principio rationis sufficientis demonstratur, præter ipsum, quod absque probatione sumitur *per hypothesis*, non sumitur principium aliud, quod non in definitionum, experientiarum indubitatarum, axiomatum, vel propositionum jam demonstratarum numero habeatur (§. 533. *Log.*) & forma argumentandi regulis syllogisticis conformis (§. 469. *Log.*). Quodsi ergo principium rationis sufficientis esset falsum, cum eodem tanquam admodum abstracto ob universalitatem suam in probatione loco majoris utamur, falsa inde colligeretur conclusio (§. 509. *Log.*): quæ si esset propositio ad demonstrandum proposita, falsam eam esse debere patet. Si conclusione inde collecta denuo utaris tanquam majore ad inferendam hinc tandem propositionem ad demonstrandum propositam, non minus patet hanc falsam esse debere. Quodsi denique contingat, nos conclusione per principium rationis sufficientis illata uti tanquam minore in Syllogismo ad inferendam propositionem, quæ ad demonstrandum proponebatur; hanc quoque falsam esse debere constat (§. 510. *Log.*). Quoniam tamen propositio per principium rationis sufficientis demonstrata experientia confirmatur, *per hypothesis*; vera est (§. 488. *Log.*), nobisque certa (§. 538. *Log.*), consequenter inde nobis ipsum quoque principium rationis sufficientis certum evadit. Assensus adeo, qui absque probatione sumto datus fuerat, continuo firmior sit, quo plura istiusmodi specimina obtinemus, cumque principio isto tanquam universali, absque ulla restrictione, in casibus admodum diversis ad demonstrandum utamur, ejus quoque universalitatis sic certi reddimur, vi eorum, quæ paulo ante (*not. §. 70.*) distinctius exposita fuerat.

Quomodo sine probatione sumtum certius evadat.

Quodsi

Quodsi præterea animadvertimus, probationes insufficientes propositionum, quæ tantum probabiles agnoscuntur, principio isto accedente vim demonstrationum acquirere; eidem majus adhuc præjium decernimus atque sic assensum ab eo demon-
veri non patimur.

§. 77.

Mundus fabu-
losus princi-
pio rationis
sufficientis
contrarius.

Sublato principio rationis sufficientis mundus verus abit in mundum fabulosum, in quo voluntas hominis stat pro ratione eorum, quæ fiunt. Etenim cum in eo, qui existit & quem nos incolimus, mundo nihil occurrat, quod principio rationis sufficientis contrarietur (§. 72.); mundus verus non amplius idem manet (§. 28.), ubi principium rationis sufficientis tollis & contrarium in ejus locum substituis, quod omnia sint sine ratione sufficiente (§. 294. Log.). Enimvero mundus fabulosus, in quo voluntas hominis stat pro ratione eorum, quæ fiunt, in eo differt a præsentē, quod posita voluntate hominis extemplo ponantur, quæ desiderat aut in votis habet, etsi in re nihil ponatur, unde modificatio ista fieri posse intelligatur, nec ponantur causæ ad actum determinandum sufficientes, consequenter in eo omnia fiant absque ratione sufficiente.

Si in mundo fabuloso cerasum appetis, cerasum cum fructibus maturis adest. Similiter fructus jussus in os advolat & ubi volueris, in via dividitur, ut nucleus cum putamine avolet, ne eum exspuere cogaris. Columbæ assæ circumvolitant & ad desiderium esurientis veluti sponte sua separatur, quod is appetit, atque in os incurrit. Quoniam hic stat pro ratione voluntas & singula fieri possunt, atque fiunt, propterea quod tibi ea velle libuerit; fabellam continuare unusquisque pro arbitrio potest.

§. 78.

Cur hic non
plura de prin-
cipio rationis
sufficientis
tradantur.

Equidem plura adhuc sunt, quæ de principio rationis sufficientis tenere oportet: enimvero cum in philosophia prima utendum sit methodo demonstrativa (§. 4.), hoc est, philosophica (§. 762. Log. & §. 132. Disc. prælim.), unumquodque eo loco tradendum est, ubi per antecedentia intelligi & demonstrari potest (§. 126. 127. Disc. prælim.). Quamobrem quæ a principiis inferius demum tradendis pendent, ea suo demum loco inferemus.

SECTIO

SECTIO II

DE

ESSENTIA ET EXISTENTIA
ENTIS AGNATISQUE
NONNULLIS NOTIONIBUS.

CAPUT I.

DE POSSIBILI ET IMPOSSIBILI.

§. 79.

Impossibile dicitur, quicquid contradictionem involvit. Impossibilia definitio.
E. gr. *Lignum ferreum* contradictionem involvit, cum fieri non possit, ut lignum simul sit ferrum, hoc est, non sit lignum (§. 28. 31.).
Est adeo impossibile.

§. 80.

Quoniam propositio universalis falsa ob defectum determinationis subjecti ex parte; falsa vero ob repugnantiam prædicati & notionis subjecti possibilis tota contradictionem involvit (§. 38. 39.); *propositio universalis falsa ob defectum determinationis subjecti in casu particulari, quando nempe deficit subjecti determinatio; falsa vero ob repugnantiam prædicati & notionis subjecti possibilis omni in casu impossibilis est.* Propositiones falsæ quando impossibiles.

§. 81.

Quoniam id contradictionem involvit, ex quo colligitur, quod vel eidem, vel propositioni alicui veræ contradicit (§. 46.); *impossibile istud est, ex quo colligitur, quod vel eidem, vel propositioni alicui veræ contradicit (§. 79.).* Primus modus impossibilitatem probandi.

§. 82.

Cum porro istud contradictionem involvat, cui simul tribuuntur, ex quorum uno vel quibusdam colligitur, quod *(Ontologia contracta.)* Secundus modus impossibilitatem probandi.

alteri una eidem attributo contrariatur (§. 42.); *istud impossibile est, cui simul tribuuntur, ex quorum uno vel quibusdam colligitur, quod alteri una eidem attributo contrariatur* (§. 79.).

E. gr. *Triangulum rectilineum birectangulum impossibile est, cum ex notione trianguli rectilinei colligatur, duos in eodem angulos non posse esse actus rectos* (§. 218. *Geom.*), seu quod birectangulum esse nequeat.

§. 83.

Tertius modus impossibilitatem demonstrandi.

Quia istud manifesto contradictionem involvit, cui talia simul attribuuntur, quæ sibi mutuo contrariantur (§. 28. 30.); *impossibile quoque illud est, cui talia inesse ponuntur, quæ sibi mutuo contrariantur*. Vid. not. §. 79.

§. 84.

Definitio nominalis & hypothesis philosophica quando impossibilis.

Definitio nominalis atque hypothesis philosophica contradictionem involvunt, si per quædam in iisdem assumta, vel per unum eorum contrarium ejus determinatur, quod una sumitur (§. 43. 44.), vel ex assumpto in iisdem colligitur, quod vel eidem, vel propositioni alicui veræ contradicit (§. 46.); *definitio adeo nominalis atque hypothesis philosophica impossibilis, si per quædam in iisdem assumta, vel per unum eorum determinatur contrarium ejus, quod una sumitur, vel exinde colligitur, quod vel eidem, vel propositioni alicui veræ contradicit* (§. 79.).

§. 85.

Possibilis definitio.

Possibile est, quod nullam contradictionem involvit, seu, quod non est impossibile (§. 79. 30. 53.).

§. 86.

Sumtio & definitio nominalis quando possibilis.

Definitio nominalis & quæcunque alias sumuntur possibilis sunt, ubi ex uno vel aliquot eorum, quæ sumuntur, contrarium ejus, quod una sumitur, non determinatur (§. 45. 47. seqq.).

§. 87.

Alius casus.

Id possibile est, ex quo colligi nequit, quod vel eidem, vel propositioni alicui veræ contradicit (§. 85. add. §. 81.).

§. 88.

Est igitur possibile, cui non nisi talia attribuantur, quæ in eodem subiecto una observantur (§. 85. add. §. 47.).

Principium
probandi pos-
sibilitatem a
posteriori.

E. gr. Observamus ignem pariter atque solem & lucere, & calefacere. Possibile igitur est, ut unum idemque corpus & luceat, & calefaciat, seu ut lux & calor simul sint in eodem subiecto.

§. 89.

Est quoque possibile, cui talia attribuantur, per quorum unum vel aliquot cetera determinari demonstrari potest (§. 50.).

Principium
demonstran-
di possibilita-
tem a priori.

E. gr. Si fumis, triangulum esse æquilaterum & æquiangulum, per æqualitatem laterum una determinari æqualitatem angulorum demonstrari potest. Non igitur impossibile, sed possibile est, ut æqualitas laterum & angulorum triangulo rectilineo simul conveniat.

§. 90.

Possibile porro est, cui attribuantur, quæ per se invicem non determinantur, fieri tamen & inter se combinari posse intelliguntur (§. 48.).

Principium se-
cundum proban-
di possibili-
tatem a prio-
ri.

E. gr. (§. 234. Log.) sumimus, aliquid prædicari de genere aliquo superiori absolute, seu absque ulla supposita conditione, aut determinatione accidentali. Admittitur hypothesis tanquam possibilis, ubi constat notionem generis superioris, notionem prædicati & notionem prædicati absoluti esse possibilem & has combinari posse, ut obtineatur una complexa, per anteriora intelligitur, vel saltem per exempla patet.

§. 91.

Si sumitur, quod demonstratum est, id possibile esse constat. Conf. Log. §. 515. 528. 491. 490. & Ont. §. 85.

Principium
tertium.

E. gr. *Propositio universalis est falsa ob defectum determinationis subiecti.* Etenim dum demonstravimus (§. 502. Log.), duas propositiones contrarias simul falsas esse, si de subiecto absolute prædicatur, quod eidem non nisi subadijcienda conditione convenit; notionum logicarum non expers facile intelligit, præsentem hypothesin a nobis fuisse demonstratam (§. 275. Log.).

§. 92.

Principium
quartum.

Si modus, quo fieri possunt, quæ simul sumuntur, demonstrari queat; ea, quæ sumuntur, a contradictione libera sunt (§. 49.). Quamobrem si modus demonstrari potest, quo prodit aliquid, cui simul insunt, vel partim insunt, partim adsunt, quæ sumuntur; id possibile est (§. 85. add. §. 49.).

§. 93.

Principium
quintum.

Si ex assumpto colligitur propositio, quam vel vi demonstrationis, vel vi experientiæ veram esse constat; illud possibile est. Conf. §. 522 sqq. 490 sq. Log.

E. gr. In Astronomia spherica possibilem agnoscimus hypothesin de cælo motu æquabili circa tellurem ab ortu in occasum rotato, propterea quod, quæ inde colliguntur de motu primo, observationibus consentanea deprehenduntur. Quod si hypothesis ista esset impossibilis, sequerentur inde absurda, quæ ab observationibus abhorrent.

§. 94.

Quænam ex
possibili
colligantur.

Ex possibili nonnisi possibile colligitur. Conf. §. 489 497. 527. 492 480. Log. & §. 30. 79. Ontol. idem patet ex §. 508. 491. Log.

Unde patet, omnes omnino demonstrationes ostensivas niti hoc principio, ut adeo non modo per universam Mathesin, verum etiam in omni alio scientiarum genere possibile agnoscatur, quod ex possibili colligitur.

§. 95.

Quale sit unde
de possibili
colligitur.

E contrario si possibile est, quod ex altero colligitur, hoc ipsum quoque possibile est. Vid. §. 93. Ont. & §. 491. Log.

Propositio præsens est inversa præcedentis, cum ea adeo non confundenda.

§. 96.

Quænam ex
impossibili
colligantur.

Ex impossibili nonnisi impossibile directe colligitur (§. 95.).

§. 97.

Quale sit unde
impossibile
colligitur.

Si impossibile est, quod ex altero directe colligitur, ipsum quoque impossibile est (§. 95.).

Paret

Patet vero omnes omnino demonstrationes indirectas seu apogógicas niti hoc principio, ut adeo non modo in omni Mathesi, verum etiam in alio quocunque scientiarum genere impossibile agnoscat, ex quo colligitur, quod impossibile. Quamobrem cum non dentur demonstrationes nisi directæ, vel indirectæ (§. 522. & seqq. Log.); omnes demonstrationes ad notiones possibili atque impossibilis reducuntur.

§. 98.

Si in demonstratione apogogica ex propositione alia falsa directe colligitur ejus contradictoria vera; non ex impossibili, sed ex possibili colligitur possibile. Hypothesin theorematis præsentis esse possibilem, tum per demonstrata (§. 93. 88.), tum per exempla (§. 529. 530. Log.) patet: ipsum vero theorema in diversis casibus diversimode demonstratur.

Quomodo ex
impossibili
possibile col-
ligatur.

Etenim si propositio universalis fuerit falsa ob defectum determinationis subjecti, ea nonnisi in casu particulari impossibilis (§. 80.). Quamobrem cum in demonstratione propositio absque determinatione in dato casu sumitur, non quod impossibile est sumitur & inde legitima consequentia possibile inferitur; sed id, quod possibile est, ponitur & ob determinationem in dato casu hypothesi contrariam evincitur, illud esse removendum, consequenter contrarium huic conveniens ponendum (§. 94.).

Si hypothesis, quæ ponitur, impossibilis, sed non ex ea, verum alio quodam principio vero, quo vel inscius uteris, deducitur propositio vera illi contraria; per se patet, quod non ex impossibili, verum ex possibili colligatur, quod possibile est, quemadmodum fieri debebat (§. 94. 95.).

E. gr. Falsa est propositio, quod *maris superficies non sit sphaerica* & ea tanquam vera assumpta directe colligitur ejus contradictoria vera: non tamen ideo ex impossibili colligitur possibile. Ita nimirum argumentamur: Cum superficies maris non sit sphaerica, partes ejus omnes a centro telluris non distant æqualiter, vi definitionis superficiei sphaeræ. Quoniam adeo alia aliis altiores sunt, altiores desfluunt, versus depressiores, donec in eadem altitudine constituentur, viciorum quæ de fluidorum æquilibrio cum per experientiam clarent, tum ex

demonstrationibus hydrostaticis liquent, consequenter singula eandem a centro distantiam fortiuntur & hinc mare superficiem sphaericam induit. Quodsi hanc demonstrationem ad examen accuratius revoces, facile apparet, ex eo, quod aliz partes maris aliis altiores supponantur, deduci, quod ad eandem a centro distantiam redigi debeant. Enimvero non impossibile in se est, ut partes aequae aliis fiant altiores, seu ultra libellam attollantur: etenim ipsa experientia loquitur id fieri posse, & in ipso mari hoc factum olim esse miraculoso Dei concursu sacrae paginae testantur. Ex eo igitur, quod possibile est, deducitur, quod non minus possibile: nempe uterque status possibilis est, etsi uterque simul esse nequeat, sed quilibet suas admittat determinationes. Ex defectu adeo determinationis unius removetur unus & uno remoto admittitur alter, propterea quod uno remoto alter ponitur. In veritatibus contingentibus, in quarum censu est exemplum praesens, satis manifestum est, quod affirmatur: enimvero in veritatibus necessariis non aequae idem patet, sed majore attentione opus est.

§. 99.

Definitio de-
ceptr. x possi-
bilia.

Si possibile definitur per id, quod esse potest; possibilis definitio nulla est. Qui enim dicit, id esse possibile, quod esse potest, is nonnisi vocis explicationem grammaticam tradit. Cum adeo verbis *esse possibile* & *posse esse* nonnisi eadem notio confusa respondeat experientia acquisita, dum nunc esse observamus, quod antea non erat (§. 634. Log.); nulla utique definitio est, ubi possibile dicitur esse id, quod esse potest (§. 163. Log.).

§. 100.

Notio possibi-
lis & impossi-
bilis praxi Ma-
thematicorum
conformis.

Notio impossibilis, quod sit id, quod contradictionem involvit, & notio possibilis, quod sit id, quod a contradictione liberum, praxi Mathematicorum conformis.

§. 101.

Impossibile
cur sit nihili-
um.

Impossibile est nihilum. Vid. §. 79. 30. Enimvero eam experimur mentis nostrae naturam, ut, dum ea judicat aliquid esse, simul judicare nequeat, idem non esse (§. 27.). Quamobrem cum judicio notio aliqua respondeat, quae subiectum cum eo repraesentat, quod eidem tribuitur (§. 38. Log.); mens sibi subiectum ita repraesentare nequit, ut idem eidem simul insit, vel non

non insit, seu simul adsit, vel non adsit. Impossibile igitur sibi repræsentare nequit, consequenter nulla ejus datur notio (§. 33. *Log.*). Est adeo nihilum (§. 57.).

E. gr. Contradictorium est *simul stare & sedere*, qui enim stat, sedere nequit, ut adeo simul stare & sedere perinde sit ac simul stare & non stare. Quodsi hominem simul stantem & sedentem tibi animo repræsentare volueris; id nullo modo a te fieri posse animadvertes. Nullam igitur habere potes *hominis simul stantis & sedentis* ideam, consequenter *Homo simul stans & sedens* est nihilum.

§. 102.

E contrario *Possibile* semper est *aliquid*, *eidemque* semper *notio respondet*. Conf. §. 79. 83. 28. 101. 60. 59.

Possibile quod sit aliquod, eique semper notio respondeat.

§. 103.

Similiter *Id*, cui *aliqua respondet notio*, *possibile est* (§. 59.).

An possibile sit, cujus notionem habemus.

Nos habere notionem *trianguli æquilateri* certi sumus, dum vi constructionis demonstrare valemus, triangulum sic constructum habere tria latera aqualia. Exinde vero inferimus, quod sit possibile (§. 92.).

CAPUT II.

DE DETERMINATO ET INDETERMINATO.

§. 104.

U si jam sumus aliquoties termino *determinati* notionem clara, quæ obvia est, contenti, cum nemo non vel ex unico exemplo allato, in quo determinatum ab indeterminato distinguitur, eam haurire valeat. Enimvero cum ipsam notionem entis in genere & in Cosmologia ipsam mundi notionem in specie ex *notione determinationis* deducamus, atque præterea alia in sequentibus inde derivemus, sicque *demonstrandi principium*

Institutum Autoris.

cipium præbeat; ut distinctam consequamur determinati ac indeterminati notionem opera nobis danda est.

Ut appareat, notionem determinati ac indeterminati claram ab exemplis obviis abstrahi posse, cogitemus notionem trianguli rectilinei, quod sit *figura plana tribus lineis rectis terminata*. Hic determinationum in numero sunt, (1) quod sit figura, et quæ (2) plana, & (3) quod terminetur lineis rectis, iisque (4) numero tribus: indeterminata vero censetur linearum ad se invicem ratio.

§. 105.

Indeterminati
& determinabilis
definitio.

Si A spectetur ut id, de quo affirmari potest vel B, vel C, vel D &c. nullum tamen adhuc eorum affirmare licet, A erit *indeterminatum* & quatenus vel B, vel C, vel D &c. de eodem affirmari potest, *determinabile*. *Indeterminatum* adeo est, de quo nihil adhuc affirmari potest, etsi de eo quid affirmari posse non repugnet.

E. gr. In definitione trianguli, quod sit *figura plana tribus lineis rectis terminata*, rationem linearum spectamus ut *indeterminatam*, quatenus ex vel æquales, vel inæquales, aut dux saltem earum æquales esse possunt, nihil tamen horum adhuc affirmare licet per ea, quæ in definitione ponuntur. Quatenus tamen certum est, non posse triangulum construi, nisi unum eorum de eodem affirmetur; latera trianguli tanquam *determinabilia* spectantur. Ideo dicimus in notione trianguli generali adhuc ulterius determinari posse laterum rationem.

§. 106.

Axioma fluens
ex notione in-
determinati.

Per ipsam definitionem indeterminati patet (§. 105.), *indeterminatum esse determinabile*.

§. 107.

Cur notio de-
terminabilitatis
prior notio-
ne indeterminati.

Quoniam notio determinabilitatis ingreditur notionem indeterminati (§. 105.); *notio determinabilitatis prior est notione indeterminati* (§. 127. Discurs. prælim.).

§. 108.

Quomodo
probetur esse
quid indeter-
minatam.

Ante cognosci necesse est, quod quid sit determinabile, quam constare potest, quod sit indeterminatum. Cum enim definitum tribui nequeat nisi ei, cui notæ in definitione enumeratæ simul conveniunt (§. 344. Log.); probaturus A esse indeterminatum demon-

demonstrare teneris de eo affirmari posse vel B, vel C, vel D &c. nullum tamen adhuc eorum affirmare licere (§. 105.).

§. 109.

Cum indeterminatum non possit concipi, nisi idem concipiatur ut determinabile (§. 106.); si A prorsus indeterminatum ponitur, non tamen ideo nihilum est (§. 57.), sed ut aptum spectatur ad recipiendum aliquid.

Quomodo A ut prorsus indeterminatum concipitur.

§. 110.

Notionem imaginariam appello, qua ob quandam similitudinem fingitur, quod non est, ut per imaginem quandam veluti oculis præfens sistere valeamus, quod in eos non incurrit. Notionem eidem oppositam realem voco, quæ omne fictitium excludit.

Notionis imaginariæ & realis definitio.

Notionem imaginariam hic definitio & a reali distinguo, quod nobis in philosophia prima propositum sit ostendere, quomodo abstractorum vulgo imaginarias forment notionem, quæ sensibus atque imaginationi inhaerentibus clariores apparere solent realibus. Neque enim solum ad eas attendere debemus, ne easdem cum realibus in præjudicium veritatis confundamus; verum etiam ut iisdem ad inveniendum & demonstrandum utamur, quoties in ceterarum locum absque veritatis præjudicio facilius intelligentiæ gratia surrogantur: quod fieri posse ipso facto experimur in ipsa Mathesi abstracta, ubi imaginariis multus est locus. Immo ex sequentibus patebit, nos ipsum Geometriæ objectum notionem nonnisi imaginaria complecti. Quamvis autem notionem imaginariæ in nonnullis in locum realium utiliter succedant; cum tamen iisdem non prorsus æquivalent, per omnia iisdem substitui non possunt. Ita in Geometria utiliter adhibemus imaginariam corporis atque extensæ notionem, quæ cum reali confusa, ubi ad Physicam & Metaphysicam transfertur, non modo tenebras affundit, sed & contradictiones parit & viam ad ulteriora præcludit.

§. III.

Indeterminatum notionem imaginaria complexuri idem nobis exhibemus tanquam receptaculum, cui vel quilibet vel, ubi quædam jam capere supponitur, A, B, aut C &c. seu aliquod datum, etsi nihil ab iis diversum inde licet. Conf. §. 109. 105.

Notio indeterminati imaginaria.

(Ontologia contracta.)

Kkk

Notione

Notione hæc indeterminati imaginaria posthac subinde non inutiliter utemur, ubi notionum origo & entis notio generalis ex indeterminati notione derivanda, cum sic absque veritatis præjudicio clariora fiant, quæ animum ad abstracta concipienda minus compositum habentibus difficulter concipiuntur & meo nescio cujus obicuritatis accusantur. Dum vero notio imaginaria sub imagine exhibet, quæ intellectus in abstracto concipere tenetur; intellectus ad consensum cum sensu & imaginatione reducitur: ad quod iis præsertim, qui adhuc hospites sunt in philosophia prima, non potest non gratissimum accidere, cum vulgo abstracta in concretis confuse intueamur.

§. 112.

Determinati
definitio.

Si A spectetur ut id, de quo affirmari debet B, aut de quo affirmari debent B, E & F &c. erit A *determinatum*. Est adeo *determinatum*, de quo aliquid affirmari debet.

§. 113.

Quando unum
determinetur
per alterum.

Si de ipso A affirmatur B, vel B, E & F &c. atque ideo de eodem quoque affirmari debet C; C *determinari* dicitur *per B*, vel *per B, E & F &c.*

E gr. Quia de triangulo æquilatelo affirmatur; quod tria ejus latera æqualia sunt, de eodem quoque affirmandum, quod tres ejusdem anguli æquales sint. Æqualitas adeo angulorum per æqualitatem laterum dicitur determinari.

§. 114.

Determinan-
tium definitio.

Ea, per quæ determinantur alia, dicuntur *determinantia*; quæ vero per alia determinantur, *determinatorum* nomen retinent (§. 112.).

§. 115.

Quod positis
determinanti-
bus ponatur
determinata.

Positis adeo *determinantibus* ponuntur quoque *determinata*, hoc est, *quæ primum determinantia sunt, determinata quæque sunt* (§. 113. 114.).

§. 116.

An determi-
nantia consti-
tuant ratio-
nem sufficien-
tem.

Determinantia sunt ratio sufficiens determinati. Vid. §. 114 112. 56. Ont. & §. 202, Log.

§. 117.

§ 117.

Hinc *Leibnitius* rationem sufficientem vocat *Rationem determinantem*: a qua appellatione nos tamen abstinemus, cum prior appellatio magis apta videatur ad memoriam notionis convenientis conservandam & quod ab ea alienum est arcendum (§. 113.).

Cur ratio sufficiens dicatur determinans.

§. 118.

Posita ratione sufficiente, ponitur id, quod per eam potius est, quam non est. Id enim, quod per rationem sufficientem potius est, quam non est, in numero determinatorum locum habet, ipsa vero ratio sufficiens per determinantia constituitur (§. 116.). Positis adeo determinantibus omnibus simul sumtis ponitur ratio sufficiens, & posito eo, quod per rationem sufficientem determinatur, ponitur quoque determinatum. Enimvero positis determinantibus ponitur determinatum (§. 115.): Ergo posita ratione sufficiente ponitur id, quod per eam potius est, quam non est (§. 56.).

An eam rationem sufficiente simul ponatur, quod per eam est.

§. 119.

Quodsi quid per aliquid determinatur, & insit id, per quod determinatur, etiam illud inesse debet, quod per idem determinatur (§. 115.).

Modus colligendi determinatum ex determinante.

§. 120.

Quodsi quædam per se invicem determinantur, & unum eorum sit; etiam alterum esse debet (§. 119. 114.).

Quando determinans ex determinato colligatur.

E. gr. In triangulo rectilineo & angulorum æqualitas per laterum æqualitatem & laterum æqualitas per angulorum æqualitatem determinatur.

§. 121.

Quæ per idem determinantur, ea sunt simul (§. 115. 119.).

Per idem determinata cur simul sint.

E. gr. Per parallelismum laterum in figura quadrilatera & angulorum diagonaliter oppositorum, & laterum oppositorum æqualitas determinatur. Quamobrem si in figura quadrilatera latera opposita fuerint parallela, & anguli diagonaliter oppositi, & latera opposita æqualia esse debent.

§. 122.

Determinatio-
nis definitio.

Quæ in aliquo subjecto certo respectu determinata sumuntur, *Determinationis* nomine veniunt.

§. 123.

Quatenus
idem & deter-
minatio & de-
terminans
dicitur.

Pater adeo (§. 114. 122.), *unum idemque dici posse determinationem, quatenus nempe aliquid in certo esse, seu ut sit certum quid, per id determinatur; & determinans, quatenus per ipsum aliud quid determinatur.*

Ita e. gr. *Æqualitas laterum* in triangulo æquilatelo dicitur determinans, quatenus per eandem angulorum æqualitas determinatur: eadem vero determinationis nomine venit, quatenus per eandem trianguli æquilateri species determinatur.

§. 124.

Notio deter-
minati & inde-
terminati pra-
xi Mathematico-
rum confor-
mis.

Notio determinati & indeterminati cum agnatis ceteris praxi Mathematicorum conformis. Patet id ex distinctione *problematum* in *determinata & indeterminata*. Determinatum enim dicitur problema, ubi data sufficiunt ad idem solvendum: indeterminatum vero vocatur, ubi data ad idem solvendum non sufficiunt. Dicuntur adeo problemata indeterminata, in quibus aliqua data determinata non sunt, quæ tamen determinata esse oportet, si quidem problema solvi debet, quod proponitur: e contrario determinata vocantur problemata, ubi singula data determinata sunt, quæ nosse debemus, ut solvi problema possit, quod proponitur. Data igitur censentur indeterminata, quæ multis, immo infinitis modis variari possunt.

§. 125.

Notio deter-
minati & inde-
terminati usui
loquendi com-
muni confor-
mis.

Notio determinati & indeterminati, quam dedimus, usui loquendi communi conformis. Facile hoc experiri datur (§. 634. *Log.*), ubi attendimus ad sermonem eorum, qui his verbis utuntur, cum de rebus obviis loquuntur. E. gr. ponamus Sempronium, Cajum & Titium convenire debere de re quadam deliberaturos. Per se patet, locum aliquem congressui destinandum esse, & eos vel in ædibus Semproni, vel Caji, vel Titii, vel in alio quodam loco, qui singulis probatur, convenire posse. Quamdiu igitur nondum decreverunt,

runt, in quo loco convenire velint; *locus congressus* nondum determinatus, vel quod perinde est, adhuc *indeterminatus* dicitur. Enimvero quam primum in certum quendam locum consentiunt, v. gr. quod in aedibus Titii convenire velint; *locus congressus determinatus* censetur, diciturque *is determinare* eundem, cui datur potestas aliquem pro suo arbitratu eligendi. Quodsi per leges aut alia de causa potestas illa uni eorum competit, tum dicimus ejus esse determinare locum.

§. 126.

Si demonstrari potest subiecto sive absolute posito, sive sub adjecta conditione tribuendum esse aliquod prædicatum; hoc in casu priori per definitionem subiecti, in posteriori per adjectam conditionem determinatur. Quodsi demonstratio fuerit ostensiva, ex ipsa ejus forma patet, si prædicatum subiecto absolute tribuitur, id de eodem affirmari posse, quia affirmantur ea, quæ in definitione continentur (§. 522. Log.); si vero prædicatum sub data conditione subiecto attribuitur, id ideo affirmari, quia affirmantur ea, quæ conditionem istam constituent (§. 523. Log.). Prædicatum adeo in casu primo per definitionem, in posteriori per conditionem subiecto adjectam, seu per determinationem ejus (§. 225. Log.), determinatur (§. 113.).

Quomodo a priori pateat, quænam per alia determinentur.

Quodsi 2. demonstratio fuerit apogogica, non minus patet propositionem esse veram, quam si demonstratio ostensiva fuerit (§. 528. Log.). Prædicatum igitur subiecto convenit, quod eidem tribuitur (§. 476 Log.). Quamobrem non repugnat, ut eadem propositio directe quoque demonstretur (§. 520. Log.). Cum adeo directe demonstrari possit (§. 85); prædicatum per definitionem vel determinationem subiecti determinatur, prout vel categorica, vel hypothetica fuerit propositio *vi numeri primi*.

§. 127.

Si, quæ in eodem subiecto una insunt, in aliis separatim deprehenduntur, eorum unum per alterum non determinatur (§. 507. Log.).

Quomodo in notescat, quæ per se invicem non determinentur.

Kkk 3

§. 128.

§. 128.

Alius modus.

Si quæ in eodem subiecto una insunt, eorum unum alio tempore non inesse observatur; ea quoque per se invicem non determinantur (§. 120. 127.).

Calorem in lapide, qui durus est, hoc tempore observamus; alio autem eundem frigidum deprehendimus: unde apparet, calorem per duritiam minime determinari.

§. 129.

Unde colligatur, quod quid sit ratio sufficiens alterius.

Si vel demonstratione, vel experientia patet, ideo esse A, quod ponatur B; ipsum B erit ipsius A ratio sufficiens (§. 113. 114. 116.).

Amplissimi usus est theorema præfens, quod ita quoque enunciari poterat: *Quo posito aliquid ponitur, illud ejus ratio sufficiens est.* Unde simul patet (§. 279. Log.), quod sit propositio conversâ superioris (§. 118.), quæ posita ratione sufficiente id poni ostendimus, quod per eam potius est, quam non est.

§. 130.

Quando ratio sufficiens sit definitio, quando ab ea diversa.

Si vel demonstratione vel experientia patet, subiecto absolute posito, vel sub adjectâ conditione conveniendi prædicatum: in priori casu ratio sufficiens, cur prædicatum subiecto tribui debeat, est definitio, in posteriori conditio adjecta (§. 126. 114. 116.).

§. 131.

Quid posita definitione vel determinatione subiecti ponatur.

Igitur posita definitione ponuntur prædicata subiecto absolute tribuenda, & posita conditione seu determinatione subiecti ponitur quoque prædicatum sub eadem eidem tribuendum (§. 130. add. §. 118.).

CAPUT III. DE NOTIONE ENTIS.

§. 132.

Cur impossibile existere non possit.

Quod impossibile est, existere nequit. Conf. §. 79. 30. 28. 27.

§. 133.

§. 133.

Quod possibile est, illud existere potest. Vid. §. 85. 30. 28. Cur possibile
§. 6. 70. 85. existere possit.

Qui simpliciter affirmat, possibile existere posse, is existentiam possibilis possibilem adeoque a contradictione liberam pronunciat (§. 85.). Non igitur alia re opus est, ubi propositionem præsentem demonstrare volueris, quam ut ostendas, existentiam non repugnare notioni possibilis, quemadmodum notioni impossibilis repugnat vi demonstrationis propositionis præcedentis (§. 132.).

§. 134.

Ens dicitur, quod existere potest, consequenter cui existentia non repugnat (§. 85. *Ontol.* & §. 308. *Log.*). Entis definitio.

§. 135.

Quoniam illud existere potest, quod possibile est (§. 133.); quod possibile est, ens est (§. 134.). Quod omne possibile ens sit.

Notio nimirum entis notioni possibilis superaddit potentiam seu possibilitatem existendi & quidem necessario superaddit, propterea quod ea ex possibilis notione fluat. atque adeo posita possibilitate rei, ponatur etiam ejus existendi possibilitas (§. 133.). Possibile adeo & ens non prorsus synonyma sunt (§. 325. *Log.*).

§. 136.

E contrario cum existere nequeat, quod impossibile est (§. 132.); quod impossibile est, ens esse nequit (§. 134.). Quod impossibile non sit ens.

§. 137.

Non Ens dicitur, quod existere nequit, consequenter cui existentia repugnat (§. 79. *Ontol.* & §. 308. *Log.*). Non entis definitio.

Non entia igitur non sunt. quæ non existunt, veluti fructus futuræ astaris, nec unquam existent, veluti spica latentes in seminibus frugum, quæ consumuntur, propterea quod nec istis, nec his existentia repugnat. Sunt vero non entia bilineum rectilineum & ferrum argenteum, propterea quod existentia iisdem repugnat, seu positis notionibus deceptricibus bilinei rectilinei & ferri argentei tollatur possibilitas existendi.

§. 138.

§. 138.

Quod impos-
bile sit non
ens.

Quoniam, quod impossibile est, existere nequit (§. 132.), *impossibile non ens est.*

Demonstravimus supra (§. 101.) impossibile esse nihilum: alio tamen respectu nihilum, alio non ens appellatur. Nihilum nempe est quod impossibile, quatenus eidem nulla respondet notio (§. 57.), consequenter omnis ex ejus notione deceptrice excluditur realitas: alio non ens dicendum, quod impossibile, quatenus ex eadem excluditur in specie existendi possibilitas basis actualis realitatis.

§. 139.

Notio entis
usui loquendi
conformis.

Notio entis, definitio quam dedimus, communi usui loquendi conformis. Quicquid existere observamus, ubi generis vel speciei, ad quam spectat, nomen nobis vel ignotum est, vel non succurrit, ens appellamus. Quoniam adeo, quod nobis obvium est, adentium classem referimus, propterea quod existit; non alia entis notione utimur, quam quod illud existat (§. 344. Log.). Enimvero qui ex eo infert ipsum A esse ens, quia existit; is etiam ens concipere valet per id, quod existere potest. Et enim ex eo, quod existit, sequitur, quod existere possit, consequenter inde porro infertur, quod sit ens (§. 344. Log.). Notio igitur nostra entis communi usui loquendi in eo casu non repugnat, ubi ens appellamus, cui conveniens generis vel speciei nomen ignoramus. Loquimur etiam in communi sermone de *entibus præteritis atque futuris*; entibus autem non minus præteritis, quam futuris, non actualis, sed possibilis tantum existentia competit, atque adeo entia vocantur, non quia existunt, sed quia vel extiterunt, vel extitura sunt, consequenter, quia existentia iisdem non repugnat. Huc porro pertinet, quod factus imaginationis entium nomine dignemur, non quod existant, sed quod iis existentia minime repugnare videatur.

§. 140.

Entis ficti de-
finitio.

Id, cui existentiam non repugnare sumimus, utut revera eidem repugnet, *Ens fictum* appellatur.

Sumimus ideo eidem non repugnare existentiam, quod idem pro possibili habeamus (§. 133.), non advertentes contradictionem in notio-
ne

ne ejus deceptrice latentem (§. 85.). E. gr. Trunco corporis humani jungimus caput bovinum & pedes equinos, quod & pingi, & sculpi potest. Nemo tamen facile sibi persuaserit, attentione sufficiente usus, fieri posse, ut istiusmodi homo existeret. Quoniam tamen nec impossibilitas demonstrari potest, existentia eidem non repugnare sumitur, ubi non satis attenti sumus, atque ideo in entium numerum refertur: sed cum perperam id fiat, ideo ens fictum appellatur.

§. 141.

Ens imaginarium appeilo, quod notione imaginaria exhibetur. Entis imaginarii definitio.

• Entia istiusmodi imaginaria sunt infinite parva Mathematicorum, quorum maxima in inveniendis utilitas. Differunt entia ficta ab imaginariis: id quod ex definitionibus eorundem inter se collatis patescit, modo ex superioribus (§. 110.) repetamus, quid sibi velit notio imaginaria

§. 142.

Si ens quoddam concipiendum, primo loco in eo ponenda sunt, quæ sibi mutuo non repugnant, quæ tamen non per alia determinantur, nec quorum unum per alterum determinatur. Cum enim ens ita concipi debeat, ut existentia eidem non repugnet, seu ut existere posse intelligatur (§. 134.); ante in eodem concipienda sunt, per quæ possibile intelligitur (§. 133.), consequenter quæ sibi mutuo non repugnant (§. 85.). Quodsi jam quædam poni concipias, quæ per alia determinantur; hæc quidem determinantia sunt, illa vero determinata (§. 114.), consequenter illa demum his positis ponuntur (§. 115.). Ens igitur concepturus primo loco ponere debes, quæ per alia non determinantur, sed aliis nondum positis intrinsicis poni possunt. Quodsi denique unum eorum, quæ ponuntur, per alterum determinatur; istud denuo determinatum, hoc determinans est (§. 114.), consequenter hoc posito ponitur illud (§. 115.). Quamobrem cum ens concepturi quæramus, quidnam sit primo loco ponendum, non vero quid eodem posito una ponatur, vi eorum quæ demonstrata sunt; inter ea, quæ sibi mutuo non repugnant, hoc in casu referenda non sunt, quæ per alia determinantur.

(*Ontologia contracta*.)

LII

Id

Id nunc agimus, ut, supposita entis definitione nominali (§. 134.), notionem entis evolamus. Ostendendum igitur est, quomodo ea, quæ enti conveniunt, determinentur. Quare cum idem ab initio tanquam omnimode indeterminatum speciemus, ut, qua ratione diversæ determinationes successive accedant, appareat; idem notione imaginaria instar receptaculi nobis exhibemus, cui quilibet indere licet.

§. 143.

Essentiæ defini-
tio.

Quæ in ente sibi mutuo non repugnant, nec tamen per se invicem determinantur, *essentialia* appellantur atque *essentiam entis* constituunt.

E. gr. In moralibus demonstratur, non repugnare ut actio legi naturali conformis ex habitu voluntatis proficiatur, *conformitas tamen actionis cum lege naturali & habitus voluntatis* per se invicem minime determinantur, consequenter *essentialia virtutis* sunt & *virtutis essentiam* constituunt.

§. 144.

Cur essentia
primum, quod
de ente con-
cipitur.

Essentia primum est, quod de ente concipitur, nec sine ea ens esse potest (§. 142 seq.).

§. 145.

Quænam præ-
ter essentialia
enti constan-
ter insint.

Si quid per essentialia determinatur, id enti constanter insint esse debet (§. 119. 144.).

Id constanter inesse dicimus, quod inest, quamdiu ens existit. E. gr. *Trianguli æquilateri essentialia* sunt tria latera æqualia & per ea tres anguli æquales determinantur. Quamdiu igitur trianguli latera æqualia sunt, hoc est, quamdiu triangulum æquilaterum est, tamdiu quoque tres ejus sunt anguli & anguli singuli inter se æquales sunt.

§. 146.

Attributorum
definitio & di-
vilio.

Quæ per essentialia determinantur, dicuntur *Attributa*. Quodsi quid per omnia essentialia simul sumta determinatur, *Attributum dicimus proprium*; si vero per quædam eorum determinatur, *Attributum commune* appellamus.

E. gr. Tria latera æqualia absolvent essentialia *trianguli æquilateri*, ut adeo in essentialibus ejus habeatur & numerus ternarius, & ratio æqualitatis laterum. Ideo quod figura rectilinea tria habet latera, tres
etiam

etiam angulos habere debet, atque adeo numerus ternarius angulorum per numerum ternarium laterum (§. 113.), consequenter per quendam essentialia determinatur. Numerus igitur ternarius angulo; non est attributum commune trianguli æquilateri. E contrario figura rectilinea ideo tres habet angulos inter se æquales, quia tria habet latera & latera ista inter se æqualia sunt (§. 186. Geom.), consequenter æqualitas angulorum & per æqualitatem & per numerum ternarium laterum determinatur (§. 113.), adeoque per omnia essentialia simul. Tres igitur anguli inter se æquales sunt attributum proprium trianguli æquilateri.

§. 147.

Si quid per essentialia non determinatur, iisdem tamen non repugnat; id enti inesse potest, etsi actu non insit; si vero iisdem repugnat, enti inesse nequit. (Conf. §. 307. Log. & §. 144. 115. Ont.). Quænam præter essentialia inesse enti possint.

E. gr. Lapidi non repugnat, ut fiat calidus: calidus ergo fieri potest. Repugnat vero eidem, ut sit aëre specificè levior: Ergo nullo modo fieri potest, ut salva ejus essentia fiat eodem specificè levior, hoc est, ut lapis permaneat, nec tamen hoc obstante specificè levior aëre reddatur.

§. 148.

Quod essentialibus non repugnat, per essentialia tamen minime determinatur, *Modus* a nobis dicitur. Scholastici *Accidens* appellant idque prædicabile. Log. §. 66. Modi vel Accidentis definitio.

§. 149.

Quicquid enti inest, id vel inter essentialia, vel attributa, vel modis locum habet. Vid. §. 53. 146. 143. 148. Quænam sint ea, quæ enti inesse possunt.

§. 150.

Attributa enti constanter insunt; modi inesse & non inesse possunt. Lege §. 146. 145. 148. 147. Attributa eue constanter insunt, modi non item.

§. 151.

Quæ enti modo insunt, modo non insunt, ea inter modos referri debent. Conf. §. 149. 144. 150. Modi unde agnoscantur.

§. 152.

Quæ constanter insunt, nec per alia, quæ simul insunt, determinantur, ea in essentialium numero sunt: quæ vero constanter insunt Essentialia & attributa unde agnoscantur.

insunt & per alia, quæ simul insunt, determinantur, attributa sunt.
 Vid. §. 150. 149. 146. 143.

§. 153.

Unde possibi-
 litas entis.

Per essentiam ens possibile est. Vid. §. 143. Ont. & 307. Log.
 it. 30. 144. 85. Ont.

Pater adeo essentiam entis possibilitate ejus intrinseca absolvi.

§. 154.

Quomodo ef-
 fentiam agno-
 scamus.

Cum essentia entis possibilitate ejus intrinseca absolvatur
 (§. 153.); *essentiam entis intelligit, qui possibilitatem ejus intrin-*
secam agnoscit.

Ita essentiam trianguli æquilateri is demum tenet, qui non solum no-
 vit, triangulum æquilaterum tribus lateribus inter se æqualibus termina-
 ri, sed & vi constructionis intelligit non repugnare, ut tres lineæ rectæ
 inter se æquales ita invicem jungantur, ut spatium comprehendant.
 Etenim tum demum agnoscit notionem trianguli æquilateri, seu spatii
 tribus lineis rectis inter se æqualibus terminati esse a contradictione libe-
 ram, consequenter intrinsecam istius figuræ possibilitatem agnoscit.

§. 155.

Idem porro
 ostenditur.

Essentiam entis intelligimus, quam primum modum, quo
fieri potest, intelligimus (§. 154.), consequenter per definitionem
geneticam (§. 192. Log. add. §. 92. Ont.).

§. 156.

Essentialium
 ratio intrinse-
 ca nulla.

Cur essentialia enti insunt, ratio intrinseca nulla datur (§.
142. §. 56. Ont. & §. 974. Log.).

§. 157.

Attributorum
 ratio quænam.

Cur attributa insunt, ratio sufficiens in essentialibus conti-
netur (§. 146. 113. 56. Ont. & §. 202. Log. idem patet ex §. 146.
114. 116.).

§. 158.

Attributorum
 communium
 ratio.

Cur attributa communia insunt, ratio sufficiens in quibus-
dam essentialibus continetur (§. 146. 114. 116.).

§. 159.

Attributorum
 propriarum
 ratio.

Cur attributa propria insunt, ratio sufficiens in omnibus ef-
sentialibus simul sumtis continetur (§. 146. 114. 116.).

§. 160.

§. 160.

Cur modi inesse possint, ratio sufficiens in essentialibus continetur (§. 148. Ont. 307. Log. 56. Ontol.): *cur vero actu insint, ratio vel in modis antecedentibus, vel in ente alio ab eo, cui insunt, diverso aut pluribus istiusmodi entibus, vel denique partim in modis antecedentibus, partim in ente alio ab eo, cui insunt, diverso, vel pluribus etiam entibus aliis querenda.*

Modorum
ratio.

Si ratio cur modus insit in ente ipso continetur, in modo antecedente vel pluribus modis antecedentibus contineatur necesse est. Etenim in essentialibus ratio esse nequit (§. 116. 148.) neque in attributis (§. 146. 113. 148.). Quod si ratio intrinseca nulla detur, cum sine ratione sufficiente nil quicquam esse possit (§. 70.); ea contineatur necesse est in ente alio ab eo, cui modus inest, diverso. Quod si aliquid rationis intrinsece detur, sed quæ ad determinandum modi actum sola non sufficit; ut actu insit aliquid præterea rationis extrinsece accedere debet, consequenter ratio sufficiens partim in modis antecedentibus, partim in ente alio aut pluribus aliis ab eo, cui modus inest, diversis continetur.

§. 161.

Entia illa, quæ ab alio ente dato diversa sunt, externa appellamus, respectu nimirum hujus entis, quod modo quocunque ad ista referimus.

Entium
externorum
definitio.

§. 162.

Si ratio, cur modus enti actu insit, partim in modis antecedentibus, partim in entibus externis continetur; per modos antecedentes solos tantummodo determinatur proprius possibilitas illius (§. 56. Ont. & §. 307. Log. 86. Ont.).

Modi
unius
possibilitas
per alios
modos
determinata.

E. gr. Corpus humanum datur per structuram organicam & mixtionem fluidorum ac solidorum, quemadmodum infra patebit. Ex iis tantum a priori intelligitur, præviis quibusdam mutationibus aliis ab hac vel ista causa morbifica datum quendam morbum produci posse, qui absente illa dispositione intrinseca produci nequit. Pater adeo ubi jam præviis quibusdam in corpore humano mutationibus effecta fuit quædam ad morbum dispositio, facilius utique fieri posse, ut homo in morbum incidat, quam ubi ista adhuc absuerit. Vi structuræ corporis &

mixtio-

mixtionis partium solidarum & fluidarum possibilis est ad morbum dispositio & hac praesupposita ipse morbus, qui causa externa accedente actu adest. Confirmantur hic dicta experientia, quando observamus, eandem causam externam non producere in omni corpore morbum, quem in uno efficit, veluti cum videmus, cibum quandam uni esse salutarem, aut saltem innocuum, qui alteri fuerat nocuus.

§. 163. *

Casualitas.

Quodsi ratio sufficiens, cur modus quidam enti insit, in pluribus modis antecedentibus contineatur, ita ut modus quidam praesens vi anteriorum determinet quendam alium, modus hic praesens vicem entis externi in casu praecedente subit, cetera in utroque casu eadem sunt. Patet igitur in hoc quoque casu per modos anteriores solos, ultimo nondum posito, tantummodo propius determinari possibilitatem ejus modi, qui rationem sufficientem in pluribus antecedentibus habet (§. 162.).

§. 164.

Modorum
possibilitate
quamnam
attributi instar
sit.

Modorum possibilitas, quorum ratio in essentialibus continetur, inter attributa referenda. Conf. §. 56. 113. 146.

E. gr. Divisibilitas parallelogrammi per diagonalem in duas partes aequales determinatur per parallelismum laterum parallelogrammi eorumque numerum (§. 335. 337. Geom.) atque adeo ejus attributum est.

§. 165.

Quenam sit
attributum
proprium;
quamnam com-
mune.

Modorum possibilitas, quorum ratio sufficiens in omnibus essentialibus simul suntis continetur, est attributum proprium; quorum vero ratio in nonnullis essentialibus continetur, est attributum commune. Vid. §. 56. 113. 146. Add. §. 154. Log.

§. 166.

Modorum
possibilitas
inter modos
referenda.

Si ratio sufficiens, cur modi inesse possint, in modis aliis continetur; eorum possibilitas in numerum modorum referenda (§. 56. 151. add. Log. §. 155.).

§. 167.

Quorum in
essentia ratio
continetur.

In essentia entis continetur ratio eorum, quae praeter eam eidem

eidem vel constanter insunt, vel inesse possunt. Vid. §. 149. 156. 157. 160. 150.

§. 168.

Essentia definiri potest per id, quod primum de ente concipitur & in quo ratio continetur sufficiens, cur cetera vel actu insint, vel inesse possint (§. 156. 144. 162.).

Definitio-
sentis nomi-
nalis.

§. 169.

Notio ista essentia, quod sit primum, quod de ente concipitur, & ceterorum, cur insint, vel inesse possint, rationem continet, est notioni philosophorum conformis.

Illius cum
notione Phi-
losophorum
conformitas.

§. 170.

Quod existit, id est possibile. Conf. §. 53. 132.

Idem vulgo ita effertur: *Ab esse ad posse valet consequentia*, seu, quod perinde est, *ab existentia ad possibilitatem valet consequentia*. Atque hinc patet modus cognoscendi a posteriori, quoniam possibilia sunt.

Principium
possibilitatem
a posteriori
cognoscendi.

§. 171.

Quod possibile est, id non ideo existit. Ponamus quod possibile est, id ideo quoque existere; nunc vide (§. 90. 91.).

Possibilitas ad
existendum
insufficiens.

Vulgo propositio ita effertur: *A posse ad esse non valet consequentia*, seu, quod perinde est, *a possibilitate ad existentiam non valet consequentia*.

§. 172.

Hinc consequitur *possibilitatem existentiam non determinari* (§. 113.); cumque adeo possibilitas non sit determinans, nec existentia determinatum (§. 114.), patet porro, *possibilitatem non esse rationem sufficientem existentia* (§. 116.), atque adeo ex eo, quod aliquid possibile a priori agnoscatur, nondum intelligi, cur existat (§. 56.).

Ratio existen-
tia sufficiens
in possibilita-
te non con-
tenta.

§. 173.

Præter possibilitatem entis aliud quid adhuc requiritur, ut existat (§. 70. 171. 179.).

Principium
existentia de-
finiendæ.

§. 174.

§. 174.

Definitio existē-
tiaz.

Hinc *Existētiā* definitio per complementum possibilitatis: quam definitionem nominalem esse patet (§.188. *Log.*), & ad recte philosophandum utilem ipso opere experiemur. Dicitur existētia etiam *Actualitas*.

§. 175.

Definitio entis actualis & potentialis.

Ens, quod existit, dicitur *ens actuale*, vel etiam *ens actū*: quod vero ad alia existētia relatum in iis habere potest rationem sufficientem existētiæ suæ, *ens potentiale* seu *ens potentia* appellamus.

E. gr. *Arbor*, quæ ex semine prognata in molem excrevit, existit atque adeo *ens actuale* est. Quodsi vero consideremus semen vi structuræ suæ esse fecundum, arbor in eadem delitescens existētiæ non repugnat. Quodsi porro perpendamus, istud solo fertili committi posse, quod & pluvia, & rore irrigatur & calore solis fovetur; arborem ex eodem prognasce & perinde ac alias arbores existētes in molem excrecere posse intelligimus. *Arbor igitur in semine delitescens, quatenus per entia alia existētia ad actum deduci potest, est ens potentiale.*

§. 176.

Entis in potentia proxima & remota definitio.

Si entia illa jam existunt, in quibus alterum rationem sufficientem existētiæ suæ habet, seu brevius, si ens potentiale rationem sufficientem existētiæ suæ habet in entibus actualibus; *ens* dicitur in *potentia proxima*: si vero entia illa nondum existunt, in quibus rationem sufficientem existētiæ suæ alterum habet, seu brevius, si ens potentiale rationem sufficientem existētiæ suæ in entibus potentialibus habet, *ens* dicitur in *potentia remota*.

E. gr. *Arbor latens in semine* fecundo est *ens actuale in potentia proxima*. Existere enim potest, si solo fecundo committatur semen, quod statō tempore pluvia ac rore irrigatur radiisque solis fovetur. Existit solum fecundum & cum natura statō tempore pluvias ac rorem producat, perinde est ac si actu existerent ros & pluvia, consequenter respectu seminis terræ committendi pro actualibus habentur, aut saltem probabiliter pro talibus sumuntur. Enimvero si assensus propositioni

tionem cuidam dandus *per demonstrationem extorquendus*, nec forma demonstrationis genuina fuerit *perspecta*, nec principia demonstrandi jam certa; erit *is ens in potentia remota*: etenim & idea formæ demonstrationis, quæ animo ad assensum perducendo observari debet, & assensus certus, qui principii præbendus, cum nondum existant, entia potentialia sunt.

§. 177.

Dantur autem gradus potentiae existendi remotæ, ita ut ens unum existentiae dato graduum numero propius censi possit, quam alterum. Etenim *si entia illa, in quibus ens quoddam datum rationem existentiae suæ habet, nonnisi successive existant; tanto existentiae propius habetur, quo plura illa intermedia præextiterint*: quod recte fieri vel inde patet, quia alias diversa a se invicem discerni non possunt.

Gradus potentiae existendi remotæ

E. gr. Filius & Nepos a *Sempronio* jam pubere progignendi entia potentialia sunt, cum is gignendi potentia præditus uxorem ducere possit, quam non esse sterilem supponimus, quod probabiliter talis præsumatur. Quodsi quem suppositio turbet, is supponat *Sempronium* & viduam, quam ducere valet, juvenulam in brevi matrimonio generandi potentiam probasse. Jam si ex hoc matrimonio prognatus filius uxorem ducat, ex eo demum *Sempronio* nascetur nepos. Patet vero *Filius & Nepotem Sempronii ab actu existendi non eodem intervallo reineri*: Filius enim existere potest, si *Sempronius* ducat uxorem, at nepos existere nequit, nisi præextiterit filius atque is eodem uxorem duxerit.

§. 178.

Si ens in potentia remota rationem existentiae sufficientem nonnisi in serie entium sibi mutuo succedentium habet; ipsum quidem existere nequit, nisi integra ista entium series præextiterit.

Modus quo ens in potentia remota successive ad actum deducitur.

Propositio præsens est notio communis, juxta quam vulgo judicant omnes de existentia entis in potentia remota. Etenim si quæsieris, an pronepos existere possit *Sempronii*, nisi præextiterit nepos & filius ejusdem; nemo non affirmabit, impossibile esse ut pronepos *Sempronii* nascatur, antequam nati fuerint filius & nepos.

SECTIO III.

DE

GENERALIBUS ENTIS
AFFECTIONIBUS.

CAPUT I.

DE IDENTITATE ET SIMI-
LITUDINE.

§. 179.

Affectionum
entis definitio.

Per *affectiones entis* intelligimus quævis ipsius prædicata, quorum ratio vel in essentia sola, vel una in aliis ab eadem diversis continetur, sive ea enti intrinseca fuerint, sive extrinseca.

§. 180.

Quænam ex
sub se comple-
stantur.

Affectiones cum attributa, tum modos, consequenter omnia prædicata intrinseca sub se complectuntur §. 149. 157. 160.)

Latius tamen patet affectionis, quam attributorum & modorum simul sumtorum nomen, cum etiam prædicata extrinseca sub isto comprehendantur, quæ respectum quandam entis unius ad alterum involvunt, veluti cum unum altero majus vel minus dicitur.

§. 181.

Identitatis de-
finitio.

Eadem dicuntur, quæ sibi invicem substitui possunt salvo quocunque prædicato; quod unius eorum vel absolute, vel sub data conditione convenit. Facta nimirum substitutione perinde esse debet, ac si nulla facta fuisset.

Si ponamus, mortuo *Cajo* doctori publico succedere *Titium*, atque hunc publico munere docendi ita defungi, ac si *Cajus* adhuc eodem fungeretur; erit *Titius* idem doctor, qui fuerat *Cajus*, nempe ratione publici docendi muneris *Cajus* & *Titius* iidem censentur.

§. 182

§. 182.

Numero vero idem est, quod de se ipso affirmari potest in singulari, seu quod bis existere repugnat. Dicitur etiam Idem ipsum. Numero idem quod sit.

E. gr. *Hoc triangulum* de seipso prædicari potest, cum hoc triangulum sit hoc triangulum, non aliud, idem etiam bis existere nequeat; est igitur *numero idem*.

§. 183.

Diversa sunt, quæ sibi invicem substitui nequeunt salvo omni prædicato, quod uni eorum vel absolute, vel sub data conditione tribuitur. Facta nimirum substitutione prædicata unius vel repugnant alteri, vel saltem non conveniunt. Diversi definitio.

§. 184.

Numero contra diversa sunt, quorum unum de altero in singulari affirmari nequit, seu quorum unumquodque propriam sibi habet existentiam. Numero diversorum definitio.

E. gr. Sint duæ personæ *Joannes* atque *Jacobus*: evidens est, dici non posse *Joannem* esse *Jacobum*, nec *Jacobum* esse *Joannem*. Inde adeo intelligitur, *Joannem* esse a *Jacobo* & *Jacobum* a *Joanne* diversum. Idem etiam exinde intelligis, quod *Jacobus* propriam sibi habeat existentiam perinde ac *Joannes*.

§. 185.

Notio identitatis & diversitatis, quam dedimus, est usui loquendi conformis atque communis. Notio identitatis & diversitatis usui loquendi conformis.

§. 186.

Quæ eadem sunt, ea sub communi quadam notione continentur (§. 181. Ont. & §. 282. Log.). Communis notio eorundem.

E. gr. Pondera discernimus per rationem ad pondus aliquod datum, quod *libra*, vel *uncia* appellari solet. Communis adeo ponderum eorundem notio est, quod habeant ad *libram*, vel *unciam* eandem rationem, nempe pondus trium librarum idem est cum alio pondere trium librarum; pondus septem unciarum idem est cum pondere alio septem unciarum, quatenus unumquodque eorum spectatur ut pondus, hoc est, ut massa determinatæ gravitatis. Quodsi fuerint pondera duo trium librarum, quorum alterum ex plumbo, alterum ex lapide factum, etiam

Mmm 2

vulgo

vulgo utrumque idem pondus appellamus reddentes hanc rationem, quod utrumque sit trium librarum.

§. 187.

Identitas ex
notione com-
muni collecta. *Quæ sub notione quadam communi continentur, ea eadem sunt (§. 130. 181.).*

§. 188.

Termini iden-
titatis vi no-
tionis com-
munis. *Quæ sub notione quadam communi continentur, ea sibi mu-
tuo possunt substitui respectu eorum, quorum in illa ratio sufficiens
continetur (§. 187. 130.).*

Mixtice hoc principium cognitionem humanam amplificat, dum co-
gnitionem singularem & particularem ad universalem & univer-alem ad
terminos legitimos reducit, ultra quos eam extendere non licet. E. gr.
Plumbum in aqua amittit aliquam ponderis sui partem, Plumbum hic
consideratur tanquam solidum grave & aqua tanquam fluidum grave &
illud quidem tanquam hoc specificè gravius, cum ratio ponderis amissi
deprehendatur in eo, quod plumbum sit solidum specificè gravius flu-
ido, in quo demergitur. Patet adeo, quod plumbo quodvis corpus so-
lidum grave & aque quodvis fluidum solido specificè levius substitui pos-
sit, atque adeo recte colligatur, quodvis solidum grave in fluido speci-
fice leviori ponderis sui partem amittere.

§. 189.

Quid ex iden-
titate rationis
sufficiens in
duobus cas-
bus sequatur. *Si in duobus casibus eadem ratio sufficiens ponitur, in utro-
que etiam idem propter eam est, seu, quod in uno casu vi illius
fuit, etiam in altero vi ejusdem esse debet. Vid. §. 181. 118.*

Si experientia observavimus, aquam in ahenò igni superimpositam
ebullire; statim hinc colligimus, si denuò aqua in ahenò igni superim-
ponatur, eam denuò ebullire debere. Etenim cum posita ratione suf-
ficiente ponatur id, quod per eam potius est, quam non est (§. 118.),
dum aquam in ahenò igni superimpositam ebullire observamus, ut aqua
ebulliat rationem sufficientem esse existimamus, si in ahenò igni super-
imponatur. Quamobrem cum colligamus, aquam in alio casu itidem
ebullire debere, si ea in ahenò igni superimponatur; ecquis non videt,
nos hoc colligere vi notionis, quod eadem ratione sufficiente iterato
posita, denuò etiam poni debeat, quod in altero casu vi ejusdem erat.

§. 190.

§. 190.

Si duo vel plura entia eandem essentiam habent, quæ uni eorum constanter insunt, ea etiam alteri constanter inesse debent, & quæ uni inesse possunt, etiam alteri inesse possunt (§. 189. item §. 167. §6.).

Prædicata entium ejusdem essentia.

E. gr. Duo triangula æquilatera eandem essentiam habent (nor. §. 143.); sed quodvis etiam eorum tres habet angulos inter se æquales & quodvis eorum per altitudinem in duo triangula congruentia resolvitur potest (§. 185. Geom.), quodvis eorum circulo inscribi potest (§. 297. Geom.).

§. 191.

Si duo vel plura entia eandem definitionem habent, eadem ipsis conveniunt prædicata absoluta & sub eadem conditione eadem quoque prædicata hypothetica (§. 130.).

Prædicata entium ejusdem definitionis.

§. 192.

Si determinantia fuerint eadem, determinata quoque eadem sunt (§. 181. 28.).

Identitas determinantium.

§. 193

Si determinata fuerint eadem, determinantia quoque eadem sunt (§. 181.).

Identitas determinantium.

Theorema præseus non abhorret a notione communi. Etenim æquilibrium determinatur per pondus in altera lance tanquam contrapondium positum. Enimvero si pondera A & B tanquam contrapondia sibi mutuo substituuntur, salvo æquilibrio; ex identitate determinati, quod hic est æquilibrium, colligimus identitatem determinantium, nempe ponderum A & B.

§. 194.

In omni propositione vera eadem semper ratio est, cur prædicatum subiecto conveniat in casu singulari. Etenim in propositione universaliter affirmante vera (§. 480. Log.), consequenter & in particulari (§. 481. Log.), prædicatum per subiectum ejusque determinationem, seu per notionem subiecti (§. 33. Log.) determinatur. Est igitur notio subiecti determinans, prædicatum, quod eidem tribuitur, determinatum (§. 114.). Quare cum determinans sit ratio sufficiens determinati (§. 116.) &

Ratio cur prædicatum subiecto conveniat quando eadem.*

MMM 3

si de:

si determinatum idem est, determinans quoque idem esse debeat (§. 193.); in propositione vera eadem semper esse debet ratio, cur prædicatum in casu singulari subiecto conveniat.

E. gr. Pone quotlibet triangula, eadem semper erit ratio, cur tres habeat angulos eosque duobus rectis æquales unumquodque eorum, nempe numerus ternarius & species laterum, quod ea sint lineæ rectæ. Atque in eo consistit fundamentum veritatis propositionum universalium: etenim si idem prædicatum subiecto tribui posset ob rationes diversas, propositiones universales condere minime daretur.

§. 195.

Similitudinis
definitio.

Similia sunt, in quibus ea eadem sunt, per quæ a se invicem discerni debebant: ut adeo *similitudo* sit identitas eorum, per quæ entia a se invicem discerni debebant. Entibus autem a se invicem discernendis destinantur intrinseca, quæ sine alio extra eadem assumpto intelligi possunt. Alias enim nec differentia alteri explicari, nec ens obvium a nobis agnosci poterit, nisi detur illud extrinsecum, sine quo intelligi nequit.

E. gr. Sint duo ædificia prorsus similia A & B. *Cajus* architecturæ peritus & in templum A intrans in charta singula studio singulari annotet, quæ tenere debet architectus, ut ædificium extruere possit, nulla tamen adhibita mensura extrinseca, sed ad magnitudinem in ædificio assumptam determinata ratione ceterorum. Intret deinde etiam in templum B & eadem industria singula annotet, quæ tenenda sunt architecto ædificium excitaturo, ratione omnium, quæ insunt, magnitudinum ad aliam in ædificio pro mensura assumptam determinata. Jam duas hæc schedas monstret *Sempronio*, architecto itidem perito, ut eas inter se conferat dicturus, quanam spectet templum A, quanam vero alterum B. Quoniam prorsus eadem sunt, quæ in utraque scheda leguntur, fieri nullo modo poterit, ut quæsito satisfaciatur. Immo eadem de causa fieri potest, ut *Cajus* ipse obliviscatur, quanam contineat ea, quæ in templo A, annotata sunt; quanam vero ea, quæ a templo B desumpta.

§. 196.

Quoniam quantitas dari equidem, sed per se intelligi non potest; *similia salva similitudine quantitate differre possunt*. Per se autem patet, quod nec similitudo immutetur, si ejusdem fuerint quantitatis, consequenter quod *similia eandem quantitatem habere possint*.

Intrinsicum
diferimen,
quod in simi-
lia cadit.

§. 197.

Si *similia simul presentia fistantur, unum ab altero extrinsece distinguere licet, per loca scilicet, quæ occupant*. Et si enim intrinsicè nihil reperias, unde duo entia a se invicem distincta esse colligas A & B, quæ similia sunt (§. 195.); cum tamen impossibile sit ut idem numero bis existat (§. 182.), ea duo entia a se invicem distincta, seu numero diversa esse colligis, quod & A, & B scorsim existere deprehendis (§. 184.).

Similia quo-
modo distin-
guantur, ubi
presentia fue-
rint.

§. 198.

Quod si *similia, quæ simul presentia fistantur, quantitate differant, cum majus a minore ipso sensuum judicio discernere valeamus, quantitate eadem a se invicem distinguere licet*.

Modus discer-
nendi similia
quantitate
differentia.

§. 199.

Quod si *similia, quæ sensui simul non obijciuntur, quantitate differant, & qui unum eorum videt, idem ad quantitatem aliquam presentem refert, ad quam antea retulit alterum, quod nunc absens est; praesens ab absente quantitate distinguere valet*. Vid. *Aritbm.* §. 131. 203.

Alter modus.

Si ædificia A & B similia, quantitate seu magnitudine differunt, ea in casu theorematum praesentis ita a se invicem distingues. Ponamus ædificium A esse majus ædificio B. Dum ædificium A contemplaris altitudinem januæ ad staturam tuam refers, cumque eandem majorem esse deprehendis, mox partem, qua staturam excedit, cum eadem statura comparas, ut ejus ad eandem, consequenter ipsius altitudinis januæ ad eandem ratio vel exacta, vel prope vera innotescat. Ubi ingrederis ædificium B, in janua constitutus denuo excessum altitudinis ejus supra staturam tuam ad staturam refers, qui cum minor sit exces-
su

su altitudinis januæ prioris, ad eandem rationem minorem habere debet (§. 203. *Arithm.*). Unde cum colligis altitudinem januæ in ædificio B minore esse altitudine januæ in ædificio A; ædificium A ab ædificio B diverſum eſſe agnoſcis, quamvis præter quantitatem intrinſecum diſcrimen nullum adſit.

§. 200.

Similia abſentia quæcunque quomodo diſtinguantur.

Quodſi ſimilia quæcunque ſenſui ſimul non obijciuntur, unum eorum ab altero diſtingui poteſt, quod per rationes quæcunque extrinſecas patet, ea in diverſis locis, vel diverſo tempore exiſtiſſe. Vid. §. 197. 182. 184.

§. 201.

Quot modis ſimilia diſtingui poſſint.

Similia non poſſunt diſtingui, niſi unum alteri immediate, vel utrique idem aliquod tertium applicando. Sint duo entia ſimilia A & B. Quoniam intrinſecum diſcrimen nullum eſt, niſi quantitas (§. 195. 196.), hæc ipſa tamen ſalva ſimilitudine eadem eſſe poteſt (§. 196.); A & B vel quantitate differunt, vel non. Quodſi eadem quantitate non differant, omni intrinſeco diſcrimine deſtituuntur. Quando igitur de iſdem cogitas, aut ea ſenſui ſimul obijciuntur, aut minus. Quodſi A & B ſenſui ſimul obijciantur, & quantitate non differant, deficiente intrinſeco diſcrimine per *demonſtrata*, diſtingui aliter haud poterunt quam ex eo, quod unumquodque eorum ſeorſim ab altero exiſtat, ſeu per loca, quæ occupant, unde nimirum ſeparata exiſtentia colligitur (§. 197.). Diſtinguitur adeo A & B, dum unum alteri immediate applicas.

Quodſi quantitate differant A & B, & ſenſui ſimul obijciantur, ea quantitate diſtinguis (§. 198.), dum ſcilicet unum ad alterum refertur atque ex mutua collatione eorundem colligis, unum altero eſſe majus. Denuo igitur A & B diſtinguis, dum unum alteri immediate applicas.

Enimvero ſi utriusque quantitatem refertur ad eandem tertiam datam & ea mediante concludis, unum altero eſſe majus (§. 199.), A & B diſtinguis utrique idem tertium applicando.

Quodſi A & B ſenſui ſimul non obijciantur, ſed quantitate differant; ea diſcernere licet quantitate, dum utriusque ratio

ratio ad eandem data examinatur (§. 199.), consequenter A & B distinguuntur utrique idem aliquod tertium applicando.

Denique si A & B sensui simul non objiciantur, at quantitate eadem sint, eadem distinguere non licet, nisi quatenus per rationes extrinsecas docetur, quod vel diversis in locis, vel diverso tempore extiterint (§. 200.), adeoque menti una præsentia exhibentur ipsorum notionibus, quæ eadem sunt (§. 195. 196.), aliis a se invicem diversis associatis, ut adeo tanquam duæ entia a se invicem diversa mente simul præsentia exhibeantur (§. 183.). Distinguuntur itaque A & B unum alteri immediate applicando.

§. 202.

A & B similia videntur, ubi nullum discrimen intrinsecum præter quantitatem, aut provus nullum deprehendimus, etsi tale adfit. Vid. Ont. §. 195. & Log. §. 344. Quænam similia appareant.

§. 203.

Notio similitudinis, quam dedimus, est usui loquendi conformis. Notio similitudinis usui loquendi conformis.

§. 204.

Omnia similia eandem essentiam habent. Conf. §. 168. 56. 113 sq. 162. 195. 193. Similia cur non sint nisi entia ejusdem essentia.

Inde est, quod similitudo non subsistat nisi inter entia, quæ vel ad eandem speciem, vel ad idem genus sive propinquum, sive remotum referuntur, nec similitudo extendatur ultra limites, quam fert notio communis, sub qua comprehenduntur.

§. 205.

In essentiis similibus essentialia similia esse debent (§. 195. 204. 192. 201.). Essentialium similitudo in similibus.

§. 206.

Si essentialia singula entis unius A fuerint similia essentialibus singulis entis alterius B, & quæ in conjunctione utrobique prodeunt relationes naturæ eadem fuerint in A & B; essentialia ipsius A similia sunt essentialibus alterius B: in casu opposito essentialia non erunt similia (§. 195.). Essentialium similitudo.

(Ontologia contracta.)

Nnn

§. 207.

§. 207.

Similitudo
sublata in simi-
lium combi-
natione.

Non minus patet propositionem generalibus ita offerri posse, seposita essentiae notione, quæ illam non ingreditur: *si entia plura fuerint inter se similia singula singulis, jungantur vero A, B & C, itidemque a, b & c, & alia fuerint relationes ipsius A ad B, quam a ad b, B ad C quam b ad c, C ad A, quam c ad a & c. vel minimum binæ quæcunque in una combinatione diversam habeant ad se invicem relationem, quam binæ quæcunque in altera, similia A, B & C in sua conjunctione non similia sunt simul similibus a, b & c in altera, seu quod ex combinatione resultat in uno casu non simile est ei, quod ex eadem resultat in altero.*

§. 208.

Diversitas ista
in quo proprie
consistat.

Quoniam similia differre nequeunt nisi quantitate (§. 196.), *relationes similiarum conjunctorum diversæ in duobus vel pluribus casibus a quantitate eorundem diversæ resultare debent, consequenter cum illarum relationes, quæ quantitatem unius ex quantitate alterius sine tertio homogeneo assumpto determinant, adeoque entibus distinguendis inservire queunt, etiamsi nec unum alteri immediate, nec utrique aliquod tertium applicetur, dicantur rationes (§. 126. Arithm.), sunt diversæ rationes quantitatis homogeneorum ad se invicem.*

E. gr. Cum rhomboides construi nequeat, nisi duabus datis lineis rectis cum angulo intercepto (§. 341. Geom.); in duobus casibus diversis non alia differentia assignari potest, quam quæ a quantitate linearum & anguli intercepti resultat, atque adeo in ratione illarum ad se invicem & in ratione hujus ad rectum vel, quod communiter obtinet (§. 59. 144. Geom.), in ratione ad quatuor rectos consistit.

§. 209.

Essentiam ean-
dem & diver-
sam, similem
& dissimilem
quænam ha-
beant.

Eandem essentiam habere dicuntur, quæ eandem definitionem geneticam habent, seu A & B eandem essentiam habent, si modus, quo fieri posse concipitur A, etiam convenit in B. Contra *similem essentiam* habere dicuntur A & B, si essentialium, per quæ determinatur A, quantitates eandem ad se invicem rationem habent, quam habent essentialium iisdem respondentium quantitates, per quæ determinatur B. Unde simul patet, quod
diversam

diversam essentiam habeant, quæ definitionem geneticam diversam habent, seu A & B diversam habere essentiam, si modus, quo fieri posse concipitur A, non convenit in B: & quod *diffimilem essentiam* habeant A & B, si essentialium, per quæ determinatur A, quantitates diversam ad se invicem habent rationem, quam quantitates essentialium iisdem respondentium, per quæ determinatur B.

§. 210.

Similitudo entium, quæ per similitudinem essentialium inest, seu quæ in similitudine essentialium & eorum, quæ per essentialia determinantur, consistit, dicitur *essentialis*: quæ vero aliunde iis superaccedit, *accidentalis*. Similitudinis essentialis & accidentalis definitio.

E. gr. Ad similitudinem triangulorum pertinet angulorum lateribus proportionalibus comprehensorum æqualitas, seu eadem eorundem ad quatuor rectos ratio. Enimvero trianguli essentialia sunt tres lineæ, ex quibus constructur, & identitas rationis laterum in duobus triangulis similitudinem essentialium constituit, per quam essentia ipsa similis evadit, quæ eadem dicebatur in utroque triangulo. Quare cum æqualitate laterum angulorum æqualitas determinetur eaque ad similitudinem essentialem pertineat; hæc ipsa angulorum æqualitas cum laterum eos comprehendentium proportionalitate essentialem triangulorum constituit similitudinem. Quodsi jam duo triangula similia in charta descripta fuerint & aream utriusque eodem colore tingas; accidentalis inde nascitur similitudo, quæ in scientiis non attenditur, cum nulla triangulorum qua talium cognitio inde pendeat.

§. 211.

Diffimilia dicuntur, in quibus ea diversa sunt, per quæ a se invicem discerni debent: ut adeo *diffimilitudo* sit diversitas eorum, per quæ entia a se invicem discerni debent. Diffimilitudinis definitio.

§. 212.

Quoniam diversa sunt, quæ non sunt eadem (§. 181. 183.), Alia *diffimilia* quoque *definiri possunt* per ea, in quibus ista non sunt eadem, per quæ a se invicem discerni debent (§. 211.), consequenter *quod non sint similia* (§. 195.). Alia definitio.

§. 213.

Diffimilia ejus-
dem essentia.

*Diffimilia eandem essentiam habere possunt, sed non simi-
lem.* Fieri enim potest ut A & B eandem definitionem gene-
ticam habeant, ea tamen, quæ eandem ingrediuntur, respectu
quantitatis diversam ad se invicem habeant rationem. Cum igitur
eandem essentiam habeant, quæ eandem definitionem gene-
ticam habent; dissimilem vero, in quibus essentialia, seu ea, quæ
eandem ingrediuntur in diversa sunt ratione (§. 209.); A & B
eandem essentiam, sed non similem habent.

§. 214.

Diffimilia di-
versæ essentia.

Quæ diversam essentiam habent, ea sunt diffimilia. Conf.
§. 181. 183. 204. 212.

E. gr. Triangulum & figura polygonæ regularis non eodem modo
construuntur (§. 205. 352. *Geom.*). Essentiam igitur diversam habent.

§. 215.

Quænam eo-
dem modo de-
terminantur.

*Eodem modo determinatur A & B, si modus, quo deter-
minatur A, substitui potest modo, quo B determinatur, ita ut fa-
cta substitutione perinde sit, ac si A suum determinandi modum
retinuisset.*

§. 216.

Identitas de-
terminationis
in essentia si-
milibus.

*Quoniam ea, quæ similem habent essentiam, non modo
genesin eandem habent, sed essentialium quoque quantitates in
eandem ad se invicem ratione (§. 209.); quæ essentiam similem ha-
bent, eodem modo determinantur.*

§. 217.

Similitudinis
principium.

Quæ eodem modo determinantur, similia sunt. Conf. §.
211. 215. *Ontol.* & §. 197. 202. *Log.* Idem patet ex §. 114. 215. 211.
193. Denique idem intelligitur ex §. 114. 215. 192. 195.

§. 218.

Diffimilitudo
unde oriatur.

Quæ diverso modo determinantur, ea diffimilia sunt. Conf.
§. 183. 215. 192. 211.

Quadratum construitur junctis quatuor rectis inter se æqualibus ad
angulos rectos (§. 338. *Geom.*); triangulum vero tribus rectis ita junctis;
ut spatium comprehendant (§. 205. *Geom.*); ut adeo Quadratum per
nume-

numerum quaternarium & æqualitatem laterum atque angulos; triangulum per numerum ternarium laterum determinetur. Modus adeo, quo determinatur Quadratum, minime substitui potest modo, quo determinatur triangulum, consequenter triangulum & quadratum diverso determinantur modo (§. 215.), atque ideo similia non sunt, sed dissimilia.

§. 219.

Quæ partim eodem, partim diverso modo determinantur, ea in aliquibus conveniunt, in aliquibus differunt (§. 215. 192.). Similitudo partialis unde.

Nascitur hinc similitudo partialis, quæ cum dissimilitudine consistit. Etsi autem similitudines istiusmodi partiales non attendendæ videantur; contrarium tamen constabit ex iis, quæ de generibus ac speciebus entium deinceps dicturi sumus. Ex hac propositione intelligitur, undenam sit, quod entia habeant prædicata partim communia, partim diversa.

§. 220.

Quæ similia sunt, ea eodem modo determinantur (§. 218.). Similium determinatio.

idem dicitur directe ex §. 195.

§. 221.

Quæ dissimilia sunt, ea diverso modo determinantur (§. 217.). Dissimilium determinatio.

§. 222.

Notio similitudinis, quam dedimus, est praxi Mathematicorum conformis. In Actis Eruditorum A. 1715. p. 213. & seqq. ostendi, quomodo eadem notio similitudinis ad determinandas quoque similitudines curvarum adhibeatur: quæ ea fini etiam usi sumus in nova Elementorum Matheseos editione.

Notio similitudinis praxi Mathematicorum conformis.

§. 223.

Quæ eadem sunt eidem tertio, ea sunt eadem inter se. Sing. Identitas duorum cum eodem tertio.

A & B eadem eidem tertio C; dico esse etiam A & B eadem. Quoniam enim A & C eadem sunt per hypotesin; A ipsi C eo eventu substitui potest, ut perinde sit ac si substitutio nulla facta fuisset (§. 181.). Sunt vero etiam B & C eadem, per hypotb. Quare cum A substitui possit ipsi C eo eventu, ut perinde sit ac si substitutio nulla facta fuisset, per demonstrata; substituatur

Non 3

in

in casu altero, ubi B & C eadem sumuntur, A ipsi C, nec alium ad B forrietur respectum, quam quem ad idem habuerat C. Erat vero C idem cum B *per hypotb.* Ergo etiam B idem cum A.

Principium hoc utilissimum in arte inveniendi. Utilitatem autem sine multo acumine prævidere licet ei, qui in Mathesi cum attentione versatus. Principium enim Mathematicorum, quod deinceps occurret, æqualia eidem tertio sunt æqualia inter se, tanquam casus specialis sub generali continetur sub præsentē. Illud vero multi ac diffusissimi usus est per omnem Mathesin, ipsam quoque Algebram, quæ Ars inveniendi Mathematicorum est.

§. 224.

Similitudo
deorum cum
eodem tertio.

Quæ similia sunt eidem tertio, ea similia sunt inter se. Sint A & B similia eidem tertio C, dico esse etiam A simile ipsi B. Quoniam enim A est simile ipsi C *per hypotb.* ea, quæ insunt ipsi C, eadem sunt cum iis, quæ insunt ipsi A (§. 195.). Similiter quia B simile est eidem C, *per hypotb.* ea, quæ insunt ipsi C, eadem quoque sunt cum iis, quæ insunt ipsi B (*f. cit.*), nempe præter quantitatem in utroque casu non attendendam (§. 196.). Sunt igitur ea, quæ ipsi B insunt, eadem cum iis, quæ insunt ipsi A (§. 223.), consequenter A & B similia sunt (§. 195.).

CAPUT II.

DE ENTE SINGULARI ET
UNIVERSALI.

§. 225.

Entis omnimode
determinati defini-
tio.

E*Ns omnimode determinatum* dicitur, in quo nihil concipitur indeterminatum, quo nondum determinato cetera, quæ insunt, actu esse nequeunt. Pone entem A inesse C & B atque his positum actu inesse debere vel D, vel E: dicitur A esse omnimode determinatum si eidem præter C & B etiam insit D.

§. 226.

§. 226.

Quicquid existit vel actu est, id omnimode determinatum est. Instar axiomatis sumi potest vi definitionis omnimode determinati (§. 225.).

Omnimode determinata quænam sint.

§. 227.

Cum entia singularia existant, evidens est, *Ens singulare, five Individuum* esse illud, quod omnimode determinatum est.

Entis singularis definitio.

§. 228.

Per *Principium individuationis* intelligitur ratio sufficiens intrinseca individui. Scholasticis idem venit nomine *Hæcceitatis*. Quamobrem per *principium individuationis* intelligitur, cur ens aliquod sit singulare (§. 56.).

Principii individuationis definitio nominalis.

§. 229.

Principium individuationis est omnimoda determinatio eorum, quæ enti actu insunt (§. 227 (q. Ont. & §. 344. Log.).

Quidnam illud sit.

§. 230.

Ens universale est, quod omnimode determinatum non est, seu quod tantummodo continet determinationes intrinsecas communes pluribus singularibus, exclusis iis, quæ in individuis diversæ sunt.

Entis in universali definitio.

§. 231.

Quodsi determinationes pluribus individuis communes ita fuerint comparatæ, ut aliis manentibus iisdem aliæ tamen differre possint; determinationes istæ, quæ eædem manent, constituunt notionem *entis magis universalis*: ut adeo appareat dari universalitatis entium gradus, & unum ens universale esse *universalius* altero.

Ens universalius quodnam sit.

E. gr. Innumera dantur triângula, quorum latera sunt in ratione æqualitatis, nec minus innumera sunt, quorum in ratione inæqualitatis sunt latera, cum in utroque casu infinitæ dentur rationes laterum ad eandem quantitatem datam, immo multis nominibus infinitæ, cum infinitus sit non modo rationum irrationalium, sed & singularum specierum rationum rationalium numerus (§. 142. & seqq. *Aritbm.*).

Conven-

veniunt istæ triangulorum singularium cohortes in eo, quod in utraque figura tribus lineis terminetur, seu laterum numerus sit ternarius. Eadem igitur determinatio cum subsistat, siue ratio laterum sit ratio æqualitatis, siue ratio inæqualitatis; triangulum in genere, quod triangula & æquilatera, & scalena sub se comprehendit, ac præterea alia, nempe æquicrura, est ens magis universale, quam æquilaterum & scalenum.

§. 232.

Unde constituantur universalia.

Entia universalia constituuntur similitudine partiali individuorum, vel minus universalium, seu eo, quo unum individuum alteri individuo, vel ens unum minus universale alteri minus universali simile est (§.195. 230 sq.).

§. 233.

Species quid sit.

Entium singularium similitudo est id, quod *speciem* appellamus.

Facile autem apparet, similitudinem hic tantummodo intelligi partialem, quæ subsistit per determinationes intrinsecas communes, quamdiu ultimæ seponuntur, quibus ens in universali in singulare abit.

§. 234.

Generis definitio.

Similiter *Genus* est similitudo specierum. *Genus* autem *superius* est similitudo generum inferiorum. Dantur autem generum superiorum gradus. Conf. §. 43 sqq. 70 sqq. *Log.*

§. 235.

Ens universale cur existere nequeat.

Ens universale existere nequit (§. 230. 226. Ont. & §. 55. Log.).

§. 236.

Determinationum species.

Determinationes, quæ notionem generis ingrediuntur, dicuntur *genericæ*; quæ notionem speciei absolvunt, *specificæ*; quæ denique in notione individui continentur, *determinationes singulares*. Nonnunquam *determinationes* genericæ & *specificæ* simul vocantur *universales*.

§. 237.

Quomodo se se ad se invicem habeant.

Quoniam species ea continet, quæ individuis communia sunt (§. 233.); genus autem, quæ communia sunt speciebus, & genus

nus tandem Superius, quæ generibus inferioribus communia sunt (§. 234.); igitur *determinationes specificæ sunt simul determinationes singulares & determinationes genericæ sunt simul determinationes specificæ* (§. 236.).

§. 238.

Determinationes communes sunt, quæ individuis & speciebus, vel speciebus & generi, vel generibus inferioribus & generi superiori simul insunt, seu quæ simul insunt inferioribus & superiori, sub quo continentur; determinationes autem propriæ, quæ inferioribus tantum insunt, non autem superiori, sub quo eadem continentur, veluti quæ insunt tantum singularibus, non autem speciebus, vel insunt tantum speciebus, non autem generi, vel denique generibus inferioribus tantum insunt, non autem superiori.

Determinatio-
nim commu-
nium & pro-
priarum diffe-
rentia.

§. 239.

Determinationes individuis propriæ sunt id, quod differentia numerica appellatur: determinationes autem speciebus propriæ sunt, quod differentia specificæ vocatur.

Differentiæ
numerice &
specificæ qua-
ritam.

§. 240.

Notio individui componitur ex notione speciei, sub qua continetur, & differentia numerica (§. 236. 238. 237. 239.).

Notio indivi-
dui qualis.

§. 241.

Notio speciei componitur ex notione generis, sub quo ea continetur & differentia specificæ. Conf. §. 236. 239.

Notio speciei
qualis.

§. 242.

Quoniam genera inferiora eodem modo referuntur ad superius, cui subsunt, quo species ad suum genus (§. 234.), atque adeo determinationes quoque iisdem propriæ sunt instar differentiarum specificarum (§. 238.); evidens omnino est, quod *notio generis inferioris componatur ex notione generis superioris & determinationibus sibi propriis.*

Notio generis
inferioris qua-
lis.

§. 243.

Quicquid est vel esse posse concipitur, dicitur *Res*, quatenus est aliquid: ut adeo *Res* definiri possit per id, quod est aliquid. Unde & *realitas* & *quidditas* apud scholasticos synonyma sunt.

Rei definitio.

(*Ontologia contracta.*)

ooo

§. 244.

§. 244.

Quo respectu
entia in spe-
cies & genera
distribuantur.

Dum igitur entia in genera & species distinguuntur, ea tanquam res consideramus (§. 232. & seqq.).

Distinguuntur enim in sua genera & species secundum id, quod sunt, non vero ideo, quia existunt.

§. 245.

Notiones in-
dividui, speciei
ac generum
praxi commu-
ni conformes,

Notiones individui, speciei atque generum sunt notiones communes, quibus vulgo utimur in distingendis entibus. Vid: Melancthon in Grammat. lat. l. 2. c. 2. p. m. 9.

§. 246.

Praxique Ma-
thematico-
rum.

Notiones individui, speciei atque generis sunt praxi Mathematicorum conformes.

§. 247.

Unde genera
& species de-
terminantur.

Genera & species per essentialia determinantur. Conf. §. 142 sq. Quicquid enti inest, id vel inter essentialia, vel inter modos locum habet (§. 149.). Quare cum in essentialibus continetur ratio sufficiens, cur attributa insint (§. 157.), vel modi inesse possint (§. 160.), consequenter quamprimum essentialia in ente quodam ponuntur, simul quoque attributa ponantur & quoniam in eo possibiles sint modi determinentur (§. 118.); attributa & modi, quatenus enti convenire possint, essentialibus sine ratione ad determinandum genera & species jungerentur, consequenter genera, & species per essentialia sola determinantur. Vid. Log. §. 69.

§. 248.

Determina-
tiones univer-
sales quales
sint.

Determinationes generica & specifica, sive universales, ex essentialibus constant. Conf. §. 247. 236.

§. 249.

Possibilitatis
modorum
species.

Possibilitas modi dicitur proxima, quæ rationem sufficientem in essentialibus vel attributis habet: remota vero, quæ eandem in modis quibusdam præcedentis simul agnoscit.

§. 250.

Quales sint.

Quoniam modorum possibilitas, quorum ratio sufficiens in essentialibus continetur, attributum est (§. 164.); quorum vero

vero sufficiens ratio in modis aliis reperitur, in numerum modorum referenda (§. 166.); *possibilitas modi proxima est entis attributum, remota modus* (§. 249.). Cumque constanter verum sit, modum, qui rationem sui sufficientem in alio præcedente agnoscit, esse possibilem, si qui præcedere debet actu in ente inesse supponatur; *possibilitas modi remota instar attributi considerari potest, si consideremus, quod inexistere possit, ubi alius ante inexistit, consequenter si ejus possibilitatem conditionate enunciemus.*

E. gr. Lapis non habet vim calefaciendi, nisi cum ipse fuerit calidus. Vis adeo calefaciendi rationem habet in modo alio præexistente, consequenter potentia calefaciendi est possibilitas modi remota in lapide. Quod si tamen ea non concipitur nisi in lapide calido, ut adeo modus, quo determinatur ejus possibilitas, una consideretur; haberi potest ea attributum lapidis calidi, nempe attributum non in omni statu, sed in quodam determinato.

§. 251.

Ignoratis essentialibus determinationes genericæ & specificæ ex attributis & modorum possibilitatibus proximis, vel remotis conditionate enunciatis constitui possunt. Cum enim attributa per essentialia determinentur (§. 146.), atque adeo essentialia determinantia sint, attributa vero determinata (§. 114.); positis in ente essentialibus ponuntur quoque attributa (§. 115.). Quoniam adeo attributa essentialibus in rebus a se invicem discernendis substituere licet, determinationes vero genericæ & specificæ, quibus genera & species distinguuntur (§. 236.), ex essentialibus constant (§. 248.), determinationes genericæ & specificæ ex attributis constitui possunt. Jam cum modorum possibilitates proximæ sint attributa; remotæ autem si conditionate enuncientur attributis æquipollean (§. 250.); ignoratis essentialibus determinationes genericæ & specificæ etiam ex modorum possibilitatibus proximis, nec non remotis conditionate enunciatis constitui possunt.

E. gr. Essentialia, quibus triangulum rectilineum determinatur, sunt tria latera spatium comprehendentia & determinationes adeo genericæ trianguli rectilinei sunt numerus ternarius laterum & species linearum,

O o o 2

quod

Quando determinationes universales ex attributis condere liceat.

quod nimirum ex rectis sint. Inter attributa refertur æqualitatis ratio, quam habent omnes anguli simul ad duos rectos. Hæc ipsa vero æqualitas cum linearum specie pro determinationibus genericis trianguli rectilinei assumi poterat, si supponamus ignorari determinationes essentialibus constantes.

§. 252.

Differentia
specifica qua-
lis sit.

Differentia specifica constat ex essentialibus; iis tamen ignoratis ex attributis modorumque possibilitatibus proximis & remotis conditionate enunciatis constitui potest. Differentia enim specifica constat ex determinationibus speciei propriis (§. 239.), adeoque iis, quæ speciei tantum insunt, non generi simul (§. 238.), consequenter quæ in specificarum numero sunt (§. 236.); determinationes autem specificæ omnes ex essentialibus constant (§. 248.). Ergo etiam differentia specifica ex essentialibus constat.

Quoniam tamen ignoratis essentialibus determinationes specificæ ex attributis modorumque possibilitatibus proximis & remotis conditionate enunciatis constitui possunt (§. 251.); essentialibus ignoratis differentia etiam specifica ex attributis modorumque possibilitatibus proximis & remotis conditionate enunciatis constitui potest.

§. 253.

Quousque in-
dividua, spe-
cies & genera
inferiora eo-
dem modo de-
terminantur.

Omnia individua, quatenus sub eadem specie continentur, & omnes species, quatenus eidem generi subsunt, omnia item genera inferiora, quatenus sub eodem superiori comprehenduntur, eodem modo determinantur. Conf. §. 233. 235. 220.

§. 254.

Essentialia sin-
gularibus, spe-
ciebus & gene-
ribus interio-
ribus commu-
nia.

Quia genera & species per essentialia determinantur (§. 247.), singularia eadem essentialia habent, quatenus sub eadem specie continentur, & species atque genera inferiora eadem essentialia habent, quatenus istæ sub eodem genere, hæc sub eodem genere superiori continentur. Vid. §. 248. 237.

§. 255.

Fons diversa-
rum specie-
rum & gene-
rum interio-
rum.

Species & genera inferiora differunt per essentialia, quæ manentibus essentialibus ceteris iisdem diversimode determinari possunt.

possunt. Vid. 241. 247. 252. de speciebus; §. 233 sq. 241 sq. de generibus inferioribus. Adde Log. §. 71.

§. 256.

Differentiæ specificæ plurium specierum, quæ sub eodem genere continentur, sigillatim generi suo minime (§. 241. Ont. 307. Log.), simul tamen eidem repugnant (§. 254. 28. Ont. & §. 307. Log.).

Differentiæ specificæ quales.

§. 257.

Quoniam notio individui componitur ex notione speciei, sub qua continetur, & differentia numerica (§. 240.), quemadmodum notio speciei ex notione generis, sub quo ea continetur & differentia specifica (§. 241.); igitur eodem prorsus, quo ante, modo ostenditur, *differentias numericas plurium individuum dissimilium sub eadem specie contentorum sigillatim speciei suæ minime, simul tamen eidem repugnare.*

Differentiæ numerice quales.

§. 258.

Singularia, quæ eandem genesin habent, seu eodem modo fieri posse concipiuntur, sunt ejusdem speciei. Conf. §. 209. 143. 247.

Singularia eandem genesin habentia quænam sint.

§. 259.

Singularia ejusdem speciei eandem genesin habent seu eodem modo fieri posse concipiuntur (§. 258.).

Singularia ejusdem speciei qualia sint.

§. 260.

Si res singularis actu gignitur vel fit; nihil in determinati genesin ingredi potest (§. 226.).

Genesis rei aQualis qualis sit.

§. 261.

Ex rerum adeo singularium genesi omnium optime perspicitur, quænam determinationes sint numerice, quænam specificæ. Sunt nimirum *æ determinationes numerice, sine quibus genesi actu dari nequit; ex adverso autem specificæ sunt, per quas rei genesis sufficienter intelligi, non tamen actu dari potest (§. 259.).*

Determinationes quænam numerice & specificæ.

§. 262.

Geneseos singularis & communis differentia.

Genesis actualis sive *singularis* est, quam ingrediuntur determinaciones numericæ: *communis* vero, ex qua determinaciones numericæ exulant, seu quam nonnulli specificæ ingrediuntur. Quodli contingat, *genesin* adhuc intelligi posse, si vel maxime determinaciones speciei propriæ exulent, nec ingrediuntur eam nisi genericæ seu speciebus communes *genesis communis* dicitur *universalis*. Quando vero de eadem *genesis* loquimur, communem vel universalem intelligimus, prout casus tulerit, cum insuper habeamus determinaciones numericas.

§. 263.

Generum & specierum possibilitas unde innoscatur.

Generum & specierum possibilitas per genesin rerum sub iis contentarum agnoscitur. Genera & species determinantur per essentialia (§. 247.), consequenter per ea, quæ sibi mutuo non repugnant, per alia tamen, quæ simul insunt, non determinantur (§. 143.). Patet autem ea, quæ simul sumuntur a contradictione libera esse, si modus demonstrari potest, quod ens istiusmodi sit, cui simul sumta una insunt (§. 49.), consequenter ex rei illius *genesis* ejus possibilitas innoscitur (§. 85.).

Sane Geometræ vel per construcciones, vel per *geneses* figurarum ostendunt, istiusmodi figuras esse possibiles, quales per definitiones nominales ex essentialibus conditas determinantur.

§. 264.

Quænam ex *genesis* rerum adducantur.

Ex genesi rerum deduci possunt omnia, quæ vel conveniunt, vel convenire possunt cum speciei, tum generi dato. Per *genesin* rei generum & specierum possibilitas agnoscitur (§. 263.), adeoque per eam patet essentialia, per quæ genera & species determinantur (§. 247.), nullam contradictionem involvere (§. 85.), consequenter simul eidem subjecto inesse posse (§. 28. 30.). Enimvero cum ratio sufficiens in essentialibus contineatur, cur attributa actu insint (§. 157.), sive communia fuerint (§. 158.), sive propria (§. 159.), modi vero inesse possint (§. 160.); per *genesin* rei intelligere licet, cur generibus & speciebus hæc vel ista conveniant.

veniant attributa, hi vel isti convenire possunt modi (§. 56.), consequenter per eam patet, quænam per essentialia determinantur (§. 146.), quænam iisdem non repugnent (§. 148.); aut quorum possibilitas per eadem determinetur (§. 85. 113.), atque ideo ex generali deduci possunt & quæ generibus ac speciebus conveniunt attributa, & qui iisdem convenire possunt modi. Jam vid. §. 149.

§. 265.

Quoniam ex definitionibus nominalibus ipsæ genericæ eruantur (§. 704. Log.), ex definitione autem generica, quæ generis rei distincte exponit (§. 192. Log.), omnia quæ eidem conveniunt vel convenire possunt deducuntur (§. 264.); ideo *dubitari nequit, ex definitione nominali omnia deduci posse, quæ rei conveniunt, vel convenire possunt.*

Quænam deducuntur ex definitionibus nominalibus.

Non tamen negamus, quod in logicis adstruximus (§. 188. 192. Log.), definitiones genericas eam habere prærogativam præ nominalibus, ut res definitas esse possibiles ex titis sine ulteriori probatione intelligatur, multaque subinde vel intuitiva ratione cognoscantur, quæ ex definitionibus nominalibus non sine ambagibus deducuntur. Habent tamen definitiones nominales præ realibus hanc vicissim prærogativam, ut res obviæ per eas facilius dignoscantur, quam per genericas. Quamobrem non inutiliter conjunguntur, nisi in usum posteriorem theorematum ex definitionibus genericis deducta, unde definitiones nominales condere licebat, adhibere velis: sunt enim revera theorematum, in quibus definitum prædicati locum obtinet, definitiones nominales (§. 1191. Log.).

§. 266.

Si essentialium homogeneorum quantitates, per quæ species determinantur, rationem eandem inter se habent; species limitata comprehendit ea, quæ similem essentialiam. Sint enim duo quæcunque individua A & B sub specie sic limitata comprehensa: cum singula, quæ in notione speciei continentur, individuis singulis sub eadem comprehensis insint (§. 240.); essentialium, per quæ determinatur A, quantitates eandem inter se rationem habent, quam habent essentialium iisdem respondentium, per quæ

Similitudo essentialitatis in eadem specie unde oritur.

B deter-

B determinatur, quantitates, *vi hypothef.* Pater adeo A & B, ac quævis individua alia sub specie eo modo limitata, quo in hypothefi exprimitur, contenta essentiam similem habere (§. 209).

§. 267.

Cur quantitas determinatio-
ne ex no-
tione entis
universalis
exulent.

Quoniam quantitatis non habetur ratio in generibus & speciebus constituendis, propterea quod non intelligi, sed tantummodo dari potest, atque adeo quantitatis determinatio ad numericas pertinet (§. 236.), non ad specificas, multo minus genericas; ideo ex *generis communi quantitatum determinationes exulant multoque magis ex universali, nec nisi singularem ingrediuntur* (§. 262.), consequenter ubi nulla proprius quantitatis ratio habetur, ibi nec ratio quantitatum homogenearum attendi potest. Unde porro patet, cur *quantitatum rationes ex notionibus generum atque specierum exulent.*

§. 268.

Quænam ea-
dem attributa
habeant.

Quæ sunt ejusdem speciei, eadem habent attributa & easdem modorum possibilitates proximas, itemque remotas conditione enunciatas. Conf. §. 247. 261. 146. 160. 250. 192.

§. 269.

Quænam ea-
dem attributa
communis
habeant.

Quæ sunt ejusdem generis, ea eadem habent attributa communia, easdemque modorum possibilitates, quæ attributorum communium instar sunt. Conf. §. 234. 247. 192. 146. 165.

§. 270.

Quænam sint
ejusdem spe-
ciei.

Quæ attributa propria eadem habent easdemque modorum possibilitates, quæ attributorum priorum instar sunt, ea ejusdem sunt speciei. Indirecte hæc patent ex §. 247. 114. 146. 193. 268. directe hæc demonstrari queunt ex §. 146. 165. 247. 193. 254.

§. 271.

Quænam ad
idem genus
referantur.

Quæ attributa communia eadem habent, aut easdem possibilitates modorum, quæ attributorum communium instar sunt, ea ad idem genus referuntur. Indirecta demonstratio pendet ex §. 247. 114. 146. 193. 269. directa vero ex §. 146. 165. 254.

CAPUT

CAPUT III.

DE NECESSARIO ET CONTINGENTE.

§. 272.

Per *Opposita* hic intelligimus, quorum unum involvit negationem alterius. Quamobrem cum fieri non possit, ut idem simul sit & non sit (§. 28.); *opposita vel simul esse, vel eidem enti simul inesse nequeunt*. Opposita ista, quæ simul esse nequeunt, dicuntur *contradictoria* (§. 30.); quæ vero eidem enti simul inesse nequeunt, *contraria*.

Oppositorum definitio.

E. gr. *Habere tres angulos & non habere tres angulos* sunt contradictoria; *habere tres angulos æquales & habere tres angulos inæquales* contraria sunt. *Tres adeo anguli & non tres anguli, tres anguli æquales & non tres anguli æquales* communi nomine opposita dicuntur.

§. 273.

Defectus alicujus realitatis, quæ esse poterat, seu quam esse per se non repugnat, *Privatio* dici solet. Quoniam defectus istiusmodi actu datur, ideo *per modum entis consideratur* (§. 134.). Defectus autem realitatis imitar entis considerari dicitur *Ens privativum*.

Privationis & entis privativi definitio.

E. gr. *Visus* est realitas, quæ homini & animalibus convenit. Fieri tamen potest, ut homo atque animal visu privetur. Defectus adeo visus appellatur *cæcitas* & *cæcitas* ens privativum dicitur.

§. 274.

Ens positivum dicitur, quod est aliquid, & rei nomine compellatur (§. 243.), in oppositione autem ad privativum positivum vocatur.

Entis positivi definitio.

Ita *visus* est ens positivum, neque enim nuda realitatis absentia determinatur, sed in realitatum numero ipsemet habetur (§. 243. 59.).

§. 275.

Quoniam idem simul ut sit & non sit nullo modo fieri potest (§. 28.), ens privativum autem realitatem, quæ veladerat, (*Ontologia contracta*)

Private oppositorum definitio.

P p p

vel

vel adesse poterat, tollit (§. 273.); ideo nec fieri potest, ut ens positivum &, quod ejusdem absentiam denotat, privativum simul sint, consequenter *ens positivum &, quod in ejus defectu consistit, privativum sibi mutuo opponuntur*. Dicuntur autem ens positivum &, quod ei respondet, privativum *privative opposita*.

E. gr. Luci tanquam enti positivo respondent tenebræ tanquam ens privativum. *Lux igitur & tenebræ sunt privative opposita*.

§. 276.

Cur enti privativo nullum conveniat prædicatum positivum.

Cum ens privativum non contineat nisi defectum quandam realitatis (§. 273.), atque adeo nihil in ejus notione ponatur, ob quod aliud quid de eodem affirmari possit; ideo patet, *enti privativo nullum competere posse prædicatum positivum*.

E. gr. De morte nihil positivi enunciari potest; si vero aliquando contingat verba esse positiva, notio tamen iisdem respondens nonnisi privativa erit, hoc est, dum de morte aliquid affirmare videmur, nullam realitatem ponimus, sed aliquam revera tollimus, aut ponimus realitatem, quæ poni nequit nisi alia sublata: id quod etiam in omni casu alio valet. Quando dicimus, *mortem injicere avaris terrorem*; morti tribuitur, quod eidem minime convenit. Avarus enim mortem cogitans sibi repræsentat defectum vitæ & securam inde corporis corruptionem, atque eidem necessario connexam opum, quas tam vehementer amat, jacturam. Terror igitur in mente nascitur, quod cum morte seu vitæ privatione opum tantopere adamatarum jacturam necessario conjunctam esse cogitat avarus. Nequaquam igitur hic morti tribuitur actio, tanquam realitas quædam eidem conveniens, qua in avaro producit terror; sed posita morte tanquam privatione ponuntur alia positiva, quæ cum ista coherent.

§. 277.

Entis privativi prædicata.

De ente privativo neganda sunt, quæ positivo, cujus absentiam denotat, conveniunt. Vid. §. 273 lq. 144. 146. 160. 113. 149.

E. gr. Tenebræ sunt ens privativum, quod luci opponitur. De tenebris adeo neganda sunt, quæ de luce affirmantur. Communis lucis notio habet, quod corpora nobis circumposita in conspectum producat; de tenebris adeo negandum est, quod hic de luce affirmatur.

Dicen-

Dicendum itaque in tenebris nihil videri posse, sed, quæ nos circumstant, corpora invisibilia esse. Lux a corporibus opacis reflectitur: tenebræ igitur ab iisdem reflecti nequeunt. Lux transiens per corpora pellucida diversæ densitatis refringitur: tenebræ adeo refractionis nesciæ sunt.

§. 278.

Habent adeo ens positivum & privativum, quæ sibi mutuo opponuntur, seu privative opposita contraria prædicata (§. 275. 277.). Qualia sunt.

§. 279.

Cujus oppositum impossibile, seu contradictionem involvit (§. 79.), id *Necessarium* dicitur. Necessarii definitio.

E. gr. Bis duo sunt quatuor & impossibile est, ut bis duo non sint quatuor. Igitur *bis duo necessario sunt quatuor.*

§. 280.

Quæ de numeris in Arithmetica, de figuris in Geometria demonstrantur; ea numeris & figuris necessario conveniunt. Enim cum theoremata geometrica & arithmetica non minus indirecte, quam directe demonstrari possint, sumto contrario tanquam vero legitima syllogismorum concatenatione tandem infertur conclusio, quæ vel hypothese, vel definitioni subjecti; vel propositioni alicui veræ contradicit (§. 524. Log.). Contrarium adeo ejus, quod in theorematibus mathematicis enunciat, impossibile est (§. 81.). Quamobrem quod in Mathesi de numeris & figuris enunciat, vel, quod enunciari possit, demonstratur, necessario iisdem convenit. Necessitas in veritatibus numerorum & figurarum.

§. 281.

Si qua subjecto necessario conveniunt; & directe, & indirecte demonstrari potest, quod eidem conveniant. Conveniat B necessario ipsi A; dico & directe, & indirecte demonstrari posse, quod B ipsi A conveniat. Quoniam enim B necessario convenit ipsi A per *hypoth.* impossibile est, ut eidem non conveniat (§. 279.). Posita ergo notione ipsius A, ponitur etiam ejus prædicatum B, consequenter B ideo affirmari debet de ipso A, quia eidem conveniunt, quæ in notione ejus continentur (§. 202.

Ppp 2

Log.);

Prædicata necessaria quomodo demonstrabilia.

Log.), adeoque B per ea, quæ in notione ipsius A involvuntur, determinatur (§. 113.). Quoniam adeo notio ipsius A est ratio sufficiens, cur eidem conveniat B (§. 116.); per eam intelligi potest, cur prædicatum B eidem conveniat (§. 56.). Quare cum in demonstratione directæ ex notione subiecti colligatur prædicatum convenire subiecto (§. 520. *Log.*), atque adeo per eam intelligatur prædicatum subiecto convenire debere; dubium superesse nequit, quin directæ demonstrari possit, quod B conveniat ipsi A.

Porro quoniam B necessario convenit ipsi A *per hypoth.* impossibile est, ut eidem non conveniat (§. 279.). Necessè igitur est, ut, si ponas, B non convenire ipsi A, ideam propositioni alicui veræ alteri contradicat, cum B ipsi A non repugnet (§. 79.). Quare cum vi demonstrationis apogogicæ detegatur, num, quod sumitur, contradictionem involvat (§. 46.); indirectæ demonstrari potest, B convenire ipsi A (§. 527. *Log.*).

Evidentiora hæc sunt, si ipsam demonstrandi formam cum ostensivam (§. 522. & sq. *Log.*), tum apogogicam (§. 524. *Log.*) attentius contempleris.

§. 282.

Quænam prædicata sint necessaria.

Si vel directæ, vel indirectæ demonstrari possit, prædicatum subiecto convenire, id eidem salva ejusdem notione necessario competit. Ponamus enim directæ demonstrari posse, B ipsi A convenire: designat autem A notionem subiecti, quæ constituitur per determinationes demonstrationem ingredientibus. Patet itaque ex forma demonstrationis directæ (§. 522. 523. *Log.*), iis de subiecto concessis affirmandum esse, quod prædicatum B ipsi A conveniat. Quamobrem cum impossibile sit, ut, iisdem de subiecto concessis, hoc est, notione subiecti salva, B ipsi A non conveniat (§. 28.), quæ propositioni, B convenit ipsi A, opponitur, scilicet B non convenit ipsi A (§. 272.), ea impossibilis est propositio. B igitur subiecto A (§. 279.) necessario competit, si directæ demonstrari possit, id eidem convenire, salva nimirum notione subiecti A, cum ea immutata demonstratio non subsistat, propterea quod omnes determinationes, per quas constituitur notio ipsius A, demonstrationem directam ingrediuntur (§. 522. 523. *Log.*).

Quodsi

Quodsi indirecte demonstrari possit, prædicatum B convenire subjecto A, e contrario, B non convenit ipsi A, tanquam vero assumpto, continua syllogismorum concatenatione inferitur tandem conclusio, quæ vel hypothese, vel definitioni, hoc est, notioni subjecti, vel veræ alicui propositioni contradicit (§. 524. Log.). Cum adeo propositio, quæ demonstrandæ opponitur (§. 272), contradictionem involvat; ea necessaria est (§. 279.), hoc est, necessario prædicatum convenit subjecto, salva ejus notione; si propositio, qua idem ei tribuitur, indirecte demonstrari possit.

§. 283.

Unicum dicitur id, cui simile non datur, vel quod sui simile non habet. Unici definitio.

Ita Titius est filius unicus Mavii, si Mavius præter Titium filium alium non habet, atque adeo non datur, qui perinde ac Titius filius Mavii appellari possit.

§. 284.

Quod necessarium est, id unico modo determinabile est. Vid. §. 279. 283. Necessarium unico modo determinabile.

§. 285.

Quod unico modo determinabile est, id necessarium est. Indirecte hæc discit ex §. 279 284. directe itidem ex §. 279. Unico modo determinabile est necessarium.

Est adeo determinabilitatis unicitas ratio necessitatis sufficiens (§. 56.), atque ideo exinde demonstrari potest, aliquid esse necessarium, quia idem aliter determinari repugnat. Quamobrem necessarium quoque definiri poterat, quod sit id, quod unico saltem modo determinabile, seu quod aliter determinari repugnat.

§. 286.

Quod possibile est, id necessario possibile est. Vid. §. 85. 28. Necessitas possibilis.
272. 279.

§. 287.

Quod impossibile est, id necessario impossibile. Vid. §. 79. Necessitas impossibilis.
28. 272. 279.

§. 288.

Principium
certitudinis
novo robore
auctum.

Quodlibet, dum est, necessario est. Vid. §. 28. 272.

279.

Canon hic est fundamentum certitudinis infallibilis cognitionis, quæ a posteriori acquiritur, & innotum præstat assensum, quem gignit principium certitudinis: *Quodlibet, dum est, est (§. 55.).*

§. 289.

Principii
rationis suffi-
cientis usus qui-
dam.

Quoniam nihil est sine ratione sufficiente, cur potius sit quam non sit (§. 70.); quodlibet, dum est, rationem sufficientem habet, cur sit potius, quam non sit. Quare cum ex ratione sufficiente intelligatur, cur aliquid sit (§. 56.); *ex ratione sufficiente etiam intelligitur, cur aliquid necessario sit, dum est.*

Ut igitur aliquid, dum est, necessario sit, id est a principio contradictionis; ut autem intelligatur, cur idem, dum est, necessario sit, id a principio rationis sufficientis pendet. E. gr. Dum lapis est calidus necessario calidus est, cum simul frigidus esse nequeat. Necessitas igitur caloris est a principio contradictionis. Enimvero cur nunc necessario sit calidus, nec frigidus esse queat, intelligitur vi principii rationis sufficientis, nimirum quod calori ignis per conveniens temporis spatium fuerit expositus. Quoniam vero non necessario calori ignis per tantum temporis spatium expositus fuit, ideo nec necessario calidus factus: est ubi calidus factus, necessario calidus est.

§. 290.

Metaphis de-
finitio.

Si in re quadam A pro aliquo B aliud C substitui, vel quod non inerat D iis, quæ insunt, superaccedere possit, ceteris, quæ in eadem re A insunt, E & F manentibus iisdem; dicitur cum B, tum ipsum etiam A *Mutable*. Unde *Mutabilitas* est possibilitas substitutionis alterius pro eo, quod est, vel accessionis ejus, quod non est, ceteris, quæ sunt, manentibus iisdem. Liquet hinc, quandonam *aliquid actum mutetur*, nempe *aliquid non amplius manet idem*, vel si sit, quod ante non erat; vel si non sit, quod ante erat; vel si sit aliud, quam ante erat (§. 181.).

§. 291.

§. 291.

Si in re quadam nihil insit, pro qua aliud substitui possit, iisdem manentibus ceteris, quæ eidem insunt, neque etiam iisdem non repugnantibus aliquid accedere queat; erit ea res, & id, cui nihil aliud substitui potest, in eadem *immutabile*. Unde *Immutabilitas* est impossibilitas substitutionis alterius pro eo, quod simul est, vel accessionis ejus, quod non est, ceteris, quæ simul sunt, manentibus iisdem.

§. 292.

Quod necessarium est, illud immutabile est. Conf. §. 290. *Necessarii immutabilitas.*
272. 279. ad indirectam, & §. 279. ad directam demonstrationem.

§. 293

Quod immutabile est, id necessarium est. Vid. §. 291. *Immutabilis necessitas.*
272. 279.

§. 294.

Contingens est, cujus oppositum nullam contradictionem involvit, seu quod necessarium non est (§. 279.). *Contingentis definitio.*

E. gr. *Calor lapidis* radiis solaribus expositi *contingens* est, neque enim impossibile est, ut calor absit & in ejus locum frigus succedat.

§. 295.

Quod contingens est, illud mutabile est (§. 294. 85. 272. *Contingentis mutabilitas.*
290.).

E. gr. *Calor lapidis* est contingens, sed idem mutabilis: qui enim est calidus, frigidus fieri potest.

§. 296.

Quod mutabile est, illud contingens est. Vid. §. 290. 272. *Mutabilis contingentia.*
30. 294.

§. 297.

Si determinans est, determinatum necessario est. Conf. *Nexus necessarius inter determinans & determinatum.*
§. 279. 113. pro indirecta, & §. 115. 28. 272. 279. pro directa demonstratione.

§. 298.

§. 293.

Nexus inter
rationem suf-
ficientem & id
quod per eam
est.

Quoniam determinantia sunt ratio sufficiens determinati (§ 116.); *Si ratio sufficiens est, illud necessario est, quod per eam potius est, quam non est* (§. 297. vid. etiam §. 1.8.).

§. 299.

Essentiarum
necessitas.

Essentie rerum sunt necessariae. Vid. §. 143. 28. 272. 279.

§. 300.

Essentia
immutabili-
tas.

Essentie rerum sunt immutabiles. Essentia rei constitui-
tur per determinatum quendam essentialium numerum (§. 143.);
quæ nempe genesi ejus determinandæ sufficiunt (§. 155. 261.).
Ponamus jam essentiali uni A substitui aliud D. Aut igitur
D ceteris essentialibus, quæ rei insunt, repugnat, aut non
repugnat (§. 53.). Ponamus D iisdem repugnare. Nihil er-
go essentiali A salvis ceteris substitui potest. Et cum idem
eodem modo arguatur de ceteris; evidens est, essentiam rei
esse immutabilem (§. 291.). Ponamus igitur porro D non
repugnare ipsi A, ad aliam ergo speciem pertinere, sub eo-
dem genere cum data specie contentam (§. 255.). Quamob-
rem cum sic species rei mutetur, essentia ejus immutabilis est
(§. 291.).

§. 301.

Rei absolute
& in hypothe-
si spectatz dif-
ferentia.

Res in se aut absolute spectari dicitur, si non attendimus
nisi ad essentiam ejus, seu, quæ ejus loco est, definitionem
ipsius. *Sub data autem conditione aut in hypothesi spectatur*, ubi
præter essentiam simul præsupponuntur determinationes aliæ,
quæ illa posita nondum ponuntur, sed quas poni saltem non re-
pugnat.

Hinc & in Logicis subiecto *absolute convenire* dicuntur prædica-
ta, quæ vi essentia aut ei succedaneæ definitionis eidem tribuenda
sunt. *Sub conditione autem convenire* dicimus subiecto prædicata,
quæ nonnisi aliis determinationibus essentia superaddentibus locum
habent. Et ideo illa *prædicata absoluta*; hæc *conditionata* appel-
lantur.

§. 302.

Id, cujus in se sive absolute spectati oppositum impossibile est, seu contradictionem involvit, dicitur *absolute necessarium*: illud vero, cujus oppositum non nisi in hypothefi data, seu sub data quadam conditione impossibile aut contradictionem involvit, *hypothetice necessarium* est.

Differen-
tia ne-
cessitatis abso-
luta & hypo-
thetica.

§. 303.

Essentia rerum sunt absolute necessariae. Sunt enim necessariae absolute spectatae, cum in earum necessitate demonstranda non supponatur nisi definitio (§. 299. 301.). Sunt igitur absolute necessariae (§. 302.).

Essentia qua-
lis conveniat
necessitas.

Cavendum vero est, ne vocem essentiae in alio sumas significatu, quam quem eidem in superioribus tribuimus (§. 143.). Quibus enim essentiarum absoluta necessitas adeo periculosa visa fuit, illi cum nonnullis Scholasticorum essentiam ita concepere, ut existentiam ad eandem pertinere existimaverint, quam nos ab eadem procul removemus.

§. 304.

Attributa rerum absolute necessaria sunt. Vid. §. 157. 118. 301. 28. 302. .

Attributorum
necessitas.

§. 305.

Modi possibilitatis proxima est absolute necessaria. (§. 250. 304. 249.).

Necessitas pos-
sibilitatis mo-
dorum proxi-
mae qualis.

§. 306.

Modi sunt hypothetice necessarij. Conf. §. 160. 118. 297. 302.

Necessitas
qualis modo-
rum.

§. 307.

Modorum possibilitas remota est hypothetice necessaria. Vid. §. 250. 306. 249.

Necessitas pos-
sibilitatis re-
mota.

Ita nonnisi hypothetice necessarium est, ut lapis calefacere possit, nempe si praesupponatur cum esse calidum.

§. 308.

Si existentiae ratio sufficiens in essentia entis continetur, ens necessario existit, estque existentia ejus absolute necessaria. Lege §. 56. 113. 146. 304. 302. 279.

Existentia
quando abso-
lute necessaria.

(Ontologia contracta.)

Q99

§. 309.

Entis necessarii definitio.

§. 309.
Ens necessarium est, cujus existentia absolute necessaria, seu, quod perinde est (§.308.), quod rationem sufficientem existentiae suae in essentia sua habet.

Entis contingentis definitio.

§. 310.
Cum contingens sit, quod necessarium non est (§. 294.); *Ens contingens* est, quod existentiae rationem sufficientem in essentia sua non habet, seu, quod rationem existentiae suae extra se in ente alio, aut in ente a se diverso habet. Definiri etiam potest, quod sit ens, quod necessarium non est (§.309.).

Divisio entium quoad existentiam.

§. 311.
Quoniam quodlibet vel est, vel non est (§. 53.); omne ens vel ens necessarium est, vel necessarium ens non est. Quamobrem cum ens contingens sit, quod necessarium non est (§. 310.); *ens omne vel est ens necessarium, vel contingens.*

Entia igitur quoad existentiam dividuntur in ens necessarium & contingens, nec plures hic species constituere licet.

Modorum & eorum, quae insunt modorum insunt, contingentia.

§. 312.
Modi rerum, nec non modorum possibilitates remotae contingenter insunt. Vid. §. 148. 297. 294. de modis, & §. 250. de modorum possibilitatibus.

Attributorum immutabilitas.

§. 313.
Attributa rerum modorumque possibilitates proximae in se immutabilia sunt. Conf. §. 304. 292. 301. 305.

Modorum mutabilitas.

§. 314.
Modi & modorum possibilitates remotae sunt mutabiles. Consule §. 312. 295. add. §. 250. 148. 115.

Fons absolutae & hypotheticae necessitatis.

§. 315.
Necessitas absoluta est, quae ex essentia entis oritur; quae vero aliunde provenit, non nisi hypothetica. Lege §. 149. 303. 307. 146. 249. 297 sq. de necessitate absoluta; & §. 148. 249. 297 sq. 160. 250. de hypothetica.

Entis contingentis existentia.

§. 316.
Ens contingens non nisi contingenter existit (§. 310. 298. 272. 294. Ont. & §. 275. Log. Idem patet ex collatione §. §. 310. 116. 148.

148. 312. Ont. & §. 275. Log.) & dum existere incipit, existentia ejus nonnisi hypothetice necessaria est (§. 306.).

E. gr. Planta in semine delitescens contingenter existit, ubi semen terræ commissum progeminat. Cum tamen fieri non possit, ut, si terræ fertili semen fecundum committatur, favente tempestate planta crescat; ideo existentia ejus hypothetice necessaria est. Necessarium scilicet est plantam crescere, ubi semen fecundum solo fertili commissum tempestatem faventem experitur. Provenit autem hæc necessitas neque a plantæ essentia, neque ab essentia seminis; sed extrinsecus advenit. Unde & per præcedens theorema (§. 315.) patet, eam non absolutam, sed hypotheticam esse.

§. 317.

Quod absolute necessarium est, contingens esse nequit. Conf. §. 302. 294.

Aboluta necessitas contingentiæ repugnans.

§. 318.

Quod hypothetice necessarium est, in se contingens est. Conf. §. 302. 301. 279. 294.

Hypothetica necessitas contingentiæ non repugnans.

Dudum Theologi contra Socinianos disputantes agnoverunt, necessitatem hypotheticam non tollere contingentiam: & ex nostris notionibus clarissime perspicitur hypothetice necessarium esse non posse, nisi quod in se contingens est. Ceterum contingentiam cum necessitate hypothetica subsistere posse, loquuntur manifesto modi & eorum possibilitas remota. Pone enim fieri non posse ut, quod hypothetice necessarium est, idem in se contingens sit. Cum modi hypothetice necessarii sint (§. 306.), cumque modorum possibilitas remota itidem necessaria sit (§. 307.); nec modus, nec ejus possibilitas remota contingens esse potest: cujus tamen contrarium paulo ante demonstravimus (§. 312.).

§. 319.

Cum id, quod necessarium est, vel absolute necessarium sit, vel hypothetice tale (§. 302.), hypothetice autem necessarium in se contingens sit (§. 317.), & e contrario absolute necessarium contingens esse nequeat (§. 318.): sola necessitas absoluta contingentiæ repugnat (§. 307. Log.), seu contingentiam tollit; hypothetica non item.

Quænam necessitas contingentiam tollat.

Nam etsi lapis calidus necessario fit, dum radiis solis æstivi exponitur: non tamen, dum caler, essentia ipsius repugnat, esse frigidum. Uti igitur necessarium sit lapidem nunc esse calidum, calor tamen nonnisi contingenter inest, hoc est, ita inest, ut cum non inesse lapidi in se considerato minime repugnet. Necessitas adeo hypothetica nihil in re in se considerata immutat: contingentia vero perinde ac necessitas absoluta est prædicatum rei in se consideratæ atque adeo per illam non mutatur.

§. 320.

Quænam necessitas rationi sufficienti jurgatur.

Si ratio sufficiens in essentia rei continetur, illud absolute necessarium est, quod per eam potius est, quam non est: si vero in alio ab essentia diverso continetur, id nonnisi hypothetice necessarium est, quod per eam potius est, quam non est. Conf. §. 298. 315.

Hæc probe notanda sunt, ne somnietur principium rationis sufficientis esse fontem absolutæ necessitatis, consequenter rationem sufficientem cum essentia rei confundamus, quæ tamen nonnisi attributorum & eorum, quæ attributorum loco sunt, ratio sufficiens est (§. 156. 160.).

§. 321.

Quid ratio sufficiens rebus adferat.

Immo quoniam A est ratio sufficiens ipsius B, non quatenus existit, cum hoc respectu A sit determinans ipsius B (§. 113.), sed quatenus per A intelligi potest, cur B potius sit quam non sit (§. 56.); ideo determinans adfert rei, quæ per ipsum determinatur, necessitatem, siue absolutam, siue hypotheticam, prout casus tulerit; ratio autem sufficiens saltem efficit, ut, cur aliquid sit, intelligibili modo explicari possit.

§. 322.

Ratio sufficientis existentia in serie contingentium nulla.

In serie rerum contingentium, quarum una per alteram determinatur, non continetur ratio sufficiens, cur qualibet earum potius sit quam non sit. Vid. §. 316. 310. 56.

Quod si forsân dubium oriatur exinde, quod in superioribus (§. 116.) ostenderimus, determinantia esse rationem sufficientem determinati, per hypothesin autem A determinetur per B, B per C, C per D & ita porro, atque adeo A habeat rationem existentia suæ sufficientem in B; illud

illud haud difficulter tolletur, ubi meminerimus, A non ante habere rationem sufficientem in B, nisi ubi B existerit; consequenter quia etiam existit C & D, atque ita porro. Ita enim patet in numero eorum, quæ existentiam ipsius A determinant, non solum esse B, verum etiam C, D, E & ita porro (§ 114.). Quodsi ergo series terminetur in contingente, ceterorum existentia pender ab existentia ultimi, consequenter cum hujus nondum detur ratio sufficiens cur potius sit, quam non sit, nec ceterorum dari potest. Principium hoc maximi momenti est in Theologia naturali, si a contingentia universi Dei existentiam demonstrare volueris.

§. 323.

Quoniam series rerum contingentium, quarum una per alteram determinatur, rationem sufficientem existentiae eorum, quæ in ipsa continentur, hoc est, sui in se non continet (§. 322.) ens vero contingens est, quod rationem sufficientem existentiae in se non habet (§. 310.); erit quoque illa *ens contingens*, consequenter cum ens contingens nonnisi contingenter existat &, dum existere incipit, existentia ejus nonnisi hypothetice necessaria sit (§. 316.), ipsamet nonnisi contingenter existit &, dum existere incipit, existentia ejus nonnisi hypothetice necessaria est.

Series rerum contingentium connexarum est ens contingens.

§. 324.

Si series rerum contingentium, quarum una per alteram determinatur, existit; rationem existentiae sufficientem in ente alio extra seriem habet, eoque necessario. Vid. §. 70. 322. 311. Idem patet ex §. 310. 308. 56. 311.

Ejus existentiae ratio quænam sit.

§. 325.

Quod absolute necessarium in se immutabile est (§. 292. 302. 301.): quod autem hypothetice necessarium, in se mutabile est (§. 318. 295.), tamdiu tamen mutari nequit, quamdiu salva est conditio, sub qua necessarium (§. 302. 292.).

Immutabilitas necessitatis absolute & hypothetice quomodo differat.

§. 326.

Notio necessitatis & contingentiae, quam dedimus, est communis usui loquendi conformis.

Notio necessitatis & contingentiae usui loquendi conformis.

§. 327.

Eadem notio-
nes notioni-
bus philoso-
phorum rece-
ptis confor-
mes.

Notio necessitatis & contingentiae, quam dedimus, est notionibus receptis philosophorum conformis. D. Thomas definit necessarium per id, quod non contingit aliter sese habere, & eandem definitionem suam fecerunt Theologi Augustinae confessionis. Unde sequitur absolute necessarium esse, quod ut aliter sese habeat, in se impossibile est; hypothetice autem necessarium, quod ut aliter sese habeat, obstat conditio ante posita. Similiter D. Thomas definit contingens per id, quod aliter sese habere potest, consequenter per id, quod non est necessarium. Quoniam itaque ejus notio necessitatis cum nostra consentit; ejusdem quoque notio contingentiae cum nostra consentire debet (§. 294.).

CAPUT IV.

DE

QUANTITATE ET AGNATIS
NOTIONIBUS.

§. 328.

Unitatis defi-
nitio.

Essentiae rerum prorsus immutabiles (§. 300.), atque adeo salvo ente nihil essentialium tolli, nil quicquam aliud in ullius eorumdem locum substitui potest (§. 291.). Inseparabilitas eorum, per quæ ens determinatur, *unitas entis* appellatur. Spectatur autem ista unitas non modo in essentia communi, quando nimirum de ente universali sermo est; verum etiam in essentia singulari, cum de ente singulari agitur.

§. 329.

Cur omne ens
sit unum.

Quoniam itaque essentialia entis a se invicem separari nequeunt, salvo eodem, hoc est, ut nec genus, nec species, nec individualitas mutetur (§. 328.); ideo vi unitatis, *Ens omne ita*

ita est aliquid, ut nihil aliud præter ipsum idem esse possit. Unde in Elementis Arithmeticæ (§. 3.) unum definimus per id, quod ita est aliquid, ut nihil præterea idem esse possit. Atque admittæ hac definitione patet, *Ens omne cum universale, tum singulare esse unum.*

Nimirum quando ens universale unum dicitur, per modum entis singularis, adeoque extra singularia existentis consideratur. Est verò hic sensus, dum genus vel speciem unum quid esse affirmamus, scilicet hoc genus unum est, vel hæc species una est; genus hoc vel hæc species tale ens universale est, ut aliud ens universale impossibile sit, quod cum illo genere, vel ista specie idem sit.

§. 330.

Hinc si A sit B, nec præterea D ponatur B, nisi A & D sint idem, ponetur B unum (§. 329.).

Quando ens unum ponatur.

Hoc corollarium est definitio unius, quam a *Leibnitio* repertam exhibui in elementis Arithmeticæ (§. 3.).

§. 331.

Si A sit unum, B sit unum, C sit unum, D sit unum, nec tamen A, B, C & D sint idem, erunt A, B, C & D simul multa.

Multi definitio.

E. gr. Hoc triangulum est unum, istud triangulum est unum, illud triangulum est unum (§. 329.). Hoc igitur, istud & illud triangulum simul sunt multa triangula.

§. 332.

Unum in abstracto unitatis nomine indigitamus; quemadmodum multa in abstracto nomine multitudinis.

Unum & multa quomodo in abstracto dicantur.

§. 333.

Si A, B, C, D &c. dicuntur unum, unum quodlibet eorum agnoscitur notione quadam fixa ad ipsum applicata. A enim unum est, quatenus ea inseparabilia sunt, per quæ in genere entium determinatur, ipso salvo (§. 328.). Quamobrem ubi unum dicimus, agnoscere debemus ea inseparabilia, per quæ determinatur, sive distincte, sive confuse, consequenter notionem aliquam fixam, vi cuius nempe unum est, ad idem appli-

Unde aliquid unum agnoscitur.

applicamus (§. 47. 344. Log.). Idem eodem modo patet de ipso B, C, D &c.

E. gr. Ponamus A esse globum: unum ergo esse agnoscis, quatenus globum esse intelligis. Globum vero esse agnoscis applicando notionem globi, quam habes, sive consulam, sive distinctam ad ipsum A.

§. 334.

Unum simpliciter quo sensu dicitur.

Unum ergo quando simpliciter dicimus, idem unum esse supponitur vi notionis entis in genere.

Dum enim dicimus unum simpliciter, eidem notio entis in genere responderet, sed indeterminate, ita ut in casu dato eidem substituatur notio aliqua fixa generis vel speciei, aut etiam individui.

§. 335.

Una quando similia.

Si A, B, C, D &c. quatenus quodlibet eorum unum est, per eandem notionem agnoscuntur; quatenus quodlibet eorum unum est, inter se similia sunt. Vid. §. 333. 195. Ont. & §. 48. 344. Log.

E. gr. Sit A triangulum æquilaterum, B æquicrurum, C scalenum. Dicatur vero A unum, quatenus est triangulum, -dicatur etiam B atque C unum ex eadem ratione. A igitur, B & C, quatenus unum sunt, agnoscuntur per notionem trianguli in genere, atque ideo perinde est, ac si in A nulla esset laterum, in B nec crurum æqualitas, in D vero nec inæqualitati laterum esset locus (§. 233.).

§. 336.

Unitatum identitas.

Si unitates, per quas in abstracto unum dicimus (§. 332.), denotant similia; eadem sunt. Vid. §. 335. 333. 181.

Hinc patet ratio, cur in Arithmetice Elementis (§. 5.) unitates easdem definiverimus per eas, quæ per eandem notionem agnoscuntur. Ponamus igitur unitatem A designare globum lapideum, B item globum lapideum, C quoque globum lapideum: erunt A, B & C, unitates eadem.

§. 337.

Quamvis dissimilia sunt re-

Si A, B, C, D &c. quatenus quodlibet eorum unum est, per diver-

diversas notiones agnoscuntur; quatenus eorum quodlibet unum est, spectu unitatis, dissimilia sunt. Conf. §. 195. 181.

E. gr. Ponamus A agnosci unum per notionem globi lapidei, B per notionem globi plumbei, C per notionem globi argentei, D vero per notionem globi eburnei: erunt ergo A, B, C & D dissimilia, quatenus quodlibet eorum unum est. Distinguere enim licet ea, quatenus quodlibet unum est, per materias, ex quibus constant, etsi quoad sphericitatem sibi mutuo similia.

§. 338.

Si unitates, per quas in abstracto unum dicimus A, B, C, Unitatum diversitas, D &c. designent dissimilia; diversae sunt (§. 337. 333. 183.).

§. 339.

Unum & unum dicuntur *Duo*; duo & unum *Tria*; tria Numerorum & unum *Quatuor*; quatuor & unum *Quinque*; quinque & unum *Sex*; sex & unum *Septem*; septem & unum *Octo*; octo & unum *Novem*; novem & unum *Decem*. In abstracto unitas & unitas simul constituunt *Binarium*; binario si accedit unitas, prodit *Ternarius* & ita porro continua unitatis accessione *Quaternarius*, *Quinarius*, *Senarius*, *Septenarius*, *Octonarius*, *Novenarius*, *Denarius* sive *Decas*. Quodsi decade utaris tanquam unitate, ita ut decem unitatum multitudo fiat unitas (§. 331. 332.); decades duae dicuntur *Viginti*; tres *Triginta*; quatuor *Quadragesima*; quinque *Quinquagesima*; sex *Sexagesima*; septem *Septuagesima*; octo *Octoginta*; novem *Nonagesima*; decem denique *Centum* seu in abstracto *Centenarius*. Quodsi porro Centenario tanquam unitate utaris, ita ut decem decadam multitudo sit unitas (§§. cit.); erunt duo centenarii *Ducenta*; tres *Trecenta*; quatuor *Quadragesima*; quinque *Quingenta*; sex *Sexcenta*; septem *Septingenta*; octo *Octingenta*; novem *Nongenta*; decem denique *Mille* seu in abstracto *Millenarius*. Quodsi millenario tanquam unitate utaris, ita ut decem millenariorum multitudo sit unitas; erunt tandem mille millenarii *Millio*. Et si porro millionibus utaris tanquam unitate; erunt mille millenarii *millionum Billio*; & ita progrediendo patet mille millenarios *billionum* (*Ontologia contracta*). Rrr esse

esse *Trillionem*; mille millenarios *Trillionum Quadrillionem* &c.

§. 340.

Numeri vul-
garis & ratio-
nalis integri
definitio.

Duo, tria, quatuor &c. communi nomine *Numeri* dicuntur. Vocantur autem *Numeri vulgares*, quia hisdem utimur in sermone communi. A Mathematicis hodie dicuntur *Numeri rationales integri*. Id vero omnes isti numeri inter se commune habent, quod in uno quolibet multæ sint unitates (§. 331. 339.), eæque eædem (§. 336.). Quamobrem *Euclides*, qui cum veribus præter numeros vulgares alios non agnoscit, *Numerum* definit per unitatum (earundem scilicet) multitudinem. Hæc adeo definitio est numeri rationalis integri sive vulgaris, qui & *Numerus* simpliciter dici solet.

§. 341.

Definitio To-
tius & Par-
tium.

Unum, quod idem est cum multis, dicitur *Totum*; ex adverso *Multa*, quæ simul sumpta idem sunt cum uno, dicuntur *Partes* ejus & unum quodque eorum dicitur *Pars*.

E. gr. Manus, pedes, truncus & caput simul sumpta constituunt corpus humanum, quod unum est (§. 319.); corpus vero humanum idem quoque est cum manu, pede, trunco & capite simul sumtis. Unde corpus humanum est totum; manus vero, pedes, truncus & caput sunt ejus partes. Manus nimirum pars est corporis humani, pedes sunt partes corporis humani, caput est pars humani corporis.

§. 342.

Totius & Par-
tium mutua
substitutio.

Quoniam eadem sibi mutuo possunt substitui salvo quocunque prædicato, quod uni eorum vel absolute, vel sub data conditione convenit (§. 181.); partes quoque *omnes simul sumptæ toti & totum partibus omnibus simul sumtis substitui potest, salvo omni prædicato, quod toti vel absolute, vel sub data conditione convenit, vel partibus omnibus simul sumtis tribuitur.*

§. 343.

Quo sensu
idem & pars
esse possit &
non possit.

Si *A* sit pars totius *C*, *B* non erit pars ejusdem nisi una cum *A* sit idem cum *C*, etsi etiam cum *D* sit idem cum *C*. Quod si contrarium ponas, tolletur definitio totius & partium; quod absurdum.

§. 344.

Cum unitates, quarum multitudine constituitur numerus vulgaris (§. 340.), simul suntæ sint idem cum hoc numero (§. 339.); *unitates sunt partes numeri vulgaris seu numeri integri rationalis, numerus vero vulgaris seu rationalis integer est totum* (§. 341.).

Partes numeri vulgaris.

§. 345.

Essentiæ rerum sunt sicuti numeri integri rationales, seu sicut numeri vulgares. In numero quolibet rationali integro combinantur aliquot unitates, quæ simul esse possunt, non tamen simul necessario sunt, hoc tamen non obstante nulla demi, nulla addi potest, numero salvo. Sive enim unitatem aliquam addas, sive auferas, numerus in utroque casu non amplius manet idem, sed in alium mutatur (§. 339.). In qualibet essentia combinantur, quæ sibi mutuo non repugnant, per se invicem tamen non determinantur (§. 143.), atque adeo in eodem subjecto simul inesse possunt, non tamen necessario simul insunt, ita ut, si unum insit, alterum quoque inesse debeat. Hoc tamen non obstante essentiæ rerum sunt immutabiles (§. 300.), ita ut, si vel unum essentiale auferatur, vel aliud superaddatur, essentia non amplius maneat essentia ejus entis, cujus antefuerat, sed in essentiam entis diversi mutetur.

Quo sensu essentia dicatur esse sicut numeri.

§. 346.

Omnis numerus unus est. Ex notionibus numerorum geneticis apparet, nullam posse numero cuicunque dato vel unitatem addi, vel demi, quin prodeat alius ab eo diversus (§. 339.). Aufer ex senario unitatem; habebis quinarium: adde unitatem, habebis septenarium (§. cit.). Est igitur omnis numerus ita hic numerus, ut nullus alius præter ipsum idem esse possit. E. (§. 330.). Idem patet ex §. 344. 341.

Unitas numeri.

§. 347.

Quoniam unum in abstracto unitatis nomine indigitamus (§. 332.); *numerus quilibet instar unitatis assumi potest*, consequenter si iterato ponitur, *unitates omnes eadem sunt*: cum enim per eandem notionem agnoscantur (§. 339.), etiam similia denotant (§. 335.) atque adeo eadem sunt (§. 336.). Unde porro

Unitas numerorum & numerus inde resultans.

consequitur, si numerus quicunque instar unitatis sumatur, iterato positum constituere numerum rationalem integrum.

§. 348.

Quantitatis
definitio.

Quoniam similia differre nequeunt, nisi quantitate (§. 196.); *Quantitas* in genere definiri potest, quod sit discrimen internum similitum, hoc est, illud, quo similia salva similitudine intrinsece differre possunt.

§. 349.

Æqualium &
inæqualium
definitio.

Æqualia sunt, quæ salva quantitate substitui sibi mutuo possunt. Contra *Inæqualia* sunt, quorum unum alteri salva quantitate substitui nequit.

§. 350.

Æqualitatis &
Inæqualitatis
definitio.

Quoniam eadem sibi mutuo possunt substitui salvo omni prædicato, ita ut facta substitutione perinde sit ac si substitutio facta non fuisset (§. 181.); æqualia vero sibi tantummodo substitui possunt salva quantitate, ita ut facta substitutione perinde sit respectu quantitatis, ac si substitutio facta non fuisset (§. 349.); æqualia sunt quantitate eadem. Unde *Æqualitas* in abstracto definitur, quod sit quantitatis identitas. Erit ergo ex adverso *Inæqualitas* quantitatis diversitas.

§. 351.

Æqualitas nu-
mero ejusdem.

Idem numero est æquale sibi et ipsi. Propositio hæc adeo manifesta est, ut non modo absque probatione sumi possit, sed & non invita Logica in numerum propositionum identicarum referatur, cum quantitas ipsius A prædicetur de quantitate ipsius A (§. 213. Log.).

§. 352.

Majoris & Mi-
noris definitio.

Majus est, cujus pars alteri toti æqualis est: *Minus* vero, quod parti alterius æquale est.

§. 353.

Majoris & Mi-
noris mutua
relatio.

Si A sit minus quam B; erit B vicissim majus quam A (§. 352.).

§. 354.

Inæqualia
quæ sint.

Inæqualium unum majus, alterum minus est. Sint A & B inæqualia per hypoth. Ergo pars unius alteri toti substitui potest.

potest (§. 349.). Ponamus adeo partem ipsius B, quæ dicatur C, substitui posse toti A; erit $A = C$ (§. cit.), consequenter A minus quam B (§. 352.) atque ideo B majus quam A (§. 353.).

§. 355.

Totum est æque omnibus suis partibus simul sumtis (§. 342, 349.). Æqualitas totius & partium.

§. 356.

Omnēs partes simul sumtæ sunt toti æquales (§. 342, 349.). Partium cum toto æqualitas.

§. 357.

Qualibet pars totius est minor toto. Quælibet enim pars totius est sibi metipsum (§. 351.), adeoque parti totius *per hypoth.* Pars cum minor toto. æqualis E. (§. 352.).

§. 358.

Totum est majus qualibet sua parte. Conf. §. 357. Totum parte majus,

353.

§. 359.

Quilibet numerus minor est pars majoris. Quilibet enim numerus minor iterata unitatis additione, consequenter vel unius, vel aliquot aliorum numerorum, degenerat in numerum majorem datum (§. 339.). Quamobrem cum omnis numerus unus sit (§. 346.) atque idem cum numero minore ac ceteris, quibus constat, simul sumtis *per demonstrata* & §. 182, quilibet numerus major est totum, cujus pars est numerus quilibet minor. Pars numeri majoris.

§. 360.

Pars aliquota est, quæ aliquoties repetita toti fit æqualis. *Pars vero aliquanta est, quæ aliquoties repetita vel major fit toto, vel eodem minor est, seu quæ repetita aliquoties toti æqualis fieri nequit.* Partis aliquotæ & aliquantæ definitio.

§. 361.

Quoniam unitas aliquoties repetita quemlibet numerum vulgarem seu rationalem integrum gignit (§. 339. 340.), adeoque cuilibet dato numero æqualis fit (§. 351.); *unitas est pars aliquota* Unitas qualis pars numeri vulgaris.

aliquota cujuslibet numeri vulgaris seu rationalis integri (§. 360.).

§. 362.

Numerorum
vulgarium of-
ficium.

Quamobrem cum in ratione multiplici terminus minor sit pars aliquota majoris (§. 142. *Arithm.*); numeri vulgares seu rationales integri exponunt rationes multiplices (§. 361.). Unde porro consequitur, tot esse species rationum multiplicium, quot sunt numeri vulgares, seu rationales integri.

Inde est, quod rationes multiplices in Mathesi determinentur per relationem numeri vulgaris ad unitatem, nempe dupla per 2: 1, tripla per 3: 1, duodecupla per 12: 1, millescupla per 1000: 1, & ita porro. Interveniunt nimirum numeri integri rationibus multiplicibus distinde enunciandis.

§. 363.

Numerus vul-
garis qualis
sit.

Numerus vulgaris seu rationalis integer eam habet ad unitatem relationem, quam recta quædam ad rectam datam habere potest. Sit numerus vulgaris seu rationalis integer 6 & linea data AB. Quoniam pars rectæ quælibet est toti similis (§. 17. *Geom.*); recta AB toties repetita, quot sunt unitates in senario, constitueret rectam AG, consequenter recta data AB est pars aliquota alterius AG (§. 360.). Refertur adeo AG ad AB ut totum ad partem aliquotam, quæ in præsentem casu sexies repetita, hanc adæquat. Enimvero unitas est etiam pars aliquota numeri vulgaris, v. gr. senarii (§. 361.), atque adeo senarius refertur ad unitatem tanquam totum ad partem aliquotam, quæ & ipsa sexies repetita senarium adæquat (§. 339.).

§. 364.

Quantitatum
homogenea-
rum & hetero-
genearum de-
finitio.

Quantitates homogeneæ sunt, quarum una aliquoties sumpta alteram superare valet: ex adverso heterogeneæ sunt, quarum una aliquoties sumpta alteram superare nequit.

§. 365.

Numerus vul-
garis unitati
homogeneus.

Quoniam unitas repetita quemvis numerum vulgarem seu rationalem integrum superare valet (§. 339.); omnis numerus vulgaris est unitati homogeneus (§. 364.).

§. 366.

§. 366.

Æqualia eidem tertio sunt æqualia inter se. Sit enim $A=B$. Ponatur porro $C=B$. Quoniam ergo C salva quantitate substitui potest pro B (§. 349.); substituantur pro B in eo casu, ubi B ad A refertur, nec mutabitur relatio quantitatis ipsius A , sed eadem erit, quæ fuerat, cum ad B referretur. Erat autem $A=B$ per hypotb. Ergo etiam $A=C$.

Modus colligendi æqualitatem duarum quantitatum

Colligimus hac ratione æqualitatem magnitudinum in vita communi, quæ sibi mutuo applicari nequeunt. E. gr. Si quasiveris, num duæ januæ sint æque altæ; solum extendimus juxta altitudinem unius eique æquale ressecamus. Idem solum coextendimus altitudini alterius januæ & si eidem æquale deprehenditur, inde æqualitatem altitudinum januarum colligimus. Altitudines adeo januarum colligimus esse æquales, quod eidem filo æquales deprehendantur, adeoque æqualitatem duorum inter se ex æqualitate singulorum cum eodem tertio.

§. 367.

Æqualia æqualibus sunt inter se æqualia (elem. Arithm. Modus alius. §. 87.).

§. 368.

Si fuerint quotcunque eidem vel totidem aliis inter se æqualibus æqualia; erunt eadem æqualia inter se. Modus generalis.

Propositio hæc ambitu suo complectitur duas immediate præcedentes (§. 366. 367.), quæ nonnisi hujus casus simplicissimi sunt.

§. 369.

Idem est pars eadem æqualium. Si in lineis rectis non nisi longitudo habetur ratio, atque adeo in æqualibus non spectatur nisi æqualitas, nec in inæqualibus nisi inæqualitas, per duas lineas rectas æquales duo quæcunque æqualia representari possunt. Sint adeo duæ lineæ rectæ æquales AB & CD , sitque minus quoddam recta HE rectis AB & CD minor. Quoniam HE minor est quam AB , erit HE parti ipsius AB æqualis (§. 352.), quæ sit AF . Similiter quia eadem recta HE minor recta CD , per hypotb. erit recta HE parti ipsius CD æqualis (§. cit.), quæ sit CG . Habemus adeo $HE=AF$ & $HE=CG$ per demonstrata, consequenter $AF=CG$ (§. 366.). Quoniam itaque CG ipsi AF

Ejusdem ad æqualia ipso majora relatio.

AF salva quantitate substitui potest (§. 349.), eam ad AB relationem habere potest, quam ad eandem habet AF, seu eadem pars est ipsius AB, quæ est AF. Et quia recta CD ipsi AB salva quantitate substitui potest, ipsa quoque CG ad CD eam relationem habet, quam habet ad AB, seu eadem pars est ipsius CD, quæ est ipsius AB, consequenter cum $HE = CG$ per demonstr. adeoque ipsi CG substitui possit salva quantitate (§. 349.), HE eadem pars est æqualium AB & CD.

Mathematici cum relationem, de qua hic loquimur, rationem appellant (§. 126. *Arithm.*), propositionem præsentem ita latius efferrunt: *Idem ad æqualia eandem rationem habet*, cujus demonstrationem aliam dedimus (§. 168. *Arithm.*). Hic tamen eandem aliter enunciare libuit, ut verba propius accedant ad notionem communem, quæ eidem responderet, quæque vulgo utimur. E. gr. Si novimus partem aliquam panni esse totius partem quintam & detur pannum aliud ejusdem longitudinis, partem istam hujus quoque quintam esse colligimus.

§. 370.

Æqualium
minorum re-
latio ad majus.

Æqualia sunt pars eadem ipsis sigillatim majoris. Sint denuo duæ lineæ æquales AB & CD minores eadem tertia EF. Quoniam AB minor ipsa EF per hypoth. erit ea parti hujus æqualis (§. 352.), quæ sit EG. Cum porro sit $AB = CD$ per hypoth. erit quoque $CD = EG$ (§. 366.), consequenter non minus AB, quam CD ipsi EG substitui potest salva quantitate ipsius EF (§. 349.), ita ut perinde sit ac si substitutio facta non fuisset. AB igitur & CD eandem habent ad EF relationem quam EG, seu eadem pars ipsius EF existunt.

Propositio præfens continetur una cum præcedente sub theoremate Mathematicorum: *Idem ad æqualia eandem rationem habet*, quatenus majus ad duo æqualia refertur. Enimvero quatenus minora, sed inter se æqualia referuntur ad majus; propositio præfens continetur sub altera: *Æqualia ad idem eandem habent rationem.* Respondet vero eidem notio communis, quæ vulgo utimur. E. gr. Ponamus partem panni esse quartam unius ulnæ vel tres quartas ejusdem partes. Quodsi refecetur pars alia eidem æqualis, inde colligimus, quod & ipsa sit pars quarta.

quarta unius ulnæ, vel tribus partibus quartis ejusdem æqualis. Habemus hic duo æqualia, quæ referuntur ad tertium ipsis majus tanquam pars ad totum & ex illorum æqualitate inferitur eadem relatio ad totum, seu quod sint eadem pars totius.

§. 371.

Si æqualibus æqualia adjiciantur, tota sunt æqualia (§. 349. & elem. Arithm. §. 88.). Æqualium compositio.

§. 372.

Quoniam æqualia A & B, quibus adjiciuntur æqualia C & D, sunt partes totorum, quæ inde resultant, perinde ac ea, quæ adjiciuntur (§. 341.); evidens est, si pars una totius fuerit æqualis parti uni alterius, fore etiam partem alteram illius æqualem parti alteri bujus. Partium totorum æqualium relatio.

§. 373.

Si duo fuerint tota in partes quotcunque numero utrobique æquales divisa & singulæ unius fuerint sigillatim æquales singulis alterius; erunt etiam tota inter se æqualia (§. 371.). Totorum æqualium ex partibus æqualibus compositio.

§. 374.

Si ab æqualibus æqualia auferantur, reliqua sunt æqualia (§. 341. 372. Vid. etiam. §. 91. Arithm.). Residuorum æqualitas.

§. 375.

Si inæqualibus æqualia adjiciantur, tota sunt inæqualia (§. 354. 352. 371. 341. 349. 358. Vid. quoque §. 90. Arithm.). Totorum inæqualitas partis accessione non mutata.

§. 376.

Quod uno æqualium majus est, idem etiam altero æqualium majus est. Sint æqualia A & B, sitque C majus quam A. Quoniam C majus quam A, erit A parti ipsius C æquale (§. 352.). Quare cum sit $A = B$ per hypoth. erit etiam B parti ipsius C æquale (§. 366.), consequenter C majus quam B (§. 352.). Modus colligendi quid esse majus altero.

§. 377.

Quod uno æqualium minus est, idem etiam altero æqualium minus est (§. 352. 355. 366. 341. 357.). Modus colligendi quid esse minus altero.

§. 378.

Si majori A & minori B adjiciantur æqualia C & D, vel Modus alius colligendi
(Ontologia contracta.) Sss

quid esse majus altero.

majori majus C, minori minus D, erit totum compositum ex A & C majus toto composito ex B & D.

E. gr. Si quis habeat decem nummos, alius vero sex; numerus nummorum illius major est numero nummorum hujus. Quodsi jam ei, qui habet decem, dederis octo; ei vero, qui sex possidet, idem octo: habebit ille nummos octodecim, hic vero nonnisi quatuordecim. Numerus adeo major provenit, si idem majori additur; minor vero, si idem additur minori.

§. 379.

Multiplicium definitio.

Duplex dicitur B ipsius A, si eidem A bis sumto fuerit æquale: *Triplex*, si ter sumto; *Quadruplex*, si quater sumto &c. *Multiplex*, si aliquoties sumto fuerit æquale.

§. 380.

Æquemultiplicium definitio.

A & B dicuntur *æquemultiplicia* ipsius C, si toties sumendum sit C, donec ipsi A æquale evadat, quoties sumendum est idem C, donec ipsi B æquale fiat.

§. 381.

Æqualitas duplicium ejusdem.

Quæ ejusdem vel æqualium duplicia sunt, inter se æqualia sunt.

Pone enim *Titium* & *Cajum* habere æqualia fila C & D; pone *Titium* sumere filum aliud, quod sit ejus, quod habebat, duplum; *Cajum* similiter sumere filum aliud B, quod sit ejus, quod ipse habebat, duplum. Nemo non hinc colligit, fila A & B, quæ *Titius* & *Cajus* nunc habent, esse inter se æqualia.

§. 382.

Æquemultiplicium æqualitas.

Quæ ejusdem vel æqualium æquemultiplicia sunt, ea inter se æqualia sunt.

Ponamus *Titium* habere tres ulnas panni, *Mævium* similiter habere tres. Ponamus porro *Ticio* dari loco trium ulnarum ter tres, hoc est, novem ulnas. Nemo non inde colliget, ut *Mevio* sint ulnæ totidem, quot *Ticio*, eidem quoque triplum ejus, quod habet, dari debere.

§. 383.

Inæqualitas æquemultiplicium.

Inæqualium æquemultiplicia inæqualia sunt, & majus quidem est, quod majoris multiplex est, minus vero, quod minoris.

Praefens.

Præfens theorema de inæqualitate æquemultiplicium inæqualium alteri, respondet axiomatici mathematicorum, si majus & minus per eundem numerum multiplicentur, factum prius posteriore majus est, vel, si inæqualia per eundem numerum multiplicentur, facta inæqualia sunt.

§. 383.

Si duo fuerint tota æqualia in partes æquales utrobique numero æquales divisa, erit pars una unius æqualis parti uni alterius.

Partes æquales totorum æqualium.

Sint duo acervi frumenti, & ambo dividantur in sex portiones æquales. Nemo non inde colligit, si duodecim istæ portiones assignentur totidem personis, singulis æquas cedere portiones.

§. 384.

Quorum idem æquemultiplex est, vel quorum æqualia æquemultiplicia sunt, & ipsa inter se æqualia sunt.

Æqualitas eorum, quorum idem æquemultiplex.

Si mensura aliqua ad januæ altitudinem applicata ter in eadem contineatur & eadem mensura applicata denuo ad altitudinem alterius januæ itidem in ea ter deprehenditur: erit altitudo utriusque januæ triplex mensura. Nemo vero inde non colligit, januarum altitudines inter se æquales esse. Immo præfenti propositioni respondens notio communis est commune principium, quo duorum pluriumve æqualitas mensurando investigatur.

§. 385.

Dimidium alterius dicitur, quod bis sumtum alteri fit æquale. Tertia pars vocatur, quæ ter sumta toti æqualis fit: Quarta, quæ quater sumta eidem fit æqualis & ita porro in infinitum. In genere Submultiplex alterius appellatur, quod aliquoties sumtum eidem fit æquale.

Dimidii & submultiplicis definitio.

§. 386.

Quoniam submultiplex alterius aliquoties sumtum eidem fit æquale (§. 385.); submultiplex alterius est ejusdem pars aliquota (§. 360.). Unde pars tertia, quarta, quinta &c. sunt partes aliquotæ.

Submultiplex qualis pars.

§. 387.

Quæ ejusdem sunt dimidia, inter se æqualia sunt.

Propositio præfens sub sequente universali tanquam casus simplicissimus continetur.

Æqualitas dimidiorum ejusdem.

§. 388.

Æquesubmultiplicium definitio.

Æquesubmultiplicia ejusdem sunt, si unum toties sumendum est, quoties sumitur alterum, donec eidem sit æquale: nempe si unum sit alicujus pars tertia, quarta, quinta &c. in infinitum; etiam alterum est ejusdem pars tertia, quarta, quinta &c. (§. 383.). Hinc simul intelligitur, quænam sint æquesubmultiplicia diversorum.

§. 389.

Æquesubmultiplicium æqualitas.

Quæ ejusdem vel æqualium æquesubmultiplicia sunt, & ipsa inter se æqualia sunt.

Theorema præfens ita etiam esse potest: *Quæ ejusdem vel æqualium eadem pars sunt; ea inter se æqualia sunt*, & in casu speciali numerorum: *Numeri inter se æquales sunt, qui ejusdem vel æqualium numerorum eadem pars sunt.* Utimur vero notione propositioni præfenti respondente etiam in communibus casibus: æqualia enim accipere *Mævium*, *Titium* & *Cajum*, si uniuscujusque portio fuerit totius hæreditatis *Scji* pars tertia, quis inde non colligit?

§. 390.

Modus alius colligendi æqualitatem ex æquesubmultiplicitate.

Quorum idem æquesubmultiplex est, vel quorum æqualia æquesubmultiplicia sunt, ea æqualia sunt.

Theorema præfens ita effertur: *Quorum idem eadem pars est, vel æqualia eadem pars sunt; ea & ipsa æqualia sunt.* Respondet vero theoremati etiam notio communis. Etenim si *Titius* dederit *Mæcio* quintam suorum nummorum partem, & *Cajus* itidem *Sempronio* quintam suorum, habeant vero *Mævius* & *Sempronius* eundem nummorum numerum, v. gr. sint utrique nummi viginti; nemo non hinc colliget, *Titium* & *Cajum* habuisse æqualem nummorum numerum, nempe utrumque habuisse nummos centum.

§. 391.

Modus colligendi inæqualitatem ex æquesubmultiplicitate.

Inæqualium æquesubmultiplicia inæqualia sunt, & majus quidem est, quod majoris submultiplex est, minus vero, quod minoris.

Propositio præfens ita quoque effertur: *Quæ inæqualium eadem pars sunt, ea inæqualia sunt, & majus quidem est, quod est pars majoris; minus vero, quod minoris.* Respondet quoque huic propositioni notio

commu-

communis. Etenim si *Titius* habeat 20 ulnas panni, *Mavius* quindecim, detque ille *Cajo*, hic *Gracho* quintam panni sui partem; nemo non hinc colliget, etsi numerus ulnarum non determinetur, sed *Titius* tantum majus habere dicatur, *Mavius* minus, *Cajum* accepisse majus, *Grachum* vero minus, quod in numeris omnium evidentissime patet, cum illi sint ulnarum quatuor, huic tres. Quoniam quotus toties sumtus, quoties divisor unitates continet, dividendo fit æqualis (§. 69. *Arithm.*); quotus est submultiplex dividendi (§. 385.).

§. 392.

Si ab inæqualibus idem vel æqualia auferantur, quæ relinquantur inæqualia sunt.

Modus colligendi inæqualitatem.

E. gr. Si duæ fuerint trabes ejusdem longitudinis & earum una major deprehendatur, quam usus, cui destinatur, requirit, resecetur autem ab ea pars quædam data, donec usui apta evadat; nemo non colligit partem trabis, quæ relinquitur, fore parti alterius æqualem, si ex ea idem pars eadem auferatur.

§. 393.

Si idem vel æqualia a majore & minori auferantur, pars residua majoris major est, minoris autem minor.

Modus colligendi, quid sit majus, quid minus.

Eandem propositionem ostendimus in Elementis Matheseos (§. 92. *Arithm.*). Ponamus *Titium* & *Mavium* accepisse poma, illum quidem plura, hunc vero pauciora. Ponamus porro utrumque *Cajo* dare tria. Nemo non hinc inferet, *Titio* plura adhuc esse quam *Mavio*. Quod si pomis substituas fila inæqualis longitudinis sibi mutuo applicata, ut minus parti majoris congruat, &, ubi extrema coincidunt, resecari ab utroque uno actu concipias partes sibi mutuo congruentes adeoque ejusdem longitudinis; clarius percipitur, fila residua inæqualia esse debere.

§. 394.

Si æqualibus inæqualia adjiciantur, tota sunt inæqualia, estque totum majus, cui majus adjicitur, minus vero, cui minus.

Modus colligendi, quid sit majus & minus seu convertendi æqualia in inæqualia.

§. 395.

Si ab æqualibus inæqualia auferas, quæ relinquantur inæqua-

§§§ 3

æqua- Modus alina-

*aequalia sunt, relinquitur autem minus, si majus fuerat subdu-
ctum; majus, si minus.*

Notio communis clarissima est, si supponas duo esse fila ejusdem
longitudinis sibi mutuo ita applicata, ut extrema utriusque coincidant.
Quodsi jam ab uno auferatur pars major, ab altero minor; partem resi-
duam primam minorem esse parte residua altera apparet.

§. 396.

Modus colli-
gendi quid sit
majus & mi-
nus.

*Quo unum aequalium majus vel minus est, eo etiam alterum
aequalium majus vel minus est.*

Pone enim *Titium* & *Cajum* habere baculos aequales; pone baculum
Sempronii eo esse minorem, quem habet *Titius*, nemo non hinc col-
ligit, eundem *Sempronii* baculum eo quoque minorem esse, quem *Ca-
jus* possidet.

§. 397.

Numerus ma-
ximus num
detur.

Dato quolibet numero sumi potest major. Conf. §. 339.
344. 359. 341. 352 seq.

§. 398.

Numerus fra-
ctus rationalis
qualis sit.

*Numerus rationalis fractus eam habet ad unitatem relatio-
nem, quam vesla quædam ad rectam datam habere potest.* Conf.
§. 41. *Aritbm.* 360. 341. *Ontol.* §. 17. *Geom.*

§. 399.

Fractorum
numerosorum
ad integros
reductio.

*Numeri rationales fracti sunt numeri integri rationales si-
ve vulgares, quorum unitas est pars aliquota alterius unitatis, seu
ad aliam unitatem rationem submultiplicem habet* (§. 41. *Aritbm.*
§. 360. 339. *Ont.* §. 142. *Aritbm.*).

E. g. *Florenum* dividimus tanquam totum in partes sedecim, pars
autem decima sexta grossus appellatur. Numeramus igitur grossos nu-
meris usi vulgaribus, ita ut dicamus duos, tres, quatuor &c. grossos,
non attenda grossi ad florenum relatione. Poteramus vero perinde
numerare duas, tres, quatuor &c. partes decimas sextas floreni, at-
tenta grossi tanquam partis floreni relatione ad florenum tanquam to-
tum. Ex ipsa adeo praxi communi apparet posse numeros fractos re-
duci ad integros, si pars totius, quæ unitatem eorum constituit, pe-
culiari nomine indigetur, seu, quod perinde est, si numerus desi-
gnans totum in suas partes divisum, quem denominatorem appellamus,
pro

pro nomine unitatis seu rei numeratæ sumatur, veluti, si sextas totius partes numeremus, pars sexta habeatur pro nomine rei numeratæ.

§. 400.

Quoniam totum in tot partes æquales dividi potest, quot unitates habet quilibet numerus integer rationalis seu vulgaris; tot sunt fractionum species, quot numeri integri rationales sive vulgares (§. 41. Aritbm.).

Species fractorum.

§. 401.

Et quia numerus fractus est unitatis parti aliquotæ aut aliquot partibus aliquotis æqualis (§. 41. Aritbm.), partes vero istæ aliquotæ sunt partes æquales, in quas unitas tanquam totum divisâ concipitur (§. 360.); in qualibet fractionum specie tot sunt numeri fracti, quot denominator continet unitates, demta una.

Numerorum fractionum numerus.

Denominator nimirum est numerus, qui indicat, in quot partes divisum est totum in dato casu (§. 59. Aritbm.).

§. 402.

Numeri fracti rationales exponunt rationes rationales minoris inæqualitatis (§. 41. 142 seqq. Aritbm.).

Numerorum fractionum officium.

§. 403.

Fractiones rationales inverse, in quibus denominator ponitur loco numeratoris & vicissim numerator loco denominatoris, exponunt omnes species rationum rationalium majoris inæqualitatis (§. 41. 59. Aritbm. §. 352. 402. Ont. §. 133. Aritbm.).

Fractionum inversarum seu spuriarum officium.

§. 404.

Quoniam itaque fractiones rationales exponunt omnes species rationum rationalium minoris inæqualitatis (§. 402), inverse autem omnes species rationum rationalium majoris inæqualitatis (§. 403.); & præter rationes majoris & minoris inæqualitatis nullæ dentur rationes inæqualitatis (§. 133. Aritbm.). Fractiones rationales earumque inverse, seu numeri fracti genuini & spurii, exponunt omnes rationes inæqualitatis rationales.

Quousque officium fractionum extendatur.

§. 405.

§. 405.

Numeri irrationales quales sint,

Numeri irrationales sunt ut linea recta ad lineam rectam aliam datam. Conf. §. 293. 43. 31. *Arithm.* §. 420. *Geom.* §. 519. *Anal. fin.*

§. 406.

Numerus in genere quid.

Numerus in genere eam habet ad unitatem relationem, quam recta quaedam ad rectam datam habere potest. Vid. §. 39. 43. 40 seq. *Arithm.* §. 363. 398. 405. *Ontol.*

§. 407.

Numeri in genere definitio.

Ideo Numerus in genere recte definitur, quod sit id, quod ad unitatem eam habet relationem, quam recta quaedam data ad rectam datam aliam habere potest (*Elem. Arithm.* §. 10.)

§. 408.

Pars partis pars totius.

** Pars partis est etiam pars totius.*

E. gr. Pars dimidia unæ dimidia est pars quarta unæ, adeoque & pars partis & simul pars totius.

§. 409.

Modus colligendi aliquid esse majus.

Si inæqualium minus majus fuerit tertio, multo magis majus eodem majus erit.

E. gr. 3 & 7 sunt duo numeri inæquales, eorum minor 3 est major binario: multo magis itaque major 7 binario major esse debet.

§. 410.

Modus colligendi aliquid esse minus.

Si inæqualium majus minus fuerit tertio, multo magis minus eodem minus erit.

E. gr. 7 & 3 sunt duo numeri inæquales, eorum major 7 est minor quam 9: ergo multo magis minor 3 est minor quam 9.

§. 411.

Modus alius colligendi quid esse majus.

Si quid fuerit majus majore inæqualium, erit idem multo magis minore inæqualium majus.

E. gr. 9 est major numerorum inæqualium 7 & 3 majore 7: multo magis itaque 9 est minore 3 major.

§. 412.

§. 412.

Si quid fuerit minus minore inæqualium, erit idem multo magis minus majore inæqualium.

Modus colligendi quid esse minus.

E. gr. Sit inæqualium numerorum minor 5, major 9. Quoniam numerus ternarius minor quinario, multo magis novenario minor esse debet.

§. 413.

Omnis numerus fractus rationalis est unitati homogeneus. Etenim numerus fractus rationalis est unitatis parti aliquotæ, vel aliquot partibus aliquotis æqualis (§. 41. *Aritbm.*). In priori adeo casu. Vid. §. 360. 341. 352. 364. in posteriori vid. §. 341. 352. 383. 409. 364.

Numerus fractus rationalis qualis.

§. 414.

Numerus irrationalis est unitati homogeneus. Conf. §. 405. *Ont.* §. 37 sq. *Aritbm.* §. 357. 364. *Ont.*

Numerus irrationalis qualis.

§. 415.

*Numerus in genere definitur per id, quod unitati homogeneum est, consequenter quod vel ab unitate aliquoties iterata superari, vel quod aliquoties repetitum unitatem superare potest (§. 364. add. 365. 413 sq. *Ont.* & §. 37 sqq. *Aritbm.*).*

Definitio numeri in genere.

§. 416.

Omnis numerus vel rationalis est, vel irrationalis & uterque sive fractus, sive integer, nec alius præterea numerus datur (§. 354. 352. *Ont.* §. 37 sq. 31. 39. 43. 41. *Aritbm.*).

Quot sint numerorum species.

§. 417.

Numeri fracti & irrationales sunt veri numeri (§. 363. 398. 405. 365. 413 sq. 407. 415. 271.).

Numeri veri num sint fracti & irrationales.

§. 418.

Quocunque numero fracto dato semper minor dari potest. Vid. §. 59. 41. *Aritbm.* & §. 397. *Ont.*

Minima fractio num datur.

§. 419.

Si totum in abstracto spectatum datum quemcumque partium numerum continere supponitur, non implicat, ut continuo major eidem attribuat. Totum in abstracto spectatum seu, quod perinde est, in genere consideratum nullum determinatum partem (*Ontologia contracta.*)

Totius in genere quæ sunt partes.

T t t

tium

tium numerum continet (§. 341.), immo cum idem totum nunc in plures, nunc in pauciores partes divisum concipi possit, per se patet, toti in genere nullum determinatum partium numerum tribui posse. Tot igitur eidem in abstracto tribuere licet partes, quot concipi possunt unitates in numero quocunque dato. Enimvero quocunque numero dato sumi potest major (§. 397.).

§. 420.

Quantitatis
distincta co-
gnitio.

Quantitatibus distincte intelligendis inserviunt numeri, seu, Quantitas qualibet data distincte intelligitur data ejus ratione ad aliam quaecunque in numeris sive rationalibus, sive irrationalibus. Sit enim quaecunque quantitas A. Sumatur alia quaecunque B instar unitatis. Cum A & B inæquales esse debeant (alias enim (§. 349.) idem explicaretur per idem); erit B altera A vel minor, vel major (§. 354.). Ponamus primo quantitatem B, quæ pro unitate assumitur, esse altera A minorem. Refertur adeo A ad B tanquam totum ad partem (§. 352.). Quodsi jam B sit pars aliquota ipsius A; ipsi A respondebit numerus rationalis integer (§. 361.), consequenter quantitati ipsius A distincte explicandæ inservit species quædam rationum multiplicium (§. 362.). Quodsi B non sit pars aliquota ipsius A, aut A & B partem aliquotam communem habent, aut non habent. In priori adeo casu cum A ponatur ipsa B major; A continet integram B vel semel, vel aliquoties & insuper aliquot ejus partes aliquotas, adeoque eidem responderi fractio quædam inversa seu spuria, consequenter ei distincte explicandæ inservit aliqua species inferior rationum rationalium majoris inæqualitatis (§. 403.). In casu posteriori A ipsi B incommensurabilis (§. 31. *Arithm.*), adeoque numerus irrationalis eidem responderet (§. 43. *Arithm.*), consequenter ubi ad numerum radicalem revocatur (§. 296. *Arithm.*), quantitati A distincte intelligendæ inservit.

Ponamus secundo quantitatem B, quæ pro unitate sumitur, esse altera A majorem. Aut igitur A est pars aliquota ipsius B, aut aliquot partibus aliquotis æqualis, aut nulla datur quantitatibus B & A pars aliquota communis. In casu priori quan-

quantitati A responder numerus fractus rationalis (§. 41. *Arithm.*), consequenter eidem distincte explicandæ inservit species aliqua rationum minoris inæqualitatis (§. 402.). In casu posteriori A denuo ipsi B incommensurabilis (§. 31. *Arithm.*), adeoque numerus irrationalis eidem responder (§. 43. *Arithm.*).

§. 421.

Si quantitas per numeros distincte explicanda, alia assumpta unitate alius quoque prodit numerus.

§. 422.

Numerus determinatus est, qui refertur ad unitatem datam: Numerus vero indeterminatus est, qui refertur ad unitatem vagam, pro qua assumi potest quodcunque visum fuerit. Indeterminate sumitur numerus determinatus, si ejus ad unitatem relatio non determinatur.

E. gr. Ternarius supponit unitatem determinatam, cujus ipse multiplex est, ita ut ter repetita eum adæquet. Enimvero quamdiu nulla adhuc unitas supponitur, tum equidem dici potest ei, quod ad unitatem aliquam datam referri potest, respondere posse aliquem numerum, sed quinam ille sit, dici nequit, quamdiu unitas data non supponitur.

§. 423.

Quoniam quælibet quantitas per numeros distincte explicari potest & alia assumpta unitate alius prodit, qui eam exprimit numerus (§. 420. 421.); Quantitates sunt numeri indeterminati.

§. 424.

Quoniam quantitates sunt numeri indeterminati, propterea quod nondum datur unitas, ad quam referri debent (§. 422.); Quantitates ad unitatem aliquam, quæ sumi potest, eam habere possunt relationem, quam recta aliqua data ad datam aliam habere potest (§. 407.).

§. 425.

Hinc quantitates per lineas rectas exponi & earum mutue relationes per rectarum relationes, quas curvæ lineæ determinant, exhiberi possunt.

Tit 2

§. 426.

Eadem quantitas per numeros diversos explicabilis.

Numeri determinati & indeterminati quantitas.

Quantitates quales sunt numeri.

Quantitates quales sint.

Cur quantitates lineis rectis exponi possunt.

§. 426.

Quando quid
augeatur vel
minuatur.

Augeri dicitur, quod homogeneo adjecto efficitur majus: *Imminui* contra, quod homogeneo ab eodem ablato efficitur minus.

§. 427.

Mutatio numerorum & quantitatum.

Numeri & *quantitates* in universum omnes augeri possunt ac minui, nec alia ipsis mutatio accidere potest, quam ut augeantur & minuantur. Conf. §. 407. 424. Ont. §. 17. Geom. §. 183. 426. Ont. §. 21. Geom.

§. 428.

Modi quantitatem augendi.

Quoniam aliquid augetur, dum homogeneo adjecto efficitur majus (§. 426.), quantitates autem omnes vel æquales sunt, vel inæquales (§. 350.); si aliquid augetur, aut continuo adjicitur, quod dato primum æquale est, aut promiscue eidem equalia & inæqualia adjiciuntur, consequenter in casu priori, ubi ex æqualibus continuo adjectis aliquid efficitur majus, quod hinc resultat totum (§. 341.) est primum dati multiplex (§. 379.).

Hinc in Arithmetica nascuntur duæ species, quæ dicuntur, *Multiplicatio* & *Additio*.

§. 429.

Modi minuendi quantitatem.

Similiter cum quid imminuatur, quod homogeneo ab eodem ablato efficitur minus (§. 426.), quantitates autem in universum vel æquales sunt, vel inæquales (§. 350.); si quid imminuitur, aut minus toties aufertur, quoties fieri potest, aut saltem semel aufertur.

Atque hinc in Arithmetica duæ enascuntur species, quæ dicuntur, *Subtractio* & *divisio*.

§. 430.

Magnitudinis definitio.

Multitudo partium totum constituentium dicitur *Magnitudo*: quæ determinata est, si numerus partium assignabilis; *indeterminata*, si idem inassignabilis.

§. 431.

Numeris quo respectu magnitudo trihuatur.

Quoniam unitates numerum constituentes sunt partes numeri (§. 344. & §. 417.), & numerus quoque minor est pars

pars majoris, quod de numero rationali integro (§. 359.) demonstratum de ceteris facile intelligitur; numero tribuitur magnitudo, quatenus ex unitatibus, vel, si fractus fuerit, ex partibus unitatis, aut in omni casu ex aliis minoribus constare concipitur tanquam partibus.

§. 432.

Si duo fuerint tota, quorum unum plures habet partes altero; quod plures partes habet, respectu alterius dicitur *Magnum*; quod pauciores, *Parvum*, consequenter *magnum est, quod ad aliud homogeneum velatum eodem majus deprehenditur; parvum vero est, quod ad aliud homogeneum velatum eodem minus deprehenditur* (§. 352.).

Magni & parvi definitio.

§. 433.

Nil igitur impedit, quo minus idem diverso respectu dicatur & magnum, & parvum.

Quo respectu idem sit magnum & parvum.

Discrepant hinc hominum de magnitudine judicia, ita ut unus magnum dicat, quod alter parvum appellat. Ponamus e. gr. *Titium* habere anulum, in quo tres comparent adamantes, quorum medius multo major est lateralibus. Dicit igitur medium magnum, laterales parvos. *Mavius*, qui vidit adamantes multo majores annulis insertos, eundem ad hos refert, eorumque respectu dicit admodum parvum, ridens *Titium*, quod magnum appellet. Etenim fieri solet, ut homines notionibus confusis non satis attendentes sibi persuadeant aliquid absolute magnum dici, quod magnum dicere soleant, quod est ordinario majus, ad ordinarium non referentes, quod rarius est.

§. 434.

Quoniam magnitudo partium multitudine, quibus totum efficitur, constituitur (§. 430.); magnitudo tribuitur rebus omnibus, in quibus partes distinguere licet totum constituentes.

Quibus rebus magnitudo tribuitur.

§. 435.

Quia in magnitudine determinata numerus partium assignabilis, una scilicet pro unitate assumpta (§. 430.); magnitudo determinata per numeros distincte explicari potest, atque partibus homogenea est (§. 415.).

Magnitudinis distincta explicatio & qualis ea sit.

E. gr. Ponamus lineam esse quinque pedum: pars adeo quinta erit unitas, qua data numerus partium in linea contentarum distinde enunciat, & ipsa magnitudo seu longitudo lineæ, quanta sit, intelligitur.

§. 436.

Magnitudinis
mutationes.

Magnitudo augeri potest ac minui (§. 430. 435. 426.).

§. 437.

Magnitudines
quantitatum
species.

Cum magnitudo, proprie nempe dicta, partium tantummodo assignabilem habeat numerum, minime autem actualem (§. 430.), atque adeo pro unitate pars quæcunque assumi possit, ubi numerus actu assignandus; alia assumta unitate alius prodit partium numerus, consequenter magnitudini numerus indeterminatus respondet. Quamobrem cum quantitas sit, quod per numerum indeterminatum exprimitur (§. 423.); *magnitudines sunt quantitates.*

Hinc veteres *Quantitatem* constituunt genus, *numerum* vero & *magnitudinem* species sub eo contentas, quorum illum *quantitatem discretam* vocant, quia partes actu sunt discretæ; veluti singulæ oves gregem constituentes, adeoque una pro unitate assumta, numerus actu per hanc unitatem actualem determinatus est; hanc vero *quantitatem continuam*; quia partes non actu sunt discretæ, atque adeo totum ex iisdem constans diversimode in partes resolvable, consequenter nullus adhuc iisdem respondet numerus actualis, cum nulla actu detur unitas.

§. 438.

Mensuræ ac
mensurati de-
finitio quid-
que sit metiri.

Si magnitudinem aliquam pro unitate assumimus & alterius ad eam rationem determinamus, eam *metiri* dicimus. Vocatur autem magnitudo, quæ pro unitate assumitur, *mensura* & magnitudo altera, cuius ad mensuram ratio investigatur, *mensuratum*.

§. 439.

Ufus aliquis
actus metien-
di.

Quod si ratio mensurandi ad mensuram detur, partem magnitudinis maioris metimur, actu metiendi terminato, quamprimum datam ad mensuram rationem habere deprehenditur. Ita enim obtineri magnitudinem, quæ ad mensuram datam habeat rationem, per se patet.

Casus

Casus hic in vita communi obuius est. E. gr. Si quis desideret quatuor panni ulnas, ratio datur, quam longitudo panni, quod emere constituit, ad mensuram habere debet. Metimur igitur partem panni, iterata applicatione ulnæ investigantes, quoties in ea contineatur. Quam primum itaque deprehendimus, eam in aliqua parte quater contineri, actum metiendi finimus & hanc partem pro ea, quæ expetebatur, sumimus, ut propterea quod rationem datam ad mensuram habere deprehenditur, dum eam metimur.

§. 440.

Quoniam magnitudinem metientes ejus ad mensuram *Mensuratio* tanquam unitatem rationem determinamus (§. 438.); *dum magni-* quid sibi velit. *tudinem metimur, eam per numeros distincte explicamus.*

§. 441.

Mensura mensurato homogenea est. Conf. §. 438. *Ontol.* *Mensura qua-* *lis sit.*
§. 126. *Arithm.* idem constat ex §. 440. 438. 415. *Ont.*

§. 442.

Quoniam magnitudo tribuitur rebus omnibus, in quibus partes distinguere licet (§. 434.); *res omnes, in quibus par-* *Res quænam* *mensurari* *possint.*
tes distinguere licet totum quoddam constituentes, metiri licet (§. 438.).

§. 443.

Euclidi in sensu strictiori magnitudo dicitur *metiri* magnitudinem, si illa aliquoties repetita alteram ædæquat. *Significatus* *mensuræ &* *metiendi ad ma-* *thematicam* *rerum cogni-* *tionem.* *At-* *que adeo mensura est mensurati pars aliquota* (§. 438. & 360.), *mensuratum vero est mensuræ multiplex* (§. 379.), consequenter si mensura sumitur pro unitate, *mensuratum ad mensuram rationem multiplicem habet* (§. 142. *Arithm.*). Paterid ex definitione tertia Elementi septimi, in qua *numerus numerum metiri* dicitur, cum minor aliquoties sumtus majori sit æqualis.

§. 444.

Mathematicam rerum cognitionem nobis comparaturi eas *Modus perve-* *niendi ad ma-* *thematicam* *rerum cogni-* *tionem.*
metiri debemus (§. 10. *Disc. præf.* §. 420. 438. 442. *Ont.*).

§. 445.

Numerorum
irrationalem
officium.

Identitas ra-
tionum in di-
verſis magni-
tudinum ge-
neribus.

§. 445.

*Singuli numeri irrationales exponunt totidem species ratio-
num irrationalium. Vid. §. 415. Ont. & §. 131. Aritbm.*

§. 446.

*Duæ magnitudines inter ſe homogeneæ eam inter ſe ratio-
nem habere poſſunt, quam habent duæ aliæ quæcunque inter ſe homo-
geneæ, ſed ipſis heterogeneæ (§. 329. 415 ſeq.).*

Hinc in Geometria rationem ſuperficierum & ſolidorum conſtitui-
mus per rationem linearum, v. gr. triangulorum æqualiorum rationem
per rationem baſium (§. 389. *Geom.*), & Cylindrorum, quorum diame-
tri æquales ſunt, rationem per rationem altitudinum determinamus (§.
573. *Geom.*). Similiter in vita communi rationem pretiorum per ratio-
nem quantitatum mercis conſtituimus. Quodſi notionem communem
evolvere libuerit, omnem demonſtrationem præſentem in eadem con-
tineri animadvertes. Etenim partem aliquam panni pro unitate ſumi-
mus, & ſic longitudini totius panni aliquis reſpondet numerus. Jam
porro pretium illius partis, quæ pro unitate ſumitur, quocunque tau-
dem numero exprimitur, reſpectu unitatis in genere monetarum aſſum-
tæ, inſtar unitatis conſideratur, atque adeo idem numerus reſpondet
pretio totius panni, qui longitudini ejusdem reſpondebat. Inde infe-
rimus toties ſumi debere pretium, quod parti panni reſpondet, ut pro-
deat pretium totius, quoties ſumi debet pars illa panni, ut prodeat lon-
gitudino totius, hoc eſt, phraſi mathematica, eam eſſe rationem pretii
parti panni reſpondentis, ad pretium, quod reſpondet toti, quam
pars iſta panni ad totum habet. Immo dum pannum metimur ſecun-
dum ſolam longitudinem, hoc ipſo ſupponimus, quod in præſente
theoremate univerſaliter enunciatur, ipſum pannum ſecundum omnes di-
menſiones ſpectatum habere ad partem quandam ipſius eam rationem,
quam longitudino totius ad longitudinem hujus. Concludimus ſane hic
ſuperficiem totius panni eſſe ad ſuperficiem partis, propter eandem cras-
ſitiem, ut totum pannum quoad omnes dimenſiones ſpectatum ad par-
tem iſtam eodem modo conſideratam, & ob ſuperficiem eandem latitu-
dinem porro inferimus, eſſe ſuperficiem totius ac partis, conſequenter
totum pannum ac partem, inter ſe ut longitudes.

§. 447.

*Quamobrem cum A fuerit ad B, ut C ad D, ſi A toties
ſumatur ut prodeat B, quoties ſumitur C ut prodeat D (§. 178.*

Aritbm.

Identitas ra-
tionum in
quantitatum

Arithm.); si duæ fuerint quantitates heterogenæ quæcunque *A* & *C*, quarum una posita ponitur quoque simul altera, erit in omni casu, quo *A* replicata prodit *B*, in altero autem quantitatum genere, ad quod *C* spectat, una cum *B* ponitur *D*, *A* ad *B* ut *C* ad *D*.

diversis generibus quomodo procreetur.

§. 448.

Si mensuram ad mensurandum applicare non licet, mensuræ ac mensurato substituere licet magnitudines seu quantitates alias ipsis proportionales, ut mensurati quantitas distincte intelligatur.

Mensura vicaria.

Ita gravitatem aëris metiri minime possumus, gravitate, quam dato tempore habet, pro unitate assumpta, eaque ad gravitatem, quam alio quodam tempore obtinet, applicata. Gravitatum igitur illarum loco sumimus altitudines Mercurii in barometro, quæ ipsis proportionales sunt & harum ope illarum rationem determinamus.

§. 449.

Quoniam *C* & *D* proportionales sunt quantitatibus *A* & *B*, si posita *A* ponitur etiam *C*, atque *B* per replicationem ipsius *A* prodit, dum eodem modo ex *C* nascitur *D* (§. 447.); si *B* metiri debemus per *A*, ejus loco metiri possumus *D* per *C* (§. 448.). Si igitur mensura *A* applicari nequit ad mensurandum *B*, posita vero quantitate *A* ponitur etiam *C* & *D* replicata *C* interea prodit, dum simili modo ex *A* nascitur *B*; ut quantitas ipsius *B* intelligatur, mensuranda est *D* per *C*.

Mensuræ vicariæ applicatio.

Ponamus metiendam esse gravitatem aquæ, hoc est, pondus ejus esse determinandum. Quoniam hic gravitas datæ ejusdam molis aquæ ad gravitatem alterius actu applicari nequit: ideo ejus loco assumi debet aliud, quod gravitati constanter proportionale deprehenditur. Quoniam itaque gravitas per omnem aquam æqualiter disseminata, ita ut sub iisdem voluminibus eadem aquæ gravitas contineatur; posito quodam volumine aquæ *A* ponitur gravitas *C* & posito volumine *A* bis, ponitur etiam bis *C*, ac ita porro in infinitum. Quare si volumen aquæ *B* eodem modo determinetur ex *A*, quo gravitas illius *D* ex gravitate hujus *C*; gravitatem *D* per *C* mensuraturi metimur volumen *B* per *A*.

(Ontologia contracta.)

U u u §. 450.

§. 450.

Quantitatum
eodem modo
determinata-
rum propor-
tionalitas.

Si quantitas B eodem modo determinatur ex A, quo D ex C; erunt C & D ipsæ A & B proportionales (§. 217. 195. Ont. & §. 132. 149. Arithm.).

§. 451.

Mensuræ vica-
riæ applicatio.

Si quantitas B eodem modo determinatur ex A, quo D ex C, & mensura A applicari nequit ad mensurandum B; ut quantitas B intelligatur, mensuranda est D per C (§. 450. 448.).

Altitudines Mercurii in barometro sunt gravitati aëris proportionales (§. 450.). Gravitationem aëris dum metiri jubemur, metimur altitudinem Mercurii in barometro per aliam altitudinem ejusdem in eodem datam, quæ unitatis ac mensuræ loco sumitur.

CAPUT V.

DE QUALITATE ET AGNATIS NOTIONIBUS.

§. 452.

Qualitatis de-
finitio.

Omnis determinatio rei intrinseca, quæ sine alio assumpto intelligi potest, dicitur *Qualitas*.

Differt hoc ipso qualitas a quantitate, quæ sine alio assumpto intelligi nequit. Quantitas enim rei tantum dari, alteri autem explicari non potest, ita ut solis verbis ejus in alterius animo excitari possit notio. E. gr. Coloris rubri notionem nonnisi confusam habemus. Si vero alteri dixeris, globum t'e desiderare rubrum; sine alio quodam dato, ad quod globum desideratum referas, intelliges qualis ille sit. Color adeo ruber, quo superficies globi infecta, est ejus aliqua qualitas.

§. 453.

Quantitatis
definitio.

Ex adverso adeo *Quantitas* definiri potest per determinationem intrinsecam, quæ tantum dari, sine alio assumpto autem intelligi nequit. *Dari autem tantum posse* dicitur, cujus notionem habere nequis nisi ubi idem actu præsens intuearis, notionem

nem adeo absentis excitare non potes, nisi id retuleris ad aliud homogeneum præfens sive datum.

§. 454.

Quoniam enti determinatio alia inesse nequit, nisi quæ vel sine alio assumto intelligi potest, vel sine alio assumto intelligi nequit (§. 53.); *omnis determinatio intrinseca vel in qualitatibus, vel in quantitatum numero est.*

Determinatio
num intrinse-
carum genera.

§. 455.

Omnis adeo determinatio intrinseca a quantitate diversa qualitas est.

Qualitatum
limites.

§. 456.

Quoniam essentialia, quibus determinationes genericæ & specificæ seu universales constant (§. 248.), intrinsecæ determinationes sunt a quantitate diversæ (§. 143.); *Essentialia sunt qualitates (§. 455.), consequenter genera & species per qualitates determinantur (§. 247.).*

Essentialia
qualia sint &
quænam gene-
ris ac specie-
rum notio-
nem ingredi-
antur.

§. 457.

Similiter quia attributa & modi, si a quantitate discesse-
ris, sunt determinationes intrinsecæ a quantitate diversæ (§. 149.); *attributa quoque & modi, exclusa quantitate, sunt qualitates (§. 455.).*

Attributa &
modi qualia
sunt.

§. 458.

Quoniam possibilitates modorum vel inter attributa (§. 164.), vel inter modos referendæ (§. 166.); *Modorum quoque possibilitates in numerum qualitatuum referuntur, si a quantitate discesseris (§. 457.).*

Modorum
possibilitates
quales sint.

§. 459.

Qualitatum aliæ se priores in ente non agnoscunt, unde reddi possit ratio, cur eidem insint; aliæ autem rationem sufficientem in se prioribus agnoscunt, cur vel actu insint, vel inesse possint. Conf. §. 455. 142. 116. 70. Idem patet ex §. 149. 456. seqq. 156 sq. 160.

Fundamen-
tum divisionis
Qualitatum.

§. 460.

Qualitates primitivæ sunt, quibus aliæ priores in ente concipi nequeunt, unde ratio reddi possit, cur eidem insint.

Qualitatum
species.

Uuu 2

Quali-

Qualitates ex adverso derivativæ sunt, quarum reddi potest ratio ex qualitatibus aliis, quæ simul insunt, cur ipsæmet vel actu insint, vel inesse possint. Qualitates derivativæ vel sunt necessariæ, vel contingentes. Necessariæ sunt, quæ rationem sufficientem in primitivis agnoscunt, cur actu insint: contingentes autem, quæ in primitivis tantummodo rationem habent, cur inesse possint, sive proximam, sive remotam.

§. 461.

Quænam ad singulas species referantur.

Qualitates primitivæ sunt essentialia (§. 156.), derivativæ necessariæ attributa, derivativæ autem contingentes modi (§. 157. 160. 460.).

§. 462.

Qualitatum in rebus a se invicem distinguendis usus.

Res a se invicem distingui possunt per qualitates (§. 452. 195.) & quidem constanter per qualitates primitivas aut derivativas necessarias; dato tempore per contingentes (§. 152. 150. 461.).

§. 463.

Ratio quantitatum in eodem ente num sit qualitas.

Ratio, quam habent quantitates in eodem ente obviæ, in qualitatum numerum referenda. Conf. §. 126. 132. Aritbm. & §. 2. Ont.

Hinc etiam querenti, quale sit triangulum, respondemus, quod sit æquiangulum, æquilaterum vel scalenum, hoc est, quod anguli & latera sint in ratione æqualitatis, vel quod latera habeant rationem in æqualitatis. Neque hic quicquam difficultatis nobis objicitur, modo notemus, rationem magnitudinum non esse ipsas magnitudines. Quamvis adeo magnitudines ex qualitatum numero excludantur, non tamen ideo ex earundem numero excludi quoque debet determinata earundem ad se invicem relatio, quæ rationis nomine venit. Sane ipsa quoque figura extensi determinati seu magnitudinis determinatæ qualitas est, etsi magnitudo in quantitatum numero sit, non vero in numero qualitatum.

§. 464.

Identitas qualitatum in similibus.

In similibus omnes qualitates eadem esse debent (§. 462. 195.) & ex adverso si omnes qualitates rerum eadem sunt, res istæ similes sunt (§. 455. 462. 453. 195.).

Consistit

Consistit adeo similitudo in identitate qualitatum, quemadmodum æqualitas in identitate quantitatis.

§. 465.

Si similia fuerint æqualia, congruere dicuntur: ut adeo *Congruentia sit æqualitas similitudinis.*

Ita triacula congruere sibi invicem dicuntur, si & similia fuerint, & æqualia.

§. 466.

Quoniam æqualia sunt quantitate eadem (§. 350.), in similibus autem omnes qualitates eadem sunt (§. 454.); in congruentibus & quantitates singule, quæ in iisdem concipi possunt, & qualitates eadem sunt (§. 465.).

Consistit adeo congruentia in identitate & quantitatibus, & qualitatum.

§. 467.

Quoniam in rebus non distinguimus nisi quantitates & qualitates (§. 454.), in congruentibus autem & quantitates, & qualitates eadem sunt (§. 466.); res congruentes prorsus eadem sunt, consequenter unam alteri substituere licet salvo omni predicato, quod uni eorum vel absolute, vel sub data conditione convenit (§. 181.).

§. 468.

Terminus sive *Limes* est id, ultra quod nihil amplius in re concipere licet ad eandem pertinens.

§. 469.

Rerum congruentium iidem sunt termini. Conf. §. 183. 181. 467. aliter pete ex §. 466. 454. vid. etiam *Elem. Geom.* §. 3. 162.

§. 470.

Qualitatis notio est usus loquendi conformis.

§. 471.

Notio congruentia, quam dedimus, & significatui in Mathefi recepto, & communi usus loquendi conformis.

Uuu 3

Eucl. mathematicorum, &

communi lo-
quendi usui
conformis.

Euclides non aliam supponit notionem congruentiæ, quam quæ respondet axiomati ipsius: Quæ sibi mutuo congruunt, ea sunt æqualia. Enimvero ex eo, quod unum alteri superimpositum eidem congruat, vulgo etiam concluditur, quod unum alteri æquale sit. Quoniam autem nullo in casu ex congruentia æqualitas inferri potest, nisi ubi ea, quæ sibi mutuo superimponuntur, etiam similia fuerint; notio quoque communis æqualitati superaddit similitudinem.

CAPUT VI.

DE

ORDINE, VERITATE ET PERFECTIONE.

§. 472.

Ordinis defini-
tio.

Ordo est similitudo obvia in modo, quo res juxta se invicem collocantur, vel se invicem consequuntur.

§. 473.

Identitas de-
terminationis
loci in ordina-
tis.

Si in rebus coëxistentibus vel sibi mutuo succedentibus ordo datur: loca singulorum eodem modo determinantur (§. 472. 217.).

§. 474.

Ratio ordinis.

Quoniam ex modo, quo loca singulorum in ordine determinantur, intelligitur, cur unicuique hic assignatus fuerit locus non alius; *in modo, quo loca singulorum sive coëxistentium, sive se invicem sequentium, determinantur, continetur ratio, cur unicuique hic potius, quam alius assignatus fuerit locus (§. 56.).*

§. 475.

Regulæ defini-
tio & plurali-
tatis regula-
rum funda-
mentum.

Propositio enuncians determinationem rationi conformem *Regula* dicitur, ut adeo regula ipsa determinatione rationi conformi contineatur. Quare si ratio sufficiens in plures resolvitur, unde tanquam totum aliquod ex partibus componatur; *regula plures nascuntur simul observandæ*, ex quibus regula una composita formari potest.

E. gr.

E. gr. Ratio, quæ in collocandis libris observatur, ex pluribus particularibus constat. Etenim argumentum librorum idem esse debet, eadem lingua conscripti sint necesse est, eadem forma typis ut descripti sint requiritur, annus denique, quo in lucem prodierunt, respiciendus. Quamobrem regula, quam tanquam unam enunciare possumus, in plures resolvì potest, nimirum in sequentes: 1. *Libri, qui de eodem argumento seu de eadem materia tractant, eodem in loco reponendi.* 2. *Libri eadem lingua conscripti in unoquoque eorum genere sunt conjungendi.* 3. *Libri ejusdem formæ in suo genere sunt conjungendi.* 4. *Liber, qui prius prodit, in sua serie præcedere debet eum, qui tardius lucem aspexit.*

§. 476.

Quodsi plures regule simul observandæ, eæ ita ordinari debent, ut præcedant, quæ observandæ sunt primo loco, sequantur, quæ observandæ demum sunt post alias (§. 70.). Ordo regularum.

§. 477.

Determinatio regulæ contraria dicitur *Defectus*, in ea nimirum re, in qua determinatio locum habet. Defectus definitio.

§. 478.

Omnis ordo suas habet regulas, per quas unicuique coexistentium vel successivorum locus determinatur (§. 474 sq.). Regularum in ordine necessitas.

§. 479.

Regulæ, quæ simul observari debent, sibi mutuo non contrariantur (§. 28.), nulla tamen earum per alteram determinatur (§. 114. 475.). Regulæ simul observandæ quales sint.

E. gr. Ponamus libros gallicos involucra habere gallica, & præter regulam, quæ libros eodem sermone conscriptos in eodem repository reponi jubet, in usum ordinandorum librorum afferri quoque alteram de libris involucra gallica habentibus eidem repository inferendis. Patet hic involucrum libri determinari per sermonem, quo conscriptus est, consequenter ubi determinatur locus, quem liber vi sermonis, quo conscriptus est, habere debet, simul determinari locum, qui eidem vi involucri convenit, cum per utramque determinationem non nisi unicus hic predeat locus: etsi in genere non necesse sit, ut in omni casu id, quod

quod per regulas determinatur, quarum una determinatur per alteram, numero idem sit.

§. 480.

Regulæ ordinis quales sint.

Quodsi ergo ordo plures habet regulas simul observandas, eadem quoque sibi mutuo contrariari nequeunt, nec ulla earum per alteram determinari debet.

§. 481.

Ordo quinam necessarius, quinam contingens.

Quodsi salva verum ordinarum essentia ordo alius esse nequit; absolute necessarius est (§. 183. 291. 293. 315.): in casu opposito contingens (§. 183. 290. 296.).

E. gr. Latera trianguli rectilinei ita junguntur, ut sinus angulorum ipsis oppositorum sint iisdem proportionales (§. 33. *Trigon.*). Quoniam vero vi demonstrationis (§. cit.) impossibile, ut tres lineæ rectæ jungantur aliter, locus illorum mutari nequit, salvis angulis, consequenter ordo laterum, qui datur (§. 472.), absolute necessarius est. Enimvero aliter sese res habet in ordinandis libris, ubi iisdem libri aliter collocari possunt, quam jubent regulæ supra traditæ. Quamobrem ordo iste contingens est.

§. 482.

Regulæ ordinis necessarii & contingentis quales.

Si regulæ ordinis salva verum ordinarum essentia aliæ esse nequeunt, ordo absolute necessarius (§. 478. 472. 481.): si eadem salva aliæ esse possunt, ordo contingens est (§. 472. 481.).

§. 483.

Defectus in ordine quando notetur.

Si inter res ordinandas locus alicui assignatur, quem vi regulæ ordinis obtinere nequit, defectu quodam ordo laborat (§. 478. 477.).

E. gr. Ponamus in ordinandis libris juxta regulas supra notatas (§. 475.) librum aliquem anglicæ sermonis conscriptum reponi inter libros latini idiomatis, vel librum mathematicum inter historicos; in priori casu aberratur a regula, quæ libros eodem sermone conscriptos in eodem repository collocari jubet, in posteriori impingitur in regulam, vi cuius nonnisi libri de eadem materia tractantes in eodem repository reponuntur. In utroque adeo casu ordo librorum defectu quodam laborat. Probe autem notandum est defectum non considerari absolute, sed

sed respectu ordinis dati, qui totus a regulis in ceteris ordinandis observatis pender.

§. 484.

Si res eadem diversis modis ordinari possunt, quod defectum in uno ordine arguit, non ideo est defectus in altero ordine (§. 478 483.).

Defectus quomodo considerandus.

Exemplum commune librorum ordinandorum propositionem præsentem illustrat. Etenim si juxta regulas superiores (not. §. 475.) ordinantur libri, ordo defectu laborat, si liber anglico sermone conscriptus reponitur inter libros latini idiomatis (not. §. 483.). Enimvero si in ordinandis libris tantummodo respicias ad materiam, formam & annum, quo publici juris factus est liber; nullius ideo defectus arguitur ordo, quod liber anglico sermone conscriptus compareat inter libros idiomatis latini.

§. 485.

Oppositum Ordinis, quod *Confusionem* appellamus, est dissimilitudo obvia in modo, quo res juxta se invicem collocantur, vel se invicem consequuntur. Potest etiam dici *Inordinatio*.

Confusionis vel Inordinationis definitio.

§. 486.

Si in rebus coexistentibus vel sibi mutuo succedentibus confusio datur; loca earum diverso modo determinantur. Conf. §. 485. 221. Indirecte demonstratur ex §. 217. 472. 485.

Diversitas determinationis loci in inordinatione.

§. 487.

Quoniam in confusione loca rerum diverso modo determinantur (§. 486.), consequenter per eandem regulam determinari nequeunt; ideo in confusione nulla datur regula constans, per quam loca rerum determinantur.

Regularum a confusione exclusio.

Hanc regularum absentiam loquitur responsio vaga ejus, qui sine ullo ordine libros Bibliothecæ intulit, qua affirmat, libros fuisse repositos, prout casus tulerit, hoc est, ob rationes, quarum non amplius recordatur. Probe nimirum notandum est, etsi ex confusione exulent regulæ; per quas ratio reddi potest in omni casu; cur A, B, vel & C &c. hunc potius teneat locum, quam alium; non tamen ideo deficere rationem, cur A hunc teneat locum, non alium; B (*Ontologia contrasta*.)

XXX

istum,

istum, non alium; C illum, non alium &c. sed rationes istæ ita sunt comparatæ, ut casui, quemadmodum dicimus, hoc est, aliis rationibus anterioribus tribuendum sit, quod in assignando loco ipsius A ad hanc potius attenderimus rationem, quam ad ceteras. quas in determinando loco ipsius B atque C secuti sumus, ita ut soli temporis acceptum referamus, quod in collocandis A, B & C rationes non permutterimus.

§ 488.

Notio ordinis
usui loquendi
conformis.

Matthias Martinius in Lexico Philologico Ordinem esse dicere dispositionem rectam antecedentium & consequentium, cum scilicet quidque suo loco collocamus: cum quo consentit *Rudolphus Goclenius* in Lexico philosophico ordinem explicans per dispositionem variorum, sua cuique loca tribuentem. Apparet adeo, nostram notionem ordinis (§. 472.) a communi non differre, nisi quatenus nostra distincta est, communis autem confusa, ita ut nos distincte enunciemus, quod verbis vagis vulgo effertur: quo ipso vocis significatus non mutatur (§. 140. Log.).

§. 488.

Ordo quando
intelligitur.

Quoniam ordo suas habet regulas, per quas unicuique coexistentium vel successivorum locus determinatur (§. 478.), in confusione autem constantes istiusmodi regulæ minime dantur (§. 487.); ordinem cognoscit, qui cognoscit regulas, juxta quas cuique locus tribuitur.

§. 489.

Quomodo co-
gnoscatur.

Si quis in rationem inquirat, cur cuique in coexistentium vel successivorum multitudine hic potius, quam alius cesserit locus, & in singulis eandem deprehendit; is ordinem cognoscit (§. 215. 473 486. 475. 488).

Continetur hoc theoremate modus cognoscendi ordinem, seu latentem in apicem producendi. E. gr. Si quis videt Professores Academiae tabulae cuidam assidentes & nosse desiderat, num ordine eidem assideant, an vero unusquisque occupaverit locum, qui ipsi commodus visus fuerit; inquirat. cuiusnam Facultatis sit unusquisque & quinam prior, quinam posterior in Facultatem receptus. Etenim ubi

ubi id constiterit, statim patebit, num ratio Facultatis & ordinis in Facultate qualibet habeatur, consequenter ordo constabit, quo tabulae assident.

§. 490.

*Si non singulae determinationes loci regula comprehenduntur, sed quaedam arbitrariae sunt; aliquid ordinis confusio-
ni vel confusio-
nis quidpiam ordini admixtum est, prout determinatio-
nes plures vel regula comprehendens, vel arbitrio relicta. Vid.
§. 215. 473. 486.*

Ordo suis nu-
meris non ob-
soluitur.

§. 491.

*Si res ordinandae singulae discrimine intrinseco differunt, quod in locis eorum determinandis attendi ac regula compre-
hendi potest; nullius locum cum loco alterius salvo ordine per-
mutare licet (vid. §. 474. sq. 490.): quodsi vero quaedam isti-
usmodi discrimine destituuntur, eorum loca salvo ordine permu-
tare licet (§. 181. 478.).*

Loca rerum
ordinatarum
quando per-
mutari pos-
sunt.

§. 492.

Si in rebus collocandis nulla dentur rationes intrinsecae, per quas earum loca determinare licet; per rationes extrinsecas ordo constituitur (vid. §. 974. Leg. & 215. 217. 472. Ont.).

Rationibus ex-
trinsecis in re-
bus ordinan-
dis quando ie-
tus.

Patet idem exemplo sedilium in conciavi ordine collocandorum, quae a se invicem non differre ponimus, quatenus ut sedilia spectantur. Deficientibus autem rationibus intrinsecis, per quas eorum loca determinari possint, non omnis ideo ordo exulat: confugimus enim ad rationes extrinsecas, eorum nempe relationem ad conclavis partes diversas resque alias in eodem simul locatas. Et per has conducuntur regulae, juxta quas sedilia collocantur (§. 415.).

§. 493.

In somnio omnia sunt absque ratione sufficiente & contradictorii locus est: in veritate rerum singula sunt & fiunt cum ratione sufficiente nec contradictorii locus est.

Differentia in-
ter somnium
& veritatem.

Somnium hic consideramus objective, quemadmodum Scholastici ajunt, quateus nimirum somnianti res quædam apparent, quæ non sunt; minime autem subjective, quatenus nimirum somnians producit rerum apparentium ideas. Priori respectu in somnio nulla datur ratio sufficiens eorum, quæ apparent admittunturque contradictoria: at posteriori respectu dantur utique rationes sufficientes, cur ideas rerum mens somnantis ita potius producat, quam aliter, & cur hoc potius ordine, quam alio. Nimirum posteriori respectu somnium est operatio animæ, quæ revera existit, atque adeo principium rationis sufficientis sequitur nec ulli contradictioni obnoxia esse potest: priori respectu sumimus ea, quæ in ideis animæ continentur ac si extra eas existerent, tumque deprehendimus hypothesein impingere non minus in principium contradictionis, quam rationis sufficientis. Atque hoc discrimen utique observandum est, ubi rationem reddere volueris, cur ideis somnantis res nullæ extra eas respondere possint, cur autem respondeant ideis vigilantium.

§. 494.

Ordo in veritate, confusio in somnio.

Quoniam in rerum veritate nihil existit, quod non concipitur possibile antequam existat, & cujus non detur ratio, cur hic potius existat, quam alibi, & nunc potius existat, quam tempore alio, dum existit; in somnio autem perinde sit, sive quid possibile sit, sive impossibile, sive habeat rationem sufficientem, sive minus, ubi quod apparet sumitur, ac si revera esset (§. 493.); ideo in veritate cuivis locus tribuitur per eandem regulam constantem, in somnio non item; consequenter *in veritate ordo est, in somnio confusio* (§. 478. 487.)

Ordo adeo veritatem a somnio, confusio somnium a veritate distinguit, seu, quod perinde est, ordo distinguit ea, quæ revera sunt, ab iis, quæ, quod appareant, sumuntur tanquam essent cum non sint.

§. 495.

Veritas adeo, quæ *transcendentalis* appellatur & rebus ipsis inesse intelligitur, est ordo in varietate eorum, quæ simul sunt ac se invicem consequuntur, aut, si mavis, ordo eorum, quæ enti conveniunt.

Probe autem notandum est, etsi veritatem a somnio distinguas, non ideo in somnio quoque eadem subinde reperiri posse, quæ in rerum veritate obtineat, si sigillatim spectentur: sufficit enim ex toto somnio exulare ordinem, etsi subinde aliquid ordinati eidem fuerit admixtum. Sane nulla datur confusio, in qua non subinde quidpiam ordinati occurrat: haud quaquam tamen ideo confusio in ordinem mutatur.

§. 496.

Ens verum dicitur, in quo datur veritas, consequenter si in iis, quæ eidem conveniunt, ordo datur (§. 495.).

Entis veri definitio.

§. 497.

Omne ens est verum. Conf. §. 149. 143. 28. 113. 156. 157. 160. 70. 113. Add. §. 478. 486. 496.

Veritas entis demonstrata.

§. 498.

Principium contradictionis & principium rationis sufficientis sunt fons omnis, quæ datur in rebus, veritatis, hoc est, datur in ente veritas, quatenus ea, quæ insunt, per ista principia determinantur. Conf. §. 497. 77. 493.

Fons veritatis in rebus.

§. 499.

Si nulla datur in rebus veritas transcendentalis, nec datur veritas logica propositionum universalium, nec singularium datur nisi in instanti. Subiectum scilicet ad quælibet prædicata indifferens est, quæ absque ulla ratione mutantur (§. 493.). Fieri adeo nequit, ut demonstraretur, subiecto absolute posito, vel sub adjecta conditione convenire debere aliquod prædicatum (§. 130.), idque necessario (§. 282.) atque adeo constanter (§. 292.). Prædicatum adeo per notionem subiecti, hoc est, absolutum per definitionem subiecti, hypotheticum per adjectam conditionem minime determinatur (§. 126.). Jam vid. §. 484. Log.

Veritatis logicæ a transcendentali dependentia.

Enimvero cum etiam in somnio, & qui eidem æquipollet mundo fabuloso quodlibet, dum est, sit (§. 493.); si affirmas A esse, seu ipsi B convenire C, iudicium singulare cum re representata consentit, adeoque logice verum est (§. 476. Log.). Enimvero quoniam in instanti mutatur, quod rei convenit, absque ulla ratione (§. 493.); propositio quoque illa singularis nonnisi in instanti vera est, ita ut, dum eam pronuncias, jam vera esse desinat.

§. 500.

Disciplina-
rum funda-
mentum.

Si nulla datur in rebus veritas transcendentalis, nullæ quoque disciplinae possibiles sunt. Conf. §. 1182. 1188. 1193 sq. Log. & §. 499. Ont.

Conf. discursus de habitu philosophiæ ad publicam privatamque utilitatem aptæ, qui in horis subsecivis Marburgensibus 1729. locum primum tenet.

§. - 501.

Eorundem
principia ulti-
ma.

Sublato principio contradictionis & principio rationis sufficientis tollitur veritas logica propositionum universalium, nec disciplinae ullæ possibiles sunt. Conf. §. 498-500.

§. 502.

Notio verita-
tis num sit si-
gnificatui re-
cepto confor-
mis.

Notio veritatis transcendentalis seu metaphysicæ distincta, quam dedimus, non contrariatur notioni confusæ ejusdem, quæ Scholasticis fuit. Conf. Suarez disput. Metaph. 8. sect. 7. f. 192 lqq. Goclenius in Lex. phil.

§. 503.

Perfectionis
definitio.

Perfectio est consensus in varietate, seu plurium a se invicem differentium in uno. Consensum vero appello tendentiam ad idem aliquod obtinendum. Dicitur perfectio a Scholasticis *bonitas transcendentalis*.

E. gr. Structura oculi ita comparata est, ut singula tendant ad delineationem imaginis claræ ac distinctæ objecti visibilis in retina, qualis ad visionem claram atque distinctam requiritur. Singula talia deprehenduntur, qualia esse debere intelliguntur, si imago istiusmodi in oculo de-

lo delineanda, Et propter hunc in structura oculi consensum oculus dicitur perfectus.

§. 504.

Imperfectio est dissensus in varietate, seu plurium a se differentiarum in uno. *Dissensus* vero consistit in contrarietate tendentiarum ad commune aliquod obtinendum. Vocatur etiam *malum*. Imperfectio-
nis definitio.

E. gr. Oculus est imperfectus, si qua in structura ejus occurrunt, quæ impediunt, quo minus imago clara atque distincta objecti visibilis in eo delineari possit. Cum enim cetera in structura oculi ita sint comparata, qualia esse debent, ut imago objecti visibilis in eo delineanda fiat clara atque distincta, & alia talia deprehendantur, ut istiusmodi imaginis delineationem impediunt; in structura oculi inter partes deprehenditur dissensus. Et in hoc dissensu consistere imperfectiorem, nec in alio consistere posse patet, quod oculus dicatur imperfectus, qui non clare ac distincte videt; id vero non contingit nisi in eo casu, quo clara atque distincta imago in oculo minime delineatur. Enimvero probe notandum est, etsi imperfectio in genere definiatur per dissensum & perfectio per consensum in varietate; non tamen ideo dicendum esse, perfectionem e. c. horologii consistere in consensu & imperfectionem in dissensu partium: nam in casu speciali consensus ille & dissensus determinandus est, qualis sit. Omnis enim terminorum abstractorum nuda applicatio in casibus maxime specialibus minime satisfacit, cum in hisce specialibus nominibus essenda sint, quæ verbis generalibus in explicatione terminorum abstractorum indicantur.

§. 505.

Omnis perfectio habet rationem quandam generalem, per quam intelligitur cur ea, quæ perfectio insunt, ita se potius habeant quam aliter, seu talia potius sint ac tanta, quam alia Ratio perfectio-
nis.
(§. 503. 56.).

V. gr. Ex structura oculi consequitur delineatio imaginis objecti visibilis in fundo ejus. Quamobrem cum inde ostendatur, cur singulæ oculi partes ita potius factæ fuerint, quam aliter, quatenus tanquam partes organi hujus visorii considerantur; delineatio imaginis objecti

objecti visibilis in fundo ejus clara atque distincta est ratio perfectionis oculi.

§. 506.

Ratio determinans perfectionis quid dicatur.

Rationem illam generalem, per quam intelligitur, cur ea, quæ perfectio insunt, ita se potius habeant, quam aliter, dicemus *Rationem determinantem perfectionis*.

§. 507.

Perfectionis simplicis & compositæ differentia.

Si ratio determinans perfectionis fuerit unica; *perfectio dicitur simplex*: si vero rationes determinantes fuerint plures, *perfectio composita* appellatur.

Perfectio fenestrarum in ædificio duplicem habet rationem determinantem, nimirum illuminationem conclavium & commoditatem prospectus. Est adeo composita, quatenus singulæ earum determinationes ita fieri debent, ut utraque obtineatur, qualis desideratur. Etenim & conclavium illuminatio, & prospectus commoditas suas habet determinationes, quas nosse debet fenestræ perfectionem inde determinaturus. Præterea quoque fenestra pars est ædificii non minus atque conclavis, consequenter nova superaccedit perfectionis ratio determinans, sed ea generalis, quæ nempe partis cujusvis compositi inorganici est, nempe convenientia, quæ symmetriam & decorem comprehendit.

§. 508.

Perfectionis primariæ & secundariæ discrimen.

Ratio determinans perfectionis primaria est, quæ ex determinationibus specificis deducitur; *secundaria* vero, quæ ex determinationibus genericis fluit. Hinc & *perfectio primaria* dicitur, quæ a ratione determinante primaria pendet, seu per eam intelligitur; *secundaria* vero, quæ per rationem determinantem secundariam intelligitur.

E. gr. Si oculus in genere consideratur, tanquam organum sensorium animalis; determinationes specificæ sunt, quibus organum visus efficitur. Quamobrem cum inde pendeat imaginis objecti visibilis in fundo oculi delineatio; clara ac distincta objecti visibilis imago est ratio determinans primaria perfectionis oculi. Quodsi in specie oculum humanum spectemus, ad determinationes specificas etiam per-

pertinent ex, quibus efficitur organum visorium commodum corporis humani, hoc est, tali menti, qualem homines habemus, uniti. Unde ratio determinans perfectionis primaria est, quæ a modo visus hominibus convenientis ducitur. Jam vero si oculum eundem consideremus tanquam corpus vivum, vel tanquam partem corporis, determinationes genericæ utique sunt, quibus oculus efficitur corpus vivum, vel pars corporis. Inde adeo derivatæ rationes determinantes secundariæ sunt. Atque hinc simul intelligitur, quoniam perfectio oculi primaria sit, quam ut secundaria spectanda. Primaria nempe perfectio est, qua oculus humanus efficitur organum visorium perfectum humani corporis; secundaria autem, qua corpus vivum perfectum, vel pars corporis tanquam totius spectati perfecta reditur.

§. 509.

Omnis perfectio suas habet regulas, per quas explicari potest, hoc est, intelligi, cur determinationes intrinsecæ tales potius sint, quam aliæ. Conf. §. 505. 507. 122. 455. 475. Regularum in perfectione necessitas.

Sic dantur in Architectura civili regulæ, per quas fenestrarum perfectio explicatur & quarum ope demonstrat Architectus eas non posse cum ratione reprehendi.

§. 510.

Si plures *regulæ* ex diversis rationibus perfectionis compositæ fluentes sibi mutuo repugnant, dicuntur *inter se collidi*. Exceptionis definitio. Regularum collisio exceptionem parit. Est adeo *Exceptio* determinatio regulæ contraria ob regularum simul observandarum collisionem facta.

Notio exceptionis generalis est, nec in sola perfectionis theoria usum habet. Ita in Grammatica habemus regulas de generibus nominum generales; habemus quoque speciales. Accidit autem, ut regulæ speciales cum generalibus collidantur, atque adeo genus nominis alicujus aliter determinandum sit, quam fert regula specialis. Exemplum exceptionis a natura factæ vide in Catoptrici §. 188, ubi leges visionis directæ & reflectæ colliduntur.

(*Ontologia contracta.*)

Yyy

§. 511.

§. 511.

Exceptio in
qua perfectio-
ne locum ha-
beat.

In perfectione simplici exceptioni locus non est (conf. §. 507. 475. 113. 121. Ont. & §. 307. Log. §. 510. Ont.): *at in perfectione composita ea locum habere potest.* Vid. §. 507. 475. 113. 121. Ont. §. 307. Log. §. 510. Ont.

Fenestrarum perfectio composita est, cum duplici nitatur ratione, nimirum comoda conclavis illuminatione & commodo prospectu. Unde regulæ architectonicæ fenestrarum aliæ debentur commoditati illuminationis, aliæ autem commoditati prospectus, aliæ utrique. Nil igitur obstat, quo minus accadat, ut, quæ ex fonte priori derivantur, repugnent ceteris ex fonte posteriori derivatis, cum commoditati prospectus contrariari queat, quod ad commoditatem illuminationis facit. In applicatione adeo regularum collisio oriri potest: unde exceptioni necessario locus est. Quodsi vero fenestra aliqua solius illuminandi aedificii gratia excitatur; regulæ omnes ad commoditatem illuminationis faciunt, adeoque nulla alteri repugnat. Nulla igitur locum habet collisio, adeoque nec exceptioni locus datur.

§. 512.

Defectus di-
visio.

Defectus apparens est, qui evitari non potest: ex adverso autem defectus verus, qui evitari poterat.

§. 513.

Qualis defe-
ctus ex exce-
ptione oritur.

Exceptio gignit defectum non verum, sed tantummodo apparentem. Conf. §. 510. Ont. 307. Log. 477. 512. Ont.

E. gr. In oculo regulæ a claritate imaginis in eo delineandæ derivatæ contrariari possunt regulis a distinctione imaginis ejusdem pendentes, ita ut imago reddatur obscurior, si fiat magis distincta, vel confusior, si fiat clarior. Quodsi ergo in structura oculi quidpiam deprehendatur, quod majori claritati obstare videtur, id minime defectum illius arguit, ubi ad hoc conducere deprehenditur, ut imago fiat magis distincta. Cum enim impossibile supponatur, ut manente eodem distinctionis gradu clarior evadat imago, non immutata oculi magnitudine, & prior sit ratio a mente desumenda, cur imaginem magis distinctam esse præstet quam clariorem; defectus clarita-

claritatis majoris in oculo nonnisi defectum arguit apparentem, minime autem verum.

§. 514.

Exceptio non parit imperfectionem, sed salva perfectione Exceptio non obstat perfectioni.
fit. Conf. §. 510. 475. 503. 504.

Absonum sane est fingere consensum, qui impossibilis est: impossibile enim nihilum est (§. 101.), consequenter consensus quoque impossibilis nullus est. Mihi autem de exceptionibus veri nominis sermo est, quæ oriuntur regulis rite constitutis.

§. 515.

Si in exceptione regula una alteri præferenda, quæ ex Quænam regula alteri in exceptione præferenda.
ratione primaria fuit præferenda est ei, quæ a secundaria pendet.
Vid. §. 56. 508. 236. 456.

§. 516.

Si plura simul constituunt unum perfectum, ratio perfectionis totius est ratio communis rationum perfectionis partium. Ratio perfectionis totius.
Vid. §. 505. 341. 455. 56.

E. gr. Ædificium aliquod totum habet aliquam rationem finalem, quæ est ratio determinans perfectionis totius ædificiū. Singulæ ædificii partes suas quoque habent rationes finales, quæ sunt rationes determinantes perfectionis earundem. Ex ratione autem finali totius ædificiū ostenditur, has esse debere rationes finales singularum partium, non alias. Atque adeo ratio determinans perfectionis totius ædificiū est ratio communis omnium rationum determinantium perfectionis singularum partium ædificiū.

§. 517.

Quoniam si plura simul tanquam partes constituunt totum perfectum, ex ratione determinante perfectionis totius conspicitur, cur tales potius esse debeant partes, quam aliæ, vi demonstrationis præcedentis (§. 516.); ex ratione determinante perfectionis totius apparet, quænam in exceptionibus regulæ aliis sint præferendæ, ubi totum aliquod ex pluribus partibus componitur, vel plura simul unum quoddam constituunt.

Yyy c

E, gr.

E. gr. Ex fine alicujus conclavis, cujus fenestræ partes sunt, intelligitur, num magis habenda sit ratio illuminationis, an commoditatis prospectus, consequenter, ubi regulæ ab utroque fenestrarum sine derivatæ inter se colliduntur, patet, utrum regulæ a commoditate illuminationis desumptæ sint præferendæ iis, quæ commoditatem prospectus respiciunt; num hæ illis præponendæ.

§. 518.

Exceptiones
quomodo fi-
ant salva per-
fectione to-
tius.

Quoniam ex ratione determinante perfectionis totius apparet, quænam in exceptionibus regulæ aliis sint præferendæ, ubi totum aliquod ex pluribus partibus componitur (§. 517.); exceptiones rationi determinanti perfectionis totius conveniunt, hoc est, tales sunt, quales esse debent, ut rationi illi sit locus, consequenter ad eam tendunt, adeoque inter se consentiunt. *Si igitur Exceptiones sunt rationi determinanti totius perfectionis convenienter; perfectio in toto conservatur.*

Quodsi e. gr. de perfectione oculi statuere volueris, non sufficit eum considerare tanquam organum visorium, & ad eas attendere determinationes, quibus oculus efficitur ad videndum perfectior: sed ad finem totius hominis respiciendum, ut inde appareat, qualis visus deceat hominem. Ita enim demum liquido constabit, quales exceptiones structura oculi admittat.

§. 519.

Magnitudo
perfectionis
quid sit.

Magnitudo perfectionis est multitudo convenientiarum determinationum entis cum regulis, per quas perfectio explicatur. Conf. §. 506. 475. 503. 341. 430.

§. 520.

Perfectius plu-
ra observabi-
lia continet.

Quoniam in perfectione majore major est convenientiarum determinationum entis cum regulis numerus, quam in minore (§. 519.); *in re perfectiore plura observabilia sunt, quam in altera, quæ minorem perfectionem habet.*

§. 521.

§. 521.

Si *A* & *B* fuerint entia ejusdem generis vel speciei, & determinationes ipsius *A* pluribus regulis conveniant, quam determinationes ipsius *B*; perfectio ipsius *A* major est perfectione ipsius *B*. Quoniam enim determinationes ipsius *A* pluribus regulis conveniunt, quam determinationes ipsius *B* per hypoth. in explicanda perfectione illius plura occurrunt, quam in hujus perfectione evolvenda, consequenter in *A* plura observabilia sunt, quam in *B*. (§. 520.).

Quamnam perfectio major.

§. 522.

Quoniam determinationes ipsius *A* pluribus regulis conveniunt, quam determinationes ipsius *B*, si in *A* pauciores fuerint exceptiones, quam in *B* (§. 510.); ideo perfectius est, quod paucioribus exceptionibus obnoxium est, quam quod plures admittit.

Altera ratio perfectionis majoris.

§. 523.

Si *A* & *B* imperfectione laborent, minor autem est imperfectio ipsius *A*, quam *B*, dicetur *A* perfectius ipso *B*. Pater autem imperfectionis magnitudinem esse debere multitudinem repugnantiarum determinationum intrinsecarum entis cum regulis, per quas perfectio explicatur.

Perfectius quidnam dicatur respective.

§. 524.

Defectus verus imperfectionem parit. Conf. 477. 512. 475. 504.

Defectus verus imperfectionis genitor.

§. 525.

Quoniam minus imperfectum respectu imperfectioris perfectius dici solet (§. 523.); ideo perfectius est, quod paucioribus defectibus veris vel minore defectu vero laborat, quam alterum.

Imperfectum quidnam sit perfectius.

§. 526.

Notio perfectionis distincta, quam dedimus, non abborret a confusa communi.

Notio perfectionis num sit usui loquendi conformis.

§. 527.

Notio perfectionis distincta non contrariatur notioni confusa,

Notio perfectionis recepto

in Ontologia
significatus
conformis.

fusa, quam Scholastici de bonitate transcendentali habuere. Vide communes libellos metaphysicos, quando bonitatem transcendentalem explicant.

§. 528.

Perfectionis
essentialis &
accidentalibus
discrimen.

Perfectio essentialis est, quæ continetur consensu determinationum essentialium. Perfectio vero accidentalis est, quæ dicit consensum determinationum accidentalium cum essentialibus.

Exemplum perfectionis accidentalis est vita hominis perfecta, in qua actiones liberæ consentiunt cum naturalibus.

§. 529.

Ratio determi-
nans perfectio-
nis accidenta-
lis.

Perfectio accidentalis eandem in ente determinantem rationem habere debet, quam habet essentialis (§. 528. 503. 505 sq.).

Ita in vita perfecta consensus actionum liberarum cum necessariis gignitur determinatione illarum per eandem rationem finalem, per quam hæ determinantur.

§. 530.

Perfectio unde
rebus super-
accedit.

Perfectio rebus tribuitur, quatenus cur tales sint determinationes intrinsecæ per rationem quandam generalem, seu certas regulas explicari potest. Conf. §. 505. 509. 529. 142.

FINIS PARTIS PRIMÆ.



PHI-

PHILOSOPHIÆ
PRIMÆ
SIVE
ONTOLOGIÆ
PARS II.

PHILOSOPHIÆ PRIMÆ

SIVE

ONTOLOGIÆ

PARS II.

DE

SPECIEBUS ENTIIUM ET EORUM AD SE INVICEM

RESPECTU.

SECTIO I.

DE

ENTE COMPOSITO.

CAPUT I.

DE

ESSENTIA ENTIS COMPOSITI.

Ens compositum dicitur, quod ex pluribus a se invicem distinctis partibus constat. Entis compositi definitio.

§. 532.

Quoniam partes, ex quibus ens compositum constat, si
mul sumtæ sunt idem cum ipso (§. 531.). Cur sit totum ali-
quod.
(*Ontologia contracta.*) Zzz est

est totum aliquod (§. 341.). Nimirum partes constituuntens compositum nexu suo, quo plura simul sumta efficiunt unum idque tale: eadem vero efficiunt totum identitate sui cum uno.

§. 533.

Essentia compositi.

Essentia entis compositi consistit in modo, quo tales partes invicem combinantur. Etenim si partes tales inter se combinantur, tale prodit compositum, consequenter modum, quo fieri potest compositum, intelligimus, quam primum intelligimus modum, quo partes tales invicem combinantur. Essentia ergo compositi consistit in modo, quo tales partes invicem combinantur (§. 155.). Idem patet ex §. 504. Log. 85. 154. Ont. nec non intelligi potest ex §. 531. 144.

E. gr. Perimeter trianguli rectilinei est ens compositum; etenim ex tribus lineis ita inter se junctis, ut spatium comprehendant, tanquam partibus constat. Essentia igitur perimetri consistit in modo, quo lineæ istæ inter se junguntur, nempe ut duarum extrema coeundant. Possibilis nimirum est perimeter, quia fieri potest, ut tres lineæ rectæ, quarum duæ simul sunt tertia majores, isto modo inter se jungantur.

§. 534.

Essentia compositi cognitio quænam completatur.

Essentiam adeo entis compositi cognoscit, qui cognoscit, quales sint partes & quomodo partes istæ inter se jungantur, ut prodeat compositum.

§. 535.

Rationes eorum, quæ composito conveniunt, unde defumantur.

Ratio eorum, quæ composito conveniunt, continetur in modo compositionis, seu in qualitatibus partium & modo, quo eadem inter se junguntur. Conf. §. 533. 167.

E. gr. Motus indicis in horologio ratio continetur in figura rotarum earumque ad se invicem ratione, nec non in modo, quo eadem inter se junguntur, hoc est, in structura ipsius.

§. 536.

Compositorum similitudo.

Entia composita similia sunt, si singulæ partes unius fuerint similes singulis partibus alterius & eadem eodem modo utrobique

bique jungantur, ut ens unum constituent. Vid. §. 531.
195.

Si duæ fuerint figuræ pentagonæ compositæ ex triangulis tribus, sintque singula triangula unius eo ordine, quo se invicem sequuntur, similia singulis triangulis alterius eodem ordine se insequentibus; figuræ illæ similes sunt. Sequitur hoc per modum corollarii ex propositione præsentī: unde tanquam exemplum eidem illustrandæ inseruit.

§. 537.

Ex adverso entia composita dissimilia sunt, si partes unius fuerint dissimiles partibus alterius, vel partes similes diverso modo jungantur. Vid. §. 211. Idem constat ex §. 183 533. 214. Dissimilitudo compositorum.

E. gr. Mola frumentaria & ferraria ex diversis constant partibus, atque per eas a se invicem distinguuntur primo statim obtutu. Sunt igitur entia composita dissimilia.

§. 538.

Si in duobus entibus compositis partes unius fuerint similes & æquales partibus alterius, singulæ singulis, ac præterea utrobique eodem modo invicem jungantur; entia illa composita prorsus eadem sunt. Conf. §. 465. 469. 467. Identitas compositorum.

§. 539.

Genera & species compositorum determinantur per qualitates partium & modum, quo partes istæ inter se connectuntur. Vid. §. 533. 247. Modus determinandi & genera & species compositorum.

Exemplo sunt animalia, v. gr. quadrupedia; quæ etsi componantur ex partibus ejusdem generis, in diversas tamen distinguuntur species per qualitates earum diversas. Unde & differentiam alicujus animalis ab altero exposituri confugimus ad differentias partium in oculos incurrentes.

§. 540.

Ex nihilo oriri quid dicitur, si existere incipit, cum nihil antea ejus actu esset. Annihilari dicitur, si, quod existit, ita existere desinit, ut nihil ejus amplius actu supersit. Ortus ex nihilo & annihilatio definitio.

§. 541.

Ortus & interitus definitio.

Oriri autem simpliciter dicitur, quod existere incipit, cum antea non existeret: ex adverso autem *interire* simpliciter dicitur, quod existere desinit, cum antea existeret. *Dum adeo ens oritur, ex statu mere possibilitatis deducitur in statum actualitatis, seu a potentia deducitur ad actum; dum vero interit, ex statu actualitatis reducitur in statum possibilitatis, seu ab actu deducitur ad potentiam.*

§. 542.

Compositorum ortus ac interitus qualis.

Composita oriri possunt citra rei cujusdam ex nihilo ortum (§. 531. 533. 173. 541. 540.): eadem interire possunt citra cujuspiam annihilationem (§. 533. 541. 540.).

Omnia corpora artificialia oriuntur citra rei alicujus ex nihilo ortum, cum partes ex materia præexistente formentur atque inde illa componantur. V. gr. In mola frumentaria rotæ parantur ex ligno, una cum axibus, quibus insiguntur, aliæ partes constant ex ferro, lapides molares ex saxo sabuloso & ita porro. Omnis adeo materia, ex quibus partes eam constituentes parantur, præexistit, nec quicquam compositionem ingreditur, quod ex nihilo oriatur. Dum vero partes eo modo combinantur, qui molæ frumentariæ convenit; ipsa mola frumentaria existere incipit. Ex adverso mola interit, dum partes conjunctæ iterum disjunguntur & disjuncta porro destruuntur, etsi nihil ejus materiæ, unde partes singulæ constabant, annihiletur. Obtinet idem in corporum naturalium ortu atque interitu, id quod pulli in ovo generatio & ex ovo exclusi corruptio per putrefactionem clarissime loquitur.

§. 543.

Ortus & interitus entium compositorum qualis notio sit possibilis.

Ortus atque interitus entium compositorum notio distincta formari potest. Vid. de ortu §. 533. 541. Ont. & §. 652. Log. de interitu §. 541. 533. 70. Ont. & §. 652. Log.

E. gr. Ortus machinarum, v. gr. molarum frumentariarum & horologiorum, distincta, immo adæquata notione explicari potest. Describi enim possunt actiones singulæ, quibus singulæ machinæ cujuslibet partes parantur, & paratæ eo modo combinantur, prout postulat unumquodque machinarum genus, v. gr. prout convenit molæ frumentariæ.

mentariæ & horologio. Similiter quoque doceri potest, quomodo machina intereat, vel dum materia, ex qua partes constant, destruitur aut ipso usu arteritur, vel dum partes invicem conjunctæ disjunguntur. Idem obtinet etiam in naturalium rerum ortu atque interitu. E gr. Distincte describi potest formatio successiva pulli in ovo, & ex Physica patet, quod distincte non minus exponi possit, quomodo corpus mortuum putredine corripitur & ejus ope prorsus destruitur.

CAPUT II.

DE

EXTENSIONE CONTINUITATE,
SPATIO ET TEMPORE.

§. 544.

SI quid percipimus tanquam a nobis diversum, aut, si magis, ubi nobis alicujus conscii sumus tanquam a nobis notio. *Extrinsèci* diversi: illud *extra nos* repræsentamus. Et in genere illa *extra se invicem* repræsentamus, quæ tanquam a se invicem distincta percipimus.

§. 545.

Ex adverso si quid percipimus tanquam tale, quod in numero determinationum est notionem nostri constituentium; id *intra nos* repræsentamus. Et in genere tanquam *intra rem* repræsentamus ea, quæ agnoscimus esse in numero determinationum notionem entis constituentium. *Intrinsèci*

E. gr. Actus percipiendi objecta externa refertur inter eas determinationes, quæ notionem mentis nostræ ingrediuntur. Unde cum nobis repræsentamus tanquam in mente nostra existentem, nec ullo modo fieri potest, ut eum exhibeamus tanquam extra nos. Etenim cum eum a voluntate nostra dependentem agnoscimus, quatenus organa sensoria objectis vel obvertere, vel ab iis avertere valeamus; eum a mente nostra tanquam ens independentem ab eadem existens dimove-

Zzz 3

re

re nullo modo possumus. Tenendum vero est, nos hic de omnibus determinationibus loqui, sive inter essentialia, sive inter attributa, sive inter modos referantur.

§. 546.

Modus determinationis
entis cognoscendi a priori.

Si quæ sibi mutuo non repugnant (§. 307. Log.), aut per se invicem determinantur (§. 297. 112. 122.); ea inter determinationes referenda, quæ notionem entis alicujus constituunt.

Ceterum hac ratione omnes reperiri determinationes rei, nec alias, quæ alterius generis sint, dari posse; haud difficulter patet. Etenim ea, quæ enti alicui inesse supponimus, aut sibi mutuo non repugnant, aut repugnant. Quæ sibi mutuo repugnant, ea simul inesse nequeunt (§. 307. Log.): ergo enti non insunt, nisi quæ sibi mutuo non repugnant. Enimvero quæ sibi mutuo non repugnant, ea vel per se invicem determinantur, vel non determinantur. Plura adeo enti inesse nequeunt, quam quæ sibi mutuo non repugnant ac per se invicem vel determinantur, vel non determinantur.

§. 547.

Modus eadem cognoscendi a posteriori.

Si qua in notione entis sensibus obvii deprehendimus, ea inter determinationes referenda, quæ notionem entis constituunt. Patet per definitionem determinationis (§. 122.).

§. 548.

Extensionis definitio.

Si plura diversa, adeoque extra se invicem existentia (§. 544.), tanquam in uno nobis representamus; notio extensionis oritur: ut adeo *Extensio* sit multorum diversorum, aut, si mavis, extra se invicem existentium, coexistentia in uno, atque *constituatur multorum extra se invicem existentium unione.*

E. gr. Lineæ rectæ tribuitur extensio, quatenus in ea distinguimus partes plures diversas atque adeo extra se invicem existentes, quæ inter se unitæ unum quid efficiunt. Patet adeo, ad notionem extensionis minime sufficere, ut plura extra se invicem existant, sed requiritur præterea, ut inter se uniantur sicque unum quid efficiant. Notione extensionis abutuntur, qui tanquam a se distincta & extra se invicem existentia considerant, quæ non sunt nisi rerum modi & attributa

buta ab ipsis inseparabilia, adeoque cum re modificata idem, atque inde extensionem tribuunt iis, quibus nulla competere potest. Ita qui in mente nostra facultates diversis animæ sibi repræsentant tanquam entia diversa, quorum unum extra alterum existit, & quæ simul sumta mentem humanam constituunt; eidem extensionem tribuunt: quod quam sit a veritate alienum, in Psychologia ostendimus.

§. 549.

Quoniam in extenso multa sunt, quæ simul sumta sunt idem cum ipso tanquam uno, ipsumque constituunt (§. 548.); *extensum omne habet partes, quarum unaquæque extra alteram existit* (§. 341.), *easque inter se unitas.*

Extensi partes.

§. 550.

Quod habet partes, quorum una extra alteram existit, sed quæ invicem unitæ sunt, extensum est. Conf. §. 341. 331. 182. 548. quidnam sit.

Extensum

§. 551.

Partes interminatæ extensi in abstracto spectati non differunt nisi numero. Si enim extensum in abstracto spectatur, partes interminatæ non alio respectu considerantur, nisi quatenus una extra alteram existit, & una alteri unitur, præcisè omnibus determinationibus intrinsicis (§. 548.) atque adeo unam alteri salvo omni respectu, qui hic attenditur, substituere licet. Sunt igitur eædem (§. 181.), adeoque non differunt nisi numero (§. 184.).

Differentiæ partium extensi.

Lineæ rectæ non tribuimus extensionem nisi in abstracto spectatam. Partes vero lineæ non differunt nisi numero. Divide enim lineam rectam in quotcunque & quascunque partes. Junge has partes tot diversis modis, quot licuerit: constanter eadem prodibit linea, ita ut uno modo composita non differat ab ea, quæ modo quocunque alio componitur. Eodem modo sese res habet in solido sive corpore mathematico. Equidem in Cosmologia ostendimus non dari istiusmodi extensum in rerum natura; id tamen minime obstat, quo minus in abstracto ex notione extensionis excludamus, quæ ad eam minime pertinent. Quoniam partes supponimus interminatas, eas consideramus præcisè magnitudine & terminis, consequenter sine relatione ad totum, quæ eas partes

partes

partes totius vel similes, vel dissimiles efficit, prout vel eandem, vel diversam ad idem rationem habent (§ 170. *Arithm.*), ac sine figura, quæ easdem in se spectatas vel similes sibi invicem, vel dissimiles reddit, prout termini eodem, vel diverso modo constituuntur, adeoque ipsæ prout eodem modo, vel diverso determinantur (§ 217). Cum adeo hic partes extensi in se spectentur sine relatione ad totum, in propositione præsentem notionem partis præcindimus, quæ respectum quendam ad totum involvit (§. 341.), atque eas non consideramus nisi ut res extenso inexistentes.

§. 552.

Uniformitas
extensi.

Quoniam in extenso in abstracto spectato si $A, B \& C$ numero differunt, eadem nec aliter nisi numero differunt (§ 551.), consequenter in iis determinationes intrinsecæ diversæ non dantur, nisi quod unumquodque eorum propriam sibi existentiam habeat (§. 184.); si $A, B \& C$ in extenso utcumque sumantur, nulla potest fingi determinatio in A , quæ non sit in $B \& C$, nec ulla fingi potest determinatio in B vel C , quæ non simul locum habeat in $A \& C$, vel $B \& A$, consequenter, cum in interminato nulla habeatur ratio magnitudinis, $A, B \& C$ utcumque sumta in extenso, quod in abstracto spectatur, qualitatibus nullis differunt (§. 455.).

§. 553.

Similitudo eo-
rum, quæ nu-
mero differ-
runt in exten-
so.

Quoniam similia sunt, quæ qualitatibus non differunt (§. 464.); extensum in A simile est extenso in $B \& C$, seu quæ in extenso numero differunt, similia sunt, si extensum in abstracto spectetur (§. 552.).

§. 554.

Continui de-
finiitio.

Si in composito partes eo ordine juxta se invicem collocentur, ut aliæ inter ipsas ordine alio interponi absolute impossibile sit, compositum continuum dicitur. Continuitas adeo excludit existentiam partis diversæ intermedia inter duas datas sibi proximas possibilem.

E. gr. Vitri polito splendor continuus est, si inter particulas politas non relinquatur locus aliis minime politis, ita ut impossibile sit inter duas quascunque particulas politas in superficie vitri utcumque assumtas, sed sibi invicem proximas interponi aliam minime politam.

§. 555.

§. 555.

Ex adverso *interruptum* vel *non continuum* appellamus, si partes in composito eo ordine juxta se invicem collocentur, ut aliae inter ipsas ordine alio interponantur vel interponi possint. *Interruptio adeo ponit existentiam partis diversae intermediae inter duas datas actualem, sive possibilem.*

Interrupti
definitio.

E. gr. Splendor virtutis politus interruptus est, si inter particulas politas interjacent aliae minus politae.

§. 556.

Duo extensa terminata *contigua* appellantur, quorum superficies se muruo contingunt, ita ut ipsa duo maneant, minime autem unum efficiant extensum. *Contiguitas adeo excludit existentiam tertii intermedii actualem.*

Contigui de-
finitio.

E. gr. Duo libri in repositoio collocati contigui sunt, si superficies unius una tangat superficiem unam alterius, ipsi tamen libri duo maneant, nec unum tantummodo efficiant.

§. 557.

Quoniam superficies contiguum in contactu actu manent distinctae (§. 556.); *nihil obstat, quo minus inter contigua tertium aliquod extensum interponatur.*

An inter con-
tigua tertium
interponi pos-
sit.

§. 558.

Cum itaque contiguitas non excludat existentiam possibilem tertii intermedii (§. 557.), *contigua non sunt continua* (§. 554.).

Contigua cum
non sint con-
tinua.

§. 559.

Pars actualis est, quae suis propriis terminis continetur: *possibilis vero*, cui termini pro arbitrio constitui possunt.

Partis actualis
& possibilis
definitio.

E. gr. In horologio partes sunt actuales, quia unaquaque propriam sibi habet figuram. Ast in massa plumbi, quatenus apparet, partes nonnisi posibles sunt, cum figuram iis pro arbitrio tribuere valeamus easdem a se invicem separantes.

§. 560.

In continuo in abstracto spectato partes tantummodo pos-
(Ontologia contracta.)

A a a a

sibiles

Partes conti-
nuae

fibiles sunt, non actuales (§. 559. 556. 558.); in serie autem continua contiguorum partes sunt actuales. Vid. §. 559. 556.

§. 561.

Distantiæ de-
finitio.

Si inter duo extensa A & B extensum tertium actu interpositum est, vel saltem iis immotis interponi potest; *distare a se invicem dicuntur.* Est autem *distantiæ* linea brevissima inter duo contenta.

In serie continua librorum sex primus a sexto distat, propterea quod inter primum & sextum secundus, tertius, quartus & quintus actu interponuntur. In distantia tantummodo una consideratur dimensio, atque adeo eam concipimus instar lineæ (§. 15. *Geom.*). Quoniam vero ab uno extenso usque ad alterum plures sæpius lineæ rectæ diversæ longitudinis duci possunt, nec in omni superficie lineas rectas uno termino usque ad alterum ducere licet; ideo ut distantia determinatum quid, non vagum significet, per lineam brevissimam defini debet.

§. 562.

Partium con-
tinui & con-
tiguorum fi-
tus.

Nec partes continui, nec contigua a se invicem distant.
Vid. §. 554. 557.

§. 563.

Uniri quæ di-
cantur.

Si A & B sint duo, ex iis tamen fiat unum, *uniri dicuntur.*

§. 564.

Cohæsi-
o pluri-
um.

Quod si vero plura A, B, C &c. ita jungantur, ut simul quidem unum ens compositum constituent, ipsam tamen plura maneant, seu, quod perinde est, si ex pluribus partibus actualibus fiat ens unum compositum; A, B, C &c. inter se *coherere*, minime autem unitæ dicuntur.

E. gr. Horologium ex pluribus constat partibus, quæ ita conjunguntur, ut ens unum constituent. Sunt tamen singulæ partes æquales. Quamobrem partes istæ coherere equidem inter se, minime tamen una alteri unitur. Cohæsi- o nimirum distinguenda est ab unione. In cohæsi- one manet dualitas seu in genere pluralitas, quæ in unione locum non habet.

§. 565.

§. 565.

Quoniam in continuo in abstracto spectato partes tantummodo possibiles sunt, non actuales; partes autem contiguae actuales manent (§. 560.); partes contiguae tantummodo cohaerent (§. 564.), in continuo autem partes sunt unitae (§. 563.).

Unio partium
continui.

§. 566.

Extensum est continuum. Conf. §. 548. 563.

Extensi con-
tinuitas.

§. 567.

Notio extensionis & continuitatis, quam dedimus, distincta non abhorret a recepto terminorum significatu. Conf. Jungius Log. Hamb. l. 1. c. 5. Clauberg phys. contractæ § 34.

Notio exten-
sionis & conti-
nuitatis num
receptæ con-
veniat.

Continuum vulgo definiri solet, quod habeat partes communi termino copulatas.

§. 568.

Notio extensionis & continuitatis, quam dedimus, est communi usui loquendi conformis.

Notio exten-
sionis & conti-
nuitatis usui
loquendi con-
formis.

§. 569.

Si, dum A existit, etiam B, C, D &c. existunt, A, B, C, D &c. dicuntur simultanea. Si vero, dum A existit, B non existit, ipso autem A existere desinente B existere incipit, & similiter si, dum B existit, C non existit, ipso autem B existere desinente C existere incipit, ac ita porro; A, B, C &c. sunt successiva. Entia simultanea dicuntur etiam coexistentia.

Simul aneo-
rum & succes-
sivorum de-
finitio.

E. gr. In horto flores, qui vere una eundem ornant, sunt simultanea; qui vero aliis pereuntibus in conspectum prodeunt, sunt successiva.

§. 570.

Ens permanens dicitur, cujus determinationes essentiales sunt simultaneae. Ens autem successivum appellatur, cujus determinationes essentiales sunt successivae.

Entis perma-
nentis & suc-
cessivi defini-
tio.

E. gr. Essentia horologii consistit in ipsius structura. Omnes vero partes, quibus horologium constat, existunt simul, quamdiu horologium existit: de integro enim sermo est, non de mutilo. Ex adverso

motus est ens successivum: componitur enim ex partibus successivis, quæ non una existunt, sed quarum una sequitur alteram.

§. 571.

Modus, quo
ad notionem
temporis per-
venitur.

Si ad continuam successivorum A, B, C, D &c. successionem attendentes, existentiam ipsius A distinguimus ab existentia ipsius B, existentiam ipsius B ab existentia ipsius C, existentiam ipsius C ab existentia ipsius D &c. quatenus tali ordine se invicem consequuntur, ut A sit primum, B secundum, C tertium, D quartum &c. notionem temporis habemus.

Observavi collectione existentiarum successivarum in continua serie formari notionem temporis. Quoniam tamen non satis commodum videbatur ipsam rerum durationem appellare tempus, quemadmodum nonnullis videtur, præsertim cum etiam tempus concipiatur præcisè existentis rerum, ita ut res in tempore existere dicantur; ideo evidens esse videbatur, tempus equidem non esse ipsam durationem rerum seu existentiam continuatam, sine existentis tamen successivorum non posse concipi. Jam vero cum in tempore distinguatur primum a secundo, secundum a tertio, tertium a quarto & ita porro, ita ut secundum non sit primum, nec tertium secundum, nec quartum tertium ac ita porro, tempus constitui intellexi per ordinem rerum successive in continua serie existentium, atque adeo pendere a possibilitate successive in continua serie existendi.

§. 572.

Temporis
definitio.

Tempus adeo est ordo successivorum in serie continua.

§. 573.

Demonstratio
definitionis.

Tempus esse ordinem successivorum in serie continua ex notatione ordinis a me primum evoluta ita ostendere soleo. Successiva A, B, C, D &c. sunt entia, quæ hic in continua serie collocantur. A & B ita comparata sunt, ut simul eadem existere repugnet, non tamen repugnet A existere post B, ita ut posito A ponatur post ipsum B. Similiter B & C sunt ita comparata, ut simul eadem existere repugnet, non tamen repugnet C existere post B, quin potius posito B existere debeat C post B & quidem C potius quam quodcumque aliud. Et ita quoque sese habent C & D, ac quæcumque sequuntur. Patet adeo successiva ita locari, ut

unum.

unumquodque existat extra alterum, sed cum altero simul existere nequeat ullum, sequatur tamen illud, quod posito ante ipsum altero post idem poni debet. Regula hic adest, juxta quam unicuique locus suus assignatur, vi cuius A esse debet primum, B secundum, C tertium, D quartum &c. in serie atque ideo successivorum loca eodem modo determinantur (§. 215.), consequenter ex hac determinatione similitudo nascitur ex modo, quo res successivæ se invicem sequuntur (§. 217.). Similitudo obvia in modo, quo res se invicem consequuntur cum sit ordo (§. 472.), in successione rerum ordinem dari patet. Et quoniam posito A post ipsum poni debeat B, non autem poni possit C vel D, vel aliud quodcunque, & posito B post A poni debeat post B potius C quam D vel aliud quodcunque &c. ideo A, B, C, D ita collocantur, ut alia ab iis diversa inter ea interponi nequeant, quamdiu scilicet rationes locandi ab ipsis desumuntur, consequenter series, in qua collocantur successiva A, B, C, D &c. continua est (§. 554.). Enimvero notio temporis adhæret seriei continuæ successivorum, ita ut impossibile sit hanc cogitare, nec tamen simul notionem temporis habere (§. 571.), consequenter posita serie continua successivorum poni etiam debeat tempus. Quare cum hic saltem res considerentur secundum successionem, quatenus nimirum existentia unius sequitur existentiam alterius (§. cit.), ex collectione autem existentiarum oriatur saltem multitudo (§. 331.), non vero quod est continuum; igitur patet non relinqui aliud, in quo tempus consistere possit, nisi ordinem in continua serie successivorum.

§. 574.

Tempus non datur nisi existentibus successivis in continua serie: quam primum vero res successivæ in continua serie existunt, tempus datur (§. 573.).

Tempus quando datur.

§. 575.

Tempus diversum est tum a rebus successivis, tum ab existentia earundem (§. 472. 574.).

Temporis diversitas a rebus & earum existentia.

§. 576.

Tempus tamen possibile, etsi res nondum existant, consequenter in abstracto, quatenus denotat ordinem possibilem successivo.

Temporis possibilitas.

favorum in continua serie existentium, concipi potest, etiamsi res nullæ existant (§. 171.).

§. 577.

Fundamen-
tum notionis
imaginarie
temporis.

Quoniam non repugnat, ut, existentibus tam simulta-
neis, quam successivis, si simul existant *A* & *a*, *a* existere cefi-
nente eidemque *b* succedente existat adhuc *A*, consequenter *A*
exister simul cum *a* & *b*, extiterit tamen, cum *b* nondum existe-
ret, & adhuc existat, ubi *a* non amplius existit; atque idem et-
iam se habeat in aliis: ideo *notionem temporis realem ad imagi-
nariam reduci* (§. 170.) cum id, quod in tempore respondet
ipsi *A* videretur esse idem cum eo, quod responderet ipsi *a* & simul
cum eo, quod responderet ipsi *b*, *tempus dividimus in partes to-
tus constituentes* (§. 341.) & quoniam res successivæ hic non con-
siderantur nisi existentes, *partes temporis interminatas similes po-
nimus* (§. 195.).

§. 578.

Durationis
definitio.

Si ens *A* coëxistit successivis in continua serie *a, b, c, &c.*
durare dicitur; ut adeo *Duratio* sit existentia, qua rebus pluribus
successivis quid coëxistit, seu existentia simultanea cum rebus plu-
ribus successivis.

Potest etiam duratio definiri per existentiam unius existentie plurium
successivorum continuatam.

§. 579.

Duratio quo-
modo intelli-
gibilis redda-
tur.

Hinc existentia seu duratio *ipsius A* *distincte explicatur*
per existentiam rerum successivarum a, b, c &c. quibus coëx-
istit.

E. gr. Duratio hominis, quam longitudinem vite speciali nomine
compellamus, resolvitur in periodos solares, quibus Sol motum pro-
prium per eclipticam absolvit, hoc est, in annos. Annus enim non
designatur nisi per existentiam revolutionis unius Solis per eclipti-
cam.

§. 580.

Duratio re-
rum cur men-
surabilia.

Quoniam itaque inter durationem seu existentiam con-
tinuatam ipsius *A* & inter existentias rerum *a, b, c &c.* ea interce-
dit

dit relatio, quæ est inter quantitates homogeneas (§. 32. *Arithm.*) & sine tertio assumpto intelligi potest; inter existentiam ipsius A & existentias rerum *a, b, c* &c. ratio intercedit (§. 126. *Arithm.*), consequenter duratio ipsius A per durationem aliarum rerum *a, b, c* &c. mensurabilis (§. 438.).

§. 581.

Notionem adeo imaginariam temporis formaturi idem consideramus tanquam ens compositum ex partibus successivis continuis nec intrinsece differentibus a rebus successivis distinctum, cui eadem coexistunt (§. 577. 571. 569. 575. 574.).

Notio temporis imaginaria.

Pater itaque notioni imaginariæ entis nihil inesse, cui non quidpiam veri respondeat. Atque adeo eadem veræ vicaria esse potest, ubi non nisi magnitudinis temporis habenda ratio, seu durationes rerum inter se comparanda; ut una per alias intelligatur. Quamobrem cum Mathematici non aliter de tempore agant, quam quatenus idem dimetiri liceat, ut rerum durationes distincte intelligantur; notio quoque imaginaria iisdem sufficit. Periculo autem errandi sese exponit, qui notionem imaginariam cum reali confundens tempus pro ente reali extra res successivas existente habet, ubi notionem imaginariam ultra eos limites extendit, intra quos veræ vicaria esse potest, & quidem tanquam actuale, quod sine principio fluxit & sine fine fluat.

§. 582.

Vi notionis imaginariæ tempus recte representatur per lineam, quæ fluxu puncti continuo gignitur, vellem. Ita enim prodit totum aliquod ex partibus continuis compositum, quod tanquam distinctum considerare licet a rebus successivis & in quo non nisi unicum punctum præsens est, quod nempe designatur per punctum fluens, rebus successivis fluxui puncti coexistentibus, quemadmodum requirit notio temporis imaginaria (§. 581.).

Cur tempus per lineam rectam representari possit.

§. 583.

Partes temporis actualis nullæ sunt, nisi quæ per existentias rerum actu designantur (§. 572. 577. 580.).

Partes temporis actualis quales.

Usum in temporis partibus distinguendis & in tempore actu in partes reales dividendo habent observationes microscopice, quibus mutationes

tationes admodum exiles innotescunt, veluti motus animalculorum.

§. 584.

Tempora
præsentis,
præteriti &
futuri defini-
tio.

Hinc *tempus præsens* est, quod designatur per existentiam rei actu existentis. *Præteritum* est, quod designatur per existentias rerum, quæ existere desierunt seu ab actu in statum possibilitatis reciderunt. *Futurum* denique est, quod designatur per existentias rerum exiturarum, quæ ut a potentia ad actum traducenda considerantur. Quoniam vero temporis partes nullæ dantur, nisi quæ per existentias rerum actu designantur (§. 573.); adeoque alæ ne fingi quidem possint, nisi quæ per existentias rerum, quæ existere desierunt; quæ existunt & post ea sequuntur, quæ nunc existunt, designantur; *nullum quoque ne fingi quidem potest tempus, quod non sit vel præsens, vel præteritum vel futurum.*

§. 585.

Quomodo
tempus men-
suetur.

Tempus mensurari potest motu æquabili alicujus objecti. Ponamus objectum aliquod, quod instar puncti supponere licet, motu æquabili incedere in peripheria circuli, quæ divisa sit in partes quocunque æquales *ab, bc, cd, de, ef* &c. Quidquid in universitate rerum existit, dum punctum hæret in *a*, & punctis singulis sequentibus peripheriæ, illud coexistit motui per *ab*, per *bc*; per *cd*, per *de*, per *ef* &c. Atque adeo duratio rerum coexistentium motui per *ab* & *bc*, potest explicari per mobilis existentiam continuatam in singulis punctis ab *a* usque ad *c* (§. 579. 580.). Similiter duratio rerum coexistentium motui per *ab, bc, de* & *ef* explicari potest per existentiam mobilis in singulis punctis ab *a* usque ad *f* continuatam (§. §. cit.). Quoniam motus æquabilis est, ideo durationes in singulis peripheriæ partibus *ab, bc, cd, de, ef* &c. æqualibus per *bypoth.* eadem sunt, ut quamvis alteri substituere liceat. Est adeo duratio motus per *af* ad durationem motus per *ab*, ut numerus rationalis integer ad unitatem (§. 339. 340.), consequenter durationem motus æquabilis datam pro mensura assumere eoque continuato tempus mensurare licet (§. 438.).

Con-

Convenit propositio praxi communi. Condimus enim horologia, in quibus index motu æquabili per circuli peripheriam movetur.

§. 586.

Notio temporis communis imaginaria est ac plerumque confusa (§. 581.).

Notio temporis communis qualis sit.

§. 587.

Tempus se habet ad res successivas sicuti numerus ad res numeratas. Etenim numerus est unitatum earundem multitudo (§. 340.), per unitates autem designantur entia (§. 332.), quorum unumquodque unum est (§. 329.) & per unitates easdem entia similia denotantur (§. 336.). Numerus adeo differt a rebus numeratis, non tamen datur nisi existentibus rebus, quæ, quatenus ut unitates spectantur eandem multitudinem constituentes, similes sunt, sed positis his rebus ponitur & ipse, iis sublati ipse quoque tollitur. Jam de tempore vide §. 572. 574. 575.

Analogia inter tempus & numerum.

Hæc analogia, quæ inter tempus ac numerum intercedit, plurimum facit ad discrimen inter notionem temporis realem ac imaginariam pervidendum.

§. 588.

Si ad simultaneorum A, B, C, D &c. coexistentiam attendentes modum, quo A coexistit ipsi B distinguimus a modo, quo ceteris C & D coexistit, & similiter modum, quo B coexistit ipsi C, a modo, quo ceteris A & D coexistit &c. quatenus tali ordine juxta se invicem collocantur, ut distantia inter A & C sit diversa a distantia inter idem A & D &c. notionem spatii habemus.

Modus, quo ad notionem spatii pervenitur.

§. 589.

Spatium est ordo simultaneorum, quatenus scilicet coexistunt.

Spatii definitio.

§. 590.

Spatium esse ordinem simultaneorum, quatenus coexistunt, ex notione ordinis evincitur. Sint A, B, C, D &c. entia, quæ simul existunt. Quoniam A, B, C, D &c. simul existunt, ideo co-
(Ontologia contracta.) Bb bb existen-

Definitionis demonstratio.

existentia eorum compatibilis, hoc est, existentia ipsius A non repugnat existentiae ipsius B, nec existentiae ceterarum C & D &c. (§. 506. Log.). Et quia A, B, C, D &c. non sunt ensidem, sed entia a se invicem, saltem numero diversa; ideo A existere debet extra B, C extra B & A, D extra C, B & A &c. (§. 544.). Simultanea igitur ita collocantur, ut unumquodque eorum existat extra alterum, adeoque si in continua serie collocentur, A & B non distent a se invicem, nec distent B & C, nec C & D &c. inter A tamen & C locetur B, quemadmodum inter B & D locatur C &c. Regula igitur adest, juxta quam locantur, quæ simul existunt, atque ideo simultaneorum loca eodem modo determinantur (§. 215.), consequenter ex hac determinatione similitudo nascitur in modo, quo simultanea coexistunt (§. 217.). Similitudo obvia in modo, quo res juxta se invicem collocantur, cum sit ordo (§. 472.); in coexistentia rerum dari ordinem patet. Enimvero notio spatii adhæret notioni simultaneorum, quatenus unum extra alterum existit & hinc diversæ distantiae coexistentium ab uno eorum assumpto resultant (§. 588.); quemadmodum notio temporis adhæret notioni successivorum, quatenus unum alteri in continua serie succedit (§. 571.). Quamobrem cum tempus non sit nisi ordo successivorum, quatenus sibi invicem succedunt in serie continua (§. 573.); ita nec spatium aliud esse potest nisi ordo simultaneorum, quatenus coexistunt, seu quæ in eorum coexistentia spectantur.

§. 591.

Unde spatium
oriatur.*Spatium adeo resultat ex possibilitate coexistendi.*

§. 592.

Continuitas
spatii.*Spatium in abstracto concipi debet continuum (§. 569. 554. 591.).*

§. 593.

Spatium in
abstracto con-
stat ex parti-
bus possibili-
bus.

Quoniam adeo in continuo A, B, C, D &c. quæ eidem insunt, uniuntur (§. 565.); adeoque ex iis fit unum (§. 563.); *spatium in abstracto spectatum concipitur tanquam totum ex partibus compositum (§. 341.),* cumque in continuo in abstracto spectato partes tantummodo possibiles sint (§. 560.), *tanquam compositum ex partibus possibilibus (§. 592.), non actualibus.*

§. 594.

§. 594.

Spatium in abstracto spectatum concipi debet tanquam extensum (§. 592. 595. 591. 588. 548.).

Extensio spatii.

§. 595.

Spatium in A simile est spatio in B & C, seu, quæ in spatio numero differunt, similia sunt, si idem in abstracto spectetur, neque adeo aliter nisi numero differre possunt.

Similitudo coexistentium in spatio in abstracto spectato.

Spatium enim in abstracto spectatum extensum est (§. 594.) neque ipsi alia tribui potest extensio, quam quæ spectatur in abstracto: quod per se patet. Enimvero in extenso in abstracto spectato A quomodocunque assumptum simile est ipsis B & C quomodocunque assumptis seu, quæ in eodem numero differunt, similia sunt (§. 553.). Ergo in spatio in abstracto spectato A simile est spatio in B & C, seu, quæ in spatio numero differunt, similia sunt, consequenter nec aliter nisi numero differre possunt (§. 195. 184.).

§. 596.

Extensum dicitur uniforme, in quo non dantur nisi numero differentia: Difforme est, in quo dantur, quæ intrinsece differunt, seu inter se dissimilia sunt.

Extensi uniformis atque difformis definitio.

Ita supponimus extensionem uniformem in plumbo, cum non in eo appareant, nisi quæ numero differunt, quia compositum concipitur ex corpusculis similibus, quippe eadem mixtione genitis, & eodem modo inter se junctis. Enimvero in corpore humano extensio difformis est, cum partes in hoc extenso sint dissimiles: quod attendenti per se manifestum est.

§. 597.

Extensum in abstracto spectatum uniforme est (§. 596. add. §. 553.).

Extensi in abstracto spectati uniformitas.

§. 598.

Spatium in abstracto spectatum uniforme extensum est (§. 596. add. §. 595. 594.).

Spatii in abstracto uniformitas.

§. 599.

Notionem imaginariam spatii formaturi idem consideramus tanquam extensum uniforme continuum (§. 589. 598. 592.),

Notio spatii imaginaria.

Bb bb 2

quod

quod est indivisibile ac immobile, & a rebus existentibus penetrabile.

Quod sit *indivisibile*, sic evincitur: ponamus A, B & C esse partes possibiles spatii (§. 593.). Ponamus porro spatium posse dividi in partes actuales, ita, ut B non maneat continuum ipsis A & C, sed iis contiguum fiat. Auferatur jam B, non alio eidem simili in ejus locum substituto, ut spatium redintegretur. Cum nihil jam obstat, quo minus extensum ipsi B simile inter extensa A & C interponi possit, A & C a se invicem distant (§. 561.). Quoniam vero spatium concipimus, ubi concipimus possibilitatem coëxistendi (§. 591.); inter A & C adhuc spatium simile spatio terminato B concipere debemus, quod tamen auferri supponimus. Dicendum itaque foret spatium, cuius pars est B, in alio spatio existere. Cumque idem dicendum foret de hoc spatio spatii, si divisibile ponatur, neque plus rationis subsit, cur spatium spatii, quam spatium coëxistentia recipiens indivisibile supponatur; evidens est, spatium esse indivisibile.

Similiter ponamus spatium quantumvis magnum, v. gr. in quo totus existit mundus, aliorum moveri. Perinde igitur spatium vacuum ibi relinqui putabitur ac si mundus ex eo, quo continetur, spatio aliorum moveretur, propterea quod adhuc possibile videbitur ibidem collocari rerum simul existentium quandam congeriem, quemadmodum ante ibidem constituta erat, cum ex possibilitate coëxistendi nascatur notio spatii (§. 591.). Perveniendum adeo tandem erit ad spatium immobile, quemadmodum paulo ante ad indivisibile, consequenter cum non plus rationis subsit, cur spatium spatii, quam spatium simultaneorum receptaculum immobile ponatur; evidens est, spatium imaginarium concipi debere immobile.

Denique cum quæ existunt in spatio eidem coëxistentur; extensio spatii intra extensionem corporis continetur, atque adeo spatium a corporibus penetrari posse concludendum, si ipsum tanquam ens a corporibus distinctum absque iis existere supponimus, quemadmodum fert notio spatii imaginarii.

Qua-

Quatenus spatium imaginarium concipitur tauquam extensum uniforme continuum, eatenus ei nihil tribuitur, cui non aliquid veri respondeat. Quamobrem spatii imaginarii notio veræ vicaria esse potest, ubi nonnisi magnitudinis rerum extensarum habenda ratio, seu corporum magnitudines iuter se comparandæ. Quoniam itaque Mathematici spatium non considerant, quam quatenus a corporibus repletur, seu mensuram magnitudinis corporum constituit, & corpora in eodem moventur, ut & moles, & motus corporum distincte intelligatur; notio quoque imaginaria iisdem sufficit. Periculo autem errandi sese exponit, qui notionem imaginariam cum reali confundens spatium pro ente reali extra res simultaneas existente habet, ubi notionem imaginariam ultra eos limites extendit, intra quos veræ vicaria esse potest. Atque ex hac suppositione fluit spatii indivisibilitas & immobilitas. Profecto si supponimus spatium imaginarium esse ens reale actu existens, talia inde consequuntur attributa, quæ Deo conveniunt, veluti quod sit actu infinitum, actus purus, omnia continens & omnia penetrans, incorporeum, immutabile, unum in se, æternum, nobis incomprehensibile, sine quo extensa nec esse, nec concipi possunt: quemadmodum ea ex hac suppositione Geometrarum methodo deducere conatus est *Josephus Raphson* in *Conamine Mathematico-Metaphysico* de spatio reali seu ente infinito c. 5. qui inde intulit, spatium esse attribum Dei atque infinitam ejus vereque interminatam essentiam exprimere, secutus *Henricum Morum*, in *Enchiridio Metaphysico* part. 1. c. 8 fol. 168. tom. I. Operum philosophicorum. Ex eodem fonte manavit, quod spatium a nonnullis habeatur pro immensitate Dei, qua rebus omnibus creatis intime præsens est, sicuti tempus sive duratio æternitate Dei constitui putatur. Et *Isaacus Newtonus* in *Optica* sub finem editionis Latine spatium sensorium Dei appellat. Etenim si spatium consideremus tanquam ens reale, quod sublatiis rebus simul existentibus extra se iuvicem existit semperque extitit, ac in infinitum extenditur; aut admittendum erit aliquid a Deo diversum eidem ab æterno coexistens, aut idem ad Deum pertinere dicendum. Sed in has angustias non delabimur, ubi spatium reale ab imaginario distinguimus, aut, quod idem sonat, concretum ab abstracto.

§. 600.

Spatium quando datur.

Spatium non datur nisi existentibus simultaneis (§. 472. add. §. 589.).

§. 601.

Spatii diversitas a rebus & earum existentia.

Spatium diversum est tum a rebus simultaneis, tum ab earum existentia (§. 589. add. §. 472.).

§. 602.

Loci definitio.

Dum simultanea certo ordine coëxistunt, ut modus, quo A coëxistit ipsis B, C, D &c. distingui possit a modo, quo B ipsis A, C, D &c. coëxistit, ac ita porro; patet unicuique simultaneorum determinatum convenire modum coëxistendi, qui diversus est a modo coëxistendi ceterorum singulorum (§. 183). Determinatus adeo modus, quo A simultaneis B, C, D &c. coëxistit, est id, quod *Locum* appellamus.

§. 603.

Situs definitio.

Situs est ordo simultaneorum non continuorum seu interruptorum, quatenus coëxistunt.

E gr. Si sint plures in horto arbores, quas uno obtutu comprehendimus, & sumamus unam earum tanquam primam; tribuimus unicuique situm respectu illius, quatenus eidem non est continua.

§. 604.

Quibusnam conveniat situs.

Quæ determinatum quendam erga se invicem situm habent, ea a se invicem distant (§. 561.). Unde porro consequitur, *situm plurium ad unum per distantias determinari.* Add. §. 603. 555.

§. 605.

Situs identitas & diversitas.

*Eundem adeo situm habent, inter quæ idem extensum interponi potest, seu quæ æquali distantia a se invicem removen-
tur. Diversum vero situm habent, inter quæ idem extensum interponi nequit, seu quæ distantis inæqualibus a se invicem removen-
tur.*

§. 606.

Modus coëxistendi quomodo.

*Si plura non continua coëxistunt, modus coëxistendi unius-
cujus-*

cujusque constituitur per situm ad coëxistentia cetera. Conf. §. do intelligatur. 603. 605. Ont. & §. 40. 303. Geom.

§. 607.

Locus determinatur per distantias existentis a duobus vel pluribus coëxistentibus, quæ simul alii coëxistentium convenire nequeunt. Conf. §. 602. 606. 604. Loci determinatio.

Determinationi loci sufficiunt distantia a coëxistentibus, quæ simul alii coëxistentium convenire nequeunt, utur locus involvat existentis relationem ad coëxistentia omnia. Ex iis enim omnibus sufficit eligere eas, per quas hic locus ab alio quocunque discerni potest. Observant hoc Astronomi locum stellæ determinaturi. Etenim vel 1. distantiam stellæ ab æquatore versus polum proximum determinant, quæ declinationis nomine compellari suevit, & puncti æquatoris, ad quod stella vi declinationis refertur, distantiam a principio arietis, quæ stellæ ascensio recta dicitur; vel 2. distantiam stellæ ab ecliptica versus polum eclipticæ proximum atque distantiam puncti eclipticæ, ad quod stella vi prioris refertur, a principio arietis, quarum distantiarum illa latitudo, hæc longitudo vocatur. Pater adeo determinationem loci stellæ sive per declinationem & ascensionem rectam, sive per latitudinem & longitudinem esse notionibus nostris conformem, quas pragmaticis esse hinc colligitur.

§. 608.

Locus differt a re, quæ in eodem existit, atque instar puncti consideratur. Conf. §. 602. 607. 561. Ont. & §. 11. Geom. Loci a re differentia & quomodo is consideretur.

§. 609.

Extensum dicitur implere Spatium, quatenus in spatio imaginario fingitur pars immobilis ejusdem extensionis. Spatii impletio.

§. 610.

Quoniam duo extensa, cum sint a se invicem saltem numero diversa (§. 184.), extra se invicem existunt (§. 544.); idem spatium simul implere nequeunt (§. 609.), consequenter cum locus concipi debeat in spatio (§. 591. 602.), nec in eodem loco simul esse possunt. Incompatibilitas implendi idem spatium.

§. 611.

Notio spatii
communis &
philosopho-
rum qualis sit.

Notio spatii communis imaginaria est (§. 599.), a quibusdam philosophis adoptata, (conf. Gassendus in philol. Epicuri Syntagm. Part. 2. c. 1. f. 11. T. 3. opp.) ab aliis rejecta.

§. 612.

Partes spatii
actualis.

Spatii actualis partes nullæ sunt, nisi quæ per res extensas existentes actu designantur (§. 590.).

Usum in spatii partibus distinguendis & in spatio actuali in partes reales dividendo habent observationes microscopice, quibus admodum exiles innotescunt, veluti organa animalculorum nudo oculo, immo microscopiis minus exquisitis non observanda.

§. 613.

Analogia inter
spatium & nu-
merum.

Spatium se habet ad res simultaneas sicuti numerus ad res numeratas. Vide denuo §. 587. 600 sq.

§. 614.

Quando ali-
quid succedat
in locum al-
terius.

Si A, B, C & D datum inter se habeant situm, & situ ipsius A mutato aliud quoddam, quod dicatur L, eundem obtineat situm ad B, C & D, quem ante habuerat A, situ ipsorum B, C & D inter se non mutato; Leodem erit in loco, in quo ante fuerat A (§. 604. 607.).

§. 615.

Loci mutatio
& permanen-
tia in eodem.

Si fuerint coëxistentia A, B, C & D, & ordo coëxistendi mutatur, ut scilicet diversis momentis non idem deprehendatur (§. 291.), fueritque ratio mutationis in A, nulla vero in B, C & D; A locum suum mutat, sed B, C & D in eodem permanent (§. 602.).

§. 616.

Unde loci mu-
tatio intelli-
gatur.

Si B, C, D eandem a se invicem distantiam servant, ipsius vero A ab iisdem distantia mutantur; locus ipsius A respectu ceterorum B, C, D mutatur (§. 290. 605. 603. 615.).

Si cometa quidam apparet, ad stellas quasdam fixas ab observatoribus refertur. Ubi postero die eundem observantes deprehendunt, ejus ab iisdem distantias fuisse immutatas, has vero pristino intervallo a se invicem distare, jam aliunde certum est atque per observationes depre-

deprehendi potest; inde colligunt, cometam locum suum respectu istarum fixarum mutasse. Immo eodem modo innouit, Solem continuo mutare locum suum respectu fixarum, nec non Lunam & Planetas ceteros. Et quodcumque tandem phenomenon obieretur, quod in cælum referimus; mutationem loci respectu ceterorum hoc modo determinamus.

§. 617.

Quodsi ergo integra congeries coëxistentium referatur ad alia simultanea extra eandem constituta, cum jam illa æquipollear ipsi A, cetera vero respondeant ipsis B, C, D; evidens est, si *quædam coëxistentium congeries spectetur tanquam existens unum & ad alia coëxistentia referatur, illius autem ab his distantie mutentur, his eadem a se invicem tuentibus; congeriem illam coëxistentium locum suum respectu ceterorum mutare.* Modus alius.

Exemplum præbet navis, quæ secundum flumen defertur. Qualescunque locorum mutationes accidant in navi respectu partium illius, navis tamen integra cum omnibus, quæ in eadem existunt, instar unius existentis consideratur, quatenus ad littora referuntur & in iis vel prope ea constituta objecta. Jam cum objecta ad littora posita, vel etiam puncta in littore assumpta suas a se invicem distantias non mutant, navis tamen distantia ab iisdem mutetur; navis locum suum respectu littoris & objectorum ad idem constitutorum mutare dicitur. Quæ igitur in navi locum mutant respectu navis, in iis duplex loci mutatio facta intelligitur.

§. 618.

Si fuerint coëxistentia A, B, C, D & aliunde certum sit B, C, D loca sua non mutasse, distantia tamen ipsius A a ceteris mutata deprehenditur; A locum suum mutavit (§. 607. 56.). Alius modus.

Utuntur hoc principio Astronomi dijudicaturi, num phenomenon quoddam cœleste locum mutet. Etenim ideo fixarum catalogos condunt, ut appareat, num & quamdiu fixa sint earum loca: reliqua autem phenomena ad easdem referunt & eorum loca per distantias ab iisdem determinant. Immo ideo puncta fixa & circulos fixos in sphaera cœlesti mente designant, ut stellis ad ea relatis judicare valeant, utrum loca mutant, nec ne. Immo eadem ratio est, cur fingamus *(Ontologia contracta.)* Cccc sphaeram

spharam cœlestem mobilem intra spharam immobilem contineri, ad
cujus fixa puncta referimus tandem existentia quævis in universo, ut
locorum mutationes dijudicentur. Sphæra isti immobili æquipollet
spatium immobile, in quo determinare licet loca fixa, quæ successive
ab aliis aliisque existentibus occupantur.

CAPUT III.

DE QUALITATIBUS ET MA-
GNITUDINE ENTIS COM-
POSITI.

§. 619.

Extensio com-
positi & com-
positio exten-
si.

Ens compositum est extensum (Conf. §. 531. 544. 533. 563 sq.
550. 564. 560. 555. 537. 609.) & ens, quod extensum est,
compositum est (§. 549. 531.).

§. 620.

Situs partium
in composito
non continuo.

*In composito non continuo partes singule determinatum ad
se invicem situm habent (§. 531. 555. 561. 604.).*

§. 621.

Figuræ defi-
nitio.

Limes extensi dicitur figura.

§. 622.

Figura com-
positi.

*Ens compositum terminatum figura certa præditum est
(§. 621. add. §. 619.).*

§. 623.

Figuræ par-
tium spatii
imaginarii.

*Ens compositum in spatio imaginario, in quo existere po-
nitur, designat figuram suæ congruentem, planam quidem si
plana fuerit; cavam si convexa; convexam denique, si conca-
va fuerit. Quoniam spatium imaginarium concipitur tanquam
extensum (§. 594.), adeoque continuum (§. 592.) & ens compo-
situm tanquam extensum (§. 619.) ejus aliquam partem implet,
quatenus in spatio imaginario fingitur pars aliqua immobilis
ejusdem*

eiusdem extensionis (§. 609.); ideo spatium considerare licet tanquam fluidum continuum, quod alteri extenso in eodem locato sese exacte accommodat ejusque figuram assumit, quatenus extra locatum in eo extenditur. Fingamus porro fluidum istud circa locatum undiqueque instar aquæ congelascere, ut, remoto extenso, quod in spatio collocabatur, figura supersit. Evidens est, cum figuræ superficialis locati & alterius in spatio residuæ iidem sint termini (§. 29. *Geom.*) eas sibi mutuo congruere debere (§. 469.), cumque spatii pars ambiens, in qua figuram istam superesse fingimus, sit instar receptaculi cavi undiqueque locato contigui, figuram istam esse debere planam, ubi locatum plana figura terminatur; cavam, ubi hoc terminatur figura convexa; convexam denique, ubi hoc figura concava terminatum fuerit.

§. 624.

Omne compositum terminatum habet magnitudinem determinatam. Pater ex demonstratione præcedente, omne ens compositum terminatum determinatam spatii partem adimplere. Quoniam itaque enti composito eadem convenit extensio, quæ concipitur in illa spatii imaginarii parte, quam implet (§. 609.), atque adeo ipsi tribuendæ sunt partes, quarum una extra alteram existit (§. 549.), eademque continuæ (§. 566.); evidens est, si jam ens compositum, quatenus spatii quandam partem implet, in abstracto spectatur, id constare ex partibus continuis. Quamobrem cum partium multitudine constet magnitudo (§. 430.); ens compositum terminatum magnitudinem determinatam habere debet.

§. 625.

Entis compositi magnitudo eadem est cum magnitudine spatii imaginarii, quod eadem figura superficiali terminatur. Etenim si compositum & spatii imaginarii pars eadem figura superficiali terminatur; spatium imaginarium & ens compositum sibi mutuo congruunt (§. 469.). Sunt igitur æqualia (§. 465.), consequenter quantitate (§. 350.), adeoque & magnitudine eadem (§. 437.).

Magnitudo
compositi.

Quanta sit ma-
gnitudo
compositi.

§. 626.

Magnitudo in
abstracto.

Quamobrem cum spatium imaginarium consideretur tanquam extensum uniforme continuum (§. 599.); *magnitudo compositorum in abstracto concipitur instar extensi uniformis continui*. Unde & magnitudo *Quantitas continua* dicitur.

Ita magnitudo consideratur in Geometria, cujus ea objectum est. In Geometria enim magnitudinem in abstracto consideramus, præcis omnibus qualitatibus, sola quantitate relicta. Atque adeo eidem tribui nequeunt nisi partes extra partes, quæ inter se unitæ continuum efficere debent, ut unum constituant. Unde apparet, objectum Geometriæ esse ens imaginarium, quatenus extensum uniforme continuum existere ponitur. Hinc & facile accidit, ut, qui cum studio Geometriæ metaphysicum non conjunxit, extensionem uniformem continuum facile tribuat corporibus, quæ spatio imaginario competit.

§. 627.

Partes magnitudinis in abstracto.

Magnitudo quoque in abstracto spectata, seu quantitas continua partes nonnisi possibiles habet, minime autem actuales (§. 626. add. §. 560.).

§. 628.

Entis compositi mensurabilitas.

Omne ens compositum est mensurabile (§. 624. 438.).

§. 629.

Magnitudo entis compositi quando augeatur.

Si plures partes entis composito extus apponantur, majus evadit (§. 548. 609. 625.); *si inter alias salva earum distantia interponantur, magnitudo eadem manet* (§. 625.).

§. 630.

Quomodo compositum fiat minus.

Quodsi ergo partes quædam aliis non interjectæ demantur, ens compositum fit minus (§. 629. 354.).

§. 631.

Propterea & remotioris definitio.

Propiora dicuntur, quorum minor est distantia; Remotiora, quorum distantia major est.

§. 632.

Alius modus compositum efficiendi minus.

Si partes quædam aliis interpositæ ex composito auferuntur, & ceteræ sibi invicem fiunt propiores; ens compositum fit minus (§. 631. 630.).

Exemplum

Exemplum habemus in spongia aqua immescente. Etenim si comprimitur, aqua ex poris exprimitur, & partes spongiæ propius ad se invicem accedunt: quod ubi contingit, magnitudo ejus perinde minuitur, ac si pars quædam, antequam comprimeretur, resecta fuisset.

§. 633.

Si partes quædam in composito aliis interponantur, ita ut vel eæ, quæ antea erant contiguæ, nunc a se invicem discent; vel quæ distabant, nunc majore intervallo a se invicem discent; magnitudo compositi sit major (§. 629.).

Modus quidam compositum efficiendi majus.

Exemplum nobis præbet lignum, quod, ubi aquam imbibit, intumescit. Etenim aqua irruens in poros ligni, partes a se invicem magis divellit, ubi non erant continuæ vel contiguæ. Ita vero moles ejus augetur.

§. 634.

Si enti composito partes quædam apponuntur, vel ab eodem quædam auferuntur, vel denique transponuntur, & in termino extensionis quicquam occurrat, quod ante diversum erat; figura illius mutatur (§. 621. 195. 290.).

Figuræ mutatione.

Facile apparet, modos plures immutandi figuras comminisci minime posse. Etenim cum ens compositum ex variis partibus constet a se invicem distinctis (§. 531.) atque certo modo inter se junctis (§. 533.); aut plures partes accedere possunt, quam quæ aderant antea, aut quædam auferri possunt, quæ ante compositionem ingrediebantur, aut partes numero eadem, nulla earum ablata, alio modo jungi possunt, quam quo antea jungebantur.

§. 635.

Si enti composito partes quædam apponuntur, vel ab eodem quædam auferuntur, vel denique transponuntur, & in termino extensi occurrat nihil, quod non eodem modo deprehendatur in termino anteriore; figura illius non mutatur (§. 621. 195. 290.).

Quando figura non mutatur.

§. 636.

Si pars una compositi existere possit, etiamsi altera an-

Divisibilitatis definitio.

nihilari ponatur, vel si partes ejus quantumlibet distantes fieri possunt, compositum *divisibile* est.

§. 637.

Divisibilitas
compositi.

Si partes compositi non sint continuæ (§. 555. 561.), aut si sint contiguæ, compositum divisibile est (§. 557.).

In horologio partes continuæ non sunt: illæ autem quovis intervallo a se invicem removeri possunt. Atque adeo horologium divisibile est in plures partes. Similiter partes metalli contiguæ sunt, continuæ enim tantummodo apparent. Est autem quoque metalium quodvis divisibile.

§. 638.

Divisibilitas
continui.

Si partes continuæ non necessario juxta se invicem existunt; continuum est divisibile (§. 294. 290. 555. 561. 636.). Idem patet ex §. 292. 636.). Quod si autem necessario juxta se invicem existant, continuum est indivisibile (§. 292. 562. 636.).

Prius etiam ostenditur hoc modo. Quoniam partes continuæ non necessario juxta se invicem existunt, *per hypoth.* una existere potest, et si altera annihilari ponatur (§. 292.). Continuum adeo divisibile est (§. 636.).

Casus secundus occurrit in spatio imaginario, ubi partes necessario juxta se invicem existentes ponimus ac ideo spatium indivisibile concipimus.

§. 639.

Notionem
compositi di-
stinctam quæ-
nam ingredi
debeant.

In explicanda compositione entis compositi descendendum usque ad partes, quæ tanquam continuum quid spectantur. Et enim cum partes, quæ tanquam continuum quid spectantur, consideremus tanquam ex partibus aliis actualibus non compositas (§. 560.); ad nullas quoque in partium hisce partibus differentias (§. 595.), consequenter nec ad modum, quo inter se combinantur, attendimus propterea, quod in dato casu perinde sit, quæcunque fuerit illarum partium figura & quocunque modo inter se jungantur. Quamobrem cum in resolutione compositi ad partes istiusmodi perventum fuerit, quas tanquam continuas spectare licet; in explicanda compositione entis compositi seu in forman-
da

da notione ejus distincta (§. 652. Log.), ultra eas progrediendum non est.

E. gr. Si structura horologii explicari debet, non solliciti sumus de figura corpusculorum metalli, ex quibus partes illius factæ sunt, multo minus inquirimus quomodo corpuscula illa per mixtionem, hoc est, aliarum particularum combinationem prodeant. Etenim metalla consideramus tanquam continuum quid, in quo nullæ sunt partes actuales a se invicem differentes. Et quas attendimus qualitates metalli, massæ integræ convenire deprehendimus, non corpusculis, ex quibus ea constat.

§. 640.

In composito mutatio nulla contingere potest, nisi quoad Mutationes figuram, magnitudinem, partium situm & locum totius. Es. compositi.
 sentia compositi consistit in modo, quo partes, ex quibus constat (§. 531.), invicem combinantur (§. 533.). Quamobrem nulla eidem mutatio accidere potest, nisi cujus ratio in modo compositionis continetur (§. 167.), consequenter quæ per eundem intelligi potest, cur scilicet hæc potius sit, quam alia (§. 56.). Jam vero cum in composito non considerari possint nisi partes & modus, quo illæ inter se junguntur, ut ens unum constituent (§. 533.); de eo aliud concipi nequit, nisi quod vel partes quædam extrinsecus apponantur, vel inter ceteras interponantur, vel nonnullæ auferantur, vel quæ adsunt, transponantur. Quare cum ex partium appositione & interpositione, & nonnullarum ablatione, vel earum, quarum numerus salvus manet, transpositione mutatio alia non oriatur nisi magnitudinis (§. 629. 630. 632. 633.) & figuræ (§. 634.), & ex transpositione partium variari earum ad se invicem situs possit (§. 604.); mutationes in composito intrinsecæ aliæ accidere nequeunt nisi magnitudinis & figuræ, ac situs partium. Quodsi compositum totum una cum aliis existit; quibus continuum non est; modus coëxistendi ipsius cum ceteris, adeoque situs (§. 602.), constituitur per situm ad coëxistentia cetera (§. 606.). Quamobrem cum locus mutetur, si compositum a coëxistentibus distantias mutat, ipsa vero distantiam suam a se invicem servant (§. 616.), consequenter si situs illius ad hæc variatur

riatur (§. 604.); evidens est, præter mutationes figuræ & magnitudinis atque partium simul locum quoque totius compositi mutari posse.

§. 641.

Utilitas doctrinæ de composito.

Philosophia entis compositi præbet principia philosophandi de corporibus, cum naturalibus, tum artificialibus (§. 531. Ont. & §. 232 sqq. 1193 sq. 532. Log.).

CAPUT IV. DE MOTU.

§. 642.

Motus & Quietis definitio.

Continua loci mutatio *Motus* dicitur: perseverantia autem in eodem loco *Quies* appellatur.

§. 643.

Quando quid moveatur.

Si fuerint coëxistentia A, B, C, D & ordo coëxistendi mutetur, fueritque ratio mutationis in A; ipsum A movetur, B vero, C & D quiescunt (§. 642. add. §. 615.).

§. 644.

Modus colligendi motum factum.

Si fuerint coëxistentia A, B, C, D & aliunde certum sit, B, C & D loca sua non mutasse, A vero distantiam aceteris mutaverit, A motum fuit (§. 642. add. §. 618.).

Ita Astronomi colligunt motum planetarum & cometarum, dum eos referunt ad fixas, quas sua loca non mutasse ex aliis observationibus ante perspexerunt.

§. 645.

Modus alius.

Si quædam coëxistentium congeries spectetur tanquam ens unum & ad alia coëxistentia referatur, quæ loca sua non mutant, atque illius ad hæc distantie mutantur; congeries ista coëxistentium respectu coëxistentium fixarum movetur (§. 644.).

Hac ratione motum hominibus in navi respectu littorum aut arborum ad littora constitutarum tribuimus.

§. 646.

§. 646.

Si B, C, D eandem a se invicem distantiam servant, ipsius Modus adhuc
vero A ab iisdem distantia mutantur, estque ratio mutationis in alius.
A; A motum fuit respectu ceterorum B, C & D (§. 616.
642.).

Exemplum de loco cometarum mutato, huc etiam transferri
 potest.

§. 647.

Si B, C, D distantia a se invicem non mutatur, mutatur au- Modus adhuc
tem distantia ipsius A ab iisdem, & ratio mutationis fuerit in B, alius.
C, D simul, nulla vero in A; moventur B, C & D simul respectu
ipsius A (§. 604. 603. 643).

§. 648.

Mobile dicitur illud coëxistentium, quod movetur. Mobilis defi-
 Quoniam vero in motu mobile non consideramus, nisi quate- nitio.
 nus locum mutat (§. 642.), præcisa magnitudine, præcisis
 multo magis qualitatibus quibuscunque; ideo *mobile, quam-*
diu solius mutationis loci ratio habetur, instar puncti conside-
ratur.

§. 649.

Omnis motus fit in tempore (§. 642. 574.).

Motus cur in
 tempore fiat.

§. 650.

Mobile describit lineam, quamdiu motus durat. Quam- Spatium a
 diu enim motus durat, mobile continuo in alio alioque loco mobili con-
 existit (§. 642.). Quare cum mobile concipiatur instar puncti- sectum.
 (§. 648.), motu autem puncti continuo linea describatur (§. 10.
Geom.): mobile utique lineam describit, quamdiu motus du-
 rat.

Hinc & Astronomi sumunt, planetas motu suo continuo describere
 lineas in se redeuntes.

§. 651.

Spatium adeo mobilis est linea, quam mobile instar pun- Spatii mobilis
cti consideratum toto illo tempore describit, quo motus du- definitio.
rat.

(*Ontologia contracta.*)

dd dd

§. 652.

§. 652.

Quidnam celerius moveatur, quid tardius.

Si motus per idem spatium inæquali tempore absolvitur, mobile dicitur *celerius moveri*, quod minore temporis intervallo spatium percurrit; *tardius* autem, quod majore temporis intervallo idem spatium percurrit.

§. 653.

Celeritatis definitio.

Celeritas adeo est id, quo mobile aptum redditur ad datum spatium dato tempore percurrendum.

Non hic quærimus nisi definitionem nominalem.

§. 654.

Motus æqualis definitio.

Si idem mobile eodem tempore spatium æquale absolvit, *motus* dicitur *æqualis*, seu, quod perinde est, *Motus æqualis* est, in quo spatia temporibus proportionalia. Add. §. 155. *Arithm.*

§. 655.

Motus inæqualis definitio.

Motus inæqualis vocatur, si mobile temporibus æqualibus spatia inæqualia percurrit, hoc est, in quo spatia temporibus non sunt proportionalia.

§. 656.

Spatiorum a mobili descriptorum æqualitas unde.

Mobile æquali tempore eadem celeritate æquale spatium describit.

Propositio præfens instar axiomatis assumi potest, quod per definitionem celeritatis manifestum (§. 270. *Log.*).

§. 657.

Celeritas in motu æquali.

Quoniam in *motu æquali* mobile temporibus æqualibus æqualia spatia describit (§. 654.); *celeritas toto motus tempore eadem* (§. 656.).

§. 658.

Spatiorum a mobili descriptorum inæqualitas unde. Celeritas in motu inæquali.

Mobile diversa celeritate temporibus æqualibus spatia inæqualia describit (§. 656.).

§. 659.

Quoniam in *motu inæquali* spatia temporibus æqualibus

bus descripta inæqualia sunt (§. 655.), *celeritas toto motus tempore eadem non est* (§. 656.), *sed diversa* (§. 658.).

Non absimili modo ostendi potest, *in motu æquali celeritatem toto motus tempore esse eandem*. Pone enim celeritatem toto motus tempore non esse eandem, sed diversam. Mobile igitur temporibus æqualibus non describet spatia æqualia (§. 656.), sed diversa (§. 658.). Non igitur movetur motu æquali (§. 654.), sed inæquali (§. 655.): id quod hypothesei repugnat.

§. 660.

Si duo mobilia eadem celeritate feruntur, eodem vel æquali tempore spatia æqualia describunt & ex adverso si spatia eodem tempore descripta æqualia fuerint, celeritate eadem feruntur (§. 656. 653. 181.).

Ratio æqualitatis spatiorum a mobilibus eodem tempore descriptorum.

Propositio præfens notio communis est.

§. 661.

Si duo mobilia diversa celeritate feruntur, eodem vel æquali tempore inæqualia spatia describunt & contra (§. 660. 652. 183.). Idem patet ex (§. 653. 183.).

Inæqualitas spatiorum eodem tempore descriptorum.

Est propositio præfens perinde ac præcedens notio communis.

§. 662.

Quemadmodum celeritas eadem est, qua eodem tempore idem spatium describitur (§. 660.); ideo *dupla* censetur, qua describitur eodem tempore spatium duplum; *tripla*, qua describitur triplum; *quadrupla*, qua describitur quadruplum &c. & in genere *multiplex*, qua describitur spatium multiplex, & vicissim *submultiplex*, qua spatium submultiplex describitur.

Celeritatis multiplicis & submultiplicis definitio.

§. 663.

Quoniam adeo celeritas multiplex B eodem modo determinatur ex simplici A, quo spatium multiplex D ex spatio simplici C (§. 662.), ut *quantitas celeritatis multiplicis intelligatur, mensurandum est spatium multiplex D per spatium simplex C* (§. 451.). Atque adeo *spatia eodem tempore*

Modus metiendi celeritatem.

Dd dd 2

descri-

descripta constituuntur mensuræ celeritatum, quibus mobilia feruntur.

§. 664.

Magnitudo
celeritatis.

Celeritati tribuitur magnitudo. Celeritas una considerari potest tanquam ex pluribus aliis simul sumtis coalescens, quemadmodum linea recta ex aliis in directum junctis constituitur (§. 662.). In ea igitur partes distinguere licet totum constituentes (§. 341.). Quamobrem cum magnitudo tribuatur rebus omnibus, in quibus partes distinguere licet totum constituentes (§. 434.); magnitudo quoque tribuitur celeritati.

§. 665.

Quomodo exponatur.

Celeritatis magnitudines per lineas rectas exponi possunt (§. 437. 425.).

Solenne hoc est Mathematicis in motuum doctrina.

§. 666.

Mutatio mobilis per motum.

Motus nullam mutationem intrinsecam inducit mobili, sed tantum extrinsecam quoad situm ad coexistentia fixa. Conf. §. 648. 642. 602. 606. 604. 561. 544.

§. 667.

Mutatio compositi per motum.

Nulla in composito accidere potest mutatio nisi per motum. Vid. §. 629 sq. 632 sqq. 602. 642. de figuræ & magnitudinis mutatione; & §. 666. 532. 341. de situs partium mutatione; & adde §. 640.

§. 668.

Celeritatum æqualitas.

Celeritates æquales sunt, quibus eodem tempore æqualia spatia describuntur. Celeritatibus enim tribuitur magnitudo (§. 664.), quæ æstimatur ex quantitate spatii dato tempore descripti (§. 663.). Quodii igitur celeritatibus quibusdam eodem tempore spatia æqualia describuntur, unam alteri salva quantitate seu magnitudine substituere licet, consequenter celeritates æquales sunt (§. 349.).

§. 669.

Celeritas quænam major sit, quænam minor.

Major est celeritas, qua dato tempore majus spatium describitur.

scribitur; minor vero, qua eodem tempore spatium minus describitur. Conf. §. 662.

§. 670.

Mobile A majorem habet celeritatem, quod celerius movetur; B vero celeritatem minorem habet, quod movetur tardius (§. 669. add. §. 652.).

Celeritas celerius & tardius moti.

§. 671.

Motus est ens successivum. Conf. §. 642. 602. 569. 122. 144. 570.).

Quale ens sit motus.

§. 672.

Notio motus communis aliquid imaginarii habet, non tamen notioni baëlenus explicatæ repugnat. Dum enim ideam motus formamus, ad existentiam mobilis in diversis locis successivam attendimus, atque ex illis existentis, quæ per loca imprimis in sensus incurrentia distinguimus, componimus ens quoddam, cujus illæ existentie diversæ sunt veluti partes motum tanquam totum constituentes (§. 341.). Cumque adeo motus constet ex partibus continuis, quarum una extra alteram datur; motui quoque tribuitur extensio (§. 548. 565.). Ceterum cum imaginaria notio nihil contineat, quod non respondeat continuæ loci, hoc est, modi coëxistendi mutationi, quam supra motum diximus (§. 642) & unde cetera deduximus; metuendum quoque non est, ne notio ista imaginaria supra tradita repugnet.

Notio motus communis.



SECTIO II.

DE

ENTE SIMPLICI.

CAPUT I.

DE DIFFERENTIA ENTIS
SIMPLICIS ET COM-
POSITI.

§. 673.

Entis simplicis
definitio.

Ens simplex dicitur, quod partibus caret (§. 531.). Neque vero putandum est, si ens simplex privative definitur, nil positivi de eo a priori cognosci posse: Etenim duplicem meditatus reperi modum ex notione privativa aliquid positivi a priori colligendi. Quando enim per notionem privativam patet, enti cuidam convenire non posse prædicata illius entis, quod de eo negatur; eo ipso simul manifestum, eidem convenire debere prædicata opposita, modo ita opponantur, ut alterutrum oppositorum enti necessario conveniat. Porro ea, quæ negative definiuntur, sub certo tamen genere continentur, veluti ens simplex sub ente in genere. Quæ vero de toto genere prædicantur, ea quoque de eodem recte enunciantur (§. 232. Log.). Quodsi jam positiva utroque modo collecta sumantur una cum negativis, quæ in definitione continentur; inde porro positiva alia concludere licet.

§. 674.

Ens simplex
cur prædicata
compositi non
recipiat.

Ens simplex non est compositum, consequenter enti simplici tribui nequeunt, quæ composito conveniunt, quatenus compositum est, hoc est, quæ composito vi definitionis tribuuntur (§. 531. 673.).

§. 675.

§. 675.

Ens simplex extensum non est. (§. 673. 349.).

Simplex extensum non est.

§. 676.

Ens simplex est indivisibile (§. 673. 341. 344. 636.).

Indivisibilitas simplicia.

§. 677.

Simplex nulla præditum est figura (§. 621. 675.) Idem discitur ex §. 622. 619. 674.

Simplex figura caret.

§. 678.

Simplex caret magnitudine (§. 673. 430.).Simplex magnitudinis ex-
pera.

§. 679.

Simplex nullum spatium implere potest (§. 609. 675.).

Spatium implere nequit.

§. 680.

Motum intestinum appellamus, quo ea, quæ sunt in ente aliquo, situm suum erga se invicem mutant.

Motus intestini definitio.

§. 681.

In composito motus intestinus dari potest (§. 680. add. §. 640. 666.).

Motus intestinus compositorum.

§. 682.

In ente simplici motus intestinus dari nequit (§. 673. 680.).

Simplici motus intestinus repugnat.

§. 683.

Ens simplex prorsus differt a composito. Vid. §. 673. 675. 679. 682. de simplici; & §. 531. 619. 637 sq. 622. 624. 609. 625. 681. 183. de composito.

Simplicis & compositi differentia.

§. 684.

Notio entis simplicis recepta est: per inconstantiam tamen loquendi simplex dici solet, quod est minus compositum. Scho- lastici simplex definire solent per id, quod ex aliis compositum non est: quemadmodum in vulgus notum.Notio simplici-
cis qualis sit.

§. 685.

Omne ens vel simplex est, vel compositum (§. 53. 531. 673.).

Entium divisio generalis.

§. 686.

§. 686.

Si entia composita dantur, simplicia etiam dentur necesse est, seu, sine entibus simplicibus composita existere nequeunt (§. 531. 56. 70. 685.).

Compositorum ex simplicibus ortus.

Propositio præfens simili aliquo illustrari potest. Numerus aliquis magnus componi potest ex aliis minoribus, id quod fit in additione, ubi summa est numerus ex aliis, se minoribus tanquam totum ex partibus (§. 359.) compositus. Quodsi numeri minores denuo ex aliis adhuc minoribus per additionem eodem modo componantur; nondum habebis rationem sufficientem, cur dentur numeri: id quod omnium optime patet, si numerum rationalem definire volueris, non suppositis nisi numeris continuo minoribus. Nulla enim numeri definitio foret, quod sit numerorum minorum multitudo. Ut igitur intelligatur, quod numerus esse possit, hoc est, ut ratio ejus sufficiens detur (§. 56.), deveniendum tandem est ad unitatem, quæ omnis multitudinis experts, quam numerus omnis involvit. Ex hoc itaque simili patet, ne sufficienter intelligi posse compositum, quamdiu illud constare possit ex compositis minoribus; sed si intelligi debeat, deveniendum tandem ad aliquid, quod compositionis omnis experts est, hoc est, ad simplex veri nominis, seu in se indivisibile.

§. 687.

Ortus simplicis ex composito impossibilis.

Simplex ex composito oriri nequit. Ponamus, si fieri potest, ens simplex ex composito oriri. Cum compositum constet ex pluribus a se invicem distinctis partibus (§. 531.); quicquid ex composito oritur, hoc est, existere incipit, cum antea non existeret, illud oriri debet vel partium dissolutione, vel partium dissolutarum nova combinatione (§. 535.). Quodsi partes dissolutæ novo quodam modo conjungantur, cum sic prodeat ens, quod ex partibus a se invicem distinctis constet, ens compositum oritur (§. 531.) ob essentialis diversitatem (§. 209. 533.) a priori utique diversum. Quodsi vero partium dissolutione aliquid prodit, aut denuo existere incipit ens compositum, quod antea non existerat, consequenter ex composito ens compositum oritur (§. 542.), non simplex (§. 674.); aut, si simplex prodit, relinquatur, quod jam aderat (§. 686.), consequen-

- sequenter nullum ens existere incipit; quod antea non aderat. Ens igitur simplex ex composito per partium dissolutionem non oritur (§. 541.).

§. 688.

Ens simplex ex alio simplici existente oriri nequit. Vid. *Entis simplicis ex simplici ortus impossibilitas.*
§. 675. 636. 541. 184.

Quodsi ponamus ens simplex præexistens transformari in aliud, ut, quod ante existebat, existere desinar, aliud vero existere incipiat, quod antea non existebat. Aut in ente simplici præexistente continetur ratio, cur talis mutatio in eodem loco habeat, aut nulla in eodem ratio continetur. Prius (§. 56.) non erit nisi modus illius entis (§. 148. 160.). Non igitur prodit ens a priori diversum, sed idem numero ens, quod antea existebat, aliis tantummodo modis vestitur. Si vero posterius; necesse est determinationes essentielles mutari in alias (§. 168.); quod idem est ac ens simplex existens annihilare & aliud ex nihilo producere (§. 540.), ob essentialium immutabilitatem (§. 300.).

Esti autem ens simplex ex alio simplici existente oriri nequeat, nondum tamen inde sequitur, ab ente simplici ex nihilo produci non posse ens simplex aliud. Neque enim hic nobis sermo est de eo, quod ab ente simplici sive in genere, sive in specie a quodam ente simplici fieri possit; sed quid ex ente simplici oriri possit vi essentiae ejus, aut actione alterius in idem exercita. Sane nec probatur a sanioribus rerum emanatio ex Deo, quæ per hanc ipsam propositionem refellitur.

§. 689.

Si ens simplex existit, aut necessario existit, (§. 311. 309. Existentiæ simplicium divinitas, 301 sq.) aut si contingenter existit, rationem existentiae suæ sufficientem in ente necessario habet (§. 310. 322. 324.). Etenim ens omne vel necessarium est, vel contingens (§. 311.). Quamobrem si ens quoddam simplex existit, idem quoque vel necessarium, vel contingens esse debet. Quodsi igitur necessarium fuerit, existentia ejus absolute necessaria est (§. 309.), adeoque vi essentiae ipsius impossibile est ipsum non existere (§. 301. 302.).

(*Ontologia contraria.*)

Eccc

§. 690.

§. 690.

Productio ex
nihilō.

Producere seu Facere aliquid idem est ac eidem existen-
tiam impertiri. *Ex nihilo producere* idem est ac existentiam im-
pertiri ei, quod ex nihilo oriri debebat.

§. 691.

Simplium con-
tingentiam
productio ex
nihilō.

*Si simplicia contingentia existunt, ex nihilo produci de-
bent.* Vid. §. 310. 690. 687. 688. 685. 540. 690.

§. 692.

Ortus instan-
tanei definitio.

Ortus instantaneus est, qui non fit in tempore.

Opponitur nimirum ortus instantaneus ortui in tempore. Etenim quemadmodum punctum est principium omnis magnitudinis, nempe lineæ, quæ magnitudinum species prima, non tamen lineæ pars aliqua; ita similiter instans est principium temporis omnis, non tamen temporis pars, sicuti enim punctum omnis magnitudinis expers, seu partibus caret, quarum multitudine constituitur magnitudo (§. 430.); ita similiter instans nullam involvit successionem, sine qua tamen tempus concipi potest nullum (§. 574.). Hinc imaginationi indulgentes tempus gigni concipiunt continuo fluxu instantis, quemadmodum lineam describi concipimus in Geometria fluxu continuo puncti. Et sane instans eodem modo existit in tempore, quo punctum in linea, nempe existit in serie continua successivorum in abstracto considerata, quemadmodum punctum in serie continua simultaneorum in abstracto considerata, quæ non est nisi linea, sicuti illa nonnisi tempus. Quamobrem si definitionem desideres instantis, eam accipe.

§. 693.

Instantis defi-
nitio.

Instans est, quod præteriti, præsentis ac futuri expers (§. 584. 583.).

§. 694.

Ortus simpli-
cium instan-
taneus.

Si simplex oritur, ortus ejus instantaneus est (§. 673. 691. 574. 692.).

§. 695.

Notio ortus
simplicis qua-
lis.

Ortus simplicis notio distincta formari nequit. Conf. §. 694. 693. 584. Ont. & § 652. Log.

§. 696.

§. 696.

Si ens compositum ex alio præexistente oritur, in tempore oritur; immo in tempore etiam oriri potest, si ex alio non præexistente oritur. Etenim cum essentia entis compositi consistat in modo, quo tales partes invicem combinantur (§. 533.), ens compositum existere incipit, consequenter oritur, ubi tales partes tali modo invicem junguntur. Quodsi ergo ex præexistente oritur, aut partes invicem jungendæ actuadsunt, aut demum dissolutione alterius compositi & nova facta combinatione formari debent. In priori casu pars una jungitur alteri successive, donec tandem omnes fuerint conjunctæ: in casu posteriori partium ipsa quoque formatio successive fieri intelligitur. Quamobrem cum tempus detur, quamprimum res successivæ in continua serie existunt (§. 574.); & partium formatio, & formarum combinatio in tempore fit, consequenter compositum ex alio præexistente oriens in tempore oritur.

Ortus entis compositi in tempore.

Quodsi ex alio non præexistente oriatur, non repugnat, ut in instanti producantur partes, vel alia, unde partes illæ formantur. Atque adeo perinde est, ac si ex alio præexistente oriri deberent. Sed in hoc casu in tempore oritur, *per demonstrata*. Ergo etiam in tempore oriri potest, si ex alio non præexistente oritur, nempe si ante supponantur partes invicem combinandæ, aut partes aliæ minores, quarum combinatione partes resultant, ex nihilo, seu non præexistente (§. 690.) produci.

Propositione hæc utemur, quando quæstio occurrit, utrum mundus materialis a Deo productus fuerit in tempore, an in instanti: quod posterius visum est nonnullis, quia id credere principiis rationis conforme; prius autem communiter placet plerisque, quia id scripturæ sacræ conforme existimant.

§. 697.

Simplex eo modo interire nequit, quo composita intereunt. Conf. §. 533. 541. 673. 79. Idem pater ex §. 674.

Interitus compositi simplici repugnant.

§. 698.

Si simplex interire debet, annihilandum est (§. 541. 676.).

Interitus simplicis per annihilationem.

§. 699.

Interitus simplicis instantaneus.

Si simplex interit, in instanti interit (§. 541. 676. 569. 574. 692.).

§. 700.

Interitus compositi in tempore.

Si compositum interit citra cuiuspiam annihilationem, interitus fit in tempore (§. 540. 533. 70. 56. 290. 554. 578. 574.).

§. 701.

Interitus compositi in instanti.

Si simplicia, unde resultat compositum, simul intereunt, interitus compositi est instantaneus (§. 699. 686.).

Propositio hæc maximi momenti est. Utemur enim ea tanquam principio demonstrandi in Theologia naturali ostensuri, quod, si Deus rebus conservandis influxum suum continuum subtraheret, totum universum in instanti recidere debeat in nihilum; ut usus alios in præsentem taceamus.

§. 702.

Interitus compositi in tempore per annihilationem.

Si simplicia, unde compositum resultat, successive intereunt, interitus compositi fit in tempore. Etenim si simplicia successive intereunt, dum interiit A, existunt adhuc B, C, D &c. dum B interiit, existunt adhuc C, D &c. dum C interiit, existunt adhuc D, E &c. & ita porro (§. 569.). Existit adeo series successivorum sive continua (§. 554.), sive aliis successivis continuis coëxistens (§. 578.): Quamobrem cum tempus datur, quam primum res successivæ in continua serie existunt (§. 574.); tempus quoque præterlabitur, dum ens compositum per successivum simplicium, sine quibus existere nequit (§. 686.), interitum interit.

CAPUT II.

DE

MODIFICATIONIBUS RE-
RUM, PRÆSERTIM SIM-
PLICIUM.

§. 703.

Omnis rei durantis (§. 578. 569.) mutatio in variatione mo-
darum consistit. Conf. §. 300. 313. 291. 149. 314. 290. Mutatio rei
durantis qua-
lis.

§. 704.

Variationem modorum, hoc est, successionem modi Modificatio-
nis definitio.
unius in locum alterius a se diversi, appellamus *Modificatio-*
nem rei.

§. 705.

Mutabilium determinatione nascitur status rei. Ut Status defini-
tio.
adeo *Status* sit coëxistentia mutabilium cum iisdem fixis.

Fixa nempe sunt essentialia & attributa, utpote in se immutabilia
(§. 300. 313.), mutabilia autem cum modi, qui insunt (§. 314.), tum
relationes rei ad alia, qualis est situs (§. 603.), qui motu rei mutatur
(§. 603. 543.).

§. 706.

Si *status rei* constituitur mutabilibus intrinsecis, nempe Status divisio.
modis, *internus* dicitur; si vero extrinsecis, quales sunt relatio-
nes rei ad alias, *externus*.

§. 707.

Si *mutabilia eadem sunt in duabus rebus A & B, status ea-* Status identi-
tas.
rum idem est (§. 181. 705.).

§. 708.

Si *mutabilia in duobus entibus A & B diversa sunt, status* Diversitas sta-
tus.
eorum diversus est (§. 181. 183. 707.).

Ee ee 3

§. 709.

§. 709.

Status mutatio.

Si mutabilia, quæ de re prædicantur, eadem non manent, status ejus mutatur (§. 707. 290.).

§. 710.

Status externi & interni mutatio.

Status rei internus mutatur, si modi non manent iidem; externus autem mutatur, si relationes ad alia non manent eadem (§. 706.).

§. 711.

Subiecti & Adjuncti definitio.

Ens, quatenus consideratur ut habens essentiam & præter eam aliorum capax, dicitur Subiectum: illa vero alia, quæ essentiam consequuntur, & vel attributa sunt, vel modi (§. 149.), vocantur Adjuncta.

§. 712.

Notio subiecti communis qualis sit.

Notio subiecti convenit cum notione recepta philosophorum, etsi communis subinde aliquid imaginarii admixtum habeat. Id patet ex definitione Goclenii aliorumque.

§. 713.

Actionis definitio.

Actio est mutatio status, cujus ratio continetur in subiecto, quod eundem mutat.

§. 714.

Passionis definitio.

Ex adverso Passio est mutatio status, cujus ratio continetur extra subiectum, quod statum suum mutat.

§. 715.

Ratio ubi querenda, cur subiectum pati possit.

In subiecto patiente datur ratio, cur passio in eo sit possibilis. Dum enim subiectum patitur, status ejus mutatur (§. 714.), consequenter vel modus aliquis, vel relatio ad alia (§. 710.), ut adeo vi passionis alius jam insit modus, quam qui ante inerat, aut subiectum patiens aliam obtineat ad alia relationem, quam quæ ipsi ante erat (§. 290.). Enimvero cur modi inesse possint, ratio sufficiens in essentialibus continetur, etsi cur actu insint, rationem habeant in ente alio a se diverso (§. 160.), atque adeo extra se (§. 544.) & cum relatio quoque ad alia, quam subiectum patiens obtinet, eidem non repugnare, debeat utpote alias impossibilis

bilis futura (§. 79), consequenter nunquam exitura (§. 132.), per ea, quæ subjecto insunt, intelligi potest, cur eidem non repugnet, consequenter ratio in eodem datur (§. 56.), cur talem relationem ad alia habere possit (§. 85).

E. gr. Spongia patitur, dum comprimitur. Enimvero non comprimeretur actu, nisi comprimi posset. Possibilis adeo concipitur compressio, antequam actu fiat. Nimirum quia partes molles sunt, adeoque tactui facile cedunt, & pori iisdem interjecti majores, ut eorum distantia imminui queant; ideo compressio possibilis intelligitur, etsi ignores, quanam sint causæ spongiæ actu comprimere valentes. Compressio illa, quatenus in spongia accidit, passio est, habetque rationem sufficientem quoad possibilitatem in essentia spongiæ, nempe in textura ejusdem, tum etiam in statu aliquo possibili, quatenus nempe partes aqua macerate molliores evadunt.

§. 716.

Possibilitas agendi dicitur *Potentia* simpliciter: subinde cum addito, *Potentia activa*: possibilitas vero patiendi *potentia passiva* appellatur. Tribuitur nempe enti potentia, quatenus per ea, quæ eidem insunt, actio concipitur possibilis; potentia autem patiendi, quatenus per ea, quæ eidem insunt, pati potest. *Potentia activa* vocatur etiam *Facultas*. Potentia definitio.

§. 717.

Ex sola potentia activa nulla sequitur actio (§. 716. 171. 173.). Terminus potentia activæ.

§. 718.

Ex sola potentia passiva nulla sequitur passio (§. 716. 171. 714. 118.). Potentia passivæ terminus.

§. 719.

Sine potentia activa nulla locum habet in subjecto actio (§. 716. 53. 132.), *nec sine passiva passio* (§. 716. 53. 132.). Potentia activæ ad actionem; passivæ ad passionem necessitas.

§. 720.

Agens est subjectum actionis, adeoque ens, in quo actio actus datur. Patiens est subjectum passionis, adeoque ens, in quo passio actus datur. Agentia & patientis definitio.

§. 721.

§. 721.

Unde actio
proficiscatur.

In agente admittendum aliquid, quod rationem sufficientem actualitatis actionis in se continet (§. 720. 717. 70.).

§. 722.

Vis definitio.

Quod in se continet rationem sufficientem actualitatis actionis Vim appellamus.

§. 723.

Necessarius
inter viam &
actionem ne-
xus.

Posita vi, ponitur actio (§. 118. 722.).

§. 724.

In quonam
vis consistat.

Quoniam ipsimet experimur, dum agentibus nobis, veluti fores propulsaturis, aliquis resistit actionem impediturus, nos continuo conari fores propulsare; haud obscure hinc intelligitur, quod vis consistat in continuo agendi conatu.

§. 725.

Status muta-
tio unde.

Vis continuo tendit ad mutationem status subjecti sive externi, sive interni (§. 724. 713. 706.).

§. 726.

Impedimenti
definitio.

Impedimentum dicitur in genere, quod in se continet rationem, cur aliquid non existat, cujus existentiae ratio sufficiens ponebatur.

§. 727.

Resistentiae
definitio.

Impedimentum actionis dicitur Resistentia: ut adeo sit id, in quo continetur ratio sufficiens, cur actio aliqua non sequatur, posita vi ad eam sufficiente (§. 723.).

Ita saxum impediens, ne janua propulsata aperiat, actioni propulantis resistit.

§. 728.

Quando ex vi
non sequatur
actio.

Ex vi constanter sequitur actio, nisi eidem resistatur. Vid. §. 723. 70. 722. 28. 727.

§. 729.

Status muta-
tio continua
unde.

Si datur in ente vis, status ejus continuo mutatur, nisi ei resistatur. Conf. §. 728. 713.

§. 730.

§. 730.

Ex vi in tempore nascitur actio. Vid. §. 722. 56. 713. 118. Actio cur in tempore nascatur.
723. 554. 569. 574.

Loquimur hic de actione, qualis datur in rebus finitis.

§. 731.

Actio simplex est, quæ in alias resolvi nequit: Actio vero composita est, quæ in alias simpliciores, vel easdem, vel diversas resolvi potest. Differentia actionis simplicis & compositæ.

E. gr. Actio scribendi est actio composita. Etenim in singulis literis earumque ductibus variat digitorum, quibus calamus movetur, motus quoad directionem, sive motus continuus sit, sive interruptus. In moribus utilissimum est actiones compositas in suas simpliciores resolvere eademque resolutio distinctam reddit animæ humanæ cognitionem in Psychologia. Dari debere actiones simplices, nec omnes esse posse compositas, eodem modo evincitur, quo supra demonstravimus simplicium existentiam (§. 686.). Non tamen ideo opus est, ut resolutio semper continuetur eo usque, donec ad simplices perveniat: sed ubi subsistendum sit, resolutionis finis in casu dato docet.

§. 732.

Quoniam in actione composita actio simplex una existit post alteram, seu existere incipit, dum altera desinit, adeoque simplices, ex quibus ea componitur, successivæ sunt (§. 569.); tempus autem datur, quamdiu dantur res successivæ in continua serie (§. 574.); ideo evidentissimum est, actionem compositam in tempore fieri. Actio composita cur in tempore fiat.

§. 733.

Eadem vis eodem tempore eandem producit actionem, seu Identitas ex vi eadem tempore eadem nascitur actio. Vid. §. 728. actionum.
554. 183.

§. 734.

Diversa vis eodem tempore diversam producit actionem, seu ex vi diversa eodem tempore diversa nascitur actio. Vid. Diversitas actionum.
§. 181.

(Ontologia contracta.)

F f f f

§. 735.

§. 735.

Definitio
actionis ejus-
dem & diver-
sæ.

Quoniam ex vi eadem eodem tempore eadem nascitur actio (§. 733.), ex diversa autem tempore eodem diversa (§. 735.), consequenter non eadem (§. 53.); *actionem diversam ab eadem distinguere licet, quod eadem nascantur eodem tempore ex vi eadem; diversæ autem eodem tempore ex vi diversa.* Atque adeo Actiones eadem definiri possunt per eas, quæ eodem tempore ex iisdem viribus nascuntur: *diversæ autem per eas, quæ eodem tempore ex viribus diversis nascuntur.*

§. 736.

Virium iden-
titas & diver-
sitas.

Et eodem modo pater, quod *eadem sint vires, ex quibus eodem tempore eadem nascitur actio; diversæ autem sunt vires, ex quibus eodem tempore actiones diversæ nascuntur.*

§. 737.

Actionum
quantitas.

Actiones habent quantitatem sive magnitudinem. Quoniam enim ex vi eadem eodem tempore eadem nascitur actio A (§. 733.), ideo ex eadem vi tempore bis T nascitur actio bis A seu 2 A; tempore ter T actio ter A seu 3 A, & ita porro in infinitum. Eam adeo actio 2 A, itidemque actio 3 A & in genere actio m A relationem habet ad actionem A, quæ est numeri ad unitatem (§. 339.). Quoniam vero actio A non determinata est, sed qualiscunque assumi potest; ideo actio m A refertur ad unitatem vagam, eique adeo respondet numerus indeterminatus (§. 422.). Quamobrem cum numeri indeterminati sint quantitates (§. 423.); actionibus tribuenda est quantitas.

§. 738.

Actiones quo-
modo per li-
neas expo-
nuntur.

Actionum quoque quantitates seu actiones ipsæ, quatenus quantitatem habent, per lineas rectas exponi & earum mutuas relationes per rectarum relationes, quas curvæ lineæ determinant, exhiberi possunt (§. 425. 737.).

§. 739.

Virium quan-
titas.

Vires quantitatem seu magnitudinem habent. Quoniam ex vi eadem eodem tempore eadem nascitur actio (§. 733.); si vis V tempore T bis ponitur & ex vi V tempore T nascitur actio

actio A, nascetur actio bis A, hoc est, ex vi 2V tempore T nascetur actio 2A. Similiter si vis V tempore T ter ponitur, nascetur actio ter A, hoc est, ex vi 3V nascetur actio 3A & ita porro in infinitum. Jam si ex vi P nascetur actio 3A tempore T; vim P considerare licet tanquam resultantem ex coalitione virium trium V prorsus earundem in unam. Quamobrem quia vis P eadem esse cum tribus viribus V simul sumtis concipitur, erit P aliquod totum & tres vires V illius partes (§. 341.), cumque vis V existere possit, etiamsi ceteræ duæ eidem eadem annihilari ponantur, vis P spectari potest tanquam in tres partes æquales divisibilis, quæ singulæ vi V eadem sunt (§. 636.). Enimvero in quo partium multitudinem concipere licet, id magnitudinem (§. 434.), adeoque & quantitatem habet (§. 437.).

§. 740.

Vires per lineas rectas exponi & earum mutue relationes per relationes rectarum, quas curvæ lineæ determinant, exhiberi possunt (§. 425. 739.). Vires quomodo per lineas exponantur.

§. 741.

Actiones & vires metiri atque earum quantitatem per numeros distincte explicare licet (§. 438. 440. 737. 739.). Virium & actionum mensurabilitas.

§. 742.

Virium & actionum cognitio mathematica possibilis (§. 10. Disc. præl. & §. 741.). Cognitio mathematica virium & actionum.

Hinc jam *Leibnizius* cogitavit de nova scientia dynamica condenda eamque in actis Eruditorum A. 1695. p. 157. promisit; sed non dedit. Nos ejus quædam principia dedimus in Commentariis Academiæ Scientiarum imperialis Petropolitane Tom. I. p. 217. & seqq.

§. 743.

Vires mensurari possunt per actiones & similiter actiones per vires. Si vim V metiri debemus, investiganda est ratio quantitatis ejus ad quantitatem vis cujusdam datæ sive assumptæ P, quæ unitatis vicem præstat atque mensuram constituit (§. 438.). Enimvero quoniam ex eadem vi eodem tempore eadem nasci-

tur actio (§. 733.), adeoque si ex P tempore T nascatur actio A, ex bis P tempore T nascitur bis A, ex ter P autem ter A & sic porro in infinitum; eodem modo actio B respondens ipsi vi V determinari potest ex actione A, quo vis V ex vi P determinari potest, cui actio A respondet. Quamobrem si vim V metiri debemus per vim P, metiri licet actionem B per actionem A & vicissim si actionem B metiri debemus per actionem A, metiri licet vim V per vim P (§. 451.).

§. 744.

Virium diffu-
sio in compo-
sito.

Vires dicuntur æqualiter diffundi per compositum, si composito in partes æquales diviso singulis eadem vis inest. E contrario inæqualiter diffunduntur per compositum, si composito in partes æquales diviso singulis vis eadem non inest. (Geom. §. 531.).

§. 745.

Virium in
composito in
partes æqua-
les divisio.

Quod si ergo vis æqualiter diffundatur per compositum, eam dividere licet in partes æquales, etsi proprie loquendo partes quantitativas non habeat; si compositum dividitur in partes æquales.

§. 746.

Gradus defi-
nitio.

Gradum appellamus id, quo qualitates eædem salva identitate differre possunt, scilicet vel tempore eodem in diversis subiectis, vel tempore diverso in eodem subiecto. Brevius: Gradus est discrimen internum qualitatum earundem, scilicet quod solum salva identitate in easdem cadit.

§. 747.

Qualitarum
quantitas.

Gradus sunt quantitates qualitatum. Vid. §. 348-341. Hinc & dicitur gradus Quantitas virtutis in oppositione ad Quantitatem molis, quæ est extensorum, seu magnitudinem proprie sic dictam, quam supra definivimus (§. 430.) constituit.

§. 748.

Gradus per se
non intelligi-
bilis.

Gradus ergo dari quidem, sed per se intelligi nequit (§. 747. vid. §. 196.).

§. 749.

Relatio gra-
dus unius ad
alterum.

Gradus quoque unus ad alterum, in iisdem scilicet qualitatibus, eam relationem habere potest, quam recta quædam data ad datam aliam habet (§. 747. 424.).

§. 750.

§. 750.

Gradus unus concipi potest tanquam compositus ex aliis minoribus veluti partibus. Vid. §. 749. 183. 352. Graduum compositio.

§. 751.

Gradibus tribuimus magnitudinem, consequenter Gradum unum altero majorem, vel minorem (§. 352.), atque ideo porro alterum magnum, alterum parvum dicimus (§. 432.). Vid. §. 434. 750. Graduum magnitudo.

§. 752.

Gradus non habet partes proprie sic dictas; sed imaginarias. Conf. §. 341. 331. 329. 183. 544. 341. 548. 749. 746. Partes graduum quales.

§. 753.

Ergo magnitudo quoque gradui tributa (§. 751.) non proprie sic dicta, sed imaginaria est. Vid. 752. 430. Magnitudo graduum qualis.

§. 754.

Gradus per lineas rectas exponi & eorum mutua relationes per vectorum relationes, quas curvæ lineæ determinant, exhiberi possunt & distincte intelliguntur, data unius ad alterum ratione in numeris sive rationalibus, sive irrationalibus. Vid. §. 747. 425. 420. Ont. & §. 126. Arithm. Graduum exacta & distincta cognitio.

§. 755.

Quoniam cognitio rerum mathematica consistit in cognitione quantitatis rerum (§. 10. Disc. prælim.); qualitates autem quantitatem habent, nempe gradus (§. 746.), ope figurarum & numerorum exacte atque distincte intelligibiles (§. 754.); Ergo qualitatum possibilem esse cognitionem mathematicam patet. Vid. §. 10. Disc. prælim. §. 746. 754. Ont. Qualitatum cognitio mathematica.

Pertinent huc, quæ de intensitate luminis in Elementis nostris Opticæ; de densitate & raritate corporum in Elementis Hydrostaticæ, de gravitatione solidorum in fluidis in iisdem, de gravitate, elasticitate, compressione, condensatione & rarefactione aëris in Elementis Aërometricæ leguntur.

§. 756.

Vasti cognitionis mathematicæ limitas.

Nibil datur in rebus (finitis scilicet, de quibus solis hic nobis sermo est), cujus non possibilis sit cognitio mathematica §. 455. Ont. §. 10. Disc. præf. §. 755. Ont.

§. 757.

Qualitatum mensurabilitas.

Qualitates metiri licet, seu qualitates omnes sunt mensurabiles. Vid. §. 747. 750. 752. 442.

Densitas fluidorum qualitas est: metitur autem eandem ope arrometrorum. Gravitas corporum in qualitatum numerum refertur: metitur autem eandem ope libræ atque stateræ. Calor qualitas est; sed eum metiri conamur ope thermometri. Similiter frigus qualitas est; sed id quoque ope thermometri metiri conamur. Eodem modo densitatem aëris ope manometri; gravitatem ejusdem ope barometri; humiditatem ejus ope hygrometri; impetum venti ope anemometri metiri conamur.

§. 758.

Intensionis & remissionis definitio.

Intendi dicitur id, cujus gradus fit major; remitti autem illud, cujus minor fit gradus.

§. 759.

Intensitatis notio.

Quoniam gradum concipimus tanquam compositum ex aliis minoribus veluti partibus (§. 750.), atque gradus ideo intenditur, quia fit major (§. 758.), consequenter plures istiusmodi partes imaginariæ (§. 753.) veluti superaccedunt (§. 352.); quod magnitudo improprie dicitur (§. 753.), id proprio nomine intensitas appellatur: ut adeo *Intensitas* sive *Intensio* sit quasi graduum multitudo, quemadmodum magnitudo partium multitudo.

§. 760.

Notio gradus unitata qualis.

Notio gradus convenit cum notione philosophorum recepta, etsi non satis distincte ab iisdem tradita.

E. c. *Goclenius* in *Lexico* Gradus rerum definit per differentias accidentales, quibus res distinguuntur in prius & posterius, in intensum & remissum, perfectum & imperfectum.

§. 761.

§. 761.

Vim & potentiam Scholastici alique philosophi non satis a se invicem distinxerunt; accuratius autem differentiam peruestigavit ac publice explicuit Leibnitius. Hinc *Goclenius* in Lexico philosophico notionem virium prorsus non explicavit, sed tantummodo potentiae. Pervidit equidem nudam potentiam non sufficere ad actum, cum alias ex potentia activa continuo actiones enasci deberent, quod tamen non fieri experientia erat manifestum; atque ideo cum *Aristotele* potentiae tribuit ἐνέργειαν seu operationem, dum ex ea aliquid actu sequitur: sed dum non explicatur, quomodo potentia fiat efficax ad operandum, ut nunc ex ea actio sequatur, quæ antea non sequebatur; notionem virium distincte non expendit, neque adeo vim a potentia sufficienter distinxit. *Claubergerius*, optimus *Cartesii* interpres, in *Metaphysica de Ente seu Ontosophia* §. 234. p. m. 59. vim, facultatem & potentiam pro synonymis habet, atque adeo nihil aliud esse pronunciat, quam non repugnantiam ad agendum, hoc est, agendi possibilitatem (§. 85.), quæ nudæ potentiae notio est (§. 716.). Mox vero §. 2536. fundamentum potentiae in creaturis Dei voluntatem esse affirmat, qua constituit, ut hoc vel illo posito aliud sequatur. Hac adeo hypothesi creaturis vis agendi omnis adimitur, nec iis nisi sola agendi possibilitas relinquitur, quæ per concursum Dei generalem vi potentiae divinæ ordinatæ ad actum determinatur: quam sane hypothesein in Gallia uberius excoluit *Malebranche*; in Germania autem *Sturmius*. De *Leibnitio* vide *Acta Erudit.* A. 1694. p. 111. A. 1695. p. 145 sqq.

Notio virium
qualis fuerit
philosophis.

§. 762.

Determinationes dicimus constantes, quæ semper eadem manent, dum alie interea sive continuo, sive per intervalla mutantur. *Variabiles* autem appellamus, quæ mutari possunt sive continuo, sive per intervalla, aliis manentibus semper, hoc est, quamdiu ens durat, iisdem.

Determinatio-
num constan-
tium & varia-
bilitum diffe-
rentia.

§. 763.

Determinationes intrinsecæ constantes sunt essentialia & attributa (§. 300. 313.); modi autem sunt variables (§. 314.).

Quænam sint
constantes;
quænam va-
riabiles.

§. 764.

Modificabilis definitio. §. 764.
Modificabile dicitur, quod successive aliarum determinationum intrinsecarum capax. Vid. §. 704.

Unde modificabilitas agnoscitur. §. 765.
 Quoniam ens modificabile, quatenus determinationi intrinsecæ B substitui potest alia C, vel etiam alia D superaccedere, quæ ante non ingrat (§. 764.); ideo modificabile, quatenus determinationes intrinsecas mutabiles habet (§. 290.), consequenter variabiles (§. 762.). *Ex determinationibus adeo intrinsecis variabilibus agnoscitur entis modificabilitas.*

Perdurabilis definitio. §. 766.
Perdurabile dicitur subiectum, quod per aliquod tempus durare aptum est.

Unde perdurabilitas agnoscitur. §. 767.
Perdurabile est, quod determinationes intrinsecas constantes habet (§. 762. 578. 574. 247. 763. 766.).

Substantiæ definitio. §. 768.
 Subiectum perdurabile & modificabile dicitur *Substantia*. Ens autem, quod modificabile non est, *Accidens* appellatur.

Substantia qualis sit. §. 769.
Substantia est subiectum determinationum intrinsecarum constantium & variabilium. Vid. 767. 762 764.

Idem ulterius expenditur. §. 770.
Substantia est subiectum, cui insunt essentialia & attributa eadem, dum modi successive variant (§. 769.). Unde porro consequitur, ens istud esse substantiam, in quo supra (§. 143. & sqq.) concepimus essentialia, attributa & modos. Vid. §. 763.

Notio substantiæ nom sit a sui loquendi conformis. §. 771.
Notio substantiæ, quam dedimus, convenit cum notione substantiæ communi Aristotelico-Scholastica.

§. 772.

§. 772.

Notio substantiæ, quam dedimus, consentit cum notione Cartesianorum. Ipse scilicet *Cartesius* in Principiis philosophiæ part. I. §. 51. p. m. 14. substantiam definit per rem, quæ ita existit, ut nulla alia re indigeat ad existendum.

Num nostra substantiæ notio sit notioni Cartesianorum conformis.

§. 773.

Notio substantiæ communis imaginaria est. Patet id ex modo, quo ad eam pervenitur. Etenim dum videmus v. gr. lapidem nunc esse frigidum, nunc vero calidum, quam differentiam tactu dijudicamus, notionem tamen confusam, quam visui debemus, in utroque statu esse eandem, lapidem consideramus tanquam receptaculum caloris vel frigoris, atque hoc respectu calorem vel frigus eidem inesse dicimus. Atque ideo lapidem subjectum caloris vel frigoris appellamus, seu dicimus esse subjectum, cui calor vel frigus insunt. Jam cum porro in lapide eodem tactu discernimus gravitatem atque duritiem, videntes alia corpora perinde esse aliis graviora vel leviora, quemadmodum alia aliis calidiora vel frigidiora deprehendimus, & quædam corpora, ceram puta, nunc esse dura, nunc mollia observamus, quemadmodum lapis nunc calidus, nunc frigidus est, etsi ignem semper calidum experiamur; gravitatem atque duritiem perinde ac calorem & frigus inter ea referimus, quæ lapidi insunt, atque adeo denuo lapidem nobis exhibemus tanquam receptaculum gravitatis atque duritiei seu dicimus eum quoque esse subjectum gravitatis atque duritiei. Jam cum omnia, quæ in rebus corporeis sensui obvia sunt, in eorum numero sint, quæ inesse iisdem dicimus; ea quidem, quæ insunt, nec extra eas res subsistere posse deprehendimus, accidentia appellamus: cum vero nihilum esse nequeat, cui cetera insunt & quorum esse a Scholasticis dicitur esse nil aliud quam inesse, supponimus aliquid, quod existit, ita ut non insit rei alteri, & cui accidentia insunt. Et subjectum istud, cui omnia insunt, quæ rei convenire observamus, substantiam appellamus: quod dum cogitamus quale sit, nihil eidem tribuere valemus, omnes quippe qualitates ab eodem removentes & inter accidentia referentes.

Notio substantiæ communis qualis sit.

(*Ontologia contracta.*)

Gg gg

inten-

intendimus, nihil prorsus in eodem videmus, cum contradictorium utique sit omnia quæ rei insunt referre inter accidentia & tamen adhuc in eodem superesse, quæ insunt. Quamobrem nil nisi tenebræ imaginationi suffunduntur, tanto obscuriores, quanto magis ad quid in subiecto videndum illius aciem intendimus. Unde substantiale rerum ignorari a nobis affirmamus. Ceterum nemo non videt fingi hic, quod non est, ut per imaginem quandam veluti oculis præsens sistere valeamus, quod in eos non incurrit, nempe receptaculum quoddam qualitatum, quod ab iis prorsus evacuatum existere potest. Nunc vid. §. 110. 141.

§. 774.

Mutabilitas
substantiæ.

Status substantiæ mutari potest (§. 768. 764. 769. 762. 290. 709.).

§. 775.

Passio actionem
supponens.

Si A patitur ab ipso B, B agit in A. Vid. §. 70. 714. 713. 721 sq. 181. 723.

§. 767.

Vis substantiarum.

Si status substantiarum mutatur, vi prædita sint necesse est. Ponamus primo substantiam existere nonnisi unam, ejusque statum mutari. Nunc conf. §. 70. 713. 721 sq. Ponamus jam plures substantias coexistere, quarum status mutatur. Aut igitur ratio sufficiens mutationis est in ipsa illa substantia, quæ statum suum mutat, aut in alia coexistente. In casu priore quælibet substantiarum vi prædita est, *per demonstrata*; in posteriore substantiæ coexistentes a se invicem patiuntur (§. 714.). Jam lege §. 775. Quamobrem cum substantia agens vi prædita sit *per demonstrata*, ut A possit pati ab ipso B, B vi præditum sit necesse est, & vicissim ut B vel aliud quoddam subiectum C ab ipso A pati queat, A quoque vi præditum esse debet.

§. 777.

Continuus
agendi conatus
substantiarum.

In substantiis, quarum status actu mutatur, est continuus agendi conatus. Conf. §. 776. 724.

§. 770.

§. 778.

Substantiarum status continuo mutatur, nisi iis resistatur. Mutatio status
§. 776. 729. substantia-
rum qualis.

§. 779.

Attributa & modi sunt accidentia. De attributis conf. Attributa &
§. 313. 291. 764. 768. De modis §. 314. 160. 290. 746. 764. 768. modi quid
sint.

§. 780.

Quantitas est accidens. Quantitati enim alia mutatio Quantitas
accidere nequit, quam ut augeatur, vel minatur (§. 427.), seu quale sit ens.
homogeneo adjecto efficiatur majus, vel eodem ablato minus
(§. 426.). Non igitur in quantitate concipere licet determina-
tiones a se invicem diversas, quæ sibi invicem succedunt, velu-
ti calorem & frigus in lapide, consequenter quantitas non est
ens modificabile (§. 764.). E. accidens (§. 768.).

§. 781.

Magnitudo quoque accidens est. Vid. §. 437. 780. Magnitudo
quale sit ens.

§. 782.

Figura accidens est. Conf. §. 621. 764. 768. Figura quale
ens.

§. 783.

*Accidentia dicuntur intrinseca, quæ sunt determinatio- Accidentia
nes intrinsecæ subjecto inexistentes: extrinseca vero dicuntur, intrinseca.
quæ non sunt intrinseca.*

§. 784.

*Attributa & modi, in specie quantitas, magnitudo at- Accidentia in-
que figura sunt accidentia intrinseca (§. 783.).* Vid. §. 146. 148. trinseca non-
348. 430. 621. 122. 545. 779 sqq. nulla.

§. 785.

Quicquid subjecto tribui nequit, nisi præsuppositis in eo. Accidentis
dem aliis, id accidens est. Vid. §. 118. 149. 156 sq. 160. 779. proprium.

§. 786.

Situs est accidens, idque extrinsecum. Vid. §. 603. 785. Situs cur sit
472. 544. 783. accidens.

§. 787.

Spatium & locus cur sit accidens.

Spatium est accidens extrinsecum, itidemque locus. Vid. §. 591. 785. 590. 786. de spatio; & §. 602. 785. 607. de loco.

§. 788.

Tempus & duratio cur sint accidentia.

Tempus (§. 574. 573. 786.) & duratio (§. 578. 785.) accidens est.

§. 789.

Essentia compositi quale ens.

Essentia entis compositi non constat nisi meris accidentibus. §. 533. 454. 603. 781. 779. 782. 786.

E. gr. Essentia horologii consistit in ejusdem structura, nec supponit, nisi quod partes hujus figuræ & magnitudinis ex metallo factæ hunc inter se habeant situm. Metallum hic non consideratur nisi quoad duritiem & extensionem continuam, consequenter nonnisi quoad accidentia. In analysi itaque structuræ horologii non progredimur ultra accidentia.

Quid pereat cum essentia compositi.

§. 790.

Dum essentia ejus tollitur, seu compositum existere definit, consequenter interit, nonnisi mera accidentia pereunt (§. 789.), nihil vero substantiale (§. 768.).

§. 791.

Accidentium cum substantiis nexus.

Accidentia sine substantiis existere nequeunt (§. 785. 768. 766. 56. 70.).

§. 792.

Substantiale in composito.

In ente composito nihil datur substantiale præter entia simplicia. Conf. §. 789. 168. 785. 791. 686.

§. 793.

Substantiæ veri nominis quænam sint.

Nullæ dantur substantiæ nisi simplices (§. 685. 792.) & entia composita sunt substantiarum aggregata (§. 686. 792. 339.).

§. 794.

Substantia simplex & composita quænam.

Substantia adeo simplex est, quæ proprie substantia dicitur: composita autem, quæ est substantiarum simplicium aggregatum, seu, quæ ob simplices compositum ens ingredientibus substantia dicitur.

§. 795.

§. 795.

Si vis datur in substantia composita, ea resultare debet ex viribus substantiarum simplicium. Vid. §. 167. 533. 56. 794. Unde vis in compositis.

CAPUT III.

DE

ENTE FINITO ET INFINITO.

§. 796.

Infinitem in Mathesi dicimus, in quo nulli assignari possunt limites, ultra quos augeri amplius nequeat. Vid. §. 339. 134. Infiniti significatus mathematicus.

§. 797.

Numeri infiniti & magnitudo infinita impossibiles. Illud enim saltem reperimus, non posse in abstracto; ubi multitudo unitatum sumitur ut indeterminata, sed innumeris modis determinabilis, concipi terminum, ultra quem in adjicienda unitate non progreditur. Dum vero sumimus numerum unitatis additione in infinitum continuata procreatum, sumimus utique quod repugnat. Etenim si unitatis additioni nullus constitui potest terminus, eam quoque ad finem perducere minime licet, consequenter continuata in infinitum unitatis additione numerus nullus procreari potest. Numerus adeo infinitus impossibilis (§. 79.). Notio numeri ac magnitudinis infinitæ num detur.

Similiter saltem reperimus, lineam rectam v. gr. quocunque intervallo continuatam adhuc ultra terminum istum continuari posse, consequenter nullum assignari posse terminum, ultra quem continuatio concipiatur impossibilis. Dum vero sumimus lineam utrinque in infinitum continuatam tanquam existentem aut existere valentem, denuo sumimus, quod repugnat. Etenim lineam eo usque productam esse ut eam ulterius produci posse concipi nequeat, repugnat. Linea adeo recta infinita impossibilis (§. 79.).

Idem cum eodem modo pateat

Gg gg 3

tear de superficie ac solido; magnitudo infinita in genere impossibilis.

§. 798.

Finiti significatus in Mathesi.

Finitum dicimus in Mathesi, cui assignari possunt termini, unde incipit & ubi definit, seu, ultra quos augeri potest, & ideo assignabile est.

§. 799.

Numeri & magnitudines reales quales sint.

Omnis ergo numerus, qui actu datur & concipi potest, finitus est, & omnis magnitudo, quæ actu datur & concipi potest, finita est (§. 797. 796. 798. 53.).

§. 800.

Numeri infinites infiniti & magnitudines infinites quales sint.

Numerus infinites infinitus & magnitudo infinites infinita impossibilis (§. 797.).

§. 801.

An infinitum unum altero majus sit. Infinitæ parvum quid sit.

Infinitum unum, quod altero majus vel minus sit, non datur (§. 797. 132.).

§. 802.

Infinitæ parvum in Mathesi dicitur, cui nullus assignari potest limes, ultra quem imminui amplius nequit.

§. 803.

Infinitæ parvi impossibilitas.

Infinitæ parva impossibilia sunt (§. 802. 797.).

§. 804.

Quantitates infinitæ & infinitæ parvæ Mathematicorum quales sint.

Quantitates infinitæ & infinitæ parvæ Mathematicorum non sunt veræ quantitates, sed saltem imaginariæ (vid. §. 797. 800. §. 803. 132. 134.). Dum adeo in Mathesi numerus infinitus sumitur & inde infinitæ magna ac infinitæ parva colliguntur, fingitur ob quandam similitudinem, quod non est, ut per imaginem quandam veluti oculis præfens sistere valeamus, quod in eos non incurrit, consequenter quantitates infinitæ & infinitæ parvæ notione imaginaria exhibentur (§. 110.).

§. 805.

Infinitum Mathematicorum quid sit.

Infinitum ergo Mathematicorum tantummodo modus loquendi est, quo plura adesse dicimus, quam quæ numero comprehendi possunt (§. 804.).

§. 806.

§. 806.

Infinite magnum & infinite parvum ad quantitatem finitam quancunque datam nullam rationem assignabilem habent. Vid. §. 131. *Arithm. & §. 796).* Ratio num assignabilis sit infiniti ad infinitum,

Definitionis loco apud Mathematicos sumitur, nec male: *Quantitatem infinitam* esse eam, quæ ad datam quancunque finitam rationem assignabilem non habet; & ex adverso, *infinite parvam partem* esse, quæ ad totum rationem assignabilem non habet.

§. 807.

Error, qui consistit in quantitate infinite parva, respectu finitæ nullus est; qui autem consistit in quantitate finita respectu infinitæ nullus est (§. 806.). Error infinite parvus qualis.

In confesso hoc denuo est apud Mathematicos, qui idem sumunt, non probant, tanquam satis manifestum.

§. 808.

Quantitas infinite parva respectu finitæ suæ habetur pro nihilo (§. 807.). Quantitas infinite parva quando nihilo æqualis.

Propositio præsens axioma est in Analyti Mathematicorum recentiori, quæ dicitur infinite parvorum, vel etiam infinitesimalis. Est autem quantitas infinite parva non absolute nihilum, sed tantummodo respectu tale. Nec nihilum dicitur in sensu philosophico, sed in calculo pro nihilo habetur, quia idem est, si quantitatem infinite parvam a finita subtraxeris, vel eidem addideris, ac si nihilum subtraxeris vel addideris.

§. 809.

Duæ igitur quantitates nonnisi infinite parva differentes, seu, quarum differentia infinite parva est, pro æqualibus habentur. Conf. §. 808. 349. Quantitates, quarum differentia infinite parva, quales.

§. 810.

Quantitas quælibet data, sive finita, respectu infinitæ suæ habetur pro nihilo (§. 807.). Quantitates finitæ quando nihilo æquales.

§. 811.

Duæ quantitates infinitæ, quarum differentia est finita, ad quam referuntur, pro æqualibus habentur (§. 810. 807. 349.). Quantitates infinitæ, differentia finitæ, quales.

§. 812.

§. 812.

Ordines infinitorum & infinite parvorum.

Quantitates infinitæ pariter ac infinite parvæ distinguuntur in ordines, si ibi multiplicatio, hic divisio per numerum infinitum continetur. Nempe *Quantitas infinita primi gradus* est, quæ prodit quantitate finita per numerum infinitum multiplicata: *Quantitas infinita secundi gradus* est, quæ prodit infinita primi gradus per numerum infinitum multiplicata: *Quantitas infinita tertii gradus* est, quæ prodit infinita secundi per numerum infinitum multiplicata & ita porro. Similiter *Quantitas infinite parva primi gradus* est, quæ prodit finita per numerum infinitum divisa: *Quantitas infinite parva secundi gradus* est, quæ prodit infinite parva primi gradus per numerum infinitum divisa: *Quantitas infinite parva tertii gradus* est, quæ prodit infinite parva secundi gradus per numerum infinitum divisa & ita porro.

§. 813.

Infinita & infinite parva superiorum graduum qualia sint.

Infinita & infinite parva superiorum graduum non sunt quantitates veræ, sed imaginariæ. Conf. §. 812. 804.

§. 814.

Relatio infinitorum & infinite parvorum diversorum graduum.

Quantitas infinita vel infinite parva secundi gradus est ad quantitatem infinitam vel infinite parvam primi gradus ut quantitas infinite parva vel infinita primi gradus ad quantitatem finitam, unde illæ oriuntur. Et in genere *quantitas infinita vel infinite parva gradus alicujus superioris est ad quantitatem infinitam vel infinite parvam gradus alicujus proxime inferioris ut quantitas infinita vel infinite parva primi gradus ad quantitatem finitam, unde illæ oriuntur.* Vid. §. 149. *Arithm.* 167. 151. ibid.

§. 815.

Infinite parva superiorum graduum quando nullecant.

Quantitas qualibet infinite parva gradus cujuscunque dati est respectu quantitatis infinite parvæ gradus proxime præcedentis nibilo æqualis (§. 126. *Arithm.* 814. 808. *Ont.*).

§. 816.

Infinita graduum super-

Quantitas infinita gradus cujuscunque respectu infinitæ gradus

gradus proxime superioris haberi debet pro nihilo (§. 814. 810).

rionum gra-
dum quan-
do nullecant.

§. 817.

Quod dari nequit, in praxi communi habetur pro nihilo, seu Quantitas, quæ dari nequit, habetur pro nihilo. In mensurarum, ponderum & monetarum divisione non progredimur ultra quendam terminum fixum, sed quod ultra eum ponendum contemtilis parvitatit existimatur, adeoque in praxi negligitur. Ita in divisione monete non progredimur ultra obulum, quæ est pars decima sexta grossi.

Quantitates
in praxi com-
muni nulle-
scentes.

§. 818.

Quod dari nequit, in praxi etiam Mathematicorum pro nihilo habetur, seu Quantitas, quæ dari nequit, habetur pro nihilo.

Quantitates in
praxi Mathe-
maticorum
nullecentes

§. 819.

Si in Geometria linea quædam, quæ ex alia pro unitate assumta, vel aliis ad eandem relatis, certo quodam modo determinatur, numero irrationali exprimitur & valor in numero rationali prope verus assignari debet; in linea minore citius pervenitur ad partem inassignabilem, quam in majore (§. 420. Geom. 817. Ont. 417. Geom. 425 ibid.

Particula in-
assignabilis
in casibus si-
milibus.

§. 820.

Ratio partis inassignabilis ad lineam, quæ ex aliis eodem modo determinatur, in numeris determinatis assignari nequit (§. 819.).

Variabilitas
partis inassi-
gnabilis in ca-
sibus simili-
bus.

§. 821.

Habet autem in eodem linearum genere pars inassignabilis rationem minorem ad lineam majorem, majorem vero ad minorem (§. 820.).

Partis inassi-
gnabilis ratio
ad totum
suum.

§. 822.

Si valor lineæ irrationalis per numerum quemcunque multiplicatur; in serie numerorum rationalium eidem respondente ultra partem ejus inassignabilem progrediendam, antequam ad (Ontologia contracta.)

Pars inassi-
gnabilis lineæ
irrationalis
multiplicatæ.

Hh hh

partem

partem inassignabilem multiplicatæ pervenias (§. 67. *Arithm.* 349. 819. *Ont.*).

§. 823.

Infinite par-
vum Mathe-
maticorum
qualis sit mo-
dus loquendi.

*Infinite parvum Mathematicorum indefinite exprimit par-
tem inassignabilem in dato quodam Quantitatum genere, quæ in
casu quolibet singulari variatur & numerus infinitus indefinite ex-
primit eum, per quem dividenda illa quantitas, ut prodeat pars
inassignabilis. Conf. §. 817. 819. 821. 796. Ont. §. 210. Arithm.
§. 808. 110. 141. 805. Ont.*

§. 824.

Infinite ma-
gnum Mathe-
maticorum
qualis sit mo-
dus loquendi.

*Infinite magnum indefinite exprimit quantitatem, cujus
respectu alia quædam data pro nihilo haberi potest, ut in da-
to casu non oriatur error assignabilis (§. 507. *Analys.* 327. *Geom.*
§. 2. *Trigon.*).*

§. 825.

Finitum quid
sit.

*Quo majus concipi potest, id est limitatum, sive finitum. Vid.
§. 352. 70. 56. 468. 798. add. §. 621. 751.*

§. 826.

Limitatum
qualis sit.

*Quicquid est limitatum, eo majus, vel minus concipi potest.
(§. 798. 426. 352.).*

§. 827.

Quid in re
mutabile sit.

*Quicquid in ente mutari potest, illud non nisi limes est (§. 468.
243. 290. 816.).*

§. 828.

Modi quid
sint.

*Omnis modus in limitibus seu limitationibus consistit (§. 314.
827.).*

E. gr. Figura ceræ impressa est modus aliquis: est vero eadem limes
extensionis, quæ ceræ competit (§. 621.). Similiter celeritas est mo-
dus vis motricis, quæ per modum rei substantialis concipitur; eadem
vero vis motrix limitatur, quæ pro diverso celeritatis gradu nunc minor
fit, nunc major.

§. 829.

Modorum
differentiæ.

*Quodsi modus in unico limite consistit, seu ex unica limi-
tatione*

ratione resultat, *simplex* a nobis dicitur: si vero ex pluribus limitationibus simul resultat, *compositus*.

E. c. Figura est modus simplex, cum ex unica limitatione extensi resultat. Sed colores sunt modi compositi: cum enim ex refractionibus & reflectionibus in moleculis corporum factis oriuntur, multiplices limitationes & vis moricis in materia luminis sive æthere quoad celeritatem & directionem, & extensionis in eodem æthere atque moleculis corporum visibilium concurrunt.

§. 830.

Omnis rei modificatio in variatione limitum consistit (§. 704. 828.).

E. gr. Cera modificatur per figuras diversas eidem successive im-
pressas. Dum vero figura mutatur, limites extensionis variantur (§. 621.). quid sint.

§. 831.

Omnis rei mutatio (intrinseca scilicet) *in variatione limitum consistit* (§. 703 sq. 830.).

Mutatio rei in
quo consistat.

§. 832.

*In modificationibus rerum nihil substantiale perit, vel produ-
citur.* Conf. §. 830. 578. 768. 541. 690.

Substantialis
immutabilitas
in modifica-
tionibus.

E. gr. Si figura cere mutatur, substantiale, quod est massa, idem manet, quod fuerat ante. Si ex dura fit mollis, nihil substantiale produ-
citur, quod antea non extitisset, sed materia saltem calorifica in po-
ros ejus ingreditur, ut particulæ ab æthere contactu dimoveantur:
quemadmodum in Physicis docetur.

§. 833.

In verum modificationibus nihil ex nihilo producitur (conf. §. 832. 793. 685. 542. 691.); *nihil etiam annihilatur* (§. 832. 793. 685. 542. 698.).

Modificatio
creationis &
annihilatio-
nis expers.

§. 834.

Ens finitum successive alios aliosque status habere potest (conf. §. 798. 830 seq. 828. 710. 290.), *non vero omnes simul* (§. 831. 28.).

Ens finitum
quale sit.

Ita e. gr. lapis nunc calidus esse potest, nunc frigidus: sed calidus &
frigidus simul esse nequit.

§. 835.

Ens igitur finitum non simul est, quod esse potest.

Notio genui-
na entis finiti.

Hh hh 2

In

In propositione precedente & ejus corollario presente continetur genuina notio entis finiti, aut, si maxis, substantiæ finitæ. Scilicet in ente finito seu substantia finita concipiuntur quædam fixa, quæ essentialia & inde resultantia attributa constituunt, & præterea quædam limitationes ejusdem variables, quibus variatis alius aliusque prodit ejusdem status: ut adeo ens omne finitum per essentialiam suam sit mutationi obnoxium. Atque hoc ens finitum reale est, cui infinitum reale opponitur, quale est Deus, diverſum ab infinito imaginario Mathematicorum, de quo paulo ante diximus. Ex progressu autem constabit, hanc esse notionem entis finiti fecundam, unde veritates tam theoreticæ, quam practicæ magui momenti, nec minoris utilitatis deducuntur.

§. 836.

Contrarietas
cur in finitum
cadat.

Ideo enti finito tempore diverso contraria convenire possunt (§. 835.).

E. c. Calor & frigus contraria sunt. Unus tamen idemque lapis nunc calidus, nunc frigidus esse potest.

§. 837.

Entis finiti
definitio.

Ens adeo finitum reale est ens, in quo omnia simul inesse nequeunt, quæ eidem actu inesse possunt.

§. 838.

Entis infiniti
notio ac defi-
nitio.

Ens infinitum, quod finitum non est (§. 53.), successive alios aliosque status habere nequit (§. 834.), sed simul est, quod esse potest (§. 835. vid. §. 805. 835-837.).

§. 839.

Entis infiniti
immutabili-
tas.

Enti infinito nulli actui mutabilia insunt (§. 834. 706.).

§. 840.

Modi an in-
finito.

Enti infinito nulli insunt modi (§. 703. 839.).

§. 841.

Cor præter es-
sentiam in-
finitum in finitum
tributa.

Quicquid enti infinito inest, id vel ad essentialia, vel ad attributa pertinet, aut, si quid modo analogum est, id per modum attributi inest (§. 149. 840.).

§. 842.

Modi analogi
in ente
infinito.

Modi analogum est, cujus oppositum enti infinito absolute

lute non repugnat, quod tamen rationem sufficientem in eodem non agnoscit, cur actu unquam infit.

E. gr. Ostendemus in Theologia naturali, Deum libere creasse hoc universum, consequenter absolute eidem non repugnasse decretum de mundo non creando. Quoniam tamen Deus libertate usus, quemadmodum decet rationem summam, qua eminet, potius existimavit condere mundum, quam eundem non condere; ideo rationem sufficientem de mundo non condendo in eodem deprehendere non licet, consequenter nec illud decretum in Deo unquam fuit, sed potius decretum contrarium de mundo condendo. Hoc igitur decretum de mundo condendo est analogum quoddam modi.

§. 843.

Modi analogi non absolute, sed tantummodo hypothetice necessaria sunt. Conf. §. 842. Ont. 307. Log. 302. Ont. 842. *ibid.*

Necessitas
analogi mo-
dorum.

§. 844.

Ens infinitum perdurabile est. (§. 841. 839. 578. 786.)

Entis infiniti
perdurabili-
tas.

§. 845.

Per eminentiam esse dicitur ens, quod proprie loquendo non est, ubi tamen quid habet in se, quod vicem ejus supplet, quod proprie eidem tribui repugnat.

Per eminentiam
quid esse
dicatur.

§. 486.

Ens infinitum per eminentiam modificabile. Vid. §. 840. 704. 841. 845.

Entis infiniti
modificabili-
tas qualis.

Nimirum per eminentiam ens infinitum dicitur modificabile, quatenus prater ea, quæ absolute necessaria sunt, dantur in eodem quodque alia, quæ absolute necessaria non sunt, sed hypothetica necessitate tantummodo insunt, ita tamen ut impossibile sit, oppositum eorum unquam actu inesse. Vid. *not.* §. 842.

§. 847.

Quoniam igitur substantia est subiectum perdurabile & modificabile (§. 788.), ens autem infinitum perdurabile (§. 844.) ac modificabile per eminentiam (§. 846.); ideo *ens infinitum per eminentiam substantia dicitur.*

Ens infinitum
qualis sub-
stantia.

Hh h h 3

§. 848.

§. 848.

Actio entis in-
finiti qualis.*Actio enti infinito per eminentiam competit. Vid. §. 713.*
839. 846. 710. 845.

§. 849.

Natura entis
finiti.*In ente finito simplici vis limitata concipienda, qua status
continuo mutatur (§. 834. 776. 468. 729. 727.) ea quidem lege, ut
præsens continueat rationem sequentis (§. 70.).*

§. 850.

Natura entis
infiniti.*In ente infinito simplici vis illimitata concipienda, qua
simul actuantur, quæcunque per essentiam ejus actu eidem inesse
possunt (§. 838.).*

SECTIO III.

DE

RESPECTU ENTIIUM
AD SE INVICEM.

CAPUT I.

DE

DEPENDENTIA RERUM EA-
RUMQUE RELATIONE.

§. 851.

Entis inde-
pendentis ac
dependentis
definitio.

Ens unum A dicitur *dependens* ab altero B, quatenus ejus, quod ipsi A inexistit, ratio in hoc altero B continetur. Ex adverso *E*ns quodpiam A *independens* dicitur ab alio B, quatenus ejus, quod ipsi tribuitur, ratio extra ipsum in alio B non continetur.

E. gr.

E. gr. Servus apud veteres actiones suas liberas non suo, sed Domini sui arbitratu determinare cogebatur. Ratio igitur, cur hæc potius faceret servus, quam aliud, erat voluntas Domini. Servus adeo in actionibus suis liberis dependebat a Domino. Ex adverso rationem existentia suæ in seipso continet Deus. Ipse igitur in existendo independens ab omni ente alio.

§. 852.

Agens, quatenus agit, non dependet ab alio (§. 851. *Independētia in agendo.* vid. §. 713.).

§. 853.

Patiens, quatenus patitur, ab alio dependet (§. 851. *Dependētia in patiendo.* vid. §. 714.).

§. 854.

Quodsi ratio, cur insit modus, continetur in ente alio ab eo, cui insit, diverso; ens istud quoad hunc modum dependet ab altero hoc ente (§. 851.).

Entis unius ab altero dependētia quoad modum.

E. gr. Calor est modus lapidis. Si is eidem competit, quatenus radiis solaribus expositus est; lapis a sole quoad calorem dependet.

§. 855.

Si entia duo A & B simul consideramus atque ea, quæ ipsis in se spectatis seu absolute conveniunt, perpendentes porro inquirimus, an inter ea, quæ ipsi B conveniunt absolute, quidpiam occurrat, per quod aliquid de A intelligi possit, quod absque eo intelligi non poterat, adeoque non nisi præsupposito B; *ens A referri dicitur ad alterum B.* Et eodem modo ens B referri quoque potest ad ens A.

Quando ens unum refertur ad alterum.

E. gr. *Adamus* genuit *Cainum*. Si *Adamus* in se consideras, eidem tribuitur actus gignendi, quem exercuit, *Caino* nondum existente, & actus iste gignendi intelligitur, etiamsi de *Caino* non cogites. Ex adverso si *Cainum* in se consideras, inter ea, quæ ipsi absolute tribuenda sunt, prædicata deprehendis, quod non prodierit a seipso, sed ab alio, nempe ab *Adamo* fuerit genitus. Quodū jam de *Adamo* & *Caino* simul cogites atque ad animum tibi revoces, quod *Adamus* genuerit *Cainum* & *Cainus* ab *Adamo* fuerit genitus, consequenter dependētiā *Caini*

Caini ab *Adamo* in eo perspicis, quod is existentiam fuerit consecutus ope ejusdam actionis *Adami*; *Adamum* ad *Cainum* & *Cainum* ad *Adamum* refert. Refert nimirum *Adamum* ad *Cainum* si perpendis, quod ille hunc genuerit. *Cainum* autem ad *Adamum*, si ad id potissimum attentionem convertis, quod *Cainus* fuerit *genitus*. Priori respectu intelligitur, *Adamum* esse patrem *Caini*; posteriori autem patet, *Cainum* esse filium *Adami*.

§. 856.

Relationis definitio.

Quod rei absolute non convenit, sed tum demum intelligitur, quando ad alterum refertur, id dicitur *Relatio*.

De *Adamo* in se considerato non intelligitur, quod sit pater; nec de *Caino* in se spectato, quod sit filius: sed illud demum patet, ubi *Adamus* ad *Cainum* refertur; hoc autem constat, ubi *Cainus* refertur ad *Adamum*. Esse igitur patrem, quod unico nomine paternitatem dicimus, est relatio: esse filium, quod unico nomine filiationem appellamus, itidem relatio est.

§. 857.

Relatio in quam consistat.

Relatio nullam enti realitatem superaddit, quam in se spectatum non habet; sed non nisi in dependentia quadam entis unius ab altero, sive vera, sive ficta consistit. (vid. §. 856. 855. 851.).

§. 858.

Fundamenti relationis & relatorum definitio.

Ratio relationis, seu id, unde intelligitur relationem adesse (§. 56.), *Fundamentum relationis* dici consuevit. Res autem sive Entia, quæ ad se invicem referuntur, dicuntur *Relata*.

Ratio, cur *Adamus* sit pater *Caini*, hæc est, quod actu gignendi ab illo exercito hic existentiam fuerit consecutus. Est igitur fundamentum paternitatis, tanquam relationis specialis, adeptio existentie, quæ de *Caino* prædicatur, ex actu gignendi *Adami*. Etenim non ob nudum gignendi actum *Adamus* dicitur parens *Caini*, sed quatenus per eundem *Cainus* existentiam fuit adeptus. Ex adverso ratio, cur *Cainus* dicitur filius *Adami*, hæc est, quod *Adamus* actu gignendi existentiam largitus fuerit *Caino* seu causa extiterit, cur existat *Cainus*. Fundamentum igitur relationis *Caini* ad *Adamum* est largitio existentie per actum gignendi.

§. 859.

§. 859.

Identitas & diversitas sunt relationes entis in genere. Relationes entis in genere.
 Conf. §. 181. 183. 855 sq.

§. 860.

Similitudo & dissimilitudo sunt relationes entis in genere secundum qualitates; æqualitas & inæqualitas sunt ejusdem relationes secundum quantitatem. Relationes secundum qualitatem & quantitatem.
 Vid. §. 195. 211. 349. 859. 464. 350.

§. 861.

Situs & locus sunt relatio quoad coexistentiam. Relationes secundum coexistentiam.
 602 sq. 859.

§. 862.

Si A aliquo temporis intervallo existit ante B, A præcessisse; B autem secutum fuisse dicitur. Quodsi intervallum istud longius fuerit, veluti aliquot seculorum, A dicitur antiquum, B autem recens, si nostro tempore velexistit, vel eidem proximum. Alias A dicitur vetus, B autem novum. Definitio antiqui, veteris & novi &c.

§. 863.

Antiquitas, vetustas, novitas sunt relationes entium successivorum quoad existentiam successivam. (§. 862. coll. §. 859.) Relationes secundum existentiam successivam.

§. 864.

Relatorum unum, quoad alterum refertur, dicitur Subjectum relationis; alterum vero, ad quod aliud refertur, Terminus relationis. Dicuntur autem Correlata duo relata, quorum unum alterius terminus esse potest. Subjecti relationis & termini, nec non correlatorum definitio.

§. 865.

Notio relationis, quam dedimus, convenit cum notione communi. Relata definiri solent cum Aristotele per ea, quæ habent totum suum esse ad aliud, seu quorum totum esse est se habere ad aliud, vel referri ad aliud. Notio relationis non usui loquendi conformis.

CAPUT II. DE CAUSIS.

§. 866.

Principii definitio.

P*rin*cipium dicitur id, quod in se continet rationem alterius. *P*rin*ci*piatum vero, quod eidem opponitur, appellatur, quod rationem sui in altero habet.

§. 867.

Prioritas principii respectu principiat.

*P*rin*ci*pium *p*ræcedit *p*rin*ci*piatum (§. 862.), consequenter *p*rin*ci*pium *p*rin*ci*piato *p*rius est (§. cit.). Vid. §. 866. 118.

§. 868.

Principiatum dependentia a principio.

*P*rin*ci*piatum *a* *p*rin*ci*p*io* *d*e*p*e*n*d*e*t (§. 851.). Conf. §. 866.

§. 869.

Vis quale principium.

*V*is est *p*rin*ci*pium *a*ctio*n*um (§. 722. 866.).

§. 870.

Idem porro expenditur.

Quamobrem cum actiones sint mutationum quædam species (§. 713.), vis autem actionum sit principium (§. 869.); *v*is est *p*rin*ci*pium *m*u*t*a*t*i*o*n*u*m.

§. 871.

Substantia qualis.

*S*ub*s*tantia *f*inita *c*o*n*t*in*e*t* in se *p*rin*ci*pium *m*u*t*a*t*i*o*n*u*m. Vid. §. 793. 1q. 849. 870. 794. 795.

§. 872.

Entis quænam sint substantia.

*Q*uod in se *c*o*n*t*in*e*t* *p*rin*ci*pium *m*u*t*a*t*i*o*n*u*m, *s*ub*s*tantia est. Vid. §. 870. 776. 793 1q. 768. 764.

§. 873.

Ens infinitum quale.

*E*ns *i*n*f*i*n*i*t*um *p*rin*ci*pium *m*u*t*a*t*i*o*n*u*m *p*e*r* *e*m*i*n*e*n*t*i*a*m *c*o*n*t*in*e*t*. Vid. §. 8, 0. 839. 846. 704. 845. 866.

§. 874.

Divisio principii.

*Q*uodsi principium in se continet rationem possibilitatis alterius, *p*rin*ci*pium dicitur *e*s*s*e*n*d*i*: si vero rationem actualitatis, *p*rin*ci*pium *s*i*e*n*d*i appellatur.

§. 875.

§. 875.

Essentialia sunt principium essendi modorum, modi autem Modorum alii antecedentes & entia ab eo, cui ipsi insunt, diversa sunt principia fiendi modorum (§. 874). Vid. §. 160.

§. 876.

Principium cognoscendi dicitur propositio, per quam intelligitur veritas propositionis alterius.

Principii cognoscendi definitio.

§. 877.

Si datur principiatum, datur quoque aliquod principium (§. 866.).

Principii cum principiato nexus.

§. 878.

Posito principio ponitur principiatum. Vid. §. 866. 118.

Principiati cum principio nexus.

§. 879.

Notio principii est conformis notioni Aristotelis. Terminus principii ex philosophia Aristotelica est desumptus. Aristoteles vero Metaphys. lib. 5. c. 1. principium esse ait primum, unde res aut est, aut fit, aut cognoscitur. Hinc D. Thomas principium in genere esse pronunciat, unde aliquid modo quocunque procedit.

Notionis principii conformitas cum Aristotelica.

§. 880.

Principium internum est, quod in principiato existit. Principium vero externum est, quod extra principiatum existit.

Principii interni & externi definitio.

Principium essendi domus est materia, ex qua extructa fuit: principium autem fiendi architectus, qui ideam ejus animo concepit & juxta eam eandem excitavit. Est vero materia intra domum nec ea sublata domus subsistere valet. Quamobrem principium internum est. Ex adverso architectus extra domum existit eodemque abeunte domus, quam extruxit, sine ejus opera subsistit; neque amplius ullo modo ab eodem pendet. Est igitur principium externum. Patet, ideam quoque architecti esse principium domus extruendæ; sed externum.

§. 881.

Causa est principium, a quo existentia sive actualitas *Causa definitio.*

entis alterius ab ipso diversi dependet tum quatenus existit tum quatenus tale existit. *Causatum* vero dicitur principiatum, cuius existentia sive actualitas ab ente altero a se diverso dependet, tum quatenus ipsum existit, tum quatenus tale existit.

§. 882.

Causa interna
& externa dicitur
secundum
fontem,

Causa interna est, si fuerit principium internum; externa autem, si principium externum fuerit (§. 880. sq.).

E. gr. Architectus est principium externum ædificii; & idem causa ædificii. Est igitur causa ædificii externa. E contrario materies est principium ædificii internum; & eadem est causa ejusdem. Est igitur causa ædificii interna.

§. 883.

Ratio existen-
tiae causati.

Ratio, cur causatum existat, vel etiam tale existat, in causa continetur, consequenter per notionem causæ intelligitur, cur causatum existat, vel tale existat (§. 56. vid. §. 866. 868. 881).

Ita in architecto continetur ratio non modo, cur ædificium existat, sed etiam cur existat tale, seu hanc potius habeat formam, quam aliam. Similiter in materie continetur ratio, cur ædificium tale potius sit, quam aliud, v. gr. cur constet muris ex lateribus constructis, cur fornices habeat, & quæ sunt alia hujusmodi a materie dependentia.

§. 884.

Causalitatis
definitio.

Ratio illa in causa contenta, cur causatum vel simpliciter existat, vel tale existat, est illud ipsum, quod *causalitatem* appellarunt Scholastici.

Ita causalitas in architecto, qui est causa ædificii, sunt actiones mentis, quibus ideam ædificii format, & actiones extrinsecæ, quibus ædificium juxta eam in charta delineat, vel ideam materialem ejusdem construit, atque actiones fabricorum & operariorum dirigit, ut ædificium idem isti conforme extruatur. Similiter attributa materiei vel etiam essentialia ejusdem, per quæ apta apprehenditur, ut ædificium tale construi ex ea potuerit, sunt causalitas.

§. 885.

Concausæ
quænam di-
cantur.

Si plures fuerint causæ ejusdem causati, hoc est, si existentia alicujus rei vel simpliciter, vel ut talis considerata a rebus pluri-

pluribus aliis dependet; causæ illæ dicuntur *Concausæ*, sive in diverso causarum genere, sive in eodem fuerint.

Ita architectus & materies sunt concausæ ædificii, sed in diverso causarum genere.

§. 886.

Causa, cujus causalitas in actione consistit, est *Causa efficiens*. Notio causæ efficientis & effectus.
sciens: ut adeo *ens sit causa efficiens alterius, cujus actio est ratio existentie alterius* (§. 883. 884.). Causatorem, quod a causa efficiente pendet, dicitur *effectus*: ut adeo *effectus sit ens, cujus existentie seu actualitatis ratio est actio entis alterius* (§. 883. 884.).

§. 887.

In causa efficiente datur & potentia (vid. §. 886. 170. 716.), *Causa efficiens qualis.*
 & *vis agendi* (§. 886. 723.) idem patet ex §. 886. 721 sq.

§. 888.

Si effectus dati causa efficiens nonnisi unica fuerit, *Causa efficiens solitaria*, vel etiam *Causa solitaria* simpliciter dicitur, *Causæ solitiariæ definitio.*
 propterea quod causa efficiens etiam simpliciter causa appellari soleat, utpote quæ a plurimis pro sola causa vera habetur.

§. 889.

Si fuerit series causarum efficientium A, B, C &c. ita *Causa efficiens proxima & remota quænam.*
 ut B sit effectus ipsius A, causa vero ipsius C & a causa C proficiscatur effectus E; dicitur C effectus, E *causa efficiens proxima*, B autem & A erunt *causæ remotæ*, & quidem B *causa propior* quam A, A autem *remotior* quam B.

E. gr. Patet gignit filium, atque adeo ejus causa efficiens dicitur. Pater genitus est ab avo atque adeo avus est causa efficiens patris. Quoniam vero pater non potuisset gignere filium, nisi ante genitus fuisset ab avo; ideo ab actione avi, qua genuit patrem, pendet quoque existentia filii ejus. Est igitur & avus causa efficiens nepotis. Dicitur autem pater causa efficiens proxima, avus vero causa efficiens remota.

§. 890.

Si actio causæ efficientis proficiscitur a vi, quæ eidem *Definitio causæ principalis*
 inest,

& instrumen-
talis.

ineſt, nec in ipſa aſtione aliunde pender, *Cauſa efficiens principalis* dicitur. Si vero aſtio proficiſcitur a vi aliunde pendente, *Cauſa efficiens* dicitur *instrumentalis*.

E. gr. Globus percutiens corpus *Sempronii* & vulnus in eodem efficiens agit vi motrice, quæ eidem ineſt, nec in aſtione aliunde pender. Eſt igitur cauſa efficiens vulneris principalis. Enimvero ſi *Titius* gladio percutit *Mevium* eumque vulnerat; cauſa efficiens *instrumentalis* dicitur gladius, quia gladius non agit virtute ſua, ſed virtute ejus, a quo movetur.

§. 891.

Quid ſit in-
ſtrumentum.

Instrumentum eſt adeo ens, quod potentia agendi inſtrum-
ctum, ſed vi agendi deſtituitur ad effectum requiſita.

§. 892.

Inſtrumen-
tum quomodo
agat.

*Instrumentum nonniſi vi alterius motum agit, dumque agit
cauſa ſit instrumentalis* (§. 886. 890. add. §. 891.).

§. 893.

Effectus ab
inſtrumen-
to pendens cui
tribuat.

Ideo effectus quoque cauſæ principali tribuendus potius
eſt, quam inſtrumento (§. 886. add. §. 892. 890.).

§. 894.

Quomodo ex-
plicetur.

Enimvero cum a cauſa principali abſque inſtrumento ta-
lis effectus proficiſci minime potuiſſet (§. 893.), atque adeo ratio
ab inſtrumento deſumenda ſit, cur talis ſit effectus (§. 56.), utur
in cauſa principali deprehendatur, cur fuerit conſecutus (§. 892.);
*in explicando effectu non minus cauſæ instrumentalis, quam princi-
palis habenda eſt ratio.*

§. 895.

Cauſæ ſubor-
dinata quæ-
nam.

Quodſi cauſa proxima & remota a ſe invicem dependent
in cauſalitate ſua, hoc eſt, ſi aſtio cauſæ proximæ pender ab aſtio-
ne remotæ, aſtio remotæ ab aſtione remotioris & ita porro; *Cauſæ*
dicimus subordinatas.

§. 896.

Effectus co-
gnitio adæ-
quata.

*Adæquata actualitatis effectus cognitio conſiſtit in diſtin-
cta notione ſubordinationis cauſarum.* Sigillatim enim exponere
vale-

valemus, quomodo causa proxima pendeat a remota, remota a remotiori & ita porro, donec perveniatur ad eam, in qua pedem figere licet (§. 895. *Ontol.* & §. 87. *Log.*). Hac vero ratione actionem causæ proximæ resolvimus in actionem causæ remotæ, actionem causæ remotæ in actionem causæ remotioris &c. hoc est, rationem reddimus effectus, quæ petitur a causa proxima; deinde porro rationem rationis, quæ petitur a causa remota; ulterius rationem hujus rationis, quæ a causa remotiori desumitur & ita porro. Notionem igitur modi, quo effectus fuit determinatus, seu actualitatis ejusdem adæquatam nanciscimur (§. 94. *Log.*).

§. 897.

Causa efficiens sufficiens est, quæ continet rationem sufficientem effectus alicujus dati. *Insufficiens* ea est, quæ rationem effectus dati insufficientem continet.

Causa efficiens quænam sufficiens; quænam insufficientis.

§. 898.

Posita actione causæ efficientis sufficientis ponitur effectus (§. 886. 897. 118.), & contra si datur effectus, detur etiam necesse est causa ejusdem efficiens sufficiens (§. 70. 897.).

Nexus causæ & effectus.

§. 899.

Causa efficiens sufficiens effectui existentiam impertitur, consequenter effectum producit (§. 690. vid. §. 898.).

Effectus productio.

§. 900.

Si plures causæ sibi invicem subordinentur, proxima sola continet rationem sufficientem effectus dati (§. 889. 118. 886.), *remotæ autem nonnisi insufficientem* (§. 895. 889. 118.).

Modus dependentiæ effectus a causis subordinatis.

§. 901.

In explicandis effectibus subsistendum est in causa proxima, si tantummodo intelligere velimus, quomodo ipsi actum fuerint consecuti. Vid. §. 56. 900.

Modus explicandi effectum.

Qui novit omnes fabricorum actiones, qui domum extruxerunt, is sufficienter intelligit, quomodo domus ista extructa fuerit.

§. 902.

Ad causas vero remotas in explicando effectû progredien-

-dum, Ulterior explicatio in

quam con-
sistat,

dum, ubi intelligere volueris, cur causa proxima fuerit apta ad effectum producendum, seu, unde habuerit eas determinationes, quæ ad actionem effectui sufficientem edendum requiruntur (§. 895. 851. 56).

E. gr. Si intelligere volueris, quomodo globus plumbeus aptus effectus fuerit ad corpus humanum percutiendum & vulnus eidem infligendum; ad vim elasticam pulveris pyrii accensi & bombardæ directionem progrediendum. Ubi porro intelligere volueris, quomodo pulvis pyrius accendi & bombardæ ad datum scopum dirigi potuerit, ad eum progrediendum, qui bombardam oneravit, oneratam direxit atque solvit. Unde patet per causas remoras intelligi, quod in determinationibus causæ effectum producentis nihil assumatur, quod eidem non conveniat.

§. 903.

Causarum
subordinatarum
sufficiens
quænam.

Causarum subordinatarum proxima est causa efficiens sufficiens effectus dati (§. 900. 897.).

§. 904.

Causarum
subordinatarum
quænam
insufficientes.

Causarum subordinatarum remotæ non sunt nisi causæ efficientes insufficientes (§. 900. 897.).

§. 905.

Causarum
subordinatarum
dependentiæ
qualis
sit.

In serie causarum subordinatarum proxime præcedens disponit sequentem ad agendum (§. 895. 851.). Jam ad actionem requiritur cum agendi possibilitas sive potentia (§. 716.), tum vis activa (§. 717. 722. & seq.). Quare in actione præcedentis causæ efficientis continetur ratio, cur sequenti competat vel potentia activa, vel ipsa vis agendi. Quoniam itaque ob potentiam activam & vim agendi causa efficiens apta est ad effectum producendum, cum ob potentiam agendi agere (§. 716.), adeoque effectum producere possit (§. 899.), ob vim vero agendi actu agat (§. 723.), adeoque effectum actu producat (§. 899.); ideo causa præcedens proxime sequentem ad agendum disponit, hoc est, efficit, ut agere possit, vel actu agat.

§. 906.

Prioritas
causæ
respectu
causæ.

Omnis causa est prior causato (§. 881. 897.).

§. 907.

§. 907.

Ergo etiam *causa efficiens effectui prior est* (§. 886.).

Prioritas cau-
sæ efficientis
respectu effe-
ctus.

§. 908.

Quod contingenter existit, id a causa quadam efficiente productum est. Vid. §. 310. 851. 866. 881. 906. 118. Contigit ergo in causa entis contingentis aliqua mutatio (§. 290.) & quidem status (§. 705.). Cum omnis status mutatio aut actio sit, aut passio (§. 713. 714. 53.); mutatio illa status causæ vel actio erit, vel passio. Jam consule §. 714. 56. 886. 899.

Ortus entis
contingentis.

§. 909.

Si ens infinitum fuerit causa efficiens entis contingentis, actio quadam per eminentiam eidem tribuitur (§. 848. 886.).

Causalitas
causæ efficien-
tis infinitæ.

§. 910.

Si ratio sufficiens existentie entis contingentis in ente infinito continetur, ens contingens ab eodem tanquam a causa efficiente productum est (§. 881. 908.).

Ortus entis
contingenter
existentis ab
ente infinito.

§. 911.

Effectus dicitur causæ continuus, si inter eum & causæ actionem nulla alia causa principalis interponitur (§. 554.). Causa, cui effectus continuus est, dicitur *causa efficiens immediata*: cui vero effectus non est continuus, ea *causa efficiens mediata* appellatur.

Causæ imme-
diatæ ac me-
diatæ definitio.

E. gr. Sol est diei causa efficiens immediata. Etenim inter actionem solis, quæ luminis productio est, & diem tanquam effectum ejus nulla alia causa principalis interponitur. E contrario globum ex bombardâ explodens est vulneris causa efficiens mediata; immediata vero ipse globus est.

§. 912.

Causa proxima efficiens est causa efficiens immediata. Vid. §. 889. 911.

Causa effici-
ens proxima
qualis.

§. 913.

E contrario quia inter causam efficientem remotam atque effectum causæ aliæ principales vel saltem una interponuntur (*Ontologia contracta*).

Causa effici-
ens remota
qualis.

Kk kk

tur (§. 889.), adeoque effectus causæ efficienti remotæ continuus non est (§. 911.); *causa efficiens remota est causa efficiens mediata.*

§. 914.

Actio causæ
efficientis
principalis &
instrumenta-
lis qualis.

Actio causæ efficientis principalis & instrumentalis non-nisi unica est. Vid §. 891. 899. 890. 723. Quoniam itaque actiones in plures distinguuntur pro virium pluralitate, ex quibus sequuntur (§. cit.); ubi unicam saltem deprehendimus vim, ibi quoque actionem nonnisi unicam admittere possumus.

E. gr. Dum gladio *Mævius* percutit *Titium*, nonnisi unica actio est *Mævi* atque gladii.

§. 915.

Relatio causæ
instrumenta-
lis ad princi-
palem.

Causa efficiens principalis & instrumentalis, quarum junctim sumatarum actio nonnisi unica est, simul sunt pro una causa (§. 886.).

§. 916.

Ens activum
quando se ha-
beat per mo-
dum instru-
menti.

Si quod ens pollet vi agendi, nec tamen eadem uti potest, nisi ad nutum alterius entis; per modum instrumenti se habet (§. 891.).

E. gr. Eques utitur equo tanquam instrumento. Etsi enim equus habeat vim currendi propriam, nec, dum currit, virtute equitis currit, eadem tamen vi non aliter utitur, quam si esset ipse equitis.

§. 917.

Causa admini-
stra quænam.

Ens istud activum seu vi agendi instructum, quo causa efficiens principalis per modum instrumenti utitur, *Causa administrata* dici solet.

§. 918.

Causæ effi-
cientes eju-
dem ordi-
nis quæ-
nam.

Causæ efficientes ejusdem ordinis sunt, quæ eandem habent definitionem, seu, quod perinde est, quæ ad eandem speciem referuntur.

E. gr. Dux causæ efficientes principales ejusdem sunt ordinis, cum eadem sit earum definitio, nempe quod vi propria, nec in ipsa actione aliunde

aliunde pendente instructæ sint (§. 890.). Similiter patet duas causas instrumentales esse ejusdem ordinis (§. cit.), itidemque duas causas ad-ministras.

§. 919.

Causæ efficientes plures ejusdem ordinis constituentes causam efficientem sufficientem dicuntur *Causæ sociæ*. Causæ sociæ quænam.

E. gr. Plures equi simul currum trahentes sunt causæ sociæ.

§. 920.

Effectus partim ab hac, partim ab ista causa sociâ producitur, a nulla earum vero totus (§. 919. 897. 53. 898.). Effectus dependentiæ a causis sociis.

§. 921.

Causa sociâ dicitur auxiliariis, quæ supplet defectum virium ceterarum vel alterius principalis. Causa auxiliariis quænam.

E. gr. Fabri eodem tempore in coagmentandis lateribus vel trabibus, & apportandis vel attollendis materiis occupari nequeunt. Quamobrem ad suppleendum hunc virium defectum operas socias præstant operarii, agentes ea, quæ viribus suis inferiora judicant fabri. Operarii igitur sunt fabrorum causæ auxiliares.

§. 922.

Effectus dicitur plenus, qui a tota actione causæ efficientis pendet: *partialis* vero, qui non solus ab eadem actione causæ efficientis pendet. Effectus plenus.

§. 923.

Posita eadem causa efficiente, idem ponitur effectus plenus (§. 836. 118. 851. 922.). Identitas effectuum.

§. 924.

Positis causis efficientibus virium æqualium, iidem ponuntur effectus pleni (§. 923. add. §. 886. 733.). Identitas effectuum.

§. 925.

Vi gradus determinati effectus determinatus respondet (§. 924.). Effectus ad viam relatio.

§. 926.

Effectus plenus, quem causa efficiens vi data producere potest, dicitur eidem, causæ scilicet efficienti, vel etiam vi ejus æqualis. Effectus quoniam causæ efficienti æqualis.

lis; quinam
eadem major
vel minor.

lis: qui vero nonnisi vi illa majore producit, illa causa effici-
ente major; qui minore producit, eadem minor.

§. 927.

Effectus ad
causam rela-
tio.

Hinc consequitur: causam efficientem omnem producere ef-
fectum sibi æqualem, non autem posse producere se majorem, nec produ-
cere se minorem, nisi quando vis integra ad agendum non applicetur.

§. 928.

Causæ causa
qualis.

Causa cause est etiam causa causati. Sit A causa ipsius B
& B sit causa ipsius C: dico A esse etiam causam ipsius C. Quo-
niam enim A est causa ipsius B per hypotesin; in ipso A conti-
netur ratio, cur B existat, vel cur tale existat (§. 883). Simili-
ter quia B est causa ipsius C; in ipso B continetur ratio, cur
C existat (§. cit.), consequenter C existere nequit nisi existat B
& B existere nequit, nisi existat A (§. 118.), consequenter
nec C existere vel tale existere potest, nisi existat A. Quam-
obrem per notionem quoque ipsius A intelligere datur, cur
C porius existat, quam non existat, atque adeo ratio aliqua
actualitatis ipsius C, quatenus vel simpliciter, vel tale ex-
istit, deprehenditur in ipso A (§. 56.). Est igitur A principi-
um ipsius C (§. 866.) & ab eodem dependet, quatenus vel
simpliciter, vel tale existit (§. 851.), consequenter causa ipsius C.
(§. 881.).

E. gr. Causa accensionis pulveris pyrii est homo, qui bombardam
oneratam & directam solvit. Pulvis pyrius accensus vi sua elastica
globum ex bombardam expellit determinata quadam celeritate & se-
cundum directionem bombardam atque adeo causa est explosionis glo-
bi. Est igitur & is, qui bombardam oneravit, direxit & solvit cau-
sa explosionis globi. Hinc & in communi sermone globum explode-
re dicitur, qui bombardam oneratam & directam solvit. Similiter
globus ex bombardam explosus est causa vulneris corpori humano in-
flucti, in quod impingit. Ergo etiam vulneris hujus causa est is, qui
globum ex bombardam explosit, consequenter qui bombardam onera-
vit, direxit atque solvit. Quamobrem communis quoque usus lo-
quendi fert, quod is dicatur globo ex bombardam explosio alterum vul-
nerasse.

§. 929.

§. 929.

Quoniam omnis causa efficiens est causa, effectus vero omnis causatum est (§. 886.); *causa quoque efficiens causæ efficientis alterius est etiam causa efficiens effectus.*

Efficiens effici-
cientis qualis.

Breviter dicere solemus. *Efficiens efficientis est etiam efficiens effectus.* Exempli loco esse potest, quod paulo ante attulimus (not. §. 928.).

§. 930.

In serie causarum subordinatarum prima & qualibet intermedia est causa efficiens effectus ultimæ (§. 886. 895. 881.).

Relatio causa-
rum subordi-
natarum ad
effectum ul-
timæ.

§. 931.

Effectus remotus dicitur, qui mediante alia causa principali vel pluribus mediantibus a causa efficiente pendet, seu, quod perinde est, qui ab ente aliquo pendet tanquam a causa remota. Effectus vero proximus est, qui a causa proxima, nulla alia causa principali interveniente proficiscitur, adeoque idem cum continuo (§. 911.).

Effectus remo-
ti & proximi
differentia.

§. 932.

Id, propter quod causa efficiens agit, dicitur *Finis*, itemque *causa finalis*. Dicitur autem causa efficiens agere propter quidpiam, si ideo agit, ut ipsum sit vel fiat.

Finis definitio.

E. gr. Studiosus studiorum gratia in Academiam proficiscitur, & quaerit cur in eam proficiscatur, respondet, ut studiis operam navet. Studia igitur sunt finis vitæ academicæ.

§. 933.

Quoniam adeo per finem intelligitur, cur causa efficiens agat (§. 932.), consequenter in eodem ratio actionis ejusdem continetur (§. 36.); *finis est causa actionis causæ efficientis (§. 866. 881.).*

Finis cursus
causa.

§. 934.

Quodsi ergo *causa efficiens ideo agit, ut effectus producat; effectus est finis ejusdem (§. 932.),* sive remotus fuerit, sive proximus.

Effectus quan-
do finis.

§. 935.

Quoniam itaque finis est effectus causæ efficientis (§. 934.)

Finis & causæ
efficientis mu-
tua relatio.

& simul causa actionis causæ efficientis (§. 933.); *finis & causa efficiens sunt sibi mutuo causæ.*

Nimirum finis in relatione ad efficientem consideratur ut existens, etsi tantummodo idealiter existat, cum idealis existentia hic sufficiat.

§. 936.

Finis cui efficienti sit causa.

Quoniam causa efficiens agit propter finem, seu ideo, ut finis existat (§. 932.); *finem præcognoscere debet, consequenter finis præsupponit agens intelligens.*

§. 937.

Medii definitio.

Quicquid rationem continet, cur finis actum consequatur, Medium vocatur.

§. 938.

Actiones quando media fiunt.

Quare cum actio sit ratio, cur effectus actum consequatur (§. 886.), medium autem rationem contineat, cur finis actum consequatur (§. 937.); *si finis est effectus proximus, actione causæ efficientis proximæ; si vero remotus, causarum quoque remotarum actionibus medium continetur.*

§. 939.

Relatio rerum in serie causarum contingentium.

Quoniam itaque effectus est finis & actio causæ efficientis medium eum consequendi (§. 938.) *in serie rerum contingentium, quarum præcedens continuo est causa sequentis, res ita invicem subordinari possunt, ut sequentes referantur ad præcedentes sicuti finis ad medium.*

§. 940.

Causæ impulsivæ quænam.

Cum fine non confundendæ sunt rationes voluntatem determinantes, ut propter hunc finem agere velimus, quæ *Causæ impulsivæ* appellatione continentur. Dividitur autem *Causa impulsiva* in internam & externam. *Interna* vocatur, si rationes istæ in agente continentur; *externa* vero, si eadem a rebus externis desumuntur.

§. 941.

Finis ac medii indissolubilis nexus.

Qui vult finem, media etiam velit necesse est (§. 118. 937.).

§. 942.

Finis primarii & secundarii definitio.

Finis, propter quem quis ita agit, ut, si nullum alium sibi propositum haberet, ob hunc solum ageret, dicitur *primarius*,

rius, vel etiam *principalis*. Ex adverso *Finis*, propter quem quis ita agit, ut, si non præterea alium sibi propolitum haberet, non ageret, *secundarius*, vel *minus principalis* vocatur.

§. 943.

Si fines plures sibi invicem subordinantur (§. 939.), *Finis proximus* dicitur, qui nullo alio mediante intenditur; *remotus* autem, qui nonnisi alio, vel aliis mediantibus obtineretur. Et inter remotos *ultimus* est, in quem tandem ceteri omnes resolvuntur, seu, propter quem ceteri omnes sunt. Remoti respectu proximi & ultimi dicuntur *intermedii*, ut adeo *Finis intermedius* sit, qui inter duos alios in serie sibi invicem subordinatorum interjacet.

Finis proximi,
remoti, ultimi,
intermedii
definitio.

§. 944.

Determinationes essentielles sunt id; quod *Forma* appellari solet, item *Causa formalis*.

Formæ defini-
tio.

§. 945.

Quoniam itaque differentia specifica ex determinationibus essentialibus constat (§. 252.) & genus atque species entis per easdem determinatur (§. 247.); *Ens a forma habet, ut sit bujus generis vel speciei atque ab aliis distinguatur* (§. 944.).

Ens quid for-
mæ debeat.

Hinc Scholastici ajunt, formam dare esse rei, dare distinguere.

§. 946.

Et quia ratio eorum, quæ enti necessario conveniunt, seu per modum attributorum insunt, in essentialibus continetur (§. 167.), agendi vero potentia per modum attributi inest (§. 164.); *a forma quoque habet ens, quod hoc modo agere possit*.

Idem ulterius
deducitur.

Hinc Scholastici affirmant, formam dare rei operari.

§. 947.

Forma inter causas rerum referenda (§. 945 sq. §. 866. 851. 881.).

Forma cur in-
ter causas re-
feratur.

§. 948.

Illud, quod determinatur in ente composito, vocatur *Materia*: unde ens compositum ex materia constare dicitur.

Materiæ de-
finitio.

§. 949.

Dicitur materia subinde *materia ex qua* ad differentiam

Objecti defi-
nitio.

subjecti, quod *materia in qua* vocatur, & objecti, quod *materia circa quam* appellatur. Est nimirum *objectum* ens, quod terminat actionem agentis, seu in quo actiones agentis terminantur: ut adeo actionis quasi limes sit.

§. 950.

Objectum cui
inserviat.

Ex notione objecti alicujus disciplinæ deducendum, quid in ea tractari debeat (§. 949.).

§. 951.

Notionis cau-
sæ conformi-
tatem, cum
recepta.

Notio causæ in genere est conformis notionibus receptis: sunt etiam risdem conformes notiones causarum in specie. Vid. Jungius log. Hamb. l. 5. c. 13. §. 2. p. 422. du Hamel in philos. vet. & nova T. 3. Tract. 2. disp. 1. quæst. 1. p. 97. Clauberg. metaph. de ente §. 225. Aristot. l. 2. physicorum c. 3.

CAPUT III.

DE SIGNO.

§. 952.

Signi defini-
tio.

Signum dicitur ens, ex quo alterius præsentia, vel adventus, vel præteritio colligitur.

Ita fumus ascendens est signum ignis præsentis. Cælum nubibus vi venti occidentalis advectis velatum est signum pluvie imminens. Solum humidum est signum pluvie per noctem delapsæ.

§. 953.

Signati defi-
nitio.

Id, cujus vel præsentia, vel adventus, vel præteritio ex altero colligitur, *Signatum* appellatur.

§. 954.

Signi demon-
strativi, pro-
gnostici & re-
memorativi
definitio.

In specie *Signum demonstrativum* dicitur, cujus signatum præsens: *Signum prognosticum*, cujus signatum futurum est: *Signum* denique *rememorativum* vel *memoriale*, cujus signatum præteritum est.

§. 955.

Fundamen-
tum signorum
naturalium.

Signa per rerum naturam vel coëxistunt, vel se invicem sequuntur, eorum unum alterius signum est (§. 952.).

Ita

Ita ignis & fumus per rerum naturam coëxistunt. Ac ideo fumus ascendens est ignis præsentis signum. Si nubes a vento occidentali advehuntur iisdemque cælum obducitur, pluvia sequitur.

§. 956.

Si significatus ratio in ipsis rerum notionibus continetur, Signi naturalia dicuntur. Signi naturalia dicuntur.

Exempla signorum naturalium sunt ea, quæ modo (not. §. 955.) in medium attulimus & plurima istiusmodi exempla quotidie obvia sunt. Signa morborum, quæ medici in Semiotica tradunt, naturalia sunt. Signa quoque morum, virtutum ac vitiorum, quæ in philosophia morali exhibentur, sunt naturalia.

§. 957.

Signa naturalia sunt necessaria (§. 956. 118. 298. 279.). Necessitas signorum naturalium.

§. 958.

Signis naturalibus opponuntur artificialia Signa, quorum vis significandi penderet ab arbitrio entis cujusdam intelligentis, veluti hominum. Signi artificialia definitio.

Talia signa artificialia sunt vocabula, quibus rerum notiones, tum res ipsæ iis respondentes significantur.

§. 959.

Signa artificialia prorsus arbitraria sunt, ac ideo per se indifferentia sunt ad quemlibet significatum, neque adeo quicquam obstat, quo minus iisdem tribuatur significatus prorsus contrarius, vel ut eidem signo tribuantur diversi simul significatus, vel ejusdem rei diversa sint signa (§. 958. 851.). Signa artificialia qualia sunt.

§. 960.

Ex notione signi artificialis nihil colligere licet, quod signato conveniat; sed idem signatum aliunde notum tantum, modo in memoriam revocat, ubi ante edocti fuerimus, cujusnam sit signum (§. 959. 952.). Usus signorum artificialium.

E. gr. Ponamus, vocem Latinorum Deus esse a Græca *θεός*, quæ metum significat; quemadmodum nomen Polonorum *Bóg*, quod originis Slavonicæ est, a *Bogum* timendo descendit, non tamen hinc colligere licet, Deum esse timendum, sed saltem intelligitur, Slavonos (Ontologia contracta.)

atque Latinos Deum significare voluisse tanquam ens, quod sit metuendum. Non igitur inde colligitur, quid Deo conveniat & ante nondum fuerat notum; sed quid de Deo persuasi fuerint Slavoni atque Latini & ad quodnam Dei pradicatum respexerint in eo denominando. Nisi aliunde constiterit, Deum esse ens, quod sit metuendum, id inde non addices, quod Latini & Slavoni Autori rerum universi imposuerint nomen a timore.

§. 961.

Quale signum
sit efficiens
sufficiens &
effectus.

Causa efficiens sufficiens est signum effectus. (Vid. §. 898. 952.) & *vicissim effectus est signum causæ efficientis sufficientis* (§. 898. 952.).

§. 962.

Causatum
quale signum.

Causatum quodlibet est signum causarum sufficientium (§. 881. 851. 70. 906. 952.): *causa vero una vel altera est signum probabile causati* (§. 881. 851. 115 sq. Ont. & 197. 544. 549. Log.).

E. gr. Ex pomorum multitudine, quæ fert arbor, colligitur, multos vere extitisse flores ceterasque successive extitisse causas fertilitatis. Sed ex multitudine florum nonnisi probabiliter colligitur, arborem multa daturam esse poma.

§. 963.

Dependentia
a communi
causa qualem
inferat vim
significandi.

Si qua a communibus causis dependent, eorum unum est signum alterius (§. 881. 851. 118. 952.).

E. gr. Reditus hirundinum atque ciconiarum, itidemque coaxatio ranarum verno tempore ab eadem causa efficiente sufficiente dependent, calore nempe atmosphaeræ. Reditus adeo hirundinum est signum reditus ciconiarum, itemque coaxationis ranarum mox audiendæ.

§. 964.

Signa primitiva
& derivativa
quoniam
sunt.

Signa primitiva sunt, quæ ab aliis signis se prioribus ortum non trahunt: signa vero derivativa sunt, quæ ab aliis signis se prioribus ortum trahunt.

Ita in sermone vocabula primitiva, quæ ab aliis non deducuntur, sunt signa primitiva: ex adverso autem vocabula derivativa, quæ ab aliis ortum trahunt, sunt signa derivativa.

§. 965.

§. 965.

Si signa primitiva artificialia denotent notas verum & iis combinatis formentur alia, quæ distincte notas illas representant ad signatum agnoscendum & ab aliis distinguendum sufficientes; signa derivativa æquipollent definitionibus, quæ i forum signata sunt. Etenim si dantur signa primitiva, quæ notas definitionem rei ingredients significant, & eadem in signo derivativo combinantur; ex signo derivativo colligitur, quænam signato insint (§. 952.). Quare cum in signo derivativo contineantur signa primitiva tot notarum, quot ad signatum agnoscendum & ab aliis distinguendum sufficiunt, *per hypoth.* ex eodem quoque ea colliguntur, quæ signato agnoscendo & ab aliis distinguendo sufficiunt. Jam vid. §. 150. *Log.* & 181. *Ont.*

Signa derivativa definitio-
nibus æqui-
pollentia.

E. gr. Signum divisionis in arithmetica primitivum est: & signum æqualitatis = idem primitivum. Signa etiam primitiva sunt, si terminos antecedentes duarum rationum voces *A* & *a*, consequentes *C* & *c*. designas. Quoniam vero identitas rationum duarum proportionem constituentium consistit in exponentibus æqualibus ex divisione antecedentium per consequentes emergentium; signum derivativum proportionis $A : C = a : c$ definitioni æquipollet, quam distincto significatu exprimit. Propositio hæc maximi momenti est, cum sit fundamentum artis characteristicæ, cujus theoriam generalem arti inveniendi reservamus. Etenim cum ex istis signis deduci possint, quæ ex definitionibus colliguntur; ea quoque ad inveniendum & demonstrandum apta sunt.

§. 966.

Quoniam propositionibus perinde ac definitionibus notationes distinctæ respondent, quæ tanquam notæ definitionem ingredients ingrediuntur determinationes subjecti sufficientes & prædicatum, quod in iis rationem sufficientem agnoscit (§. 491. *Log.* & §. 130. *Ontol.*); si signa primitiva denotent determinationes subjecti & prædicati, iis combinatis formatur signum derivativum propositionis, quod eidem æquipollet. Etenim signum derivativum æquipollent notioni, quæ propositioni responder (§. 965.); ergo & propositioni, cui illa responder.

Signa derivativa propo-
sitionibus æqui-
pollentia.


Exempli loco sunt formulæ algebraicæ. Inimò ipsæ propositiones, quatenus judiciorum signa sunt, & definitiones, quatenus notiones distinctas completas distincte significant, istiusmodi signa derivativa sunt. Ceterum maximi momenti præfens quoque propositio est non modo in arte characteristica, quatenus inservit methodo inveniendi ac demonstrandi; verum etiam quatenus suppetias fert studendi ac docendi methodo. Hinc etiam pendet notio linguæ philosophicæ & essentialiter significantis, nec non Logisticæ speciosæ universalis & modi ad utramque perveniendi.

§. 967.

Signa ista
qualia.

Quoniam *signa derivativa definitionum ac propositionum vicaria* significatum primitivum ab arbitrio significatum impo-
nentis, derivativum autem a rebus significatis habent (§. 965. 966.);
ideo respectu illius artificialia sunt (§. 958.), respectu hujus
naturalia imitantur (§. 956.), consequenter *ex artifi-
cialibus & naturalibus mixta.*

FINIS PHILOSOPHIÆ PRIMÆ.



COSMO-

COSMOLOGIA
GENERALIS,
METHODO SCIENTIFICA
PERTRACTATA,
QUA
AD SOLIDAM, INPRIMIS
DEI ATQUE NATURÆ,
COGNITIONEM VIA
STERNITUR.

COSMOLOGIÆ GENERALIS PROLEGOMENA.

§. 1.

Cosmologia generalis est scientia mundi seu universi in genere, quatenus scilicet ens idque compositum atque modificabile est. Vid. §. 71. *Disc. præl.* Cosmologia definitio.

§. 2.

In Cosmologia generali ad mundum seu universum in genere applicatur theoria entis in genere atque theoria generalis entis compositi in philosophia prima tradita, atque adeo notiones Cosmologia generalis ex principiis philosophiæ primæ demonstranda (§. 1. *Cosm.* §. 1. 531 seqq. *Ontol.*). Cosmologia principia & objectum.

§. 3.

Quæ in Cosmologia generali de mundo in genere ex principiis philosophiæ primæ (vi §. 2.) demonstrantur, ex observationibus confirmari possunt (§. 237. *Ontol.*). Modus confirmandi dogmata cosmologica.

§. 4.

Datur adeo Cosmologia duplex: altera scientifica, altera experimentalis. *Cosmologia generalis scientifica* est, quæ theoriam generalem de mundo ex Ontologiæ principiis demonstrat: *Contra experimentalis* est, quæ theoriam in scientifica stabilitam vel stabilendam ex observationibus elicit. Cosmologia scientifica & experimentalis differentia.

In Cosmologiam scientificam quadrat definitio, quam dedimus (§. 1.), vi eorum, quæ inde deducuntur (§. 2.). Fundamentum experimentalis continetur in articulo præcedente (§. 3.). Atque illa est, quam hic loci pertractamus, etsi illustrandorum & confirmandorum dogmatum gratia nonnunquam allaturi sumus, quæ ad hanc pertinent.

§. 5.

Cosmologia experimentalis scientificam præsupponit (§. 4.). Utriusque Subordinatio.
Quate.

Quatenus tamen nec repugnat, ut in scientifica tradenda ex observationibus seu phaenomenis observatis eliciantur (§. 3. 4.); *Cosmologia experimentalis & aliquatenus ante scientificam excoli & cum scientifica conjungi potest.*

§. 6.

Fructus Cosmologiae generalis seu firmitas cognitionis Dei fundamentum.

Ex iis, quae in Cosmologia generali traduntur, tum existentia Dei, tum notiones attributorum ejus demonstrativa methodo colligi possunt (§. 2. Cosm. §. 70. Ont. & §. 56. 457. ib.).

Atque sic demum Theologia naturalis, prout docet Apostolus Rom. I. 20. a contemplatione mundi visibilis ad Deum invisibilem Auctorem ejus, sine quo concipi nequit, ascendit & eodem argumento & existentiam, & attributa colligens systema efficitur harmonicum.

§. 7.

Limites Cosmologiae.

In Cosmologia generali explicandum est, quomodo mundus ex substantiis simplicibus prodeat. Conf. §. 2. Cosm. §. 144. 153. 686. Ont.).

§. 8.

Ulterius deducuntur iidem.

In Cosmologia generali explicanda sunt principia generalia modificationis rerum materialium (§. 1. Cosm. & §. 866. Ont.).

Hæc ratio est, cur de legibus motus agamus, cum omnes rerum materialium modificationes mediante motu fiant. Ex præsentia autem propositione simul innotescit usus Cosmologiae generalis in philosophia naturali, nec non in Mechanicis, ubi regulæ motus demonstrantur, sed principia earum, quæ legum motus nomine veniunt, supponuntur, atque ideo sumuntur, quia sic prodeunt regulæ experimentis consentientes.

§. 9.

Quodnam studium lectioni Cosmologiae præmittendum.

Cosmologiam generalem intellegendus & veritatis in ea proposita convincendus Ontologiae principia familiaria experiri debet (§. 2. Cosm. §. 540. 532. Log.).

FINIS PROLEGOMENORUM.

COS.

COSMOLOGIÆ GENERALIS

SECTIO I.

DE

NOTIONE MUNDI SEU
UNIVERSI.

CAPUT I.

DE

RERUM NEXU ET QUOMODO
INDE RESULTET UNIVERSUM.

§. 10.

EA inter se *connessi* dicuntur, quorum unum continet rationem sufficientem coëxistentiæ, vel successione alterius. Ex adverso autem *inconnexa* sunt, quorum unum non continet rationem sufficientem coëxistentiæ, vel successione alterius. Connessi iu-
ter se quæ-
nam dicantur.

In corpore humano multa dantur organa a se invicem diversa adeoque entia plura coëxistentia. Organa ista dicuntur inter se connexa. Quodsi jam quis ex te quæsierit, in quonam nexus iste consistat, & ut intelligi possit eum alteri explicare volueris; ex structura doces, quomodo fieri possit, ut existant simul, atque adeo rationem possibilitatis coëxistendi ex eadem reddis (§. 56. *Ontol.*). Quodsi quis ulterius quæsierit, an organa ipsa, quatenus organa sunt, hoc est, certo usui inserviunt, non quatenus entia composita seu materialia esse intelliguntur, inter se connexa sunt; denuo nexum explicaturus eorum Mm mm rum

(*Cosmologia contracta.*)

rum functionibus rationem reddi posse doces, cur eadem in corpore humano coëxistant.

§. 11.

Connexa qualia fiunt.

Si coëxistentia vel successiva inter se connectuntur, in iis quidpiam detur necesse est, per quod intelligitur, cur coëxistant, vel unum alterum sequatur. Vid. §. 10. *Cosm.* & §. 56. *Ont.*

Si gulam & ventriculum consideres ut organa corporis vivi, per structuram utriusque a priori liquet usus, cui utrumque destinatur, qui idem & a posteriori observatur, scilicet quod gula inserviat cibo demittendo in ventriculum, ventriculus autem eidem digerendo. Ex functione utriusque, gulæ & ventriculi, intelligitur, cur gula ventriculo jungatur. Nexui rerum perspicendo Teleologia inservit, perinde ac Physica. Teleologia enim rerum naturalium fines explicantur (§. 78. *Disq. prælim.*), consequenter docetur quomodo unum sit propter alterum (§. 932. *Ont.*), veluti Sol propter Tellurem. In Physica vero rerum earundem causæ investigantur (§. 52. *Disq. prælim.* & §. 881. *Ontol.*), ut pateat, cur unum sequatur alterum.

§. 12.

Principium plura connectendi.

Quæ cum eodem tertio connectuntur, ea inter se connectuntur (§. 10. *Cosm.* §. 118. § 6. *Ont.*).

In connexionibus rerum materialium, quatenus tales sunt, res adeo manifesta est, ut eas mediante aliquo tertio connectere soleamus. Sane duos asseres vel glutine, vel clavis jungimus, dum eos combinamus. Enimvero quod idem etiam contingat in nexu minime materiali, perinde exemplis doceri potest. Quodsi ergo, gulam, ventriculum & intestina tanquam organa consideres, ex functionibus eorum apparet, cur coëxistere debeant. Etenim per gulam in ventriculum cibus demittitur, in ventriculo digeritur, in intestinis chylus a digesto separatus & faeces per ea excernuntur. Quia cibus in ventriculo digeri nequit, nisi in eundem immittatur, gula autem cibo in ventriculum demittendo servit; ex functionibus eorum constat, cur gula cum ventriculo connectatur. Similiter quia cibus in ventriculo digeritur & a digesto in intestinis chylus separatur, ac faeces reliquæ per ea excernuntur, ex utriusque, organi functionibus intelligitur, cur intestina cum ventriculo connectantur. Eumvero si functiones quoque gulæ ac intestinorum

spedes,

ſpecies, cum a cibo digeſto in inteſtiniſ chylus ſeparari non poſſet, niſi ante per gulam in ventriculum dimitti potuiſſet, eo ipſo nexus quidam inter gulam & inteſtina obſervatur, quod utrumque organum vi ſuarum functionum cum ventriculo connectitur. Quodſi jam porro cibum conſideras, qui per gulam in ventriculum demittitur, demiuſus in ventriculo digeritur, digeſtus in inteſtiniſ chyli ſeparatione infervit; hoc ipſo intelligis, quæ cibo ſucceſſive accidunt inter ſe connexa eſſe.

§. 13.

Si in ſerie coëxiſtentium, vel ſucceſſivorum præcedens connectitur continuo cum proxime ſequenti; coëxiſtentia vel ſucceſſiva ſingula cum ſingulis connexa ſunt (§. 12.).

Nexus rerum
in integra
ſerie.

Præſens propoſitio oſtendit modum, quo integræ rerum coëxiſtentium & ſucceſſivarum ſeries inter ſe connecti poſſunt. Exemplum præbet corpus humanum, quod ex integra organorum multitudine conſtat, quorum ſingula cum ſingulis connectuntur, propterea quod unumquodque connectitur cum eo, quod ipſi proximum, quatenus eſt corporis vivi ac ſentientis organum.

§. 14.

Quæ inter ſe connectuntur, a ſe invicem dependent quoad exiſtentiam (§. 10. Coſm. 851. Ont.).

Dependentia
mutua rerum
connexarum.

Ita exiſtentia gulæ dependet ab exiſtentia ventriculi & viciffim exiſtentia ventriculi dependet ab exiſtentia gulæ. Eſt enim gula propter ventriculum, quod per eam cibus in hunc devolvatur, & ventriculus non exiſtaret, niſi etiam exiſteret gula, cum abſque gula nullius eſſet uſus, nec unctiōi ſuæ vacare poſſet.

§. 15.

In ſerie coëxiſtentium, vel ſucceſſivorum, in qua præcedens continuo connectitur cum proxime ſequenti, res ſingulæ quoad exiſtentiam a ſe invicem dependent (§. 14. add. §. 13.).

Dependentia
rerum in ſerie
connexarum.

§. 16.

Inter cauſam & cauſatum datur nexus, ſeu cauſa & cauſatum inter ſe connectuntur (§. 881. Ont. §. 10. Coſm.).

Nexus inter
cauſam & cauſatum.

§. 17.

Nexus inter
causam effici-
entem & effe-
ctum.

Quoniam itaque causa efficiens causa est; effectus vero causatum (§. 886. *Ontol.*), effectus & causa efficiens inter se connectuntur (§. 16.).

§. 18.

Nexus inter
medium & fi-
nem.

Medium & finis inter se connectuntur. Vid. §. 937. *Ont.* & §. 10. *Cosm.*

§. 19.

Nexus prædi-
cati & subjecti
in propositione
determina-
ta.

In propositione determinata datur nexus inter prædicatum atque subjectum seu subiectum & prædicatum inter se connectuntur (§. 315.; *Log.* §. 10. *Cosm.*).

§. 20.

Quando præ-
dicatum cum
definitione,
quando cum
conditione ei-
dem adjecta
connectatur.

Si vel demonstratione, vel experientia patet, subjecto absolute posito, vel sub adjecta conditione convenire prædicatum; in priori casu inter definitionem & prædicatum; in posteriori inter conditionem subjecto adjectam & prædicatum nexus intercedit (§. 130. *Ont.* §. 10. *Cosm.*). Idem patet ex §. 130. *Ont.* 34. 315. *Log.* §. 19. *Cosm.*

§. 21.

Attributo-
rum & modo-
rum cum es-
sentia nexus.

Attributa rei cum ejus essentia, modorum possibilitas itidem cum essentia, actualitas autem cum modis aliis, aut rebus aliis extrinsecis, sive cum statu ejusdem connectitur (§. 157. 160. 705. *Ont.* §. 10. *Cosm.*).

§. 22.

Signi cum si-
gnato nexus.

Signum connectitur cum suo signato (§. 952. 56. *Ont.* §. 10. *Cosm.*).

§. 23.

Nexus rerum
successivarum
qualis.

Nexus rerum successivarum consistit in dependentia effectus a causa efficiente & in genere in dependentia causati a causa. Vid. §. 10. *Cosm.* §. 881. 851. 886. 951. *Ont.*

In omni autem nexu rerum successivarum aliquid præcedere debere, quod sit causa efficiens sequentis, hoc modo ostenditur. In serie rerum successivarum præcedens existit, dum sequens nondum existit (§. 569. *Ontol.*), adeoque actualitas sequen-

quentis contingens eſt (§. 294. *Ontol.*). Quare cum a cauſa efficiente produci debeat, quod contingenter exiſtit (§. 908. *Ontol.*); quod in ſerie rerum ſucceſſivarum ſequitur a cauſa quadam efficiente produci debet. Connectitur autem ſequeſ cum præcedente *per hypoth.* adeoque rationem actualitatis ſuæ ſufficientem agnoſcit in præcedente (§. 10.). Quare cauſa efficiens ipliſ præcedens eſſe debet.

Patet propoſitionis præſentis veritas ex obſervationibus in mundo adſpectabili obviis, ubi, quod ſequitur, eſt effectus cauſæ alicujus efficientis præxiſtentis.

§. 24.

Quando itaque præcedens deſinit eſſe cauſa ſequentis, in Quo reſpectu ſerie ſucceſſivorum perinde eſt, ac ſi exiſtere deſineret, conſequenter res in ſerie ſucceſſivarum quatenus ſunt cauſa (§. 23.). ſuccellivarum collocentur.

§. 25.

Quamobrem cum nil repugnet, quo minus ens perma-nens, ubi deſinit eſſe cauſa rei antea non exiſtentis, denuo alterius rei nondum exiſtentis cauſa fiat; *unum idemque ens permanens plus ſimplici vice in ſerie ſucceſſivorum conſtitui poteſt, quatenus ſucceſſive entis alicujus vicem tueri non poteſt, quod eſt cauſa alterius exiſturi.* Quomodo idem in ea-dem ſerie ſucceſſivorum iterato collo-cari queat.

Sol ſingulis diebus, quamdiu ſuper horizonte conſtituitur, varios in Tellure producit effectus. Atque adeo ſucceſſive multiplicis cauſæ munere fungitur, conſequenter continuo ſub alio alioque ſchemate tanquam ens diverſum in ſerie ſucceſſivorum conſtituitur.

§. 26.

*Rerum coëxiſtentium, quarum nulla alteram præcedit, una alterius cauſa eſſe nequit (§. 906. *Ont.*).* Coëxiſtenti-um relatio qualis eſſe ne-queat.

In agro ariſtæ plures coëxiſtunt, nec una exiſtit, antequam exiſteret altera: nulla igitur earum alterius cauſa eſſe poteſt.

§. 27.

*Si rerum coëxiſtentium una eſt cauſa efficiens alterius altera vi ortus cum priori connectitur, quatenus ſucceſſivæ ſunt non qua-tenus coëxiſtunt (§. 907. *Ont.* 569. 571. 56. 571. *ibid.* & §. 24 ſq. *Coſm.*).* Coëxiſtentiz quando con-nectantur ut ſucceſſiva.

E. gr. Si pater generat filium, ex actu generationis intelligitur, cur filius existat & cur existat post patrem, non vero extiterit ante eundem. Absoluto actu generationis periunde est, siue pater moriatur, siue supervivat: a vita enim patris non amplius pendet, ut existat filius. Quare si contingat patrem adhuc vivere filio in lucem edito ac vivente, ratio coexistentiae non inde petenda est, quod pater filium generaverit. Patet itaque inter patrem & filium nexum quandam intercedere vi generationis, quatenus pater filium praecedit, filius eum sequitur; non autem quatenus pater & filius simul existunt, cum posito actu generationis fieri possit ut coexistent, utque non coexistent, minime vero ut filius patrem praecedat, quemadmodum eum sequitur.

§. 28.

Coexistentia
quando prorsus
non connectantur.

Si res quaedam A & B a diversis causis efficientibus C & D, quarum una ab altera in actione sua non pendet, simul producuntur; inter se vi ortus prorsus non connectuntur. Etenim si A producit a causa efficiente C, actio ipsius C est ratio existentiae ipsius A (§. 886. *Ontol.*), consequenter C connectitur cum A (§. 10.). Eodem modo patet, B connecti cum D. Enimvero quoniam actio ipsius C non dependet a D, nec actio ipsius D a C *per hypoth.* non in D datur ratio, cur agat C, neque in C cur agat D (§. 851. *Ontol.*). Atque adeo C agere, consequenter A existere potest, ipso D non agente, immo non existente, ac vicissim D agere, consequenter B existere potest, ipso C non agente, immo non existente. Quare cum nulla prorsus detur ratio in D, multoque minus in B, cur existat A, nec vicissim ulla detur ratio in C, multoque minus in A, cur existat B; ideo A & B vi dependentiae a causis suis C & D, adeoque vi ortus (§. 541. *Ontol.*), inter se non connectuntur.

E. gr. Ponamus duos homines simul generari a duobus parentibus diversis. Nullus datur vi generationis inter eos nexus, cum unus in lucem editus fuisset, etiamsi alter genitus non fuisset. Ex generatione unius non intelligitur, cur etiam generatus fuerit alter.

§. 29.

§. 29.

Si qua a communi causa efficiente simul producuntur, ea inter se connectuntur tanquam successiva simultanea (§. 17. 12.).

Nexus a communi causa simul productorum.

E. gr. Sol eodem tempore lapidem in via positum calefacit & terram aridam in horto exsiccatur. Nexum intercedere inter solem & effectum utrumque manifestum est, cum remoto Sole neuter effectus fuisset consecuturus, sed lapis in via frigidus, terra in horto humida permansisset. Hoc ipso autem etiam connectuntur inter se. Etenim ex eo, quod terra sit sicca in horto, etiam intelligitur, quod lapis esse debeat calidus in via. Nimirum ex siccitate terræ in horto intelligitur, qualis sit actio in Sole, & posita hac actione Solis patet, quod lapis eidem expositus calidus fieri debeat. Et ideo siccitas terræ in horto, quatenus nempe a Sole pendet, est signum caloris lapidis in via & hic vicissim signum illius (§. 952. Ont.). Signa autem & signata inter se connexa sunt (§. 22.).

§. 30.

Si qua a communi causa efficiente simul producuntur, ea ideo non connectuntur, quatenus coexistunt (§. 886. Ont.). Enimvero actio, quæ impenditur in ortum ipsius A, non simul impendi potest in ortum ipsius B. Est igitur actio illa, qua producitur A, diversa ab actione, qua producitur B, (§. 184. Ontol.), consequenter perinde est ac si causa illa communis esset duplex, cumque actio una absque altera absolvi possit, perinde est ac si duæ istæ causæ in agendo a se invicem non dependerent (§. 851. Ontol.). Jam vid. §. 28.

An ex ortu a communi causa pendeat nexus in serie coexistentium.

§. 31.

Si agens intelligens causam ideo producit, ut existat vel existere possit causatum; causa cum causato hoc ipso connectitur per rationes finales (§. 932. 883. 937. Ont. §. 18. Cosm.).

Nexus rerum per agens intelligens factus.

E. gr. Si quis sanitatis conservandæ gratia deambulat, sanitas cum deambulatione denuo connectitur tanquam cum medio finis.

§. 32.

§. 32.

Duplex causa-
ticum causa
nexus.

Quoniam inter causam & causatum datur nexus quatenus unum alterius causa est (§. 16), agens vero intelligens causam cum causato etiam connectere possit tanquam medium & finem (§. 31.); *causa & causatum duplici modo inter se connecti possunt, tum per causalitatem, tum per rationes finales.*

Ita motus indicis cum horologio, duplici modo connectitur, tum quatenus motus iste a structura horologii pender, tum quatenus per eum intenditur ab artifice, ut hora præterlapsa indicetur.

§. 33.

Nexus effectus cum causa efficiente per fines.

Quoniam causa, efficiens causa, effectus vero causatum est (§. 886. *Ontol.*); *effectus quoque cum causa efficienti per rationes finales connecti potest (§. 31.), & actio causæ efficientis cum fine connectitur.*

E. gr. Causa efficiens horologii est artifex, horologium ejus effectus est, atque adeo datur nexus inter horologium & artificem, qui consistit in dependentia horologii tanquam effectus ab artifice tanquam causa efficiente (§. 23.). Enimvero præter hunc nexus datur adhuc alius, qui pender a fine, quatenus nempe artifex horologium ideo producit, ut horam præterlapsam indicare possit, alias idem non producturus, sicque ex fine reddi ratio queat, cur idem tale potius, quam aliter fuerit effectum.

§. 34.

Nexus rerum
successivarum
qualis.

Si agens intelligens causam ideo producit, ut existere possit causatum; nexus rerum successivarum consistit in dependentia causati a causa (§. 23.), & dependentia finis a medio, & actione causæ efficientis a fine simul (§. 10. Cosm. 851. Ont. §. 31. 33. Cosm.).

§. 35.

Nexus in serie
rerum contingen-
tium qualis
esse possit.

Si in serie rerum contingentium, quarum præcedens est continuo causa sequentis, res ita invicem subordinentur, ut sequentes referantur ad præcedentes sicuti finis ad medium; nexus consistit in dependentia causati a causa (§. 23.) & finis a medio (§. 18. 10. Cosm. 851. Ont.) & actionis causæ efficientis a fine simul (§. 932. 56. 851. Ont. §. 10. Cosm.).

E. c.

E. c. Sol ex mari vapores attrahit, quos ventus occidentalis ad nos advehit. Vapores isti in aëre rariore, in nubes coeunt & nubes congestæ in guttas colliguntur: quod dum contingit, pluit. Pluvia terram humectat & semen in terra latens vegetat. Habemus hic seriem rerum successivarum. Earum una ab altera pendet instar causati a sua causa seu in specie instar effectus a causa efficiente. Sol enim est causa efficiens vaporum, vapores autem effectus sunt. Ventus est causa efficiens motus, quo vapores ad nos perferuntur; advectio autem vaporum effectus est. Vapores sunt causa materialis nubium, nubes materia pluviae, pluvia est causa humectationis terræ, humor terræ causa vegetationis. Enimvero præter hunc nexum datur adhuc alius a finibus rerum istarum desumptus. Etenim Sol attrahit ex mari vapores, ut inde formetur nubes. Ventus occidentalis stat, ut nubes ad nos deferantur. Nubes formantur & ad nos deferuntur, ut pluat. Pluit, ut terra irrigetur. Irrigatur terra, ut semen vegetetur & plantæ succrescant.

§. 36.

Si causæ plures simul ad idem causatum concurrunt, hoc ipso singulæ inter se connectuntur (§. 881. 866. 56. Ont. §. 10. Cosm.).

Nexus plurium causarum ad idem causatum concurrentium.

§. 37.

Si plures fuerint series successivorum, quorum singula singulis connexa sunt, & ex iis simul concurret unum ad aliquod causandum in serie una, hoc ipso integræ istæ series inter se connectuntur (§. 36.).

Modus connectendi plures successivorum series.

Ita uno eodemque igne eodem tempore effectus plures produci, qui ad diversas rerum successivarum series referri debent, nemo ignorat.

§. 38.

Si entia duo coexistunt & unum in se continet rationem sufficientem modificationum alterius, aut mutationum quorumcumque in altero contingentium; entia ista inter se connectuntur, quantum coexistunt (§. 118. 70. 851. 56. Ont. §. 10. Cosm.).

Nexus rerum coexistentium per dependentiam mutationum unius ab

Exemplum habemus in Sole atque Tellure. Quot & quantæ mutationes in Tellure accidunt, quæ a Sole pendunt, ipso sublato non
(Cosmologia contracta.)

N n n a

extitit,

exituræ, obvia experientia clarissime loquitur, nec nisi levi attentione opus est ut intelligatur.

§. 39.

Qualis sit nexus iste.

Si entia duo, quorum unum continet rationem sufficientem mutationum in altero contingentium, ab agente intelligente ideo simul producuntur, ut mutatiores, quæ in uno eorum fieri possunt, actu fiant, nexus eorum consistit in dependentia finis a medio. Conf. §. 932. 937. Ont. §. 38. Cosm.

Deus Solem atque Terram simul produxit, ut generationes ac corruptiones continuæ sint in Tellure atque ideo Tellus habitaculum animalium atque hominum esse queat. Nexus adeo, qui inter Solem & Tellurem intercedit, quatenus tanquam corpora mundi totalia simul sunt, consistit in dependentia mutua finis a medio & medii a fine. Existit Sol, ut mutationibus in Tellure sit locus; existit Terra, ne Sol gratis exislat.

§. 40.

Alius nexus coëxistentium.

Si plura coëxistentia simul ad aliquid actuandum apta sunt, ea hoc ipso inter se connectuntur, quatenus coëxistent (§. 56. 118. Ont.).

Ita horologii partes simul existere debent eæque tales, quales deprehenduntur, ut sit machina ad tempus dimetiendum apta.

§. 41.

Alius nexus coëxistentium.

Si duæ fuerint substantiæ A atque B, & in earum una A contingant mutationes, earum ratio reddi potest ex mutationibus in altera B contingentibus, altera tamen B non sit causa mutationum in A; substantiæ istæ connectuntur, quatenus coëxistent (§. 881. 56 Ont. §. 10. Cosm.).

Sumo non impossibile esse, ut duo construantur horologia pendulis instructa, quæ in hora diei indicanda prorsus conspirent, ita ut iidem pul us campanæ fiant in utroque simul, quibus horæ a meridie elapsæ numerantur. Ponamus unum eorum esse instructum machina autophona campanaria, quæ hora pulsata campanarum sonitu concentum harmonicum exhibet. Jam si ab horologio hoc altero removeri supponas eam partem, quæ horis pulsandis inservit una cum orbe ac indice horario, & utrumque eodem in loco collocari jubeas; unum eorum indi-

indicabit, & pulsabit horas, horaque qualibet pulsata alterum concentum harmonicum edet non secus ac si utrumque horologium non esset nisi unum. Quod si jam quæsieris, cur horologium unum A concentum harmonicum edat, ratio reddetur ex eo, quod accidit in horologio altero B, scilicet quod ipsum horam pulset, aut modo pulsarit. Immo si supponas, singulis horis diei non eundem edi concentum harmonicum; ex iis, quæ accidunt in horologio B, simul rationem reddes, cur horologium A hunc potius concentum harmonicum edat, quam alium. Duo igitur ista horologia inter se connexa sunt, ut non modo machinam unam mentiantur; verum etiam unius vicem suppleant, in qua mechanismi omnes simul conjunguntur, quibus & hora indicatur atque pulsatur, & harmonicus editur concentus. Et apparet sane artificem artis suæ specimen editurum utramque machinam simul construere, atque ex consensu concentus harmonici, qui editur ab una, cum horis ab altera pulsatis intelligi, cur existant simul: id quod ad nexum, qualem hic consideramus, sufficit (§. 10.). Et si autem ex iis, quæ accidunt in horologio B ratio reddi possit, cur nunc concentum harmonicum edat machina autophona, & cur hunc potius edat quam alium, et si alius ab ea quoque proficisci possit; non tamen ideo B est causa concentus harmonici in A, seu per modum causæ efficientis in eundem minime influit, quemadmodum obtinet eo in casu, quo horologium cum machina autophona campanaria ita conjungitur, ut istud hanc determinet ad motum remoto obstaculo, quod eum impediēbat.

§. 42.

Si duæ fuerint substantiæ A atque B, in quibus ratio continetur continuitatis temporis, quo quædam mutationes in utraque contingunt; ex mutationibus, quæ in una B contingunt, reddi potest ratio, cur jam mutationes aliæ contingant in altera. Sic enim fieri non potest, ut mutationes in utraque continuo tempore non contingant (§. 118. Ontol.). Quare cum impossibile sit, ut inter mutationem a, quæ in substantia A contingit, & alteram b, quæ in altera B accidit, alia in alterutra vel in utraque contingat (§. 554. Ontol.); earum posita una veluti b in B certum est poni etiam debere in substantia altera A mutationem alteram a, nec aliam ante eam poni posse: quod enim fieri nequeat, ut

Quando ex mutationibus substantiæ unius ratio reddi possit mutationum in altera citra causalem influxum.

Nn nn 2

muta-

mutatio *a* posita mutatione *b* non ponatur, hic supponitur, & vi notionis rationis sufficientis (§. 118. *Ontol.*) supponi potest, immo in hypothesis theorematum supponi intelligitur. Cum adeo ex mutatione *b*, quae contingit in substantia *B*, intelligatur cur accidat in altera *A* mutatio *a*; ex illa utique ratio reddi potest, cur haec sequatur, seu jam in *A* contingat (§. 56. *Ontol.*).

Propositionem praesentem illustrat exemplum de horologio & machina autophona campanaria harmonicis seu conspirantibus.

§. 43.

Quando finalis ratio reddi possit, quales esse debeant mutationes substantiae alterius.

Quodsi in hypothesis theorematum praecedentis praeterea supponatur mutationes in A & B finitae; ex mutationibus, quae in una B contingunt, ratio quoque reddi potest, cur tales jam in altera A mutationes contingere debeant (§. 42. Cosm. §. 195. 56. Ontol.).

Nimirum in praesente casu mutationes in substantia una *B* sunt signa mutationum in altera *A* (§. 952. *Ontol.*). Exempli loco esse potest imago objecti visibilis in oculo delineata & perceptio ejusdem in mente. Etenim ex imagine in oculo delineata non modo intelligitur, quod mens objectum percipere debeat; verum etiam quod tale percipere debeat.

§. 44.

Possibilitas connexionis entium finitorum.

Entia finita inter se connexi possunt (§. 837. 151. 160. Ont. §. 10. Cosm.).

Quod ex ipsa notione entis finiti demonstravimus; idem a posteriori confirmatur.

§. 45.

Finitudo entis mutabilis & mutabilitas finiti.

Omne ens mutabile finitum est (§. 290. 837. Ont.) & omne finitum mutabile (§. 834. 706. 290. Ont.).

§. 46.

Modus connexionis entis finiti.

Entia finita, quae rationem modorum suorum habent extra se in aliis, connexi possunt tanquam causae & effectus (§. 703. 118. 851. 881. 312. 908. 885. Ontol.), vel si modificationum unius ratio reddi potest ex modificationibus aliorum, etsi unumquodque in se habeat rationem earum sufficientem, sed non facile observabilem, ita connexi possunt, ut unum appareat causa mutationum in altero.

§. 47.

§. 47.

Quamobrem Si agens intelligens entia finita ita ordinat, vel ideo producit, ut ſibi mutuo vel ſint, vel appareant ſuarum mutationum cauſe, ea connectuntur per fines (§. 881. 851. Ont. §. 39. Coſm.). Idem patet ex §. 932. Ont. §. 11. Coſm.

Finitorum
per fines con-
nexio.

§. 48

Series entium finitorum tam ſimultaneorum, quam ſucceſſivorum inter ſe connexorum dicitur *Mundus*, ſive etiam *Univerſum*. Vid. §. 46. Coſm. 837 ſqq. 569. Ont.

Mundi ſeu
Univerſi defi-
nitio.

§. 49.

Mundum hunc, qui exiſtit, *Mundum adſpectabilem* appellabimus.

Mundus ad-
ſpectabilis
quinam dica-
tur.

§. 50.

Res in mundo adſpectabili exiſtentes ſunt finitæ. Res enim in univerſo exiſtentes mutabiles ſunt (§. 634. Log. 705. 838. 834. Ont.).

Rerum exi-
ſtentium fini-
tudo.

§. 51.

Dantur in mundo adſpectabili res plures ſimultaneæ.

Earum ſimul-
taneitas.

§. 52.

Dantur in mundo adſpectabili res ſucceſſivæ.

Earundem
ſucceſſio.

§. 53.

Res coëxiſtentes in mundo adſpectabili inter ſe connectuntur. E. c. Sol & terra cum reliquis planetis. Idem pater ex ſemine terræ mandato, & corpore noſtro, quod pluribus rebus indiget.

Nexus coëxi-
ſtentium in
mundo ad-
ſpectabili.

§. 54.

Res ſucceſſivæ in mundo adſpectabili inter ſe connectuntur. Si enim ad res in hoc mundo adſpectabili attendimus, quarum una alteri ſuccedit; nihil ſine cauſa ad actum perducere deprehendes, ſtatimque præſentem a præterito dependere animadverteres. Jam vide §. 16 ſq. Coſm. 851. Ont. & §. 10. Coſm. E. c. Arbor gemmas habens, quæ verno tempore in frondes explicantur, per æſtatem matureſcentes.

Nexus rerum
ſucceſſivarum
in mundo ad-
ſpectabili.

§. 55.

Mundus ad-
spectabilis
quidnam sit.

*Mundus adspectabilis est series rerum finitarum (§. 50.)
simultanearum (§. 51.) & successivarum (§. 52.), inter se con-
nexarum (§. 53. 54.).*

§. 56.

Nexus rerum
quoad spa-
tium.

*Res in universo connectuntur quoad spatium (§. 48. 10. 11.
Cosm. §. 215. 217. 472. 589. Ont.).*

§. 57.

Nexus rerum
quoad tem-
pus.

*Res in universo connectuntur quoad tempus (§. 48. 10. 11.
Cosm. §. 215. 217. 472. 572. Ont.).*

§. 58.

Rerum in
mundo exi-
stentium de-
pendentia a
se invicem.

*In mundo res omnes a se invicem dependent quoad existen-
tiam (§. 48. 13. 15.).*

CAPUT II.

DE

ESSENTIA MUNDI ET EJUS
ATTRIBUTIS.

§. 59.

Essentia mun-
di in quo con-
sistat.

Essentia mundi consistit in modo, quo res finitæ datæ, non aliæ
inter se connectuntur (§. 48.). Quare si ponas has præci-
se res finitas, quæ existunt, easque eo modo inter se con-
nectas, non alio, quo inter se connexæ deprehenduntur; hic
præcise, qui existit, non alius prodit mundus. Quodsi vero
res finitæ variantur & alio modo inter se connectantur, vel alte-
rurum saltem (si quidem fieri potest) fiat; mundus non amplius
erit idem, qui existit, sed alius ab eo diversus prodit (§. 181. 183.
Ontol.). Quare cum in modo, quo aliquid prodit, possibilitas
ejus intrinseca (§. 92. Ontol.), consequenter essentia consistat (§.

154. *Ontol.*); essentia mundi consistit in modo, quo res finitæ hæ, non aliæ inter se connectuntur.

§. 60.

Mundus est ens unum (§. 345 sq. 328. *Ont.*). Idem patet ex §. 300. 291. *Ont.* §. 19. *Cosm.* & §. 328. *Ont.* Unitas mundi.

Quodsi accuratius singula perpendas, haud difficulter animadvertere mundi unitatem a rerum nexu pendere: etenim si plures res coëxisterent a se invicem independentes, illæ simul ens unum minime constituerent. Quoniam vero ens unum est, de mundo judicaturus, ad omnia cum simultanea, tum successiva, eorumque mutuū nexum attendere debet. Successiva tanquam mutabilia diversos mundi secundum simultanea perennia considerati status constituunt (§. 705. *Ontol.*). Judicium adeo de mundo integro omnem ejus statum per tempus omne, quo durat, simul respicit.

§. 61.

Mundus est totum aliquod & entia singula in eodem vel simul vel successive existentia sunt ejus partes (§. 48. 60. *Cosm.* §. 181. *Ont.* & 341. *ib.*). Totalitas mundi.

§. 62.

Mundus est ens compositum (§. 61. *Cosm.* §. 531. *Ont.*). Quale ens sit mundus.

§. 63.

Ratio eorum, quæ mundo conveniunt, in modo compositionis, seu qualitatibus entium simultaneorum & successivorum, quatenus tanquam simultanea & successiva spectantur, & in modo, quo inter se connectuntur, querenda est (§. 62. 61. *Cosm.* §. 535. *Ont.* §. 48. 55. *Cosm.*). Ratio eorum, quæ mundo conveniant, unde petenda.

§. 64.

Si successiva in mundo connectuntur, simultanea quoque inter se connecti debent. Si enim successiva connectuntur, ea a se invicem dependent sicut effectus a causa efficiente (§. 23.), vel saltem ea ita a se invicem dependere apparere debet (§. 46.). Quare cum successiva vel sint modi rerum durantium (§. 703. *Ont.*), vel per modificationes rerum existentium prodeant (§. 683. 688. Dependentia nexus successivorum a nexu simultaneorum,

542. *Ontol.*); simultanea ita collocari debent, ut unum esse possit vel appareat causa modificationum alterius, vel unum esse aut apparere possit causa ortus successivi ex præexistentibus aliis, adeoque in gratiam successivorum inter se connectantur (§. 11.). Quare in nexu coëxistentium continetur ratio, cur successiva a se invicem dependeant sicut effectus a causa efficiente, vel saltem a se invicem dependere videantur, consequenter cur inter se sint connexa. Add. §. 851. *Ont.*

§. 65.

Machinz de-
finio.

Per *Machinam* intelligimus ens compositum, cujus mutationes modo compositionis convenienter beneficio motus consequuntur.

§. 66.

Observabilia
in mundo ad-
spectabili.

In mundo adspectabili sensu non percipimus nisi quæ sunt composita. Experientiæ indubia fide sumo sensum in discernendis rebus, quas offert mundus adspectabilis, acutissimum esse visum, nec eum acutiorem fieri posse, quam ubi microscopio exquisito armetur. Constat præterea aurum esse massam mixtam, cujus partes componuntur ex aliis diversis. Enimvero etli oculum microscopio exquisitissimo instruas; in auro tamen non distingues nisi particulas auri easque massam continuam referentes, nihil vero miscibilem distinguere licet, ex quibus particulae auri componuntur. Idem sane in aliis corporibus ad microscopia applicatis obtinere experimur, in ipsis sane vegetabilibus, ubi mixtio minus perfecta censetur, cum mixtum facillimo negotio sit resolubile, quod in auro omnium perfectissime mixto fecus obtinet.

§. 67.

Observabilia
quænam di-
cantur.

Observabilia dicimus, quæ sensu percipi possunt, sive nudo, sive armato. *Inobservabilia* vero appellamus ea, quæ ne armato quidem sensu, nedum nudo percipere valeamus.

§. 68.

Observabilia
in mundo ad-
spectabili
quænam sint.

In mundo adspectabili nonnisi entia composita observabilia sunt (§. 66sq.).

§. 69.

§. 69.

Mutationes in mundo adspectabili observabiles non sunt, nisi quæ in composito accidunt (§. 68.).

Mutationes in mundo adspectabili quales.

§. 70.

Modorum, qui enti composito insunt, ratio sufficiens non continetur, nisi in contiguo (§. 314. 290. 667. 619. 556. Ont.).

Ratio modorum compositi ubi quærenda.

Experientia idem confirmat.

§. 71.

In mundo adspectabili nullas observare licet mutationes, nisi quæ mediante motu contingunt (§. 69. Cosm. §. 667. Ont.).

Mutationes in mundo observabiles quomodo fi-

§. 72.

Motus in mundo, etiam adspectabili, suas habet regulas (§. 70. Ont.). Ratio ergo detur in dato quocunque casu, cur motus talis potius sit quam alius, nempe cum in motu spectetur imprimis celeritas & directio (§. 642. 653. Ont.), cur talis sit potius celeritas mobilis, quam alia; cur talis potius sit directio, quam mobile versus plagam datam progreditur, quam alia. Quoniam itaque in dato casu motus rationi isti conformiter determinari debet; motus in mundo adspectabili suas habet regulas (§. 475. Ont.).

ant.
Motus regulæ cur dentur.

§. 73.

Mundus omnis, etiam adspectabilis, machina est (§. 62. 49. 63. 71 sq. 65.).

Mechanismus mundi stabilis.

§. 74.

Omne ens compositum machina est (§. 535. 56. 667. Ont. 65. Cosm.).

Mechanismus entis compositi.

§. 75.

Mechanice debebus in mundo adspectabili existentibus philosophatur, qui mutationes, quæ ipsis accidunt, ex earum structuris, texturis & mixtionibus, seu ex modo compositionis secundum regulas motus intelligibili modo explicat (§. 56. Ontol. 65. Cosm.).

Mechanica philosophia quænam sit.

(Cosmologia contracta.)

00.00

§. 76.

§. 76.

Ordo uni-
versus.

Datur in mundo ordo tum in simultaneis, tum in successivis. Vid. §. 48. 54. 23. *Cosm.* 881. 866. 56. 181. 195. 472. *Ontol.* de *successivis*.

Enimvero quoniam successiva vel sunt modi rerum durantium (§. 703. *Ontol.*), vel per modificationes rerum existentium prodeunt (§. 687. 688. 542. *Ontol.*); simultanea ita collocari debent, ut unum esse possit, aut saltem apparere queat causa ortus successivi ex præexistentibus aliis. Quare etiam modus, quo coexistentia juxta se invicem collocantur, in singulis idem est, quatenus solius coexistentiæ rationem habes (§. 181. *Ontol.*), consequenter in modo, quo res in mundo coexistunt, seu juxta se invicem collocantur, similitudo quædam obvia est (§. 195. *Ont.*), consequenter ordo (§. 472.).

§. 77.

Dependentia
ordinis simul-
taneorum ab
ordine succes-
sivorum.
Veritas num-
di.

Ergo si datur ordo in successivis, datur etiam ordo in simultaneis, quæ in mundo existunt (§. 64. 76.).

§. 78.

In mundo datur veritas transcendentalis (§. 73. 65. *Cosm.* 56. *Ont.* §. 58. *Cosm.* §. 851. 118. 42. 79. 493. *Ont.*). Idem patet ex §. 76. *Cosm.* & §. 495. *Ont.*

Ex demonstratione priori liquet, dari in mundo veritatem, quia machina est, ut adeo mechanisus mundi sit fons veritatis transcendentalis, quæ in mundo tanquam ente datur, & quæ mundum ens verum efficit atque ab imaginario distinguit. Idem quoque ex demonstratione posteriori consequitur, quamvis non adeo manifesto obvium sit. Etenim in ea ex ordine colligitur veritas. Constat autem ordinem dari in mundo, quatenus machina est (§. 76.). Ergo & veritas in eodem datur, quatenus machina est.

§. 79.

Fundamen-
tum Physicæ.

Quoniam veritas logica propositionum universalium datur, eademque ad casus singulares applicari possunt, quia in rebus veritas transcendentalis datur (§. 499. *Ontol.*); ideo *de mundo & rebus in eodem existentibus propositiones universales veræ formari & ad casus singulares applicari possunt.*

Hinc

Hinc patet disciplinam aliquam possibilem esse, in qua propositiones universales de mundo & rebus in eodem existentibus demonstrari possunt. Vocamus autem illam *Physicam* (§. 52. *Disf. pral.*). Atque adeo propositio præfens *Physicæ* possibilitatem loquitur.

§. 80.

Successiva in mundo sunt contingentia. Successiva in universo vel sunt substantiæ compositæ, veluti homines, animalia bruta, arbores; vel substantiarum modi, veluti calor aut frigus lapidis. Jam substantiæ compositæ, quæ sibi invicem succedunt, existere incipiunt, cum antea non existerent, & existere desinunt, cum antea existerent. Existentia igitur illorum entium mutabilis est (§. 290. *Ontol.*), adeoque contingens (§. 296. *Ont.*). Cum adeo necessario non existant (§. 294. *Ontol.*); nec ratio sufficiens existentiae in essentia eorum continetur (§. 308. *Ontol.*) Entia igitur contingentia sunt (§. 310. *Ontol.*). Modi in universum omnes contingenter insunt (§. 312. *Ontol.*). Quare cum ratio existentiae eorundem in ipsis non contineatur (§. 308. *Ontol.*); ipsietiam entia contingentia sunt (§. 310. *Ontol.*). Idem constat ex §. 569. 290. 296. *Ont.*

Contingentia
successivorum.

§. 81.

Mundus continet seriem rerum contingentium. Mundus enim continet seriem rerum successivarum (§. 48. 55.). Quare cum successiva in mundo sint contingentia (§. 80.); mundus seriem rerum contingentium continet.

Contingentium
series in
mundo.

§. 82.

In mundo ad spectabili contingentium series non simplex est, sed multiplex. In Tellure nostra series longe plurimæ contingentiumprehenduntur, sive substantias compositas species, sive earum modos. Immo in qualibet substantiarum contingentium specie series plures dantur. Istiusmodi contingentium seriem constituit genus humanum, sed eam non simplicem, quin potius multiplicem. Animantia bruta non minus, quam homines per continuatas generationes a se invicem descendunt. Series quoque istiusmodi constituunt vegetabilia singula in quovis eorum genere. Quodsi ad cetera successiva animum adver-

Qualis ea sit
in mundo ad
spectabili.

tas, veluti ad meteora, non minus contingentium series multiplices deprehendes, etsi hic ea, quæ in eadem serie constituuntur, non sint singula ejusdem speciei, quemadmodum in seriebus hominum, animalium, vegetabilium. Si consultitur astronomia, multis modis præsens propositio confirmari potest.

§. 83.

Quomodo
actus contin-
gentium de-
terminetur.

Actus contingentium in mundo determinatur per seriem contingentium, quæ se invicem dependent ut effectus a sua causa. Datur enim in mundo series rerum contingentium (§. 81.), quæ eadem sunt cum successivis (§. 80.), adeoque inter se connectuntur (§. 48. 55.). Dependet igitur contingentia a se invicem, quemadmodum effectus a causa efficiente (§. 23.). Quare cum in serie causarum subordinatarum prima & qualibet intermedia sit causa efficiens effectus ultimæ (§. 930. *Ontol.*); cujuslibet contingentis causæ sunt res omnes in eadem serie successivorum constitutæ anteriores. Quoniam itaque contingens ideo actum suum consequitur, quia ipsum præcessere cetera in illa serie, in qua constituitur (§. 886. 56. *Ontol.*); existentia sive actus contingentis determinatur per seriem contingentium, quæ a se invicem dependent sicuti effectus a sua causa.

§. 84.

Contingenti-
um depen-
dentia in a-
ctu coexi-
stentibus.

Entia contingentia composita in mundo in actu suo a coexistentibus dependent. Quoniam essentia entium compositorum consistit in modo, quo partes tales invicem combinantur (§. 533. *Ontol.*); tandiu existunt, quamdiu partes tales isto modo coexistunt. Quia vero contingentia sunt *per hypoth.* adeoque in scala successivorum continentur (§. 80.), aliis existentibus oriuntur, iterumque intereunt (§. 569. *Ontol.*), consequenter partes illæ, in quarum combinatione consistit, non necessario ita coexistunt & per datum quoddam tempus coexistere pergunt. Enimvero cum ratio sufficiens coexistentiæ continuatæ detur necesse est (§. 70. *Ontol.*), eaque in partibus ipsis coexistentibus non contineatur, cum alias necessario (§. 118. *Ontol.*), adeoque semper ita coexisterent (§. 292. *Ont.*); extra eas contineatur necesse est, consequenter in coexistentibus (§. 569. 581. *Ont.*).

Ipsam

Ipsū corpus nostrum vivens in actu suo dependet a cibo ac potu, quo fruimur, ab aëre, quem respiramus, a calore ambiente, quo sanguinis aliorumque humorum fluiditas conservatur.

§. 85.

Entia composita in mundo in modificationibus suis a continguis dependent (§. 704. Ont. 70. Cosm.).

§. 86.

Status quoque entium compositorum in mundo a contiguis dependent (§. 710. Ont. 85. Cosm.).

§. 87.

Entis compositi contingentis in mundo existentia (§. 83. 23. 84. Cosm. §. 884. Ont. §. 85. 10. 48 Cosm.) ejusdemque modi (§. 312. Ont. 83. 85. Cosm.) determinatur per mundum integrum.

§. 88.

Omne causatum per suam causam (§. 883. 56. Ont. 202. Log. 113. Ont.) & effectus actualitas per causam efficientem (§. 886. Ont.) determinatur.

§. 89.

Actus contingentium in mundo determinatur per seriem contingentium, quorum unum determinatur per alterum quoad actualitatem suam (§. 83. 88.).

§. 90.

Contingentia in mundo non habent rationem sufficientem actualitatis suæ in serie successivorum, sed in ente alio extra seriem istam constituto, coque necessario (§. 89. Cosm. §. 322. 324. Ont. §. 80. Cosm.).

§. 91.

Progressus in infinitum est series rerum contingentium interminata; ut adeo in ista serie nec primum detur, nec ultimum.

§. 92.

Dividitur progressus in infinitum in rectilineum & circularem. Rectilincus est, in quo a termino quocunque in eodem as-

O o o o 3

sumto

Dependentia compositorum quoad modificationem.

Status compositorum in mundo dependentia.

Modus, quo actualitas compositi contingentis determinatur.

Determinatio causæ per causam & effectus per efficientem.

Continuitas determinationis contingentis unius per alterum. Ratio sufficiens contingentium in mundo.

Progressus in infinitum definitio.

Ejus divisio.

sumto continuo receditur: sed *Circularis* est, in quo ad terminum, a quo receditur, rursus causæ rerum restituuntur.

§. 93.

Progressus in
infinitum re-
ctilinei impos-
sibilitas.

Progressus in infinitum rectilineus est impossibilis (§. 91. 92. *Cosm.* §. 310. 70. 43. 79. *Ont.*).

Progressus adeo rectilineus in infinitum per principium rationis sufficientis tollitur, qui communiter non satis evidenter refellitur.

§. 94.

Casus puri
definitio.

Casus purus dicitur actualitas sive existentia destituta ratione sufficiente.

§. 95.

Casus puri im-
possibilitas.

Casus purus impossibilis (§. 94. *Cosm.* 70. 43. 79. *Ont.*).

§. 96.

Casus purus ex
mundo pro-
scriptus.

Ergo in mundo, etiam adspectabili, casus purus dari non potest (§. 95. *Cosm.* 132. *Ont.*).

§. 97.

Quænam a-
ctum conse-
quantur in
mundo.

In mundo nihil actum consequitur, nisi cujus causa in serie rerum, ex qua constat, continetur (§. 883. *Ont.* 94. 95. *Cosm.*).

§. 98.

Quænam in
mundo actum
necessario con-
sequantur.

Si quid intrinsece possibile fuerit & in serie rerum, ex qua constat mundus, habet causam efficientem sufficientem, id necessario actum consequitur (§. 133. 886. 898. 288. *Ont.*).

E. gr. Ex semine fecundo planta progerminare potest. Quare si in mundo existit homo, qui semen illud solo fecundo committit, nullumque impedimentum adesse ponitur, quod actionem alicujus causæ ad vegetationem concurrentis intervertat (quod utique in propositione nostra supponitur, cum nulla ejus mentio fiat); planta ex eodem necessario crescit.

§. 99.

Quomodo ea
existere pos-
sent, quæ actu
non existant.

Si quod intrinsece possibile in mundo consequi deberet actum, quod eum non consequitur, alia poni deberet rerum series (§. 97 sq. *Cosm.* §. 310. *Ont.* 83 sq. *Cosm.*).

§. 100.

§. 100.

Si quod intrinsece possibile actum consequi deberet, quod in mundo adspectabili actualitatem non consequitur, alius existere deberet mundus (§. 48.).

Cur existentiam alterius mundi requiratur.

§. 101.

Alii mundi possibiles sunt, in quibus ad actum deducerentur possibilia, quæ in præsentē actum non consequuntur (§. 133. Ont. 99. Cosm. 92. Ont. 48. Cosm.).

Possibilitas aliorum mundorum.

Habemus historias fictas de hominibus eorumque factis, quos orbis nunquam vidit, nec non de regionibus, quæ nullibi terrarum reperiuntur. Quoniam hæ non involvunt, quod sit contradictorium; possibiles utique sunt (§. 85. Ontol.), atque adeo existere possunt (§. 133. Ontol.). Enimvero quoniam historiarum istarum non nisi talia continent, quæ contingenter existunt; si quidem existere deberent ea, quæ narrantur, mundus quidam integer existere deberet ab eo, qui nunc existit, plurimum diversus (§. 100.).

§. 102.

Quæ in mundo, etiam adspectabili, contingunt, hypothetice necessaria sunt (§. 569. Ont. 80. Cosm. 316. Ont.).

Hypothetica eventuum necessitas.

Idem etiam patet ex modo, quo actum suum consequuntur. Quæ enim in mundo, etiam adspectabili, eveniunt, actum ideo consequuntur, quia præcessit causarum contingentium series, quarum una per alteram tanquam effectus per suam efficientem determinatur (§. 89.). Atqui tantummodo impossibile est, ut id, quod evenit, non eveniat, quatenus illa causarum series ponitur (§. 98. Cosmol. & §. 279. Ont.), adeoque sub data quadam conditione (§. 301sq. Ontol.).

§. 103.

Quæ in mundo, etiam adspectabili, contingunt, non defendant esse contingentia, eo quod necessario contingunt (§. 319. Ont. 102. Cosm.).

Contingentia eventuum necessitate eorum hypothetica non evanescit.

§. 104.

Ex ratione sufficiente eorum, quæ in mundo contingunt, nulla manat absoluta rerum necessitas (§. 321. 315. Ont.).

Ratio sufficiens eventibus

non affert ne-
cessitatem in-
evitabilem.

Sane si stante ratione sufficiente contingentia subsistere non posset, nil foret contingens, nisi quod per calum purum existeret (§. 94.), qualis est rerum in somnio apparens existentia, qualis etiam est eventuum in mundo fabuloso, in quo rationis loco stat hominis voluntas (§. 77. *Ontol.*).

§. 105.

Nexus rerum
absolutæ ne-
cessitatis fons
non est.

Ex nexu rerum in mundo nulla in earum existentiam necessitas absoluta manat (§. 10. 104.).

§. 106.

Veritatis de-
terminatæ de-
finitio.

Veritatem determinatam habere dicitur id, de quo alteram contradictionis partem affirmari, alteram negari oportet.

Ita veritas determinata est, quod die 29. Martii huius anni celebrandum sit pascha.

§. 107.

Veritas deter-
minata con-
tingentium in
mundo.

Veritas eorum, quæ in mundo contingunt, determinata est, antequam contingunt (§. 97. Cosm. 883. Ont. 48. Cosm. 118. Ont. 202. 197. Log. 886. 898. Ont. 476. Log. 106. Cosm.).

§. 108.

Certitudo
eventuum fu-
tutorum.

Futuritia eorum, quæ in mundo olim contingent, certa est (§. 107. 106. Cosm. 535. Log.).

Utemur hoc principio in Theologia naturali, ubi de præscientia futurorum eventuum, quæ in Deo datur, agendum. Etenim ex principiis rationis demonstrari nequit, Deum præscire omnes eventus rerum futuros, nisi per quæ constat, quod tales in se spectati sint, ut præsciri possint.

§. 109.

Necessitatis
naturalis defi-
nitio.

Species illa necessitatis hypotheticæ, quæ a constitutione universi & causarum serie, seu, ut alii loquuntur, a præsentente rerum ordine pender, *Necessitas physica* seu *naturalis* appellatur.

Appellatur ideo physica, quia in veritatibus physicis seu naturalibus obtinet, quemadmodum ob similem rationem *Necessitas absoluta* etiam *geometrica* & *metaphysica* vocatur.

§. 110.

§. 110.

Quæ ad hunc mundum spectant, ea vel extiterunt, vel præsentia sunt, vel olim existent. Quæ enim ad hunc mundum spectant, ea, antequam contingerent, erant adhuc futura, perinde ac ea, quæ in posterum contingent (§. 584. *Ontol.*). Enimvero futuritio eorum, quæ in mundo hoc contingunt, certa est (§. 108.). Ergo ea vel extiterunt, vel præsentia sunt, vel olim existent.

Quænam ad hanc seriem rerum spectent.

§. 111.

*Intrinsece possibile est, quod in se spectatum tale est, hoc est, in se consideratum contradictionem nullam involvit (§. 85. *Ontol.*). Extrinsece possibile est, quod determinatam causam in mundo adspectabili habet, hoc est, quod in eodem existere valet (§. 97.). Extrinsece possible dicuntur quoque Possibilia hujus mundi, quia cetera ipsis opposita existere nequeunt in hoc mundo, adeoque extrinsece impossibilia sunt.*

Differentia possibilitatis intrinsicæ & extrinsecæ.

§. 112.

In mundo extrinsece possibile non est, nisi quod vel extitit, vel actu præsens est, vel olim existet: Quod enim extrinsece possibile non est, illud determinatam in mundo causam non habet (§. 111.), adeoque in hoc mundo actum consequi nequit (§. 97.). Ergo nec existit, nec extitit, nec olim existet.

Numerus extrinsecæ possibilitatum in aliquo mundo.

Possibilitas rei intrinseca constituitur per ea, quæ rei insunt; extrinseca autem per ea, quæ eidem coexistunt eamque præcedunt. Unde non mirum, quod numerus intrinsece possibilitatum plurimum superet numerum extrinsecæ possibilitatum & numerus extrinsecæ possibilitatum adæquet numerum actualium. Et qui animo recolit, quæ superius de modo, quo actus contingentium in mundo determinatur, dicta sunt; is facile intelligit, cur actualia cum extrinsece possibilitatibus coincidere debeant.

§. 113.

Quicquid in mundo extrinsece possibile est, id veritatem determinatam habet (§. 112. 106.).

Veritas determinate extrinsecæ possibilitatum.

(Cosmologia contracta.)

P p p p

§. 114.

§. 114.

Qualis necessitas inest possibilitati extrinsecæ.

Possibilitas extrinsecæ nonnisi hypotheticam necessitatem involvit (§. 111. 98. Cosm. 302. Ont.).

§. 115.

Possibilitas extrinsecæ contingentibus conveniens.

Possibilitas extrinsecæ contingentiam non tollit (§. 319. Ont. 114. Cosm.).

§. 116.

Quid pendeat a præternaturali contingentis immutatione.

Si contingens unum, quod in mundo contingere debet, mutari ponatur in contrarium, vel in seriem verum aliquid intrudi supponitur, cujus actus per præcedentia non determinatur; sequens mundi pars non amplius erit eadem, quæ alias futura erat. Sit series contingentium successivorum A, B, C, D, E, F &c. & A denoret totam partem seriei antecedentem ipsum B, unde actualitas ipsius B pender (§. 83.). Ponamus jam non perducere ad actum B, sed ejus loco aliud quid, quod dicatur T. Quoniam B, C, D, E, F &c. inter se connexa sunt (§. 48. 54.) Ca B, Da C, Fab E &c. dependent tanquam effectus a sua causa (§. 23.). Quare sublato B tollitur etiam C, consequenter & D, E, F &c. tolluntur (§. 898. Ontol.) quatenus nempe B est causa ipsius C, C ipsius D, D ipsius E, E ipsius F &c. (§. 886. Ontol.). Quoniam vero loco ipsius B jam existit T, diversum a B per hypoth. erit T non amplius causa ipsius C, sed alterius ejusdem a C diversi, quod dicatur V (§. 883. 118. Ontol.). Et eodem modo pater, fore etiam id, cujus actualitas per V determinatur diversum a D & ita porro, in quantum scilicet præcedentia influunt in actualitatem sequentium per id, quo differunt ab aliis per A determinandis. Quare cum series successivorum a tempore ipsius T immutetur; evidens est, sequentem mundi partem non amplius fore eandem, quæ alias futura erat (§. 48. Cosmol. 3^o §. 181. Ontol.).

Quemadmodum propositio præsens ex nexu rerum successivarum evidenter resultat; ita etiam experientia confirmatur, quantum dependentia sequentium a præexistente aliquo percipitur. Ponamus e. gr. *Aristotelem* vel prorsus non extitisse, vel litteris operam non dedisse. Evidens est, quam plurima non fuisse facta, quæ nunc facta sunt.

§. 117.

Mundus propemodum se habet ut horologium automaton.

Mundi cum
horologio
comparatio.

Etenim si partes horologium constituentes repræsentare ponas ea, quæ in universo eadem perdurant, veluti corpora mundi totalia, & motus observabiles repræsentent ea, quæ continuo mutantur; quæ de mundo hætenus demonstrata sunt, in horologio quoque locum habere deprehendes & ab horologio abstrahere licet, quæ de mundo demonstrata fuere. In horologio enim quilibet rotarum situs, quem dato quovis tempore habent, situsque indicis in orbe horario determinatur per structuram horologii rotarumque motum a pondere descendente ipsis impressum, quamdiu scilicet structura horologii non mutatur, pondusque idem manet. Similiter in mundo mutationes observabiles, quæ in composito accidunt (§. 69.), per modum compositionis determinantur (§. 75.), atque per motum, per quem contingunt (§. 71.), quamdiu nihil in structura mundi vel motu corporum a causa quadam extrinseca mutatur. Quemadmodum vero non repugnat, ut tum structuræ horologii, tum motui etiam rotarum, ac indicis præsertim, a causa quadam externa ab horologio diversa mutatio quædam inducatur, cum & structura illius, & motus mutabilis sit; ita etiam absolute impossibile non est, ut in structura mundi, immo etiam corporum eorundemque motu quidpiam mutetur, si quidem talis causa externa existat. Ostendimus autem talem causam esse Deum, cum ejus omnipotentia extendatur ad possibilia omnia. Possibilitatem autem mutationis in structura mundi loquuntur diversa mundi systemata ad explicandos motus siderum ab Astronomis excogitata. Et structuram motumque corporum mutationi obnoxium esse nemo negare ausit, cum eam experientia quovis momento loquatur. Sicuti igitur ab automato necessitas absoluta exulat, sive existentiam ipsius, sive actualitatem eorum, quæ vi structuræ ejus beneficio motus consequuntur, spectes, neque ipsum nisi hypothetica necessitate existit, neque necessitate alia situs tum rotarum, tum indicis actu dantur; ita etiam mundus ab omni necessitate absoluta liber, sive existentiam ejus spectes, sive mutationes quascunque in eodem accidentes, sed ipse quoque non nisi

Pp pp 2

contin-

contingenter existit, quemadmodum suo loco ostendetur & jam ex plurium mundorum possibilitate (§. 101.) probabiliter colligitur, & quæcunque in eodem contingunt, nonnisi hypothetice necessaria sunt (§. 102.). Quemadmodum denique situs indicis atque rotarum per omne tempus sequens diversus prorsus est ab eo, qui futurus erat nulla mutatione extrinsecus inducta, ubi a causa quadam externa vel retro agitur, vel promovetur, vel in structura interna horologii quidpiam immutatur; ita quoque in mundo per tempus omne subsequens status mundi idem non est, qui alias futurus fuisset, ubi a causa quadam externa, quæ a mundo diversa est (qualem Deum esse suo loco ostendemus) quidpiam mutatur, ut actu existat, quod alias in eodem extitutum non erat, vel non existat, quod alias extitisset (§. 116.). Habet itaque mundus se propemodum ut horologium automaton.

§. 118.

Similis ultra
suum tertium
extensio.

Quoniam itaque mundus cum horologio confertur, quatenus ens utrumque generi cuidam communi substat, quod machinæ voce indigitavimus (§. 65.) & utrumque ens contingens est, in quo series continua successivorum contingentium datur, ut hoc respectu veluti parvus quidam mundus horologium dici possit, quatenus in contemplatione generali, quæ tota applicatione notionum ontologicarum continetur, subsistit (§. 48.), illustrandæ contingentiae & eidem cohererentis necessitatis hypotheticæ gratia (§. 117.); *tertium comparationis minime est modus agendi necessarius in oppositione ad libertatem hominis expensus, dum mundus cum horologio comparatur.*

SECTIO

SECTIO II.

DE

NOTIONE CORPORUM,
EX QUIBUS MUNDUS
COMPONITUR.

CAPUT I.

DE

ESSENTIA ET NATURA COR-
PORUM.

§. 119.

Entia composita, ex quibus tanquam partibus componitur Mundus, dicuntur Corpora.

Quidnam dicatur corpus.

§. 120.

Corpus omne machina est (§. 119. 74.).

Mechanismos corporum.

§. 121.

Ad corpora ea omnia applicari possunt, quæ de entibus compositis in philosophia prima demonstrata sunt (§. 343. Log. §. 119. Cosm.).

Principia philosophandi de corporibus.

§. 122.

Omnia corpora sunt extensa (§. 119. Cosm. 619. Ont.).

Extensio corporum.

§. 123.

Omne corpus terminatum præditum est figura & determinata tam habet magnitudinem (§. 119. Cosm. 622. 624. Ont.).

Figura & determinata magnitudo corporum.

Pp pp 3

§. 124.

§. 124.

Spatium cor-
poris.

Omne corpus spatium determinatum replet (§. 122. Cosm. §. 609. Ont.).

§. 125.

Ortus & inte-
ritus corpo-
rum.

Corpus oriri ac interire potest citra cujuspiam ex nihilo productionem, vel annihilationem (§. 119. Cosm. §. 542. Ont.).

§. 126.

Quid in ortu
corporum ori-
atur; quid
in interitu in-
tereat.

*Si quod corpus novum ex aliis præexistentibus oritur, non-
nisi mera accidentia oriuntur (§. 119. Cosm. 789. Ont.), & si in-
terit, nonnisi accidentia intereunt (§. 119. Cosm. 790. Ont.).*

§. 127.

Mutationes
corporum
quales.

*In corporibus nulla mutatio contingere potest, nisi quoad fi-
guram, magnitudinem, partium situm & locum totius, quatenus
extensa sunt (§. 119. 122. Cosm. §. 640. Ont.).*

Addimus restrictionem, quatenus extensa sunt, propterea quod de-
inceps ostensum sumus, præter extensionem in corporibus quoque dari
vim motricem, quæ suas etiam mutationes admittit, sed diversas sane
ab iis, quæ in extenso accidunt. Quodsi objicias propositionem præ-
sentem repugnare experientiz, quæ aperte loquatur multas dari in cor-
poribus qualitates sensibiles, quæ non minus ac figura, magnitudo &
partium situs mutabiles sunt atque actu mutantur, veluti colores, odo-
res, sapores; notes velim per ipsam præsentem propositionem patere,
quod non mutantur nisi figure, magnitudines ac situs partium, dum
qualitates istæ sensibiles mutantur.

§. 128.

Mutationes
corporum
quo medio
hant.

*In corporibus mutatio nulla accidere potest nisi per motum,
neque corpori inducitur mutatio nisi ab alio contiguo (§. 667. Ont.
70. Cosm. 703. 118. Ont. 119. Cosm.).*

§. 129.

Corporis resi-
stibilis.

*Omne corpus resistit motui. Pone enim corpus aliquod,
quod motui non resistat. Quoniam itaque in corpore nulla
datur ratio, cur motus non sequatur, si vi quacunque impellitur
(§. 726. Ontol.) & vis, qua corpus impellitur, est ratio sufficiens
actualitatis motus præciso mobili spectati (§. 722. Ontol.), corpus
quod-*

quodcumque vi quacunque movebitur, neque jam ulla amplius erit ratio, cur vis aliqua corpus potius moveat, quam non moveat, & cur in mobile non omnis potius celeritas transferatur, quam aliqua ejus pars (§. 56. *Ontol.*), adeoque motus communicatio in congressu corporum erit casus purus (§. 94.); quod est absurdum (§. 95.).

§. 130.

Principium resistentiæ motus in corporibus dicitur *Vis inertiae*, sive *Vis passiva*. Vis inertiae vel passivæ definitio.

Dici solet vis inertiae, quia per eam corpus quasi segne ad motum efficitur, ut excitatione indigeat, ubi moveri debet.

§. 131.

Vis inertiae non determinatur per extensionem (§. 548. 566. 554. 727. 113. *Ont.*), sed in extenso supponitur. Vis inertiae unde sit.

Quoniam scilicet in extenso hæc vis deprehenditur (§. 129. 130.), nec quicquam sine ratione sufficiente esse potest (§. 70. *Ontol.*); ratio illius existentiae in coexistentibus, quibus extensum constituitur, quaerenda. Quare cum posita ratione sufficiente ponatur id, quod propter eam potius est, quam non est (§. 118. *Ontol.*); resistentia ponenda est antequam cogitemus extensum, consequenter vis inertiae extensione prior concipienda.

§. 132.

Corpus vi inertiae omni mutationi resistit (§. 130. 128.). Consequens vis motricis.

§. 133.

Dum corpus B alterum A quiescens movet, vel in motu constituti motum immutat; corpus B agit, corpus autem A patitur. Corpus quando agit, quando patitur.
Vid. §. 290. *Ont.* 132. *Cism.* 714. *Ont.* de eo, quod corpus A patitur; & §. 290. 56. 713. *Ont.* de eo, quod corpus Bagat.

§. 134.

Si duo corpora secundum contrariam directionem in se mutuo impingunt & a se invicem recedunt; in se invicem simul agunt & a se invicem patiuntur. Quod a se invicem patiantur, discis ex Mutuæ corporum actiones & passionis.

ex §. 290. §6. 714. *Ont.* quod vero etiam in se invicem agant, intelligitur ex §. 290. 713. *Ont.*

§. 135.

Vis activa corporum.

Corpus in motu constitutum vi agendi prædeditum est (§. 722. Ontol. §. 133 sq. Cosm.).

§. 136.

Principium mutationum in corporibus.

Quia vis corporum activa motui locali adhæret, ut sine ea corpus concipi non possit, quod moveretur (§. 135.), omnis autem mutatio per motum contingit (§. 128.); *vis corporum activa est principium mutationum (§. 866. Ontol.).*

§. 137.

Vis motricis definitio.

Vis illa corporum activa dicitur *vis motrix*, quia nempe motui locali adhæret. Et hinc definitur, quod sit principium mutationum in corporibus, quatenus nempe sine vi motrice nulla accideret in extenso mutatio.

§. 138.

Principia explicandi mutationes corporum.

Per extensionem, vim inertiae & vim activam omnes corporum mutationes explicari possunt. Ex notione extensionis intelligitur, quænam mutationes in corpore accidere possint (§. 127. 122. *Cosm.* 619. *Ont.* 123 sq. *Cosm.* 602. *Ont.*). Enimvero nulla mutatio in corpore actu fieri potest nisi mediante motu (§. 128.). Quoniam vero vis motrix est principium mutationum (§. 137.) & vi inertiae corpus mutationi actuali resistit (§. 132.); ex vi motrice intelligitur, cur, quales vi extensionis possibiles concipiuntur, mutationes actu consequantur, & ex vi inertiae perspicitur, cur tales potius consequantur, quam aliæ per extensionem & vim motricem non minus possibiles.

§. 139.

Causa mutationis.

Omne corpus mutatur ab alio (§. 132.).

§. 140.

Essentia corporis.

*Essentia corporis consistit in modo, quo partes datæ, hoc est, tales, non aliæ inter se junguntur (§. 119. *Cosm.* §. 533. *Ont.*).*

§. 141.

Materia est extensum vi inertiae præditum.

Materiae definitio.

Definitio hæc nominalis est, adeoque arbitraria: ejus vero realitas constat ex eo, quod non minus vis inertiae (§. 129. 130.), quam extensio corpori competat (§. 122.). Neque etiam a communi loquendi usu recedit definitio, cum nemo non ultro fateatur, materiam poculi esse argentum, per se autem pateat, poculum argenteum esse extensum, quatenus ex argento constat. Neque minus quilibet largitur, corpus resistere vi, qua ad motum concitatur, cum experiamur aucta materiae quantitate augeri resistantiam.

§. 142.

Per essentiam corpus agere potest: ut vero actu agat, vi activæ tribuendum. Cum enim corpora agant (§. 133. 134.); actiones ex eorum numero sunt, quæ corpori convenire possunt (§. 170. Ontol.), consequenter corporis motus quidam sunt (§. 151. Ontol.). Quoniam igitur in essentia rei ratio sufficiens continetur, cur modi inesse possint, non tamen, cur actu insint (§. 160. Ontol.); cur corpus agere possit, ratio sufficiens in essentia ejus continetur, non tamen, cur actu agat, consequenter per essentiam corpus agere potest, non vero actu agit (§. 118. Ont.). Vis vero activa facit, ut actu agat (§. 135. Cosm. 723. Ont.).

Cur corpus agere possit & cur actu agat.

Cur manus hoc modo moveri possint, per structuram corporis intelligitur, hoc est, per essentiam ejus (§. 140.). Enimvero ut motus isti producantur, principio activo opus est, & quod vim activam corporis absolvit (§. 136.).

§. 143.

Potentia activa corporis nuda ex ejus essentia resultat (§. 716. Ont. 142. Cosm. 112. 115. Ont.).

Potentia agendi corporis unde.

§. 144.

Datur in corpore potentia passiva (§. 133. sq. Cosm. §. 719. Ont.).

Potentia passiva corporis.

§. 145.

Vis corporum activa agendi patiendive potentia ac vi inertiae juncta est id, quod Naturæ nomine compellarunt veteres & (Cosmologia contracta.)

Naturæ definitio.

Qq q q nos

nos cum iis compellamus. Quare cum ex potentia agendi red-
datur ratio, cur talis actio locum habere possit in corporibus (§.
716. *Ontol.*), ex vi activa vero, cur actu ab iisdem proficiatur (§.
722. *Ontol.*) & ex vi inertiae, cur corpus unum ab altero patiatur
(§. 130.), ex patiendi autem potentia, cur passio sit possibilis (§.
716. *Ontol.* & 144. *Cosm.*); *Natura* definiri potest per principium
actionum & passionum corporis, & in genere per principium acti-
onum & passionum entis internum.

§. 146.

Materiæ mo-
dificatio.

Materia modificatur per figuræ variationem (§. 141. *Cosm.*
621. 830. *Ont.*).

Confirmant idem exempla obvia. Etenim ceræ successive alias
aliasque figuras inducere licet, extensione salva, qua spatium ejusdem
magnitudinis constanter adimplet, quacunque tandem fuerit ipsius fi-
gura. Et quis ignorat artem omnem in eo versari, ut materiæ quædam
inducantur figuræ, quas vi naturæ non consequitur.

§. 147.

Vis activa un-
de non fit.

Vis activa corporum nec per materiam (§. 136. 132. *Cosm.*
112. 548. 566. 554. *Ont.* 137. *Cosm.* 112 *Ont.* 141. *Cosm.*), *nec per essen-*
tiam corporis determinatur. Alioquin enim posita essentia cor-
poris, poneretur vis activa (§. 115. *Ont.*). Quare cum posita vi
ponatur actio (§. 723. *Ont.*); corpus per essentiam ager actu. Sed
vide nunc §. 142. *Cosm.*

§. 148.

Motus actua-
lis unde fit.

Ergo motus corporis nec per materiam, nec per essentiam
corporis determinatur (§. 142. 137.).

§. 149.

Vis motrix in
quo consistat.

Vis motrix consistit in continuo conatu mutandi locum
(§. 725. 642. *Ont.*).

§. 150.

Directionis
definitio.

Directio mobilis dicitur linea recta, juxta quam in dato
momento progreditur, vel progredi nititur mobile, quatenus ea
positione datur.

§. 151.

§. 151.

Eorum, quæ enti insunt, soli modi sunt mutabiles (§. 149. 175. 250. 300. 313 [q. Ont.]). Lemma de mutabilitate rerum.

§. 152.

Celeritas est modus vis activæ (§. 653. 711.). Jam celeritas mutabilis est, inter ea vero, quæ enti insunt, modi soli mutabiles sunt (§. 151.). Modus vis activæ.

§. 153.

Quoniam adeo in variatione modorum modificatio rei consistit (§. 704. Ontol.); *modificatio vis activæ consistit in variatione celeritatis.* Modificatio vis motricis.

§. 154.

Per celeritatem status vis activæ intrinsecus determinatur (§. 152. Cosm. 706. Ont. 151. Cosm. 113. Ont.). Status intrinsecus vis activæ.

§. 155.

Celeritas est limes vis motricis (§. 152. Cosm. 827. Ont.). Celeritas quid sit.

§. 156.

Celeritates non differunt nisi gradu (§. 653. 669. 664. Ont. §. 152. Cosm. 457. 747. Ont.). Celeritatum differentia.

§. 157.

Quare si celeritas mutatur, nonnisi gradus ipsius variatur. (§. 156.). Celeritatis mutatio qualis.

§. 158.

Si celeritas mutatur, ea vel intenditur, vel remittitur (§. 758. Ont. 157. Cosm. 751. Ont.). Celeritatis intensio & remissio.

§. 159.

Celeritas determinata dari, sed per se intelligi nequit (§. 156. Cosm. 748. Ont.). Celeritas per se non intelligibilis.

§. 160.

Celeritas dari nequit, nisi per spatium & tempus quoddam determinatum, aut per rationem gradus celeritatis dandæ ad alium celeritatis priori modo datæ (§. 132. Arithm. 653. Ont.). Celeritas quomodo detur.

E. gr. Si quærat, quanta sit celeritas mobilis A, aut respondetur, tantam esse, ut intervallo unius minuti conficiat spatium triginta sex pedum; aut eam esse duplam, qua fertur mobile B, ubi confliterit ipsum B intervallo unius minuti conficere spatium octo-decim pedum. In utroque casu celeritas tantummodo lo datur, minime autem intelligibili prorsus modo explicatur: resolvitur enim notio gradus celeritatis nonnisi in talia, quæ saltem dari, per se autem minime intelligi possunt. Etenim in casu primo magnitudo pedis dari tantummodo, minime autem intelligi potest. Similiter intervallum unius minuti non potest per se intelligi, sed vel dandum est, vel resolvendum in talia, quæ nonnisi dari possunt. In altero casu supponitur data celeritas mobilis B priori modo, adeoque denuo recurrit, quæ ad casum primum monuimus. Nimirum illud etiam nonnisi dari, minime autem prorsus intelligi potest, quod analyti quantumlibet continuata non resolvitur nisi in talia, quæ tantummodo dari possunt.

§. 161.

Termini a quo
& ad quem de-
finitio.

Terminus a quo dicitur locus, a quo mobile recedere conatur. *Terminus ad quem* appellatur locus, ad quem mobile accedere conatur. Uterque locus consideratur instar puncti (§. 608. *Ontol.*), cum ipsummet mobile, quamdiu motus solius ratio haberetur, instar puncti considerari soleat (§. 648. *Ontol.*). Solius autem motus ratio haberetur, quamdiu continua tantummodo loci mutatio spectatur (§. 642. *Ontol.*).

In omni motu dari terminum a quo & terminum ad quem, ex ipsa motus definitione nominali manifestum est. Etenim cum per motum locus mobilis mutetur (§. 642. *Ontol.*), necesse est, ut a loco, in quo hæret, recedat & ad alium quandam tendat.

§. 162.

Directio mo-
bilis in quo
consistat.

Directio consistit in relatione termini a quo ad terminum ad quem. Determinatur enim per lineam rectam, juxta quam mobile in dato momento progredi conatur, quatenus ea positione datur (§. 150.), atque adeo ducitur per punctum, in quo mobile instar puncti consideratum, hæret, hoc est, per locum ipsum (§. 608. *Ontol.*), & locum ad quem mobile tendit, qui inde instar puncti considerari debet (§. cit.), adeoque ex loco, a quo recedere

recedere conatur mobile, in locum, ad quem accedere nititur, consequenter a termino a quo ad terminum ad quem (§. 161.). Quamobrem cum de directione mobilis cogitamus, terminum a quo ad terminum ad quem referimus (§. 855. *Ontol.*), adeoque directio non consistit nisi in relatione termini a quo ad terminum ad quem.

§. 163.

Quoniam adeo relatio nullam enti realitatem superaddit, quam in se spectatum non habet (§. 857. *Ontol.*); *directio etiam vi activæ nullam realitatem superaddit, quam in se non habet.*

Directio vis activæ qualis.

Quamobrem ubi vim absolute consideramus, nihil in ea deprehendimus, quod directioni respondeat atque ideo quoque astimationem virium non ingreditur, sed in ea tantum massæ mobilis ac celeritatis habetur ratio, quemadmodum Geometris notum est. Respondet nimirum directio mobilis situi corporis, quem motu variari constat. Quemadmodum itaque situs nulla habetur ratio, ubi corpus quoddam in se consideratur sine loco, quem inter alia obtinet; ita quoque vis activa per se non involvit directionem & præcisè ea spectatur, ubi non attenditur locus, in quo mobile initio motus hæret. Et sicuti situs corporis nullam intrinsecam mutationem eidem superinducit; ita quoque directio vim activam intrinsece non mutat.

§. 164.

Per directionem status vis activæ externus determinatur (vid. §. 163. *Cosm.* 545. *Ont.*). Ergo directio extrinsecum quid est. Quare cum eam mutabilem esse nemo negare ausit; status vero rei externus mutabilibus extrinsecis contineatur (§. 706. *Ont.*); de vi activa hic status externus affirmatur, quia eidem hæc, non alia competit directio, atque adeo status vis activæ sive motoris externus per directionem ipsius determinatur (§. 113. *Ontol.*).

Status extrinsecus vis activæ.

§. 165.

Mutata igitur directione mobilis, vis activæ status externus mutatur (§. 164.).

Mutatio status externi vis activæ.

§. 166.

Conatus quid
involvat.

In conatu adest & celeritas, & directio. Etenim posito conatu, ponitur motus mobilis, nisi eidem resistatur (§. 149. *Cosm.* 728. *Ont.*). Jam cum motus in continua loci mutatione consistat (§. 642. *Ontol.*), sine celeritate, qua ad datum spatium dato tempore absolvendum aptum efficitur (§. 653. *Ontol.*), & sine directione (§. 150.) concipi non potest.

§. 167.

Quomodo vis
activa concipi
debeat.

Vis activa in corpore pervenit ac materia concipi debet per modum rei perdurabilis. Celeritas enim limes vis metricis est (§. 155.), quemadmodum figura materiae §. 621. *Ontol.* & §. 141. *Cosm.*), neque vis activa per materiam & essentiam corporis determinatur (§. 147.). Est igitur vis corporis activa subjectum a materia diversum (§. 711. *Ontol.*), quod, cum per celeritatem (§. 153.), sicuti materia per figuram modificatur (§. 146.), per aliquod tempus durare aptum, adeoque perdurabile est (§. 766. *Ontol.*).

§. 168.

Substantiali-
tas materiae.

Materia concipi debet instar substantiae. Materia, vi cujus corpus extensum est (§. 141.), apta est ad durandum. Concipi adeo debet tanquam perdurabilis (§. 766. *Ontol.*). Quoniam vero per figurae variationem modificatur (§. 146.), porro ut modificabilis concipienda (§. 764. *Ontol.*) Nunc vide §. 768. *Ontol.*

§. 169.

Substantiali-
tas vis activae.

Vis activa corporis sive vis motrix concipi debet instar substantiae (§. 167. 153. *Cosm.* 764. 768. *Ont.*).

§. 170.

Motus conti-
nuus materiae.

Omnis materia in continuo motu est. Corpus enim materia & vi activa seu motrice, tanquam rebus substantialibus (§. 168. 169.), constat (§. 138. 141.). Jam lege §. 149. 166. *Cosm.* 653. *Ont.* 150. *Cosm.* 642. *Ont.* *Tschirnhausen* medic. ment. P. 2. p. 180. *Leibnitium* Act. crud. A. 1695. p. 145 149.

§. 171.

Si materia locum non mutat, motui resistitur a contiguis Cur corpus
(§. 170. *Cosm.* 642. 729. 556. *Ont.*).

non continuo
locum mutat.

§. 172.

Motus determinatur data celeritate & directione mobilis Ratio motum
(§. 642. 112. 649 sq. 648. *Ont.* 150. *Cosm.*).

determinans.

§. 173.

In motu nihil reale existit nisi conatus, quo scilicet ad mutationem loci nititur mobile. Dum enim corpus movetur, vi agendi, sive motrice (§. 137.), præditum est (§. 135.): quæ cum in continuo conatu mutandi locum consistat (§. 149.), in mobili adest celeritas atque directio (§. 166.). Enimvero data celeritate, dataque directione mobilis motus determinatus est, ut nihil amplius in mobili ad motum in eodem desideretur (§. 172.). Nihil igitur in motu reale existit nisi conatus, quo ad mutationem loci nititur mobile.

Realitas in
motu.

Dum mobile actu movetur sive locum mutat, nihil mutatur nisi ordo coëxistendi (§. 643. *Ontol.*), neque locus aliud quid est, nisi determinatus modus coëxistendi aliis simultaneis (§. 602. *Ont.*). Modus vero coëxistendi cum aliis nulla est realitas in re ipsa, quæ aliis coëxistit, cum eidem absolute considerata minime conveniat. Est igitur non nisi relatio ad alia quoad coëxistentiam, hoc est, quatenus ad alia ideo referri potest, quia simul cum iis existit.

§. 174.

Motus totus nunquam existit. Omnis motus fit in tempore (§. 649. *Ontol.*), adeoque fit toto tempore, quo duravit, sumitur tanquam ens unum, singulis momentis singulæ ejus existunt partes (§. 341. *Ontol.*).

Existentia
motus qualis.

§. 175.

Quoniam motus totus nunquam existit (§. 174.), adeoque partes coëxistentes (§. 341. *Ont.*), tanquam determinationes essentielles non agnoscit (§. 122. 533. *Ont.*); motus non ens permanens, sed successivum est.

Motus quale
ens.

CAPUT

CAPUT II

DE

ELEMENTIS CORPORUM.

§. 176.

Corpora quid
sint.

Corpora sunt substantiarum simplicium aggregata (§. 119. Cosm. 793. Ont.).

§. 177.

Unde sit sub-
stantia & itas
corporum.

In corporibus nihil datur substantiale prater entia simplicia (§. 119. Cosm. 792. Ont.).

§. 178.

Materia & vis
activa num
sint substan-
tiae.

Materia igitur & vis activa substantiae non sunt (§. 177.): quoniam tamen instar substantiarum concipi debent (§. 168. 169.), substantiae apparent.

§. 179.

Corpora qua-
les sint sub-
stantiae.

Corpora sunt substantiae compositae (§. 176.). Nil scilicet obstat, quo minus substantiam compositam appelles, quod substantiarum simplicium aggregatum est, ob simplices nempe substantias ipsius compositionem ingredientiens (§. 794. Ont.).

§. 180.

Unde vis mo-
trix corpo-
rum.

Vis activa sive motrix corporum ex substantiis simplicibus resultat (§. 179. 137. 135. 167. 119. 147. 153.). Enimvero si in substantia composita vis datur, ea ex viribus substantiarum simplicium resultare debet (§. 795. Ontol.).

§. 181.

Elementi de-
finitio nomi-
nalis.

Elementa dicuntur principium internum corporum irresolubile in alia, sive primum.

Intelligimus hic principium essendi corporum, quod in se continet rationem possibilitatis eorundem (§. 874. Ontol.), seu unde intelligitur, cur corpora possibilia sint (§. 56. Ontol.). Dicitur autem irresolubile, quia ab aliis se prioribus non pendet. Quamobrem vis motrix & materia,

ria, etsi sint principia essendi corporum, cum per eas explicari possit, cur corpora possibilia sint, si vim motricem atque materiam sumimus tanquam possibilem; elementa tamen corporum dici nequeunt propterea quod alia principia se ulteriora præsupponunt, unde eorum agnoscitur possibilitas, adeoque in principia se priora resolvi possunt (§. 874. *Ontol.*). Et idem quoque communis vocis significatus est. Etenim literas elementa vocabulorum dicimus. Constat autem ex literis probari possibilitatem vocabulorum, adeoque eas esse principium, idque essendi (§. 874. *Ontol.*). Constat literas in ipsis vocabulis contineri, nec ea sine literis componi posse, adeoque eas esse principium internum (§. 880. *Ontol.*). Constat denique literas in alia principia simpliciora non resolvi, sed esse prima, in quibus subsistimus, vocabula resoluturi in sua principia, adeoque eas esse principium irresolubile in alia. Quare si ex definitione nostra, qua elementa corporum definivimus, omittas corpora; habebis definitionem elementi in genere, quod nempe sit principium rei internum primum sive in alia irresolubile.

§. 182.

Substantiæ simplices sunt elementa corporum (§. 176. 686. 56. 874. 880. 643. 341. *Ontol.* 181. *Cosm.*).

Elementa corporum quænam sint.

§. 183.

Elementa rerum alias prorsus qualitates habent quam res materiales (§. 182. *Cosm.* 683. 112. 122. 545. 454. *Ont.* 119. *Cosm.*).

Qualitates elementorum quales sint.

§. 184.

Elementa rerum materialium non sunt extensa, nulla figura & magnitudine prædita, spatium nullum implent, motuque intestino destituuntur (§. 182. *Cosm.* 675. 677. 679. 682. *Ont.*).

Elementorum attributa spuria.

§. 185.

Elementa rerum materialium sunt prorsus indivisibilia (§. 182. *Cosm.* 676. *Ontol.*).

Indivisibilitas elementorum.

§. 186.

Atomus Naturæ dicitur, quod in se indivisibile est, adeoque partibus destituitur, in quas resolvi possit. Atomus autem materialis appellatur, quod in se divisibile, sed cui dividendo non sufficiunt aliquæ causæ in rerum natura existentes.

Atomorum definitio.

(*Cosmologia contracta.*)

R r r r

§. 187.

§. 187.

Quales atomi
sint elementa.

Elementa verum materialium sunt atomi naturæ, non vero atomi materiales (§. 185 seq.).

Paret hinc ratio, cur atomi naturæ ita dicantur, nimirum quod natura rerum non alias atomos, quam tales admittat, quæ in se spectatæ indivisibiles sunt, adeoque ne quidem per omnipotentiam divinam dividi possunt. Dici etiam poterant atomi physici.

§. 188.

Atomorum
materialium
differentia.

Atomi materiales figuris & mole a se invicem differre possunt (§. 186 Cosm. 636. 531. 798. 622. 624. Ont.).

§. 189.

Qualitatis oc-
cultæ defini-
tio.

Qualitas occulta dicitur ea, quæ sufficiente ratione destituitur, cur subjecto insit, vel saltem inesse possit.

Ita e gr. qualitas occulta est gravitas, si concipitur per modum vis primitivæ, aut vis a Deo materiæ impressæ, cujus ex naturis rerum nulla ratio a priori dari potest. Talis etiam est vix motrix, si sumitur pro vi primitiva a Deo in prima creatione rerum materiæ impressa.

§. 190.

Figura atomi
materialis
qualis.

Figura atomi materialis est qualitas occulta. Figuræ enim atomi materialis ratio sufficiens nulla dari potest, cur eidem insit, vel saltem inesse possit, quoniam in ea nihil supponitur, unde intelligatur, cur ea ipsi potius figura conveniat, vel convenire queat, quam alia (§. 186 Cosm. & §. 56. Ontol.). Atqui figura est qualitas (§. 454. Ontol.). E. (§. 189.).

Nulla est exceptio, quod atomis materialibus necessario hæc conveniat figura, atque adeo ratione alia a priori opus non sit, cur eidem conveniat, vel convenire possit. Figura enim limes extensi est (§. 621. Ontol.). Quare si figura atomis necessario conveniret, ratio in extenso contineri deberet: sed extensum in se ad quamlibet figuram & molem indifferens est, quod nemo negat Atomistarum. Ergo ex notione extensi a priori ratio reddi nequit, cur atomis talis potius conveniat figura, quam alia. Iribuenda igitur ipsis est absque ratione sufficiente, si vel maxime necessariam dicas. Quamobrem hoc ipso, quod eam necessa-

necessariam dicis, in numerum qualitatum occultarum eandem refers. Nemo quoque atomistarum, qui materiam a Deo creatam fuisse asseverat, atomis figuram necessario convenire statuit, verum eam iisdem a Deo arbitrario tributam esse affirmant.

§. 191.

In elementis continentur rationes ultimæ eorum, quæ in rebus materialibus deprehenduntur (§. 181. Cosm. 866. Ont.).

Rationes ultimæ eorum, quæ rebus materialibus conveniunt.

§. 192.

In elementis, consequenter substantiis simplicibus (§. 182.), *ratio ultima contineri debet, cur materia atque vis activa tanquam duæ substantiæ a se invicem diversæ appareant* (§. 191. 178.).

Ratio substantialitatis materiæ & vis activæ ubi quærenda.

§. 193.

Si elementa sunt eadem, composita etiam eadem sunt (§. 191 Cosm. 189. Ont.).

Identitas compositorum unde.

§. 194.

Si composita diversa sunt, etiam elementa diversa sunt (§. 193.).

Compositorum diversitas unde.

§. 195.

Elementa singula dissimilia sunt, seu, nulla datur substantia simplex, quæ in numero elementorum est, & alteri cuidam in eodem numero similis sit. Ponamus duo elementa esse similia. Cum nihil in eorum uno detur, quod non etiam deprehendatur in altero (§. 195. Ontol.); unum alteri salvis compositis substituere licebit, quæ ingrediuntur. Nulla igitur ratio est, cur una potius in uno composito & altera in altero constituatur, quam ut eorum loca permutata fuerint. Sic vero aliquid est sine ratione sufficiente (§. 94 sq.).

Dissimilitudo singulorum elementorum.

§. 196.

Elementa rerum singula vi quadam prædita sunt. Si in substantia composita vis datur, ea ex viribus substantiarum simplicium resultare debet (§. 795. Ontol.). Quare cum corpus sit ens compositum (§. 119.) & elementa, per quæ constituitur, sint substantiæ simplices (§. 182.), vis quædam elementis rerum materia-

Vis elementorum.

terialium inesse debet, quia datur in corpore vis æctiva (§. 135. 137. 169. 168. 180.).

§. 197.

Status muta-
tio in elemen-
tis.

Status elementorum internus continuo mutatur (§. 729. Ont. 196. Cosm. 673. 331. Ont.), ea quidem lege, ut præsens rationem contineat sequentis (§. 70. Ontol.).

§. 198.

Interior ratio
elementorum.

Unumquodque elementum continet seriem mutationum (§. 197. Cosm. 331. Ont. 10. 13. Cosm. 554. 328. Ont.), quæ diversa est a serie alterius cujuscunque (§. 195. Cosm. 211. Ont.).

§. 199.

Dependentia
status a se
invicem.

In omni elemento status singuli a se invicem dependent quoad existentiam (§. 197. 10. 13. 198. 15.).

§. 200.

Mutatio status
elementorum
ad rationem
subjicitur.

In omni elemento ex statu præsentem colligi potest, qualis sit futurus, & qualis fuerit præteritus (§. 199. Cosm. 851. 56. Ont.).

§. 201.

Elementorum
perpetua dif-
ferentia quoad
statum.

Quovis momento status unius elementi differt a statu elementi alterius cujuscunque (§. 195. Cosm. 122. 211. 706. 183. Ont.).

§. 202.

Ratio coëxi-
stentie ele-
mentorum
ubiquam qua-
renda.

Ratio coëxistentiæ elementorum, tum quatenus simul existunt, tum quatenus hoc potius modo, quam alio coëxistunt, in ipsis elementis continetur. Quoniam elementa sunt substantiæ simplices, quibus aggregatis corpora oriuntur (§. 182. 176.), spatium vero ex ordine coëxistentium demum resultat (§. 589. Ont.); ratio coëxistentiæ nec in spatio, nec extra elementa in re quadam alia datur. Cum tamen necesse sit, ut alicubi deprehendatur (§. 118. Ont.), in ipsis elementis contineatur necesse est.

Hæc ipsa propositione via sternitur ad majestatem naturæ in minimis agnoscendam, ad quam perspicendam in magnis viam præmonstravit Copernicus.

§. 203.

Finitudo ele-
mentorum.

Elementa rerum materialium sunt entia finita. Omne elementum seriem quandam mutationum continet (§. 198.), sed quæ

quæ simul tota non existit (§. 197.), immo cum præsens contineat rationem sequentis (§. cit.), adeoque sequens poni nequeat, nisi ante ponatur præcedens (§. 118. *Ontol.*), tota simul inesse nequit. E. (§. 837. *Ont.*). Idem pater per indirectum ex §. 839. 705. *Ont.* 197. *Cosm.*

§. 204.

Elementa rerum materialium omnia inter se connexa sunt Nexus elementorum.
(§. 202. 10.).

Nexus eo um pendet a rationibus finalibus & per rationes finales ordinari potuerunt, quatenus per intrinsecas differentias certa lege ordinari potuerunt.

§. 205.

Nexus rerum materialium a nexu elementorum pendet Fons nexus rerum materialium.
(§. 191. *Cosm.* 56. *Ont.* 204. 199. *Cosm.* 56. 851. *Ont.*).

§. 206.

Status quilibet elementi relationem involvit ad cetera coexistentia Relatio elementorum quoad statum eorum.
(§. 202. *Cosm.* 56. 856. *Ont.*).

§. 207.

Elementa a se invicem patiuntur Passiones elementorum.
(§. 144. 191. *Cosm.* 56. 713 sq. *Ont.*).

§. 208.

Passiones elementorum sunt continuæ. Etenim potentia passiva, quæ corpori competit (§. 144.), eidem semper inest. Pone, si fieri potest, ut tunc demum insit, quando actu patitur: ergo nulla jam dabitur ratio, cur ea tunc insit, consequenter casu puro inerit (§. 94.), quod cum poni absurdum sit (§. 95.), referenda ea est inter determinationes corporis constantes. Atqui ejus ratio in passionibus elementorum continetur. (§. 207. *Cosm.* 554. *Ont.*).

§. 209.

Mutationum omnium, quæ in uno elemento contingunt, ratio reddi potest ex mutationibus, quæ in altero contingunt. Ratio mutationis elementorum.
Elementa a se invicem patiuntur (§. 207.). Quare cum passionibus sint mutationes status, quarum ratio extra subjectum, quod

statum mutat, continetur (§. 714. *Ont.*); elementa rerum materialium ita mutant statum suum, ut mutationis ratio reddi possit ex iis, quæ in aliis accidunt. Enimvero passiones elementorum sunt continuæ (§. 208.). Nullam igitur in elemento concipere licet mutationem, in qua non patiantur ab alio, adeoque omnium mutationum ratio reddi potest ex mutationibus, quæ sunt in alio.

§. 210.

Nexus mutationis elementorum.

Mutationes elementorum omnium inter se & omnes in eodem elemento connexæ sunt (§. 209.). Quoniam itaque id, quod propter rationem aliquam est, rum ponitur, quando ratio sufficiens ponitur (§. 118. *Ont.*), & ad rationem sufficientem etiam requirantur rationes remotiores, cum sine iis plene non intelligatur, cur quid sit (§. 56. *Ont.*); posita quacunque mutatione in uno elemento, ponendæ sunt continuæ aliæ in aliis elementis. Cum adeo qualibet mutatio rationem sufficientem demum agnoscatur in mutationibus, quæ in ceteris omnibus simul contingunt, mutationes elementorum omnium inter se connectuntur (§. 10.).

Porro mutationes in eodem elemento omnes ea lege consequuntur, ut ratio sequentis contineatur in præcedente (§. 197.). Omnes igitur inter se connectuntur (§. 10.).

§. 211.

Relatio elementi unius ad omnia corpora.

*Status quilibet elementi relationem involvit ad omnia composita coexistentia & quæ successive extiterunt (§. 705. *Ont.* 209 sq. *Cosm.*).* Quare si elementa omnia simul considerentur, atque ea, quæ ipsis in se spectatis seu absolute conveniunt perpendantur, exinde intelligetur, cur cetera omnia ita successive modificari & diversis diverso tempore modis aggregari debuerint, ut mutatio hæc ad actum pervenire potuerit, quæ in dato uno quodam elemento deprehenditur. Status igitur quilibet elementi relationem involvit ad cetera omnia, quatenus ob successivas mutationes per universum tempus tali potius, quam alio modo aggregata fuere (§. 856. *Ontol.*). Enimvero dum elementa spectantur, quatenus aggregata sunt, cum sint substantiæ simplices

plices (§. 182.), corpora constituunt (§. 176). Status igitur quilibet elementi relationem involvit ad omnia corpora, siue composita (§. 119.), dato tempore coëxistentia & quæ successive extiterunt.

Sequitur hæc relatio ex elementorum dissimilitudine & eorum nexu, quorum illa non minus, quam hæc principio rationis sufficientis nititur.

§. 212.

Status quilibet elementi relationem involvit ad status omnes elementorum futuros & corpora omnia, quæ per omne tempus futurum exitura sunt. Status omnes elementorum futuri erunt aliquando præsentis (§. 584. Ont.). Quare cum status quilibet elementi relationem involvat ad omnia composita siue corpora præterita (§. 211.), consequenter etiam ad statum quemlibet singulorum elementorum, in quibus ratio ultima continetur, cur olim talia existerint corpora (§. 191.); status etiam quilibet elementi futurus relationem involvit ad statum quemlibet elementi cujuscunque præsentis. Quare etiam status quilibet præsens elementi relationem involvit ad omnes elementorum omnium status futuros, cum relationes sint mutuæ atque reciprocæ (§. 855. Ont.). Et quia elementa in corpora aggregantur (§. 176. 182.), quatenus hos status habent (§. 191.); status quilibet elementi, dum ad omnes omnium futurorum simul relationem involvit, ad omnia quoque corpora, quæ per omne tempus futurum exitura sunt, relationem involvit.

Relatio elementi ad omnium status futuros & corpora omnia.

§. 213.

Status elementi uniuscujusque quilibet relationem ad mundum integrum involvit (§. 48. Cosm. 705. 584. Ontol. 211 §q. Cosm.).

Relatio unius elementi ad integrum mundum.

§. 214.

Ex statu præsentis elementi cujuscunque dati colligi potest, qualis fuerit præteritus per omne retro tempus, qualis sit præsens, qualis sit futurus ceterorum elementorum omnium totiusque universi per tempus omni subsequendum, hoc est, omnis per omne ævum status

Cognitio omnium ex uno elementi statu dato.

tus singulorum elementorum & totius mundi (§. 210. 10. Cosm. 705. 56. 710. 160. 455. Ontol. 200. 191. 48. Cosm.).

Ceterum licet tantummodo enunciamus, quid rebus in se spectatis conveniat citra relationem ad nostrum vel entis alterius cujuscunque intellectum. Absit enim, ut affirmemus tantum esse hominis intellectum, ut tam vastæ rerum cognitioni sufficiat! Ex hoc ipso potius principio clarissime ostendi potest, infinitam esse cognitionis rerum naturalium abyssum. Præterea ab hac ipsa propositione derivandum, quod fieri possit, ut in rerum naturalium cognitione ab uno dato ad aliud quæsitum perveniri detur.

CAPUT III.

DE

ORTU CORPORUM EX ELEMENTIS.

§. 215.

Puncti Zenonici definitio.

Punctum Zenonicum dicitur ens simplex, quod præter carentiam partium nullam aliam determinationem intrinsecam admittit, seu minimum in extenso uniformi, quod nullam prorsus habet partem.

Appellatur punctum Zenonicum, propterea quod Zenoni tribui soleat ea sententia, quasi rerum elementa sint puncta, in quibus præter partium carentiam nihil concipere liceat. Sunt autem puncta illa non alia, quam mathematica.

§. 216.

Similitudo
puncctorum
Zenonicorum.

Puncta Zenonica omnia sunt inter se similia (§. 215. Cosm. 181. 195. Ont.).

§. 217.

Elementa
spuria.

Puncta Zenonica non sunt elementa rerum materialium (§. 216. 195.).

§. 218.

§. 218.

Ex punctis Zenonicis extensum oriri nequit. Quod si extensum formare debent, necesse est ut extra se invicem existant & hoc tamen non obstante uniantur (§. 548. *Ontol.*). Jam cum puncta Zenonica A & B sint similia (§. 216.) & ob partium carentiam (§. 215.) magnitudine destituantur (§. 430. *Ont.*), qua sola similia differre possunt (§. 348. *Ont.*); si eadem numero a se invicem diversa ponimus (§. 184. *Ont.*), unum equidem extra alterum existit (§. 544. *Ontol.*); quoniam tamen præter carentiam partium nihil in iis concipere licet (§. 215.), nihil in iis datur, ex quo intelligi possit, cur fiant unum, adeoque inter se uniantur (§. 563. 56. 70. *Ont.*).

Impossibilitas
compositionis
extensi ex
punctis Zeno-
nicis.

§. 219.

Elementa rerum materialium extra se invicem existunt (§. 195. *Cosm.* 211. 544. *Ont.*).

Modus exi-
stendi ele-
mentorum.

§. 220.

Elementa inter se unita sunt (§. 202. 195. *Cosm.* 328. 563. *Ont.*).

Unio elem-
entorum.

§. 221.

Aggregata elementorum extensa sunt (§. 219 sq. 195. *Cosm.* 211. 183 548. *Ontol.*).

Extensio un-
de.

§. 222.

Aggregata elementorum continua sunt (§. 221. *Cosm.* 566. *Ont.*). Idem discitur ex §. 202. 195. *Cosm.* 215. 217. 472. 554. *Ontol.*

Continuitas
unda.

§. 223.

Omne corpus oritur ex eo, quod non est extensum, ipsum tamen extensum est (§. 176. 182. *Cosm.* 541. *Ontol.* 184. 221. *Cosm.*).

Extensio
corporum.

§. 224.

Extensionem & continuitatem in corpore nonnisi confuse percipimus. Quoniam corpora sunt substantiarum simplicium (§. 176.), adeoque elementorum aggregata (§. 112.), in ele-
(*Cosmologia contracta.*)

Perceptio ex-
tensionis &
continuitatis
qualis sit.

SS ss

mentis

mentis vero rationes ultimæ eorum continentur, quæ rebus materialibus conveniunt (§. 191); in iisdem omnino extensionis quoque ratio contineri debet ultima. Quamobrem cum is rem distincte percipiat, qui notas, quas nobis sistit (§. 87. Log.), consequenter quæ rebus intrinseca sunt, unde agnoscuntur & a se invicem discernuntur (§. 78. Log.), distinguere a se invicem valet; quænam insint elementis rerum, ut iis aggregatis extensio & continuïtas resulet, a se invicem distinguimus. Enimvero quilibet sibi metipsum attendens statim agnoscit, a se ea non distingui. Quamobrem patet, quod nec distincte percipiat continuïtatem atque extensionem (§. 87. Log. & §. 53. Ontol.).

§. 225.

Phænomenon.

Phænomenon dicitur, quicquid sensui obvium confuse percipitur.

§. 226.

Extensio & continuïtas
cur sint phænomena.
Corpusculi
definitio.

Extensio & continuïtas phænomena sunt (§. 224sq.).

§. 227.

Corpuscula dicuntur entia composita per se inobservabilia, seu adeo exilia, ut omnem visum effugiant.

§. 228.

Existentia
corpusculorum.

Dantur corpuscula in mundo adspectabili. Quodsi enim e. c. particulam quandam auri microscopio subijcias, quod objecta quantumcunque amplificat, nihil tamen in eo distingues quam auri particulas. Enimvero aurum est corpus mixtum, quod oritur materiis aliis simplicioribus invicem permixtis. Quatenus vero corpus mixtum est, partes quædam ipsius ex aliis minoribus a mixto diversis componuntur, nempe ex particulis materialium simpliciorum; ex quibus mixtum prodiit. Dantur igitur in auro particule quædam, seu entia composita, adeo exilia, ut omnem quoque sensum armatum effugiant, consequenter corpuscula.

§. 229.

Corpusculum
visum.

Corpuscula primitiva sunt, in quibus nulla compositionis ratio

ratio assignari potest, præterquam in elementis. *Corpuscula autem derivativa* appellantur, quæ rationem compositionis in aliis se minoribus agnoscunt.

§. 230.

Philosophia corpuscularis dicitur, quæ phaenomenorum rationem a corpusculis desumit.

Philosophiæ corpuscularis definitio.

§. 231.

Corpora observabilia omnia constant ex corpusculis derivativis (§. 228 sq.).

Corpora observabilia ex qualibus corpusculi constant.

§. 232.

Corpuscula derivativa non sunt atomi materiales (§. 229. 186.).

Atomi materiales qualis sint corpuscula.

§. 233.

Ratio eorum, quæ corporibus observabilibus conveniunt, in qualitatibus corpusculorum derivativorum & modo, quo eadem inter se conjunguntur, continetur (§. 231. Cosm. 341. Ont. 119. Cosm. 535. Ont.).

Ratio mutationum intrinsecorum in corporibus observabilibus.

E. gr. Aurum constat ex corpusculis derivativis, quæ ex aliis minoribus componuntur ab auro diversis, cum singula derivativa auri particulæ sint. Quare ratio eorum, quæ massæ auri ex istis corpusculis per mixtionem enatis compositæ conveniunt, ex qualitatibus illarum auri particularum & modo, quo eadem inter se junguntur, ut massa auri prodeat, derivanda. Ita e. gr. color inest toti massæ flavus, quia singulis corpusculis convenit iste color. Ductilitas vero ab illorum corpusculorum figura & modo, quo invicem junguntur in massa auri constituenda, petenda est.

§. 234.

Mutationum, quæ corporibus observabilibus accidunt, intrinsecarum ratio, cur tales potius esse debeant, quam aliæ, in qualitatibus corpusculorum derivativorum & modo, quo eadem inter se junguntur, continetur (§. 233.).

Mutationem rationem in corporibus observabilibus.

E. gr. Plumbum ignis calore liquatur. Quodsi quæviseris, cur talem mutationem subeat, hoc est, cur sit liquabile & ceteris metallis facilis liquetur; ex qualitatibus corpusculorum plumbi, quibus ea differunt ab

§§ § §

alio-

aliorum metallorum corpusculis, & modo, quo eadem vi illarum inter se junguntur, reddenda ratio erit.

§. 235.

Phænomenorum ratio.

Phænomenorum specialium ratio, quæ corpora observabilia exhibent, in qualitatibus corpusculorum derivativorum & modo, quo ea inter se junguntur, quærenda (§. 233. 234. 225.).

§. 236.

Veritas philosophiæ corpuscularis.

Philosophia corpuscularis veras phænomenorum specialium rationes affert (§. 230. 235.).

Patet adeo, cur in scriptis eorum, qui philosophiam corpuscularem excoluere, multum insit veritatis, etsi circa prima eorum materialium principia erraverint Autores.

§. 237.

Principiorum mechanico-rum & physicorum differentia.

Principia mechanica appellantur figura, magnitudo sive moles, motus & situs. Principia vero physica in oppositione ad mechanica dicimus phænomena, quatenus reddendis rationibus aliorum phænomenorum inserviunt, seu quorum mechanica explicatio vel later, vel in dato casu non attendenda venit.

E. gr. Si ponamus corpuscula esse elastica & rationem elasticitatis vel dare non possumus, vel ubi ad eam in explicandis phænomenis corporis ex illis compositi recurendum, mechanicam elateris explicationem non moramur; elater corpusculi est principium physicum.

§. 238.

Qualitates mechanicae & physicae.

Qualitates mechanicas voco, quæ immediate per principia mechanica sunt explicabiles. Qualitates vero physicas appello, quæ per principia physica explicabiles sunt, seu rationem sui in phænomenis quibusdam aliis agnoscunt, aut, quod perinde est, quæ per principia mechanica immediate explicari nequeunt.

§. 239.

Qualitatum mixtarum definitio.

Qualitates mixtæ sunt, quæ partim per principia mechanica, partim per physica explicabiles sunt, seu quarum ratio

tio partim per mechanica, partim per physica principia red-
ditur.

E. gr. Spongia facile comprimi potest. Rationem compressibili-
tatis redditurus ad situm partium & flexilitatem materię coherentis,
seu ex qua spongia constat, recurrendum. Situs est principium me-
chanicum; flexibilitas materię, ex qua spongia constat, principium
physicum.

§. 240.

*Figure corpusculorum derivativorum sunt qualitates me-
chanicę, & dantur etiam in iisdem præterea qualitates mecha-
nicę alię (§. 229. 237 sq.); sed eadem quoque qualitates physicas
& mixtas habent, si corpuscula derivativorum compositionem in-
gredientia fuerint derivativa.*

Qualitates cor-
pusculorum
derivativo-
rum.

Quod etiam in corpusculis dantur qualitates physica; ipsa expe-
rientia confirmatur. Etenim & solum exemplum pulveris pyrii idem
confirmat. Singula sanè corpuscula pulveris pyrii inflammabilia esse,
ex eo colligitur, quod scintilla exigua, quę non videtur oculo nu-
do, nisi quatenus ignita, pulverem pyrium accendere possit. Neque
enim istiusmodi scintilla nisi unum vel alterum corpusculum continge-
re potest. Jam vero ista inflammabilitas a potentia ignem concipiendi
in carbone, liquabilitate & inflammabilitate sulphuris, liquabilitate &
resolubilitate nitri in halitum, adeoque a meris principiis physicis
pendet. Immo si in hæc naturę phenomena inquirens resolutiones
chymicas consulis, ipsa corpuscula carbonis, sulphuris atque nitri suas
habere qualitates physicas reperies.

§. 241.

*In philosophia corpusculari rationes petendę sunt non mo-
do a principiis mechanicis, verum etiam physicis & ubi rationes
proximę tantummodo quaruntur, in physicis subsistendum (§. 235.
240. 238 sq. Cosm. 87. Log. 225. 237. Cosm.).*

Rationes in
philosophia
corpusculari
attendendę.

§. 242.

*In philosophia corpusculari nec elementis bastenus opus
habemus, nec atomorum, si vel maxime darentur materialium ul-
lus foret usus (§. 52. Disc. præf. 235. 229. 182. 232. Cosm.).*

Elementorum
& atomorum
num aliquis
usus in philo-
sophia corpu-
sculari.

§. 243.

An elementorum qualitates & num dentur atomi Phisices nosse debeat.

Qualia ergo sint rerum materialium elementa, & utrum atomi materiales dentur, nec ne, in philosophia naturali citra errandi periculum ignoratur (§. 242.).

Non tamen ideo existimandum est; omnem de elementis rerum tractationem esse inutilem. Præterquam enim quod generalis eorumdem cognitio in Theologia naturali inexpectatam prorsus ad res maxime arduas demonstrandas utilitatem affert; errorem quoque circa phenomena generalia committendum prohibet, qui præjudicia plurima gignit, unde in metaphysicis difficultates oriuntur, qualis est ille Philosophorum labyrinthus de compositione & resolutione continui, & in phisicis entia imaginaria Mathematicorum cum realibus in universo existentibus confunduntur, atque notio directrix in veris phenomenonum specialium rationibus investigandis agre admittitur.

§. 244.

Quenam in compositione corpusculorum sint attendenda.

In compositione corpusculorum primitivorum ratio habenda ejus, quo elementum unum differt a ceteris omnibus. Similiter in compositione corpusculorum derivativorum ratio habenda ejus, quo corpusculum unum differt ab aliis in rerum natura existentibus. Pone enim in corpusculo primitivo componendo non habendam esserationem ejus, quo elementum unum a ceteris omnibus differt; sed tantummodo eorum, quæ cum aliis communia habet. Ergo salvo corpusculo, hoc est, salvis iis, quæ in corpusculo apparent, alia elementa in locum eorum substitui possunt, quæ compositionem corpusculi ingrediantur, ea nempe, quæ illa communia habent, ad quæ in compositione attendendum venit, etsi in ceteris differant. Quare cur hæc potius elementa, quam alia in rerum natura existentia, corpusculi hujus primitivi compositionem ingrediantur, intelligi nequit per ea, quæ elementis insunt, consequenter ratione sufficiente id destituitur (§. 56. Ont.), atque adeo casus purus est (§. 94 sq.).

Eodem prorsus modo ostenditur, in compositione corpusculorum derivativorum etiam rationem habendam esse ejus, quo corpusculum unum differt ab aliis in rerum natura existentibus.

§. 245.

§. 245.

Corpusculum nullum alteri simile est, seu omnia corpuscula Dissimilitudo
 (§. 229. *Cosm.* 53. *Ont.*) *inter se dissimilia sunt.* Vid. §. 229. 182. corpusculo-
 176. 195. 191. *Cosm.* 118. 189. 181. 183. 53. 211. *Ontol.* de corpusculis rum.
 primitivis; & §. 229. *Cosm.* 215. 218. *Ontol.* de derivativis.

Eodem prorsus modo patet, corpuscula derivativa, quæ ex derivativis aliis ortum trahunt, inter se similia non esse.

Non negamus, corpusculum unum alteri ex parte, immo maximam partem simile esse posse, quatenus nempe ea, quæ uni corpusculo insunt, maxima ex parte conveniunt cum illis, quæ insunt corpusculo alteri: enimvero ubi de similitudine loquimur, ne unicam quidem determinationem in duobus corpusculis diversam admittimus.

§. 246.

Nullum corpus in universo alteri simile est, sive corpora, Dissimilitudo
quæ inter se conferuntur, eodem tempore existant, sive diverso (§. corporum.
 228. 231. 245. 244.).

Quo clarius appareat, fieri non posse, ut duo corpora similia eodem tempore in diversis locis, vel diverso tempore sive in eodem, sive in diversis locis existant; corporum in universum omnium dissimilitudinem ita ostendo. Corpora sunt entia composita, quæ in mundo existunt, seu ex quibus tanquam partibus mundus componitur (§. 119.). Enimvero entium compositorum contingentium existentia in mundo per mundum integrum determinatur (§. 87.), consequenter cum mundus sit series rerum successivarum & simultanearum inter se connexarum (§. 48.), per res omnes præcedentes & coexistentes. Corporis igitur cujuscunque actualitas sive existentia determinatur per res omnes, quæ in mundo præcessere, & nunc simul existunt (§. 115. *Ont.*). Quare si duo corpora in mundo vel eodem, vel diverso tempore similia producerentur; duo ponenda essent universa per omne tempus antecedens prorsus eadem.

Hac ratione ostendimus nihil in toto universo occurrere, quod alteri simile sit, ita ut in uno non detur, per quod discerni possit ab altero. De elementis quidem §. 195. de corpusculis §. 245. de corporibus quibuscumque §. præsentē.

§. 247.

§. 247.

Individua non
solo numero
differre.

Ergo in omni mundo materiali non dantur duo individua, quæ nonnisi numero differunt, sed differentiæ non minus numericæ, quam specificæ dantur (§. 239. Ontol. 195. 245 sq. Cosm. 195. Ontol.).

§. 248.

Identitas in-
discernibi-
lium.

Quoniam in omni mundo materiali non dantur duo individua, quæ nonnisi numero differunt (§. 247.); si duo entia A & B ponas, quæ nonnisi numero differunt, consequenter indiscernibilia sunt, eus unum idemque sub duobus nominibus ponis.

Hanc propositionem de identitate duorum vel plurium indiscernibilium principium identitatis indiscernibilium appellat Leibnizius. Principio autem huic tantummodo locus est, ubi de rebus actualibus, aut de iis, quæ in ordine rerum, quibus mundus hic adspectabilis constituitur, continentur, sermo fuerit, cum absolute non repugnet, duo indiscernibilia, seu nostra phrasi duo individua nonnisi numero differentia existere. Quamobrem in philosophia prima, ubi actiones in abstracto spectamus, identitatem ita definitivimus, ut idem bis poni non repugnet, quemadmodum etiam idem genus & eadem species non simplici vice ponuntur in individuis (§. 181. Ontol.).

§. 249.

Massæ simila-
ris & dissimi-
laris definitio.

Massa similis dicitur, quæ dividi potest in partes nonnisi numero aut sola magnitudine differentes, seu, quæ componitur ex corpusculis nonnisi numero differentibus. Ex adverso Massa dissimilis appellatur, quæ dividi non potest in partes solo numero differentes, seu, quæ componitur ex corpusculis dissimilibus.

§. 250.

Massæ simila-
res num den-
tur.

247.).

Massæ similes in rerum natura non dantur (§. 249.

§. 251.

Materia omnis
qualis.

249 sq.).

Omnis igitur materia in toto universo dissimilis est (§.

Communis est Physicorum opinio, quod materia omnis sit similis: unde inferunt, ex qualibet materia fieri posse quidlibet. Ipse
Cartesius

Cartesius in Princip. Phil. non aliam, quam similem materiam agnoscit. Quare in primo statu eam sibi repræsentat tanquam extensum continuum, quod deinde a Deo divisum in particulas non aliis determinationibus aut, si mavis, qualitatibus a se invicem differentes quam figuris. Ratio quidem alia non fuit, quam quod notionem extensi imaginariam, qua Geometræ utuntur, pro reali haberet, eamque incaute in Physicam introduceret, utut difficultates inextricabiles sentiret, quæ inde resultant. - Et huic præjudicio porro debetur, quod mundus ab eo, qui existit, prorsus diversus ex eadem materia condipotuerit, quodque veram rerum materialium substantialitatem non agnoverint.

§. 252.

Materiæ duæ A & B, vel plures dicuntur *misceri*, quæ in particulas exiles admodum divisæ corpuscula gignunt ex combinatione duorum vel plurium particularum pro numero miscibilium resultantia, ex quibus deinde componitur massa quædam a materiis mixtis differens qualitatibus. *Commisceri* autem dicuntur ea, quarum particulæ, in quas divisæ sunt, se mutuo tangunt.

Misceri quædam dicantur.

Mixtio a commixtione probe est discernenda. Ponamus alumen & nitrum conteri & utriusque particulas constituere pulverem, in quo particulæ aluminis particulis nitri interjectæ sunt; alumen nitro commixtum esse dicemus. Enimvero si particulæ sulphuris, carbonum & nitri aqua humectatæ tamdiu tunduntur, donec inde generentur corpuscula ex particulis sulphuris, carbonis & nitri composita, quæ deinde corpuscula inter se combinata pulverem pyrium constituunt, istiusmodi qualitatibus instructum, quales nec sulphuri, nec carboni, nec nitro insunt; sulphur, nitrum & carbones in compositione pulveris pyrii miscentur. Facile apparet a qualitatibus particularum pendere, utrum in unum corpusculum coalescant, nec ne, consequenter num misceantur, an tantummodo commisceantur. Commixtionis exemplum clarius est, si pisæ fabis commiscantur, ubi pisæ fabis ita interjectæ comparent, ut nec inter se juncta constituant corpora a pisæ & fabis diversa, nec acervus commixtorum qualitatibus instruat, quæ nec fabis, nec pisæ insunt.

(*Cosmologia contracta.*)

T t t t

§. 253.

§. 253.

Miscibilium
mixti & cor-
pusculorum
mixti definitio.

Materiae, quæ miscentur, dicuntur *Miscibilia*: corpuscula, quæ ex combinatione particularum miscibilium prodeunt, vocantur *Corpuscula mixti*; quod vero ex his corpusculis componitur, *Corpus mixtum* appellatur.

§. 254.

Corpuscula
mixti qualia.

Corpuscula mixti sunt corpuscula derivativa (§. 229. 253.).

§. 255.

Mixtio quo-
modo deter-
minetur.

Quoniam mixtum prodit, si particule exiles miscibilium uniuntur, ut corpuscula ex iis componantur (§. 252. 253.); data *specie singulorum miscibilium & eorundem ad se invicem ratione, una cum modo, quo particule eorum uniuntur, mixtio datur.*

Hæc ideo monemus, ne desit notio directrix in explicanda mixtione corporis mixti, tum ut constet, num mixtio in dato casu sit sufficienter explicata, tum ut pateat, quomodo in essentiam mixti sit inquirendum. Si compositionem pulveris pyrii intelligere volueris, non modo constare debet, quod eam ingrediantur nitrum & sulphur cum carbonibus, verum etiam in numeris ratio tam sulphuris, quam nitri ad carbones assignanda, v. gr. quod pondus sulphuris ad pondus nitri esse debeat in ratione subseptupla, pondus vero carbonum ad idem pondus nitri in ratione subquintupla subsupertripartiente quintas, ac præterea docendum, quomodo aqua sint massæ inter se commixtæ humectandæ, quomodo & quamdiu sint tundendæ, ut tandem gignantur corpuscula mixti.

§. 256.

Perfekte & im-
perfekte mixti
definitio.

Perfekte mixtum dicitur, si in corpusculis mixti singulis, vel in quavis parte mixti eadem sit miscibilium proportio, quæ in toto mixto. Ita nempe perfecte mixtum dicitur in suo quoque genere. Unde simul pater, quod non sit perfecte mixtum, seu *imperfekte mixtum*, in suo itidem genere, si in data qualibet mixti portione, vel in singulis mixti corpusculis non eadem fuerit proportio, quam in toto mixto. Si vero mixta diversi generis inter se conferuntur, illud dicitur *perfectius mixtum*, quod difficilius resolvitur in sua miscibilia. Atque adeo *perfecte mixtum* absolute

absolute dici solet, quo non difficilior corpus mixtum aliud in sua miscibilia resolvitur.

E. gr. Pulvis pyrius est corpus mixtum, miscibilia sunt nitrum, sulphur & carbones. Quodsi ponamus rationem sulphuris ad nitrum esse ut 1 ad 7, carbonum vero ad idem nitrum ut 5 ad 28, & in quolibet corpusculo, vel quolibet etiam granulo, immo quacunque quantitate pulveris pyrii eadem sit proportio, nempe ratio sulphuris ad nitrum itidem ut 1 ad 7, carbonum vero ad idem nitrum itidem ut 5 ad 28, dicetur pulvis pyrius perfecte mixtus: fieri nimirum nullo modo potest, ut exactius misceantur miscibilia, ex quibus pulvis pyrius constat. Enimvero quando Physici & inprimis Chymici mixtum unum altero perfectius appellant, ad difficilem resolutionem mixti in sua miscibilia animus advertunt. Et hoc respectu aurum vocant perfecte mixtum, immo mixtorum omnium perfectissimum, quia mixtio auri omnium difficillime destruenda. Nobis vero hic potissimum res est cum mixtis ejusdem speciei, veluti dum quaeritur, num pulvis pyrius unus sit perfectius mixtum altero, & quando dici possit, quod perfecte mixtus, ita ut perfectior ne cogitari quidem possit.

§. 257.

Essentia corpusculorum mixti consistit in mixtione & corporis mixti essentia in modo, quo corpuscula mixti inter se junguntur (§. 253. 255. 140. 252.).

Essentia corpusculorum mixti & corporis mixti.

§. 258.

Ratio eorum, quæ mixto, quatenus mixtum est, conveniunt, ex qualitibus corpusculorum mixti & modo, quo invicem junguntur, reddenda (§. 535. Ontol. 253. Cosm.). Idem patet ex §. 254. 233 sq.

Ratio phenomenorum mixti.

E. c. Pulvis pyrius facillime accenditur & in flammam elasticam abit. Ratio petenda est a qualitibus corpusculi mixti & modo, quo hæc corpuscula inter se junguntur: quemadmodum patet ex iis, quæ de vi pulveris pyrii a priori tradimus in Pyrotechnia. Idem pulvis pyrius friabilis est. Reddenda ratio ex modo, quo corpuscula mixti in mixto & particulæ miscibilium in corpusculo mixti inter se junguntur. Pulvis pyrius corrumpitur in aëre humido. Ratio patet per qualitates corpusculorum mixti; sed per eas non prorsus liquet. Etenim cum per-

eant aliquæ corpusculi mixti qualitates, facilis nempe accensio, momentanea ejus continuatio & elasticitas flammæ; ratio a compositione corpusculorum simul petenda.

§. 259.

Ratio qualita-
tum corpo-
sculorum
mixti.

Qualitatum corpusculorum mixti ratio continetur in mixtione & qualitativis particularum miscibilium (§. 253. Cosm. 535. Ontol. 255. Cosm.).

Elasticitas flammæ est qualitas corpusculi pulveris pyrii, itidemque attractio vaporum ex aëre humido. Quare ubi istarum qualitatuum rationem requisiveris, ad qualitates particularum, quæ corpusculum pulveris pyrii ingrediuntur, respiciendum, veluti hic ad intensum calorem flammæ sulphureæ & elasticitatem vaporis sive halitus nitrosi vi caloris intendendam, in casu priori; ad potentiam attrahendi vaporem, quæ nitro tanquam soli competit, & potentiam resolvendi mixtionem nitri, quæ granulis putrefactis convenit, in casu posteriori.

§. 260.

Massæ appa-
renter simila-
res.

Massæ seu materiæ apparenter similes sunt perfecte mixta, quatenus ut talia spectantur (§. 256. 255. Cosm. 215. 217. 196 sq. Ontol. 249. 246. Cosm.), vel etiam mixta in genere, quatenus differentia a perfecte mixtis non observabilis. Sic enim videbitur perfecte mixtum, ut ut tale non sit; adeoque idem valet, quod ante assertum.

Hoc sensu quoque in corpore humano dantur partes similes, nec aliter intelligendi sunt Medici, quando de iisdem in Physiologia loquuntur.

§. 261.

Mixti remoti
& proximi dif-
ferentia.

Mixtum proximum est, cujus miscibilia non sunt corpora mixta. Mixtum vero remotum est, cujus miscibilia rursus sunt corpora mixta. Illa etiam dicuntur immediata; hæc autem mediata.

Exemplum mixti mediati seu remoti est pulvis pyrius: ejus enim miscibilia sulphur, nitrum atque carbonæ sunt denuo corpora mixta, quemadmodum Chymia docet. *Aristoteles* ignem; aquam, aërem & terram, saltem elementarem, quam vocant, pro corporibus non mistis habuit,

habuit, adeoque ipsius iudicio mixta proxima seu immediata sunt, quæ ex istis quatuor materiis per mixtionem resultant, seu cujus corpuscula ex igne, aqua, terra & aëre constant.

§. 262.

Mixta proxima oriuntur ex corpusculis primitivis (§. Ortus mixto-
 261.); *mixta vero remota ex corpusculis derivativis (§. sam.*
 257.).

Dantur adeo mixtionis gradus, ita ut corpus unum sit magis mixtum altero.

§. 263.

In mixtione particula miscibilium suas qualitates retinent, An qualitates
quas habuerant ante mixtionem (§. 252.). Dum particula istæ miscibilium
 inter se conjunguntur, nulla determinatio ipsis intrinseca muta- in mixto mu-
 tur, nulla quippe præsentē causā, quæ mutationem superindu- tentur.
 cit (§. 898. Ont.), neque singularum figuræ mutantur, quibus
 mediantibus junguntur. Atqui determinaciones intrinsecæ a
 quantitate diversæ (§. 455 Ont.), quas inter etiam ipsa figura est
 (§. 621. 122. Ont.), sunt qualitates; E.

E. c. Particulæ sulphuris in pulvere pyrio facile liquefcunt, & dum liquefcunt, in flammam abeunt, quemadmodum ante mixtionem contingebat. Particulæ nitri similiter vi caloris liquefcunt & in halitum resolvuntur elasticum. Particulæ carbonum candescunt per contactum corporis alterius candentis, vel etiam vi flammæ. Ex ipso autem modo, quo pulvis pyrius contunditur, innatescit, nec figuras particularum miscibilium immutari: neque enim ad mixtionem absolvendam alia re opus est, quam ut miscibilia commixta & aqua madefacta tamdiu tundantur, donec particulæ exiles miscibilium ita aggregentur, ut non dari possit particula quantacunque mixti, in qua non insint particulæ sulphuris, nitri atque carbonum, ut scintillula de lapsa continuo contingat aliquam carbonis particulam. Hoc ipso autem figuras particularum sulphuris exilium non immutari manifestum est, & ex friabilitate granulorum pulveris pyrii colligitur, quod in mixto illis non aliæ convenient figuræ, quam quæ particularum exilium sulphuris, nitri atque carbonum esse possunt.

§. 264.

Solutionis
mixti definitio.

Mixtum dicitur *solvi*, si miscibilium particulæ a se invicem segregentur, ut non amplius mixti corpuscula constituent.

§. 265.

Mixti in sua
miscibilia solutio.

Mixtum omne in sua miscibilia solubile, unde ortum trahit. In mixtione enim particulæ miscibilium suas qualitates retinent, quas ante mixtionem habebant (§. 263.), immo retinent etiam suas figuras, quæ ipsis tanquam particulis miscibilium conveniunt. Quare particulæ miscibilium a se invicem iterum separari possunt & in unam massam congregatæ, quæ sunt ejusdem speciei, miscibile denuo componere debent, quod ante mixtionem ex iisdem constabat, cum eadem numero particulæ iterum combinentur, quæ antea in miscibili combinatæ fuerant (§. 182. Ont. §. 264. Cosm.).

Pulvis pyrius ex sulphure, nitro & carbonibus ortum trahit: idem vero etiam in sulphur, nitrum & carbones solubilis. Alia vero quaestio est, num dentur in rerum naturâ causæ, quæ solutioni huic sufficiunt, ita ut singulæ particulæ sulphuris a particulis nitri & carbonum, singulæ particulæ nitri a particulis sulphuris atque carbonum, singulæ denique particulæ carbonum a particulis sulphuris ac nitri separatæ in unam massam congregentur, atque vel in pulverem nitrosus, sulphureum & carbonum, vel in massam quandam nitri & sulphuris atque carbonem abeant. Etenim hic tantummodo loquimur de absoluta possibilitate solutionis, non vero de modo, quo solutio ista actu fieri possit, potentia ad actum traducta.

§. 266.

Mixti solutio
mediata.

Si in mixto mediato seu proximo particule miscibilium solvuntur in sua miscibilia, mixtum quoque solvitur (§. 261. 253. 264. 262.).

§. 267.

Solutionis im-
mediatæ &
mediatæ de-
finitio.

Solutio immediata dicitur, qua miscibile solvitur in sua miscibilia. *Solutio mediata* a nobis vocatur, qua particulæ miscibilium solvuntur in particulas miscibilium, ex quibus ipsæ constant.

§. 268.

§. 268.

In solutione tam mediata, quam immediata interit mixtum. De solutione immediata vide §. 267. 264. 262. *Cofm.* 541. *Ont.* de mediata conf. §. 267. 264. 263. 262. *Cofm.* 541. *Ont.* Interitus mixti.

§. 269.

Miscibilia, quorum particulis combinatis gignuntur corpuscula mixti, vel, quod perinde est, quæ sunt miscibilia mixti, dicuntur *proxima*, vel etiam *immediata*: ex adverso *miscibilia*, quorum particulis combinatis gignuntur corpuscula miscibilium, seu, quod perinde est, quæ sunt miscibilia miscibilium mixti, *remota*, vel etiam *mediata* a nobis appellantur. Miscibilium proximorum & remotorum definitio.

E. gr. Nitrum, sulphur & carbones sunt miscibilia proxima seu immediata pulveris pyrii. Enimvero cum nitrum, sulphur & carbones sunt denovo corpora mixta; miscibilia singulorum immediata sunt miscibilia remota pulveris pyrii.

§. 270.

Solutione immediata mixta solvuntur in miscibilia proxima seu immediata; solutione autem mediata in miscibilia remota sive mediata (§. 269 267.). Solutionis mediatae & immediatae effectus.

Pulvis pyrius solutione mediata solvitur in miscibilia nitri, sulphuris & carbonum, adeoque in miscibilia remota: at si in sulphur, nitrum & carbones solvitur, solutione immediata abit in miscibilia proxima.

§. 271.

Si mixtum solvitur in miscibilia sive immediata, sive mediata, & alius secedentibus alia coalescunt in corpuscula, novum mixtum gignitur, praesertim in solutione mediata. Ponamus miscibilia immediata esse quatuor A, B, C & D: singula igitur corpuscula componuntur ex particula quadam ipsius A, particula quadam ipsius B, particula alia ipsius C & denique alia ipsius D (§. 254.). Quoniam mixtum solvitur in sua miscibilia *per hypoth.* particulae singulorum A, B, C & D in unoquoque corpusculo a se invicem separantur. Quare si jam porro unum vel alterum miscibile, veluti B, vel A & D, secedat & reliquorum particulæ Mixti generis per solutionem mixti.

ticulæ iterum coalescant in corpuscula, nempe in casu primo particulæ ipsorum A, C & D, in posteriori particulæ ipsorum B & C *per hypoth.* prodibunt alia mixti corpuscula, seu ab eis diversa, ex quibus mixtum constat, quod in sua miscibilia fuit solutum. (§. 183. *Ont.* 270. *Cosm.*).

Ponamus porro mixtum solvi in sua miscibilia mediata, consequenter solutionem esse mediatam (§. 270.). Sint jam miscibilia A, B, C & miscibilia ipsius A sint H & I, ipsius B vero L, M & N, ipsius C denique O, P, Q & R. Quoniam mixtum solvitur in sua miscibilia mediata *per hypoth.* & H, I, L, M, N, O, P, Q & R sunt miscibilia mediata (§. 269.); mixtum solvetur in H, I, L, M, N, O, P, Q & R. Enimvero miscibilibus aliis segregatis cetera, quæ supersunt, in mixtum denuo coalesunt *per hypoth.* Ergo si ponamus segregari miscibilia H, M, N, P & Q, miscebuntur I, L, O & R. Mixti igitur geniti miscibilia sunt I, L, O & R (§. 253.); mixti autem soluti erunt A, B & C *per hypoth.* Quare multo magis patet, in mixti solutione mediata genitum mixtum a mixto soluto prorsus differre (§. 183. *Ontol.*).

Illud præterea notandum, accidere etiam posse, ut, licet mixtionem in genesi mixti per solutionem immediatam ingrediantur miscibilia, quæ eadem numero fuerant in mixto soluto, ratio tamen eorum ad se invicem variari possit (§. 255.): id quod etiam accidere potest in mixtione mediata miscibilibus mediatis.

§. 272.

Alia mixti
genesis.

Si mixtum solvitur in miscibilia sive proxima, sive remota, & aliis segregatis aggregantur ceteris, quæ supersunt, alia, quæ non inerant mixto; novum inde gignitur mixtum. Ponamus miscibilia mixti immediata esse A, B, C &c. Ponamus porro facta mixti solutione inde segregari B, vel A & C; relinqui B & C, vel solum B. Ponamus denique residuis superaccedere F & G. Erunt itaque in casu primo miscibilia immediata mixti geniti B, F & G; in altero A, C, F & G (§. 269.). Quare cum miscibilia mixti geniti immediata prorsus diversa sint a miscibilibus

bus mixti soluti immediatis, mixtum quoque genitum prorsus diversum est a mixto soluto.

Quodsi mixtum solvitur in miscibilia mediata; miscibilia immediata in ea solvuntur miscibilia, quibus ipsorummet mixtio determinatur (§. 269.). Sint miscibilia immediata A & B, miscibilia ipsius A vero C, D & E, ipsius B denique F & G Solvitur adeo mixtum in C, D, E, F, & G *per hypotb.* Ponamus jam secedere D & F, relinqui C, E & G; superaccedere L, vel L, M & N &c. erunt adeo miscibilia immediata mixti geniti C, E, G & L in casu primo, vel C, E, G, L, M & N in casu altero: quæ cum prorsus diversa sint a miscibilibus immediatis mixti soluti A & B; mixtum quoque genitum a mixto soluto prorsus diversum esse debet.

Exempli loco esse poterat nitrum, quod gignitur, si calx terræ commiscetur ac libero aëri exponitur. Calx enim est residuum quoddam ex solutione alicujus mixti & dum terræ commixtus aëri humido exponitur: nova fit solutio, unde sal quoddam alcali separatur. Accedit vero ex aëre sal quoddam acidum atque ita nova mixtione gignitur nitrum.

§. 273.

Si plura mixta simul solvuntur, sive in miscibilia mediata, sive in immediata, & miscibilia quædam diversorum mixtorum iterum miscentur; mixtum prodit a mixtis solutis diversum (§. 181. Ontol. 272. Cosm.).

Mixti generis per solutionem plurium mixtorum.

§. 274.

Organicum dicitur corpus, quod vi compositionis suæ ad peculiarem quandam actionem aptum est. Dividitur in organicum simplex, quod ex nullis aliis partibus organicis componitur, & in organicum compositum, cujus partes sunt organicæ. Subinde organicum compositum per excellentiam organicum appellari solet, & organicum etiam organon appellatur.

Organici definitio & divisio.

Habemus partes organicas in corpore nostro, ipsumque corpus organicum est. Ita venæ sunt partes organicæ, quatenus sunt tubi seu canales sanguini vehendo apti. Quodsi ergo tunica, quæ hoc modo (*Cosmologia contracta.*)

U u u u

con-

conformata sunt, spectentur ut similes, non attenditur nisi aptitudine ad vehendum sanguinem: pro corpore organico simplici seu organo simplici habentur. Ipse nimirum tunica, quatenus consideratur ut vivum corpus, nutritioni aptum, & quatenus ad peculiares quosdam motus vi suae compositionis aptus sunt, etiam corpora organica sunt. Similiter ossa sunt corpora organica, quatenus ita conformata sunt, ut peculiaribus quibusdam motibus interservire possint. Quatenus vero ossa spectantur instar extensi inflexilis & materia eorum tanquam similis respectu istorum motuum, quibus interservit, spectatur, pro corpore organico simplici habentur. Enimvero oculus corpus organicum compositum est: constat enim ex partibus organicis. Et eodem modo corpus organicum compositum est auris, maxime autem integrum corpus humanum.

§. 275.

Structurae definitio.

Compositio corporis organici dicitur *Structura*.

§. 276.

Corporis organici essentia.

Corporis organici essentia consistit in structura ejusdem (§. 275. 274. 140.).

§. 277.

Ratio eorum, quae corpori organico conveniunt.

Ratio eorum, quae corpori organico, quatenus organicum est, conveniunt, hoc est, vel actu insunt, vel inesse possunt, in structura ejus continetur (§. 276. Cosm. 168. Ontol.).

§. 278.

Ratio aptitudinis organorum ad certas actiones.

In eadem structura ratio contineri debet sufficiens, cur corpus organicum ad istiusmodi actionem aptum sit (§. 274. 277.).

§. 279.

Ratio structurae unde pateat.

Vicissim in actione, ad quam corpus organicum vi structurae suae aptum est, continetur ratio, cur partes ita potius conformandae sint, quam aliter, Et hoc potius modo conjungenda, quam alio (§. 56. Ontol.).

Ita ex circulatione sanguinis rationem reddimus, cur cor hoc potius modo constructum sit, quam alio. Praesens adeo propositio fundamentum continet translationis de usu partium, corporum scilicet naturalium

turalium organicorum, quæ non infimam Teleologiæ partem constituit. Probe autem notandum est, vi hujus propositionis subinde ex actione, cui organum destinatur, colligi posse, quale ipsum esse debeat: id quod usui esse potest in iis, quæ sensui, præsertim non armato, minus obvia sunt.

§. 280.

Si partes corporis organici a se in invicem divelluntur, vel etiam dividuntur, aut quocunque modo destruuntur; corpus organicum interit. De divulsione vid. §. 531. *Ontol.* 275 sq. *Cosm.* 541. *Ontol.* de divisione & destructione cujuscunque modi conf. §. 541. *Ont.*

Interitus corporis organici.

§. 281.

Si partes corporis organici consent ex materia mixta, & mixtio illius quomodocunque solvitur; corpus organicum interit. (§. 268. 280.).

Interitus corporis organici per solutionem mixti.

§. 282.

Corpus A coherere dicitur corpori B, si unum A moveri nequit, nisi simul moveatur & alterum: ut adeo *Cohæsis* corporum vel corpusculorum sit istiusmodi coëxistentia, vi cujus unum absque altero moveri nequit.

Cohæsis definitio.

Ita partes globi plumbei cohærent: etenim fieri nequit, ut pars una globi moveatur, nisi simul moveantur ceteræ omnes,

§. 283.

Si idem corpus A secundum contrarias directiones urgetur, nullus subsequitur motus. Quoniam scilicet vis utraque utrinque æqualis est *per hypoth.* nulla sane ratio est, cur corpus A potius versus austrum, quam versus boream tendat. Atqui vid. §. 118. *Ont.*

Virium æqualium secundum contrarias directiones agentium effectus.

§. 284.

Si idem corpus A duplici vi urgetur, motus sequitur secundum directionem fortioris seu majoris. Vis enim minor parti majoris æqualis (§. 352. *Ont.*) adeoque corpus, quod vi minore urgetur, non movetur, sed quiescit (§. 283.); adeoque perinde est ac si sola vi fortiori urgeretur (§. 728. *Ont.*).

Virium inæqualium contrariorum effectus.

§. 285.

Cohæſio cor-
porum per
preſſionem
oppositam æ-
qualem.

Si duo corpuscula vel corpora A & B immediate sese contingunt secundum contrarias directiones premuntur; corpora ista cohærent, nec nisi vi majore a se invicem separari possunt. Urgentur enim eadem vi versus se invicem, neutrum ergo loco cedere potest (§. 283.). E. cohærent (§. 282.) & posita vi eadem quiescunt (§. 283.) sed posita majore vi a se separantur (§. 284.).

Hinc Jac. Bernoullius de gravitate ætheris p. 48. & Malebranchius de inquirenda veritate L. 6. c. 9. p. 282. omnem omnino firmitatem corporum seu partium cohæſionem compressioni alicujus corporis externi tribuerunt. Sane duo hemisphæria cuprea ope antliæ pneumaticæ evacuata adeo firmiter cohærent sola vi gravitatis æris compressa, ut experimenti inventor Otto de Guericke in Experimentis novis Magdeburgicis de Vacuo spatio ad hemisphæria, quorum diameter erat $\frac{3}{4}$ ulnæ Magdeburgicæ, distrahenda equis sedecim; ad separanda vero alia, quorum diameter erat integræ ulnæ, 24, immo 30 equis opus habuerit. Simile est experimentum, quo vasa evacuata cum catino antliæ pneumaticæ firmiter cohærent. Huc etiam pertinent duo marmora polita vi æris comprimentis cohærentia. Denique eodem quoque experimento constat, quod corpora per compressionem tamdiu cohæreant, quamdiu compressio ista durat. Etenim quoniam hemisphæria vi æris ambientis comprimuntur, tamdiu durat eorum cohæſio, quamdiu in ære constituuntur. Atque adeo ex uno loco in alterum salva cohæſione transferuntur. Quamprimum vero spatio ab ære evacuato immittuntur, compressio ista tollitur, adeoque etiam cohæſio cessat, consequenter hemisphæria veluti sponte sua dilabuntur. Idem patet a priori ex §. 118. Ont.

§. 286.

An sit unica
cohæſionis
causa pressio
fluidi embien-
tis.

Quoniam ante dentur corpuscula & fluidum quoddam necesse est, quam cohæſio per illorum compressionem concipi possit (§. 285.), atomi autem materiales nullæ existunt (§. 187.); cohæſio corpusculorum per compressionem nec est prima, nec unica cohæſionis causa.

Osten-

Ostendimus in superioribus elementa rerum esse unita (§. 210.) & qualis sit eorum unio prorsus diversa ab unione corpusculorum mechanica. Atque adeo non opus est, ut primam & unicam cohaesionis causam in compressione corpusculorum queramus.

§. 287.

Corpora A & B *firmitus cohaerere* dicuntur, quam C & D, si *Firmior cohaesio* major requiratur vis ad illa a se invicem separanda, quam ad haec a se invicem divellenda requiritur. *sic quanam dicatur.*

§. 288.

Eadem corpuscula A & B firmitus cohaerent, si vi majore, Firmioris cohaesionis ratio. quam si minore comprimuntur (§. 287. 285.),

§. 289.

Si figura corpusculorum A & B impediatur, quo minus alterum B moveri possit, quin moveatur & ipsum A; corpuscula A & B Aliam cohaesionis ratio. vi figura cohaerent (§. 282. Cosm. 726. 118. Ont.).

Communis experientia loquitur cohaesionem corporum figuris eorundem tribuendam.

§. 290.

Si corpora vel corpuscula per compressionem a fluido ambiente factam cohaerent, firmitus est cohaesio, si planum contactus fuerit majus, quam ubi minus fuerit. Etenim quia corpuscula in utroque casu vi fluidi ambientis compressa cohaerent, per hypoth. fluidum ambientis nil quicquam confert ad cohaesionem, nisi quatenus sese immediate contingunt (§. 285.), cumque fluidum agat secundum directiones ad planum contactus perpendiculares (§. cit.), perinde omnino est, ac si superficies, in quam agit fluidum, esset plano contactus aequalis. Quoniam itaque major fluidi quantitas in superficiem corporis agit, si planum contactus majus est, quam si idem minus fuerit, vis autem per fluidum aequaliter diffusa concipitur; majore utique vi corpuscula A & B, quorum planum contactus majus est, comprimuntur, quam corpuscula C & D, quorum minus est contactus planum. *Firmitas cohaesionis a plano contactus pendens.*

§. 291.

Si duo corpuscula A & B vi quacunque insita vel quomodo- Cohasio per motum. Unum 3 *cunque*

cunque impressa secundum contrarias directiones urgeantur adversus se invicem; eo ipso cohererent (§. 285.).

Illustrationis loco esse possunt duo digiti, quorum unus alterum urget aequali vi.

§. 292.

Cohæsi-
o plur.
um per
motum.

Si corpuscula vi quomodocunque impressa vel insita, aut etiam vi extrinsecus applicata secundum istiusmodi directiones urgeantur, vel istiusmodi quoque sint eorum figurae, ut nullum eorum alteri cedere possit; cohererunt (§. 282.).

Exempla specialia suppeditat illa Architectura civilis pars, quæ de lapidum sectione agit. Etenim lapides isto artificio cæsi-obstetricantibus figuris sola vi gravitatis cohererent, dum fornices ex iisdem constructuntur. Atque hinc intelligitur, quid sibi velit *Leibnizius*, quando motum conspirantem dixit coherætionis causam. Etenim cum absque vi motrice nullum corpusculum concipi unquam possit, nisus continuus in eodemprehenditur. Quare si vel directiones, vel figura una cum istis impediunt mutuum motum; resultabit inde corpusculorum coheræsi-
o. Atque adeo patet coherætionem motui conspiranti tributam esse causam propositionis præsentis. Quod si vim omni corpori insitam concipias, nec aliter quietem concipere licebit, quam ea de causa, quod unum impediatur motum alterius, tum ob directiones, tum ob figuras.

§. 293.

Acti-
ones &
passiones
elementorum.

Dantur in elementis actiones & passiones (§. 133 sq. Cosm. 768. Ont. 177. 182. Cosm.).

Facile apparet, nos hic considerare actiones & passiones prout integro composito accidunt: id quod in conflictu corporum contingit.

§. 294.

Principium
activum & pas-
sivum elemen-
torum.

In elementis datur principium activum & passivum (§. 293. Cosm. 70. 866. Ont.).

§. 295.

Vix motrix
quali modo
percipitur.

Vim motricem in corpore nonnisi confuse percipimus. Quoniam in substantiis simplicibus, tanquam corporum elementis (§. 182.), datur principium activum (§. 294.) aut vis activa (§. 196.),

(§. 196.), vis activa autem sive motrix corporum ex substantiis simplicibus resultare debet (§. 180.); quæ in corporibus apparet vis non diversa est ab ea, quæ in singulis elementis inexistit. Quamobrem cum is distincte rem percipiat, qui notas, quas nobis exhibet (§. 87. *Log.*), consequenter quæ rebus intrinseca sunt, unde agnoscuntur & a se invicem discernuntur (§. 78. *Log.*), distinguere a se invicem valet; vim activam in singulis elementis, ex quibus corpus aggregatur, a se invicem distinguimus, dum vim activam seu motricem corporum percipimus. Enimvero quilibet sibimetipso attendens statim agnoscit, a se ea non distingui. E. vid. 87. *Log.* 53. *Ont.*

§. 296.

Vis motrix est phenomenon (§. 295. 225.).

Vis motrix
'cur sit phæno-
menon.

§. 297.

Vim inertie nonnisi confuse percipimus. Ostenditur id eodem prorsus modo, quo vim motricem nonnisi confuse a nobis percipi modo ostendimus (§. 295.).

Vis inertie
quomodo per-
cipiatur.

§. 298.

Vis inertie phenomenon est (§. 297. 225.).

Vis inertie
quid.

§. 299.

Phænomenon substantiatum dicitur, quod substantiæ instar apparet.

Phænomeni
substantiati
definitio.

Materia phænomenon est, est etiam phænomenon vis motrix, de ceteris tamen phænomenis recte ratiocinaturi in Physicis cum materiam (§. 168.), tum vim motricem instar substantiæ concipere debemus (§. 169.), etsi substantiale sit in solis elementis compositi, adeoque materiæ & vis motricis rationem sufficientem continentibus, sed extra spheram imaginationis constitutis, intra quam phænomena continentur. Quamobrem ut, quod veritati consentaneum est, unica notione comprehendamur & phænomena ista fundamentalia, quæ ceterorum rationes immediatas continent, a ceteris distinguamus; phænomeni substantiati appellatione utemur.

§. 300.

Materia & vis motrix sunt phænomena substantiata (§. 141. 226. Materia & vis motrix qualia.

Sunt phæno-
mena.

226. 298. 178. 299. Lege de materia; de vi motrice conf. §. 296. 178. 299.).

Vis motrix &
materia cur
substantiæ ap-
pareant.

§. 301.

Vis motrix & materia substantiæ apparere debent diversa. De vi motrice vid. §. 182. 196. *Cosm.* 776. *Ont.* 180. 147. *Cosm.* 120. *Ont.* ex quibus apparebit, eam instar substantiæ concipiendam esse. Quod vero materia quoque instar substantiæ appareat, de eo consule §. 141. 221. 220. 182.

Materia extensa est, quatenus elementa rerum materialium invicem aggregantur (§. 221.) ac ideo substantia apparet. Vis motrix in corpore apparet, quatenus elementis inest principium activum (§. 294.), & eadem substantia apparet. Quoniam itaque vis motrix concipi potest sine materia, & materia sine vi motrice, duæ substantiæ diversæ apparere debent.

CAPUT IV.

DE LEGIBUS MOTUS.

§. 302.

Regulæ motus
quænam sint.

Regulæ motus dicuntur illæ, juxta quas vismotrix in conflictu corporum modificatur.

§. 303.

Leges motus
quid sint.

Leges motus appellantur principia generalia regularum motus.

§. 304.

Corpus quies-
cens non se-
ipsum movere
possit.

Nullum corpus quiescens seipsum movere potest (§. 129. 141.).

Experientia idem confirmat. Quando enim corpus aliquod ex quiete ad motum concitatur, semper ab alio corpore impellitur.

§. 305.

Corpus quies-
cens quando
moveatur.

Si corpus quiescens moveri debet, a causa externa ad motum concitandum (§. 304. Cosm. 70. 881 sq. Ont.).

§. 306.

§. 306.

Si quod corpus movetur, ratio, cur data celeritate & secundum datam directionem moveatur, continuo extrinseca est (§. 305. 172. *Cosm.* 882 sq. 122. 544. *Ont.*). Modificationis vis motricis ratio.

§. 307.

Si ergo corporis moti celeritas, vel directio mutari debet, a causa quadam externa id fiat necesse est (§. 306.). Mutatio celeritatis & directionis.

§. 308.

Corpus semel motum ad statum quietis pervenire nequit, nisi a causa quadam externa ad quietem redigatur (§. 307.). Mobile quomodo ad quietem redigatur.

Poterat idem immediate ex principio rationis sufficientis inferri (§. 304.). Habemus quoque hic experientiam consentientem.

§. 309.

Corpus unumquodque perseverat in statu suo quiescendi vel movendi uniformiter in directum, hoc est, eadem celeritate & secundum eandem directionem, nisi a causa externa statum suum mutare cogatur (§. 304 sq. *Cosm.* 709. *Ont.* de statu quiescendi; §. 307. *Cosm.* 709. *Ont.* de statu movendi). Lex prima naturalis motus.

Hæc est prima lex naturalis motus, quam sumunt Mathematici in motuum doctrina experientia confusi. Præsens autem propositio ambitu suo complectitur præcedentes sigillatim antea demonstratas.

§. 310.

Omne mobile progreditur in linea recta, nisi quid obstat (§. 309. 150.). Motus corporum rectilineus.

Hinc veteres motum rectilinem dixere naturalem, & omne corpus naturaliter motum rectilinem affectare affirmarunt provocantes ad experientiam.

§. 311.

Mobile in vacuo eadem continuo celeritate in linea recta progreditur in infinitum. In vacuo enim nulla adest causa externa, quæ vel directionem, vel celeritatem mobilis mutare possit. Jam vide §. 309. 150. Motus in vacuo.

(*Cosmologia contracta.*)

Xxxx

§. 312.

§. 312.

Motus curvilineus.

Si mobile in linea curva incedit, duplici vi urgeatur necesse est, quarum altera in linea recta progreditur, altera vero a motu rectilineo continuo retrahitur (§. 310. 307.).

Exemplum habemus in corporibus horizontaliter projectis, v. gr. in globo ex tormento vi pulveris pyrii explosio. Etenim vi pulveris pyrii imprimatur vis, qua secundum lineam rectam continuo progredetur, donec per resistantiam aeris omnis tandem celeritas foret extincta. Enimvero vi gravitatis continuo urgetur versus centrum terræ, dum vi impressa progreditur. Atque inde est, quod lineam curvam centro suo describat, aut in linea curva incedat, quæ qualis sit a Galileo primo inventum & in Mechanicæ Elementis a nobis demonstratum. In propositione præsentem continetur fundamentum geneleos curvarum linearum, qualem jam in casibus specialibus dedere veteres, v. gr. in spiraliibus Archimedes; in genere autem Isaacus Barrovi in Lectionibus Geometricis sect. 1. Propositio præsens utilissima est, cum plures dentur in natura rerum motus curvilinei.

§. 313.

Reactionis definitio.

Reactio dicitur actio patientis in agens.

§. 314.

Datur reactio corporum.

Dum corpus A motui resistit, in corpus B, quod ipsum ad motum sollicitat, reagit (§. 727. 290. 709. 56. Ont. 314. Cosm. 713 sq. 290. 709. 56. 713. Ont. 313. Cosm.).

Reactio satis obvia est ipsi tactui in istiusmodi casibus, ubi quid quacunq; ratione movere aut premere conamur.

§. 315.

Actio & reactionis necessarius nexus.

Nulla datur in corporibus actio sine reactione (§. 713 sq. Ont. 128. 133. 129. 314. Cosm.).

Etenim absque reactione corpus quodcunque ab alio corpore moto simul abriperetur & cum eo eadem celeritate progrediretur, quemadmodum nunc accidit corporibus, quæ, dum incedimus, portamus. Immo quodcunque quicunque vi propelleretur. Atque adeo aliæ prorsus prodirent regulæ motus, consequenter phenomena rerum materialium

terialium seu mutationes corporum alias prorsus sequerentur leges, quam nunc fieri solet.

§. 316.

Corpus reagit vi inertiae (§. 314. 130.).

Reactio qua
vi fiat.

Reactio omnino actionis species est (§. 313. 314.). Dubium igitur oriri poterat ex eo, quod (§. 130.) vim inertiae vim passivam appellaverimus eandemque ad materiam retulerimus (§. 141.) & vi activa contradiſtinxerimus (§. 137.). Enimvero dubium istud protinus evanescit, ubi ad auxilium revocaveris, nos vim activam corporum, vim inertiae & extensionem non tanquam entia realia a se invicem distinguere, ex quibus invicem unitis resultat corpus, cum singula nonnisi in numerum phaenomenorum referamus (§. 226. 296. 298.), quorum fons communis sunt elementa, a quibus solis corpus substantialitatem habet (§. 177.). Utile autem est vim inertiae tanquam passivam a vi activa distinguere in phaenomenis, cum corpus unum non patiatur ab altero, nisi quatenus reagit, nec plus impendatur in actionem virum, quam corpus reagere aptum: quae ex subsequenſibus clariora evadent.

§. 317.

Actio dicitur contraria actioni alterius corporis, quae fit per contrariam directionem, seu per directionem in oppositam plagam tendentem.

Actionis contrariae definitio.

§. 318.

Reactio contraria est actioni (§. 317. 314.).

Contrarietas actionis & reactionis.

§. 319.

Vis inertiae est nifus sese exerens adversus nifum agentis (§. 142. 149. 313. 316. 315.).

Vis inertiae in quo consistat.

§. 320.

Corpus non agit in alterum, nisi dum in ipsum impingit. Evidens est, nullam adesse rationem, cur agat aliquod corpus in aliud quoddam corpus, quamdiu libere movetur, nec quicquam motui ipsius obstat. Enimvero quodsi secundum eam directionem, juxta quam movetur, obvium sibi habeat corpus aliud, quod impedit, quo minus ulterius progrediarur (§. 726.

Corpus cur non agat nisi impingens in alterum.

Xxx 2

Ontol.

Ontol.), quin adversus ipsum nitatur & ipsum loco movere conetur, ne motui amplius obstat, fieri non potest. E. (§. 133.).

§. 321.

Contactus corporum in se invicem agendum.

Corpus unum in alterum agere nequit absque mutuo eorundem contactu (§. 320.).

§. 322.

Actio in distans definitio.

Actio in distans dicitur, quæ absque corporum contactu fieri ponitur.

Ita actio magnetis in ferrum dicitur actio in distans, propterea quod is trahat ferrum procul adhuc a se remotum.

§. 223.

Impossibilitas actionis in distans.

Actio in distans impossibilis (§. 322. 321.).

§. 324.

Conflictus corporum.

Conflictus corporum dicitur eorum status, quo in se invicem agunt & reagunt.

§. 325.

Motus mutatio.

Nulla motus mutatio accidit nisi per conflictum. Conf. §. 305. *Cosm.* 642. *Ont.* 133. 129. 314. 324. *Cosm.* de eo, quod quiescens corpus instatum motus transieratur per conflictum; §. 307. 133. 315. 324. de eo, quod motus mutatio in corpore moto accidit per conflictum.

§. 326.

Mutatio corporum quomodo accidat.

Nulla in corporibus mutatio accidere potest nisi per conflictum (§. 128. 325.).

§. 327.

Contactus ad conflictum necessarius.

Nullus datur conflictus corporum sine impactu unius in alterum, seu absque mutuo eorundem contactu (§. 324. 320. 321.).

§. 328.

Incurtus corporis unius in alterum.

Corpus unum incurtere dicitur in alterum, si vel in quiescens, vel motum ad eandem partem impingit.

§. 329.

Corpus unum dicitur *occurrere alteri*, si ambo moveantur in partes contrarias, & in se invicem impingant. Occursus corporum.

§. 330.

Corpus unum *impingit* in alterum *directe*, si linea directionis impingentis transit per centrum gravitatis alterius, in quod impingit, aut, si mavis, ubi fuerit ad planum contactus perpendicularis. Impactus directus.

Quid sit centrum gravitatis ex Staticis patet. Est nempe punctum, per quod corpus dividitur in duas partes æquiponderantes, quarum scilicet neutra alteram movet (§. 122 *Mech.*). Hoc punctum in motu corporum gravium semper pro toto corpore substituere licet (§. 125. *Mech.*), modo retineat eum situm, quem in situ corporis obtinet. Enimvero ne quis existimet, definitionem ad sola gravia restringi, alteram definitionem adjicere libuit, quam priori æquipollere ex iis ipsis colligitur, quæ modo de centro gravitatis annotavimus.

§. 331.

Corpus unum in alterum *indirecte impingit*, si linea directionis impingentis transit equidem per corpus, in quod impingit, sed non per centrum gravitatis, aut, si mavis, ubi fuerit ad planum contactus obliqua. Brevius dici potest: *Indirecte impingit*, quod non impingit directe. Impactus indirectus.

§. 332.

Si corpus unum in alterum incurrens directe impingit; *directe incurere* dicitur: si oblique vel indirecte, *indirecte* vel *oblique*. Incurtus directus & indirectus.

§. 333.

Si corpora in se invicem directe impingunt, dum sibi mutuo occurrunt; *directe* sibi mutuo *occurrere* dicuntur; si oblique vel indirecte, *oblique* vel *indirecte*. Occursus directus & indirectus.

§. 334.

Si *conflictus corporum* oritur, aut corpus unum in alterum *incurrit*, aut duo corpora sibi mutuo *occurrunt*, vel directe, vel indirecte (§. 324. 320. 328-333.). Conflictus causalis.

§. 335.

Corpus quando impellatur.

Corpus unum *impellere* dicitur alterum, si ita movet, ut ipsum libere progrediatur, sive illud post conflictum quiescat, sive moveri pergat.

§. 336.

Progressus quid sit.

Progredi dicitur corpus, si motum in linea sive recta, sive curva (uti planetæ in orbitis suis circa solem) ita continuet, ut a termino, unde motus inchoatur, seu in quo tempore dato hæret, continuo longius distet.

§. 337.

Retrogradatio quid sit.

Corpus dicitur *retrogradi*, si vel in linea recta, vel in linea curva ita movetur, ut, cum antea distantia a termino dato continuo crescerent, seu majores fierent, nunc eadem iterum decrescant, seu continuo minores evadant.

Obtinet hic casus in motu planetarum primariorum, qui nonnunquam retrogradi spectantur.

§. 338.

Corpus quando trahatur.

Corpus *trudere* dicimur, si continua actione moventis moveatur cum eodem eadem celeritate versus eandem partem, ita tamen ut mobile præcedat movens.

§. 339.

Corpus quando trahatur.

Corpus *trahere* dicimur, si continua actione moventis movetur cum eodem eadem celeritate versus eandem partem, ita tamen ut mobile sequatur, movens præcedat.

§. 340.

Conflictus in trusione & tractione.

Si corpus unum *trudit* vel *trahit* alterum, continuus est *trudentis* & *ejus*, quod *truditur* (§. 338. 315. 324), itemque *trahentis* & *ejus*, quod *trahitur*, *conflictus*, quamdiu motus durat (§. 339. 315. 324.).

§. 341.

Virium æqualium secundum contrarias directiones effectus.

Si duo corpora *A* & *B* æquali vi adversus se invicem secundum contrarias directiones nitantur, neutrum eorum movetur (§. 118. Ontol.).

Idem experiri datur, si digitos duos adversus se invicem vi quacunque premas: ambo enim juxta se invicem quiescunt, quacunque vi adversus se

se invicem nitantur. Pertinet huc etiam libra æqualibus ponderibus utrinque in lancibus depositis onerata.

§. 342.

Si duo corpora vi inæquali adversus se invicem secundum contrarias directiones nitantur, motus sequitur secundum directionem fortioris seu majoris (§. 352. Ontol. 341. Cosm.).

Virium inæqualium contrariorum effectus.

§. 343.

Corpus eodem vi agit in alterum, qua hoc ipsi resistit (§. 118. Ontol.). Quando igitur nulla amplius resistantia est, ratio cur agat tollitur, adeoque & actio cessare debet (§. 118. Ontol.). Enimvero cum corpus vi inertie resistat (§. 132.), vis autem inertie consistat in nisu adversus nisum agentis sese exerente (§. 319.); resistantia tolli nequit, nisi quatenus uterque nisus æqualis est (§. 341.).

Vis in actionem impendenda.

§. 344.

Quodsi ergo corpus A majore vi nitatur adversus B, quam qua B ipsi resistit; excessus virium in motum impenditur (§. 342.).

Nisus in motum impendens.

Equus partem virium, quibus trahit currum, in actionem impendit, qua resistantiam ejus vincit, residuam autem earum partem impendit incessui.

§. 345.

Et, si corpus A minore vi nitatur adversus alterum B, quam hoc resistere valet, cum tota nonnisi parti resistantiæ vincendæ sufficiat (§. 341.); motus subsequetur nullus.

Quando resistantia invincibilis.

§. 346.

Actioni corporis unius æqualis est reactio alterius. Corpus enim reagit in alterum vi inertie (§. 316.), consequenter nititur adversum nisum agentis (§. 319.). Quare cum uterque nisus æqualis sit (§. 343.) & actio atque reactio eodem tempore fiant (§. 316. 319.), eodem autem tempore viribus iisdem (§. 733. Ontol.); adeoque æqualibus (§. 349. 737. Ontol.), æquales actiones producantur; actio utique & reactio æquales esse debent.

Æqualitas actionis & reactionis.

§. 247.

Conflitus effectus immediatus.

Dum corpus unum in alterum incurrit, vel duo sibi invicem occurrunt, unum alterum durante conflitu in eodem loco detinet. Vid. de incurfu §. 328. 320. 315 sq. 319. Enimvero dum corpus B adversus alterum A secundum directionem AC nititur, impossibile est, ut secundum directionem AD corpori A cedat, cum nemo non intelligat, fieri non posse ut uno eodemque tempore secundum directiones contrarias moveatur idem corpus B. Necessse igitur est, ut corpus utrumque B & A in eodem spatio hæreat, consequenter corpus unum detineat alterum in eodem loco, donec actio & reactio, consequenter conflitus fuerit absolutus (§. 324.). De occurfu vide §. 329. 320. cetera ex antecedentibus patent.

§. 348.

Actionis & reactionis æqualitas in conflitu corporum libere motorum. Passionum indentitas und e.

In conflitu corporum sibi mutuo occurrentium, vel quorum unum in alterum incurrit, actio constanter æqualis est reactioni (§. 347. 341. 316. 319. Cosm. 733 Ont.).

§. 349.

Si actiones eadem sunt, passiones quoque subjectis in iisdem eadem esse debent. Quoniam enim ratio passionis continetur extra subjectum patiens (§. 714. Ontol.), B autem in A agit, si A ab ipso B patitur (§. 775. Ontol.); ratio illa alia esse nequit quam actio agentis (§. 713. Ont.). Si igitur actiones eadem sunt, eadem in duobus vel pluribus subjectis iisdem ponitur ratio sufficiens passionum. E. (§. 189. Ont.).

§. 350.

Passiones mutue corporum in conflitu.

Si corpus aliquod in alterum impingens motum ejus vi sua quomodocunque mutaverit; idem quoque vicissim in motu proprio eandem mutationem in partem contrariam vi alterius subibit. Et enim si corpus aliquod in alterum impingit, vel eidem occurrat (§. 329.), vel in idem incurrit (§. 328.), consequenter actio & reactio æquales sunt (§. 348.), seu actiones mutue eorundem in se invicem eadem sunt (§. 350. Ont.), neque enim actiones hic consideramus alio respectu tanquam easdem, nisi quatenus quantitate eadem sunt. Enimvero si actiones eadem sunt, etiam passiones

siones eandem esse debent (§. 349.). Quamobrem passiones corporum, quorum unum impingit in alterum, eandem sunt. Sunt vero passiones mutationes motus in istis corporibus (§. 714. Ont.) & mutatio in corpore impingente ob directionem contrariam reagentis fit in partem contrariam (§. 318.). Ergo.

§. 351.

Corpus dicitur *descendere*, si, dum movetur, ad Tellurem, vel aliud corpus mundi totale continuo accedit propius. Descensus definitio.

Studio dicimus, corpus descendens propius accedere ad tellurem, non vero quod præcise ad centrum illius accedat, quia appropinquatio continua ad centrum telluris difficiliter demonstratur, quam ejus ad tellurem accessus, consequenter definitionis applicatio præter necessitatem longe difficillima redderetur.

§. 352.

Corpus *ascendere* dicitur, si, dum movetur, a Tellure continuo magis magisque recedit, vel etiam ab alio quocunque corpore mundi totali continuo distantia ejus augetur. Conf. §. 351. monita. Ascensus definitio.

§. 353.

Gyrari sive *rotari* dicitur corpus, si circa lineam quiescentem ita movetur, ut quodlibet punctum extra eam assumptum circuli peripheriam describat. *Motus rotationis* in corporibus dicitur etiam *motus vertiginis*, non autem in planis aut superficiebus atque lineis. Motus rotationis definitio.

§. 354.

Corpus rotundum dicitur *volutari*, si, dum progreditur, simul rotatur. Volutionis definitio.

Motus adeo volutionis duplicem motum involvit, nempe progressivum & rotationis. Exemplum habemus in globo, qui, ubi projectus terram contingit, vel per planum inclinatum descendit, volutatur.

(Cosmologia contracta.)

Yy yy

§. 355.

§. 355.

Vestionis de-
finitio.

Vebi dicitur corpus A corpore B, si ad motum B move-
tur, quia ipsi vel inclusum, vel affixum est, vel quomocun-
que adheret.

Ita homo vehitur navi vel curru, in quo sedet.

§. 356.

Vis mortuæ
definitio.

Vis dicitur *mortua*, quæ in solo conatu ad motum subfi-
sit. Dicitur etiam *elementaris*.

Istiusmodi vis mortua est gravitas, quamdiu grave ex filo suspensum
descendere nititur, descendere tamen actu nequit.

§. 357.

Vis vivæ defi-
nitio.

Vis viva dicitur, quæ cum motu locali conjuncta & ad mo-
tum localem porro producendum tendit.

Istiusmodi vis viva est in gravi cadente, ubi jam aliquem celeritatis
gradum acquisivit.

§. 358.

Vis primitivæ
definitio.

Vis primitiva est, quæ omni corpori per se inest, seu
cujus non alia datur ratio, præterquam in elementis.

§. 359.

Cognitio vis
primitivæ un-
de pendeat.

Quamdiu itaque *elementorum determinationes intrinsecæ*,
seu *genericæ & specificæ* ignorantur; *tamdiu vis primitiva intelli-*
gibili modo explicari nequit (§. 358. *Cosm.* 122. §6. *Ont.*).

§. 360.

Vis primitiva
quid proprie
sit.

Quoniam vis activa corporis sive motrix instar substantiæ
concipi debet (§. 169.), ut talis non sit, sed saltem appareat
(§. 178.); substantia vero est subiectum perdurabile & modi-
ficabile (§. 768. *Ont.*); *vis primitiva utique est istud subiectum per-*
durabile & modificabile, præcis modificationibus actualibus spe-
ctatum, consequenter *vis* dicitur *primitiva*, quatenus substantia-
litas eidem tribuitur, seu tales tribuuntur *determinationes con-*
stantes, ob quas *modificationis capax*, nempe per celeritatem (§.
153.) & *directionem* (§. 165.).

§. 361.

In reddendis rationibus phaenomenorum specialium, seu rerum sensibilium, non recurrendum est ad vim primitivam. Cum enim per rationem sufficientem intelligatur, cur quid potius sit, quam non sit (§. 56. *Ontol.*); vis primitiva rationem sufficientem phaenomenorum specialium, seu rerum sensibilium minime continet, quod in dato quolibet casu speciali manifestum est. E.

An per vim primitivam ratio reddi possit phaenomenorum,

Per rationes nimirum remotas, quæ causis remotis insunt, nonnisi phaenomena generalia explicantur, & quo rationes sunt remotiores, eo quoque phaenomena sunt generaliora, quæ per ipsas explicari possunt.

§. 362.

Vis derivativa est, quæ per modificationem vis primitivæ resultat. Vis derivativæ definitio.

Nimirum hic spectamus vim motricem, quatenus actu modificata est, cum vis primitiva spectetur ut modificabilis. Vires adeo derivativæ sunt, quæ a gravibus cadendo acquiruntur, itemque vis derivativa est; quæ a pulvere pyrio globo ex tormento explodendo imprimatur. Ratio denominandi, desumpta esse videtur ab eo, quod apparet. Etenim si globus unus in alterum incurrit, unus aliquam vis suæ partem amittit, sed e contrario alter partem aliquam acquirit. Unde vulgus sibi imaginatur, motum, quem cum vi motrice confundit, ex uno subiecto migrare in alterum. Vis adeo corpori uni derivatur a corpore altero. Enimvero denominatio etiam cum rei veritate consistere potest, cum eatenus vis a corpore altero in conflictu acquisita dici possit a vi alterius corporis derivata, quatenus in vi corporis incurrentis continetur ratio, cur vim quandam acquirat corpus alterum antea quiescens.

§. 363.

Vis derivativa per corporum inter se conflictus resultat. Vis derivativa Etenim vis derivativa per modificationem vis primitivæ resultat unde derivatur. (§. 362.), consequenter dum ejus celeritas (§. 153.), aut directio variatur (§. 165.), adeoque motus corporis determinatur (§. 172.). Quoniam itaque motus mutatio nulla accidere potest nisi per

Y y y y 2 con-

conflictum (§. 325.); vis derivativa per corporum inter se conflictus resultat.

§. 364.

Quomodo vis derivativa determinetur. *Vis derivativa resultat per limitationem vis primitivæ (§. 362. Cosm. 830. Ont.).*

§. 365.

Quomodo explicetur. *Vires derivativæ intelligibili modo explicantur per regulas motus (§. 362.). Vires ergo derivativæ intelligibili modo explicantur, ubi rationem modificationis earundem dederis (§. 56. Ont.). Quare cum vis motrix in conflictu corporum, per quem vis derivativa resultat (§. 363.), juxta regulas motus modificetur (§. 362.; per eas intelligitur, cur vis primitiva in dato casu ita potius modificetur, quam aliter, consequenter ratio modificationis per eas redditur (§. 56. Ont.).*

§. 366.

Celeritatis diffusio in motu rectilineo. *Si corpus in linea recta movetur, tota ejus massa seu partes omnes eadem celeritate moventur. Pater enim omnem materiam, quæ cum corpore movetur, adeoque totam ejus massam (§. 6. Mech.), eodem tempore per idem spatium transferri (§. 668. Ont.).*

§. 367.

Celeritas corporis recti. *Corpus, quod vehitur, & alterum, a quo vehitur, in motu rectilineo eadem celeritate moventur (§. 366. 355. Cosm. 341. Ont.).*

§. 368.

Corporis trahi vel trahi celeritas. *Corpus trahens & quod trahitur, trahens & quod trahitur, eadem celeritate moveri debent (§. 366. 338 seq. Cosm. 341. Ont.).*

§. 369.

Num vehens agit in id, quod vehitur. *Si corpus vehitur, alterum, a quo vehitur, in ipsum non agit (§. 355. Cosm. 5670. 713. Ont.).*

In exemplis veritas propositionis obvia est, hoc est, ipsa claritate sua assensum elicit.

§. 370.

Corpus, quod vehitur, resistantiam ejus, a quo vehitur, Resistentia corporis, quod vehitur alterum, qualis sit.
auget (§. 355. 129. Cosm. 426. Ont.).

Videmus enim currum onustum difficilius trahi, quam vacuum, & equos currum trahentes celerius incedere, si fuerit parum onustus, quam ubi ingens onus eidem incumbit.

§. 371.

Si corpus A a corpore B vehitur, & C in B agit; idem C Actio moven-
in A nonnisi mediante corpore B agit (§. 370. 130. Cosm. 758. Ont.) tis in corpus, quod vehitur.
 316. 318. 345. 132. Cosm.).

Dum equus currum trahit, currus eidem vi inertiae sibi propria resistit, atque eatenus equus in currum agit, quatenus reactionem currus, seu resistantiam ejus superare tenetur, antequam progredi possit, nec incessui amplius quid obstat. Jam si ponamus onus sexcentarum librarum curru impositum esse; hoc tota vi gravitatis currum premit: & vi hujus actionis ob contrariam pressionem currus, qua pressionem oneris resistit, ne frangatur, vis inertiae currus augetur, ita ut perinde sit ac si vis ponderi sexcentarum librarum aequalis ipsi curru inesset. Equus igitur in currum majore vi agit, quam antea, ubi onus istud impositum ei nondum erat, dum non modo resistantiam, quae curru per se inest, verum etiam alteram, quae a pondere imposito venit, superare tenetur. Equus adeo in currum agit & nonnisi mediante curru in onus eidem impositum.

§. 372.

Dum vehimur, nullam actionem corporis alterius in nos Cur actionem
percipimus, consequenter motus illius nobis conscius non sumus, nisi moven-
tis non
percipiamus,
dum vehimur.
eundem aliunde percipiamus (§. 371. 369.).

Hæc propositio ideo probe notanda est, ne in Physica & Astronomia motus vertiginis & translationis Telluris circa Solem nobis negotium facessat, quod illius motus nobis conscius non sit. Neque vero negotium fuisse debet, quod, dum curru vehimur, motum percipiamus. Quodsi enim attentione utamur, haud difficulter perspiciemus, nos nec actionem equorum in currum, nec motum inde pendentem percipere, sed potius actionem currus in corpus nostrum, quæ ab agitatione ejus ob viæ asperitatem pendet. In motu igitur Telluris cir-

Yyyy 3

ca

ca axem cessat illa ratio : unde non mirum, quod eum prorsus non percipiamus.

§. 373.

Motus corporis, quod vehitur, quando cesset. *Quamprimum motus corporis B, quo vehitur corpus A, cessat; motus etiam corporis A, quod vehitur, cessare debet (§. 355. Cosm. 118. Ont.).*

§. 374.

Vis corporis, quod trahitur, vel truditur, qualis. *Si corpus trahitur vel truditur, vis in eodem genita viva non est, sed mortua (§. 338 sq. Cosmol. 56. 118. Ontol. 357. 356. Cosmol.).*

§. 375.

Vis corporis, vincti ab eo, qui trahitur vel truditur. *Si corpus vehitur a corpore, quod trahitur, vel truditur; vis in eodem genita non nisi mortua est (§. 373. 357. 356.).*

§. 376.

Vis corporum, quæ trahuntur, truduntur, vehuntur, quomodo se exerat. *Ideo quoque vis corporis, quod trahitur, vel truditur, quodque a corpore tali vehitur (§. 375.), in solo conatu ad motum subsistit (§. 356.).*

§. 377.

Vis viva quando non gignatur. *Si cessante actione moventis motus corporis cessat, vis viva nulla in eodem genita (§. 357. 309.).*

§. 378.

Vis viva quando gignatur. *Si cessante actione moventis motus corporis continuatur, vis viva in eodem genita (§. 357.).*

Actio pulveris pyrii in globum tormentarium cessat, quamprimum is ex tormento exploditur. Quare cum libere posthac per aërem moveatur, vis eidem ingenerata viva est.

§. 379.

Qualis vis generetur in conspectu corporum sibi mutuo occurrentium vel quorum unum in alterum incurrit. *Si corpus unum in alterum incurrit, vel duo corpora sibi mutuo occurrunt, vires per conspectum in corporibus genitæ vivæ sunt (§. 324. 378.).*

§. 380.

Corporis elastici definitio. *Corpus dicitur elasticum, quod ictu vel alia quacunque ratione compressum cessante ictu vel actione comprimentis in statum*

statum pristinum restituitur. Unde per vim elasticam nisum illud intelligimus, quo compressa a vi comprimente liberata in statum pristinum restituuntur.

§. 381.

Si corpus unum in alterum directe incurrit, nec motus ejus extinguitur in conflictu corporum, celeritas per ea ita distribuitur, ut utrumque eandem celeritatem & motum secundum eandem directionem acquirat. Etenim dum corpus unum in alterum incurrit, unum alterum durante conflictu in eodem loco detinet (§. 347.), ut adeo quasi coherere videantur (§. 285.). Quare cum corpus B, in quod incurrit A, vel quiescat, vel segnius moveatur, adeoque secundum directionem eandem (§. 328.), consequenter directioni incurrentis nil sit contrarium; tanquam corpus unum simul secundum eandem directionem progredi debent. Celeritas igitur per utrumque corpus ita distribuenda, ut utrumque eandem acquirat (§. 366.).

Effectus corporis in alterum incurrentis.

§. 382.

Corpus non elasticum in conflictu nullam motus patitur mutationem, nisi quæ ex actione & reactione oritur. Etenim si corpus non est elasticum, figura ipsius in conflictu vel non mutatur, vel, si mutatur, non rursus restituitur (§. 383.). Nulla igitur adest ratio, cur motus ex actione & reactione in conflictu resultans (§. 324.), ulterius immutari debeat (§. 56. Ontol.).

Mutatio motus in corporibus non elasticis unde nani sit.

§. 383.

Corpus perfecte durum est, quod ab ictu figuram non mutat. Dicemus idem brevitatis gratia durum simpliciter.

Corporis perfecte duri definitio.

An dentur corpora perfecte dura in rerum natura, jam non disquirimus.

§. 384.

Corpus molle dicitur, quod ab ictu figuram mutat, sed vi propria in eandem non rursus restituitur.

Corporis molli definitio.

§. 385.

Corpus perfecte durum atque molle elasticum non est, consequenter

Principium sequens motus corpo-

ram durorum & mollium. sequenter in conflictu non aliam patitur motus mutationem, quam quæ ex actione & reactione oritur (§. 383 sq. 380.).

§. 386.

Celeritatis mutatio in corporibus duris, quorum unum in alterum quiescens incurrit.

Si corpus aliquod A in alterum B quiescens directe incurrat, quorum utrumque elasticum non est, celeritas per conflictum in utroque resultans est ad celeritatem incurrentis in ratione massæ incurrentis ad massam utriusque simul.

§. 387.

Celeritatis mutatio in corporibus duris, quorum unum incurrit in alterum segnius motum.

Si corpus A in alterum B tardius motum directe incurrat, quorum utrumque elasticum non est, celeritas communis post conflictum prodit, excessu celeritatis incurrentis supra celeritatem alterius, in quod incurrit, in ratione aggregati massarum utriusque corporis ad massam incurrentis diviso & quoto celeritati tardius moti adjecto.

§. 388.

Motus corporis incurrentis quando extinguitur.

Si massa corporis quiescentis plurimum superet massam incurrentis, nec celeritatis ingens admodum sit gradus; motus corporis incurrentis per conflictum extinguitur, vel si celeritas corporis non elastici incurrentis in quiescens dividatur in ratione massarum utriusque corporis ad massam incurrentis & celeritas prodeat contemptibilis parvitat, motus incurrentis extinguitur.

§. 389.

Motus incurrentis per conflictum extinguitur.

Si vis inertia corporis quiescentis superat vim corporis incurrentis motus nullus subsequitur & motus incurrentis non elastici extinguitur (§. 739. Ont. 129 sq. 343. Cosm.). Quare cum vis resistentis major vi incurrentis, per hypoth. corpus incurrens A resistentiam alterius B infringere, consequenter loco movere nequit. Et cum non sit elasticum (§. 380.); motus incurrentis cessare debet.

§. 390.

Motuum contrarietatem effectus.

Si corpus idem secundum oppositas directiones moveri debet, quiescit. Quoniam ratio nulla est, cur potius secundum directionem AB, quam AC progrediarur per hypoth. absque ratione

tione autem sufficiente nihil fieri possit (§. 70. *Ontol.*); neque secundum directionem AB, neque secundum oppositam AC movebitur. E. in loco suo manet (§. 642. *Ont.*).

§. 391.

Celeritates adeo in conflictu secundum contrarias directiones in eodem mobili se mutuo destrunt (§. 390.).

Celeritates quando extinguntur.

§. 392.

Si duo corpora non elastica aequalia A & B aequali celeritate lata sibi mutuo directe occurrunt; post conflictum ambo quiescunt (§. 391.).

Conflictus corporum non elasticorum aequalium & eadem celeritate istorum in occursum.

§. 393.

Si duo corpora inaequalia non elastica A & B diversa celeritate lata sibi invicem occurrant, celeritas utriusque distribuitur in ratione aggregati massarum ad massam sui & differentia celeritatum resultantium est celeritas communis post conflictum, moventur autem secundum directionem ejus corporis, ex cujus motu in conflictu major celeritas resultat.

Celeritatis mutatio in corporibus duris sibi mutuo occurrentibus.

§. 394.

Corpus in motu actuali *Impetus* habere dicitur, quatenus massa ipsius, sive materia cohaerens dato celeritatis gradu sit moveretur. Hinc *major* dicitur *Impetus* ejusdem mobilis, quando majore celeritate movetur; *minor* autem, si idem minore celeritate fertur.

Impetus quid sit.

§. 395.

Quoniam celeritas per singulas corporis moleculas aequaliter distribuitur (§. 366.); *Impetus aestimatur per factum ex massa in celeritatem. Unde duorum corporum impetus sunt in ratione composita massarum & celeritatum, quibus moventur (§. 159. Aritbm.).*

Impetus motus.

Ponamus e. gr. corpus A esse trium, B vero quatuor librarum; celeritatem vero illius esse ad celeritatem hujus ut 5 ad 2. Erit impetus ipsius A ad impetum ipsius B ut 15 ad 8.

§. 396.

Corpora inaequalia eundem impetum habent, si celeritates fuerint massis reciproce proportionales (§. 299. Aritbm. 395. Cosm.).
(*Cosmologia contracta.*)

Aequalitas impetus in corporibus inaequalibus.

Z z z z

Movet

Moveatur e. gr. corpus A 5 librarum quatuor & corpus B 10 librarum duobus celeritatis gradibus. Erunt massæ ut 5 ad 10, celeritates ut 4 ad 2, hoc est, massæ sunt ut 1 ad 2, celeritates vero ut 2 ad 1 (§. 181. *Arithm.*), consequenter celeritates massis reciproce proportionales. Est vero impetus corporis A ut 20; impetus corporis B itidem ut 20, adeoque impetus corporum A & B æquales sunt. Patet itaque fieri posse, ut corporum inæqualium impetus sint æquales.

§. 397.

Impetus corporis minoris quando superet majorem.

Corporis minoris impetus major est quam majoris, si celeritates majorem rationem habuerint quam massæ reciproce sumtæ.

E. gr. Moveatur corpus A duarum librarum novem, corpus vero B 3 librarum quatuor celeritatis gradibus: erit corpus A minus corpore B & ratio celeritatum 9 ad 4 major ratione reciproca massarum 3 ad 2, cum 9 contineat 4 bis & præterea quartam partem, 3 vero contineat 2 semel cum parte dimidia. Est vero impetus corporis A ut 18 & impetus corporis B ut 12, consequenter impetus corporis minoris A major impetu corporis majoris B.

§. 398.

Motus & motionis Quantitas.

Quoniam omnes corporis in linea recta moti partes eadem celeritate moventur (§. 366.); *Quantitas motus* (momentanea scilicet, quæ in instanti corpori inest) dici solet, quod producitur massa in celeritatem ducta. *Leibnitius* in actis Eruditorum A. 1695. p. 148. *Quantitatem motionis* appellat & cum motus in tempore existat, *Quantitatem motus* æstimat ex quantitate motus ad tempus applicata, hoc est, ex facto, quod prodit massa per celeritatem multiplicata, per tempus ulterius multiplicato.

§. 399.

Impetus mensura.

Quantitas motus instantanea, seu quantitas motionis est mensura impetus (§. 395. 398).

§. 400.

Impetus in corpori unius in alterum incursum quomodo mutetur.

Si corpus unum A in alterum B incurrit, summa impetuum in utroque corpore ante & post conflictum eadem.

§. 401.

Impetus mutatio in occursum corporum.

Si duo corpora non elastica sibi mutuo directe occurrunt; erit post conflictum impetuum in utroque corpore summa æqualis differentiæ eorundem ante conflictum. Quoniam eadem celeritate moventur

ventur & æqualia sunt *per hypoth.* impetus eorum æquales sunt (§. 395.), adeoque eorum differentia nulla. Enimvero post conflictum corpus utrumque quiescit (§. 392.), adeoque nullus in utroque impetus est (§. 395.), consequenter & summa impetuum nulla. Differentia igitur impetuum ante conflictum & summa eorum post eundem æquales sunt.

§. 402.

In occurſu corporum non elasticorum quantitas motus minuitur. Etenim quantitas motuum in utroque corpore post conflictum est æqualis differentie motuum ante eundem (§. 401. 398.). Cum itaque quantitas motus post conflictum minor sit quam ante eundem (§. 64. *Arithm.*); quantitas motus in occurſu corporum non elasticorum minuitur.

Quantitas motus per conflictum imminuta.

Si corpora æqualia eadem celeritate lata sibi invicem occurrunt, post conflictum quiescunt (§. 392.). Motus igitur adeo minuitur, ut post conflictum prorsus extinguatur. Ex his adeo manifestum est, falli *Cartesium* asserentem, quod in conflictu semper conservetur eadem motus quantitas.

§. 403.

Si corpus non elasticum in aliud non elasticum incurrit; quantitas motus in conflictu conservatur (§. 400. 399.).

Quantitas motus in conflictu conservata.

Patet adeo principium *Cartesianum* de conservata in conflictu eadem motus quantitate non semper fallere; sed sapissime experimento comprobari.

§. 404.

Si inæqualium majus A ducatur in majus C & minus B in minus c; facta vero dividantur per idem: quotus ex divisione B in c emergens minor est quotu, qui emergit ex divisione A in C.

Lemmas.

§. 405.

In conflictu corporum non elasticorum, quorum unum in alterum incurrit, motus corporis tardius moti acceleratur; celerius autem moti retardatur. Si vero sibi mutuo occurrunt, celerius moti retardatur, quando massa tardius moti minor est massa celerius moti.

Motus mutatio in conflictu corporum non elasticorum.

§. 406.

Si duo corpora A & B non elastica diversa celeritate lata sibi mutuo

Motus mutatio in conflictu

Z z z z 2

corporum sibi
mutuo occur-
rentium.

mutuo occurrant, sitque massa tardius moti B minor massa celerius moti A; motus illius per consilium pro diversa celeritatum ratione accelerari & retardari potest. Acceleratur scilicet, si celeritates fuerint in ratione maiore quam aggregatum ex massa maiore & dupla minore ad maiorem; retardatur vero, si celeritates rationem minorem habuerint, quam illud aggregatum ad massam maiorem.

§. 407.

Motus in utro-
que corpore
per occursum
retardatus.

*Si in occursum corporum non elasticorum majus moveatur tardius, minus vero celerius; motus corporis utriusque per consilium semper retardatur, si ratio massarum reciproca major fuerit ratio-
ne celeritatum.*

§. 408.

Motus in oc-
cursu corpo-
rum nunc re-
tardatus, nunc
acceleratus.

Si in consilio corporum non elasticorum majus moveatur tardius, minus vero celerius; motus corporis celerius moti semper retardatur, si celeritatum ratio major fuerit reciproca massarum, alio quod tardius movetur, ejus motus pro diversa celeritatum ratione & acceleratur, & retardatur: acceleratur scilicet, si in specie ratio celeritatum major fuerit ea, quam habet aggregatum ex massa minoris & dupla massa maioris ad massam minoris; retardatur vero, si ratio celeritatum hac altera minor fuerit.

§. 409.

Observatio.

Vis elastica major est, si corpus magis comprimitur. Patet per exempla eunti.

Quæ hæcenus tradidimus principia, demonstrandis regulis corporum non elasticorum abunde sufficiunt: restat igitur ut superaddamus, quæ ad demonstrandas regulas motus corporum elasticorum porro requiruntur.

§. 410.

Observatio
alia.

Corpus, quod comprimi potest, vi majore magis comprimitur, quam minore.

§. 411.

Ratio elastici-
tatis maio-
ris.

Vis elastica major est, si corpus vi majore comprimitur, quam si comprimitur minore (§. 410. 409.).

§. 412.

§. 412.

Elaster est æqualis vi comprimenti (§. 380. 410. 341.).

Ita æris elasticitas æquatur ponderi, quod ille sustinet, dum comprimitur. Et hoc modo elasticitas ad mensuram revocari potest.

Quantitas elateris.

§. 413.

Quoniam adeo vi comprimente aucta elasticitas augetur, quamdiu corpus comprimi potest; *corporis elastici vis per actionem corporis comprimentis determinatur.*

Modus determinandi quantitatem elateris.

§. 414.

In conflictu corporum elasticorum elasticitas determinatur per ictum (§. 380. 413.).

Elasticitas unde in conflictu determinatur.

§. 415.

Si duo corpora elastica sibi mutuo occurrunt, vel unum in alterum incurrit; vis elastica utrique eadem acquiritur (§. 414. 346. 412.).

Elasticitas ex conflictu duobus corporibus acquisita.

§. 416.

Si corpus elasticum A in aliud elasticum B incurrat; motus ex ictu acquisitus in corpore B acceleratur, in corpore autem A retardatur (§. 380. 391.).

Motus per elaterem modificatio in iurcussu corporis unius in alterorum.

§. 417.

Quoniam per se patet, vi elastica majore ejusdem corporis motum magis accelerari, vel retardari debere; vis autem elastica per ictum seu percussionem determinatur (§. 414.); in conflictu corporum si corpus A in alterum B incurrit, motus ipsius B magis acceleratur, incurrentis autem A motus magis retardatur, si percussio major sit, quam si minor fuerit.

Unde pendet diversitas modificationis motus ob elasticitatem.

§. 418.

Si A & B sibi mutuo occurrunt, vi elastica motus ex percussione resultans acceleratur in eo corpore, ex cuius motu in conflictu minor celeritas resultat, dum ea, quæ ante eundem ipsi conveniebat, per utrumque distribuitur; motus autem alterius retardatur.

Modificatio motus per vim elasticam in occurssu corporum.

§. 419.

Vis elastica, quæ in conflictu corporibus elasticis acquiritur, æquatur vi percussione (§. 412. 414. 34.).

Vis elastice per conflictum acquisitæ quantitas.

§. 420.

Identitas vi-
rium.

Si duo globi æqualis ponderis eadem celeritate moventur, vis utriusque eodem est (§. 181. Ont.).

Propositio præsens & evidentiæ rationis, & claritate notionis nititur, ita ut & sine probatione admittatur in Dynamicis, & in notionum communium numero sit, vi quarum pondera æqualia seu corpora ejusdem ponderis eadem celeritate mota ad præstandum aliquem effectum sibi invicem substituuntur.

§. 421.

Ratio virium
in corporibus
eadem celeri-
tate latet.

Si globus dupli ponderis, vel tripli, vel quadrupli &c. in infinitum, aut etiam subduplus, subtriplus, subquadruplus &c. in infinitum eadem celeritate moventur; vis dupla, vel tripla, vel quadrupla &c. in infinitum, aut subdupla, subtripla, subquadrupla &c. in infinitum ejus corporis est, quod cum idem habeat pondus, non tamen nisi celeritate simpla movetur.

§. 422.

Virium inæ-
qualitas in ce-
leritate ead-
dem.

Si duo globi inæquales eadem celeritate moventur; vis majoris major est, minoris vero minor (§. 341. 352. Ontol. § 20. Cosm.).

§. 423.

Vis corporis
quando ma-
or.

Si idem globus majore celeritate movetur, vis ejus major est, quam si minore movetur (§. 352. Ont. 420. Cosm.).

§. 424.

Vis quomodo
intendatur &
remittatur.

E. vis corporis efficitur major, si motus ejus acceleratur; minor, si retardatur: eidem vero corpori eadem vis acquiritur, quam alias habuerat, ubi eadem celeritate movetur, qua alias movebatur (§. 420. 423.).

§. 425.

Inæqualitas
virium in cor-
poribus æ-
qualibus.

Quodsi duo corpora æqualia celeritate inæquali moveantur, vis ejus major est, quod celerius movetur, minor vero est alterius, quod movetur tardius (§. 423.).

§. 426.

Inæqualitas
virium in cor-
poribus inæ-
qualibus.

*Si duo corpora sint inæqualia & majus minore celeritate moveatur, fieri potest, ut vis tardius moti sit major vi celerius mo-
ri*

ti & contra, vel ut vis corporis majoris sit major vi minoris & contra.

Consona hæc experientia sunt, quæ magistra docemur, corporibus minoribus inesse vim majorem, quam majoribus, si multo celerius moveantur minora, quam majora. Unde corporibus exiguis magnam celeritatem imprimimus, veluti dum globum plumbeum vi pulveris pyrii ex sclopeto explodimus, ut vim ei magnam conciliemus.

§. 427.

Si duo corpora sint inæqualia & majus majore, minus autem minore celeritate moveatur; vis majoris semper major est vi minoris (§. 422 sq.).

Alia inæqualitatis ratio.

§. 428.

Si duo corpora inæqualia diversa celeritate moveantur, majus quidem minore, minus autem majore; fieri potest, ut vis corporis minoris celerius moti sit æqualis vi corporis majoris tardius moti.

Æqualitas virium in corporibus inæqualibus.

Patet fundamentum demonstrationis in eo consistere, ut ex collatione corporum & virium eruatur mensura communis.

§. 429.

Si corpus unum in alterum quiescens incurrit, impetus in conflictu ex percussione amissus est ad impetum, quem ante eundem habebat, in ratione massæ corporis incurrentis ad massam utriusque simul.

Impetus per percussione amissus in corpus quiescens factam.

§. 430.

Si corpus unum in alterum quiescens incurrit, impetus per percussione huic acquisitus est ad impetum incurrentis ante conflictum in ratione massæ suæ ad massam utriusque simul.

Impetus corpori quiescenti ex percussione acquisitus.

§. 431.

Si corpus unum in alterum tardius motum incurrit, impetus per percussione amissus est ad impetum, quem haberet corpus tardius motum, quod percutitur, ubi differentia celeritatum, quas habent corpora ante conflictum, moveretur, uti aggregatum massarum ad massam incurrentis.

Impetus amissus si corpus unum in alterum tardius motum incurrit.

§. 432.

Quodsi ponamus corpus unum quiescere, erit celeritas ipsius ante

Impetus per percussione ante

in corpus qui-
escens factam
amissus.

ante conflictum nulla, consequenter differentia celeritatum ante conflictum æqualis celeritati corporis incurrentis. Quoniam itaque impetus, quem haberet corpus quiescens, si differentia celeritatum moveretur, æqualis est impetui, quem haberet, si celeritate corporis incurrentis progrediretur (§. 395.); si corpus unum in alterum quiescens incurrit; erit impetus per percussione[m] amissus ad impetum, quem haberet corpus quiescens, si celeritate corporis incurrentis moveretur, ut massa corporis incurrentis ad massarum aggregatum (§. 431.).

§. 433.

Impetus cor-
pori tardius
moto ex per-
cussione in-
currentis ac-
quisitus.

Quodsi corpus unum in alterum tardius motum incurrit, impetus ex percussione huic acquisitus est ad impetum, quem idem corpus haberet, si differentia celeritatum moveretur, quibus ante conflictum corpora ista feruntur, uti ad aggregatum massarum est massa incurrentis.

§. 434.

Identitas im-
petus amissi
ab uno corpo-
re & ab altero
acquisiti.

Si corpus unum in alterum siue quiescens, siue tardius motum incurrit, impetus, qui ab incurrente amittitur, quiescenti siue tardius moto acquiritur. (Conf. de quiescente §. 429 sq. Cosm. 177. Aritbm. de tardius moto §. 431. 433. Cosm. 177. Aritbm.).

§. 435.

Celeritas ac-
quisita corpo-
ri tardius mo-
to, dum per-
cutitur.

Dum corpus unum in alterum tardius motum incurrit, celeritas huic acquisita est ad differentiam celeritatum ante conflictum ut massa corporis incurrentis ad massarum aggregatum (§. 387. Cosm. 169. Aritbm.).

§. 436.

Celeritas a
corpore per-
cutiente amissa.

Dum corpus unum in alterum tardius motum incurrit, celeritas, qua privatur corpus percutiens, est ad excessum celeritatis, qua fertur, supra celeritatem percussi in ratione massæ corporis percussi ad massarum percutientis & percussi aggregatum.

§. 437.

Celeritas in
percussione
quiescentis
acquisita & a-
missa.

Si corpus quacunque celeritate latum corpus quiescens percutit, erit celeritas corpori quiescenti acquisita ad celeritatem corporis percutientis in ratione massæ percutientis ad aggregatum massarum percutientis & percussi; celeritas vero, quæ amittitur a per-

percutiente, erit ad eam, quæ fertur, dum corpus quiescens percutit, in ratione massæ corporis percussæ ad aggregatum massarum percutientis & percussæ simul (§. 642. Ont. 435 sq. Cosm.).

§. 438.

Si corpus quoddam in alterum tardius motum incurrit; Percussionis percussio eadem est, quæ fieret ab eodem corpore alterum in quiete positum percutiente, si celeritate moveretur æquali differentiæ celeritatum, quibus corpus percutiens & percussum moventur ante conflictum. identitas.

§. 439.

Si duo corpora sibi mutuo celeritatibus quibuscunque occurrunt, impetus ab eo in percussione amissus, cujus major ante conflictum impetus est, sese habet ad impetum corporis debilioris, quem haberet, si summa celeritatum moveretur, quibus corpora ante conflictum moventur, ut massa corporis fortioris ad aggregatum massarum. Impetus in occursum a fortiori ex percussione amissus.

§. 440.

Si duo corpora sibi mutuo celeritatibus quibuscunque occurrunt, impetus a fortiori amissus est ad impetum, quem haberet, si summa celeritatum moveretur, quibus sibi mutuo occurrunt, ut massa corporis debilioris ad aggregatam massarum. Idem impetus amissus.

§. 441.

Si fuerint quatuor quantitates proportionales & consequens primæ dividatur, antecedens secundæ multiplicetur per idem; erunt quoque quantitates ita immutatæ adhuc proportionales. Lemma.

§. 442.

Si duo corpora celeritatibus quibuscunque sibi mutuo occurrunt, celeritas a fortiori in percussione amissa est ad aggregatum celeritatum, quibus ante conflictum moventur, in ratione massæ debilioris ad massarum aggregatum. Celeritas in occursum a fortiori amissa per percussionem.

§. 443.

Si corpus unum in alterum incurrit, percussio fit ab incurrente: si vero duo corpora sibi mutuo occurrunt, percussio fit a fortiori, seu ab eo, cujus impetus major est. Si corpus unum in alterum incurrit, aut hoc alterum quiescit, aut tardius movetur (§. Cosmologia contracta.) Percussio in conflictu a quonam corpore fiat.

(Cosmologia contracta.)

Aaa aa

328.)

328.). Si quiescit; vid. §. 129 sq. si tardius movetur; conf. §. 328. Eatenus resistit, quatenus movetur tardius; adeoque rursus percussio fit ab altero incurrente.

Quodsi denique duo corpora sibi mutuo occurrunt, vires corporum secundum contrarias directiones agunt (§. 329.). Quoniam vero vis debilioris minor est vi fortioris, parti hujus æqualis est (§. 352. *Ontol.*). Quare cum corpora se invicem non moveant, quatenus æquali vi adversus se invicem nituntur (§. 341.); percussio a fortiori fieri debet.

§. 444.

Quantitas vis
elasticæ per-
cussione de-
terminatur.

Vis elastica in concursu corporum æqualis est impetui a corpore fortiori in percussione amisso; in incurfu autem unius in alterum æqualis est impetui ab incurrente amisso (§. 414. 412. 443.).

§. 445.

Percussio in
occurfu cor-
porum qualis.

Si duo corpora celeritatibus quibuscunque sibi mutuo occurrunt, percussio eadem est, quæ fieret a fortiori debilius in quiete percutiente, si moveretur celeritate æquali summæ celeritatum, quibus corpora sibi mutuo occurrunt.

§. 446.

Actio vis ela-
stica, dum
corpus unum
in alterum in-
currit.

Si corpus elasticum unum in alterum incurrit, vis elastica corporis percutientis post percussione eodem modo agit in percutisum ac si differentia celeritatum in ipsum quiescens incurreret, quibus ante conflictum ferebantur: vis autem elastica percussus agit in percutiens ac si in hoc quiescens eadem celeritatum differentia incurreret (§. 438. 444. 414 sq. 444. 431. 434. 432.).

Reducimus hic actionem elasticitatis ad percussione, quia effectum percussione per antecedentia determinare licet. Ita enim & effectum vis elasticæ in conflictu corporum determinare datur. Effectus autem, quem hic consideramus, est modificatio vis motricis quoad gradum celeritatis, a quo quantitas vis vivæ in corporibus pendet. Etenim ratio, cur ita modificetur vis motrix in corpore percusso, seu ita mutetur celeritas ejusdem, in percussione continetur, per quam quippe intelligitur, cur hoc potius modo quam alio mutetur. Mutatio igitur celeritatis, consequenter impetus (§. 395.), est effectus corporis percutientis, quem percutiendo producit (§. 886. *Ont.*). Id autem in primis notan-

notandum est, nos supponere in propositione *corpus perfecte elasticum*, cujus figura per compressionem mutata tota restituitur, ut actione elateris absoluta ne minimum quidem vestigium supersit: alias enim elastica vis tota non impenderetur in actionem.

§. 447.

Si corpus unum elasticum in alterum incurrit, vi elastica post percussione Modificatio
percussione in incurrente seu percutiente producit virium per e-
ad differentiam celeritatum, quibus corpora ante consilium ferun- laterem, dum
tur, in ratione massæ percussæ ad aggregatum massarum percussæ corpus unum
et percutientis simul; quæ vero producit in percussione est ad eandem in alterum in-
celeritatum differentiam ut massa percutientis ad idem massarum currit.
aggregatum.

Propositio hæc generalius enunciari poterat: *Si corpus unum in alterum incurrit, vi elastica ab unoquoque post percussione celeritatem in altero produci, quæ est ad differentiam celeritatum ante consilium in ratione massæ agentis ad massam utriusque simul (§. 446. 386.).*

§. 448.

Quoniam in corpore percusso motus ex ictu acquisitus *Celeritas cor-*
 per vim elasticam acceleratur; in percutiente autem seu incur- porum elasti-
 rente retardatur (§. 416.); *si celeritate communi ex percussione ac-* corum, quo-
quisita, dum corpus unum in alterum incurrit (§. 386.), subtraba- rum unum in
tur celeritas in corpore incurrente vi elastica producit rit, post con-
Quodsi vero eidem celeritati addatur ea, quæ in corpore percusso vi silium.
elastica producit; prodibit celeritas corporis, in quod alterum
incurrit, post consilium.

§. 449.

Quodsi in corpore incurrente vi elastica major producit Quando &
celeritas, quam ex ictu obtinuit; differentia barum celeritatum quæ celeritate
finito consilii resilit, hoc est, movetur juxta directionem ei con- corpus incur-
trariam, juxta quam advenerat (§. 328. 381. 423. 391.). rens resilit.

§. 450.

Si duo corpora elastica sibi mutuo occurrunt, vis elastica for- Actio vis ela-
tioris eodem modo in debilius agit, ac si fortius celeritate latum, sticæ in occur-
quæ est æqualis summæ celeritatum ante consilium, debilius in quie- su corporum.

te percuteret: corpus autem debilius vi elastica in fortius eodem modo agit, ac si in idem quiescens incurreret celeritate, quæ est æqualis summæ celeritatum, quibus corpora sibi mutuo occurrebant (§. 445. 414. 444 415. 445. 432.).

Poterat propositio præsens generaliter ita enunciari. *Si duo corpora elastica sibi mutuo occurrunt, vis elastica uniuscujusque eodem modo in alterum agit, ac si in ipsum quiescens incurreret celeritate equali summæ celeritatum, quibus sibi mutuo occurrunt.*

§. 451.

Modificatio
vis motricis
in occurſu
corporum per
vim elasticam.

Si duo corpora elastica sibi mutuo occurrunt, celeritas vi elastica a fortiori in debiliori producta post percussione est ad aggregatum celeritatum, quibus corpora sibi mutuo occurrunt, ut massa fortioris ad aggregatum massarum utriusque: quæ vero vi elastica debilioris in fortiori producitur est ad idem aggregatum celeritatum in ratione massæ debilioris ad aggregatum massarum utriusque (§. 450. 386.).

§. 452.

Celeritas cor-
porum sibi
mutuo occur-
rentium post
conflictum.

Si celeritas per vim elasticam acquisita in conflictu, dum corpora sibi mutuo occurrunt, a celeritate communi per ictum in eodem acquisita subtrahatur, celeritas corporis (ante conflictum scilicet) fortioris prodit; si vero eidem addatur celeritas ejus habetur, quod ante conflictum erat debilius (§. 443. 391.).

§. 453.

Quando cor-
pora in occur-
ſu resiliunt.

Si duo corpora sibi mutuo occurrunt, debilius in semper resilit; fortius autem resilit, si celeritas ex vi elastica fuerit major celeritate ex ictu; progreditur autem cum debiliori, si celeritas ex vi elastica fuerit minor celeritate ex ictu (§. 393. 337. 452.).

§. 454.

Cur corpora
æqualia ea-
dem celerita-
te lata a se in-
vicem resili-
ant.

Quodsi duo corpora elastica æqualia eadem celeritate sibi mutuo occurrant, æquali celeritate a se invicem resiliunt. Si enim nulla esset vis elastica, post percussione ambo quiescerent (§. 392.). Moventur adeo sola actione vis elasticæ. Sed vis elastica in utroque corpore æqualis esse supponitur. Ratio igitur nulla est, cur majore celeritate resilire debeat A quam B, vel vicissim

sim B quam A. Quare (§. 70. Ont.) eadem celeritate a se invicem resilire debent.

§. 455.

Si duo corpora elastica M & m ante & post conflictum in eandem plagam moventur; differentia celeritatum tam ante, quam post impulsum eadem.

Celeritas post conflictum qualis. Casus primus.

§. 456.

Si duo corpora elastica M & m ante conflictum in eandem plagam moventur, post conflictum vero in contrarias; differentia celeritatum ante conflictum æqualis est summæ celeritatum post eundem.

Casus secundus.

§. 457.

Si duo corpora elastica M & m ante conflictum in partes contrarias, post eundem in eandem moventur, summa celeritatum ante conflictum æqualis est differentię post eundem.

Casus tertius.

§. 458.

Si duo corpora elastica M & m ante & post conflictum in partes contrarias moventur; summa celeritatum ante & post conflictum eadem.

Casus quartus.

§. 459.

Si duo corpora elastica M & m ante & post conflictum in eandem plagam moventur; summa impetuum ante & post conflictum eadem.

Summa impetus ante & post conflictum eadem.

§. 460.

Si duo corpora elastica M & m ante conflictum in eandem partem, post conflictum vero in contrarias moventur; differentia impetuum post conflictum est æqualis summæ eorundem ante eundem.

Differentia impetus post conflictum summæ ante eundem æqualis.

§. 461.

Si duo corpora elastica M & m ante conflictum in partes contrarias, post eundem in eandem moventur; summa impetuum post conflictum æqualis est differentię eorundem ante eundem.

Summa impetuum post conflictum differentię ante eundem æqualis.

§. 462.

Si duo corpora elastica M & m ante & post conflictum in

Aaa aa 3

partes

Differentia impetuum

post & ante
conflictum
eodem.

partes contrarias moventur; differentia impetuum ante & post conflictum eadem.

§. 463.

Quantitatis
motus con-
servatio.

In conflictu corporum elasticorum hoc solo in casu conservatur motus quantitas, quando corpora ante & post conflictum in eandem plagam moventur. In solo hoc casu summa impetuum ante & post conflictum eadem (§. 459. & seqq.). Sic vero summa quantitatum motuum in utroque corpore ante & post conflictum eadem (§. 399.).

Equidem jam inde patet asserti *Cartesiani* falsitas, quod in conflictu corporum eadem motus quantitas conservetur: ut tamen idem distinctius appareat, demonstrandum est, quid in ceteris casibus accidat, quando eadem quantitas non conservatur. Quæritur enim num augeatur, num imminuatur, & quandonam alterutrum horum accidat.

§. 464.

Quantitas mo-
tus quando in
conflictu au-
geatur.

Si duo corpora elastica ante conflictum in partem eandem, post eundem in contrarias moventur; quantitas motus in conflictu augetur. Etenim tunc differentia impetuum post conflictum est æqualis summæ eorundem ante eundem (§. 460.), consequenter & summa quantitatum motuum ante conflictum est æqualis differentię earundem post conflictum (§. 399.). Quare cum per se pateat, summam motuum post conflictum esse majorem differentia eorundem; erit etiam summa quantitatum motuum post conflictum major summa earundem ante conflictum (§. 376. & 426. Ont.).

§. 465.

Quantitas mo-
tus quando in
conflictu im-
minuatur.

Si duo corpora elastica ante conflictum in partes contrarias, post eundem in eandem moventur; quantitas motus in conflictu imminuitur. Tunc enim summa impetuum post conflictum æqualis est differentię eorundem ante eundem (§. 461.). Est igitur summa quantitatum motuum post conflictum æqualis differentię earundem ante eundem (§. 399.). Quare cum per se pateat, summam quantitatum motuum ante conflictum esse majorem differentia earundem quantitatum; erit summa quantitatum motuum ante conflictum major summa quantitatum motuum post eundem (§. 376. Ontol.) E. (§. 426. Ontol.).

§. 466.

§. 466.

Si duo corpora diversa celeritate in eandem plagam moventur & celerius motum præcedit, tardius motum sequitur, distantia eorum ita augetur, ac si sequens quiesceret, præcedens autem differentia celeritatum ab eodem discederet.

Recessus corporum versus eandem plagam continuo progredientium a se invicem.

§. 467.

Si duo corpora diversa celeritate in eandem plagam progrediuntur & tardius motum præcedit, celerius motum sequitur; distantia eorum ita imminuitur, ac si præcedens quiesceret, sequens autem differentia celeritatum ad idem accederet.

Accessus corporum ad se invicem, quæ in eandem plagam feruntur

Ponamus corpus *m* describere spatium unius pedis BF tempore quocunque, corpus vero M celeritate tripla pedes tres eodem tempore. Accedet ergo ad corpus *m* intervallo isto temporis per spatium duorum pedum. Differentia celeritatum est 2: celeritate vero ut 2 describi debet eodem tempore spatium 2 pedum (§. 660. Ontol.). Quare si corpus *m* quiesceret & M moveretur celeritate ut 2, quæ est datarum differentia, ad idem eodem tempore accederet per intervallum duorum pedum. Idem exemplum applicari potest ad propositionem præcedentem.

§. 468.

Si duo corpora sibi mutuo occurrunt, distantia eorum ita imminuitur, ac si alterutrum quiesceret, alterum vero summa celeritatum moveretur.

Accessus corporum ad se invicem, quæ in contrarias plagas tendunt.

§. 469.

Si duo corpora a se invicem recedentia in contrarias plagas tendunt, distantia eorum ita augetur, ac si alterutrum quiesceret & alterum celeritatum summa moveretur.

Recessus corporum a se invicem, quæ in contrarias plagas tendunt.

Ponamus corpus *m* celeritate 1 describere spatium DB sive CG, & corpus M celeritate 2 spatium AC; erit spatium AG ut 3, seu ipsius CG triplum. Enimvero si corpus M moveatur solum summa celeritatum 3; eodem tempore spatium AG describit. Idem exemplum inservit illustrandæ propositioni præcedenti.

§. 470.

In conspectu corporum elasticorum semper conservatur eadem celeritas respectiva, hoc est, corpora eadem celeritate post conservatio.

Celeritatis respectivæ conservatio.

conflictum a se invicem recedunt, qua ante eundem ad se invicem accedebant.

§. 471.

Effectus divi-
lio.

Effectus nocuus est, qui vim, qua producitur, absorbet: effectus vero innocuus, qui vim motricem non absorbet, sed eam intemeratam relinquit.

E. gr. In motu æquabili effectus vis motricis est translatio mobilis per spatium. Enimvero si motus fit in medio non resistente, vi motrici nulla mutatio accidit, cum mobile pergat eadem celeritate moveri (§. 309.). Effectus igitur, quem producit, innocuus est. Sed dum grave recta projectum ascendit, ascensus ejus nocuus est: omnis enim impetus eidem impressus tandem expirat, ut vi gravitatis denuo descendat.

§. 472.

Effectus per-
cussionis qua-
lis sit.

Effectus percussionis in conflictu corporum nocuus est. In conflictu corporum aut corpus unum incurrit in alterum, aut duò corpora sibi mutuo occurrunt (§. 334.). Si corpus unum in alterum incurrit; percussio fit ab incurrente; si vero corpora sibi mutuo occurrunt, percussio fit a fortiori (§. 443.). Enimvero in conflictu corporum non minus incurrens in priori casu (§. 436. 437.), quam fortius in posteriori parte aliqua celeritatis privatur (§. 442.), ut adeo per percussionem minor evadat (§. 352. *Ontol.*). Vis igitur corporis percutientis in utroque casu ex percussione fit minor (§. 423.), consequenter pars aliqua vis corporis percutientis in effectum percussionis impenditur. E. (§. 471.).

§. 473.

Effectuum no-
cuarum ratio:

Effectus nocui sunt ut vires, quas absorbent. Pone enim effectum E absorbere vim V. Patet, hanc præcise vim ad eum producendum requiri, vel minorem eidem sufficere (§. 925. *Ontol.*). Quod si ergo effectus alius absorbet vim bis V, æquipollet is utique duobus effectibus, qui singuli absorbent vim V, adeoque erit effectus E duplus, seu, effectus, qui absorbet vim bis V, erit bis E. Eodem modo patet, effectum, qui absorbet vim ter V, esse ter E, & ita porro in infinitum.

§. 474.

Quoniam quantitas effectuum nocuorum pendet a quantitate virium, quas absorbent (§. 473. *Cosm.* & §. 851. *Ontol.*); in effectibus nocuis æstimandis non habenda est ratio temporis.

An in æstimandis effectibus nocuis temporis habenda ratio.

§. 475.

In conflictu duorum corporum elasticorum id, quod efficitur ducendo singulorum massas in velocitatum suarum quadrata, simul additum ante & post conflictum idem est.

Quidnam in conflictu conservetur.

§. 476.

Si duo corpora elastica æqualia eadem celeritate sibi mutuo occurrunt, vel unum in alterum quiescens incurrit; eadem vis in conflictu conservatur & quidem beneficio vis elasticæ.

Casus specialis virium in conflictu conservatarum.

Idem ostendi potest in aliis casibus particularibus, veluti si duo corpora elastica æqualia inæqualibus celeritatibus sibi mutuo occurrunt. Etenim si corpus M ante conflictum celeritate C movetur, corpus vero m celeritate c, post conflictum movebitur m celeritate C & M celeritate c (§. 452.). Erit adeo post conflictum vis corporis M æqualis vi corporis m ante eundem, & vicissim vis corporis m post conflictum æqualiserit vi corporis M ante eundem (§. 420.). Summa igitur virium ante & post conflictum eadem. Ex casibus istis particularibus probabile fit eandem virium quantitatem in conflictu corporum elasticorum semper conservari.

§. 477.

In conflictu corporum elasticorum vis derivativa ex ea resultans (§. 363.) in corporibus collisis est effectus plenus (§. 56. *Ont.* 324. *Cosm.* 886. *Ont.* 380 446. 451. 448. 452. 153. 358. 362. *Cosm.* 851. 922. *Ont.*): in conflictu corporum non elasticorum non item (§. 381. 199. 380. 384. 362.).

Effectus in conflictu corporum.

Vi adeo elasticæ debetur, ut tota corporum actio in se invicem in modificationes virium impendatur.

§. 478.

Vires derivativæ, quæ per corporum inter se conflictus resultant, sunt effectus nocui (§. 448. 357. 362.).

Vis derivativa qualis sit effectus.

(*Cosmologia contracta.*)

Bbb bb

§. 479.

§. 479.

Aequalitas vi-
rium produ-
ctricium &
productarum.

*Vires derivativæ sunt viribus vivis æquales, quæ in iis produ-
cendis consumuntur.* Quoniam enim vires derivativæ sunt
effectus nocui (§. 478.), adeoque tantam præcise vim ad sui pro-
ductionem requirunt (§. 925. *Ontol.*), quantam absorbent (§. 471.);
ex eo intelligitur, vim quandam in corpore A fuisse productam,
quia alia in B periit, & tantam præcise esse vim ipsi A acquisitam,
quia tanta præcise, non major, nec minor periit in B, consequen-
ter ratio, cur tanta potius, quam minor, vel major vis orta fue-
rit in A ratio est, quod tanta præcise, non major, nec minor in
B periit (§. 56. *Ontol.*). Quoniam vero vis, quæ perit in uno
corpore, tota in vi alteri corpori ingeneranda consumitur *per*
hypoth. & tale quid fieri posse in anterioribus demonstratur, nulla
sane ratio est, cur minor potius esse debeat vis in A producta,
quam major ea, quæ periit in B, si æqualis non est, aut in uno ca-
su potius major, quam minor, in altero potius minor, quam ma-
ior esse debeat, si nec in omni casu minor, vel major est vi pro-
ductrice. E. (§. 70. *Ontol.*).

§. 480.

Conservatio
virium in con-
flictu corpo-
rum elastico-
rum.

*In conflictu corporum elasticorum semper conservatur eadem
virium quantitas, hoc est, summa virium vivarum ante & post con-
flictum eadem* (§. 477. *Cosm.* 922. *Ont.* 478. 471. 479. *Cosm.*).

Equidem conservatio virium vivarum nondum universaliter demon-
strata videtur in propositione præsentē, cum ad solum conflictum cor-
porum elasticorum restringatur, nec per eadem principia ad conflictum
corporum non elasticorum, veluti mollium, in quibus vires per confli-
ctum resultantis effectus pleni corporum in se invicem agentium non
sunt, extendi possit; ex subsequētib; tamen patebit legem esse uni-
versalem: id quod in Cosmologia ut agnoscatur plurimum interest.

§. 481.

Mensura vi-
rium vivarum.

*Vires derivativæ seu vivæ corporum sunt ut facta ex mas-
sis eorundem in quadrata celeritatum, seu, in ratione composita ex
simplici massarum & duplicata celeritatum* (§. 480. 475.).

Movea-

Moveatur corpus 3 librarum celeritate ut 4; corpus vero 2 librarum celeritate ut 5; erit vis illius ut 3. 16 five 48, hujus ut 2. 25 five 50. Sunt igitur vires illorum corporum ut 48 ad 50, five ut 24 ad 25. (§. 181. *Aritbm.*).

§. 482.

Quodsi massæ corporum fuerint æquales, vires vivæ erunt ut celeritatum quadrata (§. 481. *Cosm.* 181. *Aritbm.*).

Mensura virium vivarum in corporibus æqualibus.

§. 483.

Mensura virium experimentis confirmatur. Primus de experimento cogitavit Joannes Polenus, in libro de Castellis, per quæ derivantur fluviorum aquæ, habentibus latera convergentia §. 118.

Mensura virium experimento confirmata.

§. 484.

Nulla vis viva in corpore perit nisi per conflictum; nec oritur, vel variatur nisi per conflictum (§. 357. 325.).

Vis vivæ in corpore orta, interitus & variatio.

§. 485.

Si mensura virium vivarum a posteriori stabilitur; inde colligitur in motu corporum elasticorum eandem virium quantitatem conservari. Etenim tunc demonstratur, vires vivas esse in ratione factorum ex massis in quadrata celeritatum (§. 483.). Enim vero summa factorum ex massis corporum elasticorum in suarum celeritatum quadrata ante conflictum est æqualis summæ factorum ex massis eorundem in suarum celeritatum quadrata post eundem (§. 475.). Ergo summa virium post & ante conflictum in utroque corpore eadem est, consequenter in conflictu corporum elasticorum eadem virium quantitas conservatur.

Conservatio virium vivarum alia ratione demonstrata.

§. 486.

Vis viva, quæ in percussione amittitur, non perit, sed conservatur (§. 480.). Adeoque vis viva, quæ per percussione amittitur, non perit, sed, dum figura corporum in contactu mutatur, in alia materia conservatur. Quodsi ergo corporum mollium figuræ in contactu immutantur; nulla sane ratio est, cur non etiam in hoc casu vis viva in percussione amissa

Conservatio virium in percussione amissarum.

ne amissa conservari debeat, etsi, cum figuræ non restituantur, vis amissa corporibus non restituatur. Etenim eadem vis amittitur in percussione, sive corpora elastica sint, sive minus: quod exinde liquet, quod in percussione nulla habeatur elasticitatis ratio. Præterea utrobique eodem modo partes quædam moventur, dum figuræ mutantur, & ipsis versus centrum recedentibus materia alia contigua propellitur, sive corpus elasticum fuerit, sive minus. Quamobrem cum appareat in uno casu vim a mobilibus in conflictu amissam non perdi, sed conservari in materia alia; nulla sane ratio est, cur idem in alio quoque casu obtinere non debeat, ut scilicet vis a mobilibus amissa conservetur in materia alia, quæ nunc movetur, cum antea quiesceret, aut alia celeritate movetur, quam antea ferebatur. Vid. §. 192. *Ont.*

§. 487.

Conservatio
viri-
um in tota
natura.

In toto universo semper conservatur eadem virium vivarum quantitas. (De elasticis vid. §. 480. de non elasticis §. 486.).

Quodsi contingat in conflictu corporum non elasticorum motum prorsus extinguere (§. 392.), adeoque vires vivas in corporibus sibi mutuo occurrentibus amitti (§. 357.); in motum intestinum recipiuntur.

§. 488.

Corpora resili-
entia an sint
elastica.

Corpora dura, quæ resiliunt, sunt elastica. Si non essent elastica, post conflictum moverentur in eandem plagam (§. 381. 393.) aut, si obicem firmum cedere nescium attingerent, prorsus quiescerent (§. 389.) E. (§. 380.).

§. 489.

Effectus elasti-
citatis in cor-
poribus in
eandem pla-
gam motis.

Si duo corpora post conflictum in eandem plagam moventur, aliquo tamen intervallo a se invicem distant; corpora ista elasticitate omni non destituuntur (§. 381. 393.). Aliqua ergo adesse debet ratio, cur corpora in conflictu a se invicem separentur, ut post eundem aliquo intervallo a se distant.

distent. Quoniam vi elastica in conflictu corporum celeritas ex ictu acquisita in corpore præcedente acceleratur, in corpore autem sequente retardatur (§. 416.); vi elastica corpora a se invicem in conflictu separantur, ut post eundem aliquo intervallo a se invicem distantia progrediantur in eandem plagam. Quare cum non alia adsit vis, cui idem effectus tribui possit; pro effectû vis elasticæ ista in conflictu facta corporum separatio utique habenda, consequenter ex eo recte colligitur, corpora ista esse elastica (§. 898. *Ontol.*). Erit autem elasticitas tanto major, quo major deprehenditur ceteris paribus effectus (§. 925. *Ontol.*).

§. 490.

Quoniam experimentorum fide constat, corpora aliquid duritiei saltem habentia, nec ob lubricitatem sibi mutuo adhaerentia, post conflictum aliquo intervallo a se invicem separari, nec eadem prorsus celeritate versus eandem plagam progredi; *nullum datur corpus molle, quod non aliquem habeat elasticitatis gradum.*

Universalitas elasticitatis.

§. 491.

Si duo globi A & B jungantur recta AB, quæ transit per eorum centra A & B, rectaque AB ita dividatur in C, ut sit AC ad CB uti reciproce massa corporis B ad massam corporis A, dicatur punctum C *Centrum Gravitatis* istorum globorum sive corporum.

Definitio centri gravitatis duorum corporum.

§. 492.

Si duo corpora elastica æqualia A & B celeritatibus inæqualibus sibi mutuo occurrunt; post conflictum permutatis celeritatibus a se invicem resiliunt.

Celeritatum in conflictu permutatio.

Poteramus hanc propositionem supponere tanquam in formula generali (§. 452.) contentam. Enimvero cum eadem in sequentibus utamur tanquam principio ad demonstrandam veritatem maxime arduam; non abs re fuit eam h. l. commemorare.

§. 493.

Celeritas corporum ante & post conflictum eadem.

Si duo corpora inæqualia elastica sibi mutuo occurrant celeritatibus, quæ sunt reciproce ut massis eorundem, iisdem celeritatibus a se invicem resiliunt, quibus adveniant.

§. 494.

Centrum gravitatis mobilium ante & post conflictum quiescens.

Si duo corpora elastica æqualia A & B eadem vel diversis celeritatibus sibi mutuo occurrant; centrum gravitatis C ante & post conflictum quiescit.

§. 495.

Motus centri gravitatis corporum æqualium in contrarias plagas tendentium.

Si corpora æqualia diversa celeritate in plagas oppositas feruntur, centrum gravitatis eorum movetur cum celeriori in eandem plagam.

Centrum adeo gravitatis nonnisi eo in casu ante & post conflictum quiescit, si mobilia sunt æqualia, quæ eadem celeritate feruntur (§. 494.).

§. 496.

Motus centri gravitatis corporum inæqualium in contrarias plagas tendentium.

Si duo corpora elastica inæqualia in contrarias plagas feruntur celeritatibus inæqualibus, quæ non sunt massis eorundem reciproce proportionales, centrum gravitatis non quiescit, sed movetur.

Quando itaque corpora in contrarias plagas tendunt, centrum gravitatis nunquam quiescit, nisi quando massis reciproce proportionales sunt celeritates.

§. 497.

Motus centri gravitatis cum mobilibus in eandem plagam.

Si duo mobilia quæcunque in eandem plagam tendunt, centrum gravitatis una cum ipsis in eandem plagam movetur.

§. 498.

Distantiæ corporum elasticorum ante & post conflictum.

Si corpora fuerint elastica, æqualibus temporibus ante & post conflictum sumtis, æquales sunt corporum cum a se invicem, tum a centro gravitatis distantiæ.

§. 499.

§. 499.

In conflictu corporum elasticorum centrum gravitatis C ante conflictum & post eundem eadem celeritate movetur, quando scilicet movetur. Etenim sumtis æqualibus ante & post conflictum temporibus, distantie mobilium a centro gravitatis æquales sunt (§. 498.). Quare centrum gravitatis in linea recta, quæ inter corpora interjicitur, ante & post conflictum eundem locum inter corpora tenet. Movetur autem ante & post conflictum per hypoth. Eadem igitur celeritate moveri debet.

Motus centri gravitatis in conflictu corporum elasticorum.

§. 500.

Si corpora sibi mutuo directe occurrunt, vel unum in alterum directe incurrit, & centrum gravitatis movetur, ante & post conflictum in eadem recta movetur. Quoniam enim mobilia ante & post impulsu in eadem linea recta moventur, nisi quod non semper post conflictum in eas tendant plagas, in quas ante eundem tendebant, nec ambo constanter in eandem plagam simul tendant, sed tubinde in contrarias, quod ex anterioribus liquet, & partim per se patet, partim ex eo intelligitur, quod in concursu directo & dum corpus unum in alterum directe incurrit, nulla adsit ratio, cur mobilia a linea, in qua ante conflictum, incedunt (§. 309.) detorqueri debeant: centrum gravitatis constanter est in eadem recta, in qua mobilia incedunt (§. 491.), consequenter quando movetur, in eadem recta ante & post conflictum moveri debet.

Via centri gravitatis mobilium.

§. 501.

Si corpora elastica ante & post conflictum in eandem plagam feruntur; centrum gravitatis ante & post eundem in eandem plagam cum ipsis movetur. Quando enim corpora in eandem plagam tendunt, centrum gravitatis una cum ipsis in eandem plagam movetur (§. 497.). Enimvero corpora ante & post conflictum in eandem plagam tendunt per hypoth. Ergo centrum quoque gravitatis cum ipsis in eandem plagam tendere debet.

Directio centri gravitatis in conservatione directionis corporum.

§. 502.

Si corpora elastica æqualia celeritatibus inæqualibus sibi mutuo occurrunt; centrum gravitatis ante & post conflictum in eandem

Directio centri gravitatis in occurfu.

corporum æ-
qualium di-
versa celerita-
te motorum,
& status centri
gravitatis
conservatio.

*eandem plagam tendit. In corporum vero elasticorum quorumcun-
que conflictu status centri gravitatis conservatur.* Si corpora
æqualia celeritatibus inæqualibus sibi mutuo occurrunt, in pla-
gas oppositas feruntur (§. 329.), consequenter centrum gravita-
tis eorum movetur cum celeriori in eandem plagam (§. 495.).
Sit B celerius, quod versus A movetur; movebitur ergo centrum
gravitatis versus A. Enimvero corpora elastica sunt *per hypoth.*
Quare cum permutatis celeritatibus a se invicem resiliant (§. 492.);
corpus A post conflictum movetur celeritate ipsius B & secun-
dum directionem, quam habebat B ante conflictum, & vicissim
corpus B movetur celeritate ipsius A & secundum directionem,
quam A habebat ante conflictum. Quoniam itaque corpus A
post conflictum celerius movetur quam B, centrum gravitatis post
eundem movetur cum corpore A in eandem plagam (§. 495.),
adeoque in eam, in quam tendebat ante conflictum *per demon-
strata.* Quod erat unum.

Si in conflictu centrum gravitatis movetur, ante & post
conflictum movetur in eadem recta (§. 500.), consequenter se-
cundum eandem directionem (§. 150.), eademque celeritate (§.
499.). Quare cum in motu directio & celeritas mutabiles
sint, adeoque status centri gravitatis ex iis resultet (§. 154. &
164.). Status centri gravitatis in conflictu corporum elastico-
rum non mutatur, sed conservatur (§. 707. *Ontol.*). Quod erat
alterum.



SECTIO

SECTIO III.

DE

NATURA UNIVERSA ET
PERFECTIONE MUNDI.

CAPUT I.

DE

NATURA UNIVERSI IN GE-
NERE, ITEMQUE NATURALI
ET SUPERNATURALI.

§. 503.

Per *Naturam universam* seu *Naturam* simpliciter dictam intelligimus principium mutationum in mundo eidem intrinsicum. Naturæ universæ definitio.

§. 504.

Quoniam *Natura* mundo intrinseca est (§. 503.); *ab eodem distinctum ens esse nequit* (§. 544. *Ontol.*), sed ita ad eundem pertinet, ut absque ea mundus concipi nequeat (§. 545. *Ontol.*). Natura num sit ens a mundo distinctum.

§. 505.

In *natura* continetur ratio, cur mutationes in mundo *be-* Ratio actualitatis mutationum in mundo ubi querenda.
potius contingant, quam alia (§. 56. *Ontol.* §. 503. *Cosm.* 866. *Ontol.*).

Ecce adeo tibi rationem, cur vulgo sibi imaginentur naturam tantam causam eorum, quæ in mundo accidunt (§. 881. *Ont.*). Scilicet per essentiam mundi possibile est tales mutationes ut accidunt; ut vero actu contingant, naturæ tribuendum.

(*Cosmologia contracta.*)

Ccc cc

§. 506.

§. 506.

Natura quid
sit.

Natura universa est vis activa sive motrix (§. 505. 71. *Cosm.* 56. *Ont.* 137. 128. *Cosm.* 56. *Ont.*). Idem patet ex §. 503. *Cosm.* 870. *Ont.* 71. 137. *Cosm.*

§. 507.

Natura uni-
versâ undere-
sultet.

*Natura universa est aggregatum omnium vivium motrici-
um, quæ corporibus in mundo coexistentibus simul sumtis insunt.* Mundus ex corporibus tanquam partibus componitur (§. 119.), neque adeo in eodem mutationes aliæ contingunt, quam quæ in corporibus accidunt. Quare cum mutationum istarum principium sit vis motrix, quæ corporibus inest (§. 137.); præter istas vires corporibus inexistentes & ad naturam earum pertinentes (§. 145.) principium mutationum aliud in mundo non datur, cumque ad omnes corporum mutationes explicandas sufficiat, cur scilicet actu contingant (§. 138.). sufficiens actualitatis ratio in eadem continetur (§. 56. *Ontol.*), consequenter aliud præterea principium non requiritur (§. 118. *Ontol.*).

§. 508.

Natura num
sit substantia.

Natura universa non est substantia, talis tamen apparet (§. 507. 178.).

Qui naturam tanquam idolum impugnant, veluti *Robertus Boyle* in *Traclatu de Natura*, ipsumque secutus *Sturmius* in *Physica Electiva sive Hypothesica* Tom. 1. lib. 1. Sect. 1. c. 4. p. 142. & seqq. sortum hunc imaginationis impugnant. Naturam autem prorsus rejecerunt, propterea quod extensum sive materiam pro substantia corporea habuerunt, absolum adeo judicantes corpus componi ex duabus substantiis, materia nempe atque natura. Ex notionibus autem rite evolutis apparet, quod nec materia, qualis apparet, nec natura sive vis motrix sint substantiale corporum (§. 177.); sed quod substantialitatem largiantur elementa nostro sensu accepta, in quibus utraque rationem sufficientem agnoscit, cur ita appareat.

§. 509.

Naturale quid
dicatur.

Naturale in genere dicitur, cujus ratio in essentia & natura entis continetur. In mundo autem adspectabili materiali *Naturale* appellatur, cujus ratio in essentia & natura corporum continetur.

§. 510.

§. 510.

Supernaturale est, cujus ratio sufficiens in essentia & natura entis non continetur. Respectu autem corporum in hoc mundo adspectabili & ipsius mundi *Supernaturale* appellatur, cujus ratio sufficiens in essentia & natura corporum non continetur. Dicitur etiam *Miraculum*.

Supernaturalis sive miraculi definitio.

Si ignis non adurit corpora adversus ipsius vim non munita, quæ ab eodem naturaliter consumuntur; effectus hic dicitur miraculosus seu supernaturalis.

§. 511.

Mutationes corporum naturales sunt, quæ per modum, quo partes ipsius inter se junguntur earumque qualitates atque regulas motus explicari possunt. (S. 509. Cosm. 56. Ont. 140. 145. 302. Cosm.).

Quænam mutatio corpora naturalis.

§. 512.

Quoniam modus, quo partes tales, non aliæ inter se junguntur, est essentia corporis (§. 140.); essentia vero corpusculorum mixti in mixtione (§. 257.), mixti corporis essentia in modo, quo corpuscula mixti inter se junguntur, consistit (§. cit.); *mutationes mixtorum naturales* sunt, quæ per mixtionem & modum, quo corpuscula mixti inter se junguntur juxta regulas motus explicari possunt (§. 511.).

Mixti mutatio naturalis.

§. 513.

Mutationes corporis organici naturales sunt, quæ per structuram ejus juxta regulas motus explicari possunt (§. 511. 140. 276.).

Organici mutatio naturalis.

§. 514.

Miraculum erit omnis corporum mutatio, quæ per modum, quo partes ipsorum inter se junguntur earumque qualitates atque regulas motus explicari nequeunt (§. 510 sq.).

Miraculum in quo consistat.

§. 515.

Miraculum in mixto qua tali contingit, si qua mutatio accidit, quam ex mixtione corpusculorum mixti & modum, quo illa inter se junguntur, per regulas motus explicare non licet (§. 510. 512.).

Miraculum in mixto quando contingat.

Talis est conversio aquæ in vinum, quod primum a Christo patratum miraculum commemorat *Joannes* c. II. 46. & seqq. Enimvero quomodo in continenti aqua tanquam corpus mixtum jussu alterius vasi infusa in vinum transmutari queat, ex mixtione & motus regulis explicari non posse intelliget, qui ad generalem saltem mixtionis notionem & regulas motus maxime generales attendit. Est igitur conversio aquæ in vinum, prout ab autore sacro describitur, miraculum.

§. 516.

Miraculum in corpore organico patratum.

Miraculum in corpore organico qua tali contingit, si qua mutatio accidit, quam ex structura corporis per regulas motus explicare non licet (§. 513. 510).

E. gr. Cum Petrus homini claudis solis verbis aut, si mavis, solo imperio restituit membrorum integritatem, ut exiliens staret atque ambularet Act. I. 1. 6. & seqq. Neque enim verba, quæ dixit Petrus, per regulas motus membra claudis ex utero matris suæ in eum situm detorquere ac in articulatione figuram immutare potuerunt: id quod evidentissime demonstrari potest, modo statum hominis claudis & regulas motus habueris perspectas. Neque per easdem regulas ista figuræ ac situs mutatio explicari potest ex eo, quod Petrus apprehensa manu ejus dextra cum allevaverit.

§. 517.

Intrinfeca miraculi possibilitas.

Miraculum non contradicit essentiæ illius corporis, in quo contingit, seu, miraculum tale, quale contingit, in eo corpore, in quo contingit, possibile. Sic enim esset impossibile (§. 79. 132. 85. Ont.).

§. 518.

Miracula quando contingant.

Si miraculum contingit, naturales deficiunt causæ actum ejus, quod possibile est, determinantes (§. 173. 898. Ont. 517. 510. Cofin.).

Atque hinc jam apparet, quid Physica conferat ad demonstrandum miraculi existentiam. Scilicet ex ea ostendi potest, quales actiones requirantur, ut mutatio illa sequatur in corpore, quæ eidem minime repugnat, & quænam sint causæ, a quibus istiusmodi actiones proficisci valent. Ex modo vero, quo patratum fuit miraculum, vel aliis circumstantiis tum, quando extitit, obviis monstratur, istiusmodi causas tum defecisse. Ita demonstrativa ratione patet miraculi existentia.

Fallun-

falluntur itaque qui sibi persuadent Physicum miracula in dubitationem adducere.

§. 519.

Quoniam miraculum est mutatio per essentiam corporis, in quo accidit, possibilis (§. 517.), sed quæ causa naturali sufficiente constituitur, dum contingit (§. 518.), *omnis effectus naturalis erit miraculum, si deficiente causa naturali sufficiente existit.* Quando effectus naturalis in miraculum abeat.

E. c. In terra pluvia ac rore irrigata efflorescunt plantæ. Effectus iste naturalis est unamini omnium confessione ac in Physica, quod talis sit, ostenditur. Enimvero supponamus idem fieri in terra exiccata, ceteris manentibus iisdem; effectus non amplius naturalis erit, sed miraculum. Similiter petra dura valide percuti potest, ut rimas agat: quodsi vero ponamus tale quid fieri in petra baculo leniter percussa, quemadmodum a Mose factum legimus Exod. XVII. §. miraculum utique erit. Atque adeo apparet non repugnare, ut, quod ordinarie naturaliter contingit, id alio tempore miraculum sit: id quod probe notandum est, ne naturæ efficacibus habeamus intelligentes, quomodo per causas naturales, quales in mundo dantur, produci poterint, quæ tamen in dato casu miraculis accensenda, propterea quod causæ istæ minime adfuerint.

§. 520.

Quoniam miraculum contingit, si causæ efficientes sufficientes naturales deficiunt (§. 518.) & effectus alias naturalis in miraculum abit, si causa naturalis sufficiens deficit, quando existit (§. 519.); *ex defectu causarum naturalium sufficientium miraculum, quando existit, potissimum agnoscitur.* Miraculum unde agnoscitur.

Quamobrem operæ pretium faceret, qui Scripturæ sacræ auctoritatem adversus homines prophanos & Antiscripturarios defensurus ex solidis Physicæ principiis demonstraret, miraculorum in Scriptura sacra relatorum causas naturales sufficientes defecisse.

§. 521.

Quodsi causa effectus naturalis sufficiens per miraculum ponatur, quomodo vero ponatur, observari nequeat; miraculum erit inobservabile. Quoniam enim effectus, quem observamus, datur causa naturalis sufficiens *per hypoth.* pro miraculo haberi nequit. Miraculum inobservabile.

quit (§. 520.). Habebitur itaque pro naturali (§. 509. 510.). Quare cum caufa fufficiens deficiente caufa naturali fufficiente ponatur, quæ obfervari nequit *per hypoth.* ignorari omnino debet, caufam effectus fufficientem per miraculum fuiſſe poſitam, confequenter miraculum erit inobſervabile.

E. gr. Ponamus tempeſtate valde ſicca favonium advehere nubes. Ponamus porro per miraculum determinari ventum, qui nunc ex occidente ſpirat. Quoniam favonius advehere nubes ſolet naturaliter, quemadmodum & in Geographia, & in Phyſica docetur, ac obſervatio communis confirmat; miraculum jam contigiffe ut obſervetur fieri nequit, quamdiu in agnoſcendis cauſis remotioribus non ultra noſtrum ævum fuerimus proceſſi. Principium hoc probe notandum eſt, ut miracula, quæ deceant ſapientiam divinam ſuo tempore determinare valeamus.

§. 522.

Quodnam vires totius naturæ excedat.

Si in ſerie cauſarum naturalium nulla continetur, quæ dato tempore datoque in loco effectum quendam poſſibilem producat; effectus ille vim naturæ univerſæ ſuperat (§. 507. 520.).

Ut aliquid dato loco datoque tempore ad actum producat, non ſufficit alio loco hoc tempore extare vel alio tempore hoc loco extitiſſe aut extituram eſſe cauſam ſufficientem ejus; ſed requiritur ut nunc hic exiſtat (§. 898. *Ontol.*). Quamobrem ſi fieri naturaliter non poſſit, ut hic & nunc exiſtat talis cauſa, dicendum utique erit, effectum ab ea producendum naturam univerſam excedere: quoniam poſitis naturæ univerſæ viribus non tamen ponitur cauſa. E. gr. Naturaliter ex ovo dato pullus excludi poteſt a gallina ad incubandum apta. Enimvero ſi jam ponas ovum in loco, quo gallina ad incubandum apta deferri nequit, nec iſto tempore gallina in iſto ſtatu reperiri poteſt; vires univerſæ naturæ excedit, ut ex ovo pullus excludatur, utut in ſe ſpectatum impoſſibile non ſit.

§. 523.

Miraculum cur vim naturæ univerſæ excedat.

Miraculum omne vim naturæ univerſæ excedit (§. 522.), hoc eſt, poſita vi univerſæ naturæ non tamen ponitur miraculum (§. 519.).

§. 524.

§. 524.

Si ergo miraculum aliquod produci debet, ab ente quodam a mundo diverſo producendum (§. 48. 423.).

Cauſa miraculorum efficiens.

Atque ita evidens eſt nexus, qui inter exiſtentiam miraculi atque exiſtentiam Dei intercedit. Atheus ergo, qui exiſtentiam Dei negat, nec exiſtentiam miraculi concedere valet. Neceſſario itaque miracula omnia negat, nec alia concedit niſi ſecundum vulgi opinionem talia. Enimvero non vice verſa ſequitur, quod, qui exiſtentiam Dei admittit, miracula etiam concedat. Etenim vel negare poteſt, quòd Deus velit miracula patrare, vel quod poſſit, quatenus illa ſapientia contrariari arbitrat, vel cauſarum ſeriem abſoluta neceſſitati cum *Spinoſa* ſubjicit. Quamvis enim utrumque abſurdum eſſe in Theologia naturali demonſtraturi ſumus, hoc tamen non obſtante fieri poteſt, ut quis agnoſcat dari Deum, ut agnoſcat eidem convenire attributa ipſi tribui ſolita, ut agnoſcat eum eſſe autorem univerſi, & juxta alterutrum errorem foveat.

§. 525.

Motus, qui juxta regulas motus non conſequitur, non eſt naturalis, ſed miraculoſus (§. 509. 381 ſqq. 448 ſqq. 510.).

Motus quiſnam miraculoſus.

Norandum hic eſt, illum motum conſequi juxta regulas motus, qui per eas explicari poteſt, cur ſcilicet tanta ſi celeritas, cur hæc ſit directio; ex adverſo autem juxta regulas motus non conſequi eum, qui per easdem explicari nequit.

§. 526.

Motus miraculoſus legibus motus contrariatur (§. 303. Coſm. 866. 118. Ont. 525. Coſm.).

An motus miraculoſus legibus motus contrarius.

E. gr. Si globus in quiete poſtus moveri inciperet, nullo corpore, quod moveretur, in eum impingente; motus hic contrarius foret legi naturali, vi cujus unumquodque corpus perſeverat in ſtatu ſuo quieſcendi, niſi a cauſa externa ſtatum ſuum mutare cogatur (§. 309.). Foret itaque miraculoſus. Et talis motus occurrit in miraculo ſolis ſtantis tempore *Jofue*: id quod etiam in hypothefi ſyſtematis terræ mota verum eſt. Etenim ut ſol ſtaret, hoc eſt, eundem reſpectu Telluris ſitum retineret, motus vertiginis Telluris ſiſtendus erat. Globus igitur in motu conſtitutus ad quietem redigebatur nulla præſente cauſa externa, quæ cum

cum eodem congregiebatur nulla presente causa externa, quæ cum eodem congregiebatur.

§. 527.

**Legum motus
contingentia.**

Leges motus non sunt absolute necessariae, sed contingentes (§. 303. 358. 302. 153. 165.). Inter istas leges continetur, quod corpus unumquodque perseveret in statu suo quiescendi vel movendi uniformiter in directum, hoc est, eadem celeritate & secundum eandem directionem, nisi a causa aliqua externa statum suum mutare cogatur (§. 309.). Hanc enim ad regulas motus demonstrandas adhiberi patebit, ubi demonstrationes illarum propositionum, quæ conflictum corporum explicant (§. 381. & seqq. & §. 448. & seqq.) eo modo in sua principia resolvitis, quem alibi (§. 962. *Log.*) exemplo illustravimus. Enimvero si porro legis istius demonstrationem resolvitis eodem modo, patebit eam a principio convenientiæ seu rationis sufficientis pendere: unde etiam immediate demonstrari potest. Similiter inter leges motus refertur propositio de æqualitate actionis & reactionis corporum (§. 346.). Quod si vero ipsius etiam demonstrationem debito modo resolvitis, denuo incidet in principium rationis sufficientis, a quo adeo etiam pendet actionis & reactionis æqualitas. Regulæ motus etiam ex eo demonstrari possunt, quod in conflictu corporum elasticorum eadem conservetur virium quantitas (§. 480.). Enimvero facta demonstrationis resolutione non minus incidet in principium rationis sufficientis, quam in legibus ceteris. Quoniam igitur ex ratione sufficiente regulæ motus in mundo obtinent, non vero ex essentia corporum vi principii contradictionis manant, ex ea adeo non demonstrabiles, ratio sufficiens autem saltem efficit, ut, cur aliquid sit, intelligibili modo explicari possit (§. 321. *Ontol.*), necessitate absoluta ex essentiis rerum resultante (§. 315. *Ontol.*): leges motus a necessitate absoluta liberæ sunt, consequenter ipsis oppositæ contradictionem non involvunt (§. 279. *Ontol.*), atque ideo contingentes sunt (§. 294. *Ontol.*).

§. 528.

**Motus miraculosi
possibiles.**

Motus miraculosus in se spectatus non est impossibilis (§. 526 sq. *Cosm.* 294. *Ont.*).

Quoniam

Quoniam *Spinoza* leges motus absolute necessarias facit loco supra citato; motum quoque miraculosum pro impossibili habet. Ad defendendam autem miraculorum in Scriptura sacra relatorum veritatem requiritur ut constet, motum legibus motus contrarium non esse in se spectatum impossibilem, etsi in natura rerum possibilitate intrinseca deficiatur, quatenus nempe naturaliter fieri non potest motus legibus naturæ contrarius.

§. 529.

Natura rerum ab absoluta necessitate libera (§. 145. 507. 302 sq. *Cosm.* 866. 851. *Ont.* 527. *Cosm.* 279. *Ont.*).

Naturæ contingencia.

Nimirum salvis corporum essentis fieri posset, ut earum natura esset alia, seu manentibus iisdem corporibus fieri posset, ut ipsis ineffent vires alio modo modificabiles. Hæc igitur natura, quæ existit, corporibus tantummodo non repugnat, sed non absolute necessaria est. Atque hæc ratio est, cur ex naturæ notione non possit demonstrari notio materiæ, nec ex notione materiæ notio naturæ, consequenter nec leges motus ex notione materiæ deduci possint, quemadmodum fieri debebat, si inter notionem materiæ & notionem naturæ nexus necessarius daretur atque una alteram determinaret, cum se mutuo determinantia ponantur simul (§. 120. *Ontol.*) & determinantia sint ratio sufficiens determinati (§. 116. *Ontol.*).

§. 530.

Si effectus naturaliter existere deberet, qui per miraculum existit, alius existere deberet mundus (§. 517 sq. 100.). Vide etiam §. 87.

Miraculum quando naturaliter fieri posset.

§. 531.

Si miraculum in mundo contingit, nec aliqua ulterius mutatio accidit; sequens mundi pars non amplius erit eadem, quæ alias futura erat (§. 509 sq. 116.).

Miraculi effectus.

Ponamus miraculum solis stantis ita contigisse tempore *Josue*, ut alia præterea per miraculum mutatio non acciderit: vicissitudo dierum atque noctium per totum terrarum orbem nunc non amplius eadem est, quæ absque miraculo isto fuisset, nec eadem sunt in universum omnia, quæ a vicissitudine dierum atque noctium, itemque a primo die longiori per universum terrarum orbem pendunt. Plurimum autem fallitur, (*Cosmologia contracta.*)

D d d d

qui

qui sibi persuadet, ex hoc miraculo non alia consequi, quam quod, quæ nunc sunt, aliquot horis postposita fuerint. Neque enim interea temporis, quo nox in diem conversa, quieverunt homines, nec otiosa fuit natura. Quamobrem ubivis terrarum vi hujus miraculi in omni rerum corporearum genere contigerunt, quæ alias non contigissent, cumque ista continuo influant in sequentia, virtute hujus miraculi alia prorsus rerum facies in Tellure emerit, quam alias per universum tempus subsequens apparuisset. Quodsi nexum inter corpora mundi tota haec & ex iis emergentia systemata intime perspecta haberemus; hinc porro censleret, quænam in systemate nostro planetario & porro in ceteris mutari debuissent, ut motus diurnus vertiginis per aliquod horarum spatium cessaret, nisi supponas, ad impediendam causæ hujus actionem in globum terraqueum, per omne istud intervallum, quo sol stetit, athenem miraculosam fuisse continuatam.

§. 532.

Qualis præcise
sit miraculi
effectus.

Si quid per miraculum in mundo adspectabili mutetur, non alia mutatio in coexistentibus accidit, nec alia diversitas in futuram rerum seriem introducitur, quam quæ posita ista mutatione miraculosa in ceteris per naturam & essentiam corporum consequi debeat. Etenim si quid per miraculum in mundo adspectabili mutatur, aliquid existit, quod per naturam rerum existere non poterat (§. 523). Quare si talis mutatio accidere non possit, nisi simul quedam ob nexum coexistentium seu mutuam eorundem a se invicem dependentiam (§. 84.) alia mutentur; illa quoque mutari debere per se patet.

Jam si miraculum accidit, effectus quidam miraculosus in causam abit naturalem, hoc est, essentiae ac naturæ corporeæ conformiter seu per regulas motus ordinarias effectum suum producitur (§. 509. 511.). Produci adeo effectum, alias in mundo non feciturum (§. 531.) naturaliter & ita porro per omne subsequens tempus (§. 54.). Quamobrem cum in posterum effectus omnes a miraculo pendentes naturaliter producantur, in futuram rerum seriem utique alia diversitas introduci nequit, quam quæ posita ista mutatione miraculosa in ceteris per naturam & essentiam corporum consequi debet (§. 509.).

Prius

Prius Ricciolus agnovit, quemadmodum ex iis apparet, quæ de miraculo solis tempore passionis dominicæ eclipsati in Almagesto Vet. & Novo lib. 5. c. 18. §. 59. f. 360. 361. annotavit. Sumit eclipsin solis factam esse modo ordinario, Luna scilicet inter solem atque Terram diametraliter interposita, quæ cum soli opponeretur motu miraculoso (§. 528.) ex oppositione in conjunctionem translata. Quoniam vero eclipsis ista universalis fuit cum mora trium horarum, testibus Evangelistis; ideo expendit, quoniam præterea per miraculum fieri debuerint, ut Luna inter Solem atque Tellurem interposita eclipsin istiusmodi causaretur, qualis ab Evangelistis describitur. Decem igitur recenset miracula, quæ tunc temporis simul facta, ut sol tempore plenilunii eclipsin pati posset. Quod vero ad alterum spectat, exemplum paulo ante (not. §. 531) allatum ostendit, quales sint mutationes, quas futuris temporibus miraculum post se trahit & quæ futuram mundi faciem diversimodè reddunt ab ea, quam alias habiturus fuisset.

§. 533.

Si miraculum sequentem mundi partem variare non debet, per aliud miraculum restituendi sunt effectus, qui naturaliter in iis rebus consecuti fuissent, quæ vi miraculi sunt immutata. Pone enim per miraculum in A patratum mutationes quasdam accidisse in B, C, D &c. Quodsi jam per aliud miraculum restituantur mutationes, quæ in B, C, D &c. tempore dato extinxisent, si miraculum factum non fuisset in A; perinde omnino erit respectu partis sequentis seriei, ac si miraculum in A nullem factum fuisset.

Miraculum
quando non
influat in fu-
tura.

Defendit D. Thomas 3. part. quæst. 44. art. 2. tempore Christi patientis deliquium solis contigisse per interpositionem diametralem Lunæ inter Solem & Terram, atque adeo inter facta miraculosa refert conjunctionem Lunæ cum Sole per trium horarum intervallum & finita eclipsi subsecutam oppositionem cum Sole, seu Lunæ versus orientem ad oppositionem cum Sole reversionem. Quando deliquium Solis contingebat, plenilunium erat, consequenter Luna Soli opposita. Motu igitur miraculoso ad conjunctionem rapta & per miraculum integris tribus horis in eodem situ detenta fuit. Atque ita Sol deliquium passus est per miraculum. Quodsi luna hoc situ perstitisset, ad hodiernum usque diem plenilunia & novilunia alio

D d d d 2

tempore

tempore contingerent, quam alias contigissent, si motus Lunæ per miraculum minime mutatus fuisset, immo quæ a plenilunio & novilunio pendent, veluti apud nos paschatis ac pendentium inde porro festorum mobilium celebratio non eodem modo jam sese haberent, qualia fuissent, si miraculum nen contigisset. Enimvero quomodo Deus evitavit hanc mutationem in serie rerum futura ex mente *Thome & Cornelli* quoque a *Lapide* in Matth. 27, 45? Nonne per hoc, quod alio motu miraculoso tribus horis elapsis Lunam reduxit in eum locum, in quo dato momento haesisset, si nullum miraculum contigisset, hoc est, per miraculum restitutionis.

§. 534.

Miraculi illustratio.

Miraculum se habet ut motus indicis in horologio a causa extrinseca dependens. Ponamus in horologio indicem retorqueri per intervallum decem minutorum ab eo, quem obtinet, situ. Non repugnat structura horologii, ut index per istiusmodi intervallum retroagatur, adeoque motus iste possibilis est: ex structura tamen horologii vi elateris aut ponderis, qua rotæ ad motum impelluntur, minime consequitur; sed causa externa opus est ab horologio prorsus distincta. Quodsi index actu retroagatur, v. gr. minutarius per intervallum decem minutorum, simul retroagetur per conveniens sibi intervallum index horarius, aliaque quædam mutationes intra horologium accident, jam non commemorandæ. Quamprimum vero index retroactus fuerit, toto futuro tempore momentis singulis alius erit utriusque indicis situs, quam alias futurus fuisset, si index minutarius non fuisset retroactus, ut alias quasdam mutationes interiores taceamus, quæ inde pendent, propterea quod non ab omnibus intelligantur. Denique si futuro tempore non amplius diverfi, sed iidem indicum situs obtinere debent momentis singulis, quos nullo motu violento facto habuissent, index minutarius ad eum locum reduci debet, quo momento isto constitutus fuisset, nisi vi externa e situ suo dimotus fuisset. Similiter in se non repugnat miraculum essentia illius corporis, in quo contingit (§. 517.), etsi causæ naturales deficient actum ejus determinantes (§. 518.), ut adeo ab ente quodam a mundo diverso, seu extra seriem rerum materialium existente (§. 48.), produci debeat (§. 524.).

(§. 524.). Quodsi miraculum in mundo contingit, sequens mundi pars non amplius erit eadem, quæ alias futura erat (§. 531.), sed tam in coexistentibus mutatio accidet, quam in futuram rerum seriem introduceretur diversitas, quæ posita miraculosa in ceteris mutatione per naturam & essentiam corporum consequi debet (§. 532.). Quodsi denique miraculum sequentem mundi partem variare non debet, per aliud miraculum restituendi sunt effectus, qui naturaliter in his rebus consecuti fuissent, quæ vi miraculi sunt immutati (§. 533.). Relege §. 117.

Motus indicis a structura & vi, qua animatur horologium, pendent respondens mutationibus naturalibus; motus autem ejusdem indicis violentus, qui a causa quadam externa pendet, miraculo.

CAPUT II. DE PERFECTIONE MUNDI.

§. 535.

Perfectio corporis organici consistit in eo, quod ex ratione quadam generali derivari possint rationes singularum partium sufficientes, cur tales potius sint quam aliæ & hoc potius quam alio modo inter se jungantur (§. 505. Ont. 274. Cusin. 56. Ont.). Actio illa peculiaris, ad quam corpus organicum aptum est, est ratio illius generalis.

Perfectio corporis organici.

E. gr. Oculi aptus est per structuram suam ad lumen a corporibus in eum illapsum ita refringendum, ut ejus imago in fundo clare ac distincte delineetur. Habemus adeo rationem generalem, unde ratio reddi potest singularum partium, cur sc. tales sint & cur tali modo inter se jungantur: Atque inde oculi perfectio colligitur.

§. 536.

Perfectio corporis organici in eo consistit, quod per rationem generalem intelligantur determinationes omnes essentielles (§. 535. 140.).

Generalis perfectionis corporum notio ex anteriori derivata.

§. 537.

Perfectio corporis cujuscunque in eo consistit, quod ex ratione quadam generali derivari possint speciales, cur tales potius sint

Perfectio corporis in genere in quo consistat.

Ddd dd 3

sint quam alie ipsius partes & cur tali potius, quam alio modo inter se jungantur (§. 140. Cosm. 163. Ont.).

§. 538.

Perfectio mixti in quo consistat.

Perfectio mixti consistit in eo, quod per usum quandam mixti ratio reddi possit, cur talia mixtionem ingredientur miscibilia, cur particule miscibilium hoc modo jungantur, & cur similiter corpuscula mixti tali modo potius, quam alio jungantur (§. 255. 253. 537.).

Exempli loco esse potest pulvis pyrius. Usus ejus est in impellendis globis aliisque effedibus producendis, qui a vi elastica proficisci possunt. Ex hoc usu reddenda est ratio, cur ex sulphure, nitro atque carbonibus componendus sit pulvis pyrius, cur ea esse debeat miscibilium ratio, cur hoc potius quam alio modo mixtio & preparatio pulveris pyrii fieri debeat. Atque hinc demum intelligitur, qualis esse debeat pulvis pyrius, ut perfectus dici possit. Patet vero, non ante de perfectione rerum statui quid firmiter posse, quam usus rerum seu fines eorundem fuerint pers. ecti.

§. 539.

Modus cognoscendi perfectiones corporum.

Si quis inquireat, quales sint corporum partes & quomodo inter se jungantur: quinam sint corporum usus seu fines & quinam sint partium singularum usus seu fines: & quomodo usus particulares singularum partium ex generali corporis totius consequantur, curque tales potius esse debeant partes quam alie & hoc potius modo, quam alio inter se jungi; is perfectionem corporis agnoscit (§. 537.).

Per se autem patet, propositionem presentem non modo de corporibus naturalibus, verum etiam de artificialibus accipiendam esse. Ita patet per eandem perfectionem telescopii astronomici immutecere, ubi primo intelligimus, quot & quales lentes ad telescopium istiusmodi requirantur, quoniam earum ad se invicem esse ratio debeat, quo intervallo a se invicem distent opus sit, quinam sit usus totius telescopii, & quid ad eum conferant lentes telescopicæ singulæ, atque hinc tandem colligitur, qualia singuli ista sese habere debeant, ut telescopium usum præter, quem præstare debet.

§. 540.

Perfectio mundi.

Perfectio mundi consistit in eo, quod rationes particulares simultaneorum, & successivorum tandem in aliquam generalem resolvantur (§. 48. 55. 10.).

In

In Theologia autem naturali demum clarissime constabit, quænam sit illa ratio ultima, unde speciales tanquam ex fonte profluunt. Atque tum a priori constabit, dari in mundo perfectionem.

§. 541.

Nemo mortalium perfectionem totius universi comprehendere atque distincte explicare valet (§. 540. 246sq. 176. 182. 195. 198 sq. Cosm. 851. Ont. 202. Cosm.). Ergo perfectionem totius universi comprehensurus atque distincte explicaturus & singula, quæ unquam extiterunt, nunc existunt olimque exitura sunt, corpora corundemque mutationes successivas, immo singula elementa singulisque convenientem mutationum seriem una cum omnibus coexistentiarum & successionum rationibus distincte cognoscere atque eas tandem ad rationem aliquam generalem reducere debet. Patet autem per se, neminem mortaliū omnem istam rerum varietatem multo minus omnes, a quibus varietas ista oritur, rationes comprehendere posse, tantum abest, ut omnes istas rationes ad rationem generalem reducere quicquam valeat.

Impossibilitas
comprehen-
dendi perfecti-
onem universi.

Ut infinita rerum in universo varietas animo observetur, ex Astronomia recolenda sunt, quæ ibidem de vero mundi systemate traduntur; ex Physica autem repetenda, quæ de rebus minutissimis per observationes microscopicas innouere. Utile præterea est perpendere, quantam vi motuum microscopiorum seu in rebus minutissimis per microscopia observabilium divisionem tempus admittat.

§. 542.

Si quid in re in se spectata imperfectionem arguit; id ideo non arguit in ea imperfectionem, quatenus ad aliam quandam refertur. Etenim si res quædam duplici modo spectari debet, tum in se, tum in relatione ad alias; plures sunt rationes generales, per quas intelligitur, cur ea, quæ rei insunt, talia potius sint, quam alia, cum alia rei in se spectatæ, alia eidem ad alias relatæ conveniant, consequenter in eadem re plures sunt rationes determinantes perfectionis (§. 506 Ontol.), adeoque rei illius perfectio composita est (§. 507. Ontol.). Quoniam itaque in ea locum habere potest exceptio (§. 511. Ontol.), consequenter quædam regulæ (§. 510. Ontol.), adeoque rationi determinantium contraria determinatio admittenda (§. 475. Ontol.); res in se

Imperfectio
absoluta nam
sit respectiva.

se spectata imperfectione aliqua laborat (§ 504. *Ontol.*). Quoniam tamen exceptio non imperfectionem parit, sed tantum admittitur, ubi res non solum in se, verum etiam in relatione ad aliam spectari debet, quemadmodum ex demonstratis intelligitur; quod in re in se spectata imperfectionem arguit, non ideo in ea imperfectionem arguit, quatenus ad aliam quandam refertur.

E. gr. Oculus in se consideratus est organicum corpus, imaginibus objectorum clare ac distincte delineandis aptum. Si vero refertur ad corpus, pars quædam corporis humani est. Si idem refertur ad mentem corpori organico junctam, organum sensorium est humanum. Plures adeo sunt rationum fontes, unde determinanda est oculi humani perfectio. Quomobrem etsi tibi oculus aliqua imperfectione laborare videatur, quatenus in se spectatur tanquam corpus organicum; non tamen ideo aliqua in eum imperfectio cadit, quatenus est pars corporis atque organum sensorium hominis.

§. 543.

Imperfectio-
nis apparen-
tis & veræ dif-
ferentia.

Imperfectio apparens dicitur, quæ rei in se spectatæ convenit, talis tamen non est, si res ad aliam quandam refertur, seu quæ in defectu apparente consistit. *Imperfectio vera* est, quæ rei tam in se spectatæ, quam ad alias relatæ convenit, seu quæ in defectu vero consistit.

Ita imperfectio apparens oculi est, quod non tanta idem polleat acie, qualis in spectandis minutissimis objectis per microscopiaprehenditur. Etenim si oculum consideramus tanquam organum sensorium corporis humani; istam aciem homini parum convenire, immo inutilem esse ac in plurimis casibus nocuamprehendimus: id quod cum multiplici documento probari posset, hic quidem expendisse sufficit, quod oculus microscopio armatus exiguum admodum spatium uno obtutu comprehendat, nudus vero amplum. Cogitandum nimirum est, quantum conducat homini, ut spatium satis amplum uno obrutu comprehendat, sive latitudinem, sive longitudinem spectes. Verâ in horologio spectatur imperfectio, si index non exacte horam indicat, quam indicare debet.

§. 544.

Fons perfe-
ctionum ap-
parentium.

Imperfectiones apparentes ex exceptionibus oriuntur (§. 543. *Cosm.* 513. *Ont.*).

§. 545.

§. 545.

Dantur regulæ perfectionis mundi (§. 509. Ont. 48. Cosm.). Regulæ perfe-

§. 546.

Regulæ perfectionis mundi nituntur ratione generali, in quam rationes particulares resolvuntur, cur tales potius sint res successivæ & simultaneæ, quam aliæ, cur & hoc potius ordine sese invicem excipiant, quam alio (§. 475. Ont. 540. Cosm.). Fundamen-
tum regula-
rum perfe-
ctionis mun-
di.

In theologia naturali rationem istam generalem ex attributis divinis tanquam primis possibilibus deducemus. Ex ea igitur non modo regulas quasdam perfectionis mundi a priori eruemus; verum etiam regulæ ex observationibus erutæ demonstrari possunt.

§. 547.

Imperfectioes apparentes in parte non tollunt perfectionem in toto (§. 544. 543. Cosm. 512. Ont. 540. Cosm. 518. Ontol.). sed cum majore perfectione totius coherant (§. 506. Ont.). Imperfectio
partis consi-
stens cum per-
fectione to-
tius.

Vid. not. §. 543. 544.

§. 548.

Quoties itaque imperfectio in parte cum majore perfectione totius coheret; imperfectio in parte admittenda, ut prodeat major perfectio in toto (§. 547.). Imperfectio
in parte quan-
do admitten-
da.

§. 549.

Mundus perfectior est, in quo exceptiones sunt pauciores, quam in quo pluribus locus est (§. 522. Ont.). Mundus qui-
nem perfecti-
or altero.

Monstra cum rarissima sint, si ea ad viventium numerum referas, quæ regularem habent structuram; raritas eorum perfectioni mundi patrociniatur. Quod si plura nascerentur monstra, quam viventia structuræ regularis, vel numerus illorum saltem æqualis esset horum numero; illud imperfectionem in mundo argueret: quamvis tum quoque iudicium suspendere, quam præcipitare præstaret, quod nonnisi exiguam partem universi contueri nobis datur.

§. 550.

Ex perfectione partis non potest iudicium ferri de perfectione totius, adeoque nec ex perfectione partis unius mundi de perfectione totius mundi (§. 548.). Cur ex perfe-
ctione partis
non liceat ju-
dicare de per-
fectione to-
tius.

Quicquid homines profani contra imperfectionem mundi obijciunt, ut religionis tam naturalis, quam revelatæ fundamenta labefacerent; ex hoc fonte manat. Nemo non agnoscit absurdum esse, si quis, qui leo-
(Cosmologia contracta.) Eec ee nem

nem nunquam vidisset, ex solo ungue ipsi oblato de perfectione hujus animalis iudicium ferre vellet, vel ex squama unica piscis de perfectione totius sibi non visi iudicium deproperaret. Qui ex Astronomia novit, quam exigua moles sit globus, quem incolimus, terraqueus, cujus ne minimam quidem partem agnoscimus; is satis intelliget, maiorem esse absurditatem illorum, qui ex iis, quæ in globo terraqueo observant, de perfectione totius mundi iudicium ferre audeant, quam quæ foret hominis ex squama tunica piscis de toto pisce sibi prorsus ignoto iudicantis.

§. 551.

Aliud mundi
perfectionis
requisitum.
Varietas re-
rum auget
perfectionem.

Mundus, in quo plura observabilia sunt, altero perfectior est, in quo pauciora observabilia sunt (§. 520. Ont.).

§. 552.

Mundus perfectior est, in quo major est rerum consentientium varietas (§. 551.).

§. 553.

Imperfectio in
parte ex quo
sente manet.

Ex iisdem regulis imperfectio apparet in parte subinde resultat, ex quibus perfectio in toto manat (§. 544. Cosm. 510. Ont. 545. Cosm.).

Exempli loco esse potest oculus, in quo ad imperfectiones apparentes refertur, quod subinde res aliter repræsentet, quam revera sunt, quemadmodum perfectionis est, quod res regulariter tales repræsentet, quales sunt. E. gr. Dum corpus in vicinia non nimis tarde movetur, motum ejus videmus: ast si movetur & e longinquo spectatur, quiescere videtur. Similiter globi figuram in proportionata distantia videmus, qualis est; ast e longinquo spectatus globus instar circuli apparet. Qui Opticam didicere, illis perspectum est, eandem esse legem, per quam explicatur, cur oculo corpus, quod movetur, in vicinia moveri, in distantia autem remota quiescere videatur. Similiter eadem lex optica est, per quam explicatur, cur sphaera in vicinia videatur, qualis est, e longinquo autem circulus esse appareat.

CAPUT III. DE ORDINE MUNDI ATQUE NATURÆ

§. 554.

Ordo mundi
perfecti.

In mundo perfecto datur ordo (§. 48. 10. 540. Cosm. 215. 217. 472. Ont.) & ordo iste a perfectione pendet (§. 851. Ont.).

§. 555.

§. 555.

Cognita ergo mundi perfectione ejus etiam ordo cognoscitur (§. 554. *Cosm.* 851. 56. *Ont.*). Cognitio ordinis quomodo a cognitione mundi pendet.

Via tamen hæc nimis difficilis est ad ordinis mundi cognitionem perveniendi. Quamobrem in hunc ordinem porro inquirendum, ut in aliam incidamus, quæ magis plana sit, nec tot difficultatibus obsepta.

§. 556.

Ordo mundi suas habet regulas, per quas uniuscujusque corporum coëxistentium vel successivorum locus determinatur (§. 478. *Ontol.*). Regulæ ordinis mundi.

E. gr. In mundo adspectabili coëxistunt Sol, Mercurius, Venus, Tellus cum Luna, Mars, Jupiter cum quatuor Satellitibus sive Lunis & Saturnus cum quinque Satellitibus sive Lunis. Ex Astronomia constat, singula hæc corpora diversas a Sole distantias habere. *Keplerus* in *Myserio cosmographico* regulas ordinis dare intendit ordinem in systemate solari evicturus; sed magis ingeniosa, quam veritati consentanea dedit.

§. 557.

Per Ordinem naturæ intelligimus eum, quem natura in agendo observat. Ordo naturæ quid dicatur.

Hinc dicimus fieri juxta naturæ ordinem, quod naturaliter contingere solet. E. gr. quando tempore plenilunii luna, vel novilunii tempore sol eclipsatur; eclipses juxta naturæ ordinem contigisse affirmamus.

§. 558.

Ordo naturæ is est, qui in modificationibus virium motricium deprehenditur (§. 557. 507.). Qualis sit.

Corpora non agunt in se invicem nisi per motum (§. 128. *Cosm.* & §. 713. *Ont.*); motus autem a vi motrice est (§. 142.), consequenter a natura (§. 145.). Vis activa, cum in ea non spectetur nisi celeritas (§. 154.), aliam mutationem subire nequit, nisi quatenus celeritas variatur, consequenter ipsa modificatur (§. 153.).

§. 559.

Regulæ motus sunt illæ, quibus ordo naturæ continetur (§. 478. *Ontol.* 558. 302. *Cosm.*). Regulæ ordinis naturæ.

§. 560.

Datur ordo naturæ in mundo adspectabili (§. 386. 399. 392. 399. 153. 164. 325. 302. 559.). Ordo naturæ evictus.

Ecc ee 2

§. 561.

Contingentia
ordinis natu-
re.

§. 561.
Ordo naturæ contingens est, seu a necessitate absoluta liber (§. 559. 527. Cosm. 294. Ont.).

Nunc demum patet via per ordinem naturæ ad existentiam Dei perveniendi, postquam exploratum est, dari ordinem naturæ (§. 560.) & hunc esse contingentem (§. præf.). Non vero adeo facile est probare contingentiam ordinis naturæ: id quod ipsis oculis manifestum evadet, ubi demonstrationem per continuam resolutionem ad principia prima reducere volueris, quæ sine probatione sumere licet, quemadmodum in Logica (§. 962.) præcepimus.

§. 562.

Perfectio or-
dinis naturæ.

Ordo naturæ in mundo adspectabili perfectus est. Etenim naturæ ordo regulis motus continetur (§. 559.). Quare cum regulæ motus deduci possint ex principiis quibusdam generalibus, quas leges motus dicimus (§. 303.), eaque principia in principium rationis sufficientis tandem resolvantur, quemadmodum ex supra allatis (cap. 1. sect. 3. passim) probationibus apparet, si legitime resolvantur (§. 962. Log.); regulæ motus generalem quandam rationem admittunt, per quam intelligitur, cur tales potius sint, quam aliæ. E. (§. 505. Ont.).

§. 563.

Ordinis mun-
di & naturæ
differentia.

Ordo naturæ cum ordine mundi non idem est, sed ad eum se habet per modum partis ad totum. De ordine naturæ, quid ille respiciat, vide §. 558. 557. 128. de ordine vero mundi lege §. 556.

§. 564.

Ordinis & per-
fectionis
mundi diffe-
rentia.

Ordo mundi a perfectione ejusdem differt (§. 556. 540. Cosm. 183. Ont.).

§. 565.

Secundum &
contra naturæ
ordinem quid
fieri dicatur.

Contra naturæ ordinem fieri dicitur, quod ordini naturæ contrariatur, seu eodem salvo fieri nequit, quemadmodum ex adverso secundum naturæ ordinem fieri dicitur, quod ordini naturæ convenit, seu eodem stante fieri debet. Illa etiam naturæ ordinem turbare dicuntur.

§. 566.

Quænam se-
cundum &

Quæ in mundo adspectabili naturaliter fiunt, secundum naturæ

naturæ ordinem sunt (§. 511. 559. 565.): *miracula vero contra naturæ ordinem sunt* (§. 514. 559. 565.).

contra naturæ
ordinem fiant.

§. 567.

Cursus naturæ appellatur eventuum essentiis corporum atque naturæ eorundem conformis consecutio. *Cursus naturæ definitio.*

Cursus naturæ obtineret, etiam si nullus esset naturæ ordo. Nimirum quando quid evenire solet ex causis naturalibus, quas vel adesse observamus, vel præsumimus; id alias itidem per easdem causas contingere colligimus (§. 189. *Ontol.*), atque id naturaliter fieri dicimus. Quatenus igitur eadem ex iisdem causis naturalibus eveniunt; eatenus cursum naturæ concipimus & secundum eum quid contingere affirmamus.

§. 568.

Naturale secundum naturæ cursum (§. 509.); *miraculum contra cursum naturæ contingit* (§. 510.).

Quid cursui
naturæ con-
forme, quid
contrarium.
Ordinis natu-
ræ ab elemen-
tis dependen-
tia.

§. 569.

Si alius esse debet ordo naturæ, elementa alia existere debent (§. 558. *Cosm.* 183. *Ont.* 180. 182. 191. *Cosm.* 189. *Ont.*).

§. 570.

Si alius existere deberet mundus, elementa alia existere deberent (§. 119. 194.).

Mundi ab ele-
mentis depen-
dentia.

§. 571.

Eadem elementa alio modo coexistere nequeunt (§. 202. *Cosm.* 56. *Ont.*).

An elementa
rerum mate-
rialium alio
coexistere
modo possint.
Quid miracu-
lum in ele-
mentis im-
portet.

§. 572.

Si miraculum in corpore quodam patrat, status internus elementorum mutari debet. Foret nimirum aliquid in composito, cujus nulla ratio dari potest ex elementis, consequenter in elementis non amplius continebuntur rationes ultimæ eorum, quæ in rebus materialibus deprehenduntur: quod absurdum (§. 191.).

§. 573.

Si miraculum in corpore quodam contingit, plura miracula in elementis contingunt. Etenim si miraculum in corpore quodam patrat, status internus elementorum, quorum sc. aggregatum corpus istud est (§. 176. 182.), mutari debet. Enimvero quovis momento status unius elementi differt a statu elementi alterius

Multiplix
miraculi in
uno.

cujuscunque (§. 201.). Quare in singulis istis elementis, quorum aggregatum est corpus miraculo obnoxium, status internus peculiari ratione mutari debet. Tot igitur habemus miracula, quot status mutationes miraculosæ in elementis contingere debent, consequenter si miraculum in corpore quodam contingit, plura miracula in elementis contingere debent.

§. 574.

Effectus miraculi in elemento.

Si mutatio aliqua per miraculum in elemento contingit, mutationes in eodem posthac aliæ sunt, quam futuræ alias fuissent miraculo nullo facto (§. 197. Cosm.). Quare si ponamus per miraculum fieri, ut præsens status alius sit, quam qui ex antecedente naturaliter secutus fuisset; non amplius eadem ponetur ratio status sequentis, sed diversa (§. 118. Ont.).

§. 575.

Modus impediendi, ne effectus miraculi per futura secula serpat.

Quodsi effectus miraculi per futura secula continuari minime debet, in elementis aliquo tempore elapso determinationes intrinsecæ a miraculo pendentes mutandæ sunt in eas, quæ non facto miraculo isto tempore extitissent (§. 707. 290. Ont. 197. Cosm. 118. Ont.).

§. 576.

Idem ulterius explicatur.

Si a miraculo in elementis fit restitutio status naturalis; in mundo nulla amplius contingit mutatio a miraculo pendens (§. 191. Cosm. 118. Ontol. 575. Cosm.).

FINIS COSMOLOGIÆ.



121 15-215-21

